

A vibrant tropical beach scene at sunset. A large, thick palm tree trunk leans from the left side of the frame over the water. The sky is filled with colorful clouds in shades of orange, yellow, and blue, with the sun setting on the horizon. The water is a deep blue-green, and white waves are crashing against dark rocks in the foreground.

New Testament

Tanna, North Language

North, Tanna - Bible - New Testament

Matiu	3	
Mak	116	
Luk	184	
Jon	304	
Wək Min	394	
Rom	502	
1 Korin	553	
2 Korin	598	
Kalesia	628	
Efesas	648	
Filipae	664	
Kolosi	675	
1 Tesalonaeka	688	
2 Tesalonaeka	698	
1 Timoti	704	
2 Timoti	719	
Taetas	728	
Filimon	735	
Hiprus	738	
Jemes	776	
1 Pita	789	
2 Pita	804	
1 Jon	812	
2 Jon	823	
3 Jon	825	
Jut	827	
Nol Əpən	831	

North, Tanna - Bible - New Testament

Matiu

Matiu 1

Tipi Iesu Kristo rat min

(Luk 3:23-38)

- ¹Inu nãrgi tipi Iesu Kristo rat min, kit in Kig Tefit, kãn kit min in Epraham.
- ²Epraham in tata rãha Aisak, kãn Aisak in tata rãha Jekop, kãn Jekop in tata rãha Juta ne pian min,
- ³kãn Juta in tata rãha Peres ne Sera, rãhalau mama u Temar, kãn Peres in tata rãha Hesron, kãn Hesron in tata rãha Ram,
- ⁴kãn Ram in tata rãha Aminatap, kãn Aminatap in tata rãha Nason, kãn Nason in tata rãha Salmon,
- ⁵kãn Salmon in tata rãha Poas u rãhan mama Rehap, kãn Poas in tata rãha Opet u rãhan mama u Rut, kãn Opet in tata rãha Jese,
- ⁶kãn Jese in tata rãha Kig Tefit. Kãn Kig Tefit in tata rãha Solomon u rãhan mama in pãtan rãha Uria aupãn,
- ⁷kãn Solomon in tata rãha Rehopoam, kãn Rehopoam in tata rãha Apia, kãn Apia in tata rãha Asa,
- ⁸kãn Asa in tata rãha Jehosafat, kãn Jehosafat in tata rãha Jehoram, kãn Jehoram in pipi rat rãha Usia,
- ⁹kãn Usia in tata rãha Jotam, kãn Jotam in tata rãha Ahas, kãn Ahas in tata rãha Hesehia,
- ¹⁰kãn Hesehia in tata rãha Manase, kãn Manase in tata rãha Amon, kãn Amon in tata rãha Josaea,

¹¹kən Josaea in tata rəha Jekonaea ne pian min, kən uarisig lan, tikimir min rəha noanol min rəha Isrel kəmotəmik ilat motuwın Papilon məmə ilat okotuwa slef min rəhalat.

¹²Kən inu nərgi pipi min itəm təmətuoun e nian noanol min rəha Isrel kəmotuwın Papilon. Jekonaea in tata rəha Sealtiel, kən Sealtiel in pipi rəha Serupapel,

¹³kən Serupapel in tata rəha Apiut, kən Apiut in tata rəha Eliakim, kən Eliakim in tata rəha Asor,

¹⁴kən Asor in tata rəha Satok, kən Satok in tata rəha Akim, kən Akim in tata rəha Eliut,

¹⁵kən Eliut, in tata rəha Eleasar, kən Eleasar in tata rəha Matan, kən Matan in tata rəha Jekop,

¹⁶kən Jekop in tata rəha Josep u iərman rəha Meri. Kən Meri təmiləs Iesu, kən kətaun-in məmə Kristo itəm Uhgın təmən məmə otahl-ipa.

¹⁷Təmətuoun e Epraham mətoarus-pən Kig Tefit, pipi rat min əm u neen kəməte rəkis nərgilat, ilat fotin. Kən təmətuoun min e Kig Tefit mətoarus-pən noanol min rəha Isrel kəmotuwın Papilon, pipi rat min ilat rafin fotin. Kən təmətuoun min e noanol min rəha Isrel kəmotuwın Papilon mətoarus-pən Kristo itəm Uhgın təmən məmə otahl-ipa, pipi rat min ilat rafin fotin.

Naiirən rəha Iesu Kristo

(Luk 2:1-7)

¹⁸Inu namnusən rəha naiirən rəha Iesu Kristo. Mama rəha Iesu, nərgin u Meri, kinən rəkis məmə okos rəhan kətim kan məmə otətəu-pən suah kit, nərgin u Josep. Məto e nian kəsueamən əh muatig kitəh, kən Josep təsuwınən əh mehm, məto Narmin Rəha Uhgın tinol məmə Meri tinəpək-əpək rəkis.

¹⁹Kən rəhan iaguihl Josep in etəm ətuatip, kən tatətəlig-in məmə otapəs Meri, məto in təsolkeikeən məmə otol Meri taulis, kən nikin təht məmə otəsən-iarəpən kəm netənim.

²⁰Məto nian nikin təmatəht məmə in otol nətəligən əh, kən nagelo kit rəha İərəmərə təmuwa ron e napılaiirən mən-ipən kəm in məmə, “Josep, mipi Tefit rat. Onəkəsəginən məmə onakit Meri məmə in rəham pətan, məto-inu suakəku əh tətətig lan, in təmisi-pən əm o Narmin Rəha Uhgın.

²¹Kən in otıləs nətın kit iərman, kən onəkaun-in nərgin məmə İesu məto-inu in otosmegəh rəhan min netəmim e nolən tərət min rəhalat.”

²²Natimnat min rafın əh kəmotuwa kol əm nıpahrienən e nəghatən rəha İərəmərə itəm rəhan kit ien təmən aıpən ikin məmə,

²³“Pətan əkəku kit itəm iərman təsuwinən əh ron, otəpəs məwig, kən panıləs nətın kit iərman, kən okaun-in nərgin məmə Emanuel,” inu nıpətın təmə, “Uhgın tətətig kitat min.”

²⁴Kən nian Josep təmaiir, kən təmətəu-pən əm nəghatən rəha nagelo rəha İərəmərə. Kən təmuwin mit Meri muwa e rəhan latuənu məmə rəhan pətan,

²⁵məto in təməsuwinən əh mehm matuwin matuwin mətoarus-pən Meri tiləs nətın iərman. Kən Josep təmaun-in nərgin məmə İesu.

Matıu 2

Netəm-iasol kəmotairahgin İesu

¹İesu təmaiir əpəh nıtən rəha Jutia e taon Petlehem e nian Kig Herot Asol in təmatərəmərə lan. Kən uarisig ikin, netəm-iasol min neen kəmotisi-par isəu motuwa Jerusalem. Kotenatig wir e nənən nıpəti məhau min. Kən motuwa motətapəh məmə,

²“?Suakəku u in hiə, itəm in təmaiir məmə in kig rəha netəm İsrəl? Emotehm rəhan məhau təmər əpəh par, kən ekoatuwa məmə ekotos-ipən nisiiən kəm in.”

³Nian Kig Herot Asol təməto nəghatən əh, ilat netəm Jerusalem nıkilat rafın təmərat.

⁴Kən təmargəfimin pris asol min ne iəgətun min rəha Lou rəha nəfakən rəha netəm İsrəl, kən matətapəh olat məmə, “?Kristo itəm Uhgın tinəmən rəkis məmə otahl-ipa, in otaiir hiə?”

⁵Kən kəmotən-ipən kəm in məmə, “In otaiir əpəh taon Petlehem e nitən rəha Jutia. Məto-inu ien kit rəha Uhgın aupən, təməte tol min-nulan məmə,

⁶Ik Petlehem əpəh e nitən Juta, okol kəsənən məmə ik nat əpnapın e netəm-iasol min əpəh ikin Juta, məto-inu etəm-iasol kit otisi-pən lam, kən in otatehm wir rəhak min netəm Isrel tahmen-pən e etəm tatehm wir rəhan sipsip min.”

⁷Kən Kig Herot Asol təmaun-in netəm kotenatig wir e nənən nipəti məhau min kotuwa tuəfimin anion ilat, matətapəh olat məmə məhau əh təmər ətuatip e nian naka, kən kəmotən-ipən nian rəha məhau kəm in.

⁸Kən in təmən-ipən kəm ilat məmə, “Otuwin Petlehem motegəs-in wir suakəku. Nian onəkotehm un, kən nakotos nəghatən lan motuwa məmə io min ekuwin mos-ipən nisaiiən kəm in.”

⁹⁻¹⁰Nian kəmotəto nəghatən əh, kəmotiet motuwin, kən motehm məhau ilouin itəm kəmotehm əpəh par. Nian kəmotehm min məhau əh, nikilat təmagien təmagien. Kən məhau un təmaupən-in ilat muwin matətul ətuatip əh suakəku ilouin tətapıl ikin.

¹¹Kən kəmotuwin əh imə, motehm suakəku ilau rəhan mama Meri. Kən kəmotisin nulilat moatos-ipən nisaiiən kəm suakəku əh. Kən kəmotielig nautə e rəhalat kətim min itəm nəmtilat tiəkis, moatos-ipən kəm in. Kəmoatos-ipən iaen u kol tatipit-ipit, ne nat kit min itəm nəmiəwin təwir nian katuwan e nigəm, nərgin u frankinsens, ne fomat itəm nəmiəwin təwir, nərgin u mir.

¹²Kən Uhgın təmən-iəhau ilat e napılaiirən məmə okəsotitəlig-pənən o Kig Herot Asol. Kən inəh ilat kəmotawilək-in Kig Herot motuwin-pən e suatip pisin moatuwin iməlat ikin.

Josep ne Meri kəmiales lesu məhlagim məhaluwin əpəh Ijip

¹³Nian netəm kotenatig wir min u kəmotiet rəkis minoatuwin, kən nagelo kit rəha Uhgın təmuwa miet-arəpa o Josep e napılaiirən matən-ipən kəm in məmə, “Ətul uəhai, miləs suakəku ilau rəhan mama, onəkəhlagim məhaluwin

əpəh Ijip. Kən onatəhlatig əh-ikin mətəarus-pən io əm ekən-ipinə min kəm ik məmə onəkəhalitəlig-pa min, mətə-inu otəsuwəhən, Kig Herot Asol team-in suakəku u məmə otohamnu.”

¹⁴Kən əmun e nian əh lapin, Josep təmətul miləs suakəku ilau rəhan mama məhlagim mətəhaluwın əpəh Ijip.

¹⁵Kən kəmətəhlatig e niməptən əh mətəarus-pən Kig Herot Asol otimis. Nat u tinuwa məmə otol nipahrienən e nəghatən itəm İərəmərə təmən rəkis aupən e nəghatən rəha ien kit tatən min-nulan məmə, “Emaun-in nətik iərman məmə otiet rəkis Ijip.”

Mopael min rəha Kig Herot Asol kəmotəhamnu nisualkələh nəman

¹⁶Kən e nian Kig Herot Asol təmītun məmə netəm kotenatig wir e məhau min kəməsotolən nəwian motawilək-in motagim, kən nikin təmāhmə pik agin. Kən in təmahl-ipən rəhan mopael min məmə okotuwin Petlehem ne ikin min rafin titəlau lan, məmə okoteam-in nisualkələh iərman min itəm rəhalat nup təsaprəkis-inən nup kəiu, kən okotohamnu ilat rafin. In təmītəpun nup kəiu nəhlan mətə-inu nikin təməht məmə nian ətuatip əh itəm netəm kotenatig kəmotəhm məhau lan.

¹⁷Natimnat min u təmol nəghatən u tuwa mol nipahrienən lan itəm ien Jeremaea tinəmən rəkis aupən ikin məmə,

¹⁸“Netəm Rama kəmotəto pətan kit tətəsək tətəsək mətə-inu tatəto tərat agin. Pətan əh in Rejel, in tətəsək o rəhan nisualkələh. Kən məsolkeikeən məmə suah kit otuwa məghat miləs-ipər min rəhan nətəligən mətə-inu rəhan min nisualkələh kinotimis rafin.”

Josep ne Meri ne suakəku kəməhaliet Ijip məhalitəlig-pən Nasaret

¹⁹Uarisig e nian Kig Herot Asol təmimis, mətə Josep ne Meri ne suakəku katəhlatig əh əpəh Ijip, kən nagelo kit rəha Uhgın təmuwa o Josep e napilairən kit matən-ipən kəm in məmə,

²⁰“Josep. Ətul mİLƏs suakəku ne rəhan mama kən məhalitəlig-pən e nəptən əh Isrel, məto-inu netəm min u kəmotolkeike məmə okotohamnu suakəku, ilat kinotimis rəkis.”

²¹Kən Josep tƏmƏtul mİLƏs suakəku əh ne rəhan mama, kən məhalitəlig-pən min e nəptən əh Isrel.

²²Məto nian Josep tƏmƏto məmə Akeleas tƏmos nəme rəhan tata Kig Herot Asol matərƏmƏrə e Jutia, kən in tƏmƏgin nitəlig-pənən Jutia. Kən Uhgın tƏmƏghat kƏm Josep e napılaiirən kit min məmə in otƏsuwınən Jutia, kən tƏmiet muwın ikin pisin e nitən asol Kalili.

²³Kən kƏməhaluwın mətəhlatig nitən əh Kalili e taon kit, nərgin u Nasaret, məmə otol nəghatən rəha ien min rəha Uhgın aupən otuwa mol nıpahrienən. İlat kəmotən-ipən məmə, “Okotən məmə in etəm Nasaret.”

Matiu 3

Jon Baptais tƏtamnus-iarƏp nəghatən rəha Uhgın

(Mak 1:1-8; Luk 3:1-9,15-17; Jon 1:19-28)

¹Nup min neen tınuwa minuwın rəkis, kən Jon Baptais tƏmiet-arƏpa, kən mətəmnus-iarƏp nəghatən rəha Uhgın əpƏh Jutia ikin taruən-aruən ikin,

²matən məmə, “Otəuhlin itəmat e rəhatəmat nolən rat min, kən motuwın o Uhgın, məto-inu, nian itəm Uhgın otərƏmƏrə e netəmim rafin tınatuwa iuəhkir.”

³Jon Baptais u, itəm Aesea, ien rəha Uhgın aupən, təmatəghat-in məmə, “Suah kit tƏtaun əpƏh ikin taruən-aruən ikin matən məmə, ‘İtəmat, otol əpen-əpenə rəha İərƏmƏrə, kən motol rəhan suatıp tətuatıp.’”

⁴Jon tatuwın e natımnat itəm kəmol e nıməme nat megəh kit katən məmə kamel, kən rəhan kətət kəmol e nuwigi kau, kən nigın nagwənən, tatun pitip ne nahui sukapak.

⁵Kən netəmim tƏpət kəmotisi-pən Jerusalem, ne ikin min nitən Jutia, ne ikin min iuəhkir o nəhau əh Jotan, kəmotuwa məmə okotəplan Jon.

⁶Kən kəmotən-iarəp rəhalat nolən rat mīn, kən in təmol baptais elat e nəhau əh Jotan.

⁷Məto nian Jon təməplan məmə Farisi mīn ne Satusi mīn tepət kəmotuwa məmə otol baptais elat, kən təmən-ipən kəm ilat məmə, “!Itəmat nəkotahmen e təgəluə mīn! Rəhatəmat nolən teko-eko. ?Nikitəmat təht məmə okəmə nəkoatol əm baptais u, kən onəkotagim tənin nalpīnən ne neməha rəha Uhgīn itəm otuwa? !Kəp!

⁸Otol natimnat itəm koatəgətun məmə nəmotəuhlin nətəligən rəhatəmat, motapəs pahrien nolən rat mīn, kən motuwīn o Uhgīn.

⁹“Kən sotən atipən kəm itəmat e nausitən məmə itəmat nəkotətuatip əm məto-inu itəmat noanol mīn rəha Epraham. !Kəp! Inu nat əpnarīn əm. Iatən kəm itəmat məmə nat əpnarīn kəpiel mīn əm, məto Uhgīn titun nəuhlinən ilat kotuwa noanol mīn rəha Epraham.

¹⁰Məto-inu roiu ne, Uhgīn tinətul matip rəkis məmə otahtil-pən nig əpəh e nəukətīn. Kən okəmə nig kit təsoe-inən noan itəm təwīr, kən in otahtil mərakin-pən e nigəm.

¹¹“Roiu, iatol baptais etəmat e nəhau məto-inu, itəmat nəmotəuhlin rəhatəmat nətəligən o nolən rat mīn rəhatəmat. Məto etənim kit otuwa itəm rəhan nəsanənən ne nepətən taprəkis-in io. Kən io ləhau agin, esahmen-pənən məmə ekiləs rəhan put tahmen e rəhan iolwək. Kən suah əh, in otol baptais etəmat e Narmin Rəha Uhgīn ne nigəm.

¹²In tatətul matip o nakilən nolən rəha netənim məmə otoor netənim, tahmen-pən e etəm tətəsum mator nagwənən təwīr ne nagwənən tərət. Tatos nagwənən təwīr matuwīn latuənu. Məto tatərakin-pən nagwənən tərət e nigəm asol itəm tatuəp namnun tikə.”

Jon təmol baptais e Iesu

(Mak 1:9-11; Luk 3:21-22)

¹³Kən Iesu təmīet e nitən Kalili muwa e nəhau Jotan məmə Jon otol baptais lan.

¹⁴Məto Jon tatən-iəhau əskasik in mən-ipən məmə, “Tətuatip əm məmə ik onəkol baptais lak. ?Tahro natuwa məmə ekol baptais lam?”

¹⁵Məto Iesu təməni-ipən kəm in məmə, “Kəp. Pəs otol nəhlan roiu. E nolən əh, kilau okioal nat kit itəm Uhgın tolkeike.” Kən Jon təmegəhan-in.

¹⁶Kən Jon təmol baptais e Iesu, kən roiu agin Iesu təməni e nəhau, kən əmun nego e neai təməni, kən təməniplan Narmin Rəha Uhgın təmeiuaiu-pa tahmen e mak, kən məpələh-pər lan.

¹⁷Kən nəwia Uhgın təməni-pən e neai matən məmə, “Inu nətik keike itəm iakolkeike pik, kən nikik tagien pik ron.”

Matiu 4

Setan təməni-ipən-os-ipən kəm Iesu

(Mak 1:12-13; Luk 4:1-13)

¹Kən Narmin Rəha Uhgın təməni-pən e niki Iesu məmə in otuwın əpəh ikin taruən-aruən ikin məmə Setan otos-ipən-os-ipən kəm in. Kən Iesu təmuwın ikin.

²Kən Iesu təməni nəgwənən o nian foti, e nərauiəgən ne lapin, kən uarisig lan nəumis təmus pik.

³Kən Setan təmuwa minatos-ipən-os-ipən kəm Iesu mən-ipən kəm in məmə, “Okəmə ik Nəti Uhgın, ən-ipən kəm kəpiel min pəs kotəuhlin ilat motuwa motol pıret lan.”

⁴Məto Iesu təmuhalpın nəghatən rəha Setan məmə, “Kəməte e Naoa Rəha Uhgın məmə, ‘Nəməni okol kəsotatigən e nəgwənən əm, məto okotatig e nəghatən min rafin itəm tətisi-pən o Uhgın.’”

⁵Kən Setan təməni Iesu mian əpəh Jerusalem, e nətuei nimə əpəh ilis agin e Nimə Rəha Uhgın,

⁶kən mən-ipən kəm Iesu məmə, “Okəmə ik Nəti Uhgın, ətipən əpəh ləhau e nisip, məto-inu Naoa Rəha Uhgın tatən məmə, ‘Uhgın otən-ipən kəm rəhan nagelo min məmə okoatehm wir ik, kən motiləs əm ik ilis e nelmilat məmə nəkəsorinən nelkəm məsin ne e kəpiel.’”

⁷Kən Iesu təmuhalpin nəghatən rəha Setan məmə, “Naoa Rəha Ughin tatən min məmə, ‘Okol nəkəsotos-ipən-os-ipənən kəm rəhatəmat Iərəməmə Ughin məmə otol nat kit, kən məmə onəkotəplan məmə in tətətig itəmat min, o kəp.’”

⁸Kən Setan təmit min Iesu mian əpəh ilis e nitot asol, kən təməgətun in e kantri min rafin e nətueintən, ne nəsanənən rəhalat, ne natimnat wir agin min rafin itəm kotatig lan,

⁹kən təmən-ipən kəm Iesu məmə, “Natimnat rafin min əh, oekos-ipinə kəm ik məmə onatərəməmə olat, okəmə nəkisin-pa nulim kən məfak-pa kəm io.”

¹⁰Kən Iesu təmuhalpin rəhan nəghatən məmə, “!Uwin isəu, Setan! Naoa Rəha Ughin tatən məmə, ‘Onəkotəfak əm kəm rəhatəmat Iərəməmə Ughin, kən in əm, onəkotol əm rəhan nətəligən.’”

¹¹Kən Setan təmagim mapəs Iesu, kən nagelo min kəmotuwa motasitu lan.

Iesu tinətuoun matən-iarəp nəghatən rəha Ughin e nitən Kalili

(Mak 1:14-15; Luk 4:14-15)

¹²Kən e nian əh, kəmaskəlim Jon Baptaıs kiləs-ipən e kalapus. Kən nian Iesu təməto nəghatən lan, kən in təmiet muwin e nitən Kalili.

¹³Kən təmapəs natigən Nasaret, kən miet muwin əpəh ləhau e taon kit, nərgin u Kapaneam, iuəhkır o Lek Kalili, kən mətətig ikin əh e nitən asol rəha noanol min rəha Sepulun ne Naptali aıpən.

¹⁴Təmuwin ikin əh məmə nəghatən rəha ien Aesea otuwa mol nıpahrienən lan itəm təmən aıpən məmə,

¹⁵“Nəptən rəha noanol rəha Sepulun, ne nəptən rəha noanol rəha Naptali tatəməhl e suatıp tatuwin e lek Kalili, entənıpən-pən e nəhau Jotan. Inu nitən asol Kalili, ima İaihlua min.

¹⁶Netəm ikin kəmotatig e napınəpən, məto kəmotəplan nəhag-əhagən asol kit. Kən tinatian, kən nəhag-əhagən asol təmasiəgəpın ilat itəm kəmotatig e napınəpən rəha nımısən u tatəfətain ilat nian rafin.”

¹⁷Kən mətououn e nian əh, Iesu təmatən-iarəp nəghatən rəha Uhgın matən məmə, “Otəuhlin itəmat e rəhatəmat nolən rat mın, kən motitəlig-pən o Uhgın, mətə-inu nərəmərəən rəha Uhgın tinatuwa iuəhkir.”

Iesu təmaun-in netəmim kuwit məmə okotətəu-pən in

(Mak 1:16-20; Luk 5:1-11)

¹⁸Iesu təmətaliwək e nıkali Lek Kalili, kən məplan suah mil kəiu ilau pian, Antru ne Saimon, u nərgın kit mın u Pita. Ilau katuərakin net e Lek Kalili mətə-inu ilau etəmim mil rəha niuwən nəm mın.

¹⁹Kən təmən-ipən kəm ilau məmə, “Uea, mətəu-pa io, muea rəhak etəmim mil, kən io ekol itəmlau nakuea etəmim mil rəha niuwən netəmim məmə okotuwa rəhak mın netəmim.”

²⁰Kən roiu agın, ilau kəmuapəs rəhalau net, kən muətəu-pən.

²¹Kən Iesu təmaliwək muwın noan məsın mın, kən məplan suah mil kəiu mın ilau pian, nərgilau u Jemes ne Jon, nəti Sepeti mil. Katuəpələh e nıpəgnoa pot iləhal rəhalau tata matuəhl wir rəhalau net mın, kən Iesu təmaun-in ilau məmə okuea miauarisig-in in.

²²Kən roiu agın, ilau kəmuətul muapəs pot ne tata rəhalau, kən muətəu-pən Iesu.

Iesu təməgətun netəmim kən matol-wir netəmim e nimisən

(Luk 6:17-19)

²³Kən Iesu təmaliwək ikin mın rafin e nitən Kalili, matəgətun netəmim əpəh e nimə mın rəha nuəfiminən, kən matən-iarəp namnusən təwir rəha nərəmərəən rəha Uhgın kəm netəmim, kən matol-wir netəmim itəm koatimis e nimisən rafin, ne netəmim itəm nıpətilat tərət o nimisən rafin.

²⁴Kən namnusən e Iesu təmitəlau rafin e profens ikin Siria, kən netəmim kəmotəmik netəmim rafin itəm koatimis motuwa o Iesu, rəhalat nimisən tol min-nulan: neen koatimis, neen nıpətilat titahmə, neen narmin rat tətətig elat, neen koatos nimisən rəha mənig moataut, kən neen nıpətilat məsın təmimis. Mətə Iesu təmol-wir ilat.

²⁵Kən nimanin netəmim kəmotiet e nitən Kalili, ne ikin Tekapolis, ne Jerusalem əpəh Jutia, ne ikin pisin min neen əpəh Jutia, ne ikin min entənipən-pən e nəhau Jotan, kən ilat rafin kəmotuarisig-in Iesu.

Matiu 5

Əpəh ilis e nitot, Iesu təməgətun rəhan netəmim itəm koatuarisig-in in

¹Nian Iesu təməplan nimanin netəmim itəm koatətəu-pən in, kən in təmuwin əpəh ilis e nitot, kən məpələh, kən rəhan netəmim itəm koatuarisig-in in, ilat kəmotuwa.

²Kən minətuoun matəgətun ilat.

Netəmim itəm koatətig e nəwİRƏn pəhriən

Iesu təmən məmə,

³“Nakoatətig e nəwİRƏn pəhriən nian nəkoatİləs-iəhau itəmat, moatən e nikitəmat məmə nakoatəkul-pən əm e UhgİN. In nəwİRƏn pəhriən məto-inu, itəmat netəmim rəha UhgİN, kən in tatərəmərə etəmat.

⁴Nakoatətig e nəwİRƏn pəhriən nian nakoatasək kən nikitəmat titəhmə. In nəwİRƏn pəhriən məto-inu, UhgİN otos-iəhau nikitəmat.

⁵Nakoatətig e nəwİRƏn pəhriən nian nəsotos-ipər atipən itəmat. In nəwİRƏn pəhriən məto-inu, o nian kit UhgİN otos-ipİNə nətueintən kəm itəmat u rəhan mİN.

⁶Nakoatətig e nəwİRƏn pəhriən nian nakotolkeike pİK e nikitəmat rafin agİN məmə nəmegəhən rəhatəmat okotətuatİp e nİganəmtİ UhgİN. In nəwİRƏn pəhriən məto-inu, UhgİN otol rəhatəmat nəmegəhən kotətuatİp e nİganəmtİN.

⁷Nakoatətig e nəwİRƏn pəhriən nian nakotasəkitun netəmim. In nəwİRƏn pəhriən məto-inu, UhgİN otasəkitun itəmat.

⁸Nakoatətig e nəwİRƏn pəhriən nian nikitəmat tətuatİp məwİR. In nəwİRƏn pəhriən məto-inu, onəkotəplan UhgİN.

⁹Nakoatatig e nəwirən pahrien nian itəmat netəmim rəha nələhəuən nəməlinuən. In nəwirən pahrien məto-inu, okaun-in itəmat məmə nenəti Uhgīn.

¹⁰Nakoatatig e nəwirən pahrien nian nəkoatol natimnat itəm kotətuatip e nigənəmti Uhgīn, kən netəmim koatol tərət kəm itəmat ron. In nəwirən pahrien məto-inu, itəmat netəmim rəha Uhgīn, kən in tatərəmərə etəmat.

¹¹“Nakoatatig e nəwirən pahrien nian netəmim koatol natimnat min tərət kəm itəmat məto-inu itəmat netəmim rəhak, inəh koatən rat itəmat, kən moatərəkin itəmat, kən moateiuə-in itəmat moatən nəghatən tərət min moatərəkin itəmat lan.

¹²Nipahrienən, netəmim kəmoatol nolən ahmen min əm kəm ien min aupən ikin itəm ilat koatol kəm itəmat. Kən otagien pik, məto-inu nətouən asol rəhatəmat tətatig əpəh e nego e neai.

Sol ne nəhag-əhagən

(Mak 9:50; Luk 14:34-35)

¹³“Itəmat nəkotahmen e sol kəm netəmim rafin e nətueintən. ?Məto okəmə rəhan nətehenən tinikə, otahro muwa mətehen min? Təsəwir minən o nat kit min, okərakin, kən netəmim kotaliwək lan.

¹⁴Itəmat nəhag-əhagən rəha netəmim e nətueintən. Taon itəm kəmol əpəh ilis e nitot, okol təsəhluaigən.

¹⁵Kən etəmim kit tikə məmə otasiepən e lait, kən məfətain-iəhau e kətim. Kəp, nian tasiepən e lait, kən in otəkəike mətu-pər ikin lait tatəpələh ikin məmə lait otasiəgəpīn rafin nīpəgnoa nimə o netəmim rafin.

¹⁶Kən e nolən ahmen min əm, otol rəhatəmat lait e nəmegəhən rəhatəmat tasiə məmə netəmim okotəplan wək wir min itəm itəmat nəkoatol, kən ilat okotiləs-ipər nərgi tata Uhgīn itəm tətatig e nego e neai.”

Lou rəha Moses

¹⁷Kən Iesu təmatəkəike matən-ipən kəm ilat məmə, “Təsəwirən məmə nikitəmat otəht məmə emuwa məmə ekərakin Lou itəm Uhgīn təmos-ipən

kəm Moses ne ien min aupən. !Kəp! Eməsuwamən məmə ekərakin ilat, mətə emuwa məmə ekol nīpəti nəghatən min əh okotuwa motol nīpahrienən.

¹⁸Pahrien, iatən kəm itəmat məmə nian nəptən ne neai kətuatig, kən Lou, in min otatig. Kən okol nat kit otəsikəən lan, nat əpnapin in leta əkəku agin, kən Lou otətul motol wək mətəarus-pa nəghatən min rafin rəha Lou kotuwa motol nīpahrienən lan.

¹⁹Kən, o nat əh inəh, suah kit itəm tapəs Lou matəgətun netəmim min məmə ilat min okotapəs, nat əpnapin in Lou kit ləhau agin, kən okotaun-in suah əh məmə in ləhau agin e nərəmərəən rəha Uhgīn. Mətə suah kit itəm tatol Lou min əh, matəgətun netəmim lan, kən okotaun-in suah əh məmə in ilis agin e nərəmərəən rəha Uhgīn.

²⁰Iatən nəhlan kəm itəmat mətə-inu, rəhatəmat nolən otəkəike mətəuatip wir agin e nīganəmti Uhgīn, taprəkis-in nolən min rəha Farisi min ne iəgətun min rəha Lou itəm nīkilat əm təht məmə kotətəuatip wir. Okəmə rəham nolən təsətəuatip wirən nəhlan, kən okol nəsuwinən matig ahgin nərəmərəən rəha Uhgīn.”

Suah kit itəm neməha tatol

(Luk 12:57-59)

²¹Kən Iesu təmən min məmə, “Itəmat nəmotətə rəkis nəghatən itəm iəgətun min kəmotən kəm pipi rat min rəhatəmat aupən. Ilat kəmotən məmə, ‘Əsotohamnuən etəmim,’ kən ‘Etəmim itəm təmoamnu itəm, otəkəike mətul e nīganəmti kot mos nalpinən.’

²²Mətə io iatən kəm itəmat məmə, okəmə suah kit neməha tatol o nat kit pian təmol, kən tətəuatip məmə suah əh itəm neməha təmol, otətul e nīganəmti kot. Kən okəmə suah kit tatən rat pian, kən tətəuatip məmə in otətul e nīganəmti kaonsel asol. Kən okəmə suah kit tətəu-iərmis-in suah kit, kən tətəuatip məmə etəm təmən nəghatən əh otuwīn e nīgəm asol.

²³“Kən o nat əh inəh, okəmə nian natuwīn e olta e Nimə Rəha Uhgīn məmə onəkəos-ipən nat kit kəm Uhgīn, mətə ikin əh, nīkim tinəht pian itəm tatol neməha kəm ik o nat kit nəmol kəm in itəm təsahmenən,

²⁴əpəs pitən rəham nat əh, kən muwīn məplan piam muəg-ətuatip-in nətəligən rəhatəlau, muapəs nolə tikimir, muea iolitilau min, kən uarisig nəpanitəlig muwīn mos-ipən nat kit rəham kəm Uhgin e olta əpəh e Nimə Rəha Uhgin.

²⁵“Kən okəmə nəmol nat kit təsahmenən e etəmim kit, kən etəmim un tolkeike məmə otiləs ik muwīn e kot, təwir məmə nakuwīn uəhai əm, nian nəsianən əh e kot, kən muəg-ətuatip-in nīpəgnəmtin rəhatəlau pitən. Okəmə nakapəs, etəmim un otiləs-ipən ik e nelmi etəm tətakil nəghatən, kən etəm tətakil nəghatən otos-ipən ik e nelmi polis, kən polis otiləs-ipən ik e kalapus.

²⁶Nīpahrienən iatən kəm itəmat məmə, okəmə tol nəhlan, okol nəsietən e kalapus mətoarus nakətou rafin agin nalpīnən rəham.”

Etəmim itəm tətakləh-in pətan

²⁷Kən Iesu tatəkəike matən-ipən kəm ilat məmə, “Itəmat nəmotəto rəkis nəghatən u məmə, ‘Itəmat itəm nəmotol marit rəkis, nəsotakləh-inən nīpitan pisin min.’

²⁸Məto io, io iatən kəm itəmat məmə nian suah kit itəm tinol marit rəkis tatəplan pətan pisin kit matolkeike məmə otakləh-in, kən in tinol rəkis təfagə rat e nīkin, tahmen əm məmə in tinakləh-in pahrien.

²⁹Okəmə niganəmtim tol ik natol təfagə, kən təwir məmə nakiləs-irəkis mərakin. Təməwir məmə nīpətim məsin tikə, taprəkis-in nīpətim rafin okərakin-pən e nīgəm asol namnun tikə.

³⁰Kən okəmə nelməm tol ik natol təfagə, kən təwir məmə nakətatip rəkis mərakin. Təməwir məmə nīpətim məsin tikə, taprəkis-in nīpətim rafin okərakin-pən e nīgəm asol namnun tikə.”

Etəmim itəm tətəpəs rəhan pətan

(Mat 19:9; Mak 10:11-12; Luk 16:18)

³¹Kən Iesu təmən min məmə, “Itəmat nəmotəto rəkis nəghatən u məmə, ‘Etəmim itəm otəpəs rəhan pətan, in otəkəike mos-ipən naoa kit kəm in itəm tatəgətun məmə in tinapəs in.’

³²Məto io, io iatən kəm itəmat məmə, okəmə pətan kit itəm təmol marit təsuwinən mehm suah pisin kit, məto rəhan iərman tatol tifos mətapəs in, kən suah un tatol təfagə rat. Kən okəmə pətan əh tatətəu-pən suah pisin, kən pətan əh tatol təfagə, məto nəmkakiəhən rəha iərman rəhan aupən. Kən suah u itəm tatit pətan əh, in min tatol təfagə.”

Noanawil min

³³Kən Iesu təmən min məmə, “Nəmotəto rəkis nəghatən kit min itəm iəgətun min kəmotən kəm rəhatat pipi min aupən məmə, ‘Nəsotətəghlən noanawil min rəhatəmat itəm nəmotos, məto nəkotəkəike motol nat naka itəm nəmotos noanawil lan kəm Uhgīn məmə nəkotol.’

³⁴Məto io, io iatən kəm itəmat məmə, sotos əmən noanawil o nat kit məmə otol rəhatəmat nəghatən təkaskik. Sotosən noanawil o nego e neai məto-inu ikin əh Uhgīn tatərəmərə lan, kən nolən əh tahmen məmə noatos noanawil o Uhgīn.

³⁵Kən sotosən noanawil o nətueintən məto-inu ikin əh Uhgīn tatərəmərə lan, kən nolən əh tahmen məmə noatos noanawil o Uhgīn. Kən sotosən noanawil o Jerusalem məto-inu ikin əh in taon rəha Uhgīn, u in Kig asol ikin, kən nolən əh tahmen məmə noatos noanawil o Uhgīn.

³⁶Kən sotosən noanawil o rəhatəmat-kəpə, məto-inu rəhatəmat nəsanənən tikə məmə nakotəuhlin noanutəmat kit tuwa məruən o mapin. Uhgīn əm tatərəmərə e natimnat e nəmegəhən rəhatəmat. Kən nolən əh tahmen məmə noatos noanawil o Uhgīn.

³⁷Məto apəs rəhatəmat nəghatən nian rafin otən əm nīpahrienən. Kən okəmə rəhatəmat nətəligən e nat kit in ‘əwəh,’ kən nakotən əm məmə, ‘əwəh.’ Kən okəmə rəhatəmat nətəligən e nat kit in ‘kəpə,’ kən nakotən əm məmə, ‘kəpə.’ Nəghatən min itəm kotaprəkis-in ‘əwəh’ o ‘kəpə,’ koatisi-pən e Setan.”

Nalpinən

(Luk 6:29-30)

³⁸Kən Iesu təmatəkəike matən məmə, “Nəmotəto rəkis nəghatən kit məmə, ‘Okəmə suah kit tərəkīn niganəmtim kit, kən netəmim okotərəkīn min

niganəmtin kit. Kən okəmə suah kit tərəkīn nəluəm kit, kən netəmin okotərəkīn min nəluin kit.’

³⁹Məto io, io iatən kəm itəmat məmə, nəsalpīnən nəratən kəm etəmin itəm təmol tərət kəm ik. Okəmə suah kit təhai ik mem nīkapīm matip, kən nakəkəike maləlin-pən min nīkapīm mol pəs tem min.

⁴⁰Kən okəmə suah kit tīləs ik mian e kot, kən matəkəike ron ik məmə nakos-ipən rəham sot əkəku kəm in məmə otəg-ətuatip-in rəhatəlau nəratən, kən nakəkəike mos-ipən min rəham sot asol.

⁴¹Kən okəmə mopael kit rəha netəm Rom tatəkəike ron ik məmə nəkiləs rəhan kətim muwin kilometa kitīəh, məto ik nakəkəike mīləs min muwin kilometa kit min tol kəiu.

⁴²Okəmə suah kit tateasiə-in ron ik, kən ik nakəkəike mos-ipən kəm in. Kən okəmə suah kit tolkeike məmə in otos rəham nat kit muwin kənu mos mitəlig min muwa, kən nəsənən məmə nakapəs, nakəkəike mos-ipən.”

Nolən rəha nolkeikēən tikimir min

(Luk 6:27-28,32-36)

⁴³Kən Iesu təmən min məmə, “Nəmotəto rəkis məmə, ‘Onəkotolkeike rəhatəmat min, kən motətəhau tikimir min rəhatəmat.’

⁴⁴Məto io, io iatən kəm itəmat məmə onəkotolkeike rəhatəmat tikimir min, kən motəfak o netəm min u itəm koatol nəratən kəm itəmat,

⁴⁵kən nolən əh otəgətun məmə itəmat nenəti Uhgīn rəhatəmat itəm tətətig ilis e nego e neai. Kən otol nəhlan məto-inu rəhatəmat tata Uhgīn təmol mitgar tətasiəgəpīn netəmin itəm kotəwir ne netəmin itəm kotərat, kən in mətahl-ipa nuhūən kəm netəm min u itəm rəhalat nəmegəhən tətuatip, ne netəm min u itəm rəhalat nəmegəhən təsətuatipən.

⁴⁶?Okəmə nakotolkeike əm netəm min u itəm kotolkeike itəmat, kən nikitəmat təht məmə Uhgīn otətou itəmat o nolən kit itəm təwir? !Kəp! !Netəm min u itəm koatos məni rəha takis, itəm katən məmə netəm rat, ilat min kotolkeike ilat min!

⁴⁷?Kən okəmә nakotos әm itəmat min neen moatəghat kəm ilat min, mətə tahro? ?Nikitəmat təht məmә nəkoatol nat kit itəm in təwir taprəkis-in netəm әpnapin? Kәp. Netənim min itəm kəsotitunən Uhgın, ilat min koatol nəhlan.

⁴⁸Tol nəhlan, itəmat nenəti Uhgın, nəkotəkәike motol nolən itəm in təwir mətuatip nian rafin, tahmen-pən әm məmә rəhatəmat Tata Uhgın in tatol.”

Matiu 6

Nolən min itəm təwir kəm Uhgın

¹Kən Iesu təmən min məmә, “Sotolən məmә nəkotol nolən min itəm təwir kəm Uhgın məmә netənim okotəplan itəmat ron. Okəmә nəkotol məmә netənim okotəplan, kən Uhgın әpәh e nego e neai otəsətouən itəmat ron.

Nolən itəm təwir o nos-ipənən kəm ian-rat min

²“Tol nəhlan, okəmә nakotos-ipən nat kit kəm ian-rat min məmә nakotasitu elat, nəsotolən e nolən rəha netənim itəm rəhalat nənən təwir, mətə nikilat tamkimik. Nian ilat kotasitu e ian-rat min, rəhalat iolwək min koatahl təwi moatol-arəp e nimә rəha nuəfiminən ne ihluə e suatip asol məmә netənim okotitun. Koatol nəhlan məmә netənim okotisiai-in ilat. Nipahrienən iatən kəm itəmat məmә, ilat kinotos rəkis nətouən rəhalat, inəh nisaiien rəha netənim.

³Mətə itəmat, okəmә nakotos-ipən nat kit kəm ian-rat min məmә nakotasitu elat, nəkotəkәike motol məmә netənim okəsotəplanən, nat әpnapin rəhatəmat min netənim.

⁴Otol nəhlan məmә netənim okotəruru rəhatəmat nolən wir min, kən rəhatəmat Tata itəm tatəplan rəhatəmat nolən anion min, in otətou itəmat o rəhatəmat nolən wir min.”

Nolən rəha nəfakən

(Luk 11:2-4)

⁵Kən Iesu təmatəkәike matən məmә, “Nian nakotəghat kəm Uhgın e nəfakən, kən sotolən e nolən rəha netənim itəm rəhalat nənən təwir, mətə nikilat tamkimik. Netəm min әh, ilat kotolkeike məmә okotətul әpәh e nimә rəha

nuəfiminən, ne ihluə e suatip asol, kən motəfak məmə netəmim okotəplan motəto ilat. Nipahrienən iatən kəm itəmat məmə ilat kinotos rəkis nətouən rəhalat, inəh nisaiiən rəha netəmim.

⁶Məto nian nakotəghat kəm Uhgīn e nəfakən, nakotuwin əpəh e nipəgnoa nimə rəhatəmat, kən motahtosig e toa, kən motəfak kəm Uhgīn itəm tətatiḡ ikin əh itəm netəmim kəsotəplanən itəmat. Kən rəhatəmat Tata itəm tatəplan rəhatəmat nolən anion min, in otətou itəmat o rəhatəmat nolən wir min.

⁷“Kən nian nakotəghat kəm Uhgīn e nəfakən, sotargətainən nəghatən min tepət tepət u nipətīn tikə, tahmen e netəm kotəruru Uhgīn. Nikilat təht məmə rəhalat uhgīn min okotəto ilat o nəghatən min tepət itəm koatəfak moatən.

⁸Sotolən məmə ilat ne, məto-inu uarisig nakotətapəh ron, məto rəhatəmat Tata Uhgīn tinitun rəkis nat naka itəm nakotoleike.

⁹“Kən tol min-nəhlan, nian nakotəghat kəm Uhgīn e nəfakən, kən otəfak mihin nulan: ‘Tata rəhatimat itəm nətatiḡ e nego e neai, pəs netəmim kotisiai-in ik.

¹⁰Pəs nərəmərəən rəham tuwa, kən pəs nat itəm ik nakolkeike in otuwa mol nipahrienən lan ikin-u e nətueintən, tahmen-pən əm ilis e nego e neai.

¹¹Os-ipa nagwənən kəm itimat tahmen-in rəha nian roiu.

¹²Kən aluin məsalpīnən, nolən rat min rəhatimat, tahmen-pən əm məmə itimat ekotaluin məsotaskəlīm-iəkisən e nikitimat nolən rat min rəha netəmim itəm koatol nərātən kəm itimat.

¹³Kən segəhan-inən itimat ekotuwin ima nos-ipən-os-ipənən, ikin itəm mətə oekotakiə motol nolən rat, məto os-irəkis itimat e nelmi Setan.’

¹⁴“Okəmə itəmat nəkotaluin, məsotaskəlīm-iəkisən e nikitəmat nolən rat min rəha netəmim itəm koatol kəm itəmat, kən rəhatəmat Tata Uhgīn e nego e neai, in otaluin məsalpīnən, rəhatəmat nolən rat min.

¹⁵Məto okəmə itəmat nəsotaluinən, motaskəlim-iəkis e nikitəmat nolən rat min rəha netənim itəm koatol kəm itəmat, kən okol rəhatəmat Tata Uhgın otəsaluinən kən malpın nolən rat min rəhatəmat.”

Nolən rəha nətuakəmən

¹⁶Kən Iesu təmatən min məmə, “Nian nakotətuakəm motapəs nagwənən motəfak kəm Uhgın, sotolən niğanəmtitəmat təpou tahmen-pən e netəm min u itəm rəhatəmat nənən təwir, məto nikilat tamkimik. Ilat koatol niğanəmtilat tol pisin, məmə netənim okotəplan ilat məmə nəumis tinus ilat, kən netənim okotisiai-in ilat. Nipahrienən iatən kəm itəmat məmə ilat kinotos rəkis nətouən rəhalat, inəh nisiiən rəha netənim.

¹⁷Məto nian nakotətuakəm motapəs nagwənən moatəfak kəm Uhgın, onəkotaikuas e niğanəmtitəmat, kən motol-pən oel etəmat,

¹⁸məmə netənim okəsotəplanən məmə nakotətuakəm motapəs nagwənən moatəfak kəm Uhgın, kən rəhatəmat Tata itəm tatəplan rəhatəmat nolən anion min, in otətou itəmat o rəhatəmat nolən wir min.”

Nat təwir əpəh e nego e neai

(Luk 11:34-36)

¹⁹Kən Iesu təmatən min məmə, “Təsəwirən məmə nəkotuargətain rəhatəmat nat wir min e nətueintən u məmə rəhatəmat nautə otepət, məto-inu e nətueintən u, win min kotitun nunən, kən namtəən titun nərəkinən natimnat min əh, kən iakləh min kotitun nəhapən rəhatəmat nimə motuwın imə kakləh-in rəhatəmat natimnat.

²⁰Məto təwir məmə nəkotuargətain rəhatəmat nat wir min əpəh e nego e neai. İkin əh win min kəsotunən, kən namtəən okol təsərəkinən natimnat min əh, kən iakləh min okol kəsotakləh-inən.

²¹Iatən nəhlan məto-inu, ikin pəhruən rəhatəmat natimnat wir min koatəməhl ikin, məto nian rafin nikitəmat otəkəike matəht natimnat min əh-ikın əh.

²²“Niganəmtim in tahmen e lait itəm tatos-ipən nəhag-əhagən kəm nīpətīm. Okəmə niganəmtim mil kuəwir, tahmen əm məmə nīpətīm tərīoah e nəhag-əhagən.

²³Məto okəmə niganəmtim mil kuərat, tahmen əm məmə nīpətīm in tərīoah e naluginən. !Kən okəmə nəhag-əhagən e nīpətīm in napinəp əmən, tahmen əm məmə ik nəkətatiḡ e napinəpən asol aḡin-əh!

²⁴“Etənim tikə itəm titun nuwamən in slef rəha etəm-iasol kəiu. Okəmə in tətalkut məmə otol nəhlan, kən otolkeike kit mol nəwian, kən metəhau kit məsolən nəwian. Okol nəsolən slef rəha Uḡin ne mənī e nian kitīəh əm.”

Təsəwirən məmə nakotətəliḡ-in pik

(Luk 12:22-31)

²⁵Kən Iesu təmən məmə, “Kən o natimnat mīn əh, io iatən kəm itəmat məmə, təsəwirən məmə nakotətəliḡ-in pik rəhatətmat nəmegəhən məmə onəkotun naka, kən motənim naka. Kən təsəwirən məmə nakotətəliḡ-in pik nīpətītəmat məmə onəkotos hiə rəhatəmat napən. ?Nəukəti nəmegəhən rəhatimat tatəmegəh əm e nagwənən, o kəp? Kəp. ?Kən naka in nat asol o nīpətītat, napən, o kəp? Kəp.

²⁶Otəplan-tu mənīḡ mīn itəm koatiwiḡ moatan. Ilat kəsotasumən, kən ilat kəsotələhəu-wirən nagwənən e nīpəḡnoa nimə, məto Tata rəhatəmat e nego neai, in tatos-ipən nagwənən kəm ilat. ?Kən e niganəmtin, nīkitəmat təht məmə in tolkeike pik itəmat taprəkis-in mənīḡ mīn? !Əwəh!

²⁷?Nīkitəmat təht məmə rəhatəmat nətəliḡən pik titun nolən rəhatəmat nəmegəhən təfəməh? !Kəp! Nolən rəha nətəliḡən pik təsafin-pənən aua kitīəh əm e rəhatəmat nəmegəhən.

²⁸“?Kən təhrol nīkitəmat tatəht pik napən onəkotuwīn lan? Nīkitəmat təht-tu nəḡui niḡ mīn itəm koatəwiə əpnāpīn əm. Ilat kəsotol pikən wək o nəhlən rəhalat napən.

²⁹Məto ekən kəm itəmat məmə Kig Solomon, in etənim rəhan nautə tepət, kən rəhan napən itəm tatuwīn-in, ilat kotəwir motaprəkis. Məto nəḡui niḡ əpnāpīn mīn kotəwir taprəkis-in rəhan napən.

³⁰Uhgin tæmol manuwihl ærnapin æm tæwir pik e nægui nig min æh. Mæto manuwihl æh in ræha nian kitiæh æm, kæn olawig kuwan e nigæm. ?Kæn okæmæ Uhgin tatol-wir manuwihl æh, kæn nikitæmat tæht mæmæ Uhgin otos-ipinæ napæn itæm nækotækæike motuwîn lan? !Æwæh! In otol næhlan. !Ei, ræhatæmat nahatætæn in tækæku agin!

³¹“Tol næhlan, tæsæwiræn mæmæ itæmat nakotætælig-in pik mæmæ, ‘?Ekotun naka?’ o ‘?Ekotænim naka?’ o ‘?Ekotos hiæ napæn motuwîn-in?’

³²Sotætælig-in pikæn. Netæm itæm kotærruru Uhgin, ilat koatætælig-in pik natimnat itæm tol næhlan. Mæto itæmat nenæti Uhgin min, kæn ræhatæmat Tata æpæh e nego e neai, in titun mæmæ nækotækæike motos natimnat min æh.

³³Mæto pæs onækotol næræmæææn ræha Uhgin, ne næmegæhæn ætuatip itæm Uhgin tolkeike, ilau okuætul aupæn e næmegæhæn ræhatæmat. Nian nækotol næhlan, kæn Uhgin otos-ipinæ min natimnat min æh kæm itæmat.

³⁴Tol næhlan, tæsæwiræn mæmæ nakotætælig-in pik natimnat itæm onækotækæike motos olawig, mæto-inu natimnat ræha olawig, ilat ræha olawig. Næratæn ræha nian kitiæh, in tinahmen rækis ræha nian kitiæh.

Matiu 7

Sotakilæn nolæn ræha suah kit min

(Luk 6:37-38,41-42)

¹Okæmæ nakotakil rat netæmim, kæn Uhgin otælæhæu næghatæn ræha nalpinæn ræhatæmat.

²Tol næhlan mæto-inu, næghatæn æskasik itæm nakoatæn mæmæ suah kit in etæm rat, kæn Uhgin otætæu-pæn æm o nænæn ræhatæmat nolæn rat min. Okæmæ nakotakil etæmim e nolæn itæm tætuatip, kæn Uhgin otakil itæmat e nolæn itæm tætuatip. Mæto okæmæ nakotakil rat netæmim e nolæn æskasik, kæn Uhgin otakil itæmat e nolæn ahmen min æm.

³?Tahro nakoatæn nimismisi nig itæm tætætig e nigænæmti piatæmat min, mæto itæmat næsotæplanæn nig asol itæm tætætig e nigænæmtitæmat?

⁴?Kən tahro nakoatən mēmə, ‘Ei piak, pəs ekos-irəkis nimismisi nig e niganəmtim,’ mətə nəsotəplanən nig asol e niganəmtitəmat?

⁵!Rəhatəmat nənən təwir, mətə nikitəmat tamkimik! Otaupən, motos-irəkis nig asol e niganəmtitəmat, kən nəkotitun nəplan wirən nohrəkisən nimismisi nig itəm tətətig e niganəmti piatəmat min.

⁶“Sotos-ipənən natimnat rəha Uhgin kəm kuri min, kən sotəraikin-pənən rəhatəmat nat wir min kəm pikəs min. Okəmə nəkətol nəhlan, kən ilat okotaliwək lan kən moteirair motus itəmat.”

Nolən ətuatip o nətapəh-inən nat kit o Uhgin

(Luk 11:9-13; 6:31)

⁷Kən Iesu təmatəkəike matən mēmə, “Ekən kəm itəmat mēmə, otətapəh-in kəm Uhgin o natimnat, kən in otos-ipinə kəm itəmat. Kən otegəs-in pəs nakotehm. Kən otəht-əht toa pəs toa oterəh otəmat.

⁸Ekən nəhlan mətə-inu netəmim rafin itəm koatətapəh-in, kən okotos. Kən netəm min u itəm koategəs-in, kən okotehm. Kən netəmim itəm koatəht-əht toa, kən toa oterəh olat.

⁹“?Itəmat pah, nian nətın tatətapəh-in pıret, mətə in tatos-ipən kəpiel? !Kəp!

¹⁰?O, nian in tatətapəh-in nəm, mətə in tatos-ipən sinek? !Kəp!

¹¹Nat əpnarın itəmat netəmim rəha nətueintən nakotərat, mətə nakoatos-ipən natimnat wir min kəm nenətitəmat min. !Mətə Tata Uhgin e nego e neai, nolən rəhan in təwir pik maprəkis-in nolən rəhatəmat, kən nıpahrienən, in otos-ipən natimnat wir min kəm netəm min u itəm koatətapəh-in rən!

¹²Kən tol nəhlan, otol təwir kəm netəmim rafin e nolən min rafin itəm nakətolkeike mēmə netəmim okətol min kəm itəmat. Inu nıpəti Lou itəm Uhgin təmos-ipən kəm Moses, ne nəukəti nəghatən itəm təmos-ipən kəm ien min aupən.”

Suatip kəiu

(Luk 13:24)

¹³Iesu tāmən mīn mēmə, “Itəmat onəkotəkəike motuwīn-pən e nafiluə itəm təkəku, mətō-inu nafiluə itəm iahgin ne suatip itəm tīmətig əm tatuwīn o nərəkīnən, kən netəmim tepət koatuwīn-pən e nafiluə əh.

¹⁴Mətō nafiluə itəm təkəku, ne suatip itəm tiəkis tatuwīn o nəmegəhən, kən netəmim noan məsīn əm okotəplan.”

Nig ilau noan

(Luk 6:43-44)

¹⁵Kən Iesu tāmən mēmə, “Oatəto wīr itəmat o ien eiueiuə mīn. Ilat koatuwa moatəghat mətīg e nolən əpou tahmen e sipsip, mətō əpəh imə e nīkilat, ilat kotahmen e kuri iarupīn.

¹⁶Kən e nəmegəhən rəhalat, nəkotəplan noan, kən nəkotitun naka tətətig e nīkilat. Netəmim okol kəsotuwīnən e nolkosik o iapīl-iapīl moatəhl noa nig itəm təwīr mətəhen tahmen e krep o fik.

¹⁷Tol mīn-nulan, nig itəm təwīr tatōe-in noan itəm təwīr, mətō nig itəm tərat tatōe-in noan itəm tərat.

¹⁸Nig itəm təwīr okol təsōe-inən noan itəm tərat, kən nig itəm tərat, okol təsōe-inən noan itəm təwīr.

¹⁹Nig mīn rafin itəm kəsotōe-inən noalat itəm təwīr, okəte rəkis ilat, kərakin-pən ilat e nigəm.

²⁰Tol nəhlan, e nəmegəhən rəha ien eiueiuə mīn əh, onəkotəplan noan, kən nəkotitun naka tətətig e nīkilat.

²¹“Sənəmə netəmim rafin itəm kotaun-in io motən mēmə, ‘Iərəmərə, Iərəmərə,’ itəm ilat kotitun nuwīnən motatīg ahgin nərəmərəən rəha Uhgīn mətō ilat mīn əm u itəm koatol nəwīa rəhak Tata itəm tətətig e nego e neai.

²²E nian Uhgīn otakil netəmim rafin, netəmim tepət okotən kəm in mēmə, ‘!Iərəmərə, Iərəmərə! ?Tahro? ?Nəkītun o kəp mēmə, itimat emotən-iarəp nəghatən rəham itəm nəmos-ipa kəm itimat, kən motəhg-iarəp narmin rat mīn e nərgəm, kən motol natimnat pīspīs mīn e nərgəm?’

²³Kən oekən-ipən ətuatip kəm ilat məmə, ‘Aupən ekəruru itəmat, kən u-roiu min ekəruru itəmat. !Otuwin isəu ron io, itəmat netəm noatol nolən tərət!’”

Etəmim kəiu kəmiailəkin nimə

(Mak 1:22; Luk 6:47-49)

²⁴Kən Iesu təmol namnun rəhan nəghatən məmə, “Okəmə itəmat u itəm nəmotəto nəghatən min u rəhak kən moatol, kən onəkotahmen e etəmim itəm tenatig, in təmiləkin-pən nəukəti rəhan nimə e kəpiel.

²⁵Kən nuhuən təməfik, kən naruəh taiu, kən nimətag asol telel moh nimə. Məto nimə təsietən məto-inu kəmiləkin-pən nəukətin e kəpiel.

²⁶Okəmə itəmat u itəm nəmotəto nəghatən min u rəhak kən məsotolən, kən onəkotahmen e etəmim itəm təsətəlig-in wirən nolən natimnat kən in ialmə, in təmiləkin-pən nəukəti rəhan nimə e niməkləkil əm.

²⁷Kən nuhuən təməfik, kən naruəh taiu, kən nimətag asol telel moh nimə. Kən nimə təmiet, kən nian təmiet, məto təmərat agin.”

Nəghatən rəha Iesu, nəsanənən tətətig lan

²⁸Kən nian Iesu təmol namnun rəhan nəghatən, kən netəmim narmilat təmiwig pik ron,

²⁹məto-inu nian tatəgətun, sənəmə tahmen e rəhalat iəgətun min rəha Lou, məto rəhan nəghatən təfigəm, nepətən əh-ikin.

Matiu 8

Iesu təmol-wir suah kit təmos nimisən u leprosi

(Mak 1:40-45; Luk 5:12-16)

¹Nian Iesu təmeiuaiu-pa e nitot, netəmim tepət kəmotətəu-pən.

²Kən suah kit nimisən u leprosi təmol təmuwa ron, misin-pən nulın o Iesu, kən mən məmə, “Iərəmərə, okəmə nakolkeike, kən nəkitun nol-wirən io kən mafəl rəkis namkimikən lak.”

³Kən Iesu təməg-əfəməh-in nelmin mələhəu-pən lan, mən məmə, “Əwəh. Iakolkeike. Əwir-ta.” Kən roiu agin-əh, nimisən leprosi təmagim mikə lan.

⁴Kən Iesu təmən-ipən kəm in məmə, “Əsən-iarəpən natimnat min u kəm netəmim, məto uwın əm mehm pris kit pəs in tehm məmə nıpətım tinol min-nulan, kən os-ipən kəm in nat u itəm Lou rəha Moses təmən o suah kit itəm rəhan leprosi tinikə, kən netəmim okotitun məmə nıpahrienən ninəwir, kən rəham namkimikən tinikə.”

Nahatətəən rəha etəm-iasol kit rəha mopael min

(Luk 7:1-10)

⁵Kən Iesu təmuwın miet-arəpən əpəh e taon Kapaneam, kən etəm-iasol kit rəha mopael min rəha netəm Rom təmuwa məplan Iesu, kən mətasək-pən ron matən məmə,

⁶“İərəmərə, rəhak iolwək tatimis, kən mətapıl əpəh e nimə rəhak, nıpətin rafin təmimis, kən tatəto tərat pik.”

⁷Kən Iesu təmən-ipən kəm in məmə, “Oekimnə mol in təwir min.”

⁸Kən etəm-iasol rəha mopael min təmən-ipən kəm in məmə, “İərəmərə, io etəmim kit itəm esətuatipən, kən esahmenən məmə ik onəkuwa e rəhak nıpəgnoa nimə. Ən əm nəghatən kit, kən ekitun məmə in otəto təwir min.

⁹Ekitun məmə nimisən əh otəkəike mol nəwiam, məto-inu io min, rəhak netəm-iasol min kotərəmərə lak, kən iatol nəwialat, kən mopael min neen əh-ikin itəm io ekərəmərə elat. Okəmə ekən kəm kit məmə, ‘Uwın,’ kən tuwın. Kən okəmə ekən kəm kit məmə, ‘Wa,’ kən tuwa. Kən okəmə ekən kəm rəhak slef məmə, ‘Ol nat u,’ kən tol nat əh.”

¹⁰Nian Iesu təməto nəghatən əh, kən narmin təmiwig pik ron, kən təmən-ipən kəm netəmim itəm koatuarisig-in məmə, “Nıpahrienən iakatən kəm itəmat məmə, suah u sənəmə in etəm Isrel. Kən nat ərnapın noanol min rəha Isrel, məto esəhmən ilat kit itəm rəhan nahatətəən təskasik tahmen-pən lan.

¹¹Iatən kəm itəmat məmə netəmim tepət okotisi-pən e nikalın par ikin ne e nikalın pah ikin, okotuwa motagwən kitiəh e tepıl ilat Epraham, ne Aisak, ne Jekop əpəh e nərəmərəən əpəh e nego e neai.

¹²Məto itəmat noanol rəha Isrel itəm Uhgın təmaupən mitəpun itəmat məmə in otərəməərə etəmat, in otəra kin-pən itəmat ihluə e napinəpən, kən ikin əh, netənim okotasək kən moatəto tərət, kən moatəgətəin nəluilat min.”

¹³Kən Iesu təmən-ipən kəm etəm-iasol rəha mopael min məmə, “Atuwın. Rəham iolwək otəwir tol əm məmə inu ne nəmahatətə məmə Uhgın otol mihin.” Kən e nian ətuatip əh, nıpəti iolwək rəha etəm-iasol rəha mopael min təmuwa məwir min.

Iesu təmol nımısən tēpət kotəwir min

(Mak 1:29-34; Luk 4:38-41)

¹⁴Kən Iesu təmuwın e nımə rəha Pita, kən muwın imə məplan uhu Pita tatətəp-ətəp mətapıl.

¹⁵Kən təməg-əfəməh-in nelmin mek nelmi pətaguıhl un, kən nətəp-ətəpən təmagım mikə, kən tınətul. Kən minatol nagwənən niği Iesu.

¹⁶Kən ehnaipən in, netənim kəmotəmik netənim tēpət itəm narmin rat tətətig elat motuwa o Iesu, kən Iesu təməhg-iarəp narmin rat min e nəghatən əm rəhan, kən mol-wır netənim rafin itəm koatımıs.

¹⁷Natimnat min əh təmol nəhlan məmə otol nəghatən rəha ien Aesea tuwa mol nıpahrienən lan, itəm təmən aupən ikin məmə, “In təmos-irəkis nımısən min rəhatat, kən mol nıpətıtət min itəm kotahmə, kotəwir.”

Etənim kəiu kəmioalkeike məmə okıauarisig-in Iesu

(Luk 9:57-62)

¹⁸Kən nian Iesu təməplan nımanin netənim itəm koatıtəlau in, kən təmən-ipən kəm rəhan netənim məmə okotuwın e nıkali lek entənıpən-pən.

¹⁹Kən iəgətun kit rəha Lou təmuwa mən-ipən kəm in məmə, “İəgətun. Hiə ikin onakatuwın-pən ikin, oekətəu-pən ik.”

²⁰Məto Iesu təmən-ipən kəm in məmə, “Kuri iarupın min, rəhalat nıpəg tatig o napılən, kən mənig min nımaalat tatig o napılən. Məto Nəti Etənim, in rəhan nımə rəha napılən tikə məmə otuwın mapıl ikin.”

²¹Kən etəmim kit min rəha Iesu təmuwa mən-ipən kəm in məmə, “Iərəmərə. Oekətəu-pən ik mətə, pəs ekuwin pitən mitənim rəhak tata.”

²²Mətə Iesu təmən-ipən kəm in məmə, “Ətəu-pa io. Netəmim itəm kəsotolən nəwia Uhgın, in tahmen əm məmə ilat kinotimis rəkis. Pəs ilat okotuwin motitənim rəhalat netəmim itəm kəmotimis.”

Iesu təmən-iəhau nimətag asol e Lek Kalili

(Mak 4:35-41; Luk 8:22-25)

²³Kən Iesu təmuwin e pot, kən rəhan min netəmim kotuwın ilat min.

²⁴Kən təsuwəhən, nimətag asol kit tətul kən minol peau-peau asol min e lek, kən nəhau tatər-pən e pot, iuəhkır əm pot tətəmmim, mətə Iesu tətəpıl.

²⁵Kən kəmotuwın motəhgaiir e Iesu motən-ipən məmə, “!Iərəmərə! !Osmegəh kitat! !Otəsuwəhən kotəmmim!”

²⁶Kən Iesu təmən-ipən kəm ilat məmə, “?Tahro nakotəgın pık? Rəhatəmat nahatətəən təkəku agın.” Kən təmətul mən-iəhau nimətag ne peau-peau asol min. Kən nimətag təmurahl nelmin, kən tinəməlinu tinəməlinu.

²⁷Kən netəmim rəha Iesu narmilat təmiwig pık moatən məmə, “!Ei! ?Etəmim naka u? Nat ərnapın nimətag ne nəhau, mətə ilau kətioal nəwian.”

Iesu təməhg-iarəp narmin rat e etəmim kəiu

(Mak 5:1-20; Luk 8:26-39)

²⁸Kən nian Iesu təmuwa miet-pa entənipən-pən e lek, ikin Katara, kən etəmim kəiu itəm narmin rat min kotatig elau kəmiaiet-arəpa məmə okuəplan Iesu. İlau kəmiəsipən e nipəg kəpiel min, ikin katitənim netəmim ikin. İlau kuəsanən mətioh netəmim, kən netəmim koatəgın nuwin-pənən ikin.

²⁹Kən əmun narmin rat min itəm kotatig elau kəmotaget əfəməh motən məmə, “!Ik Nəti Uhgın! ?Nəmuwa məmə nakahrol itimat? ?Nəmuwa məmə nakol nalpınən kəm itimat itəm təsölən əh nian rəhan?”

³⁰Iuəhkır əm olat, pıkəs min tepət əh-ikin kotəgwən,

³¹kən narmin rat min kotasək-pən o Iesu motən məmə, “Okəmə nəkəhg-iarəp itimat, ahl-ipən itimat ekotuwin e pıkəs min əh.”

³²Kən Iesu təmən-ipən kəm ilat məmə, “Otuwin.” Kən narmin rat min kəmotiet elau, motaiu motuwin e pikəs min, kən əmun pikəs min ilat rafin kəmotaiu moteiuaiu ikin təkul-əkul ikin, kən motiet-pən e lek motamnim.

³³Kən netəmim itəm koatehm pikəs min, kəmotagim motuwin e taon motən-iarəp natimnat rafin, ne natimnat itəm Iesu təmol kəm suah mil itəm narmin rat min kotatig elau.

³⁴Kən əmun netəmim rafin rəha taon kəmotuwa məmə okotəplan Iesu. Kən nian kəmotəplan in, kən kəmoatəkəike əskasik kəm in məmə otəkəike miet əh-ikin əh.

Matiu 9

Iesu təmol-wir etəm nipətin təmimis

(Mak 2:1-12; Luk 5:17-26)

¹Kən Iesu təmuwin e pot muwin entənipən-pən e lek, kən miet-arəpa iman ikin, e taon Kapaneam.

²Kən netəmim neen kəmotiləs etəmim kit motuwa ron. Nipətin məsin təmimis, kən mətapil e rəhan nimitiwin. Kən nian Iesu təməplan rəhalat nahatətən, kən təmən-ipən kəm etəm tatimis un məmə, “Nətik, əsəginən. Rəham nolən rat min emos-irəkis rəkis.”

³Kən nian kəmotəto nəghatən əh, iəgətun min neen rəha Lou kotən-ipən kəm ilat min məmə, “Nəghatən əh tərət. Suah əh tatəghat məmə otol məmə in Uhgın.”

⁴Məto Iesu titun nətəligən rəhalat kən təmən-ipən kəm ilat məmə, “?Tahro itəmat nakoatos nətəligən itəm tərət min-nulan?”

⁵?In pəhruən timətig məmə oekən, məmə, ‘Emafəl rəkis rəham nolən rat min,’ o ‘Ətul maliwək?’

⁶Kən roiu ekol nat kit məmə nəkotitun məmə Nəti Etəmim tatos nepətən ikin-u e nətueintən məmə ofafəl rəkis təfagə rat min.” Kən in təmən-ipən kəm suah əh tatimis məmə, “Ətul miləs rəham nimitiwin maliwək matuwin latuənu.”

⁷Kən suah u tatimis tēmətul maliwək matuwīn latuənu.

⁸Kən nian nīmanin netēmim kəmotəplan nat əh, kən kəmotəgin, kən motənwiwi nərgi Uhgīn itəm təmos-ipən nepətən kəm etēmim məmə otol nəhlan.

Iesu tēmaun-in Matiu

(Mak 2:13-17; Luk 5:27-32)

⁹Kən Iesu tēmaliwək muwīn mēsīn mīn, məplan suah kit, nərgīn u Matiu. In etēmim itəm tatos mēni rəha takis, kən tatəpələh ikīn katətou-pən takis ikīn. Kən Iesu tēmən-ipən kəm in məmə, “Uarisig-in io, muwa etēmim rəhak.” Kən in tēmətul muarisig-in Iesu.

¹⁰Kən Iesu tēmuwīn mətəgwən e nīmə rəha Matiu, kən netēmim tēpət rəha nosən mēni rəha takis kəmotuwa, kən netēmim tēpət itəm koatol təfagə rat kəmotuwa, kən ilat kəmotuwa motəpələh motəgwən ilat Iesu ne rəhan netēmim.

¹¹Kən nian Farisi mīn kəmotəplan nat əh, kən kotən-ipən kəm netəm rəha Iesu məmə, “?Tahro rəhatəmat iəgətun tətəgwən kələh ilat netəm koatos mēni rəha takis ne netəm koatol təfagə?”

¹²Məto Iesu tēməto rəhalat nəghatən kən tēmən-ipən kəm ilat məmə, “Etēmim itəm tēsīmīsən təsuwīnən məplan tokita. Məto etēmim u itəm tatimis, in otəkəike muwīn məplan tokita.

¹³Otuwīn motegəs-in motol nīpəti nəghatən u pahrien itəm Naoa Rəha Uhgīn tatən məmə, ‘Nat kit tatol nīkik tətəgien, inu məmə onəkotasəkitun netēmim, məto sənəmə rəhatəmat sakrifais mīn itəm nəkoatol moatos-ipa kəm io itəm tatol nīkik tətəgien.’ Iatən tol mīn-nulan məto-inu eməsuwamən məmə ekaun-in netəm mīn u itəm nīkilat təht məmə kinotətuatip rəkis məmə okotuarisig-in io, məto emuwa məmə ekaun-in netəm mīn u, netəm nol təfagə məmə okotuarisig-in io.”

Nolən rəha napəsən nagwənən o Uhgīn

(Mak 2:18-22; Luk 5:33-39)

¹⁴Kən netəmim rəha Jon Baptaıs kəmotuwa motəplan Iesu motən-ipən kəm in məmə, “Əplan-tu. İtimat ekotətuakəm motapəs nagwənən motəfak kəm Uhgın, kən Farisi mın, ilat mın koatol mihin. ?Məto təhrol e rəham netəmim kəsotolən nəhlan?”

¹⁵Kən Iesu təmən-ipən kəm ilat məmə, “?Nian netəmim koatol marit rəha suah kit, kən in tətətig e nagwənən rəhan ilat in mın neen, nikitəmat təht məmə in mın neen okotasək? !Kəp! Məto nian əh-ikin itəm tatuwa məmə netəmim okotıləs-irəkis etəmim itəm katol nagwənən rəhan. Kən e nian əh, in mın neen kotitun napəsən nagwənən.

¹⁶“Kən etəmim kit təkə məmə otos nımısmısi nıməhan wi kit, kən məhlətəin-pən e nıməhan oas rəhan itəm təməhap, məto-inu okəmə tol nəhlan, kən nımısmısi nıməhan wi titun nəhapən nıməhan oas, kən ikin təməhap ikin aupən titun nuwamən mol iahgin pık agın.

¹⁷“Kən etəmim kit təkə məmə otos wain itəm kəmol wi, kən miuw-pən e pətəl oas u təkəsik itəm kəmol e nuwıgı nəni. Okəmə tol nəhlan, kən wain otahləpık, kən pətəl otəhap, kən wain otəhtəg, kən pətəl otərat. Məto wain itəm kəmol wi okəkəike kiuw-pən e pətəl itəm kəmol wi tımətmətig, kən wain ne pətəl katuəməhl wir.”

Pətagwəhl kit itəm tatımıs ne pətan əkəku kit itəm təmımıs

(Mak 5:21-43; Luk 8:40-56)

¹⁸Nian Iesu tatən-ipən natımnat mın əh kəm ilat, etəm-iasol kit tuwa misin-pən nulın o Iesu məmə, “Nətık pətan əkəku təmımıs roiu əm. Məto wa, mələhəu-pən nelməm lan, kən otəmegəh mın.”

¹⁹Kən Iesu təmətul ne rəhan netəmim, motuarisig-in suah un motuwın.

²⁰Kən əmun pətan kit əh-ikin itəm tatos nımısən rəhalat nıpitan nian rafın əm, minos nup tuelef. Kən pətan əh təmısi-pən e məntaa Iesu ikin, kən meapən mek nıpəgnəmti kot məsin rəhan,

²¹təmol nəhlan məto-inu tatən atıp kəm in məmə, “Okəmə ekek əm rəhan kot, kən rəhak nımısən otol namnun.”

²²Kən Iesu təmeirair məplan pətan əh, kən mən-ipən kəm in məmə, “Nətik pətan, əsəginən. Rəham nahatətən təmol ik ninəwir min.” Kən e nian əh, rəhan nimisən təmikə.

²³Kən nian Iesu təmuwa miet-arəpa e nimə rəha etəm-iasol əh, kən təmuwin imə məplan netəmim koatahl nau motan napuən lan rəha nimisən, kən netəmim kəmoatasək p̄ik.

²⁴Kən Iesu təmən-ipən məmə, “Otiet motuwin isəu, məto-inu pətan əkəku un təsimisən, məto in tətəp̄il əm.” Kən ilat kəmotalah e Iesu.

²⁵Məto nian netəmim kəmotiet motuwin ihluə, kən tuwin imə, maskəlim nelmi pətan əkəku, kən pətan əkəku un təmətul.

²⁶Kən namnusən rəha nat u təmaiu m̄itəlau rafin e nəptən əh.

Iesu təmol-wir iganəmtin rat kəiu

²⁷Kən nian Iesu təm̄iet ikin əh, məto iganəmtin rat mil kəiu kəmuətəu-pən in, kən mətuagət əfəməh məmə, “!Mipi Kig Tefit, asəkitun itimlau!”

²⁸Nian Iesu tinuwin əpəh imə, kən iganəmtin rat mil kuea ron. Kən Iesu təmən-ipən kəm ilau məmə, “?Itəlau nətuahatətə məmə ekitun nol-wirən niganəmtitəlau, o kəp?” Kən ilau kuən-ipən məmə, “Əwəh, Iərəməərə.”

²⁹Kən Iesu təmələhəu-pən nelmin e niganəmtilau mən-ipən məmə, “Uhḡin otol-wir niganəmtitəlau məto-inu nəmuahatətə lan.”

³⁰Kən niganəmtilau tinəwir kən kinatuəplan nat. Kən Iesu təmən-ipən əskasik kəm ilau məmə, “Onəsüən-iarəpən natimnat min u kəm netəmim.”

³¹Məto ilau kəmiaiet mian, kən muən-iarəp namnusən rəha Iesu tuwin m̄itəlau e ikin min rafin e nəptən u.

Iesu təməhg-iarəp narmin rat e etəm təruru nəghatən

³²Nian suah mil u kəmiaiet, netəmim kotiləs etəmim kit təruru nəghatən motuwa o Iesu. Suah əh in təruru nəghatən məto-inu narmin rat tətətig lan.

³³Kən Iesu tēmāhg-iarəp narmin rat e suah əh, kən tinatəghat. Kən nimanin netənim narmilat tēmiwig pik ron, kən motən mēmə, “Suah kit təsəplanən nat kit tol nulan əpəh Isrel nian kit ne.”

³⁴Məto Farisi min kəmotən mēmə, “Tatos nəsanənən o etəm-iasol rəha narmin rat min mēmə otəhg-iarəp narmin rat min.”

Iesu nikin tēmāhmə pik o netənim

³⁵Kən Iesu tēmaliwək matuwīn e taon ne latuənu min rafin, kən matəgətun əpəh e nipəgnoa nimə min rəha nuəfiminən, matən-iarəp namnusən təwir rəha nərəmərən rəha Uhgīn, kən matol-wir netənim rafin itəm koatimis, ne netənim rafin itəm nipətīlat tərət koatəwir.

³⁶Nian tēməplan nimanin netənim tīnepət pik, kən nikin tēmāhmə pik olat məto-inu kinotos pik nahmən, kən motəruru nasitu-atipən e rəhalat nəmegəhən, kinotahmen e sipsip min itəm etənim tikə o nehmən ilat.

³⁷Kən Iesu tēmən-ipən kəm rəhan min netənim mēmə, “!Otəplan-tu! Nagwənən tepət əpəh e nasumən itəm kinotimətə, məto iolwək min noan məsin əm kotəulək-in.

³⁸Kən otəfak-pən o etəm-iasol rəha nasumən mēmə otahl-ipa iolwək min tepət mēmə okotuwīn kəulək-in nasumən rəhan.”

Matiu 10

Netəm tuelef rəha Iesu

(Mak 3:13-19; Luk 6:12-16)

¹Kən Iesu tēmaun-in netəm tuelef rəhan kotuwa kitīəh, kən mos-ipən nəsanənən kəm ilat mēmə ilat kotitun nəhg-iarəpən narmin rat min e netənim, kən motitun nol-wirən nimisən min rafin, ne netəm min u nipətīlat tēmərat.

²Kən inu nərgi netəm tuelef rəha Iesu: in taupən Saimon, u nərgin kit min un Pita; ne təhan Antru; ne Jemes ne pian Jon, nəti Sepeti mil;

³ne Filip ne Patolomiu; ne Tomas ne Matiu, etənim rəha nosən məni rəha takis; ne Jemes nəti Alfeas; ne Tateas;

⁴ne Saimon u kətaun-in məmə Selot; ne Jutas Iskariot u təmegəhan-in-pən Iesu tuwin e nelmi rəhan tikimir min.

Iesu təmahl-iarəp rəhan netəmim tuelef

(Mak 6:7-13; Luk 9:1-6)

⁵Kən nian Iesu təmahl-iarəp rəhan netəmim tuelef məmə okotuwın motol wək rəhan, təmaupən məghat kəm ilat məmə, “Itəmat onəsotuwınən o netəm min un sənəmə noanol min rəha Isrel, kən məsotuwınən e taon kit rəha netəm Sameria,

⁶məto onəkotuwın o noanol min rəha Isrel itəm kotahmen e sipsip min koatəluə.

⁷Kən nian nakotuwın, nəkotəkəike motən-iarəp məmə, ‘Nian itəm Ughin otərəməərə e netəmim rafin lan, tınatuwa iuəhkir.’

⁸“Kən itəmat nəkotəkəike motol netəm koatimis kotəwir min. Kən itəmat nəkotəkəike motol netəm kəmotimis kotəmegəh min. Kən netəmim itəm leprosi tatol ilat, nəkotəkəike motol nipətīlat tuwa məwir min. Kən netəmim itəm narmin rat tətatiğ elat, itəmat nəkotəkəike matəhg-iarəp narmin rat min kotuwın isəu olat. Kən nəsanənən itəm nəmos, nəməsotosən nəmtin. Kən onəkotəkəike motol wək əm, netəmim okəsətouən itəmat lan.

⁹Nian nakotuwın, nəsotosən məni.

¹⁰Kən məsotəmikən rəhatəmat kətim min. Kən natimnat itəm nakoatuwin-in, in əm un, məsotos minən iahgoau kit min. Kən məsotosən put, ne kasikin rəhatəmat min. Iatən nəhlan məto-inu tətuatip əm məmə katos-ipən kəm iolwək min natimnat itəm tətuatip o natigən rəhalat.

¹¹“Nian nakotuwın e taon kit o latuənu kit, nəkotəkəike motehm etəmim kit itəm nikin tagien məmə nakotuwın mətatiğ itəmat min, kən nakoatatiğ ikin əh mətoarus-pən nian nakotiet min.

¹²Nian nakotuwın kətatiğ e nimə kit, nəkotəkəike kəghat wir kəm ilat məmə, ‘Nəməlinuən tətatiğ otəmat.’

¹³Kən okəmә netәmim e nipәgnoa nimә u, nikilat tagien mәмә okotos itәmat, kән pәs rәhatәmat nәghatән rәha nәmәlinuән tәtatig olat. Mәto okәмә nikilat tәsagienән otәmat, nәkotәkәike motos nәghatән rәha nәmәlinuән moatuwin.

¹⁴“Kән okәмә netәmim neen kәsotolkeikeән mәмә okotit itәmat nakotuwин e rәhalat nipәgnoa nimә, o kәsotәtәlig-inән rәhatәmat nәghatән, kән nian nәkoatiet e nimә rәhalat, o rәhalat latuәnu, nәkotәkәike motohapispis rәkis nisip e nelkitәmat mәмә ilat okotitun mәмә nәmotәuhlin-pән mәntaatәmat olat.

¹⁵Nipahrienән iatән kәм itәmat, e nian itәм Uhgин otakil netәmim, nalpinән rәha netәм min әh in otәskasik pik maprәkis-in nalpinән rәha netәм kotәrat aupән e taon mil әh, Sotom ne Komora.”

Netәmim okotol tәrat kәм netәmim rәha Iesu

¹⁶Kән Iesu tәmatәkәike matән mәмә, “Otәtәlig-in-tu. Etahl-ipән itәmat nakoatuwin tahmen e sipsip min itәм kәmotuwин ilugin e kuri iarupин min. Onәkotәkәike motenatig wir tahmen e malikim, kән itәmat motan mәtig tahmen e mәnig mak.

¹⁷Onakoatәto wir itәmat o netәmim, mәto-inu ilat okotilәs itәmat mәмә nәkoatәtul e niganәmti kaonsel rәhalat, kән okotalis itәmat әpәh imә e nimә rәha nuәfiminән.

¹⁸“Kән mәto-inu itәmat netәmim rәhak, okotewkәkan itәmat nakotuwин motәtul e niganәmti etәм-iasol min rәha kapman min, ne kig min mәмә onәkotән-iarәp nәghatән tәwir rәhak e niganәmtilat, kән e niganәmti Iaihlua min.

¹⁹Nian ilat okotuwa motilәs itәmat, kән nikitәmat tәsәht pikән mәмә onәkotuwин motән mәмә naka, o nakotәhrol nulan motәghat. Nәsotәginән mәto-inu Narmin Rәha Uhgин, in otos-ipinә nәghatән itәм onәkotән e nian әtuatip әh.

²⁰Nәsotәginән mәto-inu sәnәmә itәmat onәkotәghat, mәto Narmin Rәha rәhatәmat Tata, otos-ipinә nәghatән kәм itәmat mәмә nakoatән-iarәp.

²¹“Netəmim okotegəhan-in-pən pialat ətuatip min kəm rəhalat tikimir min məmə okotohamnu ilat, kən tata min okotol mihin min kəm nenətilat ətuatip min, kən nisualkələh okotətul motol nolən ahmen min əm kəm rəhalat tata min ne mama min məmə okotohamnu ilat.

²²Netəmim rafin okotetəhau itəmat o nərgək. Məto etəm otətul əskasik mətoarus-pən natimnat min un okotol namnun, kən Uhgın otosmegəh.

²³Nian okotol tərət kəm itəmat e taon kit, kən nakotiet motagim motuwın e taon pisin kit min. Iatən pahrien kəm itəmat məmə okol nəsotuwın rafinən e taon min rəha Isrel mətoarus-pən Nəti Etəmim in otuwa min.

²⁴“Netəmim itəm koatətəlig-in, okol kəsotaprəkis-inən rəhalat iəgətun, kən iolwək min, okol kəsotaprəkis-inən rəhalat etəm-iasol.

²⁵Netəm katəgətun ilat, kotəkəike motagien məmə okotuwa motahmen e iəgətun rəhalat, kən iolwək min kotəkəike motagien məmə okotuwa motahmen e etəm-iasol rəhalat. Io, io etəm-iasol rəha nimə. Okəmə netəmim neen kotən rat io məmə io Pielsepul, u nərgin kit rəha Setan, kən okol tahmen min əm e iolwək min rəha nimə rəhak.”

Etəmim rəha Iesu təsəginən etəmim

(Luk 12:2-7)

²⁶Kən Iesu təmən məmə, “Tol nəhlan, əsotəginən netəmim. Natimat itəm netəmim koatəfətain, Uhgın otiləs-iarəpa ikin tagəhag ikin, kən natimnat itəm netəmim koatəhluaig-in, Uhgın otiləs-iarəpa, netəmim rafin kotəplan.

²⁷Natimnat itəm iatən kəm itəmat e napinəpən, itəmat onəkotəkəike motən-iarəp min e nəhag-əhagən, kən natimnat itəm iatən anion, itəmat onəkotəkəike motən-iarəp asol e niganəmti netəmim.

²⁸“Sotəginən netəmim itəm kotitun nohamnuən nipətətəmat, məto okol kəsotohamnuən narmitəmat. Məto nəkotəgin Uhgın itəm titun nərəkinən nipətətəmat ne narmitəmat e nigəm asol.

²⁹Otəplan-tu. Məniğ əlkələh min, netəmim koatol-salim-in məni əkəku əm. Məto okəmə rəhatəmat Tata Uhgın təsegəhan-inən ilat, okol kit təsimisən.

³⁰Kən noanutəmat e rəhatəmat-kapə, Uhgīn tətəfin rafin ilat.

³¹!Tol nəhlan, sotəgīnən! Uhgīn tolkeike pīk itəmat taprəkis-in mənīg əlkələh mīn əh.

³²“Tol nəhlan, okəmə etəmim otən-iarəp nərgək e nīganəmti netəmim, kən io mīn iatən-iarəp nərgīn e nīganəmti rəhak Tata e nego e neai.

³³Məto okəmə etəmim otən-iarəp e nīganəmti netəmim məmə in sənəmə rəhak, kən ekən-iarəp e nīganəmti rəhak Tata e nego e neai məmə in sənəmə rəhak.

³⁴“Nikitəmat təsəhtən məmə emuwa məmə ekələhəu nəməlinuən e nətueintən. Eməsuwamən məmə ekələhəu nəməlinuən, məto emuwa məmə ekol netəmim kotəmu.

³⁵Iatən nəhlan məto-inu emuwa məmə ekol iərman otol timəht ilau rəhan tata, kən pətan otol timəht ilau rəhan mama, kən pətan otol timəht ilau uhun,

³⁶kən etəmim otol tīkīmīr ilat atīp rəhan mīn.

³⁷“Kən etəmim itəm tolkeike pīk rəhan tata ne mama taprəkis-in io, in təsahmenən məmə otuwa rəhak etəmim. Kən etəmim itəm tolkeike pīk netīn iərman o pətan taprəkis-in io, in təsahmenən məmə otuwa rəhak etəmim.

³⁸Kən etəmim itəm təsīləsən rəhan nīg kəməluau muarisīg-in io, in təsahmenən məmə otuwa rəhak etəmim.

³⁹Kən etəmim itəm tatol pīk wək əm məmə rəhan nəmegəhən e nətueintən u in otəwīr, otəmkarəpən e nəmegəhən pahrien. Məto etəmim itəm otīmīs o nərgək, in otos nəmegəhən līlīn.

⁴⁰“Kən etəmim itəm tatos itəmat e nīkin agien, kən tahmen əm məmə tatos io e nīkin agien. Kən etəmim itəm tatos io e nīkin agien, kən tahmen əm məmə tatos etəm u itəm təmahl-ipa io.

⁴¹Kən etəmim itəm tatos e nīkin agien ien rəha Uhgīn, məto-inu in titun məmə suah u in ien rəha Uhgīn, in otos nətouən lan, tahmen əm e itəm ien

min koatos. Kən etəmim itəm tatos e nikin agien etəm ətuatip, məto-inu in titun məmə in etəm ətuatip, in otos nətouən lan, tahmen əm e etəm ətuatip.

⁴²Kən etəmim itəm tatos-ipən nəhau ətəp noan-məsin əm kəm rəhak etəmim, məto-inu in titun məmə rəhak etəmim, nat əpnəpən rəhak etəmim in ləhau agin, niphrienən iatən kəm itəmat məmə, okol təsəmkarəpənən e rəhan nətouən.”

Matiu 11

Iesu ne Jon Baptais

(Luk 7:18-35)

¹Nian Iesu tinol namnun nəgətunən rəhan netəm tuelef, təmiet ikin əh muwin e taon min e nitən Kalili, matəgətun netəmim kən matən-iarəp nəghatən rəha Uhgən kəm ilat.

²E nian əh, Jon Baptais tətətig e kalapus, kən in təməto namnusən e wək itəm Iesu tatol. Kən təməhl-ipa rəhan neen netəmim kotuwən motətarəh ron məmə,

³“?Tahro? ?Ik u etəm kəmatən aypən məmə suah kit otuwa, o itimat ekoatəsağin etəmim kit min məmə otəpanuwa min?”

⁴Kən Iesu təmən-ipən kəm ilat məmə, “Otuwin motəplan Jon motən-ipən nat naka itəm nəmotuwa motəto kən motəplan:

⁵netəm niganəmtilat təpis kinoatəplan nat. Kən netəmim itəm nelkilat tərət kinotəto təwir kən minotaliwək. Kən netəm min u kəmos nimisən leprosi, nuwigilat tinəwir. Kən netəm min u matəlgilat təmalu, roiu matəlgilat tinoag, kən netəm min u kəmotimis, kinotəmegəh min. Kən ian-rat min, roiu əh suah kit tinatən-iarəp namnusən təwir kəm ilat.

⁶Etəmim otətig e nəwirən pahrien okəmə in təsəhlmanən rəhan nahatətən lak o natimnat itəm io ekol.”

Iesu təməghat-in Jon Baptais

⁷Nian netəmim rəha Jon koatitəlig, kən Iesu tinətuoun matəghat-in Jon kəm netəm min u koatəpələh əh-ikin, matən məmə, “?Aypən, nəmotuwən ikin

taruən-aruən ikin məmə nəkotəplan naka? ?Nəmotuwīn məmə nəkotəplan suah kit tahmen e nuwig itəm nīmətag tətahləpik-ahləpik əpnəpīn əm? Kəp.

⁸?Kən tahro itəmat nəmoatiet, məmə nəkotəplan suah kit itəm tatuwīn e napən wir nəmtin tiəkis? Kəp. Netəm kotuwīn e napən wir tol nəhlan, nian rafin kotatig e nīmə rəha kig.

⁹?Kən tahro itəmat nəkoatiet, məmə nəkotəplan ien kit? Əwəh, nīpahrienən, kən etəmim əh in ilis taprəkis-in ien.

¹⁰Inu etəm Naoa Rəha Uhgīn təmatəghat-in nian Uhgīn təmən məmə, ‘Otəplan-tu. Iatahl-ipīnə rəhak iahləpis itəm otos rəhak nəghatən. In otaupən-in ik məmə otol əpen-əpenə e rəham suatip.’

¹¹Nīpahrienən iatən kəm itəmat, etəmim tikə itəm təmaiir e nətueintən in ilis taprəkis-in Jon Baptais, kən mətə etəm ləhau agin e nərəmərən rəha Uhgīn, in ilis taprəkis-in Jon.

¹²E nian Jon Baptais təmətuoun matən-iarəp nəghatən rəha Uhgīn mətəarus-pa roiu, nərəmərən rəha Uhgīn in təkaskik məmə otol wək matuwīn. Kən netəmim itəm kotəskasik kotalkut pik məmə okotuwīn motatig ahgin.

¹³Iatən nəhlan mətə-inu, aupən agin mətəarus-pa nian rəha Jon, nəghatən min rəha Lou itəm Uhgīn təmos-ipən kəm Moses, ne nəghatən min rəha ien min rəha Uhgīn, koatən-iarəp nərəmərən rəha Uhgīn.

¹⁴Kən okəmə nikitəmat tagien məmə nakotos nətəligən u, ekən məmə Jon in Elaija itəm in ien kit aupən kəmatən məmə otuwa.

¹⁵Etəm matəlgin tatig, təwir məmə in otətəlig-in wir kən mitun nəghatən min u.

¹⁶“?Netəm min u itəm koatətig roiu, ilat kotəhrol nulan? Ilat kotahmen e nisualkələh itəm koatəpələh ikin katol maket ikin moatakuhl motaun-in ilat min neen məmə,

¹⁷‘Itimat emotahl nau kəm itəmat məmə onakoatol danis rəha nagienən lan, mətə itəmat nəkəsotolən danis. Kən itimat emoatasək eiuə rəha nimisən, mətə nəsotasəkən kitat min itimat.’

¹⁸Iatən nəhlan mətə-inu Jon təmuwa, kən matətuakəm mətəpəs nagwənən matəfak kəm Uhgīn, kən məsənimən wain. Kən netəmim kotən məmə, ‘Suah əh, narmin rat kit tətətig lan.’

¹⁹Mətə nian io, Nəti Etəmim, emuwa kən mətəgwən kən matənim wain, kən netəmim kotən məmə, ‘Otəplan-tu, suah əh in etəmim rəha nagwən pīkən ne etəmim rəha napīsən, kən motan kələh ilat netəmim rəha nosən məni e takis, ne netəmim itəm nol təfagə.’ Mətə netəmim itəm koatətəu-pən nitunən rəha Uhgīn koatol wək wir min. Kən wək wir min əh koatəgətun məmə nitunən rəha Uhgīn in nīpahrienən.”

Nahməən asol otuwa

(Luk 10:13-15)

²⁰Kən Iesu təməghat əskasik e netəm e taon min əh itəm in təmōl nat pīspīs tēpət ikin e niganəmtīlat. Təməghat nəhlan mətə-inu ilat kəsotəuhlinən nətəligən rəhalat o rəhalat nolən rat min.

²¹Təmən məmə, “!Itəmat netəm Korasin, kəsi, nahməən asol otuwa otəmat! !Itəmat netəm Petsaeta, kəsi, nahməən asol otuwa otəmat! Mətə-inu emol pap nat pīspīs tēpət e taon rəhatəmat! Kən okəmə emol natimnat min əh əpəh Taea ne Saeton aupən, okol netəmim əh-ikin əh kəmotəuhlin rəhalat nətəligən e nolən rat min, kən ilat kəmotuwīn e natimnat rat motuwīn moatəpələh e nəmtap e nīgəm motəgətun məmə koatəto tərət agin o rəhalat nolən rat min.

²²Mətə iatən kəm itəmat məmə e nian əh itəm Uhgīn otol nalpīnən kəm netəmim, nalpīnən rəhatəmat in otəskasik, maprəkis-in nalpīnən rəha netəm Taea ne Saeton aupən ikin.

²³“?Kən itəmat netəm Kapaneam, nikitəmat təht məmə Uhgīn otīləs-ipər itəmat e ikin rəha nisīaiiən əpəh e nego e neai? !Kəp! Mətə Uhgīn otəhlman itəmat nakotuwīn ləhau agin, imə naulisən, mətə-inu emol nat pīspīs tēpət e

taon rəhatəmat. Kən okəmə emol natimnat min əh əpəh Sotom, kən netəm ikin kəmotəuhlin rəhalat nətəligən, kən okol Uhgın təməsərəkənən Sotom, kən təmətətig əm mətoarus-pa u-roiu.

²⁴Məto iatən kəm itəmat məmə e nian əh itəm Uhgın otol nalpınən kəm netəmim, nalpınən rəhatəmat in otəskasik, taprəkis-in nalpınən rəha netəm Sotom aupən ikin.”

Itəmat itəm ninotəpou

(Luk 10:21-22)

²⁵Kən e nian əh, Iesu təməfak matən məmə, “Tata Uhgın, ik İərəmərə rəha natimnat rafın ilis e neai ne ləhau e nətueintən. Iatənwiwi ik məto-inu nəməhluaig-in nıpəti natimnat min u e niganəmti netəmim itəm kotenatig motitun wir nat. Kən nəmol-arəp kəm netəmim itəm kotahmen-pən əm e nisualkələh məmə okotitun wir.

²⁶Əwəh, Tata, inu nat kit itəm nakolkeike.”

²⁷Kən Iesu təmatəkəike matən kəm ilat məmə, “Rəhak Tata təmos-ipa nitunən rafın agın kəm io. Kən suah kit tikə itəm titun wir io u Nəti Uhgın, məmə io pah ətuatip. Məto Tata Uhgın əm titun. Kən suah kit tikə itəm titun wir Uhgın, məto io pisin əm u Nəti Uhgın, ekıtun, ne netəmim itəm io emitəpun məmə ekol-arəp Tata Uhgın kəm ilat.

²⁸“Otuwa ron io, itəmat itəm nəkotol pik wək kən ninotəpou o natipa-inən katipa əfigəm min, kən ekos-ipinə namegən.

²⁹Pəs kotalis rəhak katipa, kən pəs iakaupən mägətun itəmat lan. Iatən nəhlan məto-inu io etəm mətig, kən rəhak nətəligən in ləhau. Kən onəkotos namegən e rəhatəmat nəmegəhən.

³⁰Tol nəhlan məto-inu rəhak wək ekos-ipinə kəm itəmat in timətig, kən rəhak katipa in toigoig.”

Matıu 12

İərəmərə rəha Sapat

(Mak 2:23–3:6; Luk 6:1-11)

¹Kən e nian əh e Sapat kit, Iesu ne rəhan min netəmim kəmotaliwək motuwın-pən e nasumən rəha wit, nat kit tahmen e rais, kən rəhan netəmim nəumis təmus ilat, kən kəmotəhl noa wit kən motun.

²Məto nian Farisi min kəmotəplan ilat, kən kəmotən-ipən kəm Iesu məmə, “!Ei, əplan-tu! Rəham netəmim koatol nat kit itəm koatətgəhl Lou rəha Sapat.”

³Kən Iesu təmən-ipən kəm ilat məmə, “?Nəmotafin o kəp, nat naka itəm Kig Tefit təmol aupən, nian in ne rəhan min netəmim nəumis təmus ilat?

⁴In təmuwın imə e Nimə Tapolen Rəha Uhgın, kən mos pıret mun itəm pris min kinotos-ipən rəkis kəm Uhgın. Kən nolən əh tatətgəhl Lou, məto-inu pıret əh, Lou tatən məmə pris min əm kotıtun nunən.

⁵?Kən nəmotafin e Lou o kəp, məmə nian rafin e Sapat, pris min əpəh e Nimə Rəha Uhgın, ilat koatol wək rəhalat itəm tatətgəhl Lou rəha Sapat? Məto Uhgın tatəplan məmə nat əh in tətuatıp əm.

⁶Məto iatən kəm itəmat məmə suah kit u ikin-u in ilis taprəkis-in Nimə Rəha Uhgın.

⁷E Naoa Rəha Uhgın, in tatən məmə, ‘Nat kit tatol nıkkik tətəgien, inu məmə onəkotasəkitun netəmim, məto sənəmə rəhatəmat sakrifais min itəm nəkoatol moatos-ipa kəm io itəm tatol nıkkik tətəgien.’ Okəmə nəkotıtun nıpəti nəghatən u, kən netəm min u itəm kotətuatıp, okol nəsotakilən ilat motən məmə ilat koatol nolən rat.

⁸Iatən nəhlan məto-inu io, Nəti Etəmim, io İərəmərə rəha Sapat.”

⁹Kən Iesu təmıet ikin əh, maliwək matuwın əpəh imə e nimə rəha nuəfiminən rəhalat.

¹⁰Kən əmun ikin əh, suah kit əh-ikin nelmin təmimis, təsəg-ətuatıp-inən. Kən kəmotətapəh o Iesu məmə, “?Tahro? ?In tətuatıp e Lou məmə e Sapat, etəmim titun nol-wırən etəmim itəm tatımıs?” İlat kəmotətapəh ron məto-inu koategəs-in nat tərat kit rəha Iesu itəm ilat okotıləs-ipən in e kot ron.

¹¹Kən Iesu təmən-ipən kəm ilat məmә, “?Okəmә itəmat kit rəhan kit sipsip, kən sipsip un tiwig-pən e noakimil e Sapat, nikitəmat təht məmә suah əh otuwın miuw-pər-pa mın? !Əwəh! Otəkəike muwın miuw-pər.

¹²!Məto etənim, in nat keike taprəkis-in sipsip! Kənu, in tətuatip əm e Lou məmә natol nat itəm təwir e Sapat.”

¹³Kən təmən-ipən kəm etəm nelmin tənimis məmә, “Əg-ətuatip-in-tu nelməm.” Kən təmäg-ətuatip-in nelmin, kən nelmin tinuwa mınəwir agın mın, tınahmen e nelmin kit mın.

¹⁴Məto Farisi mın kəmotiet motuwın ihluə minoatəte noa ron məmә okotohamnu Iesu.

Iolwək itəm Uhgın təmitəpun

¹⁵Kən Iesu təmitun nətəligən rəhalat, kən təmiet ikin əh. Kən netənim tepət kəmotuarisig in. Kən in təmol-wir nimisən rafin rəhalat kotuwa motəwir mın.

¹⁶Kən təmən-iəhau ilat məmә okəsotən-iarəpən in kəm netənim mın.

¹⁷Natimnat mın əh kəmotiet məmә nəghatən rəha Naoa Rəha Uhgın otuwa mol nıpahrienən lan. Uhgın təmos-ipən kəm ien Aesea u aıpən o nən-iarəpən məmә,

¹⁸“Inu iolwək rəhak itəm io enitəpun rəkis, iakolkeike pik in, kən nıkk tagien pik ron. Kən io oekol məmә Narmin Rəhak otuwa mərıoah lan. Kən in otən-iarəp nolən ətuatip rəhak ne nosmegəhən rəhak e nıganəmti netənim e nəptən pisin pisin mın.

¹⁹Okol in təsərgəhəuən kən məsəgət əfəməhən, məsəghat pikən ikin netənim kotargəfimən ilat mın ikin.

²⁰In etəm mətig, kən in otol təwir kəm netənim itəm koatəpou kən rəhalat nəsanənən tikə. In otol nəhlan mətoarus-pa nolən itəm in tətuatip, otol win e nolən itəm tərat.

²¹Kən netəm u sənəmә noanol mın rəha Isrel, ilat okotələhəu-pən əskasik rəhalat nətəligən tətətig lan, məmә in otosmegəh ilat.”

Iesu ne Pielsepul

(Mak 3:20-30; Luk 11:14-23; 12:10)

²²Kən netəmim kəmotiləs suah kit motuwa kəm Iesu itəm niġanəmtin təpis kən təsəghatən məto-inu narmin rat kit tətatiġ lan. Kən Iesu təmol-wir min, kən suah əh tənətəplan nat kən minatəghat.

²³Kən netəmim rafin narmilat təmiwig motən məmə, “?Okəmə naka suah u in Mipi Kig Tefit itəm Uhgın təmən məmə otahl-ipa?”

²⁴Kən nian Farisi min kəmotəto nat əh ne nəghatən lan, kən kəmotən məmə, “Suah əh tatəhg-iarəp narmin rat min e nəsanənən əm rəha Pielsepul u etəm-iasol rəha narmin rat min.”

²⁵Məto Iesu titun nətəligən rəhalat, kən təmən-ipən kəm ilat məmə, “Okəmə netəmim e kantri kit koator ilat min, kən okotərəkin rəhalat kantri. Kən tahmen-pən əm e taon kit o latuənu kit, okəmə netəmim kotoor ilat min, kən okotərəkin taon un o latuənu un.

²⁶“Kən okəmə Setan tatəhg-iarəp narmin rat min rəhan e netəmim, kən tatol atip əm tikimir kəm in. ?Kən otahro nulan, rəhan nərəmərəən otətul?”

²⁷?Kən okəmə io iatəhg-iarəp narmin rat min e nəsanənən rəha Pielsepul, kən tahro e rəhatəmat min netəmim? ?Ilat koatəhg-iarəp narmin rat min e nəsanənən rəha pah? ?Rəha Setan? Kəp. Kən tərət məmə nakoatən məmə io iatol nəhlan. Tol nəhlan, rəhatəmat netəmim okotakil nəghatən min rəhatəmat, motən məmə in neiueiuəən.

²⁸Məto okəmə iatəhg-iarəp narmin rat min e nəsanənən rəha Narmin Rəha Uhgın, kən nərəmərəən rəha Uhgın tinuwa rəkis otəmat.

²⁹“Kən ekən e suatip kit min tol nulan məmə, etəmim kit tikə məmə titun nuwinən e nimə rəha etəmim kit itəm təsanən məmə otəmik rəhan natimnat. Məto otaupən məlis ətain etəm u itəm təsanən, uarisig təpanuwın imə məmki-rəkis rəhan natimnat.

³⁰“Etəm u itəm təsuarisig-inən io, in rəhak tikimir. Kən etəm u itəm təsargətainən sipsip min, in tatoor ilat kotagim atit.

³¹Tol nǎhlan iatǎn kǎm itǎmat mǎmǎ, Uhgǎn otafǎl rǎkis nolǎn rat min rafin pǎsin pǎsin, ne nǎghatǎn rat min rafin pǎsin pǎsin itǎm netǎmim koatǎn lan, mǎto otol nalpǎnǎn kǎn mǎsaluinǎn nǎghatǎn rat min itǎm netǎmim koatǎn e Narmin Rǎhan.

³²Kǎn okǎmǎ etǎmim tatǎn rat io, Nǎti Etǎmim, kǎn Uhgǎn otaluin kǎn mǎsalpǎnǎn. Mǎto etǎmim itǎm tatǎn rat Narmin Rǎha Uhgǎn, Uhgǎn okol tǎsaluinǎn nian kit, e nǎtueintǎn u, ne e nian itǎm tatuwa.

³³“Okǎmǎ nig in tǎwir, kǎn noan in tǎwir, okǎmǎ nig in tǎrat, kǎn noan in tǎrat. Tol nǎhlan mǎto-inu itǎmat nǎkotǎplan ǎm e noa nig mǎmǎ nig in tǎwir o nig in tǎrat.

³⁴!Itǎmat nǎkotahmen e sinek! Itǎmat noatol nolǎn eko-eko, kǎn itǎmat netǎm nakotǎrat. Okol nǎsotǎnǎn nat tǎwir kit, mǎto-inu nian etǎmim tatǎghat, tatǎn ǎm nat naka itǎm tǎrioah e nǎkin.

³⁵Etǎmim itǎm nǎtǎligǎn tǎwir tǎrioah e nǎkin, nian rafin in tatǎn nat itǎm in tǎwir. Kǎn etǎmim itǎm nǎtǎligǎn rat tǎrioah e nǎkin, nian rafin in tatǎn nat itǎm tǎrat.

³⁶Iatǎn kǎm itǎmat mǎmǎ e nian Uhgǎn otakil netǎmim lan, netǎmim okotǎkǎike kǎn-iarǎp kǎm in mǎmǎ tahro ilat kǎmoatǎn nǎghatǎn rat ǎpnarǎn min rafin rǎhalat.

³⁷Tol nǎhlan, in otakil rafin nǎghatǎn pǎsin min rǎhatǎmat, mǎmǎ itǎmat netǎm kotǎtuatǎp o netǎm kotǎrat.”

Nǎmtǎtin rǎha Jona

(Mak 8:12; Luk 11:29-32)

³⁸Kǎn iǎgǎtun min neen rǎha Lou ne Farisi min kǎmotǎn-ipǎn kǎm in mǎmǎ, “Iǎgǎtun. Ekotolkeike mǎmǎ ekotǎplan nǎmtǎtin kit itǎm tapǎspǎs itǎm ik onǎkol.” ;

³⁹Mǎto tǎmǎn-ipǎn kǎm ilat mǎmǎ, “Itǎmat netǎm roiu ne, nakotǎrat, nǎmotapǎs rǎhatǎmat nahatǎtǎn o Uhgǎn, tahmen e pǎtan kit tapǎs rǎhan iǎrman matǎtǎu-pǎn suah pǎsin. Kǎn roiu nakotolkeike mǎmǎ ekol nǎmtǎtin

kit itəm otəgətun məmə emisi-pən o Uhgın. Məto Uhgın otos-ipən əm nəmtətın kitəh əm, kən inəh nəmtətın rəha ien əh Jona.

⁴⁰Tahmen əm məmə Jona təməməhl e nian kisil lapin ne nərauiəgən e nərpı nəm asol, kən Nəti Etəmim, in otəməhl nian kisil lapin ne nərauiəgən əpəh e niki nəptən.

⁴¹“E nian əh itəm Uhgın otakil netəmim rafın, kən netəm Nineva aupən, ilat okotətul motən-iarəp məmə itəmat noanol rəha Isrel nakotərat. Okotitun nənən nəhlan məto-inu nian ilat kəmotəto nəghatən rəha ien əh Jona, ilat kəmotəuhlin rəhalat nətəligən o rəhalat nolən rat min. Kən otəplan-tu, suah kit itəm ilis taprəkis-in Jona tinuwa.

⁴²Kən e nian əh itəm Uhgın otakil netəmim rafın, kən kwin rəha nəptən pis ikin, in otətul mən-iarəp məmə itəmat netəm nakotərat. Otıtun nənən nəhlan məto-inu, in təmiet e nikalın nəptən əpəh isəu agın, kən maliwək muwa məmə otəto nəghatən rəha Kig Solomon itəm tenatig wir. Kən otəplan-tu, suah kit itəm ilis taprəkis-in Kig Solomon tinuwa.

⁴³“Nian narmin rat tiet e etəmim, kən in otuwın maliwək mətan əpəh ikin nig ne niamitə tikə ikin, kən nəhau tikə ikin, mategəs-in ikin otatig mameg ikin, məto təsəplanən.

⁴⁴Kən tən atip əm kəm in məmə, ‘Ekitəlig-pən e rəhak nimə itəm emisi-pən ikin.’ Kən nian tuwa məplan nimə, etəmim tikə ikin, kən kəmafəl, kən məlin wir natimnat.

⁴⁵Kən tuwın mit narmin rat sepin min itəm kotərat pik taprəkis-in in, kən motuwın imə motatig, kən natigən rəha suah əh roiu tərat pik taprəkis-in rəhan natigən itəm aupən. Kən kotahmen əm e itəmat netəm kotərat itəm nəkotatig roiu.”

Mama rəha Iesu ne pian min

(Mak 3:31-35; Luk 8:19-21)

⁴⁶Nian Iesu tatəghat əh kəm netəmim, kən rəhan mama ne pian min koatətul əpəh ihluə moatəpəh-in məmə okotəghat kəm in.

⁴⁷Kən etəmim kit təmən-ipən kəm Iesu məmə, “Rəham mama ne piām min əpəh ihluə koatətul. İlat kotolkeike məmə okotəghat kəm ik.”

⁴⁸Kən Iesu təmən-ipən kəm suah əh itəm təmən-iarəp məmə, “?Pah u rəhak mama, kən pah u piak min?”

⁴⁹Kən mæg-ətuatip-in-pən nelmin mægətun-pən rəhan netəmim, kən mən məmə, “!Inu rəhak mama ne piak min!

⁵⁰Iatən nəhlan məto-inu pah u tatol nəwia rəhak Tata əpəh ilis e nego e neai, in piak, ne winik, ne rəhak mama.”

Matiu 13

Nimaa nəghatən e nəptən

(Mak 4:1-20; Luk 8:4-15)

¹E nian ətuatip əh, Iesu təmiet e nimə muwin matəpələh əpəh iuəhkir e nikali Lek Kalili.

²Məto-inu netəmim tepət kəmotuwa kətul kitəlau in, kən in təmuwin e bot kit matəpələh. Kən netəmim kəmoatətul ipar.

³Kən in təmən-ipən natimnat tepət kəm ilat e nimaa nəghatən min. Təmən məmə, “Etəmim kit təmuwin məmə oteatəgtəg rəhan nikuti wit əpəh e rəhan nasumən.

⁴Kən nian təmərakin-rakin rəhan nikuti wit, neen kəmotisas-pən e suatip, kən mənig min kəmotuwa motun ilat rafin.

⁵Kən nikuti wit neen kəmotisas-pən e nəptən itəm kəpiel iuəhkir əm. Kəmotəwiə uəhai əm məto-inu nəptən noan məsin əm.

⁶Məto nian mitgar tər, kən məhg ilat koatauke-auke məto-inu nokilat təseiuaiu pikən.

⁷Kən nikuti wit neen kotisas-pən e niki nəlkosik, kən nian nikuti wit kotəwiə məto nəlkosik tətatu-atu ilat kən kəmotamis.

⁸Kən nikuti wit neen min kəmotisas-pən e nəptən itəm təwir, kən kəmotoe-in noalat, neen noalat wan-hanrit, neen noalat sikiste, neen noalat tate.

⁹Etəm matəlgin tatig, təwir məmə in otətəlig-in wir kən mitun nəghatən min u.”

¹⁰Kən netəm rəha Iesu kəmotuwa motətapəh ron məmə, “?Tahro natəghat kəm netəmim e nimaa nəghatən min?”

¹¹Kən Iesu təmən-ipən kəm ilat məmə, “Iatən nəhlan mətə-inu itəmat un, Uhgīn təmerəh e suatip otəmat məmə itəmat onəkotitun nəghatən anion min rəha nərəmərəən rəha Uhgīn. Mətə ilat əh, Uhgīn təməsərəhən e suatip nulan olat.

¹²Tol nəhlan mətə-inu, etəm u itəm rəhan əh-ikīn nitunən, Uhgīn otos-ipən min nitunən kəm in, kən rəhan nitunən in otepət pik. Mətə etəm u itəm rəhan nitunən tikə, Uhgīn otos-irəkis rafin rəhan nitunən itəm nīkin təht məmə in tatos.

¹³Iatəghat e nimaa nəghatən kəm ilat mətə-inu ilat koatəplan pap mətə kəsotitunən, kən ilat koatəto pap mətə kəsotitun wirən.

¹⁴Nəmegəhən rəhalat tatol nəghatən rəha ien Aesea tatuwa matol nīpahrienən lan. In təmən məmə, ‘Okəatəto, moatəto, moatəto, mətə okol kəsotitunən. Kən okəatəplan, moatəplan, moatəplan, mətə okol kəsotitunən nian kit.

¹⁵Tol nəhlan mətə-inu nīkīlat tinuwa məskasik, kən kīnotəprou-in nətəlig-inən, kən motahtosig-in nīganəmtilat. Okəmə təsələn nəhlan, okəm-naka ilat okotəplan e nīganəmtilat, kən ilat okotətəlig-in e matəlgilat, kən nīkīlat otəmət-mətig, kən okotitun, kən okotəuhlin-pa ilat ron io məmə ekosmegəh ilat.’

¹⁶Mətə itəmat u, Uhgīn təmawte-in rəhan nəwirən kəm itəmat, kən nian nəkotəplan, nəkotitun, kən nian nakotəto, nəkotitun.

¹⁷Nīpahrienən iatən kəm itəmat məmə, ien min tepət ne netəm ətuatip min tepət kəmotolkeike pik məmə okotəplan nat naka itəm nakoatəplan, mətə kəsotəplanən. Kən motolkeike pik məmə okotəto nat naka itəm nakoatəto, mətə kəsotətəən.”

¹⁸Kən Iesu tēmatəkēike matēn mēmə, “Itēmat otētēlig-in wir-tu mēmə nəkotitun nīpētī nīmaa nēghatēn rēha etēm u itēm tēmərakin nīkuti wit.

¹⁹Nīkuti wit itēm tēmīsas e suatīp, in tahmen e etēmim itēm tēto nēghatēn rēha nērēmərēan rēha Uhgīn, mēto in tēsītunən. Kən Setan tuwa mos-irəkis uəhai əm nēghatēn əh itēm tēmuwīn e nīkin.

²⁰“Kən nīkuti wit itēm tēmīsas-pən e nīsīp itēm kəpiel iuəhkīr əm, in tahmen e etēmim itēm tatēto nēghatēn rēha Uhgīn, kən mos e nīkin agien,

²¹mēto nokīn tēseiuiiu pīkən, kən tatētul əm o nian əkuəkīr əm. Nian nēsəsauən, o nērātēn tuwa e nēmegəhən rēhan o nēghatēn əh, kən tēme uəhai əm e rēhan nahatētēan.

²²“Kən nīkuti wit itēm tēmīsas-pən e nīki nəlkosik, in tahmen e etēmim itēm tēto nēghatēn rēha Uhgīn, mēto rēhan nētēligən tatuwīn pīk o natīmnat rēha nətueintən, kən in tolkeike mēmə rēhan nautə otepət, kən nētēligən mīn əh kotatu-atu nēghatēn rēha Uhgīn, kən nēghatēn əh tēsōe-inən noan.

²³“Mēto nīkuti wit itēm tēmīsas-pən e nēptən wir, in tahmen e etēmim itēm tēto nēghatēn rēha Uhgīn kən mītun nīpētīn. Kən e nēmegəhən rēhan, in otōe-in noan, nian neen noan wan-hanrit, nian neen noan sikiste, kən nian neen noan tate.”

Nīmaa nēghatēn e manuwīhl itēm tērat

²⁴Kən Iesu tēmuəh nīmaa nēghatēn kit mīn kəm ilat matēn mēmə, “Nērēmərēan rēha Uhgīn, in tahmen e etēmim kit itēm tēmərakin nīkuti wit e rēhan nasumən.

²⁵Mēto nian in ne rēhan mīn netēmim kəmoatāpīl, rēhan kit tīkīmīr tēmuwīn mərakin nīkuti manuwīhl rat mīn e rēhan nasumən, kən magīm.

²⁶Kən nīkuti wit wir mīn kəmotəwīə motol iahgīn motol noalat. Mēto e nian əh, nīkuti manuwīhl rat mīn kəmotər mīn motuwa motol iahgīn.

²⁷“Kən slef min rəha etəmim əh, kəmotuwa motəplan in, motən məmə, ‘Etəm-iasol. ?Nikuti wit min itəm nəmərakin e rəham nasumən, ilat nikuti wit wir min əm, o kəp? ?Məto tahro nikuti manuwihl rat min kinotər?’

²⁸Kən təmən-ipən kəm ilat məmə, ‘Tikimir kit təmol nat əh.’ “Kən rəhan slef min kotən-ipən kəm in məmə, ‘?Məto tahro? ?Nakolkeike məmə itimat ekotuwin kew rəkis manuwihl rat min əh?’

²⁹“Məto təmən-ipən kəm ilat məmə, ‘Kəpə. Otapəs. Okəmə itəmat nakotuwin kew rəkis manuwihl rat min, kən mətə nakotew rəkis min wit wir min.

³⁰Pəs ilau kərən əm kuər mətoarus-pən wit tinimətə. Kən ekən-ipən kəm netəmim itəm okotəulək-in wit məmə ilat okotaupən motew rəkis manuwihl itəm tərət motəlis o nərakin-pənən e nigəm. Uarisig okotəulək-in wit wir min moatəmik moatuwa e nipəgnoa nimə rəhak itəm katəlin nagwənən ikin.”

Nimaa nəghatən e nikuti mastat

(Mak 4:30-32; Luk 13:18-19)

³¹Kən Iesu təmuəh nimaa nəghatən kit min kəm ilat məmə, “Nərəmərən rəha Uhgın in tahmen e nikuti mastat itəm etəmim təmos muwin məfe e rəhan nasumən.

³²Nikuti mastat əh in nətin agin, məto nian in otəwiə, in otuwa iahgin tahmen e nig kit, kən mənig min itəm koatiwig ilis okotuwa motol nimaalat e nelmin min.”

Nimaa nəghatən e is

(Mak 4:33-34; Luk 13:20-21)

³³Kən Iesu təmuəh nimaa nəghatən kit min məmə, “Nərəmərən rəha Uhgın in tahmen-pən e is noan məsin itəm pətan kit tətalkin e flaoa tepət itəm kəmol-pən e pesin asol, kən tətahl flaoa rafin tətasis matol iahgin.”

³⁴Natimnat min əh rafin, Iesu təmuəh nimaa nəghatən lan kəm netəmim. Nipahrienən məmə təməsənən nat kit kəm ilat okəmə təməsüəhən nimaa nəghatən.

³⁵Nolən əh təmöl nəghatən rəha ien aupən tatuwa matol niphahrienən lan. Təmən məmə, “Ekən-iarəp rəhak nəghatən e nuəhən nimaa nəghatən min. Ekən-iarəp natimnat itəm eməhluaig-in ilat nian emətuoun matol nətueintən mətoarus-pa u-roiu.”

Iesu təmən nıpəti nimaa nəghatən e manuwihl

³⁶Kən Iesu təmiet rəkis e netəmim, kən muwin e nıpəgnoa nimə kit. Kən rəhan min netəmim kəmotuwa ron motətapəh məmə, “Ən-tu kəm itimat nıpəti nimaa nəghatən e manuwihl itəm təmər e nasumən.”

³⁷Kən Iesu təmən-ipən məmə, “Etəmim itəm təmərakin nıkuti wit e nasumən, inu io, Nəti Etəmim.

³⁸Kən nasumən, in nətueintən, kən nıkuti wit wir min, ilat u netəmim rəha Uhgın itəm tatərəmərə elat. Kən manuwihl rat min, ilat netəmim rəha Setan.

³⁹Kən tikimir itəm təmuwin mərakin manuwihl rat, in Setan. Kən nian okəulək-in nasumən, in namnun nian, kən netəmim itəm koatəulək e nasumən, ilat u nagelo min.

⁴⁰Okotəmik manuwihl rat motan-ətip e nigəm, nolən əh tahmen əm e namnun nian.

⁴¹“Io Nəti Etəmim, ekahl-ipinə nagelo min rəhak okotuwin ikin iatərəmərə ikin, motoe rəkis natimnat rafin ne netəmim rafin itəm koatiuw-pən netəmim o nolən təfagə rat min.

⁴²Ilat okotərakin-pən ilat e nigəm asol, kən ikin əh netəmim okotasək kən moatəgətain nəluilat min.

⁴³Kən netəm kotətuatip okotasiə tahmen e mit e nərəmərəən rəha rəhalat Tata Uhgın. Etəm matəlgin tatig, in otəkəike mətəlig-in wir nəghatən min u.”

Nimaa nəghatən e bokis məni itəm tatəhluaig

⁴⁴Kən Iesu təmatəkəike matən məmə, “Nərəmərəən rəha Uhgın in tahmen e bokis məni kit itəm tatəhluaig e nəptən kit. Kən etəmim kit təmətan məplan

bokis mæni əh, kæn tatig mitənim min. Nikin təmagien pik, kæn təmuwin mol-salim-in natimnat rafin rəhan, kæn mos-nəmtin nəptən əh.”

Nimaa nəghatən e kəpiel perel

⁴⁵Kæn Iesu təmən məmə, “Nərəmərəən rəha Uhgın in tahmen e etəmim itəm tategəs-in natimnat, kæn matol-salim-in min. Kæn in tategəs-in kəpiel wir min nəmtilat tiəkis, katən məmə perel.

⁴⁶Nian təməplan perel kit itəm təwir pik agin, kæn in təmuwin mol-salim-in rəhan natimnat rafin, kæn muwin mos-nəmtin perel əh kæn mİLəs rəhan.”

Nimaa nəghatən e net rəha niuwən nəm

⁴⁷Kæn Iesu təmatəkəike matən məmə, “Nərəmərəən rəha Uhgın in tahmen e nian netəmim koatərakin-pən net əpəh itəhəi moatos nəm pisin pisin min lan.

⁴⁸Nian net tinərioah e nəm, kæn kotiuw-par net, kæn motor nəm min motaii-pən nəm wir min e kətim asol min rəhalat, məto okotərakin nəm itəm kotərat.

⁴⁹Kæn e namnun nian, nagelo min okotuwa motos-irəkis netəmim itəm kotərat o netəmim itəm kotətuatip,

⁵⁰kæn motərakin-pən netəm kotərat e nigəm asol, kæn ikin əh netəmim okotasək moatəgətain nəluilat.

⁵¹“?Itəmat nəkotitun natimnat min un, o kəp?” Kæn ilat kəmotən kəm in məmə, “Əwəh.”

⁵²Kæn təmən kəm ilat məmə, “Tol nəhlan, iəgətun min rafin rəha Lou itəm kəməgətun wir ilat e nəərəmərəən rəha Uhgın, kotahmen e etəm-iasol rəha nimə itəm rəhan nautə tepət. Kæn nian kit in tatos-irəkis nat wi e rəhan nautə, kæn nian kit min tatos-irəkis nat oas.”

Ien itəm kəsisiai-inən

(Mak 6:1-6; Luk 4:16-30)

⁵³Nian Iesu tinol namnun nuəhən nimaa nəghatən min əh, kæn təmiet ikin əh,

⁵⁴muwin iman ikin. Kən təmatəgətun netəmim əpəh e nimə rəha nuəfiminən, kən narmilat təmiwig, kən kotən məmə, “?Suah u təmiləs hiə nenatigən əh ne nəsanənən əh o nolən nat pispis min?”

⁵⁵Suah əh, kitat kotitun wir in. ?In neti etəmim itəm tatol nimə, o kəp? ?Kən rəhan mama, in Meri, kən pian min ilat Jemes, ne Josep, ne Saimon, ne Jutas, o kəp?

⁵⁶?Kən rəhan kaka min kitat min ilat, o kəp? ?Təmos hiə nitunən o nolən natimnat min əh?”

⁵⁷Kən nikilat təsagienən ron kən motəuhlin məntaalat ron. Məto Iesu təmən-ipən kəm ilat məmə, “Okəmə suah kit in ien, netəmim rafin koatisiai-in. Məto rəhan min netəmim əpəh latuənu ne rəhan min netəmim e nipəgnoa nimə rəhan, ilat əm kəsotisiai-inən.”

⁵⁸Kən təməsolən nat pispis tepət ikin əh, məto-inu ilat kəsotahatətəən lan.

Matiu 14

Kig Herot Antipas təməghat o Iesu

(Mak 6:14-29; Luk 9:7-9)

¹E nian əh, Kig Herot Antipas u tatərəməərə e nitən Kalili, təməto namnusən rəha Iesu.

²Kən təmən-ipən kəm rəhan etəm-iasol min məmə, “Suah u in Jon Baptais itəm təməmegəh min e nimisən. Tol nəhlan tatos nəsanənən əh o nolən nat pispis min.”

Nimisən rəha Jon Baptais

³⁻⁴Herot Antipas təməghat nəhlan məto-inu in təmohamnu rəkis Jon Baptais. Inu namnusən e nimisən rəha Jon Baptais, tol min-nulan. Aupən ikin, Kig Herot Antipas təmakləh-in Herotias u pətaguihl rəha pia Herot u, Filip Kitiəh. Kən Jon təmən-ipən kəm in məmə, “Təsətuatipən məmə nəkiləs pətan u, məto-inu nakatətəghl Lou.” Kən Herot Antipas təmaskəlīm Jon o Herotias, məlis ətain, mīləs-ipən e kalapus.

⁵Herot Antipas tolkeike mēmā in otohamnu Jon, mēto tēmōsolēn mēto-inu tatēgin netēmim. Ilat koatisiai-in Jon moatēn mēmā in ien kit.

⁶Mēto nian kit, Herot Antipas tēmōl lafet kit rēha nian tēmaiir lan, kēn pētan ēkēku, nēti Herotias, tēmōl danis aupen e nīganēmti netēmim rafin. Kēn rēhan nolēn danis tēmōl Herot Antipas nīkin tēmuwīn pīk lan,

⁷kēn tol nēhlan, in tēmēn-iēkis mos noanawīl mēmā in otos-ipēn nat naka itēm pētan ēkēku ēh tolkeike.

⁸Kēn Herotias tēmēghat kēm nētīn, kēn nētīn tēmēn-ipēn kēm Herot Antipas mēmā, “Os rēhn-kapē Jon Baptais e plet kit muwa ikin-u mos-ipa kēm io roiu.”

⁹Kēn kīg, nīkin tērou. Mēto tēmēn-ipēn kēm rēhan netēmim mēmā ilat okotol nēwia nēti Herotias, mēto-inu o rēhan noanawīl ne nēniēkisēn itēm tēmōl e nīganēmti netēmim.

¹⁰Kēn tēmahl-ipēn netēmim neen kotuwīn e kalapus, kēn ilat kēmōtētātip rēkis rēhn-kapē Jon ikin ēh,

¹¹motēlēhēu-pēn e plet kit, motos motuwa, motos-ipēn kēm nēti Herotias, kēn in tēmos-ipēn kēm rēhan mama.

¹²Kēn netēmim rēha Jon kēmōtuwīn motīlēs nīpētīn motuwīn motītēnim, kēn motuwīn motēn-ipēn kēm Iesu.

Iesu tēmāgwēn netēmim faif-taosan

(Mak 6:30-44; Luk 9:10-17; Jon 6:1-14)

¹³Nian Iesu tēmōto namnusēn ēh, kēn tēmētīpēn e bot kit muwīn ēpēh ikin kīkē-kīkē ikin. Mēto nian nīmanīn netēmim kēmōtītun ikin tēmuwīn ikin, ilat kēmōtiet e rēhalat latuēnu mīn motaliwēk ipar motuarisīg-in Iesu.

¹⁴Nian Iesu tēmuwar, tēmēplan nīmanīn netēmim tēpēt, kēn nīkin tēmāhmō olat matakeike ilat, kēn mol-wir nīmīsēn mīn rēhalat.

¹⁵Kēn ehnaipēn iuēhkīr o napīnēpēn, rēhan mīn netēmim kēmōtuwa ron moatēn mēmā, “Ikin-u, ikin kīkē-kīkē ikin, kēn otēsuwēhēn talugin. Ahl-ipēn

nimanin netəmim məmə okotuwin latuənu min motos-nəmtin nigilat neen nagwənən.”

¹⁶Kən Iesu təmən-ipən məmə, “Kəp. Otəpəs əm ilat kotatig, kən itəmat əm otagwən ilat.”

¹⁷Məto komotən-ipən kəm in məmə, “Itimat ekoatos əm pıret faif ne nəm kəiu.”

¹⁸Kən təmən məmə, “Otos motuwa kəm io.”

¹⁹Kən mən-ipən kəm netəmim məmə okotəpələh ləhau e manuwıhl. Kən təmos pıret faif ne nəm kəiu əh, masipər əpəh e neai, matəfak-pən ron, kən məmkas pıret. Kən təmos-ipən kəm rəhan min netəmim, kən ilat kotos-ipən kəm nimanin netəmim.

²⁰Kən ilat rafin kəmotagwən, nərpilat tasis. Kən nımismisi nagwənən itəm kəmotapəs, netəmim rəha Iesu kəmotaii-pən e kətim asol ilat tuelef itəm kəmotər kər wir.

²¹Kən netəmim itəm kəmotagwən, nəman əm tahmen e faif-taosan, məto kəsafinən nıpitan ne nisualkələh.

Iesu təmaliwək e nəhau

(Mak 6:45-52; Jon 6:16-21)

²²Kən Iesu təmən kəm rəhan netəmim məmə ilat okotətipən e bot motaupən moatuwin entənıpən-pən e lek, məto in otahl-ipən netəmim kotitəlig-pən imələt min ikin.

²³Nian tınahl-ipən rəkis netəmim, kən muwin əpəh ilis e nitot kit in pisin əm, məmə otəfak. Nian tinalugən, Iesu pisin əm əh-ikin,

²⁴məto bot tınuwin rəkis ilugin e lek, kən tınatıləs pıkən nımətag, kən peau-peau min kinoatoh bot.

²⁵Kən lapin iuəhkir o nianən, Iesu təmaliwək e nətuei nəhau muwa olat.

²⁶Məto nian netənim rəha Iesu kəmotəplan in tətaliwək e nətuei nəhau, kən kəmotəgin pik moatən məmə, “!Ei, narmi etənim kit!” Kən kəmotasək əfəməh məto-inu koatəgin.

²⁷Məto uəhai əm, Iesu təməghat kəm ilat məmə, “!Ei, nikitəmat tətul məhəməha. Io əpəh. Sotəginən!”

²⁸Kən Pita təmə, “!Ərəmə, okəmə ik pahrien, kən aun-in io ekaliwək e nətuei nəhau minə.”

²⁹Kən Iesu təmən-ipən məmə, “Wa.” Kən Pita tiet e nətuei bot, kən maliwək e nətuei nəhau matuwın o Iesu.

³⁰Məto nian təməplan nimətag, kən nikin təməgin pik, kən minətuoun mətamnim mətasək-pən o Iesu matən məmə, “!Ərəmə, asitu lak!”

³¹Kən roiu agin, Iesu təmea-pən maskəlim Pita, kən mən-ipən kəm in məmə, “!Ik rəham nahatətəən təkəku agin. ?Tahro rəham nahatətəən təkəku lak?”

³²Kən nian kəmuətəpən e bot, kən nimətag təmuraħl nelmin.

³³Kən ilat e nətuei bot kəmos-ipən nisaiien asol kəm in moatən məmə, “Pahrien, ik Nəti Uħgin.”

³⁴Nian kinotuwin entənəpən-pən, kəmotuwar e nəptən Kenesaret.

³⁵Kən nian netənim əh-ikin əh kinotitun Iesu, kotahl-ipən nəghatən tuwin mitəlau o netənim e latuənu min rafin əh-ikin. Kən kəmos rəhalat min netənim itəm koatimis motuwa o Iesu,

³⁶kən kəmotəkəike o Iesu məmə ilat itəm koatimis okotek əm nəpəgnəmti kot rəhan. Kən ilat rafin itəm kəmotek nəpəgnəmti kot rəhan, rəhalat nimisən təmikə, kən kəmotəwir.

Matiu 15

Nat itəm tatol etənim tamkimik

(Mak 7:1-23)

¹Kən Farisi min neen ne iəgətun min neen rəha Lou kəmotisi-pən Jerusalem motuwa o Iesu. Kən motətapəh ron məmə,

²“?Tahro rəham netənim koatətgəhl kastom rəhatat itəm rəhatat pipi min aupən kəmotəgətun kitat lan? Ilat kotagwən, mətə kəsotaupənən motaikwas e nelmilat.”

³Kən Iesu təmən-ipən kəm ilat məmə, “?Mətə tahro itəmat min nakoatətgəhl Lou rəha Uhgin o naskəlīm əskasikən kastom rəhatəmat?

⁴Iatən nəhlan mətə-inu, Uhgin təmən məmə, ‘Nəkotəkəike motisiai-in rəhatəmat tata ne mama,’ kən təmən min məmə, ‘Etənim itəm otəghat rat e rəhan tata o mama, okəkəike kohamnu.’

⁵Mətə itəmat nakotən məmə, okəmə suah kit rəhan kit mənī əh-ikin itəm in titun nasituən e rəhan tata ne mama lan, in titun nənən kəm ilau məmə, ‘Kəsi, emələhəu pisin mənī u məmə rəha Uhgin,’

⁶kən okol in otəsisiai-inən rəhan tata, kən məsos-ipənən mənī u kəm in. E nolən əh, itəmat noatol nəghatən rəha Uhgin tatol nat ərnapin lan, mətə-inu itəmat nakotolkeike məmə nakotaskəlīm kastom rəhatəmat min əm.

⁷!Rəhatəmat nənən təwir, mətə nikitəmat tamkimik! Ien Aesea təməghat-in itəmat ətuatip nian təmatən-iarəp nəghatən rəha Uhgin itəm tatən məmə,

⁸‘Netəm min u koatisiai-in io e nohlilat əm, mətə nikilat isəu ron io,

⁹Rəhalat nolən rəha nəfakən ron io in nat ərnapin əm, kən nian koatəgətun, koatən məmə nəghatən min rəhak, mətə in nəghatən min rəha netənim əm.”

¹⁰Kən Iesu təmaun-in netənim məmə okotuwa ron, kən mən-ipən kəm ilat məmə, “Otətəlig-in-tu, kən motitun nat u.

¹¹Nat naka itəm katun, təsolən etənim tamkimik e niganəmti Uhgin, mətə nat naka itəm tatiet e nohli etənim, in tatol etənim tamkimik e niganəmti Uhgin.”

¹²Kən rəhan netənim kotuwa ron moatətapəh məmə, “?Nəkitun məmə Farisi min, nikilat tərət nian kəmotətəto nəghatən əh?”

¹³Kən təmən-ipən məmə, “Nig min rafin itəm rəhak Tata əpəh e nego e neai təməsəfəən, okew-pər ilat nokin.

¹⁴Apəs ilat. Ilat koatit netəmim, məto niğanəmtilat təpis. Okəmə etəmim itəm niğanəmtin təpis tit etəmim kit min itəm niğanəmtin təpis, kən ilau kərən okiaiwig-pən e noakimil.”

¹⁵Kən Pita təmən-ipən kəm in məmə, “Ən-tu nipəti nimaə nəghatən kəm itimat.”

¹⁶Kən Iesu təmən-ipən kəm ilat məmə, “?Itəmat rəhak netəmim, məto itəmat min nəsoṭitunən əh?

¹⁷?Nəkotitun o kəp məmə, nat naka itəm tatuwin e nohli etəmim meiuaiu e nərpın, kən miet min e nipəti etəmim?

¹⁸Məto natimnat itəm tətisi-pən e niki etəmim kən matiet e nohli etəmim, matol etəmim tətamkimik e niğanəmti Uhgın.

¹⁹Tol nəhlan məto-inu, natimnat itəm tətisi-pən e niki etəmim kotol nulan: nətəligən tərət min; nohamnuən etəmim; nakləh-inən pətan; nipitan ne nəman ne, koatit anion ilat min; nakləhən; nəghat eiuəən e netəmim; nən ratən nərgi etəmim.

²⁰Inu natimnat itəm tol etəmim tətamkimik e niğanəmti Uhgın, məto okəmə suah kit təsaikuasən nelmin kən mətagwən, inu təsolən in tamkimik e niğanəmti Uhgın.”

Nahatətəən rəha pətan laihluə

(Mak 7:24-30)

²¹Kən Iesu təmiet ikin əh, kən muwin ikin itəm taon kəiu əh, Taea ne Saeton katuəməhl ikin.

²²Kən pətan kit əh-ikin, laihluə u pətan Kenan, təmuwa ron mətasək əfəməh məmə, “Iərəmərə, Mipi Tefit, asəkitun io. Narmin rat kit təskasik təmatig e nətik pətan matərəkın in.”

²³Məto Iesu təsən-ipən agin-əhən nəghatən kit kəm in. Kən rəhan netəmim kotuwa moatəkəike ron, motən məmə, “Ahl-ipən in isəu, məto-inu tətəsək əfəməh matuarisig-in kitat.”

²⁴Kən Iesu təmən-ipən kəm ilat məmə, “Kəmahl-ipa əm io o sipsip min rəha noanol rəha Isrel itəm kəmotəlue.”

²⁵Məto pətan əh təmuwa misin nulin aupən e Iesu matən məmə, “Iərəmərə, asitu lak.”

²⁶Kən Iesu təmən-ipən məmə, “Təsətuatipən məmə ekos nagwənən nigī nisualkələh, kən mərakin-pən kəm kuri min.”

²⁷Kən pətan u təmən-ipən məmə, “Əwəh, Iərəmərə. Məto kuri min koatun nimismisi nagwənən itəm təmisas e tepil rəha iərəmərə min rəhalat.”

²⁸Kən Iesu təmən-ipən məmə, “Ei, pətan. !Rəham nahatətəən in iahgin! Nat naka itəm nakolkeike, otuwa mol nipahrienən.” Kən roiu agin, netin pətan təməwir.

Iesu təmol-wir nimisən tepət

²⁹Kən Iesu təmiet ikin əh maliwək e nikali Lek Kalili. Kən mər muwin əpəh ilis e nitot kit kən matəpələh.

³⁰Nimanin netəmim kəmotuwa ron, moatəmik netəm min u itəm nelkilat təməfaiu-əfaiu, ne netəm niganəmtilat təpis, ne netəm nipətilat məsin təmimis, ne netəm kotəruru nəghatən, ne nimisən pisin pisin min. Kən motəlin-pən ilat iuəhkir o Iesu, kən təmol-wir ilat.

³¹Kən nimanin netəmim narmilat təmiwig nian kəmotəplan netəm kotəruru nəghatən kinotəghat, ne netəm nipətilat məsin təmimis kinotəwir, ne netəm nelkilat təməfaiu-əfaiu kinotaliwək, ne netəm niganəmtilat təpis kinoatəplan nat. Kən moatənwiwi Uhgīn rəha Isrel.

Iesu təmagwən netəmim fo-taosan

(Mak 8:1-10)

³²Kən Iesu təmaun-in rəhan netəmim kotuwa ron, təmən-ipən kəm ilat məmə, “Nikik tinahməh pik o netəmim min u. Kitat min ilat o nian kisil əh-roiu, kən nat tikə məmə okotun. Esolkeikeən məmə ekahl-ipən ilat koatuwin, nəumis tus ilat, mətan, neen kotimis-eah əpəh e suatip.”

³³Kən rəhan netəmim kotən-ipən kəm in məmə, “?Okotos hiə pīret u ikin-u, ikin taruən-aruən ikin itəm tahmen məmə okotagwən nīmanin netəmim lan?”

³⁴Kən Iesu təmən-ipən kəm ilat məmə, “?Pīret kuwəh u nakoatos?” Kən kotən-ipən məmə, “Ekoatos pīret sepīn ne nəm əkəku noan məsīn əm.”

³⁵Kən Iesu təmən-ipən kəm nīmanin netəmim məmə okotəpələh e nəptən.

³⁶Kən təmos pīret ilat sepīn, ne nəm əlkələh, kən məfak-pən lan, kən məmkas ilat, mos-ipən kəm rəhan netəmim mīn, kən kotos-ipən kəm netəmim.

³⁷Kən ilat rafīn kəmotun nərpīlat tasis. Kən netəmim rəha Iesu kotaii-pən nīmismisi nagwənən itəm kəmotun kapəs e kətīm asol ilat sepīn, kəmotər kər wīr.

³⁸Netəmim itəm kəmotun, nəman ilat fo-taosan, mətō kəsafinən nīpitan ne nisualkələh.

³⁹Kən Iesu tahl-ipən nīmanin netəmim koatuwīn, kən in təmətīpən e bot muwīn ikin Makatan.

Matiu 16

Farisi mīn ne Satusi mīn koatəpəh o nəmtətīn kit

(Mak 8:11-13; Luk 12:54-56)

¹Kən Farisi mīn ne Satusi mīn kəmotuwa o Iesu, kən kəmotəghat əuhlin kəm in məmə otol kəm ilat nəmtətīn kit rəha nego e neai, inu nat pīspīs asol itəm otəgətun məmə Uhgīn təmahl-ipa in.

²Kən təmən-ipən kəm ilat məmə, “Nian tīnehnaipən, nakotən məmə, ‘olawīg tərāuīə, mətō-inu napuə tīnasiə.’

³Kən laulaugīn nakotən məmə, ‘Nuhuən otəfik, mətō-inu napuə tīnasiə mītəlau.’ Nəkotītun nənən nīpətī nəmtətīn mīn e nīmāl napuə itəm tatiet, mətō nəkotəruru nənən nīpətī nəmtətīn itəm nəkotəplan əh-roiu.

⁴“Itəmat netəm roiu ne, nakotərat, itəmat netəm Isrel nəmotapəs rəhatəmat nahatətən o Uhgīn, tahmen e pətan kit tapəs rəhan iərman matətəu-pən suah pīsīn. Kən roiu nakotolkeike məmə ekol nəmtətīn kit itəm otəgətun məmə

emisi-pən o Uhgín. Məto Uhgín otos-ipən əm nəmtətín kitiəh əm, kən inəh nəmtətín rəha ien əh Jona.” Kən təmapəs ilat matuwín.

Is rəha Farisi mìn ne Satusi mìn

(Mak 8:14-21)

⁵Nian Iesu ne rəhan mìn netəmim kəmoatuwín entənípən-pən e Lek Kalili, rəhan netəmim kəmotaluin məmə okotos pìret neen. Kən nian kinotuwin entənípən-pən,

⁶kən təmən-ipən kəm rəhan netəmim məmə, “Onakoatəto itəmat o is rəha Farisi mìn ne Satusi mìn.”

⁷Kən kəmoatən-ipən kəm ilat mìn məmə, “Tatəghat nəhlan məto-inu kəmotaluin nəmikən pìret neen.”

⁸Məto Iesu tinitun rəhalat nətəligən, kən təmən-ipən kəm ilat məmə, “Ei, rəhatəmat nahatətəən təkəku agin. ?Tahro nakoatən-ipən kəm itəmat mìn məmə pìret tikə otəmat?

⁹?Nəsotitunən əh, o kəp? ?Ninotaluin pìret faif u itəm emagwən netəmim faif-taosan lan, kən uarisig, nəmotaii-pən nīmismisi nagwənən itəm kəmapəs e kətim asol kuwəh?

¹⁰?Kən ninotaluin pìret sepin u itəm emagwən netəmim fo-taosan lan, kən uarisig, nəmotaii-pən nīmismisi nagwənən itəm kəmapəs e kətim asol kuwəh?

¹¹?Tahro itəmat nəsotitunən məmə esəghat-inən pìret? Oatəto itəmat o is rəha Farisi mìn ne Satusi mìn.”

¹²Kən e nian əh, ilat kəmotitun məmə in təsəghat-inən is rəha nolən pìret məmə okoatəto ilat ron, məto okoatəto ilat o nəghatən mìn itəm Farisi mìn ne Satusi mìn koatəgətun netəmim lan.

Pita təmən məmə Iesu in Kristo

(Mak 8:27-30; Luk 9:18-21)

¹³Nian Iesu təmuwa ikin Sisaria Filipae, mən-ipən kəm rəhan netəmim məmə, “?Netəmim kotən məmə pah u io, Nəti Etəmim?”

¹⁴Kən kotən-ipən məmə, “Neen koatən məmə ik Jon Baptais, neen koatən məmə ik ien Elaija, kən neen koatən məmə ik ien Jeremaea, o ien kit aupən ikin.”

¹⁵Kən təmən-ipən kəm ilat məmə, “?Məto tahro etəmat? ?Nakotəmə pah u io?”

¹⁶Kən Saimon Pita təmən-ipən məmə, “Ik Kristo itəm Uhgın təmən məmə otahl-ipa, ik Nəti Uhgın itəm tətatiğ matəmegəh.”

¹⁷Kən Iesu təmən-ipən məmə, “Uhgın təmawte-in rəhan nəwirən kəm ik, Saimon nəti Jona, məto-inu sənəmə etəmim əm təmol-arəp nat u kəm ik, məto rəhak Tata əpəh e nego e neai itəm təmol əp nat u kəm ik.

¹⁸Kən ekən-ipinə kəm ik məmə ik Pita, u nıpətın təmə kəpiel. Kən ekiləkin rəhak nıməfak e kəpiel u, kən okol nəsanənən rəha nımısənənotəsaprəkis-inən.

¹⁹Ekos-ipinə kəm ik nepətən itəm tətisi-pən o Uhgın əpəh e nego e neai. Kən əpəh e nego e neai, Uhgın tınegəhan-in rəkis nəwıam itəm onakən e nətueintən. Nian onakahtosıg-in nat kit, o onategəhan-in nat kit, kən otol mihin.”

²⁰Kən mən-ipən əskasık kəm rəhan netəmim məmə okəsotən-ipənən kəm suah kit məmə in Kristo itəm Uhgın təmən məmə otahl-ipa.

Iesu təmən-iarəp rəhan nımısən

(Mak 8:31–9:1; Luk 9:22-27)

²¹E nian əh, Iesu təmətuoun matən-iarəp kəm rəhan netəmim məmə in otəkəike muwın Jerusalem, kən etəm-iasol mın rəha noanol rəha Isrel, ne pris asol mın, ne iəgətun mın rəha Lou, okotol in tətə nahməən e nəratən tepət, kən okotohamnu in, kən uarisıg e nian kısıl, in otəmegəh mın e nımısən.

²²Kən Pita tos pısın Iesu, kən mətuoun matən-iəhau matən məmə, “İərəmərə, Uhgın otəkəike mahtosıg-in nat əh. !Nat əh okol təsuwamən mol nıpahrienən lan!”

²³Kən Iesu talalin mən-ipən kəm Pita məmә, “!Setan! !Uwin isəu ron io! Ik nətahtosig-in io. Rəham nətəligən sənəmә nətəligən rəha Uhgın, mətō in nətəligən rəha netəmim әm.”

²⁴Kən Iesu təmən-ipən kəm rəhan netəmim məmә, “Etəmim itəm tolkeike məmә otuarisig-in io, otəkəike maluin atip in, kən mīləs rəhan nig kəməluau mətəu-pa io.

²⁵Tol nəhlan mətō-inu, etəmim itəm tatol pik wək әm məmә rəhan nəmegəhən e nətueintən u in otəwir, otəmkarəpən e nəmegəhən pahrien. Mətō etəmim itəm otimis o nərgək, in otos nəmegəhən lilin.

²⁶?Okəmә etəmim kit tatos rafin natimnat e nətueintən, mətō uarisig lan otimis kən təsosən nəmegəhən lilin, in təmol win e nat kit təwir, o kəp? Kəp. Okol suah əh təsos-ipənən nat kit kəm Uhgın məmә Uhgın otos-ipən nəmegəhən lilin kəm in.

²⁷Tol nəhlan mətō-inu, io Nəti Etəmim epanuwa itimat nagelo min e nəsanənən ne nepətən əhag-əhag asol rəha Tata rəhak, kən ekos-ipən nətouən kəm netəmim rafin e wək ətuatip itəm kəmotol.

²⁸Iatən-ipinə nīpahrienən məmә netəmim neen koatətul ukin-u itəm kəsotimisən motəmegəh әm nian Nəti Etəmim u in kig, otuwa məmә in otərəmərə e natimnat rafin.”

Matiu 17

Nipəti Iesu təmuwa mol pisin

(Mak 9:2-13; Luk 9:28-36)

¹Nian sikis tinuwa minuwın rəkis, Iesu tit Pita, ne Jemes, ne Jon u pia Jemes, mit iləhal motuwın əpəh ilis e nitot əfəməh, ilat pisin әm.

²Kən ikin əh, nipəti Iesu təməuhlin muwa mol pisin. Rəhn-kapə təmasiə məhag-əhag tahmen e mitgar, kən rəhan natimnat tinuwa məruən məhag-əhag.

³Roiu agin, Moses ne Elaija kəmiaet-arəpa mətəhaləghat iləhal Iesu.

⁴Kən Pita təmən-ipən kəm Iesu məmә, “Iərәmәрә. Tәwir mәмә itimәhal emәhaluwa ikin-u. Okәмә nakolkeike, ekilәkin makeen kisil u ikin-u, rәham kit, kән rәha Moses kit, kән rәha Elaija kit.”

⁵Nian Pita tәmatәghat әh, mal napuә itәм tәhag-әhag tәmuwa malpin ilat, kән kәmotәto nәwia suah kit tәmiet e mal napuә matән mәмә, “Inu nәtik itәм iakolkeike pik. Nikik tagien pik ron. !Әhalәtәlig-in in!”

⁶Nian suah milәhal әh kәмәhalәto nәghatән әh, kәмәhalisi-pәр mәhalitәnim-pән rәhalәhal-kapә e nәptән mәhalәgin pik.

⁷Mәto Iesu tәmuwa mek ilәhal matән mәмә, “Әhalәtul. Әsәhalәginән.”

⁸Nian kәмәhlasipәр, mәsәhalәplanән suah kit, mәto Iesu pisin әm.

⁹Nian kәmoteiuaiu-pa e nitot, Iesu tәмән kәм ilәhal mәмә, “Әsәhalәнән kәм etәmim kit nat naka itәм nәмәhalәplan mәtoarus-pән Nәti Etәmim otәmegәh min e nimisән.”

¹⁰Kән kәмәhalән-ipән mәмә, “?Mәto tahro iәgәtun min rәha Lou koatән mәмә Elaija otәkәike maupән muwa min?”

¹¹Kән Iesu tәмән-ipән mәмә, “Nipahrienән mәмә Elaija otәkәike maupән muwa mәмә otol-wir min natimnat rafin.

¹²Mәto ekән-ipinә kәм itәmәhal mәмә, Elaija tinuwa rәkis, mәto netәmim kәsotitunән in, kән motol tәrat lan. E nolән ahmen min әm, Nәti Etәmim otәto nahmәән e nelmilat.”

¹³Kән rәhan netәmim kinotitun mәмә tatәghat-in Jon Baptais kәм ilat.

Iesu tәmәhg-iarәp narmin rat e suakәku kit

(Mak 9:14-32; Luk 9:37-45)

¹⁴Nian kinotiet-pa o nimanin netәmim, suah kit tuwa misin nulin aupән-in Iesu,

¹⁵kән mәмә, “Iәрәmәрә, asәkitun nәtik. Tәtaut, kән matәto pik nahmәән lan. Nian tepәt tatiet-pән e nigәм, matiet-pән lәhau e nәhau.

¹⁶Emilәs muwin o rәham netәmim, mәto kotәruru nol-wirән.”

¹⁷Kən Iesu təmən-ipən məmә, “Ei, itəmat netəm roiu nəsothahatətəən, kən ninotuwın isəu o suatip rəha Uhgın. ?Onəghan nəpanotitun? ?Oekətatig kitat min itəmat mətəarus nian naka? Otiləs suakəku motuwa kəm io.”

¹⁸Kən Iesu təməghat əskasik kəm narmin rat, kən tiet e suakəku, kən roiu agın suakəku təməwir.

¹⁹Kən rəhan netəmim kəmotuwa kətul pisin ilat Iesu, kən motətapəh ron məmә, “?Tahro itimat ekotəruru nəhg-iarəpən narmin rat?”

²⁰Kən Iesu təmən-ipən kəm ilat məmә, “Mətə-inu rəhatəmat nahatətəən təkəku əm, təsahmenən. Mətə iakatən pahrien kəm itəmat məmә, okəmә rəhatəmat nahatətəən əh-ikin, nat əpnarın tahmen e nikuti mastat u nətın agın, kən nəkotitun nən-ipənən kəm nitot u məmә, ‘Otiet u ikin-u, muwın ikin əh,’ kən nitot otiet, kən nat kit tikə itəm itəmat nəkotəruru nolən.”

21

²²Nian kəmotuwa kitieh əpəh Kalili, Iesu təmən-ipən kəm ilat məmә, “Io Nəti Etəmim, suah kit oteghəhan-in-pən io e nelmi tikimır min.

²³Netəmim okotohamnu io, kən uarisig e nian kisił, Uhgın otosmegəh min io e nimisən.” Kən rəhan netəmim kəmotəto tərət pik agın o nəghatən əh.

Takis rəha Nimə Rəha Uhgın

²⁴Nian Iesu ne rəhan netəmim kəmotuwa Kapaneam, netəmim rəha nosən məni rəha takis rəha Nimə Rəha Uhgın, kəmotuwa o Pita motən məmә, “?Tahro? ?Rəham iəgətun tatətou takis u, o kəp?”

²⁵Kən Pita təmən-ipən məmә, “Əwəh, tatətou.” Nian Pita təmuwın e nipəgnoa nimə, kən Iesu təmaupən məghat matən kəm in məmә, “?Saimon, nikim təht mə naka? ?Kig min rəha nətueintən koatos takis o pah, koatos o rəhalat min netəmim, o netəm pisin min?”

²⁶Pita təmən-ipən məmә, “Koatos o netəm pisin min.” Kən Iesu təmən-ipən məmә, “Kən tol nəhlan, netəm rəha kig kəsotətouən.

²⁷Məto kitat kəsotolkeikeən məmə kotol ilat kotəto tərət otat. Kən tol nəhlan, təwir məmə ik onəkuwin əpəh ləhau e lek, mərakin rəham nipiən o niuwən nəm. Nəm itəm nakaupən miuw, nakəhap nipəgnoan, kən onəkəplan mənī silfa kit tahmen-in nətouən takis. Os muwin mos-ipən kəm ilat o nətouən rəhalau takis.”

Matiu 18

Etəm-iasol e nərəmərəən rəha Uhgīn

(Mak 9:33-37; Luk 9:46-48)

¹E nian əh, netəmim rəha Iesu kəmotuwa ron motətapəh ron məmə, “?Pah u in etəm-iasol e nərəmərəən rəha Uhgīn?”

²Kən Iesu taun-in suakəku kit tuwa mətul ilugīn elat,

³kən mən məmə, “Pahrien iatən kəm itəmat məmə okəmə nəsotəuhlinən itəmat motuwa motahmen e nisualkələh, okol nəsotuwīnən motatīg ahgīn nərəmərəən rəha Uhgīn.

⁴Tol nəhlan, pah u otīləs-iəhau atip in tahmen e suakəku u, in etəm-iasol e nərəmərəən rəha Uhgīn.

⁵“Okəmə suah kit in ləhau tahmen e suakəku u, kən etəmim kit nīkin tagien o nosən suah u muwin e nīpəgnoa nīmə rəhan, kən okəmə tatol e nərgək, kən tahmen məmə tatos io mīn e nīkin agien.

⁶“Məto okəmə etəmim kit tatiuw-pən rəhak kit etəmim u tahmen e suakəku əh, məmə otol nolən rat, kən suah əh, Uhgīn otol nalpīnən asol kəm in. Kən nalpīnən əh otəskasik taprəkis okəmə kətu-pən kəpiel kit e nentou, kən kərakin-pən əpəh itəhəi lokamnim məmə otamnim.

⁷“Kəsi, nahməən asol otuwa o netəmim rəha nətueintən, itəm koatos-ipən-os-ipən kəm netəmim məmə okotol təfagə rat. Nos-ipən-os-ipənən mīn əh okotəkəike motuwa. Məto kəsi, nahməən asol otuwa o suah u itəm in suatip rəha nərətən əh.

⁸Okəmə nelməm o nelkəm tol ik natol təfagə, kən nakəte rəkis mərakin. Məto-inu təwir pik məmə nian nakuwin e nego e neai, nelkəm kit o nelməm

kit tikə, taprəkis-in məmə ik nataskəlim nelməm kərən mil ne nelkəm kərən mil əh-ikin, kən kərakin-pən ik e nigəm itəm tatuəp namnun tikə.

⁹Okəmə nigənəmtim tol ik natol təfagə, kən asul-irəkis mərakin. Məto-inu təwir pik məmə nian nakuwin e nego e neai, nigənəmtim kit tikə, taprəkis-in inu məmə ik nataskəlim nigənəmtim kərən mil, kən kərakin-pən ik e nigəm asol itəm tatuəp namnun tikə.”

Nimaa nəghatən o sipsip itəm təməluə

(Luk 15:3-7)

¹⁰Kən Iesu təmən-ipən məmə, “Nəkotəkəike moatitun wir məmə nəsotehm-iəhauən netəmim rəhak min itəm kotahmen e nisualkələh, məto-inu iatən kəm itəmat məmə nagelo min itəm koatehm ilat, nian rafin ilat koatətul e nigənəmti rəhak Tata u tətatiğ əpəh e nego e neai məmə okotən-iarəp ilat kəm Uhgın.

11

¹²“?Nikitəmat təht məmə naka? ?Okəmə etəmim kit rəhan sipsip wan-hanrit, kən kitəh təluə mətan, kən suah əh otol naka? In otapəs ilat nainti-nain əpəh e nitot, kən muwin megəs-in itəm un itəm təməluə.

¹³Kən okəmə təməplan, iatən pahrien kəm itəmat məmə, nikin otagien o sipsip u kitəh əm, taprəkis-in ilat u sipsip nainti-nain itəm kəsotəluəən.

¹⁴E nolən ahmen min əm, rəhatəmat Tata əpəh e nego e neai, in təsolkeikeən məmə rəhan kit suakəku otuwin məluə.”

Piam itəm tatol nəratən kəm ik

(Luk 17:3)

¹⁵Kən Iesu təmən məmə, “Okəmə piam kit tol nolən rat kit kəm ik, uwin məplan itəlau pisin əm, kən nakən-ipən nat naka itəm təmol təsətuatipən. Okəmə tatətəlig-in ik, rəham nəghatən otol in tatitəlig-pa min nakuəwir otəlau min.

¹⁶Məto okəmə təsətəlig-inən ik, os etəmim kitəh o kəiu məhaluwin min məhaləplan məmə nəghatən min rafin itəm onəkotən, okotitun məmə ilat rafin niphahrienən əm.

¹⁷Məto okəmə təsətəlig-inən ilat, ən-ipən kəm niməfak. Məto okəmə təsətəlig-inən niməfak, kən niməfak otəplan in tahmen e Iaihlua o etəmim rəha nosən mənə e takis.

¹⁸“Iatən pahrien kəm itəmat məmə, əpəh e nego e neai, Uhgın tinegəhan-in rəkis nəwiatəmat itəm nakotən e nətueintən. Nian nəkoatahtosig-in nat kit o nakoategəhan-in nat kit, kən otol mihin.

¹⁹“Kən iatən min kəm itəmat məmə, okəmə itəlau kəiu nakuən nəghatən kit muəlis e nat kit itəm nakətuətapəh ron o Uhgın, kən rəhak Tata əpəh e nego e neai otol nat naka itəm nakətuətapəh ron.

²⁰Tol nəhlan məto-inu, ikin pəhruən etəmim kəiu o kisil kəhaluwa kitəh e nərgək, io itəmat min ilat.”

Nimaa nəghatən e etəmim itəm təsaluinən kaon rəha suah kit

²¹Kən Pita təmuwa o Iesu kən mətapəh ron məmə, “Iərəmərə. ?Ekaluin nolən tərət itəm piak təmol kəm io mau kuwəh? ?Mau sepin tahmen, o?”

²²Kən Iesu təmən-ipən məmə, “Iakən-ipinə kəm ik məmə, sənəmə mau sepin əm, məto mau sepin-te-sepin.

²³“Nakəkəike mol nəhlan məto-inu nərəmərəən rəha Uhgın in tol nulan. Kig kit tolkeike məmə otəplan-tu kaon min itəm rəhan netəmim kəmotol kəm in məmə ilat okotətu.

²⁴Nian tinətuoun wək əh, kotiləs rəhan kit iolwək motuwa ron itəm təmol kaon iahgin iahgin, tahmen e ten-taosan talen.

²⁵Məto suah əh tinəruru nətuən, kən tol nəhlan, kig təmən məmə okol-salim-in in, ne rəhan pətan, ne rəhan nisualkələh, ne rəhan natimnat min rafin məmə otətu rəhan kaon.

²⁶“Kən rəhan iolwək təmeiuaiu misin nulın aupən in. Kən matəkəike ron matən-ipən kəm in məmə, ‘Awi. ?Nəkəitun nos-ipamən nian əkuəkir məsin kəm io məmə ekətu rafin rəhak kaon?’

²⁷Kən rəhan etəm-iasol təmasəkitun in, kən mapəs rafin rəhan kaon məmə otəsətouən nian kit ne, kən megəhan-in məmə otuwīn.

²⁸“Məto nian iolwək u təmuwīn, kən məplan etəmim kit u təmol kaon kəm in, wan-hanrit tenarius. Ilau kərən iolwək mil kətioal wək kitiəh əm rəha etəm-iasol. Kən iolwək itəm etəm-iasol təmaluin rəhan kaon, in təmaskəlīm itəm u kit kəmətioal wək kələh, kən matəmkətip nentou, matən məmə, ‘!Ətou-pa rəham kaon itəm nəmol kəm io!’

²⁹“Kən iolwək un itəm təmol kaon kəm in, teiuaiu misin nulin matəkəike ron matən məmə, ‘Awi. ?Nəkitun nos-ipamən nian əkuəkīr məsin kəm io məmə ekətou rəhak kaon?’

³⁰“Məto in təmə, kəp. Kən təmuwīn mən məmə okiləs suah u kan kiləs-ipən e kalapus mətoarus-pa otətou rafin rəhan kaon min itəm təmol.

³¹Nian iolwək min neen kəmotəplan nat əh, nīkilat təmahmə pik ron, kən motuwīn motən-ipən kəm etəm-iasol natimnat rafin itəm kəmotəplan.

³²“Kən etəm-iasol təmaun-in iolwək un tuwa təmən-ipən kəm in məmə, ‘Ik iolwək itəm tərət agin. Emapəs rafin rəham kaon məto-inu nəmatəkəike ron io.

³³?Tahro nəsasəkitunən suah u natioal wək itəlau min, tahmen-pən əm e itəm emol kəm ik?’

³⁴Kən neməha təmol etəm-iasol, kən təmən məmə okiləs kan kiləs-ipən e kalapus məmə etəm tatehm kalapus otol nalpīnən kəm in mətoarus-pən otətou rafin rəhan kaon itəm təmol.”

³⁵Kən nian Iesu təmol namnun nimaa nəghatən, təmən-ipən kəm ilat məmə, “Kən e suatip kitiəh əm, rəhak Tata əpəh e nego e neai, otol kəm itəmat rafin, okəmə nəsotaluin pahrienən nəratən itəm piatəmat min koatol kəm itəmat.”

Matiu 19

lərman ne pətan kətuapəs ilau min
(Mak 10:1-12; Luk 16:18)

¹Nian Iesu tæmol namnun nænæn natimnat min u, tæmiet Kalili muwin nitæn Jutia entænipæn-pæn e nikali nêhau Jotan.

²Kæn nîmanin netæmim kæmotuarisig-in in motuwîn æh-ikîn æh, kæn tæmol-wîr ilat e nimisæn min.

³Kæn Farisi min neen kæmotol noa eko-eko mæmæ otiuw-pæn Iesu o nænæn nêghatæn kit itæm tæsætutipæn. Kæmotuwa o Iesu motæn mæmæ, “?Lou tatæn mæmæ iærman titun napæsæn ræhan pætæn o nat ærnapîn æm kit, o kær?”

⁴Kæn tæmæn-ipæn mæmæ, “?Næmotafin o kær mæmæ, e nætuounæn muwin mætoarus-pa u-roiu, Uhgîn u itæm tæmol netæmim rafin, tæmol iærman ne pætæn?”

⁵Kæn Suah u tæmæn mæmæ, ‘O nat æh in æh, iærman otæpanapæs ræhan tata ne mama, kæn mætuatig ilau ræhan pætæn. Kæn ilau okuea nîpætîlau kitîæh.’

⁶Kæn roiu, ilau sænæmæ kæiu, mæto kitîæh æm. Uhgîn tinîlpîn ilau kinuea minioal kitîæh, kæn o nat æh, pæs etæmim kit okol tæsætutipæn ræhalau natigæn.”

⁷Kæn Farisi min kotæn-ipæn mæmæ, “?Mæto tahro Moses tæmæn mæmæ etæmim titun nos-ipænæn naoa kit kæm ræhan pætæn o napæsæn, kæn mahl-ipæn tatuwin?”

⁸Kæn Iesu tæmæn-ipæn mæmæ, “Moses tæmegæhan-in itæmat noanol ræha Isrel mæmæ onækotapæs ræhatæmat nîpitan min mæto-inu ræhatæmat-kapæ tæskasik pik. Mæto aupæn, tæmæsolæn nulan.

⁹Mæto iakatæn kæm itæmat mæmæ, okæmæ suah kit tatol tifos mætapæs ræhan pætæn itæm tæmæsætæu-pæn anionæn iærman pîsîn kit, kæn suah u mit pætæn pîsîn, tahmen æm mæmæ in tætaklêh-in pætæn æh, mateguafæl ræhan pætæn ætuatip.”

¹⁰Kæn netæmim ræha Iesu kotæn kæm in mæmæ, “Okæmæ natigæn ræha iærman ne pætæn tæskasik pik nulan, tæwîr mæmæ iærman ne pætæn okæsioalæn marit.”

¹¹Kən Iesu təmən-ipən məmә, “Sənәmә netәmim rafin okotitun nosән nәghatән u, mәto netәm min әm un itәm kәmos-ipән nәghatән u kәm ilat, in rәhalat әm.

¹²Tol nәhlan mәto-inu, netәmim neen okәsotolән marit o nat pisin pisin min. Kit okol tәsolән marit mәto-inu nipәtin mәsin tәrat nian tәmaiir. Kit okol tәsolән marit mәto-inu netәmim kәmotәрәkin nipәtin mәsin. Kән kit tatән atip mәмә in otәsolән marit mәмә otol wәk rәha nәрәmәрәән rәha Uhgин. Etәmim itәm titun nosән nәghatән u, in tәike mos.”

Iesu tәmәfak o nisualkәlәh

(Mak 10:13-16; Luk 18:15-17)

¹³Kән netәmim kәmotәmik nisualkәlәh motuwa o Iesu mәмә otәlәhәu-pән nelmin elat, kән mәfak olat. Mәto netәmim rәha Iesu kәmotән-iәhau ilat.

¹⁴Mәto Iesu tәмән-ipән mәмә, “Pәs nisualkәlәh kotuwa ron io, sotән-iәhauән ilat, mәto-inu nәрәmәрәән rәha Uhgин in rәha netәmim min u kotol nulan.”

¹⁵Kән tәmәlәhәu-pән nelmin elat, kән miet ikin әh.

Etәm aluә itәm rәhan nautә tәpәt

(Mak 10:17-31; Luk 18:18-30)

¹⁶Kән suah kit tәmuwa o Iesu mән-ipән mәмә, “Iәgәtun. ?Io ekәkәike mol wәk naka itәm in tәwir mәмә ekos nәmegәhән lilin?”

¹⁷Kән Iesu tәмән-ipән mәмә, “?Tahro nakatәtapәh ron io o nat naka itәm tәwir? Suah kitiәh әm itәm in tәwir. Okәmә nakolkeike mәмә nakos nәmegәhән lilin, әtәu-pән nәghatән min rәha Lou.”

¹⁸Kән suah u tәмән-ipән mәмә, “?Lou min pәhruән?” Kән Iesu tәмән-ipән mәмә, “Sohamnuән etәmim, kән mәsaklәh-inән pәtan, kән mәsaklәhән, kән mәseiueiuәән e kot,

¹⁹kән misiai-in rәham tata ne mama, kән molkeike ik kit tahmen әm mәмә nakolkeike atip ik.”

²⁰Kән etәm aluә u tәмән-ipән mәмә, “Natimnat rafin un iakatol. ?Nat naka min әh-ikin itәm emәsolән?”

²¹Kən Iesu təmən-ipən məmə, “Okəmə nakolkeike məmə rəham nolən otətuatip agin, uwın mol-salim-in rəham nautə, kən mos-ipən mənı lan kəm ian-rat mın. Kən ik onakos natimnat wir əpəh e nego e neai. Kən wa, mətəu-pa io.”

²²Nian etəm aluə təməto nəghatən əh, kən təmagim matuwın nıkin tərou mətə-inu rəhan nautə tepət.

²³Kən Iesu təmən-ipən kəm rəhan mın netəmim məmə, “Ekatən pahrien məmə, tiəkis o etəmim itəm rəhan nautə tepət məmə otuwın matig ahgin nərəmərən rəha Uhgın.

²⁴Kən iatən mın kəm itəmat məmə, tiəkis məmə kamel otuwın-pən e nıpəg nitel, mətə tiəkis pik məmə etəm rəhan nautə tepət otuwın matig ahgin nərəmərən rəha Uhgın.”

²⁵Nian netəmim rəha Iesu kəmotəto nəghatən əh, narmilat təmiwig pik, kən motən-ipən məmə, “?Kən pah titun nosən nəmegəhən lilin?”

²⁶Kən Iesu təplan ilat kən mən məmə, “Nat u, okol etəmim təsolən. Mətə Uhgın, in titun nolən natimnat rafın.”

²⁷Kən Pita təmən-ipən məmə, “Emotapəs natimnat rafın məmə ekotətəu-pən ik. ?Nat naka u, o nian kit in rəhatimat?”

²⁸Kən Iesu təmən-ipən kəm ilat məmə, “Iatən pahrien kəm itəmat məmə, e nian itəm natimnat rafın okotəuhlin motuwa motuwiwi, kən Nəti Etəmim otəpələh e rəhan jea rəha kig itəm in təhag-əhag məwir agin, kən itəmat un itəm nəmoatətəu-pa io, onəkotəpələh mın e jea rəha kig ilat tuelef, kən motərəmərə e noanol mın ilat tuelef rəha Isrel.

²⁹Kən netəmim rafın un itəm kəmotapəs rəhalat nimə mın, o pialat mın, o winilat mın, o rəhalat tata o mama, o nenətılal mın, o rəhalat nəptən mın o nərgək, Uhgın otos-ipən natimnat mın əh tepət pik agin kəm ilat, kən mos-ipən nəmegəhən lilin kəm ilat.

³⁰Mæto netəmim tēpət itəm koatətul aupən e nətueintən roiu, okotuwa motətul uarisig e nəmegəhən itəm otuwa. Kən netəmim tēpət itəm koatətul uarisig e nətueintən roiu, okotuwa motətul aupən e nəmegəhən itəm otuwa.”

Matiu 20

Nimaa nəghatən e iolwək min əpəh e nasumən

¹“Tol nəhlan mæto-inu nərəmərən rəha Uhgın tahmen e etəm-iasol kit rəha nasumən. Təmiet laulaugin agın məmə otegəs-in netəmim okotuwa motol wək e rəhan nasumən.

²Kən in təmən məmə otətou ilat kitih kitih wan tenarius e nian kitih, kən mahl-ipən ilat kotuwın e rəhan nasumən.

³“Iuəhkir nain klok laulaugin, təmiet muwın e maket məplan netəmim neen koatətul məsotolən nat kit.

⁴Kən təmən-ipən kəm ilat məmə, ‘Itəmat min, otuwın motol wək əpəh e rəhak nasumən, kən ekətou itəmat e məni itəm tətuatip.’

⁵Kən kəmotuwın. “Kən iuəhkir o tina, təmiet muwın mol nat kitih əm, kən mol min e tri klok ehnaipən.

⁶Kən iuəhkir e faif klok ehnaipən, təmiet muwın məplan netəmim neen min koatətul ənəpın əm. Kən təmən-ipən kəm ilat məmə, ‘?Tahro nəkoatətul ikın-u nian ariəpiə kit, məsotolən nat kit?’

⁷Kən kotən-ipən məmə, ‘Mæto-inu suah kit təsegəs-inən itimat məmə ekotol wək rəhan.’ Kən təmən-ipən kəm ilat məmə, ‘Itəmat min otuwın kol wək e rəhak nasumən.’ Kən ilat kəmotuwın.

⁸“Nian tinehnaipən, etəm-iasol rəha nasumən təmən-ipən kəm rəhan etəmim itəm tatehm rəhan iolwək min məmə, ‘Aun-in iolwək min kotuwa, nakos-ipən rəhalat məni. Nakətuoun mətou netəm itəm kəmotuwa uarisig muwın mætoarus netəm kəmotaupən motol wək.’

⁹“Kən iolwək min itəm kəmotuwa motol wək e faif klok, kəmotuwa kən təmətou ilat wan tenarius kitih kitih.

¹⁰Tol nəhlan, netəm min u itəm kəmotaupən kol wək, nikilat təht məmə okotos məni taprəkis-in itəm min u kəmotol wək uarisig. Məto ilat kitiah kitiah kəmos min əm wan tenarius.

¹¹Nian kəmos məni, kən kəmoatəghat-əghat kəm ilat min məmə nikilat təsagienən o məni, kən motən-ipən kəm etəm-iasol rəha nasumən məmə,

¹²‘Netəm min u itəm kəmotol wək uarisig, kəmotol wək əm e aua kitiah əm, məto ik nəmətou itimat min ilat tahmen-ahmen əm. Məto itimat emotol wək asol e nərauiə əskasik e nian apiəpiə.’

¹³“Məto etəm-iasol təmən-ipən kəm ilat kit məmə, ‘Io kit. Esakläh-inən ik. ?Nəmən məmə nakol wək o wan tenarius, o kəp?

¹⁴Os rəham məni matuwın. Iakolkeike məmə ekətou etəm u itəm təmol wək uarisig tahmen əm lam.

¹⁵Rəhak u məni. ?Ekitun nolən nəhlan nat naka itəm iakolkeike, o kəp? ?Natetəhak olat məto-inu io iakəwir olat?’”

¹⁶Kən nian Iesu təmol namnun nimaa nəghatən, təmən-ipən kəm ilat məmə, “Tol nəhlan, etəm tatuarisig otaupən, kən etəm tətaupən otuarisig.”

Iesu təmən-iarəp rəhan nimisən

(Mak 10:32-34; Luk 18:31-34)

¹⁷Kən nian Iesu təmatuwın Jerusalem, təmos rəhan netəmim tuelef motətul pisin, kən təmən-ipən kəm ilat məmə,

¹⁸“Koatuwin əpəh ilis Jerusalem, kən io Nəti Etəmim, okegəhan-in-pən io kəm pris asol min ne iəgətun min rəha Lou. Kən okotiuw-iarəp io məmə ekimis,

¹⁹kən motiləs-ipən io kəm Iaihlua min məmə okotəsan lak, kən motalis motoh, kən motətu-pər io e nig kəməluau məmə ekimis. Kən uarisig e nian kisil, kən Uhgin otosmegəh min io e nimisən.”

Nətapəhən rəha mama kit o Iesu

(Mak 10:35-45)

²⁰Kən pətan rəha Sepeti, tiləs nətilau mil muwa misin-pən nulin o Iesu, matətapəh-in nat kit ron.

²¹Kən Iesu təmən-ipən məmə, “?Nakolkeike naka?” Kən pətan təmən-ipən məmə, “Pəs nakegəhan-in məmə nətik mil u, ilau kərən kit otəpələh e nikaləm matip, kən kit təpələh e nikaləm mol, ikin min rəha nəsanənən ne nisiiəən, nian natərəmərə lan.”

²²Kən Iesu təmən-ipən kəm ilau məmə, “Nəkuəruru nat itəm natuətapəh ron. ?Tahro? ?Itəmlau, nikitəlau təht məmə nəkuahmen məmə kitəhal kəhalətul e nigəm rəha nuwigi nien itəm io ekəike mətul lan?” Kən kuən-ipən kəm Iesu məmə, “Əwəh, ekiatun.”

²³Kən Iesu təmən-ipən kəm ilau məmə, “Pahrien, onakuəkəike muənīm-pən e rəhak kap rəha nətoən nahməən. Məto o nəpələhən e nikalik matip ne mol, sənəmə rəhak məmə ekən. Ikin mil əh, ilau rəha netəm min u itəm Uhgın təmol əpen-əpenə olat.”

²⁴Nian netəmim ten min rəha Iesu kəmotəto nəghatən əh, kən neməha təmol pīk ilat o suah mil ilau pian.

²⁵Məto Iesu taun-in ilat kotuwa kitəh, kən mən-ipən kəm ilat məmə, “Nəkotitun rəkis nolən rəha netəm-iasol rəha Iaihlua min. Ilat koatol təkasiik pīk kəm rəhalat netəmim min. Kən rəhalat kapman min koatol ilat kotəməhl ləhau e nərəmərəən rəhalat.

²⁶Məto itəmat, okol nəsotolən nəhlan. Məto okəmə itəmat kit tolkeike məmə otuwa in etəm-iasol kit rəhatəmat, in otəkəike muwa tahmen e iolwək kit rəhatəmat,

²⁷kən okəmə itəmat kit tolkeike məmə otətul aupən etəmat, in otəkəike muwa slef rəhatəmat.

²⁸Nolən əh tahmen əm lak, Nəti Etəmim. Eməsuwamən məmə netəmim okotol wək rəhak, məto emuwa məmə ekol wək rəhalat, kən ekos-ipən rəhak nəmegəhən məmə ekikis ilat e rəhalat nolən rat min.”

Iganəmtin rat mil kəmuəplan nat

(Mak 10:46-52; Luk 18:35-43)

²⁹Nian Iesu ne rəhan min netəmim kəmoatiet e taon Jeriko, nimanin netəmim kəmotətəu-pən in.

³⁰Kən iganəmtin rat mil kəiu katuəpələh e nīkali suatip, kən nian kəmuəto məmə Iesu taliwək e suatip matuwa, kən kəmuagət əfəməh muən məmə, “!Iərəmərə, Mipi Tefit, asəkitun itimlau!”

³¹Kən mətə, nimanin netəmim koatən-iəhau ilau, motən-ipən məmə kəsuağət pikən, mətə ilau kuagət pik agin min məmə, “!Iərəmərə, Mipi Tefit, asəkitun itimlau!”

³²Kən Iesu tətul maun-in ilau, mən-ipən məmə, “?Nakioalkeike məmə ekol naka kəm itəlau?”

³³Kən kuən-ipən məmə, “Iərəmərə, ekioalkeike məmə ekuəplan nat.”

³⁴Kən Iesu təmasəkitun ilau, kən mek niganəmtilau. Kən roiu agin, kinatuəplan nat, kən matuətəu-pən Iesu.

Matiu 21

Iesu təmuwin əpəh Jerusalem mol əp məmə in Kig

(Mak 11:1-11; Luk 19:28-40; Jon 12:12-19)

¹Nian kinotuwa iuəhkir o Jerusalem, kinotuwa Petfas e Nitet Rəha Nig U Olif, kən Iesu tahləpis rəhan etəmim kəiu,

²kən mən-ipən kəm ilau məmə, “Ian əpəh e latuənu aupən etat, kən ikin əh, nakuəplan togki kit kəmərūətain ilau nətin. Kən nəkiakis ilau muasig muea kəm io.

³Okəmə suah kit tən nat kit kəm itəlau, nəkuən-ipən kəm in məmə Iərəmərə tolkeike ilau, kən otəpanahl-ipa ilau e nian əh.”

⁴Nat u təmuwa məmə in otol nəghatən naka itəm ien təmən otuwa mol nipahrienən. Ien təmən məmə,

⁵“Otən-ipən kəm Nətin Pətan Saeon məmə, ‘Otəplan-tu, rəhatəmat kig tatuwa otəmat, rəhan nətəligən in ləhau, kən mətəsuə e togki, ne togki u in nətin əm.’”

⁶Kən etəmim mil rəha Iesu kəmian mioal nat naka itəm Iesu təmən məmə okioal.

⁷Kəmuasig togki ne nətın, kən muəfətain noankawi togki mil e rəhalau kot min, kən Iesu təpələh-pər lan.

⁸Nımanin netəmim tepət koatəpen rəhalat kot min əpəh e suatıp, kən neen kotəte nımalı nig min, kən motəpen ilat e suatıp.

⁹Kən nımanin netəmim itəm kotaupən e Iesu, ne nımanin netəmim itəm kotuarisig-in Iesu, koatagət əfəməh moatən məmə, “!Hosana o Mipi Tefit! !İərəməə Uhgın tətatiğ ilau suah u itəm tatuwa e nərgin! !Hosana o Uhgın əpəh ilis e nego e neai!”

¹⁰Nian Iesu təmıet-arəpa Jerusalem, netəmim rafın əh-ikın nıkilat təmaut, kən moatən nəghatən tepət moatətapəh məmə, “?Pah u?”

¹¹Kən nımanin netəmim kotən məmə, “Inu ien Iesu, rəha Nasaret, əpəh e nıtən Kalili.”

Iesu əpəh e Nımə Rəha Uhgın

(Mak 11:15-19; Luk 19:45-48; Jon 2:13-22)

¹²Kən Iesu təmuwin əpəh imə e Nımə Rəha Uhgın, kən məhg-ıarəp netəmim itəm koatol-salım-in ne moatos-nəmtın natımnat əh-ikın məmə okotol sakrifais lan. Kən mahwin tepıl min itəm kətawluin məni ikın, kən mahwin jea min rəha netəm min u koatol-salım-in ioen min.

¹³Kən mən-ıpən kəm ilat məmə, “Kəməte e Naoa Rəha Uhgın məmə, ‘Rəhak nımə, okaun-in məmə nımə rəha nəghatən kəm Uhgın e nəfakən,’ mətə itəmat nəmotol məmə in ‘nımə rəha iakläh min.’”

¹⁴Kən ıganəmtın rat min ne netəm nelkilat təməfaiu-əfaiu kəmotuwa ron əpəh e Nımə Rəha Uhgın, kən tol-wır ilat.

¹⁵Mətə nian pris asol min ne iəgətun min rəha Lou kəmotəplan nat wır min itəm in təmol, kən motəplan min nisualkələh koatagət əfəməh əpəh e Nımə Rəha Uhgın, moatən məmə, “!Hosana o Mipi Tefit!” neməha təmol ilat.

¹⁶Kən kotən-ipən kəm Iesu məmə, “?Nakatəto nat naka itəm nisualkələh koatən, o kəp?” Kən Iesu təmən-ipən kəm ilat məmə, “Əwəh. ?Nəmotafin, o kəp, nəghatən suah kit təmen kəm Uhgın itəm tatən nulan məmə, ‘E nohli nisualkələh agin ne nisualkələh mətmətig, nəmol məmə ilat okotənwiwi ik?’”

¹⁷Kən təmapəs ilat miet Jerusalem muwin e taon Petani, mapıl ikın.

Nig kit fik təmauke-auke

(Mak 11:12-14,20-26)

¹⁸Laulaugin agin, Iesu təmatitəlig-pən Jerusalem, kən nəumis tinus.

¹⁹Kən təməplan nig u fik e nikali suatip, kən təmuwin ron məto təsəplanən noan kit, tatəplan əm nimalin. Kən təmən-ipən kəm nig u məmə, “!Okol nəsoe minən!” Kən roiu agin, nig təmauke-auke.

²⁰Nian rəhan netəmim kəmotəplan nat əh, kən narmilat təmiwig, kən motən-ipən kəm Iesu məmə, “?Tahro nig əh fik təmauke-auke uəhai əm nəhlan?”

²¹Məto Iesu təmən-ipən məmə, “Iatən-ipinə nipahrienən məmə okəmə nakoatos nahatətən, kən rəhatəmat nətəligən təsolən kəiu, nəkotitun nolən nat naka itəm emol e nig u fik. Məto sənəmə in əm əh, nəkotitun nən-ipənən kəm nitot əh məmə, ‘Uwin mamnim əpəh itəhəi,’ kən otol nəwiatəmat.

²²Okəmə nakotahatətə, kən onəkotos nat naka itəm nakoatətapəh-in e nəfakən.”

Nətapəhən o nepətən rəha Iesu

(Mak 11:27-33; Luk 20:1-8)

²³Iesu təmuwin e Nimə Rəha Uhgın, kən nian təmatəgətun, pris asol min ne netəm-iasol rəha netəm Isrel, koatuwa ron motən-ipən məmə, “?Natol natimnat min u e nepətən rəha pah? ?Kən pah təmos-ipinə nepətən un?”

²⁴Kən Iesu təmən-ipən məmə, “Iakətapəh-in-pinə nəghatən kit kəm itəmat. Okəmə nakotos-ipa nəghatən kit, kən ekən-ipinə kəm itəmat məmə nepətən naka itəm ekatol natimnat min u lan.

²⁵?Nepətən rəha Jon təmisi-pən hiə o nolə baptais? ?Təmisi-pən e nego e neai, o rəha netəmim əm?” Kən kəmotən-ipən kəm ilat min məmə, “Okəmə

kotən məmə, ‘Nepətən rəha Jon təmisi-pən e nego e neai,’ kən otən məmə, ‘?Məto tahro nəsotənən nīpahrienən lan?’

²⁶Məto okəmə kotən məmə, ‘Rəha netəmim əm,’ kitat koatəgin netəmim, məto-inu nīkilat təht məmə Jon in ien kit rəha Uhgīn.”

²⁷Tol nəhlan, kəmotən-ipən kəm Iesu məmə, “Itimat ekotəruru.” Kən Iesu təmən-ipən kəm ilat məmə, “Kən io mīn, okol ekəsənən kəm itəmat məmə e nepətən naka ekatol natimnat mīn u lan.”

Nimaa nəghatən e suah mil kəiu

²⁸Kən Iesu təmən-ipən məmə, “?Tahro? ?Nīkitəmat tatəht məmə naka? Suah kit, nətīn iərman kəiu. Kən təmuwīn mən-ipən kəm itəm iahgin lan məmə, ‘Nətīk, uwīn mol wək u-roiu əpəh e nasumən.’

²⁹Məto nətīn təmən-ipən məmə, ‘Iakapəs.’ Kən matīg məuhlin mīn rəhan nətəligən, kən muwīn e nasumən.

³⁰“Kən tata tuwīn o nətīn itəm təkəku, mən-ipən mīn kəm in nat kitiəh əm. Kən nətīn təmən-ipən məmə, ‘Əwəh, tata, ekuwīn,’ məto təmapəs-pən e nasumən.

³¹“?Otən-tu məmə suakəku mil u in pəhruən, təmol nəwīa rəhan tata?” Kən kəmotən-ipən məmə, “Suakəku itəm iahgin lan.” Kən Iesu təmən-ipən kəm ilat məmə, “Əwəh, in ətuatīp. Kən iakatən-ipinə nīpahrienən məmə, netəm koatos mənī rəha takis, ne nīpitan rəha suatīp koatuwīn e nərəmərən rəha Uhgīn aupən etəmat,

³²məto-inu Jon təmuwa otəmat məmə otəgətun suatīp rəha nolən ətuatīp, kən məto itəmat nəsotənən nīpahrienən lan, məto netəm koatos mənī rəha takis, ne nīpitan rəha suatīp kəmotən nīpahrienən lan. Kən nəmotəplan pəp nat əh, məto nəməsotəuhlinən itəmat e rəhatəmat nolən rat mīn, kən məsotənən nīpahrienən lan.”

Nimaa nəghatən e netəmim rat itəm koatehm nasumən

(Mak 12:1-12; Luk 20:9-19)

³³Kən Iesu tatəkəike matən məmə, “Otətəlig-in-tu nimaa nəghatən kit mīn. Etəm-iasol kit rəha nasumən, təmōl nasumən kit e nol kit katən məmə krep, u katol wain lan. Kən mol fenis e kəpiel muwīn mītəlau lan. Kən mol ikin kit o nolən nəme naliwək-aliwəkən e noa krep məmə nahuin otaiu kən kol wain lan. Kən mol nimə kit itəm in ilis məmə etəmim otaiu lan matehm wir nasumən o nat megəh mīn ne netəmim. Kən təmegəhan-in-pən nasumən kəm netəmim məmə okotasum lan, kən motoor noa krep, məsin rəhan, məsin rəhalat. Kən miet muwīn o naliwəkən ik pisin kit.

³⁴Nian krep tinəmarəg, kən tahl-ipən rəhan slef mīn məmə okotuwīn e nasumən rəha krep, motətapəh o netəm koatol wək e nasumən məmə okotos-ipən rəhan krep məsin kəm ilat.

³⁵“Məto netəm koatol wək e nasumən kəmotaskəlīm rəhan slef mīn, kən motoh kit, motohamnu kit, motaht e kəpiel itəm tatol kisil lan.

³⁶Kən tahl-ipən mīn slef mīn neen kotuwīn olat, ilat tepət taprəkis-in itəm aupən mīn. Kən netəm koatol wək e nasumən kotol tərət kəm ilat e nolən ahmen mīn əm itəm kəmotol kəm netəm aupən.

³⁷Namnun agin, tahl-ipən nətin iərman tuwīn olat, kən mən məmə, ‘Ilat okotəkəike motisiai-in nətik.’

³⁸“Məto nian netəm koatol wək e nasumən kəmotəplan nətin, kən kotən-ipən kəm ilat mīn məmə, ‘Inu nəti etəm-iasol itəm otərəməərə e nasumən nian rəhan tata otimis. Pəs kotuwīn motohamnu mīn, kən motərəməərə e nasumən rəhan.’

³⁹Kən kəmotaskəlīm motatipin-iarəp e nasumən, kən motohamnu.”

⁴⁰Kən nian Iesu təmōl namnun nimaa nəghatən, kən təmən məmə, “?Tol nulan, nian etəm-iasol rəha nasumən otuwa, kən otol naka kəm netəmim itəm təmegəhan-in nasumən kəm ilat?”

⁴¹Kən kəmotən-ipən məmə, “Otərək-rəkin agin-əh netəm rat mīn əh, motohamnu ilat. Kən uarisig, təpanegəhan-in rəhan nasumən əh tuwīn e

nelmi netəm pişin neen, kən e nian ətuatip itəm krep tatəmarəg, ilat okotos-
ipən noan məsin rəhan.”

⁴²Kən Iesu təmən-ipən kəm ilat məmə, “?Nəmotafin Naoa Rəha Uhgın u, o
kəp? Tatən məmə, ‘Kəpiel u itəm netəm rəha niləkinən nimə kəsotolkeikeən
motapəs, in tınuwa kəpiel keike o nolən nimə. İərəmərə təmol nat u, kən in
nat təwir agın e niganəmtitat.’

⁴³Tol nəhlan, iatən kəm itəmat məmə nərəmərəən rəha Uhgın okoh-rəkis
otəmat, kən kos-ipən kəm netəmim min u itəm okotol noalat.

⁴⁴Okəmə suah kit otisi-pər e kəpiel u, kəpiel otətarerəh-ətərarəh, məto okəmə
kəpiel otisi-pər lan, otəpələh-ərən in.”

⁴⁵Nian pris asol min ne Farisi min kəmotəto nimaa nəghatən itəm Iesu
təmuəh, kən kinotitun məmə tatəghat-in ilat.

⁴⁶Kən kinotegəs-in suatip kit məmə okotiləs Iesu lan kan e kalapus, məto
koatəgin nımanin netəmim, məto-inu netəmim koatən məmə in ien kit.

Matiu 22

Nimaa nəghatən e nagwənən asol rəha marit

¹Kən Iesu təmuəh nimaa nəghatən kit min kəm ilat məmə,

²“Nərəmərəən rəha Uhgın in tahmen e kig kit itəm təmol əpen-əpenə e
nagwənən asol o marit rəha nətın.

³Kən mahl-ipən rəhan iolwək min məmə okotuwin o netəmim min u itəm
təmahl-ipən rəkis nəghatən olat məmə okotuwa o nagwənən rəha marit. Məto
kotən məmə kol kəsotuwamən.

⁴“Kən tahl-ipən rəhan iolwək neen min, mən-ipən kəm ilat məmə, ‘Otuwin
motən-ipən kəm netəm min u itəm emahl-ipən rəkis nəghatən olat məmə,
enol əpen-əpenə rəkis e rəhak nagwənən. Rəhak kau min ne nətı kau min
rəhak itəm kotəhg-əhg wir, emoh rəkis ilat, kən natımnat rafin tinahmen.
Otuwa e nagwənən rəha marit.’

⁵“Məto kəsotətəlig-inən iolwək min, kən motagim min, kit tatuwin e rəhan nasumən, kit tatuwin e rəhan stoa.

⁶Kən neen kotaskəlim iolwək min rəhan, motol tərət kəm ilat, kən motohamnu ilat.

⁷Kən kig, neməha təmol pik. Kən tahl-ipən rəhan mopael min kotuwın, kən motohamnu netənim min u itəm kəmotohamnu rəhan iolwək min, kən motasiepən e rəhalat taon asol.

⁸“Kən mən-ipən kəm rəhan iolwək min məmə, ‘Kinol əpen-əpenə rəkis e nagwənən rəha marit, məto netəm min u itəm emahl-ipən rəkis nəghatən olat, nolən rəhalat təsahmenən məmə okotuwa.

⁹Tol nəhlan, otuwın əpəh e suatip asol min kən motən-ipən kəm netənim əpnəpın rafin itəm nakoatəplan məmə okotuwa e nagwənən rəha marit.’

¹⁰Kən iolwək min kəmotuwın əpəh e suatip asol min, kəmotuəfimin netənim rafin itəm kəmotəplan ilat, netənim itəm kotəwir ne netəm itəm kotərat, kən ikin kətagwən ikin təmərıoah e netənim.

¹¹“Məto nian kig təmuwa məplan netənim, təməplan etənim kit əh-ikin itəm təsuwinən e natimnat rəha marit.

¹²Kən kig təmən-ipən məmə, ‘?Io kit, nəmahro? ?Nəmuwa imə məto nəməsuwinən e natimnat rəha marit?’ Kən suah u tinəruru nuhalpınən nəghatən rəhan.

¹³“Kən kig təmən-ipən kəm rəhan min netənim məmə, ‘Okotəlis ətain nelmin ne nelkin, kən motəraikin-iarəp əpəh e naluginən itəm ikin kətasək ikin, kən katəgətain nəluitəm ikin.’”

¹⁴Kən Iesu təmatəkəike mən məmə, “Tol nəhlan məto-inu netənim tepət, kətahl-ipən nəghatən olat, məto noan məsin əm itəm katitəpun ilat.”

Takis rəha Kig Sisa

(Mak 12:13-17; Luk 20:20-26)

¹⁵Kən Farisi min kəmotiet motuwın motol noa eko-eko min məmə otiuw-pən Iesu o nənən nəghatən kit itəm təsətuatipən.

¹⁶Kən kotahl-ipən rəhalat netəmim kotuwīn o Iesu ilat netəmim rəha pati rəha Herot. Kən motən-ipən məmə, “Iəgətun. Ekotitun məmə ik etəm ətuatip, kən matəgətun ətuatip pahrien suatip rəha Uhgīn. Nəsolən məmə nətəligən rəha netəmim okotiuw rəkis rəham nətəligən, mətō-inu natol tahmen-ahmen əm kəm netəmim rafin, okəmə in etəm-iasol o etəm ərnapīn əm.

¹⁷Kən ən-tu kəm itimat rəham nətəligən e nat u. ?Tətuatip məmə okətou-pən takis kəm Kig Sisa, o kəp?”

¹⁸Mətō Iesu tinitun rəhalat nətəligən rat mīn, kən təmən-ipən kəm ilat məmə, “!Rəhatəmat nənən təwir, mətō nikitəmat tamkimik! ?Tahro nakotalkut məmə nəkotol noa eko-eko ron io?

¹⁹Otəgətun-tu mənī itəm katətou takis lan.” Kən kotos mənī motuwa kəm in,

²⁰kən təmən-ipən kəm ilat məmə, “?Narmī pah u, kən nərgī pah u e mənī u?”

²¹Kən kotən-ipən məmə, “Kig Sisa.” Kən Iesu təmən-ipən kəm ilat məmə, “Naka u rəha Kig Sisa, otos-ipən kəm Kig Sisa. Kən naka u rəha Uhgīn, otos-ipən kəm Uhgīn.”

²²Nian kəmotətō nəghatən əh, narmilat təmiwig. Kən kəmotapəs Iesu motagim.

Nian Uhgīn otosmegəh netəmim e nimisən

(Mak 12:18-27; Luk 20:27-40)

²³E nian əh inəh, Satusi mīn kəmotuwa o Iesu. Ilat koatən məmə netəmim okəsotəmegəh mīnən e nimisən. Kən kotən-ipən kəm Iesu məmə,

²⁴“Iəgətun. Moses təmən kəm itimat məmə, okəmə etəmim otimis kən məsiləsən nətin kit, kən pian otəkəike mit nəutahlimis əh məmə otiləs suakəku o niuw-pərən nərig rəha pian itəm təmimis.

²⁵“Kən ikīn əh imatimat ikīn, netəm ilat pialat mīn ilat sepīn. Itəm təmaupən maiir təmol marit, kən mīmīs, məsiləsən nətin kit, kən pian itəm tatol kəiu lan tit nəutahlimis.

²⁶Kən in mīn təmimis məsiləsən nətin kit, kən itəm tatol kīsil lan ne ilat rafin muwīn mətōarus-pən itəm tatol sepīn, kəmotol nat kitīəh əm.

²⁷Kən əmun, nəutahlimis timis.

²⁸?Tol nəhlan, ən-tu kəm itimat məmə, e nian itəm Uhgın otosmegəh netəmim lan e nimisən, pətan əh in rəha pah, məto-inu ilat rafin əh sepin kəmotol marit e pətan əh?”

²⁹Kən Iesu təməni-pən kəm ilat məmə, “Itəmat nəmotən-arəpən e rəhatəmat nəghatən məto-inu nəsoitunən Naoa Rəha Uhgın ne nəsanənən rəhan.

³⁰Nian Uhgın otosmegəh netəmim e nimisən, kən netəmim okəsətölən marit, okotahmen e nagelo min əpəh e nego e neai.

³¹?Nəmotafin o kəp, Naoa Rəha Uhgın itəm tatəghat-in nian Uhgın otosmegəh netəmim e nimisən? Tatən məmə,

³²‘Io Uhgın rəha Epraham, io Uhgın rəha Aisak, kən io Uhgın rəha Jekop.’ In sənəmə Uhgın rəha netəm kəmotimis, məto in Uhgın rəha netəmim itəm koatəmegəh, tahmen-pən min e təs miləhal.”

³³Nian nimanin netəmim kəmotəto nəghatən əh, narmilat təmiwig e nəgətunən rəhan.

Lou itəm in ilis pik

(Mak 12:28-34)

³⁴Nian Farisi min kəmotəto məmə Iesu təmoh-iəhau Satusi min e rəhan nəghatən, kən Farisi min kəmotuwa kitəh.

³⁵Kən kit itəm titun pik Lou, təməni-pən nəghatən kit kəm Iesu məmə Iesu otən nəghatən kit təsətuatipən, məmə,

³⁶“?Lou pəhruən rəha Uhgın u in ilis pik?”

³⁷Kən Iesu təməni-pən məmə, “Nakəkəike molkeike İərəmərə Uhgın rəham e nikim rafin, ne nəmegəhən rafin rəham, ne nətəligən rafin rəham.

³⁸Inu in Lou itəm tətaupən kən in ilis pik.

³⁹Kən Lou itəm tatol kəiu lan, in iuəhkir tahmen əm, məmə, ‘Nakəkəike molkeike ik kit tahmen əm məmə nakolkeike atip ik.’

⁴⁰Kən Lou mil u kəiu, ilau nəukəti Lou rafin, ne naoa rəha ien min rafin aupən.”

Kristo in nəti pah

(Mak 12:35-37; Luk 20:41-44)

⁴¹Kən e nian Farisi min kotuəfimin ilat min, kən Iesu təmən-ipən məmə,

⁴²“?Nikitəmat təht məmə naka, e Kristo itəm Uhgın təmən məmə otahl-ipa? ?In tatisi-pən e noanol rəha pah?” Kən ilat kotən-ipən məmə, “In noanol rəha Tefit.”

⁴³Kən Iesu təmən-ipən məmə, “Məto tahro e Tefit, itəm tatəghat e narmin rəha Uhgın, tətaun-in Kristo məmə ‘Iərəməərə.’ Məto-inu tatən məmə,

⁴⁴‘Iərəməərə təmən kəm rəhak Iərəməərə məmə, “Əpələh e nikalik e nelmək matip, ikin rəha nəsanənən ne nisialiən, mətoarus ekiləs-iəhau rəham tikimır min ləhau e nelkəm.”

⁴⁵?Kən okəmə Tefit tətaun-in Kristo məmə ‘rəhak Iərəməərə,’ kən otahro məmə Kristo in mipi Tefit rat?”

⁴⁶Kən etənim kit təsuhalpınən nəghatən rəha Iesu. Kən e nian əh matuwın, kəmotəgin o nətapəh-inən nəghatən kit min tol min-nəhlan.

Matiu 23

Nahməən asol sepın itəm otatuwa

(Mak 12:38-40; Luk 11:37-54; 20:45-47)

¹Kən Iesu təmən-ipən kəm nımanın netəmim ne rəhan min netəmim məmə,

²“İəgətun min rəha Lou ne Farisi min koatos nepətən məmə okotən-iarəp Lou rəha Moses kəm itəmat.

³Tol nəhlan, nəkotəkəike motətəu-pən kən motol natimnat rafin itəm koatən kəm itəmat. Məto nəsotolən nat naka itəm koatol, məto-inu ilat kəsotolən nat naka itəm koatən-iarəp.

⁴Koatəkəike o netəmim məmə okotətəu-pən lou əskasik min itəm kotahmen e katipa əfigəm, məto okol kəsotos-ipənən noanelmılat məmə okasitu elat.

⁵“Natimnat rafin itəm ilat koatol, koatol əm məmə netəmim okotəplan. Nəkotitun paos itəm netəmim kəmotaii-pən nəghatən rəha Naoa Rəha Uhgın ikin, kənu motəlis rəhalat-kapə ne nelmilat lan. Məto rəha iəgətun min rəha Lou ne Farisi min, rəhalat paos in iahgın taprəkis. Kən nəkotitun nol əlkələh min itəm koatəkul-pən e nıpəgnəmti kot min, itəm tatəgətun məmə etəmim in təkasiək o nətəu-pənən Lou. Məto rəha iəgətun min rəha Lou ne Farisi min, rəhalat nol kaifəməh pik.

⁶Kən e lafet min, ilat kotalkeike ikin rəha nisaiiən, kən əpəh e nimə rəha nuəfiminən, ilat kotalkeike məmə okotəpələh ima netəm-iasol min ikin.

⁷Kən e ikin katol maket ikin, ilat kotalkeike məmə netəmim kotən təwir kəm ilat, kən motaun-in ilat məmə ‘Rapai’ u nıpətın təmə ‘etəm in ilis.’

⁸Məto sotolən məmə netəmim okotaun-in itəmat məmə ‘Rapai, u etəm in ilis,’ məto-inu rəhatəmat Etəm-iasol kitiəh əm, kən itəmat piatəmat min.

⁹Kən sotaun-inən suah kit u e nətueintən məmə, ‘Tata, etəm katisiai-in,’ məto-inu Tata rəhatəmat kitiəh əm əpəh ilis e nego e neai.

¹⁰Kən sotolən məmə netəmim okotaun-in itəmat məmə, ‘Iəgətun,’ məto-inu rəhatəmat Iəgətun kitiəh əm, Kristo itəm Uhgın təmən məmə otahl-ipa.

¹¹Etəm u in ilis etəmat, in iolwək rəhatəmat.

¹²Tol nəhlan məto-inu, etəmim itəm otos-ipər atıp in, Uhgın otıləs-iəhau, kən etəmim itəm otos-iəhau atıp in, Uhgın otıləs-ipər.

¹³“!Kəsi, nahməən asol otuwa otəmat iəgətun min rəha Lou, ne Farisi min! Rəhatəmat nənən təwir, məto nikitəmat tamkimik! Nakotahtosiğ-in o netəmim suatıp o nuwinən matig ahgın nərəməərəən rəha Uhgın, məto itəmat nəsotuwinən, kən nəsotegəhan-inən məmə netəmim okotuwin ikin, nat ənnapin ilat kotalkeike məmə okotuwin.

14

¹⁵“!Kəsi, nahməən asol otuwa otəmat iəgətun min rəha Lou, ne Farisi min! Rəhatəmat nənən təwir, məto nikitəmat tamkimik! Nikitəmat tagien əm məmə nakotuwin isəu e nego, o e naliwəkən əm o nuwinən e nəptən pişin

pisin min mēmә nakotiuw-pa etәmim kitiәh әm e nәfakән rәhatәmat. Mәto nian suah kit tatos nolән min әh rәhatәmat, kән tatuwa etәm rat taprәkis-in itәmat, kән nәmotol mēmә in otәkәike mos nalpinән rәha nigәm asol taprәkis-in itәmat.

¹⁶“!Kәsi, nahmәән asol otuwa otәmat itәm noatit netәmim mәto nigәnәmtitәmat tәpis! Itәmat nakoatән mēmә, ‘Okәmә suah kit tatos noanawil o Nimә Rәha Uhgin mēmә otol rәhan nәghatән tatәtul-iәkis, okәmә tәsolән, mәto in nat әpnapin әm. Mәto okәmә suah kit tatos noanawil o iaen u kol tatipit-ipit rәha Nimә Rәha Uhgin, kән in otәkәike mol nәwian itәm tәmos noanawil ron.’

¹⁷!Itәmat netәm nakotalmәl, nigәnәmtitәmat tәpis! ?Naka u in ilis, iaen u kol tatipit-ipit, o Nimә Rәha Uhgin itәm tatol kol tasim?

¹⁸Nakotән min mēmә, ‘Okәmә suah kit tatos noanawil o olta, in nat әpnapin әm. Mәto okәmә suah kit tatos noanawil e sakrifais itәm tatәpәlәh lan, kән in otәkәike mol nәwian itәm tәmos noanawil ron.’

¹⁹!Itәmat netәm nigәnәmtitәmat tәpis! ?Naka u in ilis, sakrifais o olta itәm tatol sakrifais tasim?

²⁰Tol nәhlan, etәm tatos noanawil e olta, pahrien, tatos noanawil e olta ne natimnat rafin itәm tatәpәlәh lan.

²¹Kән etәm tatos noanawil e Nimә Rәha Uhgin, pahrien tatos noanawil e Nimә Rәha Uhgin ne Suah u tәtatig ikin.

²²Kән etәm tatos noanawil e nego e neai, pahrien tatos noanawil o jea rәha kig u in rәha Uhgin, kән tatos noanawil o Suah u tatәpәlәh-pәр lan.

²³“!Kәsi, nahmәән asol otuwa otәmat iәgәtun min rәha Lou, ne Farisi min! !Rәhatәmat nәнән tәwir, mәto nikitәmat tamkimik! Nәkoatәtәu-pән lou әlkәlәh min moatos-ipән tait rәha rәhatәmat nimali nig nәmiәwilat tatәpien u katos-ipән e nagwәнән, katән mēmә min, ne til, ne kumin. Mәto nakotapәs nat asol e Lou, inu etәm tatol tәtuatip kән mahmen-ahmen әm kәм netәmim, kән mәtasәkitun netәmim, kән tatol nian rafin nat naka itәm tәike matol.

Təwir nəkoatol lou əlkələh min, məto nəkotəkəike moatol lou asol min, məto kəp, nəsotolən.

²⁴!Itəmat noatit netənim məto niğanəmtitəmat təpis! !Itəmat netənim noategəs-in miminao e rəhatəmat kap məmə ko nəsotərgeən, məto nəkotərge nat megəh asol u kamel!

²⁵“!Kəsi, nahməən asol otuwa otəmat iəgətun min rəha Lou, ne Farisi min! !Rəhatəmat nənən təwir, məto nikitəmat tamkimik! Nakotafəl ihluə e kap ne plet, məto əpəh imə tamkimik, kotərioah e nagwənən ne nənimən itəm nəmotakləh-in, o natimnat itəm nəmos məto-inu itəmat iaumis min kən nian rafin nəkoatol əm natimnat rat min itəm tətətig e rəhatəmat nətəligən.

²⁶!Itəmat Farisi min, niğanəmtitəmat təpis! Otaupən kafəl əpəh imə e kap ne plet, kən ihluə min in təwir təsamkimikən.

²⁷“!Kəsi, nahməən asol otuwa otəmat iəgətun min rəha Lou, ne Farisi min! !Rəhatəmat nənən təwir, məto nikitəmat tamkimik! Nəkotahmen e suwit rəha netəm kəmotimis itəm kəmuəh e pen ruən. Ihluə, netənim kotəplan məmə təwir, məto əpəh imə tərrioah e nikilkili netəm kəmotimis, ne natimnat rafin itəm tamkimik.

²⁸E nolən ahmen min əm, ihluə, e nolən rəhatəmat, netənim kotəplan məmə itəmat nəkotətuatip. Məto imə, e nikitəmat, nakotərioah e nəghatən nakotən məsotolən, ne nolən rat agin min.

²⁹“!Kəsi, nahməən asol otuwa otəmat iəgətun min rəha Lou, ne Farisi min! !Rəhatəmat nənən təwir, məto nikitəmat tamkimik! Nakotiləkin nimə e kəpiel rəha suwit rəha ien min aupən ne netəm kotətuatip, kən moatol nəhlip e kəpiel kən moatol malə-malə lan.

³⁰Kən nakotən-ipən məmə, ‘Okəmə itimat emotatig e nian min rəha tipitat min, okol itimat eməsotasituən elat motohamnu ien min.’

³¹E nəghatən əh, nakoatən-iarəp məmə itəmat noanol ətuatip min rəha tipitimat min aupən itəm kəmotohamnu ien min əh, kən nakotahmen-ahmen əm elat.

³²Kən təwir əm, itəmat otəkəike motol namnun wək itəm tipitəmat min kəmotətuoun.

³³“!Itəmat sinek min, ne neti sinek min! ?Nikitəmat tatəht məmə okol nakotagim e nalpinən e nigəm asol? !Kəp!

³⁴Tol nəhlan, ekahl-ipinə ien min, ne netəm kotenatig, ne iəgətun min. Neen, itəmat onəkotohamnu ilat motətu-pər elat e nig kəluau, neen onəkotalis motoh ilat əpəh e nimə rəha nuəfiminən rəhatəmat, kən neen nakotitəp ilat kotiet e taon kit motiet motuwın e kit.

³⁵Kən tol nəhlan, itəmat onəkotos nalpinən rəha netənim itəm kəmotohamnu netənim rafin itəm kotətuatip, itəm tətəuoun e Epel itəm in tətəuatip, muwın mətoarus-pən Sekaraea, nəti Perekia, itəm tipitəmat min kəmotohamnu e Nimə Rəha Uhgın ilugin e olta ne nimə.

³⁶Iatən pahrien kəm itəmat məmə, nalpinən rafin u otuwa o netəm rəha Isrel itəm kotatig roiu.

³⁷“!Awe, netəm Jerusalem, netəm Jerusalem! Itəmat nakotohamnu ien min rəha Uhgın, kən netənim itəm Uhgın təmahl-ipa kəm itəmat, nəkotahtimnu ilat e kəpiel apin, inəh netəm u rəha Uhgın itəm koatos nəghatən rəhan. Nian tərət iatəg-əfəməh-in nelmək məmə iatəmik-əfimin wir itəmat matos wir itəmat, tahmen-pən e mənig itəm tatu nenətın min e nıkwın, məto itəmat nikitəmat təsagienən ron kən motapəs io.

³⁸Otəplan-tu. Uhgın tinapəs itəmat, rəhatəmat nimə nəratən otoh, kən nat otikə ikin.

³⁹Kən ekən kəm itəmat məmə, nat əh in nıpahrienən məto-inu onəsotəplan minən io mətoarus nakotən məmə, ‘!İərəmərə Uhgın tətətig ilau suah u itəm tatuwa e nərgin!’”

Matıu 24

Nəmtətin min rəha namnun nian

(Mak 13:1-37; Luk 21:5-36)

¹Iesu tēmiet e Nimə Rəha Uhgın maliwək matuwın, kən rəhan mın netəmim kotuwa motən-ipən kəm in məmə otəplan-tu nimə mın u əpəh e Nimə Rəha Uhgın.

²Kən Iesu təmən-ipən məmə, “Əwəh, otəplan-tu nimə mın əh. Nipahrienən iatən kəm itəmat məmə nimə mın əh netəmim okotəhap-əhap kəpiel mın elat. Okol kəpiel kit təsəməhlin e nəmeen.”

³Kən uarisig lan, Iesu təmaliwək ilat rəhan netəmim motuwın əpəh e Nitot Rəha Nig U Olif kən matəpələh. Kən rəhan netəmim kotuwa pisin əm ron motən-ipən məmə, “?Otən-tu məmə natimnat mın u okotuwa e nian naka, kən nəmtətin naka otol-arəp məmə rəham nuwamən ne namnun nian tinuwa iuəhkir?”

⁴Kən Iesu təmən-ipən kəm ilat məmə, “Oatehm wır itəmat məmə etəmim kit otəseiüə-inən itəmat,

⁵məto-inu netəmim tepət okotuwa motos nərgək moatən məmə, ‘Io Kristo itəm Uhgın təmən məmə otahl-ipa,’ kən okoteiüə-in netəmim tepət.

⁶Onəkotəto namnusən rəha nəluaginən mın, kən onəkotəto nəghatən əpnəpin mın məmə netəmim koatəluagin. Məto nakoatehm wır itəmat məmə nəsotəginən. Natimnat mın əh otəkəike motuwa motol nipahrienən lan, məto namnun nian otəpanuwa.

⁷Noanol mın okotoh noanol mın, kən kantri mın okotoh kantri mın. Nəumis otan, kən namig otəloal ikin mın tepət.

⁸Natimnat mın əh, nətuounən əm rəha nəratən, tahmen e pətan itəm tinətuoun matəto nahməən o neməkən.

⁹“E nian mın əh, netəmim okotegəhan-in-pən itəmat məmə okol nəratən kəm itəmat, kən kohamnu itəmat, kən netəmim rəha noanol mın rafin okotetəhau itəmat məto-inu o nərgək.

¹⁰Kən e nian mın əh, netəmim tepət okotapəs rəhalat nahatətən, kən okotegəhan-in-pən ilat mın e nelmi tikimir mın rəhalat, kən motetəhau ilat mın,

¹¹kən ien eiueiuə min okotuwa moteiuə-in netəmim tepət.

¹²Məto-inu nəratən tinatepət, iuəhkir netəmim rafin rəhalat nolkeikeən o Uhgīn otikə,

¹³məto etəmim itəm otətul əskasik mətoarus namnun nian, kən Uhgīn otosmegəh in.

¹⁴Kən namnusən təwīr əh rəha nərəmərən rəha Uhgīn, okən-iarəp ikin min rafin e nətueintən, məmə suatip əh-ikin rəha kantri min rafin o nətəlig-inən, kən namnun nian otuwa.

¹⁵“Ien u Taniel tēməghat-in nat kit katən məmə, ‘nat itəm Uhgīn tatətəhau, kən matol Nimə Rəha Uhgīn tamkimik’ (nian nakotafin, otətəlig-in nīpətin). Tol nəhlan, nian nat tərət əh tatətul e Nimə Rəha Uhgīn,

¹⁶kən itəmat itəm nəkotatig Jutia, nakotiet motagim motuwīn motəhluaig e nitot min.

¹⁷Okəmə etəmim tətameg ihluə e rəhan nimə, okol təsuwīnən imə mos min rəhan natimnat.

¹⁸Okəmə etəmim əpəh e nasumən rəhan, okol təsitəlig-pənən latuənu mos rəhan kot.

¹⁹!Kən kəsi o nīpitan u itəm kotəpik-əpik, ne nīpitan itəm kotapinahin nisualkələh e nian əh, məto-inu ilat okotəto tərət pik agin!

²⁰Təwīr nakotəfak məmə onakəsotagimən e nəratən əh e nian rəha nətəpən, o e nian rəha Sapat,

²¹məto-inu e nian əh, nəratən asol otuwa itəm etəmim tēməsəplanən tol mihin nəhlan aupən mətoarus-pa u-roiu, kən okol nəratən asol kit tol nəhlan otəsuwa minən nian kit tahmen e in əh.

²²Kən okəmə Uhgīn təsətətipən nian rəha nəratən əh, okol etəmim kit tēməsəmegəhən. Məto Uhgīn otətətip nian əh o rəhan min netəmim itəm təmitəpun rəkis ilat.

²³“E nian əh, okəmə suah kit otən-ipinə kəm itəmat məmə, ‘!Otəplan-tu, inu Kristo itəm Uhgın təmən məmə otəpanahl-ipa!’ o ‘!In əpəh!’ sotənən nıpahrienən lan,

²⁴məto-inu netəmim neen okotuwa motən məmə ilat Kristo, ne ien eiueiuə min okotuwa, kən ilat okotol nəmtətin asol min, ne nat pıspıs min məmə okoteiuə-in netəmim, kən okotalkut məmə okoteiuə-in netəmim itəm Uhgın təmitəpun rəkis ilat, okəmə ilat kotitun nolən.

²⁵Nikitəmat otəkəike matəht wir nəghatən min u itəm emən rəkis kəm itəmat, uarisig natımnat min u okotuwa motol nıpahrienən lan.

²⁶“Tol nəhlan, okəmə suah kit tən kəm itəmat məmə, ‘In əpəh, ikin taruən-aruən ikin,’ əsotuwınən. O suah kit tən məmə, ‘In ikin-u e nıpəg noa nimə,’ sotənən nıpahrienən lan,

²⁷məto-inu nian Nəti Etəmim otitəlig-pa min, otuwa uəhai əm, kən netəmim rafın okotəplan, tahmen e nıpitən itəm təmpıt masiəgəpın rafın neai.

²⁸Nian nat megəh kit təmimis, nəkotəplan kuəriə min kotuwa məmə okotun. E nolən ahmen min əm, nian nəkotəplan nəmtətin min əh, nəkotitun məmə otəsuwəhən ekuwa min.

²⁹“Nian ətuatıp nəratən əh otol namnun, kən ‘mitgar otəpıs agın, kən məwig otəsəmilhən minən, kən məhau min okotısas e neai, kən Uhgın otəloal e nəsanənən min əpəh e neai.’

³⁰“E nian əh, nəmtətin rəha Nəti Etəmim otol-arəp e neai, kən noanol min rafın e nətueintən okotasək e nəgınən. Kən okotəplan io, Nəti Etəmim ekuwa e nımal napuə e neai e nəsanənən ne nepətən əhag-əhag asol rəha Uhgın itəm otasiə mitəlau lak.

³¹Kən ekahl-ipən rəhak nagelo min kotiet nian okotəto təwi otasək əfəməh, kən ilat okotuwın ikin min rafın e nətueintən, motos-irəkis rəhak netəmim itəm Uhgın təmitəpun rəkis ilat, kən kuəfımın ilat kitıəh.

³²“Nikitəmat otəkəike matəht nig u fik. Nian ətuatip itəm nelmin min kinotətuoun katəwiə, kən nimalin min kinoatərgət, itəmat nəkotitun məmə nian əh inəh itəm nakotasum lan rəhatəmat.

³³Kən e nolən ahmen min əm, nian nəkotəplan nəmtətin min əh, onəkotitun məmə otəsuwəhən ekuwa min roiu agin.

³⁴Iatən pahrien kəm itəmat məmə netənim itəm kotatig u-roiu, okol kəsotimis rafinən mətoarus natimnat min əh okotuwa kol niphahrienən lan.

³⁵Neai ne nətueintən okiakə, məto nəghatən min rəhak okol kəsotikəən.”

Etənim tikə itəm titun nuwamən rəha Iesu Kristo

³⁶Kən Iesu təmatəkəike matən məmə, “Suah kit təsitunən nian o aua ətuatip rəha natimnat min əh. Nagelo min əpəh e neai kotəruru, kən io min Nəti Etənim ekəruru. Məto Tata Uhgın əm in titun nian ətuatip əh.

³⁷E nian io Nəti Etənim ekuwa lan, otahmen e nian rəha Noah aupən ikin itəm netənim kəsotol əpen-əpenəən ron.

³⁸E nian əh, itəm naruəh təsaiuən əh, netənim koatagwən, moatənim, moatol marit, inəh natimnat rafin kəmoatol e nəmegəhən rəhalat, mətoarus-pən Noah təmuwin imə e niphəgnoa nego rəhan,

³⁹kən ilat kinotəruru nat naka otuwa mətoarus-pa naruəh təmaiū məmik ilat rafin. In əh otol tahmen əm e nian Nəti Etənim otuwa.

⁴⁰Etənim kəiu e nasumən, kən okos kitəh, kapəs kitəh.

⁴¹Pətan kəiu katuəpələh kitəh matioal nagwənən, kən okos kitəh, kapəs kitəh.

⁴²“Tol nəhlan, nəkotəkəike motaiir, məto-inu nəkotəruru nian naka rəhatəmat ləramərə otuwa lan.

⁴³Məto nəkotəkəike motitun nat u. Okəmə etəm-iasol rəha nimə titun nian ətuatip lapin itəm iakləh otuwa, kən in otəkəike mətaiir matehm wir nimə məmə iakləh otəsəhapən muwin imə.

⁴⁴Kən itəmat min onəkotəkəike moatətul matip, məto-inu Nəti Etəmim otuwa e aua əm itəm nikitəmat təsəhtən.

⁴⁵“Nikitəmat otəkəike matəht wir nolən rəha iolwək itəm in tenatig kən tətəskəlīm wir wək rəhan kən məsapəsən. Etəm-iasol təmələhəu məmə iolwək əh otərəməərə e rəhan min rafin iolwək min məmə in otos-ipən nagwənən kəm ilat e nian ətuatip.

⁴⁶Kən okəmə etəm-iasol otuwa məplan etəm tətərəməərə e iolwək min rəhan, kən matol-wir rəhan wək, kən otos-ipən nətouən kit kəm suah əh.

⁴⁷Iatən-ipinə nīpahrienən məmə etəm-iasol əh otələhəu in tərəməərə e natimnat rafin rəhan.

⁴⁸Məto okəmə iolwək əh, in etəm rat, kən nikin otəht məmə, ‘Rəhak etəm-iasol təsuwamən nuwəh,’

⁴⁹kən mətuoun matoh iolwək min neen, kən muwin magwən mənim ilat netəm kotapis.

⁵⁰Kən etəm-iasol rəha iolwək əh otuwa e nian ne aua itəm iolwək nikin təsəhtən məmə rəhan etəm-iasol otuwa lan.

⁵¹Etəm-iasol əh otol nalpīnən asol kəm iolwək əh kən mərakin-pən ikin rəha netəm rəhalat nənən təwir, məto nīkilat tamkimik. Ikin əh, netəmim okotasək moatəgətain nəluilat.”

Matiu 25

Nimaa nəghatən o nīpitan əlkələh ilat ten

¹Kən Iesu təmən-ipən kəm ilat məmə, “E nian itəm rəhatəmat İərəməərə otuwa min, nərəmərəən rəha Uhgīn otol nəhlan. Nīpitan əlkələh ilat ten kəmotiet lapin məmə okotuwin e marit kit, kən moatəsahgin etəm otol marit otuwa mos rəhan pətan muwin e rəhan nimə, əpəh ikin katol lafet ikin. Ilat ten kəmos rəhalat lait.

²Faif kotalmə, kən faif kotenatig.

³Nipitan min u ilat faif itəm kotalməl kəmos rəhalat lait min, məto kəsotosən karasin məsin min o niuw-pənən e lait.

⁴Məto nipitan min u ilat faif itəm kotenatig kəmos rəhalat lait min, kən motos min karasin məsin o niuw-pənən e rəhalat lait.

⁵Kən etəm otol marit təsuwa uəhaiən, kən napilən tinatos ilat koatiuw nəm, kən minotapil.

⁶“Kən lapin agin, suah kit təmagət əfəmäh məmə, ‘!Etənim itəm otol marit tatuwa u-roiu! !Otuwa motəplan!’

⁷“Kən nipitan əlkələh u ilat ten kəmotaiir motuarin asol rəhalat lait min.

⁸Kən nipitan itəm kotalməl kotən-ipən kəm nipitan itəm kotenatig məmə, ‘!Awi! Otos-ipa rəhatəmat məsin karasin məto-inu rəhatimat karasin e rəhatimat lait kinotamir, otəsuwəhən kotəpis.’

⁹“Məto nipitan itəm kotenatig kotən-ipən kəm ilat məmə, ‘!Kəp! Karasin min u kəsotahmenən o kitat rafin. Məto otitəlig motuwın motos-nəmtin rəhatəmat neen karasin əpəh e stoa.’

¹⁰“Məto nian nipitan itəm kotalməl kəmotaliwək motitəlig moatuwin o karasin, kən etəm itəm otol marit təmuwa. Kən nipitan əlkələh itəm koatətul matip, kəmotuwın ilat min e nagwənən rəha marit, kən motuwın imə. Kən kahtosig e toa.

¹¹“Uarisig, nipitan əlkələh itəm kotalməl kəmotitəlig-pa motaun motəmə, ‘!Etəm-iasol, etəm-iasol! !Egəhan-in itəmat ekotimnə imə!’

¹²“Məto etəm otol marit təmən-ipən kəm ilat məmə, ‘!atən-ipinə pahrien məmə, io ekəruru itəmat.’”

¹³Kən nian Iesu təmol namnun nimaa nəghatən, təmən-ipən kəm ilat məmə, “Tol nəhlan, itəmat nəkotəkəike motaiir, məto-inu nəkotəruru nian ne aua rəha rəhatəmat İərəmərə otuwa lan.”

Nimaa nəghatən e iolwək e mənı kisil

¹⁴Kən Iesu təmuəh nimaə nəghatən kit min məmə, “Ekən min məmə e nian itəm rəhatəmat İərəmərə otuwa min, nərəmərəən rəha Uhgın otol nəhlan. Etəm-iasol kit təmol əpen-əpenə məmə otaliwək muwin e nəptən pisin kit muwin isəu. Kən maun-in rəhan iolwək min kotuwa, kən tələhəu-pən e nelmilat rəhan məni min məmə okotol nat kit lan.

¹⁵Təmos-ipən tətəu-pən nitunən rəhalat məmə okotol wək lan. E etəmim kitiəh, təmos-ipən kətim faif kəmotər-motərioah e məni, u məni tepət pik agin. Kən kit min, təmos-ipən min kətim kəiu tahmen əm, u məni tepət pik. Kən kit min, təmos-ipən kətim kitiəh tahmen əm, u məni tepət. Kən etəm-iasol təmiet muwin e rəhan naliwəkən.

¹⁶Kən iolwək itəm təmos kətim faif təmuwin uəhai əm mol bisnes lan, kən təmos min kətim faif min.

¹⁷Kən tahmen-ahmen əm, iolwək itəm təmos kətim kəiu, təmuwin mol bisnes lan, kən mos min kətim kəiu min.

¹⁸Məto iolwək itəm təmos kətim kitiəh, in təmuwin mel noakimil məhluaigin-pən məni rəha rəhan etəm-iasol ikin.

¹⁹“Kən nup tepət tinuwa minuwın, kən etəm-iasol rəha iolwək min u tinitəlig-pa, kən maun-in rəhan iolwək min məmə otəplan-tu məmə ilat kəmotol naka e məni min itəm təmos-ipən kəm ilat.

²⁰Iolwək itəm təmos kətim faif, təmuwa matos kətim faif min itəm təmos, mətul e niganəmti etəm-iasol məmə, ‘Etəm-iasol. Aupən nəmələhəu-pən kətim faif e nelmək. Kən emol bisnes lan, kən mos min iahgoau kətim faif u.’

²¹“Kən etəm-iasol təmən-ipən kəm in məmə, ‘Nəmol təwir, kən ik iolwək təwir itəm nataskəlim wir wək rəham kən məsapəsən. Nəmol təwir nəhlan e natimnat min əh noan məsin, kən ekələhəu ik nakərəməre e natimnat tepət. !Wa imə matig ahgin nagienən rəha etəm-iasol rəham!’

²²“Iolwək itəm təmos-ipən kətim kəiu kəm in, təmuwa mən-ipən məmə, ‘Etəm-iasol. Aupən nəmələhəu-pən kətim kəiu e nelmək. Kən emol bisnes lan, kən mos min iahgoau kətim kəiu u.’

²³“Kən rəhan etəm-iasol təmən-ipən məmə, ‘Nəmol təwir, kən ik iolwək təwir itəm nataskəlim wir wək rəham kən məsapəsən. Nəmol təwir nəhlan e natimnat min əh noan məsin, kən ekələhəu ik nakərəmərə e natimnat tepət. !Wa imə, kuagian!’

²⁴“Iolwək itəm kəmos-ipən kətim kitiəh kəm in, təmuwa mən-ipən məmə, ‘Etəm-iasol. Ik etəm nakatəkəike pīk o netəmim. Kən ik natos nagwənən e nasumən itəm nəməsasum-inən, kən matəhl noa nig e nig itəm nəməsəfəən.

²⁵Kən eməgin ik, məmə okəmə emərəkīn rəham mənī, kən onəkōl nalpīnən asol kəm io, kən emos rəham mənī muwīn məhluaig-in e nisip. Ah, inu rəham mənī.’

²⁶“Kən rəhan etəm-iasol təmən-ipən məmə, ‘!Ik iolwək rat, ik iəlpah! Ik nəkitun rəkis məmə iakatos nagwənən e nasumən itəm esasum-inən, kən matəhl noa nig e nig itəm eməsəfəən.

²⁷?Tahro nəsuwīnən mələhəu-pən rəhak mənī e bank, u in nimə rəha nələhəuən mənī? Okəmə nəmol nəhlan, nian emitəlig-pa, ekuwīn mos rəhak mənī, kən ekos mənī məsin min itəm bank otos-ipa.’

²⁸Kən etəm-iasol təmən-ipən kəm rəhan iolwək pīsīn məmə, ‘Os-irəkis mənī ron mos-ipən kəm iolwək u itəm təmos kətim faif,

²⁹məto-inu etəmim u itəm tīnos rəkis nat kit mol wək lan tuwa mepət, kən okos-ipən neen min, rəhan natimnat tepət. Məto etəmim itəm təsolwəkən rəhan tuwa mepət, okos-irəkis rafīn natimnat ron.

³⁰Kən iolwək u iəlpah itəm təruru nolən nat təwir kit, ərakin-pən ihluə e napīnəpən, ikīn əh kətəsək ikīn katəgətāin nəluitəm.”

Sipsip min ne nənī min

³¹Kən Iesu təmən-ipən məmə, “Nian Nəti Etəmim otuwa e nepətən əhag-əhag ne nəsanənən rəhan, ilat nagelo min rafīn, in Kig, kən in otəpələh e rəhan jea rəha Kig matərəmərə e nəsanənən ne nepətən əhag-əhag rəhan.

³²Netəmim rafin e noanol min rafin e nətueintən, okotuəfimin ilat min e niganəmtin, kən in otoor netəmim tahmen e etəmim itəm tatehm sipsip min tatoor sipsip min ne nəni min.

³³In otoor sipsip min kotuwa kan e nelmin matip, kən nəni min okotuwın e nelmin mol.

³⁴“Kən Kig otən-ipən kəm netəm min un e nelmin matip məmə, ‘Otuwa, itəmat u itəm Uhgın təmawte-in rəkis rəhan nəwirən kəm itəmat. Otuwa motos nat naka u itəm Uhgın təmələhəu pisin rəhatəmat. Otuwa motatig ahgin nərəmərəən rəhan itəm təmol əpen-əpenə lan aupən təpanol nətueintən.

³⁵Otuwa motos, mətə-inu nian nəumis təmus io, nəmos-ipa nagwənən ekun; kən emətoaoa, nəmos-ipa nəhau ekənim; kən io iapispis, nəmotit io kotuwın e rəhatəmat latuənu;

³⁶kən rəhak napən tikə, kən nəmos-ipa napən kəm io; kən matimis, nəmotehm wir io; kən emətatig e kalapus, nəmotuwa kuag-pənin io.’

³⁷“Kən netəm kotətuatip okotən-ipən kəm in məmə, ‘?Iərəmərə, nian naka emotəplan ik nəumis təmus ik, kən emotagwən ik; o nəmoaoa, kən emotos-ipinə nəhau məmə nakənim?’

³⁸?Nian naka emotəplan ik iapispis, kən emotit ik motuwa latuənu; o rəham napən tikə, kən emotos-ipinə napən kəm ik?

³⁹?Nian naka emotəplan ik nakatimis, o nəmətatig e kalapus, kən emotimnə kuag-pənin ik?’

⁴⁰“Kən Kig otən-ipən məmə, ‘Iatən-ipinə nıpahrienən məmə nat naka itəm nəmotol kəm piak min u kit, nat ənnapin in ian-rat, mətə nəmotol kəm io.’

⁴¹“Kən in otən-ipən kəm netəm min u e nelmin mol məmə, ‘Otuwin isəu ron io. Uhgın tinələhəu rəkis rəhatəmat nalpınən. Otuwin e nigəm asol itəm tatuəp namnun tikə u Uhgın təmol rəha Setan ne nagelo min rəhan.

⁴²Otuwin isəu məto-inu nian nəumis təmus io, nəsos-ipamən nagwənən kit məmə ekun; kən emətoaoa, nəsos-ipamən nəhau məmə ekənim;

⁴³kən io iapispis, nəsotaun-inən io məmə ekuwa latuənu; kən rəhak napən tikə, nəsos-ipamən napən kit rəhak; kən ematimis, mətətig e kalapus, nəsotuwamən kuag-pənin io.’

⁴⁴“Kən ilat min okotən-ipa məmə, ‘!İərəmərə! ?Nian naka itəm emotəplan ik nəumis təmus ik, o mətoaoa, o ik iapispis, o rəham napən tikə, o nəmatimis, o nəmətətig e kalapus kən eməsotimnə kuag-pənin ik?’

⁴⁵“Kən in otən-ipən kəm ilat məmə, ‘İatən-ipinə pahrien kəm itəmat məmə, okəmə nəməsotasituən e piak min u kit, nat ənpənin in ian-rat, məto nəməsotolən kəm io.’

⁴⁶“Kən ilat okotuwın motos nalpınən itəm namnun tikə. Məto netəmim kotətuatip okotos nəmegəhən liliin.”

Matiu 26

Nalpəkəuən o nohamnuən İesu

(Mak 14:1-2; Luk 21:1-2; Jon 11:45-53)

¹Nian İesu təmol namnun nəghatən min əh kəm rəhan netəmim, kən mən-İpən kəm ilat məmə,

²“Nəkotitun məmə lafet rəha Nuhagego-inən otuwa, nian kəiu əm əh-ikin. Kən io, Nəti Etəmim, okegəhan-in-pən io məmə okətu-pər e nig kəməluau.”

³Kən pris asol min ne netəm-iasol rəha noanol rəha İsrəl kəmotuəfimin ilat min e nimə rəha pris asol agin u nərgin u Kaeafas.

⁴Kən moatəlpəkəu məmə okotaskəlīm İesu e nolən eko-eko, kən motəhamnu in.

⁵Məto motən məmə, “Sənəmə e nian rəha lafet rəha Nuhagego-inən, okol məta netəmim kotoh ilat min.”

Pətan kit təmau İesu e nat pien-pien

(Mak 14:3-9; Jon 12:1-8)

⁶Nian Iesu əpəh e Petani e nimə rəha suah əh, nərgin u Saimon u leprosi təmol,

⁷kən pətan kit təmuwa ron mos senta kit u nəmtin tiəkis, kəmiuw-pən e pətəl kəmol e kəpiel itəm nəmtin tiəkis, katən məmə alapasta. Nian Iesu tatəpələh e tēpil mətəgwən, kən pətan u təmau rəhn-kapə e senta un.

⁸Nian netənim rəha Iesu kəmotəplan nat əh, neməha təmol ilat, motən məmə, “?Tahro katərəkin nat u?

⁹Senta u, kitun nol-salim-inən, kən kos mənəi asol lan, kos-ipən kəm ian-rat min.”

¹⁰Məto Iesu tinitun nəghatən itəm koatən, kən mən-ipən kəm ilat məmə, “?Tahro noatən rat pətan u? In təmol nat təwir agin kəm io.

¹¹Ian-rat min nian rafin kotatig itəmat min ilat. Məto io, okol esatigən kitat min itəmat nian rafin.

¹²Nian təməhtəg-pən e nīpətik, təmol məmə otol əpen-əpenə o nītənimən io.

¹³Iatən pahrien kəm itəmat məmə, ikin min rafin e nətueintən itəm okən-iarəp namnusən təwir u, kən okəkəike kən-iarəp min nat naka itəm pətan u təmol, kən nīkilat otatəht min in.”

Pris asol min kəmotətou Jutas məmə otegəhan-in-pən Iesu e nelmi rəhan tikimir min

(Mak 14:10-11; Luk 22:3-6)

¹⁴Kən netəm tuelef u kit rəha Iesu, nərgin u Jutas Iskariot, təmuwın məplan pris asol min,

¹⁵kən mən-ipən məmə, “?Onəkotos-ipa naka kəm io okəmə ekegəhan-in-pinə Iesu kəm itəmat?” Kən kəmotafin mənəi ilat rafin tate itəm kəmol e silfa.

¹⁶Kən tətoun e nian əh, Jutas təmategəs-in suatip məmə otegəhan-in-pən Iesu e nelmi rəhan tikimir min.

Namnun nagwənən

(Mak 14:12-25; Luk 22:7-23; Jon 13:21-30; 1 Kor 11:23-26)

¹⁷Nian e nātuounən itəm rəha lafet rəha Pret U Is Tikə Lan, netəmim rəha Iesu kəmotuwa motən-ipən kəm in məmə, “?Nakolkeike məmə itimat ekotol əpen-əpenə hiə rəham nagwənən rəha lafet rəha Nuhagego-inən məmə nakagwən ikin?”

¹⁸Kən Iesu təmən-ipən məmə, “Otuwin əpəh e taon, kən onəkotəplan suah kit itəm ekən kəm itəmat, kən nakotən-ipən kəm in məmə, ‘Iəgətun tatən məmə: Nian itəm Uhgin təmitəpun rəkis məmə rəhak, tinuwa iuəhkir. Kən ekol lafet rəha Nuhagego-inən kitiəh itimat rəhak netəmim min e rəham nimə.’”

¹⁹Tol nəhlan rəhan netəmim kəmotol nat naka itəm Iesu təmən məmə okotol o nol əpen-əpenən o nagwənən rəha lafet rəha Nuhagego-inən.

²⁰Nian tinehnaipən, Iesu tatəpələh ilat rəhan netəmim tuelef əpəh e tepil.

²¹Kən nian kəmotagwən, kən təmən-ipən kəm ilat məmə, “Iatən pahrien kəm itəmat məmə itəmat kit otegəhan-in-pən io e nelmi tikimir min rəhak.”

²²Kən nikilat tinərou, kən moatən-ipən kəm Iesu kitiəh kitiəh məmə, “?Eh, Iərəməərə, pah u? ?Io?”

²³Kən Iesu təmən-ipən məmə, “Etəmim itəm otegəhan-in-pən io e nelmi tikimir min rəhak, in rəhak kit itəm tatos nigin pīret mos-ipən meer e plet kitiəh əm itimlau min.

²⁴Io, Nəti Etəmim, iatuwin e suatip rəhak, tahmen-ahmen əm e nəghatən kəməte lak. !Məto kəsi, nahməən asol o etəm u itəm otegəhan-in-pən Nəti Etəmim e nelmi rəhan tikimir min! Təwir pik agin məmə təməsaiir-əmən.”

²⁵Kən Jutas u etəm otegəhan-in-pən Iesu e nelmi rəhan tikimir min təmən-ipən məmə, “Iəgətun. ?Pah əh? ?Io?” Məto Iesu təmən-ipən məmə, “Əwəh, ik. Ik atip nəmən.”

²⁶Nian kəmoatagwən, Iesu təmos pīret, məfak ron, məmkas, mos-ipən kəm rəhan netəmim, mən-ipən məmə, “Otos motun, inu nipətik.”

²⁷Kən mos kap wain, məfak ron, mos-ipən kəm rəhan netəmim, mən-ipən məmə, “Otənim, itəmat rafin.

²⁸Inu nitak itəm tatol məmə nəniəkisən rəha nasituən in tatətul matəmegəh. Nitak u okəhtəg o netəmim tepət məmə otafəl rəkis rəhalat nolən rat min.

²⁹Iatən pahrien kəm itəmat məmə ekəsənim minən wain u mətəarus nian itəm ekənim wain wi kitat min itəmat əpəh e nərəmərəən rəha Tata rəhak.”

³⁰Nian kəmotan napuən əfak kit, motiet motuwīn e Nitot Rəha Nīg U Olif.

Iesu təmən-iarəp məmə Pita otafəs in

(Mak 14:26-31; Luk 22:31-34; Jon 13:36-38)

³¹Kən Iesu təmən-ipən kəm ilat məmə, “O lapin əm u, nakotapəs rəhatəmat nahatətəən lak o nat naka itəm okol lak. Naoa Rəha Uhgīn itəm təkəike mol nīpahrienən, təmən məmə, ‘Io ekohamnu etəmim itəm tatehm sipsip min, kən sipsip min okotan kitīəh kitīəh.’

³²Məto nian ekəmegəh min e nimisən, iakaupən muwīn əpəh Kalili, kən itəmat nəpanotuarisig.”

³³Kən Pita təmən-ipən məmə, “Mətan, ilat rafin okotapəs rəhalat nahatətəən lam, məto io, kəp, esapəsən rəhak nahatətəən lam nian kit ne.”

³⁴Kən Iesu təmən-ipən kəm Pita məmə, “Iatən-ipinə pahrien kəm ik məmə, lapin əm u, uarisig mənig təpanimnən, onakən mau kisil məmə nəkəruru io.”

³⁵Məto Pita tən məmə, “Nat ərnapin ekəkəike mimis kilau min ik, okol ekəsənən məmə ekəruru ik.” Kən rəhan rafin netəmim kotən min tahmen e Pita.

Iesu təməfak əpəh Ketsemani

(Mak 14:32-42; Luk 22:39-46)

³⁶Kən Iesu ne rəhan netəmim kəmotuwīn ikin kit katən məmə Ketsemani, kən təmən-ipən kəm ilat məmə, “Oatəpələh ikin-u, pəs io ekuwīn ikin əh məghat kəm Uhgīn e nəfakən.”

³⁷Kən təmit Pita ne nəti Sepeti mil ilat min, kən nīkin tīnahmə pīk, kən tīnəto tərət.

³⁸Kən təmən-ipən kəm iləhal məmə, “Iakəto nīkik tīnahmə pīk, iuəhkīr ekimis lan. Itəməhal ətəhləpələh ukīn-u, mətəhlaiir kitat min io.”

³⁹Kən muwin noan məsin əm, meiuaiu misin-pən rəhn-kapə e nisip matəfak, matən məmə, “Rəhak Tata, okəmə suatip kit min əh-ikin o rəham nalpəkauən, pəs nakohrəkis ron io nərətən itəm tatuwa. Məto sənəmə nakol nəwiak, məto nakol nəwiam.”

⁴⁰Kən təmitəlig-pa məplan iləhal kətəhlapil. Kən təmən-ipən kəm Pita məmə, “?Tahro nəşəhlairən kitat min io o aua kitiəh əm ne?

⁴¹Atəhlair kən mətəhaləfak məmə nəşəhaluwınən ima nos-ipən-os-ipənən. Nikitəməhal tolkeike, məto nipətītəməhal tərou.”

⁴²Kən mitəlig-pən min matəfak mətau kəiu, matən məmə, “Rəhak Tata, okəmə ekəkəike mos nərətən itəm tatuwa, kən pəs nakol nəwiam.”

⁴³Kən nian təmitəlig-pa, təməplan iləhal kinəhlapil məto-inu napilən tinos iləhal.

⁴⁴Kən tapəs iləhal mitəlig-pən min matəfak mətau kisil, matən əm nəghatən kitiəh əm.

⁴⁵Kən mitəlig-pa mən-ipən kəm iləhal məmə, “?Nəkətəhlapil əh mətəhlameg, o? Əhaləplan-tu, aua tınatuwa iuəhkir, kən io Nəti Etəmim, okegəhan-in-pən e nelmi netəm nol təfagə rat.

⁴⁶!Əhalətul-ta, koatuwin! !Etəmim u tatuwa itəm otegəhan-in-pən io e nelmi rəhak tikimir min!”

Tikimir min rəha Iesu kəmotiləs motaskəlim

(Mak 14:43-50; Luk 22:47-53; Jon 18:2-11)

⁴⁷Nian Iesu təmatəghat-əh, Jutas, in etəm tuelef kit rəha Iesu, təmiet-arəpa ilat nimanin netəmim itəm koatəmik naip asol rəha nəluaginən ne kəsou-əsou. Pris asol min ne netəm-iasol rəha noanol rəha Isrel kəmotahl-ipa ilat.

⁴⁸Jutas təmən-ipən rəkis nəghatən kəm ilat məmə, “Pah u itəm ekətuilim-pən lan, kən nakotaskəlim in.”

⁴⁹Kən roiu agin, Jutas təmaliwək muwin o Iesu mən-ipən məmə, “!Təwir, ləgətun!” kən mətuilim-pən lan.

⁵⁰Kən Iesu təmən-ipən məmə, “Io kit, ol nat naka itəm nəmuwa ron.” Kən netəmim kəmotaliwək motaskəlīm Iesu məmə okotiləs-ipən e kalapus.

⁵¹Kən etəmim kit rəha Iesu təmea-pən miuw rəkis rəhan naip asol rəha nəluaginən, kən moahin naip tətə-rəkis matəlgi slef rəha pris asol agin.

⁵²Kən Iesu təmən-ipən kəm in məmə, “Aii-pən rəham naip e nəmeen, mətō-inu netəm min u itəm koatoahin naip, okotimis e naip.

⁵³?Nikim təht məmə ekəruru naun-inən rəhak Tata, kən roiu agin otahl-ipa nagelo min taosan tepət tepət məmə okotasitu lak?

⁵⁴Məto okəmə ekol nəhlan, okol Naoa Rəha Uhgīn otəsuwamən mol nīpahrienən lan, itəm tatən məmə otuwa tol nəhlan.”

⁵⁵E nian əh, Iesu təmən-ipən kəm nīmanin netəmim məmə, “?Tahro nəmotuwa motəmik naip asol min ne kəsou-əsou min? ?Nikitəmat təht məmə io iatol nəluaginən o nahwinən kapman, o? !Kəp! Nian rafin iakatəpələh əpəh e Nīmə Rəha Uhgīn matəgətun netəmim, kən nəsotuwamən motaskəlīm io.

⁵⁶Məto natimnat min əh rafin tinuwa mol nīpahrienən lan məmə Naoa Rəha Uhgīn itəm ien min aypən kəmotətə otuwa mol nīpahrienən lan.” Kən rəhan min netəmim kəmotapəs in motagim.

Iesu tēmətul e niganəm̄ti kaonsel

(Mak 14:53-65; Luk 22:54-55,63-71; Jon 18:12-14,19-24)

⁵⁷Netəm min u itəm kəmotaskəlīm Iesu, kəmotiləs motuwīn o Kaeafas u in pris asol agin. İkin əh, iəgətun min rəha Lou ne netəm-iasol min rəha noanol rəha İsrel, koatuwa motuəfimin ikin.

⁵⁸Məto Pita tətən təlīg-təlīg matuarisig-in Iesu, muwīn əpəh e latuənu rəha pris asol agin. Kən təmuwīn əpəh e iat matəpələh ilat mopael min məmə otəplan-tu məmə okol naka e Iesu.

⁵⁹Pris asol min ne netəmim rafin rəha kaonsel koategəs-in nəghatən eiueiua min e Iesu məmə okotohamnu in o nəghatən min əh.

⁶⁰Məto kəsotəplanən nolən rat kit rəhan o nəghatən eiueiuə min rəha netəmim, nat ərnapin nəghatən eiueiuə min tepət kəmotiet. Kən əmun, etəmim kəiu kuea aupən,

⁶¹kən muən-iarəp məmə, “Suah u təmatən məmə titun nərəkinən Nimə Rəha Uhgın, kən miləkin min e nian kisil əm.”

⁶²Kən pris asol agin tətul mən-ipən kəm Iesu məmə, “?Tahro nə səghatən? ?Tahro e nəghatən min əh itəm koatən-iarəp tatiləs pikən ik?”

⁶³Məto Iesu tərnapin əm mə səghatən. Kən pris asol agin təmən-ipən kəm in məmə, “Onakəkəike mos noanawil kit e Uhgın itəm tatəmegəh, kən mən-iarəp nıpahrienən kəm itimat məmə ik Nəti Uhgın ne Kristo itəm Uhgın təmən məmə otahl-ipa, o kəp.”

⁶⁴Kən Iesu təmən-ipən məmə, “Əwəh, tol əm məmə inu nəmən mihin ne. Məto ekən-ipinə kəm itəmat rafin məmə, e nian itəm otuwa, onəkotəplan io Nəti Etəmim ekatəpələh e nikalın matip rəha Uhgın u Etəm Təsanən Agin, kən mateiuaiu-pa e neai e nimal napuə.”

⁶⁵Kən pris asol agin təməhap rəhan napən məto-inu tatəto tərət o nəghatən rəha Iesu, kən mən məmə, “!Tatəghat rat e Uhgın! ?Tahro məmə suah kit min təkəike məghat min lan? Otətəlig-in-tu, nəmotəto nəghatən rat əh.

⁶⁶?Nikitəmat təht məmə naka?” Kən kəmotən-ipən məmə, “Otəkəike mimis.”

⁶⁷Kən kəmotagəh ərnapin əm nıganəmtin, kən motaht e nelmilat. Neen kotem e nelmilat,

⁶⁸kən motən-ipən məmə, “Ei, Kristo. ?Ən-iarəp e nəsanənən rəha Uhgın məmə pah təmoh ik?”

Pita təmən məmə təruru Iesu

(Mak 14:66-72; Luk 22:56-62; Jon 18:15-18,25-27)

⁶⁹E nian əh, Pita tatəpələh ihluə e iat rəha nimə, kən iolwək kit pətan əkəku tuwa ron mən-ipən kəm in məmə, “Ik min u, nəmatuarisig-in Iesu, etəm Kalili.”

⁷⁰Məto Pita təmən-iamnin kəm ilat rafin məmə, “İəkəruru nat un itəm nakatən.”

⁷¹Kən maliwək muwin e ket rəha iat, kən ikin əh pətan əkəku kit min təməplan in, kən təmən-ipən kəm netəmim ikin əh məmə, “Suah u kit u təmatuarisig-in İesu Etəm Nasaret.”

⁷²Məto Pita təmən-iamnin əskasik min mos noanawil məmə, “!İəkəruru suah əh!”

⁷³Təsuwəhən, netəm min u koatətul ikin əh kotuwın o Pita motən-ipən məmə, “Pahrien məmə ik kit əh, məto-inu nolən rəha nəghatən rəham tahmen əm elat.”

⁷⁴Kən tınətuoun maun-in nəratən min koatisi-pən o Uhgın moatuwa ron okəmə teiuə. Kən təmos noanawil məmə, “!İəkəruru suah əh!” Kən roiu agın, mənig təmimnən.

⁷⁵Kən Pita nikin təht nəghatən itəm İesu təmən kəm in məmə, “Uarisig mənig otimnən, onakən mau kışil məmə nəkəruru io.” Kən Pita təmiet muwin ihluə, kən təmasək təmasək.

Matıu 27

Jutas təmaril atıp in

(Mak 15:1; Luk 23:1-2; Jon 18:28-32)

¹Laulaugın agın, pris asol min rafin ne etəm-iasol min rəha netəmim kəmotuəfimin min motəte noa məmə okotətəu-pən suatıp naka o nohamnuən İesu.

²Kəmotəlis in, kən motiləs motuwın motəhlman-pən e nelmi Pailat, kapman rəha Rom.

³Nian Jutas u etəm təmegəhan-in-pən İesu e nelmi rəhan tikimir min, təməplan məmə kəmotiuw-iarəp İesu məmə otimis, nikin tınahmə pik o nat naka itəm təmöl, kən təmik məni tate əh itəm kəmöl e silfa, məmki-pən kəm pris asol min ne etəm-iasol min rəha noanol rəha İsrəl.

⁴Kən mən-ipən məmә, “Emol tәfagә mәto-inu emegәhan-in-pән e nelmi tikiimir min suah kit itәм tәsolән nat tәrat kit.” Kən kotән-ipән mәмә, “Inu nat әnnapin әm otәmat. Nat kit rәham әm.”

⁵Tol nәhlan, Jutas tәmәrakin-pән mәni әpәh e Nimә Rәha Uhgın, kән in miet magim muwin maril atip in.

⁶Kən pris asol min kәmotuwın motuwәр mәni, kән motән mәмә, “Tәsәtuatipән e rәhatat Lou mәмә okotәlәhәu-pән mәni u ilat mәni rәha Nimә Rәha Uhgın, mәto-inu kәmos-nәmtin nita etәmim lan.”

⁷Kән koatән mәмә okotos mәni әh kән kos-nәmtin nәptән kit u aupән katән mәмә, “nәptән rәha suah kit itәм tatol sospән e nәptән,” kән koatән mәмә okatitәnim iapispis min ikin.

⁸Tol nәhlan, muwa mәtoarus-pa u-roiu, netәmim kotaun-in nәptән әh mәмә, “Nәptән Rәha Nita.”

⁹Kән nәghatән naka itәм ien Jeremaea tәmән aupән, tәmuwa mol nipahrienән lan. Tәmән mәмә, “Kәmotos mәni tate әh itәм kәmol e silfa, inu nәmtin itәм netәм Isrel kәmotән o suah u,

¹⁰kән koatos mәni әh mәмә okotos-nәmtin ‘nәptән o nolән sospән,’ tahmen әm mәмә Iәrәmәrә tәmән kәм io.”

Iesu tәmәtul e niganәmti Pailat

(Mak 15:2-15; Luk 23:3-5,13-25; Jon 18:33–19:6)

¹¹Kән Iesu tәmuwın mәtul e niganәmti Pailat, kән tәmәtapәh ron mәмә, “?Ik kig rәha netәм Isrel?” Kән Iesu tәmән-ipән mәмә, “Ik nәmән mihin.”

¹²Nian pris asol min ne etәм-iasol min rәha Isrel koatән-iarәp nәghatән min e Iesu, mәto Iesu tәsuhalpınән rәhalat nәghatән.

¹³Kән Pailat tәmән-ipән kәм in mәмә, “?Nakatәto nәghatән min itәм koatән tatilәs pikән ik, o kәp?”

¹⁴Mәto Iesu tәnnapin әm mәsәghatән mәsuhalpınән nәghatән kit ilat katән, kән Pailat, narmin tәmiwig pik.

¹⁵Kən e nian rəha lafet rəha Nuhagego-inən, in nolən rəha kapman məmə otahl-iarəp etəmim kit e kalapus itəm nimanin netəmim kəmotən.

¹⁶E nian əh, etəm kit tatəməhl e kalapus, nərgin u Parapas. Kən netəmim rafin kotitun məmə in təmol tərət pik agin.

¹⁷Kən nian nimanin netəmim kinotuwa, kən Pailat təmətapəh olat məmə, “?Nakotolkeike məmə ekahl-iarəp pah e kalapus tiet matuwın, Parapas, o Iesu, kətaun-in məmə Kristo?”

¹⁸Təmən nəhlan məto-inu in titun məmə kəmotegəhan-in-pən Iesu e nelmin məto-inu koatetəhak o Iesu.

¹⁹Nian Pailat tatəpələh e jea rəha nakilən nəghatən, rəhan pətan tahl-ipən nəghatən kəm in məmə, “Suah un təsolən nat tərət kit. Əsolən nat kit lan, məto-inu emapilair lan, kən roiu iatəto tərət agin ron.”

²⁰Məto pris asol min ne netəm-iasol rəha noanol rəha Isrel kəmotəghat kəm nimanin netəmim məmə okotəuhlin nətəligən rəhalat. Kən ilat kəmotətapəh o Pailat məmə otahl-iarəp Parapas, kən kotohamnu Iesu.

²¹Kən Pailat təmətapəh olat məmə, “?Suah mil u, in pəhruən lan ekahl-iarəp?” Məto nimanin netəmim kəmotən-ipən məmə, “Parapas.”

²²Kən Pailat təmən-ipən məmə, “?Kən oekahro Iesu u kətaun-in mə Kristo?” Kən nimanin netəmim rafin kəmotən-ipən məmə, “!Okətu-pər e nig kəluau otimis!”

²³Kən Pailat təmən-ipən kəm ilat məmə, “?O naka? ?Təmol nat tərət naka?” Məto nimanin netəmim kəmotagət əfəməh, motən məmə, “!Okətu-pər in e nig kəluau otimis!”

²⁴Kən nian Pailat təməplan məmə okol təsələhəuən nəghatən rəhalat, kən ilat kinoatətul matip o nəmouən, kən tos nəhau maikuas e nelmin aupən e nimanin netəmim, kən mən-ipən kəm ilat məmə, “Nəghatən kit rəhak tikə o suah u, məmə nitan otəməhl-pa lak. !Nimisən rəhan tatəməhl-pinə e nelmitəmat!”

²⁵Kən netənim rafin kəmotən məmə, “!Pəs nitan təməhl-pa otimat ne nisualkələh min rəhatimat min!”

²⁶Kən Pailat təmahl-iarəp megəhan-in-pən Parapas kəm ilat. Məto təmən məmə okalis Iesu, kən təmegəhan-in-pən in məmə okətu-pər e nig kəluau məmə otimis.

Mopael min kəmoatol milə e Iesu

²⁷Kən mopael min rəha Pailat kotiləs Iesu motuwın əpəh imə e nimə asol rəha kapman, katən məmə Praetorium. Kən kəmotəun-in rafin mopael min kotuwa kitəlau lan.

²⁸Kən motəmki-rəkis rəhan natimnat, motuwın-in-pən kot tasiə kit kəm in, tahmen e kot rəha kig kit.

²⁹Kən motuarin-uarin nol itəm tol nihlən-nihlən motol hat lan, motəfauin-pən e rəhn-kapə Iesu motol milə lan məmə in hat rəha kig kit. Kən motələhəu-pən noanig kit e nelmin matip, kən motisin nulilat aypən in, motol milə lan, motən-ipən məmə, “!Ekotisiai-in ik, kig rəha netəm Isrel!”

³⁰Kən motagəh lan, kən motiləs noanig motoh rəhn-kapə lan mau tepət.

³¹Nian kinotol rəkis milə lan, kən motəpeg rəkis kot tasiə, motuwın-in-pən min rəhan natimnat. Kən motiləs motuwın məmə okotətu-pər e nig kəluau məmə otimis.

Kəmətu-pər Iesu e nig kəluau

(Mak 15:21-32; Luk 23:26-43; Jon 19:17-27)

³²Nian kəmoatuwin, motəplan etəm Saerin kit, nərgin u Saimon, kən moatəkəike kəm in məmə otiləs nig kəluau.

³³Kəmotuwa ikin kit katən məmə, Kolkota, u nipətin tatən məmə Louipil-uipil.

³⁴Ikin əh kəmotəmki-pən wain kəm Iesu itəm kəmeapətıp e nat tarıp. Məto nian Iesu təmənım asgəwin, kən mapəs nənimən.

³⁵Nian kəmətu-pər e nig kəluau, kən moturin taes o rəhan natimnat.

³⁶Kən moatəpələh moatuag-pən moatehm Iesu ikin əh.

³⁷Ilis e rəhn-kapə, kəmotəte nīpəgnəmtin nənən. Tatən nəhlan məmə, Inu Iesu, kig rəha netəm Isrel.

³⁸Kən etəmim kəiu itəm kətioh netəmim mətuakləh-in rəhalat natimnat, kəmətu-pər ilau e nig kəluau, kit e nīkalin matip, kit e nīkalin mol.

³⁹Kən netəm min u itəm kəmotaliwək motuwa moatuwin, motən-ipən nəghatən rat kəm Iesu, moturin-urin rəhalat-kapə,

⁴⁰moatən məmə, “Nəmatən məmə onakərəkin Nimə Rəha Uhgın kən ik pisin əm miləkin o nian kisil. !Osmegəh atip ik! !Kən eiuaiu e nig kəluau okəmə ik Nəti Uhgın pahrien!”

⁴¹E nolən ahmen min əm, pris asol min, ne iəgətun min rəha Lou, ne netəm-iasol min rəha noanol rəha Isrel kotol milə lan,

⁴²motən məmə, “Təmosmegəh netəmim, məto okol təruru nosmegəh atipən in. In kig rəha Isrel. Okəmə tatite atip e nig kəluau, kən okotən nīpahrienən lan.

⁴³Tətahatətə e Uhgın. Pəs Uhgın tiləs-irəkis in əh-roiu okəmə in tolkeike, məto-inu təmən məmə in Nəti Uhgın.”

⁴⁴E nolən ahmen min əm, iətgəhl lou mil itəm kəmətu-pər iləhal min in e nig kəluau, katuən-ipən nəghatən rat tepət kəm in.

Iesu tinimis

(Mak 15:33-41; Luk 23:44-49; Jon 19:28-30)

⁴⁵Kən e tuelef klok mətoarus-pən tri klok, napinəpən təmeiuaiu mīrəfin nat.

⁴⁶Kən iuəhkir e tri klok ehnaipən, Iesu təmasək əfəməh mən məmə, “!Eloi, Eloi! ?Lama sapaktani?” u nīpətīn təmə, “!Uhgın rəhak, Uhgın rəhak! ?Tahro nakatapəs io?”

⁴⁷Nian netəmim neen itəm kəmoatətul əh-ikin kəmotəto təmasək əfəməh nəhlan, kən kotən məmə, “In tətaun-in Elaija.”

⁴⁸Roiu agin, kit tēmaiu muwin mīlēs nat kit tame-ame tahmen e katēn, kēn mau e wain u tagin, maru e nig, kēn mīlēs-ipēn mēmā Iesu otēnim.

⁴⁹Kēn ilat min neen kotēn-ipēn mēmā, “Apēs əm. Pēs koatēplan okēmā Elaija otuwa mosmegəh in, o kəp.”

⁵⁰Kēn nian Iesu tēmasək əfəməh min, megəhan-in atip mēmā otimis, kēn rəhan namegən tiet.

⁵¹E nian ətuatip əh, nīməhan itəm tatəkul e Nimə Rəha Uhgīn tēməhap mol mēsīn kəiu, tēmətuoun əpəh ilis muwa mol namnun əpəh ləhau. Namig tēməloal, kēn kəpiel min kəmotimismis.

⁵²Kēn suwit min itəm kəmol e nīpəg kəpiel kəmotəhap motoag, kēn netəm kotətuatip tepət itəm kəmotimis rəkis, kəmotəmegəh min.

⁵³Kəmotiet e suwit min kəmol e nīpəg kəpiel, kēn uarisig Iesu tēməmegəh e nīmīsən, ilat kəmotuwīn əpəh Jerusalem motiet-arəp o netəmim tepət.

⁵⁴Kēn nian etəm-iasol rəha mopael min rəha netəm Rom ilat netəm min u itəm kəmoatehm Iesu, kəmotəplan namig ne natimnat min əh, kəmotəgīn pīk, kēn motən əfəməh mēmā, “!Nīpahrienən, inu Nəti Uhgīn pahrien!”

⁵⁵Nīpitan tepət kəmoatətul isəu moatəplan. Aupən ikin kəmotiet Kalili moatətəu-pən Iesu moatasitu lan e nat pīsīn pīsīn min.

⁵⁶Ilat min neen u Meri Maktala, kēn Meri u mama rəha Jemes ne Joses, kēn mama rəha nəti Sepeti mil.

Kəmitənim Iesu

(Mak 15:42-47; Luk 23:50-56; Jon 19:38-42)

⁵⁷Etəm Aramatia u rəhan nautə tepət, nərgīn u Josep, in etəmim kit rəha Iesu. Nian tinatuwa iuəhkir o napinəpən,

⁵⁸təmuwīn məplan Pailat, kēn tətəpəh-in nīpəti Iesu, kēn Pailat tegəhan-in nīpəti Iesu kəm in.

⁵⁹Kēn Josep tēmīlēs nīpəti Iesu muwin malpin e nīməhan ruən wi kit, nərgīn u linen,

⁶⁰kən miləs muwin miləs-ipən e suwit wi kəmel e kəpiel. Suwit u in rəha Josep. Kən məsəupəlpəlin-pən kəpiel asol kit mahtosig-in nīpəg kəpiel lan, kən matuwīn.

⁶¹Meri Maktala, ne Meri kit min katuəpələh əh iuəhkir o suwit.

Mopael min itəm kəmotehm nīpəg kəpiel

⁶²Nian əh, in nian katol əpen-əpenə o Sapat, kən kəmən lawigin e Sapat, pris asol min ne Farisi min kəmotuwīn motəplan Pailat.

⁶³Motən-ipən məmə, “Etəm-iasol. Nīkitəmat tīnəht məmə, nian suah əh, etəm rəha neiuəən, təmatəmegəh əh, matən məmə, ‘Nian kisil otuwa muwin, kən Uhgīn otosmegəh min io e nīmīsən.’

⁶⁴Tol nəhlan, ahl-ipən rəham neen mopael okotuwīn moatehm nīpəg kəpiel suwit mətoarus-pən nian kisil tuwa muwin. Mətan, rəhan netənim okotuwa kəkləh-in nīpətīn, kən motən-ipən kəm netənim məmə təməmegəh min e nīmīsən. Kən neiuēiuəən u, in otərat taprəkis-in itəm aupən.”

⁶⁵Kən Pailat təmən-ipən məmə, “Otos mopael min, kən motuwīn motol natimnat rafin itəm nakotolkeike məmə okotol o nehm wīrən suwit e nīpəg kəpiel.”

⁶⁶Kən kəmotuwīn moatehm wīr nīpəg kəpiel tol nulan, motələhəu-pən nəmtətīn kit e kəpiel. Kən kəmotələhəu mopael min məmə okoatehm ikin əh.

Matiu 28

İesu təməmegəh min e nīmīsən

(Mak 16:1-8; Luk 24:1-12; Jon 20:1-10)

¹E Sante laulaugin agīn, təmatian məsian wīrən, Meri Maktala ne Meri kit min kəmian məmə okiauag suwit e nīpəg kəpiel.

²Kən əmun, namig asol kit təməloal məto-inu nagelo kit rəha İərəmərə təmeiuaiu e nego e neai muwin e nīpəg kəpiel, kən məsəupəlpəl-in rəkis kəpiel, kən matəpələh-pər lan.

³In tətasiə tahmen e nīpītən, kən rəhan natimnat min kotəruən tahmen e nahui noa nītəhəi.

⁴Mopael min kəmotəgin pik, kən motasiəp-asiəp, narmilat təmikə tahmen e netəm kəmotimis.

⁵Kən nagelo təmən-ipən kəm pətan mil məmə, “Suəginən, mətə-inu ekitun məmə natuegəs-in Iesu itəm kəmətu-pər e nig kəluau.

⁶Tikə u ikin-u. In təməmegəh min e nimisən tahmen əm e inu təmən mihin aupən. Uea muəplan ikin təmatəməhl ikin.

⁷Kən ian uəhai, kən muən-ipən kəm rəhan netəmim məmə, ‘In təməmegəh min e nimisən, kən in tətaupən-in itəmat matuwīn əpəh Kalili. Kən ikin əh, onəkotəplan in əh-ikin.’ Itəla, rəhak u nəghatən enən kəm itəmlau.”

⁸Kən pətan mil kəmuagim uəhai əm e suwit e nipəg kəpiel, matuəgin, mətə nikilau tətəgien, mətian məmə okuən-ipən kəm netəmim rəha Iesu.

⁹Kən əmun, Iesu tiet-arəpa olau, mən-ipən məmə, “Təwir.” Kən kəmuea o Iesu, muaskəlim nelkin, kən muəfak kəm in.

¹⁰Kən Iesu təmən-ipən kəm ilau məmə, “Suəginən. Ian muən-ipən kəm piak min məmə okotuwīn Kalili. Ikin əh okotəplan io ikin.”

Nəghatən rəha mopael min

¹¹Nian pətan mil kəmualiwək mətian, kən mopael min əh neen kəmotuwīn e taon, kən motən-ipən kəm pris asol min natimnat rafin itəm kəmotəplan.

¹²Nian pris asol min kəmotuwīn motəplan netəm-iasol rəha noanol rəha Isrel, kən moatol noa kit motəlis nəghatən lan. Kən motos-ipən mənī asol kəm mopael min,

¹³motən-ipən kəm ilat məmə, “Nakotən-ipən kəm netəmim məmə, ‘Rəhan netəmim kəmotuwa lapin nian itimat emotapil, motakləh-in nipətīn motiləs motagim.’

¹⁴Okəmə kapman otəto namnusən u, kən itimat ekotəg-ətuatip-in nəghatən u kəm in. Itəmat onəsotosən nəratən lan.”

¹⁵Tol nəhlan, mopael min kəmos mənı, kən motol tahmen-pən əm məmə kəmən mihin kəm ilat. Kən namnusən u təmuwin mitəlau e netəm Isrel muwa mətoarus-pa roiu.

Iesu təmıet-arəpa o rəhan netəmim

(Mak 16:14-18; Luk 24:36-49; Jon 20:19-23)

¹⁶Kən netəm lepen rəha Iesu kəmotuwın Kalili, motuwın e nitot itəm Iesu təmən kəm ilat məmə okotuwın ikin.

¹⁷Nian kəmotəplan in, kən kəmotəfak kəm in, məto neen rəhalat nətəligən tatol kəiu.

¹⁸Kən Iesu tuwa olat, kən mən-ipən kəm ilat məmə, “Nepətən rafın rəha nego e neai ne nətueintən o nərəmərən, Uhgın təmos-ipa kəm io.

¹⁹Tol nəhlan, otuwın motiww netəmim rəha noanol min rafın e nətueintən məmə okotuwa rəhak netəmim, kən motol baptais elat e nərgi Tata Uhgın, ne Nətin, ne Narmin,

²⁰kən motəgətun ilat məmə okotətəu-pən rafın nəghatən min itəm emən kəm itəmat. Kən nıpahrienən, ekətətig kitat min itəmat nian min rafın mətoarus namnun nian.”

Mak

Mak 1

Jon Baptais t̄amol ̄apen-̄apen̄e e suatip

(Mat 3:1-12; Luk 3:1-18; Jon 1:19-28)

- ¹Inu n̄atuoun̄en r̄aha Namnus̄en T̄awir r̄aha Iesu Kristo, Neti Uhgin.
- ²Ien r̄aha Uhgin, n̄ergin u Aesea t̄am̄ete-p̄en mihin e naoa aup̄en. Uhgin t̄am̄en m̄em̄e, “Ot̄eplan-tu. Iatahl-ip̄in̄e r̄hak iahl̄epis it̄em otos r̄hak n̄eghat̄en. In otaup̄en-in ik m̄em̄e otol ̄apen-̄apen̄e e r̄ham suatip.”
- ³“Suah kit t̄etaun ̄ap̄eh ikin tarūen-arūen ikin mat̄en m̄em̄e, ‘It̄emat, otol ̄apen-̄apen̄e o suatip r̄aha Īer̄em̄er̄e, k̄en motol r̄ehan suatip t̄etuatip.’”
- ⁴K̄en tol n̄əhlan, Jon Baptais t̄amiet-pa ikin tarūen-arūen ikin matol baptais e net̄amim, k̄en mat̄en-iar̄ep̄ n̄eghat̄en r̄aha Uhgin k̄em ilat m̄em̄e okot̄ək̄eike mot̄uhlin m̄entaalat o nol̄en rat min r̄əhalat, k̄en motuw̄in o Uhgin, m̄em̄e in otaf̄el nol̄en rat min r̄əhalat. K̄en e n̄əmt̄etin kit, okol baptais elat.
- ⁵Net̄amim rafin r̄aha nit̄en ̄əh Jutia ne taon ̄əh Jerusalem, k̄əmotuwa mot̄ət̄elig-in r̄ehan n̄eghat̄en k̄en mot̄en-iar̄ep̄ r̄əhalat nol̄en rat min, k̄en Jon t̄əmol baptais elat ̄ap̄eh e n̄əhau Jotan.
- ⁶Jon t̄əməsuw̄in̄en e nat̄imnat wir. R̄ehan nat̄imnat tahmen ̄əm e r̄aha ien u Elaija aup̄en. R̄ehan nat̄imnat k̄əmol e n̄im̄əme kamel, k̄en r̄əhn k̄ət̄ut k̄əmol e nuw̄iḡi kau, k̄en matun ̄əm pit̄ip̄ ne nahui sukapak e n̄ikinat.
- ⁷K̄en t̄əmat̄en-iar̄ep̄ k̄em net̄amim m̄em̄e, “Suah kit u tatuarisig-in io, r̄ehan n̄əsan̄ən̄en ne nep̄ət̄en tapr̄əkis-in io. Io ek̄əsahmen-in min̄en m̄em̄e ekeiuaiu mapeg r̄əkis r̄ehan put.
- ⁸Ekatol baptais et̄emat e n̄əhau, m̄əto in ot̄əpanol baptais et̄emat e Narmin R̄aha Uhgin.”

Jon t̄əmol baptais e Iesu ̄ap̄eh e n̄əhau Jotan

(Mat 3:13-17; Luk 3:21-22)

- ⁹E nian ̄əh, Iesu t̄əmiet ̄ap̄eh Nasaret, latūənu kit r̄aha Kalili muwa. K̄en Jon t̄əmol baptais lan ̄ap̄eh e n̄əhau Jotan.

¹⁰Nian Iesu tēmər əpəh e nəhau, kən masipər məplan nego e neai tēmerəh, kən Narmin Rəha Uhgın təmeiuaiu-pa ron tahmen-pən e mak.

¹¹Kən nəghatən kit təmisi-pər əpəh e nego e neai matən min-nulan məmə, “Ik netik keike, ekolkeike pik ik, kən nikik tagien pik agin ron ik.”

Setan tēmos-ipən-os-ipən kəm Iesu

(Mat 4:1-11; Luk 4:1-13)

¹²Kən roiu agin-əh min, Narmin Rəha Uhgın təmit-ipən Iesu əpəh ikin taruən-aruən ikin,

¹³ima nat iarupin min. Təmatig ikin mos nian fote. Nian min Setan tatos-ipən-os-ipən kəm in. Kən nagelo min kəmotasitu lan.

Iesu tinatətuoun matən-iarəp Namnusən Təwir

(Mat 4:12-17; Luk 4:14-15)

¹⁴Nian kiniləs-ipən rəkis Jon e kalapus, Iesu təmuwin əpəh Kalili matən-iarəp Namnusən Təwir rəha Uhgın kəm netəmin.

¹⁵Təmən məmə, “!Ure! !Rəhan nian tinuwa! !Nian rəha nərəmərəən rəha Uhgın tinatuwa iuəhkir! !Otəuhlin nətəligən rəhatəmat, motapəs pahrien nolən rat min, kən motuwın o Uhgın, kən motahatətə e Namnusən Təwir!”

Iesu tēmaun-in etəmin kuwit rəha niuwən nəm

(Mat 4:18-22; Luk 5:1-11)

¹⁶Nian Iesu tēmətaliwək e nikali Lek Kalili, kən məplan suah mil kəiu, etəmin rəha niuwən nəm min, nərgilau u Saimon ne pian Antru. Kətuatip-in rəhalau net.

¹⁷Kən Iesu tēmən-ipən kəm ilau məmə, “Uea, mətəu-pa io, muea rəhak etəmin mil, kən io ekol itəmlau nakuea etəmin mil rəha niuwən netəmin məmə okotuwa rəhak min netəmin.”

¹⁸Kən əmun kuapəs rəhalau net, kən muətəu-pən.

¹⁹Kən Iesu təmaliwək muwin təhmin min məsin, kən məplan neti Sepeti mil Jemes ne pian Jon katuəpələh e rəhalau pot matuəhl wir rəhalau net.

²⁰Kən e nian əm əh inəh, Iesu təmaun-in ilau lan, kən kuətul muapəs rəhalau tata Sepeti ne rəhan iolwək min kotəpələh e nīpəg noa pot, kən muətəu-pən Iesu.

Iesu tēməhg-iarəp narmin rat e suah kit əpəh Kapaneam

(Luk 4:31-37)

²¹Kən Iesu ne rəhan min netəmim kəmotuwīn əpəh Kapaneam. Kən e nian rəha Sapat, Iesu tuwīn əpəh e nimə rəha nuəfiminən matəgətun netəmim.

²²Kən netəmim kəmotəto rəhan nəghatən, kən narmilat tēmiwig pīk ron mətə-inu rəhan nəghatən təfigəm, nepətən əh-ikin, kən maprəkis-in min rəha iəgətun min rəha Lou.

²³Kən e nian əh, suah kit narmin rat tətatiɡ lan təmuwa imə kən mətəgət əfəməh məmə,

²⁴“!Ik Iesu etəm Nasaret! ?Nəmuwa məmə onakahro itimat? !Okəmə naka nəmuwa məmə onakərəkin itimat! !Io enəmitun rəkis ik, ik Etəm Asim rəha Uhgīn!”

²⁵Kən mətə Iesu təmən-ipən əskasik kəm narmin rat un məmə, “!Ah! Əsəghatən, miet e suah un.”

²⁶Kən narmin rat təmol nīpəti suah apon tasiəp-asiəp, magət əfəməh miet lan.

²⁷Kən netəmim kəmotaut motən-ipən kəm ilat min məmə, “!Ei, naka u! Okəmə naka nəgətunən wi kit u. !Suah u tatos nəsanənən o nəghatən kəm narmin rat min, kən koatətəlig-in motol nəwian!”

²⁸Kən kəmamnus ueiuəhai əm Iesu, tuwīn mapəköl əpəh e nītən Kalili.

Iesu təmol-wir netəmim tēpət

(Mat 8:14-17; Luk 4:38-41)

²⁹Nian Iesu ne Jemes, Jon, Saimon, ne Antru kəmotiet e nimə rəha nuəfiminən, kən motaiu ətuatip əm kan əpəh latuənu rəha Saimon ne Antru ikin.

³⁰Nian kəmotuwīn, mətə uhu Saimon tatətəp-ətəp, kən mətəpīl-pər e rəhan pet, kən kəmotən-ipən kəm Iesu məmə pətan əh tatimis.

³¹Kən Iesu təmuwin mea-pən o nelmin kən tətul. Kən nətəp-ətəpən tagim lan, kən tuwin matol nigilat nagwənən.

³²Tinehnaipən mit tinaht, nian rəha Sapat tinol namnun, kən netəm min u koatimis, ne netəm narmin rat tətatig elat, pialat min kəmotəmik ilat motuwa o Iesu.

³³Netəmim rafin e latuənu un kəmotuwa motargəfimin əm ilat min əpəh e nafiluə e nimə un rəha Saimon ne Antru.

³⁴Kən Iesu təmol-wir netəmim tepət u koatos nimisən pişin-pişin min kotəwir, kən məhg-iarəp narmin rat tepət e netəmim, məto təmən-iəhau narmin rat min məmə okəsotəghatən, məto-inu kinotitun rəkis məmə pah u Iesu.

Iesu təmatamnus-iarəp rəhan nəghatən əpəh Kalili

(Luk 4:42-44)

³⁵Kən laulaugin agin, fetukai təsirən əh, Iesu təmiet muwin əpəh ikin netəmim kotikə ikin matəfak.

³⁶Kən Saimon ne in min neen kəmotuwin kateam-in.

³⁷Nian kəmotəplan, kən kəmotən-ipən kəm in məmə, “Netəmim rafin koteam-in ik.”

³⁸Məto Iesu təmən-ipən kəm ilat məmə, “Kəpə. Pəs kotuwin əpəh e latuənu pişin min neen, ekamnus-iarəp rəhak nəghatən kəm netəmim mapəköl məto-inu, nat əh in əh emuwa ron məmə ekol.”

³⁹Kən muwin mapəköl rafin e nitən əpəh Kalili, mətamnus-iarəp rəhan nəghatən əpəh e nimə rəha nuəfiminən min, kən məhg-iarəp narmin rat min e netəmim.

Iesu təmol-wir suah kit leprosi təmol

(Mat 8:1-4; Luk 5:12-16)

⁴⁰Suah kit leprosi təmol təmuwa misin-pən nulın o Iesu mətasəkin-pən nəwirən ron məmə, “Okəmə nakolkeike, kən nəkitun nol-wirən io kən mafəl rəkis namkimikən lak.”

⁴¹Kən Iesu nikin təmahmə pik ron, kən təmæg-əfəmäh-in nelmin mələhəu-pən lan, mən məmə, “Əwäh. Iakolkeike. !Əwir-ta!”

⁴²Kən roiu aġin-əh, nimisən leprosi təmagim mikə lan, kən nipətin tinəwir, namkimikən tinikə.

⁴³⁻⁴⁴Kən Iesu təmən-ipən əskasik kəm suah un məmə, “Əsən-iarəpən natimnat min u kəm netəmim, məto uwın əm mehm pris kit pəs in tehm məmə nipətim tinol min-nulan, kən os-ipən kəm in nat u itəm Lou rəha Moses təmən o suah kit itəm rəhan leprosi tinikə, kən netəmim okotitun məmə nipahrienən ninəwir, kən rəham namkimikən tinikə.” Kən mahl-ipən tatuwin.

⁴⁵Məto suah un təmuwin kən mən-iarəp nat un kəm netəmim min rafin mol Iesu təsuwinən e latuənu min məghat məto-inu nimanin netəmim tepət pik koatətulosig-in. Kən o nat əh inəh, təmətan ikin netəmim kotikə ikin. Kən netəmim kotisi-pən əpəh ikin min rafin moatuwa ron.

Mak 2

Iesu təmol-wir suah kit nəwtain məsin təmimis

(Mat 9:1-8; Luk 5:17-26)

¹Nian neen kinotuwa rəkis minotuwin, Iesu təmitəlig-pən min əpəh Kapaneam, kən nəghatən təmaiu muwin kəm netəmim min məmə Iesu əpəh rəhan nimə.

²Kən netəmim tepət kəmotuwa motər wir əpəh imə, ne ihluə ne, kən rum tikə o etəmim kit min. Kən Iesu tatən-iarəp rəhan nəghatən kəm ilat.

³Kən suah kuwit kəmotalis pialat kit motuwa o Iesu itəm nipətin məsin təmimis mətapil-pər e rəhan nimitiwin.

⁴Nian kəmotuwa, məto netəmim kinotər əpəh imə, kən okol kotəruru nuwinən kehm Iesu. Kən kotiləs motuwin əpəh ilis e nimə motos-irəkis nəhgi nimə məsin ətuatip əm əh Iesu tatətul ikin imə, kən motəhlman-əhlman suah un tatite e nimitiwin rəhan muwin iuəhkir əm o Iesu.

⁵Nian Iesu təməplan nahatətən rəhalat, kən tən-ipən kəm etəm tatimis un məmə, “Nətik, enos-irəkis rəkis nolən rat rəham.”

⁶Məto iəgətun min neen rəha Lou kotəpələh əpəh imə, kən nikilat təməht məmə,

⁷“?Tahro suah u tatən rat Uhgin? Nəghatən əh tərət. Uhgin əm titun nos-irəkisən nolən rat rəha etəmim. !Pah min titun nos-irəkisən!”

⁸Kən roiu agin-əh, Iesu tiləs rəhalat nətəligən, kən məmə, “?Tahro nikitəmat tatəht pīk natimnat min-nulan?”

⁹?Itəm pəhruən timetig, itəm u məmə ekən-ipən kəm suah əh məmə, ‘Enos-irəkis rəkis rəham nolən rat,’ o itəm u timətig məmə, ‘Ətul, miləs rəham nimitiwīn matuwīn’?

¹⁰Məto ekol nat kit məmə onəkotitun məmə io Neti Etəmim, iatos nepətən ikin-u e nətueintən o nos-irəkisən nolən rat rəha netəmim.” Kən məghat kəm suah əh məmə,

¹¹“Iatən-ipinə kəm ik məmə, ətul, miləs rəham nimitiwīn matuwīn imam ikin.”

¹²Kən əmun suah apon təmətul, miləs rəhan nimitiwīn, maliwək matuwīn, kən ilat rafin kəmotəplan, motaut, narmilat təmiwig ron kən motənwiwi Uhgin motəmə, “Ekəsotehmən əh nat kit tol min-nulan ne, nian kit.”

Iesu təmaun-in Lifae məmə otuwa muarisig-in

(Mat 9:9-13; Luk 5:27-32)

¹³Iesu təmuwīn min mətaliwək əpəh e nikalkal nəhau Lek Kalili, kən nimanin netəmim kəmotuwa ron, kən tatəgətun ilat.

¹⁴Kən təmaliwək matuwīn kən məplan Lifae neti Alfeas, in etəmim rəha nosən mənī rəha takis, tatəpələh imə matol rəhan wək. Kən Iesu təmən-ipən kəm in məmə, “Ətəu-pa io, muwa rəhak etəmim.” Kən əmun tətul muarisig-in.

¹⁵Kən nian kit, Iesu təmuwīn mətəgwən əpəh ima Lifae ikin ilat netəmim rəha nosən mənī rəha takis, ne netəm nol təfagə rat neen. Kotəgwən əm kitəh ilat Iesu ne rəhan min netəmim məto-inu netəmim tepət kotol təfagə rat nəhlan kotuarisig-in Iesu.

¹⁶Iægætun rəha Lou neen, ilat u Farisi. Kən neen kəmotəplan məmə Iesu tətəgwən əm kitəh ilat nol təfagə mīn un, ne netəmim rəha nosən mənī rəha takis, kən kotətapəh o netəmim rəhan mīn məmə, “?Tahro Iesu tətəgwən əm kitəh ilat netəm koatol nəhlan?”

¹⁷Kən Iesu təməto rəhalat nəghatən, kən təmən-ipən kəm ilat məmə, “Netəm mīn u kəsotimis-imisən kəsotuwīnən o tokita, məto netəm mīn u koatimis-imis koatuwīn ron. Io eməsuwamən o netəm mīn u kotəmə kinotətuatip rəkis. Məto emuwa o netəm mīn u kotitun əm məmə ilat koatol nolən rat mīn.”

Kotapəs nagwənən o nəfakən

(Mat 9:14-17; Luk 5:33-39)

¹⁸Kən e nian əh, netəmim mīn rəha Jon Baptais ne Farisi mīn kəmotapəs nagwənən motətuakəm o nəfakən kəm Uhgīn. Kən netəmim neen kəmotuwa motən-ipən kəm Iesu məmə, “Əplan-tu, netəmim rəha Jon Baptais ne Farisi mīn kotətuakəm o nəfakən. ?Məto tahro rəham mīn kəsotolən mihin?”

¹⁹Kən Iesu təmən-ipən kəm ilat məmə, “?Nian katol lafet lan rəha etəm tatol marit, kən iərman u otol marit tətətig əh ilat in mīn neen motol lafet, nikitəmat tatəht məmə otətuakəm motapəs nagwənən? !Kəpə! Nian tətətig əh ilat mīn, kən nīkilat tətəgien, motəgwən əm.

²⁰Məto nian əpəh ikin məmə okəpaniləs-irəkis suah əh lan, kən e nian əh in əh, in mīn neen nīkilat otahmə ron, kən kəpanotətuakəm motapəs nagwənən.”

²¹Kən təmatig mən mīn məmə, “Suah kit mīn okol təsəhl-pənən nīmismisi nīməhan wi kit e nīməhan oas itəm təmerəh. Okəmə otəhl-pən, kən nīməhan wi un titun nəhap asolən nīməhan oas un.

²²“Suah kit mīn okol təsiuw-pənən wain wi kit e nuwigi nat oas kit, məto-inu okəmə otiuw-pən wain wi e nuwigi nat oas itəm təkasiḱ, kən wain otapuəl-apuəl kən nuwigi nat oas un otahgig kən məhap, kən wain ne nuwigi nat un okuərat. Məto wain wi okiuw-pən əm e nuwigi nat wi itəm timətəmatig.”

Netəmim mīn rəha Iesu kəmotəhl wit e Sapat

(Mat 12:1-8; Luk 6:1-5)

²³E nian kit e Sapat, Iesu ne rəhan min netəmim kəmotaliwək motuwın-pən əpəh e niki nasumən rəha wit, kən netəmim min rəha Iesu kəmotəhl wit məmə okotun.

²⁴Kən Farisi min u kotaskəlim əskasik Lou rəha Moses kəmotən-ipən kəm Iesu məmə, “!Ei, əplan-tu! E Sapat, kəsəuləkən əh e nasumən ne kəsolən natimnat min nəhlan kotərəkin Lou. ?Tahro rəham netəmim min kətol nəhlan?”

²⁵⁻²⁶Iesu təmuhalpın rəhalat nəghatən məmə, “Okəm-naka itəmat nakəsotafinən əh nat u Tefit təmol aupən nian Apiata in pris asol agin rəha Uhgin. Itəmat ninotafin rəkis məmə Tefit nəumis təmus, kən tuwin əpəh e Nimə Tapolən rəha Uhgin, kən mıləs pıret asim u pris min əm koatun, kən in mıləs muwa motun ilat in min neen.”

²⁷Kən təmatig mən-ipən min kəm ilat məmə, “!Kəməsolən Sapat məmə in nat fıgəm kəm netəmim, məto kəmol Sapat məmə otasitu elat kotameg!

²⁸Tol nəhlan, io Neti Etəmim ekatərəməərə rafin e natimnat min, kən matərəməərə min e Sapat.”

Mak 3

Iesu təmol-wir nelmi suah kit təməfaiu

(Mat 12:9-14; Luk 6:6-11)

¹E Sapat kit min, Iesu təmitəlig-pən min əpəh e nimə rəha nuəfiminən kən məplan suah kit nelmin təmimis, təsəg-ətuatıp-inən.

²Nian Iesu təmuwin imə, kən netəmim kəmotolkeike məmə okotən iərəkin Lou lan, kən motalkəlik wir ron məmə okotehm-tu məmə otol-wir suah un e Sapat, o kəp.

³Kən Iesu təmən-ipən kəm suah un məmə, “Ətul muwa u aupən,” kən tətul muwin əpəh aupən.

⁴Kən Iesu təməhai ilat məmə, “?Rəhatat Lou təmə kotitun nolən naka e Sapat? ?Təmə təwir məmə okotol nat wir, o nat tərət? ?Təwir məmə okotosmegəh netəmim, o təwir məmə okotohamnu netəmim?” Məto kotəpnarın əm.

⁵Kən Iesu tēmasipən mēplan ilat, kən neməha tol, kən nīkin tahmə olat mətō-inu rəhalat-kapə tiəkis pik. Kən mən-ipən kəm suah un mēmə, “Əg-ətuatip-in-tu nelməm.” Kən suah apon tēməg-ətuatip-in nelmin, əmun nelmin təwir.

⁶Kən Farisi min apon kəmotiet motaiu ətuatip əm motuwīn motəplan rəhalat tīkimir min e pati rəha Herot, motol əm kitīəh moteam-in suatip mēmə okotiləs Iesu motohamnu.

Nīmanin netəmim kəmotuarisig-in Iesu

⁷Iesu ne rəhan min netəmim kəmotiet moteiuaiu motuwīn əpəh e nəhau Lek Kalili. Nīmanin netəmim kəmotuarisig-in ilat. Netəm min un neen kəmotisi-pən e latuənu rəhalat e nitən Kalili,

⁸neen kotisi-pən əpəh e latuənu əlkələh min ne Jerusalem rəha nitən əpəh Jutia. Neen min kəmotisi-pis e nəwtain məsin əpəh nitən Itumia ne e nəwtain nəhau Jotan entənipən-pən matuwīn. Neen min kəmotisi-pəhap əpəh ikin min e taon mil un Taea ne Saeton. Netəm min un kīnotəto rəkis natimnat min un Iesu tatol ilat, kən kotuwa mēmə okotəplan.

⁹Kən nīmanin netəmim kəmotuwa pik, kən Iesu tēmən-ipən kəm rəhan min netəmim mēmə okotol-əpen-əpenə e pot kit mēmə otuwīn məpələh lan, mēmə nīmanin netəmim okəsotəhg-əhg pikən in.

¹⁰Mətō-inu tinol-wir rəkis netəmim tepət, kən netəm min u kotimis əh kotəhg-əhg ilat min mēmə okotuwa iuəhkir motek Iesu.

¹¹Kən nian netəmim itəm narmin rat min kotatig elat kəmotəplan Iesu, koteiuaiu aupən-in motorin ilat motagət əfəməh mēmə, “!Ik Neti Uhgīn!”

¹²Mətō Iesu tēmən-iəhau əskasik narmin rat min un mēmə okəsotən-iarəpən in kəm netəmim.

Iesu tēmaun-in rəhan netəm tuelef mēmə okotuarisig-in

(Mat 10:1-4; Luk 6:12-16)

¹³Kən Iesu ne kəmotuwīn əpəh e noanu nitot min, kən tētaun-in netəmim neen mēmə okotuwa ron.

¹⁴Nian kəmotuwīn, kən təmitəpun rəkis ilat tuelef kən mos-ipər ilat məmə aposol min. In təmən min məmə netəm min əh, ilat əh okotaliwək ilat min, kən in otahləpis ilat kotuwīn motən-iarəp namnusən təwīr kəm netəmim əpəh ikin min,

¹⁵kən okotos min nepətən ne nəsanənən o nəhg-iarəpən narmin rat min e netəmim.

¹⁶Netəm min u ilat u təmitəpun ilat, ilat u, Saimon u Iesu təməhun-pən min nərgin kit min məmə Pita,

¹⁷ne Jemes ne pian Jon neti Sepeti mil u Iesu təmos-ipən min nərgilau təhan məmə, “Poanejes,” nipəti nəghatən əh təmə neti kaluəluə mil, mətə-inu neməha tatol ueiuəhai ilau,

¹⁸⁻¹⁹ne Antru, Filip, Patolomiu, Matiu, Tomas, Jemes u neti Alfeas, Tateas, Saimon u kətaun-in məmə Selot, ne Jutas Iskariot u təmegəhan-in-pən Iesu e nelmi tikimir min. Netəm min əh ilat əh tuelef, Iesu təmos-ipər ilat.

Iesu ne Pielsepul

(Mat 12:22-32; Luk 11:14-23; 12:10)

²⁰Uarisig, təmitəlig-pən min latuənu, kən nimanin netəmim kəmotuwa min ron, kən Iesu ne rəhan min netəmim kinotəruru namegən ne nagwənən ne.

²¹Nian rəhan mama ne kəmotəto nəghatən u katən e Iesu, kən motuwa məmə okotit-irəkis o netəmim, mətə-inu netəmim neen koatən məmə Iesu nitalməl.

²²Iəgətun min neen rəha Lou kəmotisi-pən əpəh Jerusalem motuwa kən motəmə Pielsepul, u in etəm-iasol rəha narmin rat min, in tətətig e Iesu, kən motəmə in tatos-ipən nəsanənən kəm Iesu məmə otəhg-iarəp narmin rat min e netəmim.

²³Kən Iesu təmaun-in ilat kotuwa iuəhkīr ron kən tatuəh nimaa nəghatən kəm ilat, məmə, “?Nikitəmat tatəht məmə okol Setan təhg-iarəp atip Setan? !Kəp!

²⁴Okəmə netəmim e kantri kit koatoor ilat min, kən okotərəkīn rəhalat kantri, kən nərəmərəən rəhan otisas mikə.

²⁵Kən tahmen-pən əm, e latuənu kit, okəmə netəmim lan koator ilat min, kən okotərəkīn agin-əh latuənu u.

²⁶Kən okəmə Setan tatəhg-iarəp narmin rat min rəhan e netəmim, kən tatol atip əm tikimir kəm in. ?Kən otahro nulan, rəhan nərəməərən otətul? Wək rəhan otisas mikə.

²⁷“Kən okol iakläh kit təsuwin əpnapinən imə e rəha etəm kəgin kit ikin, mətakläh-in natimnat rəhan, mətə otəkəike məlis e nol, mələhəu u, kən panuwīn makläh-in rəhan natimnat.

²⁸“Ekatən pahrien kəm itəmat məmə təfagə rat rafin rəha netəmim, ne nəghatən rat min itəm ilat koatən, Uhgīn titun nos-irəkisən.

²⁹Mətə etəm tatən rat Narmin Rəha Uhgīn, okol Uhgīn təsos-irəkisən rəhan təfagə rat. Təfagə rat un otətatiḡ kitīəh lan mətatiḡ, okol təsikəən.”

³⁰Iesu təmən nəhlan mətə-inu kəmotəupən motən məmə narmin rat kit tətatiḡ lan.

Mama rəha Iesu ne pian min

(Mat 12:46-50; Luk 8:19-21)

³¹Kən e nian əh, mama rəha Iesu ne pian min kəmotuwa, kən moatətul əm əpəh ihluə kən motahl-ipən nəghatən o Iesu məmə tuwa-tu mehm ilat.

³²Kən nīmanin netəmim kəmotəpələh kan keko-in Iesu, kən kən-ipən kəm Iesu məmə, “Ei, mama rəham ne pian min əpəh ihluə, kotolkeike məmə okotehm-tu ik.”

³³Kən Iesu təmən-ipən kəm ilat məmə, “?Pah u rəhak mama ne piak min?”

³⁴Kən masipən məplan rafin ilat kən məmə, “Otasipən-tu. Itəmat u piak min ne rəhak mama ətuatip min.

³⁵Netəm min u koatol nəwīa Uhgīn, ilat u piak min, ne rəhak kaka min, ne rəhak mama.”

Mak 4

Etəm tatəfe nikutin natimnat

(Mat 13:1-9; Luk 8:4-8)

¹Kən Iesu təmitəlig-pən min əpəh e Lek Kalili matəgətun netəmim, məto nimanin netəmim kəmotuwa ron, motol məmə Iesu tuwin e pot. Kən pot un tatəməhl-pən e lek, kən Iesu tatəpələh-pən lan. Kən nimanin netəmim kəmotəpələh əpəh ipar e nıkalkal lek.

²Kən Iesu tatuəh nimaa nəghatən min kəm ilat matəgətun ilat e natimnat tepət.

³Təmən-ipən kəm ilat məmə, “Otətəlig-tu. Suah kit təmuwin məmə oteatəgtəg rəhan nıkutin natimnat əpəh e rəhan nasumən.

⁴Nian təmateatəgtəg rəhan nıkutin natimnat, kən neen kotisas-pən əpəh e nıkalkal suatip, kən mənig min kotuwa moaton rəkis.

⁵Kən neen komotisas-pən əpəh e niki kəpiel, kən motəwiə uəhai əm məto-inu nisip noan məsin.

⁶Kən nian nərauiə təhg ilat kən kotauke-auke motamis, məto-inu nokilat təməseiuiəu pıkən.

⁷Kən neen kəmotisas-pən e niki nolkosik. Nian kəmotəwiə məto nolkosik tətəht-əsin ilat kən mətatu-atu-pən elat, kən kotəwiə rat kən məsotoeən.

⁸Kən neen min kəmotisas-pən e nəptən wir, kən motəwiə wir motol iahgin, kən motoe-in noalat, neen noalat tate, neen noalat sikiste, neen noalat wanhanrit.”

⁹Kən Iesu təmatig mən-ipən min kəm ilat məmə, “Etəm matəlgin tatig, təwir məmə in otətəlig-in wir kən mitun nəghatən min u.”

Netəmim min rəha Iesu kotəmə otən-tu nıpəti nimaa nəghatən u

(Mat 13:10-17; Luk 8:9-10)

¹⁰Nian Iesu ne kəmotan pisin əm ilat rəhan netəmim tuelef ne netəm kotuarisig-in, kən kotətapəh ron o nuəhən nimaa nəghatən min.

¹¹Kən Iesu təmən-ipən kəm ilat məmə, “Itəmat un, Uhgın tatən-ipinə nəghatən anion rəhan kəm itəmat məmə in tatuwa məmə otərəməərə e rəhan min netəmim. Məto netəm min u laihluə min, kotəto əm nəghatən rəha Uhgın e nuəhən nimaa nəghatən.

¹²Nolən u tol min-nəhlan məmə, ‘Kotarəplan pap mətə kəsotehmən, moatəto pap, mətə kəsotitunən, kən mətə-inu rəhalat-kapə tiəkis, kən ko kəpotitəlig motapəs rəhalat təfagə rat, məmə Uhgın otos-irəkis rəhalat təfagə rat.’”

Iesu təmən-iarəp nīpəti nuəhən nimaa nəghatən

(Mat 13:18-23; Luk 8:11-15)

¹³Kən Iesu təmən-ipən kəm ilat məmə, “?Okəmə naka itəmat nəkotəruru əh nuəhən nimaa nəghatən u? ?Itəmat nakotəmə onəkotahro motitun min nīpəti nuəhən nimaa nəghatən pisin pisin min rafin? Otətəlig-in wir-tu məmə nəkotitun.

¹⁴“Nīpəti nuəhən nimaa nəghatən e nīkutin natimnat əh tahmen əm e nəghatən rəha Uhgın itəm katən-iarəp kəm netəmim, kən nisip tahmen e niki netəmim.

¹⁵Netəmim neen koatəto, mətə tahmen əm e nīkutin natimnat u tatisas-pən e suatip. Nian koatəto nəghatən rəha Uhgın, mətə Setan tuwa mos-irəkis ueiuəhai əm olat.

¹⁶⁻¹⁷Kən neen koatəto, mətə tahmen əm e nīkutin natimnat un tatisas-pən e niki kəpiel nokilat təseiuiu pikən. Nian koatəto nəghatən rəha Uhgın, koatos ueiuəhai əm e nagienən, mətə təsatigən tuwəh e nīkilat. Nian koatatig rat, o netəmim koatol tərət kəm ilat o nəghatən rəha Uhgın, kən koatəme ueiuəhai əm e rəhalat nəmegəhən.

¹⁸Netəmim neen min koatəto, mətə tahmen əm e nīkutin natimnat u tatisas-pən e niki nolkosik. Nian koatəto nəghatən rəha Uhgın,

¹⁹mətə rəhalat nətəligən tatuwin pik o natimnat rəha nətueintən, kən ilat kotolkeike məmə rəhalat nautə ne natimnat wir min otepət. Natimnat min u kotahmen e nolkosik tətəht e nīkilat, mol kotəpou-in nolən nəghatən rəha Uhgın, kən məsotəe-inən noalat.

²⁰Kən neen min koatəto, mətə tahmen e nīkutin natimnat u tatisas-pən e nəptən wir. Nian koatəto nəghatən rəha Uhgın, kotos e nīkilat pahrien, kən motəe-in noalat, neen tate, neen sikiste, kən neen wan-hanrit.”

Lait u itəm kəməfətain

(Luk 8:16-18)

²¹Kən Iesu təmən-ipən kəm ilat məmə, “?Pah tətasiəpən e lait kən mətaii-pən e pesin, o tatəhtu-pən e nīpəg pet? !Kəp! Kəsolən mihin. Nian nakotasiepən e lait, kən motətu-pər e tepil məmə netəmim okotehm nat lan.

²²Nat katəfətain okəike kepik, kən ne nat tatəhluaig otəkəike miet-pa ikin təhag-əhag ikin.

²³Etəm matəlgin tatig, təwir məmə in otətəlig-in wir kən mitun nəghatən min u.”

²⁴Kən matig mən-ipən min kəm ilat məmə, “Otətəlig-in wir-tu. Etəm u tatəto rəhak nəghatən məto təsətəu-pənən, okol təsitun wir minən. Məto etəm un tatəto matətəu-pən, in otitun tepət məsin min.

²⁵Tol nəhlan məto-inu, etəm u itəm rəhan əh-ikin nitunən, kən in tatətəu-pən, kən Uhgīn otos-ipən min nitunən kəm in, kən rəhan nitunən in otepət pik. Məto etəm u itəm rəhan nitunən tikə, Uhgīn otos-irəkis rafin rəhan nitunən itəm nikin təht məmə in tatos.”

Nuəhən nimaa nəghatən e nisən nikutin natimnat

²⁶Kən Iesu təmən min məmə, “Nərəməərəən rəha Uhgīn tahmen e suah kit təmis nikutin natimnat əpəh e rəhan nasumən.

²⁷⁻²⁸Lapin min tuwin mətapil, kən e nərauiəgən min tuwin maliwək mətan, kən məsol minən nat kit lan ne, məto-inu nisip əm tatos-ipən niamitəən kəm in məmə otoe-in noan. Məto nikutin nat un tinəwiə muwin minol iahgin, məto suah un təruru məmə təmahro min-nulan məwiə. Kən təmərgət mol iahgin, kən mol-pən nimalin, kən moe matuwīn matuwīn, kən minimətə.

²⁹Kən nian tinimətə, e nian əm əh inəh, suah apon tuwin miləs rəhan nisa muwin matəte rəkis matəulək-in, məto-inu nian ətuatip rəhan tinuwa.”

Nuəhən nimaa nəghatən e nikuti mastat

(Mat 13:31-32; Luk 13:18-19)

³⁰Kən Iesu təmən min məmə, “?Nərəmərən rəha Uhgın tahro min-nulan?
?Karmə ekən naka məmə tahmen lan?”

³¹In tahmen e nikuti mastat. Mastat un in nig kit nikutin netin, netin, netin.
In təkəku e nikuti nig min rafin.

³²Məto nian kəməfe, kən təwiə mol iahgin maprəkis-in nig min itəm katəfe e
nasumən, mol nelmin iahgin min, kən mənig ilis min kotuwa motol-pən niag-
iagilat huə e tikəmkəmən.”

Iesu təmatəgətun netəmim e nuəhən nimaa nəghatən

(Mat 13:34-35)

³³Iesu təmatəgətun mihin nəhlan netəmim e nuəhən nimaa nəghatən tepət,
məto təmatən-ipən əm tahmen məmə okotitun.

³⁴In təmatəgətun əm netəmim e nuəhən nimaa nəghatən min əh tepət. Məto
nian kotan pisin əm ilat rəhan min netəmim, kən tatən-iarəp nıpəti nuəhən
nimaa nəghatən kəm ilat.

Iesu təmən-iəhau nimətag asol ne nəhau ne

(Mat 8:23-27; Luk 8:22-25)

³⁵Tinehnaipən, kən Iesu təmən-ipən kəm rəhan min netəmim məmə, “Pəs-tu
kotuwın-tu əpəh entənipən-pən e lek u.”

³⁶Kən kəmotapəs netəmim, kən rəhan min netəmim kəmotuwın e pot məto
Iesu tınəmuwın rəkis matəpələh. Kən kəmotiləs Iesu e pot moatuwın ilat pot
neen min kotuarisig-in ilat.

³⁷Kəmoatuwın əmun nimətag asol kit nahgin-nahgin tahmen əm e nalip
təmuwa. Kən peau-peau asol min kotoralkin-pən əpəh e nıpəgnoa pot, kən
nəhau tinatər-pən e pot, kən pot natol o namnimən.

³⁸Məto Iesu əpəh uarisig tətəpəl əlu-alu matauloga-pən e pelo kit. Kən rəhan
min netəmim kəmotaiu motuwa motəhgaiir lan, motəmə, “!Ei, İəgətun!
!Tahro nikim təsəhtən itimat ne, iuəhkir əm ekotimis!”

³⁹Kən Iesu təmaiir mətul matən-iəhau nimətag ne nəhau məmə, “!Nahmen! !Uameg-ta!” Kən nimətag təmuraħl nelmin, kən peau-peau asol min apon kəmotikə, kən təməməlinu təməməlinu.

⁴⁰Kən Iesu təmən-ipən kəm rəhan min netəmim məmə, “?Tahro nakotəgin pik nəhlan? Okəmə naka rəhatəmat nahatətəən tikə əh lak.”

⁴¹Məto rəhan min netəmim kinotəgin pik, kən motən-ipən kəm ilat min məmə, “!Ei nəman! ?Etəmim naka u? Nat əpnarın nimətag ne nəhau, məto ilau kətioal nəwian.”

Mak 5

Iesu təməhg-iarəp narmin rat e suah kit

(Mat 8:28-34; Luk 8:26-39)

¹Iesu ne rəhan min netəmim kəmotuwın motuwar əpəh entənipən-pən e Lek Kalili, əpəh ima netəm Kerasa.

²Nian Iesu təmiet e pot, kən məplan suah kit təmisi-pən əpəh e nipəg kəpiel min, ikin katitənim netəmim ikin. Suah un narmin rat tətətig lan.

³Suah un tətətig əm əpəh e suwit, okol kəsaskəlimən, kən kəruru min nəlisən e nol o sen.

⁴Nian tətət kotəlis nelmin ne nelkin ne e sen. Məto nian rafin tateatip-eatip sen, kən matoratip-oratip sen e nelmin ne nelkin ne, kən məsanən pik məsahmen-inən suah kit məmə otaskəlim.

⁵Kən lapin ne e nərauiəgən min ne nian rafin, in tətan əpəh e suwit, ne əpəh e nitot min, in pisin əm, mətagət əfəməh, kən matəte atip əm in e kəpiel asilə min.

⁶Nian suah un təmasipən-in Iesu əpəh isəu tatuwa əh, kən təmaiu muwin meiuaiu misin-pən nulin ron.

⁷⁻⁸Kən mətagət əfəməh məmə, “!Iesu, ik Nəti Uhgin Ilis Agin! ?Nəmuwa məmə onakahro io?” Məto Iesu təmə, “!Ik narmin rat, iet e suah un!” Məto narmin rat apon təmə, “!Ekateasiə-in e nərgi Uhgin məmə onakəsələn nalpinən kəm io!”

⁹Kən Iesu tēmətapəh ron məmə, “?Ik nərgəm pah?” Məto təmə, “Nərgək u, Nimanin Tepət, məto-inu itimat tepət.”

¹⁰Kən kəmotən-ipən əskasik kəm Iesu məmə otəsahl-iarəpən ilat əh-ikin əh.

¹¹Ikin əh, pikəs min tepət tepət kotalu əpəh e nikali nitot un.

¹²Kən narmin rat min apon kəmotən-ipən kəm Iesu məmə, “Kəsi, ahl-ipən-tu itimat ekotuwın o pikəs min əpəh, megəhan-in itimat ekotuwın motatig əpəh elat”

¹³Kən Iesu təmegəhan-in ilat məmə okotuwın, kən narmin rat min apon kəmotiet e suah apon motuwın əpəh e pikəs min. Kən pikəs min un kotahmen-in tu-taosan, kəmotaiu motuwın əpəh ikin təkul-əkul ikin, kən motiwig-pən əpəh ləhau e nəhau un motamnım.

¹⁴Kən netəmim itəm kəmotagwən pikəs min un, kəmotaiu motuwın motən-iarəp natun kəm netəmim min əpəh e taon rəhalat, kən motən tuwın mapəkol əpəh latuənu min. Kən netəmim tepət kəmotuwa məmə okotəplan-tu nat un məmə kəmahrol min-nulan.

¹⁵Nian kəmotuwa o Iesu, kən motəplan suah un narmin rat min kəmotatig lan aupən, tinapəs nalmələn kən minuwın e natımnat matəpələh, kən narmilat təmiwig ron kən motəgin.

¹⁶Kən netəm min u kəmotehm nat ətuatip e niganəmtilat kəmotamnus nat un kəmotehm Iesu təmol e suah un ne pikəs min kəm ilat min neen.

¹⁷Məto netəm min u e nitən un kəmotən-ipən əskasik kəm Iesu məmə otatuwın məsətulən əh iməlat ikin.

¹⁸Kən nian Iesu tinatitəlig-pən min məmə otuwın e pot, məto suah un narmin rat min kəmotatig lan, təmolkeike pik məmə otuwın ilat Iesu ne, kən matən-ipən kəm Iesu məmə, “Egəhan-in io, pəs ekimnə kitat min itəmat.”

¹⁹Məto Iesu təməsegəhan-inən, məto təmən-ipən kəm in məmə, “İtəlig-pən imam ikin, kən mamnus kəm netəm imam ikin nat naka itəm Uhgın ilis pik təmol kəm ik, kən məmə in təmasəkitun ik.”

²⁰Kən təmuwin əpəh ikin Tekapolis matən-iarəp natimnat itəm Iesu təmol kəm in. Kən nian netəmim kəmotəto, kən kəmotaut pik ron.

Pətagwəhl kit itəm tatimis ne pətan əkəku kit itəm təmimis

(Mat 9:18-26; Luk 8:40-56)

²¹Kən Iesu ne kəmotuwin min e pot motitəlig-pən entənipən-pa e lek, mətə nimanin netəmim kəmotuwa ron motitəlau in əpəh e nikalkal lek.

²²Kən suah kit, nərgin u Jaeras, in etəm-iasol kit rəha nimə rəha nuəfiminən, təməplan Iesu kən təmuwa misin-pən nulin ron.

²³Kən təmatətapəh o Iesu matəkəike kəm in o nasituən məmə, “Rəhak pətan əkəku tatimis pik otəsuwəhən timis. !Awi, wa-tu kian nəkələhəu-pən nelməm lan pəs təwir məmegəh!”

²⁴Kən Iesu təmətəu-pən suah un mətian, kən nimanin netəmim tepət kəmotuarisig-in kitəlau lan katiləs-pikən-ləs-pikən.

²⁵Kən pətan kit təmuwa o Iesu itəm tatos nimisən rəhalat nipitan nian rafin əm, minos nup tuelef.

²⁶Kən təmuwin məplan tokita tepət, kən mərakin rafin rəhan məni elat, mətə wək rəhalat kəmotol tətə pik nahməən. Mətə rəhan nimisən təməseiuaiuən, in təmər məsin min.

²⁷⁻²⁸In təmətə namnusən e Iesu, kən nikin təməht məmə, “Okəmə ekek əm rəhan kot, kən rəhak nimisən otol namnun.” Kən tol nəhlan, təmuwa maliwək muarisig-in ilat, misi-pən e məntaa Iesu ikin, kən meə-pən mek rəhan kot.

²⁹Nian təkək kot rəha Iesu nəhlan, kən roiu min əm rəhan nimisən təmətul, kən təmətə əm e nipətin məmə in tinəwir.

³⁰Kən roiu min əm, Iesu təmətə məmə nəsanənən məsin təmiet lan, kən təmeirair matətapəh məmə, “?Pah təkək rəhak kot?”

³¹Kən mətə rəhan min netəmim kotəmə, “Ei, əplan-tu. Netəmim koatiləs-pikən-ləs-pikən pik ik. ?Tahro nakatən nulan məmə, ‘pah təkək io?’”

³²Mətə Iesu təmategəs-in məmə otehm-tu məmə pah təkək.

³³Kən əmun pətan apon tinitun məmə nian in təmek kot rəha Iesu, rəhan nimisən tinikə. Tol nəhlan, minatəgin mətasiəp-asiəp muwa meiuaiu misin-pən nulin o Iesu matən-ipən natimnat rafin kəm in.

³⁴Kən Iesu təmən-ipən kəm in məmə, “Nətik pətan, e rəham nahatətəən, ninuwa minəwir. Kən atuwin, pəs nəməlinuən rəha Uhgın tətətig ron ik. !Rəham nimisən tinikə!”

³⁵Nian Iesu təmatəghat əh kəm pətan un, kən netəmim neen kəmotisi-pən əpəh ima Jaeras ikin motuwa motən-ipən kəm Jaeras məmə, “Rəham pətan əkəku tinimis rəkis. Əsəlikiamtəən iəgətun.”

³⁶Məto Iesu təməsətəlig-inən rəhalat nəghatən, kən mən-ipən kəm Jaeras məmə, “Əsəginən, məsolən nikim tərət. Ahatətə əm lak.”

³⁷Kən Iesu təmən-iəhau netəmim məmə okəsotuarisig-inən ilau, kən mit əm Pita ne Jemes ne pian Jon motuwin.

³⁸Kən kəmotuwın əpəh ima Jaeras ikin motəplan netəmim tepət kəmotuwa motasək moatəun-əun.

³⁹Kən Iesu təmuwin əpəh imə mən-ipən kəm ilat məmə, “?Nakotagət pik nulan o naka? ?Kən motasək pik o naka? Pətan əkəku u təsimisən, tətəpil əm.”

⁴⁰Kən netəmim kəmotalah-əmnu. Məto Iesu tahl-iarəp ilat məmə okotiet motuwın əpəh ihluə. Kən mit əm rəhan etəmim miləhal ne mama ne tata rəha pətan əkəku un motuwın əpəh pətan əkəku un tatəməhl ikin.

⁴¹Kən Iesu təmos nelmin, mən e rəhalat nəghatən məmə, “*Talita kum,*” nıpəti nəghatən un təmə, “!Pətan əkəku, iatən-ipinə kəm ik məmə onakətul!”

⁴²Kən roiu min əm, pətan əkəku apon təmətul minataliwək. (Pətan əkəku un tinos nup tuelef.) Nian netəmim kəmotəplan nat un Iesu təmol, kən narmilat təmiwig pik ron.

⁴³Kən Iesu təmən-ipən əskasik kəm netəm min un məmə, “Onakəsotən-iarəpən nat un kəm suah kit.” Kən matig mən-ipən min kəm ilat məmə okotos-ipən nagwənən kit kəm pətan əkəku un tun.

Mak 6

Netəm Nasaret kəməsotisiai-inən Iesu

(Mat 13:53-58; Luk 4:16-30)

¹Iesu təmiet ikin-un kən rəhan min netəmim kəmotətəu-pən motuwın əpəh iman ikin.

²Kən e nian rəha Sapat, Iesu tuwın əpəh e nimə rəha nuəfiminən matəgətun netəmim. Kən netəmim tepət itəm kəmotəto rəhan nəghatən, kəmotaut pİK ron motəmə, “?Ei nəman, kəruru məmə suah əpəh təməmİK hiə natimnat min əpəh? ?Kəruru məmə təmahrenatig nəhlan? ?O kəruru məmə təmahrol nəhlan matol nat pİspİs min əpəh?”

³Kitat kotİtun əm məmə suah əh iol əm nimə. In netİ Meri, pia Jemes, Joses, Jutas ne Saimon. Kən kitat rəhan kaka min kotatig.” Kən nİkilat təsagienən ron kən motəuhlin məntaalat ron.

⁴Məto Iesu təmə, “Ien rəha Uhgın katİsİai-in pİK ikin min rafin. Məto rəhan min əm, ne netəm iman ikin kəsotisiai-inən.”

⁵Kən ikin əh, okol təsolən nat pİspİs kit ikin, məto rəhan əmun, titun nələhəu-pənən nelmin e netəm koatimis neen, kən kotəmegəh min.

⁶Kən Iesu narmin təmiwig pİK o netəm iman ikin məto-inu kəsotolkeikeən məmə okotən nİpahrienən lan. Kən təmaliwək muwın latuənu min rafin, matəgətun netəmim.

Iesu təmahI-ipən rəhan netəm tuelef məmə okotuwin e nitən min

(Mat 10:5-15; Luk 9:1-6)

⁷Kən matig maun-in min rəhan netəm tuelef kotuwa ron, kən mahl-ipən ilat keiu-keiu. Təmos-ipən nəsanənən kəm ilat o nəhg-iarəpən narmin rat min e netəmim.

⁸Kən mən-ipən nəghatən u kəm ilat məmә, “Onəkəsotosən nat kit e rəhatəmat naliwəkən, məto onəkotos əm kasikin rəhatəmat. Onəsotosən mənı kit e paos rəhatəmat, kən məsotosən pıret, o kətim, o nat kit.

⁹Onəkotuwın e put, məto onəsotosən sot kəiu.

¹⁰Okəmә onəkotuwın əpəh ima suah kit ikin, kən otapıl əm e rəhan nimə motatig kətatig kətoarus motiet latuənu əh.

¹¹Kən okəmә onəkotuwın e latuənu kit, məto netənim neen kəsotolkeikeən məmә okotit itəmat nakotuwın e rəhalat nıpəgnoa nimə, o kəsotətəlig-inən rəhatəmat nəghatən, kən nian nəkoatiet e rəhalat latuənu, nəkotəkəike motohapıspıs rəkis nısp e nelkitəmat məmә ilat okotitun məmә nəmotəuhlin-pən məntaatəmat olat.”

¹²Kən kəmotiet motuwın motən-ipən kəm netənim məmә okotəuhlin nətəligən rəhalat, motapəs pahrien nolən rat min, kən motuwın o Uhgın.

¹³Kən motəhg-iarəp narmin rat min tepət e netənim, kən motol-pən oel e netəm min u koatimis, kən motol-wır ilat.

Kig Herot Antipas təmən Jon Baptais məmә tinəmegəh min

(Mat 14:1-2; Luk 9:7-9)

¹⁴Kən Kig Herot Antipas təməto nəghatən rəha Iesu tinuwın minapakol e nitən min rafin. Kən netənim neen kotəmә in Jon Baptais əpəh tinaiir-pa min mol tatos nəsanənən o nolən nat pıspıs min.

¹⁵Məto netənim neen min kotəmә in Elaija, neen min kotəmә ien kit rəha Uhgın məto tahmen e ien min rəha Uhgın aupən.

¹⁶Məto Kig Herot Antipas təməto, kən məmә, “Jon Baptais əpəh emətatıp rəkis rəhn-kapə, məto tinəmegəh min.”

Nolən itəm Kig Herot Antipas təmoamnu Jon Baptais lan

(Mat 14:3-12; Luk 3:19-20)

¹⁷⁻¹⁹Kig Herot Antipas təmən nəhlan məto-inu in təmol nat kit təsahmenən. Pian Filip təmatit pətan kit nərgın un Herotias mioal marıt, kən Kig Herot Antipas tit-irəkis pətan un ron mioal marıt. Kən Jon təmatən-ipən kəm in

məmə, “Nakatərəkin Lou. Təsahmenən məmə onakit pətan rəha piam.” Kən Herotias təməto nəghatən un kən metəhau Jon ron, kən molkeike məmə okohamnu, məto kəp. Kig Herot Antipas təmolkeike məmə otol rəhan pətaguihl nikin tagien, kən mahl-ipən rəhan min netəmim kotuwīn motaskəlīm Jon kəlis ətain, kən kiləs kan kiləs-ipən e kalapus.

²⁰Məto Kig Herot Antipas tatisiai-in Jon mitun məmə in etəm asim, kən in etəm ətuatip kit mol tatehm wir kən məsohamnuən. Nian tepət təto nəghatən rəha Jon, kən tinəruru əfəməh, məto tolkeike məmə otatətəlig-in.

²¹Matuwīn matuwīn Herotias tinos rəhn matip Jon e nian kəmatol lafet lan rəha Kig Herot Antipas e nian təmaiir lan. Kig təmaun-in rafin netəm-iasol rəhan min, ne netəm-iasol rəha rəhan mopael min, ne netəm-iasol rəha netəm Kalili, məmə okotuwa motehm motagwən.

²²Kən e nian əh, pətan əkəku un neti Herotias təmuwa imə matol tanis e niganəmtilat. Kəmotəplan təmol tanis kən nikilat təmagien pik ron. Kən kig apən təmən-ipən kəm pətan əkəku apən məmə, “Okəmə nakolkeike naka, nakətapəh-in ron io, kən ekos-ipinə kəm ik.”

²³In təmən-iəkis kən mos noanawil ron məmə, “Nat naka nakolkeike kən measiə-in ron io, ekos-ipinə. Nat əpnaripin okəmə iahgin tahmen e nipilga rəhak natimnat, məto ekəike mos-ipinə.”

²⁴Kən pətan əkəku apən təmuwīn əpəh ihluə matətapəh o rəhan mama məmə, “?Mama, oekeasiə-in naka o kig?” Məto rəhan mama təmə, “Uwīn measiə-in rəhn-kapə Jon Baptais.”

²⁵Kən pətan əkəku apən təmaiu ueiuəhai əm muwīn əpəh imə o kig kən məmə, “Ekolkeike məmə onakiləs-ipa rəhn-kapə Jon Baptais u-roiu agin, kəmələhəu-pən e pilet kit.”

²⁶Kən nat un təmol kig nikin tahmə pik, məto okol təsapəsən, məto-inu tinəmos rəkis noanawil e niganəmti netəmim u kəmotuwa o lafet.

²⁷Kən mahl-ipən rəhan kit mopael məmə otaiu əm muwin miləs rəhn-kapə Jon Baptais muwa. Kən mopael apon təmuwin əpəh e kalapus kən mətətip-rəkis rəhn-kapə Jon Baptais,

²⁸kən mələhəu-pən e pilet kit miləs muwa, kən miləs-ipən kəm pətan əkəku apon, kən tiləs muwin kəm rəhan mama.

²⁹Nian netəmim min rəha Jon Baptais kəmotəto netəmim kəmotamnus nat un kəmol e Jon, kən kotuwa motiləs nipətin motuwin motitənim e nipəg kəpiel rəha nolən suwit.

Netəm tuelef rəha Iesu kəmotitəlig-pa min ron

(Luk 9:10)

³⁰Kən aposol min rəha Iesu kəmotitəlig-pa min ron, kən motən-ipən natimnat rafin itəm kəmotol, ne nəghatən min itəm kəmotəgətun netəmim lan.

³¹Məto netəmim tepət koatuwa moatuwin moatiet moatuwin, kən Iesu ne rəhan min netəmim kinotəruru nagwənən ne namegən ne. Kən Iesu tən-ipən kəm ilat məmə, “Pəs-tu kotuwin-tu əpəh ikin kit netəmim kotikə ikin, kən nakotameg məsin.”

³²Kən ilat əm motuwin e pot kit minotuwin əpəh netəmim kotikə ikin.

Iesu təmagwən nəman faif-taosan

(Mat 14:13-21; Luk 9:11-17; Jon 6:1-14)

³³Məto netəmim tepət kəmotəplan ilat nian kəmotiet, kən motitun ilat. Kən kəmotiet e latuənu min motaiu kaupən-in ilat, motuwin əpəh koatuwin ikin.

³⁴Nian Iesu təmuwar e pot məplan nimanin netəmim tepət kinəmotuwa rəkis, kən təmasəkitun ilat, məto-inu kotahmen əm e sipsip min itəm etəmim tikə o nehmən ilat. Kən təmətul matəgətun ilat e natimnat tepət.

³⁵Tinəhnaipən, kən netəmim rəha Iesu kəmotuwa motən-ipən kəm in məmə, “Tinətalugin, kən ikin-u kəsətigən ikin.

³⁶Təwir məmə onakahl-ipən-ta netəmim koatuwin əpəh e latuənu min, ne əpəh ikin min, məmə okotos-nəmtin nigilat nagwənən.”

³⁷Məto in təmən-ipən kəm ilat məmə, “Kəp, itəməhal əm. Nakəhlagwən netəm mīn əh.” Məto kotəmə, “!Naka! ?Nakəmə oekotuwin motəra kin mənī asol agin u tu-hanrit tenarius o nosən pīret lan o nagwənən nīmanin netəmim u?”

³⁸Məto Iesu təmə, “?Nakoatos pīret kuwəh? Otuwin motehm.” Kəmotuwin motehm motəmə, “Pīret faif, kən nəm kəiu.”

³⁹Kən Iesu tən-ipən kəm rəhan mīn netəmim mə okotol netəmim kotəpələh e manuwihl amiəmitə fifti fifti ne uan-hanrit uan-hanrit,

⁴⁰kən kəmotəpələh nəhlan fifti fifti ne uan-hanrit uan-hanrit.

⁴¹Kən Iesu təmos pīret faif ne nəm mil u kəiu, kən mətag-pər əpəh e neai məfak ron, kən məmkas pīret un məmki-pən kəm rəhan mīn netəmim məmə okotoor kəlin kəm netəmim. Kən matig mos mīn nəm mil u kəiu məmkas moor kəm netəmim.

⁴²Kən netəmim rafin kəmotun nərpiilat tasis,

⁴³kən motapəs nīmismisi pīret un ne nəm mil un, kən netəmim mīn rəha Iesu kotaii-pən e kətim asol tuelef kotər wir.

⁴⁴Kən netəm mīn u kəmotagwən, nəman elat kotahmen e faif-taosan.

Iesu təmaliwək e nətuei nəhau

(Mat 14:22-33; Jon 6:15-21)

⁴⁵Kən roiu agin-əh mīn, Iesu təmən-ipən kəm rəhan mīn netəmim məmə okotiləs pot kit motaupən motuwin entənipən-pən əpəh ikin kit nərgin u Petsaeta, məto in otatig mahl-ipən paupən netəmim koatuwin iməlat mīn ikin-u panuwin.

⁴⁶Nian tinauiatipin rəkis netəmim, mahl-ipən ilat koatuwin, kən muwin əpəh e nitot məmə otəfak.

⁴⁷Kən tinətalugin, pot tinuwin əpəh ilugin ətuatip əpəh e lek, məto Iesu tətən pişin əm əpəh ipar.

⁴⁸Kən məplan ilat kotasuə kitasuə məto kinotərou məto-inu nımətag tatoh ilat. Kən tınatian-ian, kən taliwək e nətuei nəhau matuwa. Təmaliwək muwa, iuəhkir əm taprəkis-in ilat.

⁴⁹⁻⁵⁰Kən nian netəmim min rəha Iesu kəmotəplan taliwək e nətuei nəhau matuwa, kən nıkilat təht məmə narmi suah kit. Kən ilat rafin kəmotəplan, kən motəgin katearig əfəməh. Məto roiu agin-əh əm, Iesu təmən-ipən kəm ilat məmə, “!Ei, nıkitəmat tətul məha-məha. Io u inu. Sotəginən!”

⁵¹Kən muwin e pot məplan ilat moatəpələh, kən nımətag təmurahl nelmin, kən kəmotaut pik ron,

⁵²məto-inu rəhalat-kapə tiəkis. Kəmotəplan pap Iesu təmagwən netəmim tepət e pıret noan məsin əm, məto ilat kotəruru əh məmə in pah.

Iesu təmol-wir netəm koatimis əpəh Kenesaret

(Mat 14:34-36)

⁵³Kəmotuwın entənıpən-pən motuwar əpəh ikin kit nərgin u Kenesaret, kən motietain pot ikin.

⁵⁴Nian kəmotuwar ikin əh, netəm ikin kəmotıtun ueiuəhai əm məmə in Iesu.

⁵⁵Kən kəmotaiu motuwın əpəh latuənu min moatən-ipən kəm netəmim. Kən nian kotəto məmə Iesu əh-ikin əh, koatəmik netəm koatimis e rəhalat pet motuwa ron.

⁵⁶Kən ikin min rafin Iesu tatuwin-pən ikin e latuənu əlkələh, ne latuənu asol min, ne ikin min rafin titəlau, netəmim kotəmik netəm koatimis motiet katəlin əm ilat əpəh maket ikin. Kən kəmoatəkəike katən-ipən kəm Iesu məmə otegəhan-in ilat kotek əm nıpəgnəmti rəhan kot. Kən netəmim rafin u kəmotek rəhan kot, kən motəwir e rəhalat nımisən.

Mak 7

Netəm-iasol min kəmotetəhau Iesu o kastom rəhalat

(Mat 15:1-9)

¹Kən Farisi min ne iəgətun neen rəha Lou, kəmotisi-pən əpəh Jerusalem, motuwa moatəpələh ilat Iesu.

²Kən kəmotəplan məmə netənim min rəha Iesu kəmotagwən kən məsotaikuas wirən e nelmilat e nolən rəha Farisi min.

³Farisi min, ne netəm Isrel tepət, kəmoatətəu-pən ətuatip kastom rəha tipilat nuwəh min. Okəmə kəsotaikuas wirən e nelmilat un, kən kəsotagwənən.

⁴Kən nian koatisi-pən e maket moatuwa, məsotagwənən pitən, motaupən kaikuas e nelmilat kən panotagwən. Kən moatətəu-pən natimnat tepət min nəhlan itəm kəmos o tipilat nuwəh min. Kən kastom ətuatip əh-ikin rəha naikuasən e sospən, ne panikin, ne pesin u kəmol e iaen.

⁵Kən inu Farisi min ne iəgətun min rəha Lou kotətapəh o Iesu məmə, “?Tahro rəham min netənim kəsotətəu-pənən kastom rəha tipitat nuwəh min? ?Tahro kəsotaupənən motaikuas pitən e nelmilat u panotagwən?”

⁶Məto Iesu təmən-ipən kəm ilat məmə, “Aupən Aesea təmən-iarəp nəghatən rəha Uhgın kən məht ətuatip itəmat lan u rəhatəmat nənən təwir, məto nikitəmat tamkimik. In təmən məmə, ‘Uhgın təmə netəm min u kotisiai-in io e nəghatən əm rəhalat, məto nikilat tətən-pən əh əpəh isəu.

⁷Motəfak kəm io o nat ərnapin əm məto-inu ilat kotəgətun netənim e lou itəm etənim əm təmol motəmə lou rəha Uhgın, məto kəp.”

⁸Kən Iesu təmən min kəm ilat məmə, “Itəmat nakotapəs Lou rəha Uhgın moatətəu-pən əm kastom rəha etənim.”

⁹Kən mən-ipən kəm ilat məmə, “Nakotausit pik o nolən apon rəhatəmat məmə nakotapəs Lou rəha Uhgın kən motətəu-pən atip əm kastom rəhatəmat.

¹⁰Moses təmən məmə, ‘Onakisiai-in rəham tata ne mama. Okəmə suah kit tatəghat rat e rəhan tata ne mama, okəike kohamnu.’

¹¹Məto itəmat nakotən məmə, suah kit okəmə tapəs nasituən e rəhan tata ne mama kən mən-ipən kəm ilau məmə, ‘Rəhak u nat u ekəmə ekasitu etəlau lan, məto emələhəu əm məmə rəha Uhgın. Kən nat katos-ipən kəm Uhgın okol kəsol minən nat kit lan.’

¹²Kən motatig moatən-iəhau min o nasituən e rəhan tata ne mama.

¹³Məto e nolən əh, nakotəgətun netəmim e rəhatəmat kastom motol nəghatən rəha Uhgın tatol əm nat əpnapın lan. Kən natimnat min tepət min nəhlan itəmat nəkoatol.”

Nat tol netəmim kotərat e niganəmti Uhgın

(Mat 15:10-20)

¹⁴Kən Iesu təmaun-in nımanin netəmim məmə okotuwa iuəhkır ron kən məmə, “Otətəlig-in wır-tu io məmə nəkotıtun.

¹⁵Nat etəmim tatərge təsolən etəmim tamkimik e niganəmti Uhgın, məto nat tatiet e niki etəmim tatol etəmim tamkimik e niganəmti Uhgın.”

¹⁶

¹⁷Nian Iesu təmıet e nımanin netəmim un kən muwın əpəh imə, kən rəhan min netəmim kotətapəh o nıpəti nəghatən min un kəm in.

¹⁸Kən Iesu təmən-ipən kəm ilat məmə, “Okəmə naka itəmat min rəhatəmat-kapə tikə. Onəkotəkəike motıtun məmə natimnat itəm etəmim tatərge in tahmen əm e nat ihluə təsolən etəmim tərət e niganəmti Uhgın.

¹⁹Məto-inu tərge kən təsuwınən e nıkin, məto tatuwın e tıpəin u, kən matiet min.” (E nəghatən əh Iesu təmən-iarəp məmə nagwənən rafın katun təwır e niganəmti Uhgın.)

²⁰Kən məmə, “Məto nat itəm tatiet e niki etəmim, in tol etəmim tətamkimik e niganəmti Uhgın.

²¹Məto-inu niki etəmim tatəht natimnat tərət tepət, ilat u: nıpitan ne nəman ne, koatit anion ilat min; nakləhən; nohamnuən itəm;

²²nakləh-inən pətan rəha suah pısın; naumisən o natimnat; nolən rat min; neıuəən; nolən rəha nit əpnapın əmən nıpitan ne nəman; netetən; nənən nıkal itəm; nausitən; nalmələn.

²³Nolən rat min əh, ilat əh kotisi-pən e niki netəmim kən motol ilat kotamkimik e niganəmti Uhgın.”

Iesu təməhg-iarəp narmin rat e neti pətan kit

(Mat 15:21-28)

²⁴⁻²⁶Kən Iesu tēmiet ikin-un kən məsou pəhap muwin əpəh Fonisia, ima Iaihlua min e nitən rəha Siria, mətatig e nimə kit iuəhkir o taon u Taea, matəhluaig məsolkeikeən məmə netəmim okotitun məmə in tətatig əh-ikin əh, mətə okol təsəhluaigən. Mətə pətan kit əh-ikin, narmin rat tətatig e rəhan pətan əkəku. Pətan un təmaiir ikin əh, kən in təsəfakən, in Iaihlua. (Netəm Isrel kotəmə Iaihlua min kotahmen e kuri.) Nian təmətə natimnat wir min itəm Iesu tatol ilat, kən tasək muwa misin-pən nulin ron məmə otəhg-iarəp narmin rat e rəhan pətan əkəku.

²⁷Mətə Iesu təmə, “Kəpə. Pəs kaupən kagwən nisualkələh. Təsəwirən məmə okərakin-pən nagwənən nigə nisualkələh kəm kuri min.”

²⁸Mətə pətan u təmə, “Nipahrienən etəm-iasol, mətə kuri min koatun əm nimismisi nagwənən nigə nisualkələh itəm kotisas-pən e nipəg tepil.”

²⁹Kən Iesu təmən-ipən ron məmə, “Mətə-inu nəmuhəlpin wir rəhak nəghatən, uwın-tu əpəh imam ikin məplan narmin rat tiniet rəkis e rəham pətan əkəku.”

³⁰Pətan u təmaiu muwin iman latuənu məplan rəhan pətan əkəku tətəpəl-pər wir əm e rəhan pət, kən narmin rat tiniet rəkis lan.

Iesu təmol-wir suah kit matəlgin talu məruru nəghatən

³¹Kən Iesu tēmiet ikin-un ima netəm Taea kən muwin-pən əpəh Saeton matuwın əpəh e nəhau Lek Kalili, mətə təmuwin-pən əpəh Tekapolis ikin.

³²Kən netəmim kəmotit suah kit matəlgin talu kən məruru nəghatən motuwa məmə Iesu otələhəu-pən nelmin lan pəs tətə təwir.

³³Kən Iesu təmit suah un mian əpəh isəu məsin o netəmim, kən miləs-ipən noa nelmin e matəlgin kən magəh nelmin mələhəu-pən e nami suah un.

³⁴Kən masipər əpəh e neai, kən mamegahl ron e rəhan nəghatən məmə, “*!Efata!*” Nipətin təmə, “*!Əwir-ta!*”

³⁵Kən əmun suah un tinatəto nat, kən namin tinəwir minatəghat wir.

³⁶Kən Iesu təmən-iəhau ilat məmə okəsotənən nat un kəm netəmim. Mətə nian Iesu təmatəkəike kəm ilat, kən ilat kəmotəkəike kən-iarəp kəm netəmim.

³⁷Kəmotaut pik ron motəmə, “Natimnat rafin itəm tatol, məto in təwir pik agin. Netəm u matəlgilat talu kinoatəto nat, ne netəm kotəruru nəghatən kinoatəghat.”

Mak 8

Iesu təmagwən netəmim fo-tausan

(Mat 15:32-39)

¹E nian kit min netəmim tepət kəmotuwa min ron, kən məto, nigilat nagwənən tinikə. Kən Iesu təmaun-in rəhan min netəmim kotuwa kən tən-ipən kəm ilat məmə,

²“Nikik tinahmə pik o netəm min əpəh məto-inu, kəmotuarisig-in io minotos rəkis nian kisil, kən roiu əh, nigilat nagwənən tinikə.

³Okəmə ekahl-ipən ilat koatuwin əh-roiu, kən niganəmtilat otapin e suatip, kən sueiuei otoh ilat, məto-inu kəməsotagwənən nuwəh, kən neen kəmotisipən əpəh isəu.”

⁴Kən rəhan min netəmim kəmotətapəh ron məmə, “?Okəmik hiə pīret tahmen-in nagwənən ilat? İkin-u taruən-aruən ikin, netəmim kəsotatigən ikin.”

⁵Kən Iesu təmətapəh olat məmə, “?Nakoatos pīret kuwəh?” Məto kotəmə, “Sepin.”

⁶Kən təmən-ipən kəm netəmim məmə okotəpələh, kən mos pīret un məfak matən-ipən tagkiu ron kəm Uhgın, kən məmkas mos-ipən kəm rəhan min netəmim məmə okotoor kəlin kəm netəmim, kən kəmotol mihin.

⁷Kən kəmos min nəm əlkələh neen ka, kən Iesu təfak ron kən mos-ipən min kəm ilat məmə okotoor kəlin kəm netəmim.

⁸⁻⁹Kən netəm min u Iesu təmagwən ilat kotahmen e fo-tausan, kəmotun nagwənən nərpilat tasis, kən kapəs nımismisi nagwənən, kən kəii-pən e kəpəhau sepın kotər.

¹⁰Kən Iesu tahl-ipən netəmim koatuwin iməlat min ikin. Kən ilat rəhan min netəmim kəmotuwın e pot kan əpəh e nītən Talmanuta.

Farisi min kəmotən məmə okotehm nəmtətin kit

(Mat 16:1-4)

¹¹Kən Farisi min neen kəmotuwa o Iesu moatərgəhəu kəm in motən-ipən kəm in məmə otol-tu nəmtətin asol kit pəs kotitun məmə in təmişipən pahrien o Uhgın, o kəp.

¹²Kən Iesu nikin təmərəu, kən mamegahl ron kən məmə, “?Karmə tahro netəm min u-roiu ne kotəmə okotəplan-tu nəmtətin kit? Məto iatən pahrien kəm itəmat məmə okol kəsölən nəmtətin kit kəm itəmat.”

¹³Kən mapəs ilat motuwın e pot kan əpəh e nikali nəhau lek entənipən-pən.

Is rəha Farisi ne is rəha Kig Herot Antipas

(Mat 16:5-12)

¹⁴Rəhan min netəmim kəmotaluin nəmikən pıret məto kəmos əm kitiəh əm motuwın e pot.

¹⁵Kən Iesu təmatəhag kəm ilat məmə, “Otehm wir itəmat o is rəha Farisi min ne is rəha Herot Antipas.”

¹⁶Kən kəmotən-ipən kəm ilat min məmə, “Tatən nəhlan məto-inu kəməsotəmikən pıret.”

¹⁷Kən məto Iesu tinitun rəhalat nətəligən kən mən məmə, “?Tahro nakoatən nəghatən əh məmə nəməsotəmikən pıret? ?Tahro itəmat nəkəsotehmən əh kən məsotitunən əh? !Rəhatəmat-kapə tiəkis!

¹⁸Nıganəmtitəmat u ikin. ?Tahro nəkəsotehmən nat? Kən matəlgitəmat u ikin. ?Tahro nəkəsotətoən nat? Ekitun məmə okəmə naka ninəmotaluin natimnat itəm kinotuwa rəkis.

¹⁹?Nian emos pıret əh faif məmkas mos-ipən kəm netəmim min əpəh faif-tausan kotun, kən uarisig nəmotaiipən nimismisin e kətim asol kuwəh?” Məto kotəmə, “Tuelef.”

²⁰Kən təmətapəh min olat məmə, “?Kən nian emos pıret əh sepın məmə ekos-ipən kəm netəm min əpəh fo-tausan kotun, kən uarisig nəmotaiipən nimismisin e kətim asol kuwəh?” Məto kotəmə, “Sepın.”

²¹Kən təmatəpəh olat məmə, “?Məto itəmat nəkotəruru əh io?”

Iesu təmol-wir suah kit niganəmtin təpis

²²Kən kəmotuwar əpəh ikin kit katən məmə Petsaeta, kən netəm ikin kəmotit suah kit niganəmtin təməpis motuwa kən kətəsək ahgin Iesu məmə otələhəu-pən nelmin lan.

²³Kən Iesu təmos nelmi suah un mian isəu məsin o latuənu kən tagəh niganəmti suah un kən mələhəu-pən nelmin mil lan, kən mətapəh ron məmə, “?Ninitun nehmən nat o kəp?”

²⁴Məto suah un təmasipər kən məmə, “Ekatəplan netəmim məto kotahmen əm e niğ min məto in əmun kotaliwək.”

²⁵Kən Iesu təmatig mələhəu-pən min nelmin mil e niganəmti suah un, kən tinitun nəplan wirən natimnat minapəs noapoapən.

²⁶Kən Iesu təmah-lipən məmə otatuwin iman ikin məto təmən-iəhau məmə otəsuwın-pənən əh latuənu əh-ikin.

Pita təmən-iarəp məmə Iesu in Mesaea ilouin

(Mat 16:13-20; Luk 9:18-21)

²⁷Kən Iesu ne rəhan min netəmim kəmotiet motəsou pəhap motuwın e latuənu min u iuəhkir o nat əpəh Sisaria Filipae. Nian kəmoatuwin e suatip kən tatəpəh olat məmə, “?Otən-tu məmə netəmim kotəmə pah u io?”

²⁸Məto rəhan min netəmim kotəmə, “Netəmim neen kotəmə ik Jon Baptais. Neen min kotəmə ik Elaija. Neen min kotəmə ik ien kit rəha Uhgın aypən.”

²⁹Kən təmətapəh olat məmə, “?Məto itəmat nakotəmə pah u io?” Kən Pita təmə, “Ik Mesaea ilouin, itəm Uhgın təmən məmə otəpanahl-ipa.”

³⁰Kən Iesu təmən-iəhau əskasik ilat məmə, okəsotən-iarəpən in kəm suah kit.

Iesu təməghat-in rəhan nimisən

(Mat 16:21-23; Luk 9:22)

³¹Kən təmatəgətun ilat kən matən məmə, “Io Neti Etəmim oepənəto nahməən o natimnat tepət. Netəm-iasol rəha netəm Isrel, ne pris asol min, ne iəgətun

min rəha Lou okotetəhau io, kən motohamnu io, məto oekos nian kisil un, kən panəmegəh min.”

³²Təmən wir pap kəm ilat, məto Pita təmit Iesu mian əpəh e nīkali suatip kən matən-iəhau əskasik məmə otəsəghatən nəhlan.

³³Kən məto Iesu təmasipən məplan rəhan min netəmim, kən mən-ipən kəm Pita məmə, “!Ik iərmis Setan asol, agim muwin isəu lak! Rəham nətəligən sənəmə rəha Uhgīn, məto rəha etəmim əm.”

Naulis-inən nən-iarəpən Iesu kəm netəmim

(Mat 16:24-28; Luk 9:22-27)

³⁴Kən Iesu təmaun-in rafin netəmim ne rəhan min netəmim məmə okotuwa ron, kən təmən məmə, “Okəmə suah kit təmə otuarisig-in io, otəkəike maluin atip in, kən mīləs rəhan nig kəməluau muarisig-in io.

³⁵Etəmim itəm tolkeike məmə otosmegəh rəhan nəmegəhən e nətueintən u, kən otakiəh e rəhan nəmegəhən lilin. Məto etəm otimis ron io ne Namnusən Təwir rəhak, in otos nəmegəhən lilin.

³⁶?Okəmə etəmim kit tatos rafin natimnat e nətueintən, məto uarisig lan otimis kən təsosən nəmegəhən lilin, in təmol win e nat kit təwir, o kəp? Kəp.

³⁷Okol suah əh təsos-ipənən nat kit kəm Uhgīn məmə Uhgīn otos-ipən nəmegəhən lilin kəm in.

³⁸“Netəm kotaulis-in nən-iarəpən io ne rəhak nəghatən kəm netəm kotapəs nəfakən motol təfagə rat, kən o nian io Neti Etəmim oekuwa lan, io min oekaulis-in nənən məmə ilat u rəhak min netəmim. O nian əh oekuwa itimat nagelo asim min e nepətən əhag-əhag asol rəha rəhak tata.”

Mak 9

¹Kən Iesu təmən məmə, “Ekatən pahrien kəm itəmat məmə, itəmat neen u nəkoatətul u ikin-u roiu, okol kəsotimisən mətoahgin kotəplan nərəmərən rəha Uhgīn otuwa e nəsanənən asol.”

Nipəti Iesu təmuwa mol pisin

(Mat 17:1-13; Luk 9:28-36)

²Kən nian sikis kinotuwa minotuwin rəkis, kən Iesu tit Pita, Jemes, ne Jon, kən iləhal pisin əm kəhaluarisig-in motuwın əpəh e nitot əfəməh kit, kən ilat pisin əm əh-ikin. Kən kəməhaləplan nıpəti Iesu təmol pisin.

³Rəhan napən təmuwa məruən matipit-ipit, okol suah kit təsaikuasən e niməhan kit tərüən min-nəhlan.

⁴Kən suah miləhal apon kəməhaləplan Elaija ne Moses kəmiaet-arəpa mətəhaləghat iləhal Iesu.

⁵Kən Pita təmən-ipən kəm Iesu məmə, “İəgətun, təwir məmə ekəhaluwa ikin-u. Pəs məhalol makeen kisil, rəham kit, rəha Moses kit, kən rəha Elaija kit.”

⁶Pita tinatəghat ənnapin əm mətə-inu kinəhaləgin pik matəhlasiəp.

⁷Kən napuə təmuwa malpin ilat, kən kəmotətə nəwia suah kit təmisi-pən əpəh e napuə məmə, “Inu netik keike u ekolkeike pik. Onakəhaləkəike məhalətəlig-in in.”

⁸Kən roiu agin-əh min, kəməhaleirair, mətə kinəsəhaləplanən suah mil un, mətə kəməhaləplan əm Iesu tatətul ilat min iləhal.

⁹Nian kəmoateiuaiu e nitot un kan əpəh ləhau, kən Iesu təmən-iəhau əskasik iləhal məmə, “Natimnat un nəməhalehm əpəh ilis e nitot, onəsəhalənən kəm suah kit məhalətoarus-pən io Neti Etəmim oekəmegəh min e nimisən.”

¹⁰Kən iləhal kəməhalisiai-in nəghatən rəha Iesu, mətə kəmatəhalən əm kəm iləhal min məmə, “Nəghatən əh təmən məmə otəmegəh min e nimisən, kəruru məmə nıpətin təmə naka.”

¹¹Kən kəməhalətapəh o Iesu məmə, “?Tahro iəgətun min rəha Lou kotəmə Elaija otəkəike maupən muwa?”

¹²Kən Iesu təmən-ipən kəm iləhal məmə, “Nipahrienən, Elaija otaupən muwa matol-wir min natimnat rafin. ?Mətə tahro Naoa Rəha Uhgın təmən məmə io Neti Etəmim oepənəto nahməən o natimnat tepət, kən netəmim okotəplan io motapəs io?”

¹³Məto ekatən pahrien kəm itəməhal məmə Elaija tinuwa rəkis, kən kəmol nat tərət lan tahmen e Naoa Rəha Uhgin təmən məmə okəpanol mihin.”

Iesu tēməhg-iarəp narmin rat e suakəku kit

(Mat 17:14-21; Luk 9:37-43)

¹⁴Nian kəmotitəlig-pa min, motehm netəmim neen min rəha Iesu, məto nimanin netəmim kəmotitəlau elat, kən iəgətun neen rəha Lou ne netəmim min rəha Iesu kotərgəhəu.

¹⁵Nian netəmim kəmotəplan Iesu, narmilat təmiwig pik ron, kən motaiu ka məmə okotəghat kəm in.

¹⁶Kən Iesu təmətapəh olat məmə, “?Naka əpəh nakotərgəhəu ron itəmat netəm min əpəh?”

¹⁷Məto netəm min u kit təmə, “Iəgətun, io emit netik muwa ron ik məmə onakol-wir, məto-inu narmin rat kit tətətig lan kən mol təruru nəghatən.

¹⁸Kən nian narmin rat apon taskəlim in, kən moh miləs-iəhau morin əpəh e nisip, kən nahuin noan tiet tahmen əm e sop, kən matəgətain nəluin, nipətin tatikimkim. Kən emətapəh o rəham netəmim məmə okotəhg-iarəp narmin rat əpəh lan, məto kotəruru nəhg-iarəpən.”

¹⁹Məto Iesu təmə, “Kəsi, itəmat un netəm roiu ne nakəsotahatətəən lak. Karmə oekatig kitat min itəmat mətoarus-pən nian naka nəpanotahatətə lak. Kən karmə onəghan epanameg etəmat. Enəpou-in itəmat. !Otiləs suakəku un motuwa!”

²⁰Kən kəmotiləs kan o Iesu. Kən narmin rat apon təməplan Iesu kən mol suakəku apon taut nipətin tasiəp-asiəp pik, kən miet morin əpəh ləhau e nisip məsoupəlpəl mətan, kən nahui noan tiet tahmen e sop.

²¹Kən Iesu təmətapəh o rəhan tata məmə, “?Təmöl min-nəhlan minos nup kuwəh?” Məto rəhan tata təmə, “Təmətuoun e nian təmatəkəku mətoarus-pa əh-roiu.

²²Kən nian tepət narmin rat əh toh matiləs-ipən əpəh e nigəm ne nəhau məmə otəhamnu. Okəmə nəkitun nolən, pəs nakasəkitun itimlau masitu etimlau.”

²³Məto Iesu təmə, “?Naka əh, nəghatən u məmə, ‘Okəmə nəkitun nolən’? Uhgın titun nolən natimnat rafin o etəmim itəm tətahatətə lan.”

²⁴Kən roiu agin, tata rəha suakəku un təmagət əfəməh məmə, “Ekətahatətə lam, məto in əmun rəhak nahatətəən təkəku əm, asitu lak məmə rəhak nahatətəən otər mepət.”

²⁵Kən nian Iesu təməplan məmə netəmim neen min kinotuwa iuəhkır ron, kən tən-ipən əskasik kəm narmin rat apın məmə, “Ik narmin rat itəm natol matəlgitəm tətalu kən mol itəm katəruru nəghatən. !Ekatən-ipinə ətuatıp u-roiu məmə onakiet e suakəku un, kən məsuwa minən muwın lan!”

²⁶Kən narmin rat apın təmagət əfəməh mol suakəku apın taut masiəp-asiəp min u iuəhkır agin timis, kən miet lan. Okol nəkəplan məmə tinimis rəkis, kən netəmim tepət kotəmə tinimis.

²⁷Məto Iesu təməa-pən maskəlim nelmin miuw-pər, kən tətul.

²⁸Iesu təmuwın imə, kən ilat pisin əm rəhan min netəmim koatəpələh, kən kotətapəh ron məmə, “?Karmə tahro ekotəruru nəhg-iarəpən narmin rat əpəh?”

²⁹Məto Iesu təmə, “Nəfakən əm titun nəhg-iarəpən narmin rat min əh nəhlan.”

Iesu təmən-iarəp min rəhan nimisən

(Mat 17:22-23; Luk 9:43-45)

³⁰Kən Iesu ne rəhan min netəmim kəmotiet ikin-un kən motuwın-pən əpəh e nitən Kalili ikin, məto Iesu təsolkeikeən məmə okitun məmə in əh-ikin əh.

³¹Təmol nəhlan məto-inu tatəgətun rəhan min netəmim. Təmən məmə, “Io Neti Etəmim, okegəhan-in-pən io kəm netəmim kotohamnu io ekimis. Məto oekos nian kisil u, kən panəmegəh min.”

³²Kən məto rəhan min netəmim kəsotitun wirən rəhan nəghatən, kən nikilat tinəgin o nətapəh-inən nipəti nəghatən rəhan.

?Pah in tepət elat?

(Mat 18:1-5; Luk 9:46-48)

³³Kəmotiet-pa əpəh Kapaneam, kən minoatuwin imə kit. Kən Iesu təmatətəpəh olat məmə, “?Naka əpəh nəmoatən e suatip?”

³⁴Məto kinotəruru nuhalpənən məto-inu, e suatip kəmoatən məmə pah in tərət elat.

³⁵Kən Iesu təməht-iəhau məpələh, kən maun-in rəhan netəm tuelef məmə okotuwa-tu ron, kən tən-ipən kəm ilat məmə, “Etəm tolkeike məmə in oterət e netəmim, in oteike meiuaiu elat kən muwa məmə in iolwək əm kit rəhalat.”

³⁶Kən mīləs suakəku kit muwin məf aupən-in ilat, kən maskəlīm məmə,

³⁷“Kən etəmim itəm tatos e nīkin agien suakəku tahmen e inu, kən tatol e nərgək, kən tahmen əm məmə tatos io e nīkin agien. Kən etəmim itəm tatos io e nīkin agien, kən tahmen əm məmə tatos etəm u itəm təmahl-ipa io.”

Suah kit təmol nat pispis e nərgi Iesu

(Luk 9:49-50)

³⁸Kən Jon təmən-ipən kəm Iesu məmə, “İəgətun emotəplan suah kit tatəhg-iarəp narmīn rat mīn e nərgəm, kən emotən-iəhau məto-inu sənəmə kitat kit.”

³⁹Məto Iesu təmə, “Sotən-iəhauən, məto-inu etəm tatol nat pispis mīn e nərgək, okol təsən uəhaiən nəghatən rat lak.

⁴⁰Etəm itəm sənəmə rəhatat tikimīr, in tolkeike itat.

⁴¹Ekatən pahrien kəm itəmat məmə, okəmə etəm tətəsitə etəmat, məto-inu rəhak u itəmat, suah u otəkəike mos nətouən rəhan, nat əpnarīn in nat əkəku əm tahmen tatos-ipinə nəhau ətəp kəm itəmat nakotənim.”

Nat tol etəmim tatəme e rəhan nəmegəhən

(Mat 18:6-9; Luk 17:1-2)

⁴²Kən Iesu təmatəkəike matən məmə, “Nisualkələh mīn u kotahatətə lak, okəmə suah kit tol kit təme e rəhan nəmegəhən o rəhan nahatətəən, kən suah əh, Uhgīn otol nalpənən asol kəm in. Kən nalpənən əh otəskasik taprəkis okəmə kətu-pən kəpiel kit e nentou, kən kərakin-pən əpəh itəhəi lokamnim məmə otamnim.

43-44“Kən okəmә nelmәм tol ik natol tәfagә, kən tәwir mәмә nakәtatip rәkis mәрakin. Okәмә nelmәм kitiah әm mәto onakos nәmegәhән lilin, inu tәwir pik maprәkis-in mәмә nelmәм kәiu mәto okәrakin-pән ik e nigәм asol namnun tikә.”

45-46Kən okәмә nelkәм kit tol ik nakatәme e rәham nәmegәhән nakәtatip rәkis. Okәмә nelkәм kitiah әm mәto onakos nәmegәhән lilin, inu tәwir pik maprәkis-in mәмә nelkәм kәiu mәto okәrakin-pән ik e nigәм asol.

47Kən okәмә niganәmtim kit tol ik nakatәme e rәham nәmegәhән, nakilәs-irәkis. Okәмә niganәmtim kitiah әm mәto onәkuwin ikin Uhgin tatәrәmәrә ikin, inu tәwir pik maprәkis-in mәмә niganәmtim kәiu mәto okәrakin-pән ik e nigәм asol.

48Kən ikin әh, firәl min okotәtip e nipәti netәmim ikin mәsotimisән, kән nigәм tatus ilat kән matuәp әm kilpın okol kәsohamisән nian kit ne.

49“Uhgin tateatәgtәg-pән nigәм e netәmim tahmen әm e sol kateatәgtәg-pән e nagwәнән.

50“?Sol tәwir, mәto okәмә otisiu roiu, kән kәruru mәмә okos-ipән min naka pәs tәtehen? Onәkotәkәike motos sol u tahmen e nolkeikeән e rәhatәmat nәmegәhән, kән motatig e nәmәlinuән nian rafin.”

Mak 10

?Tәwir mәмә nipitan ne nәman okotapәs ilat min, o kәp?

(Mat 19:1-12; Luk 16:18)

1Kən Iesu tәmiet ikin-un kән muwin miet-pән әpәh entән әpәh Jutia entәnipән-pән e nәhau әpәh Jotan. Kән nimanin netәmim kәmotuәfimin-pән min ilat min ron, kән tatәgәtun ilat mәмә inu tatәgәtun әh mihin ilat ne nian min.

2Kən Farisi neen kәmotuwa keiuә әm katәtapәh ron mәмә, “?Tahro? ?Rәhatat Lou tategәhan-in mәмә iәрman titun napәsән rәhan pәtan, o kәp?”

3Mәto Iesu tәmәtapәh olat mәмә, “?Lou naka un Moses tәmәlәhәu aupән kәm itәmat?”

⁴Kən mətə kotəmə, “Moses təmegəhan-in məmə okəmə iərman tətəpəs rəhan pətan un, təike mətə naoa kit mos-ipən kəm rəhan pətan məmə in tīnapəs, kən panahl-iarəp.”

⁵Mətə Iesu təmə, “Moses təmətə lou un mətə-inu rəhatəmat-kapə tiəkis pik.

⁶Mətə e nətuounən, Uhgīn təmol natīmnat, kən mol iərman ne pətan.

⁷O nat əh in əh, iərman otəpanapəs rəhan tata ne mama, kən mətuatīg ilau rəhan pətan.

⁸Kən ilau okuea nīpətīlau kitīəh. Kən roiu, ilau sənəmə kəiu, mətə kitīəh əm.

⁹Uhgīn tīnīlpīn ilau kīnuea mīnioal kitīəh, kən o nat əh, pəs etəmim kit okol təsətatīpən rəhalau natīgən.”

¹⁰Kən Iesu ne rəhan mīn netəmim kəmotuwīn əpəh imə, kən rəhan mīn netəmim kotətapəh ron o nat un.

¹¹Kən təmən-ipən kəm ilat məmə, “Etəm tatol tīfos mətəpəs rəhan pətan kən matit mīn in pīsīn kit, in tategoafəl matol təfagə rat e rəhan ətuatīp pətan.

¹²Kən tahmen mīn əm, okəmə pətan kit tətəpəs rəhan iərman kən matətəu-pən in pīsīn kit, in mīn tateguafəl matol təfagə rat e rəhan ətuatīp iərman.”

Iesu təməfak o nisualkələh

(Mat 19:13-15; Luk 18:15-17)

¹³Kən netəmim neen kəmotəmīk nisualkələh motuwa o Iesu məmə otələhəu-pən nelmīn elat mawte-in nəwīrən rəha Uhgīn kəm ilat, mətə rəhan mīn netəmim kəmoatən-iəhau ilat.

¹⁴Mətə nīan Iesu təməplan, kən neməha tol, matəhai ilat məmə, “Pəs nisualkələh okotuwa ron io. Əsotən-iəhauən nisualkələh mīn un, mətə-inu netəm mīn u nīkīlat tahmen əm e nīkī nisualkələh, ilat u Uhgīn tatərəmərə elat.

¹⁵Iatən pahrien kəm itəmat məmə, okəmə suah kit təsolkēikēən məmə oteiuaiu mahmen e suakəku mapəs Uhgīn tərəmərə lan, in okol təsatīg ahgīnən nərəmərəən rəha Uhgīn.”

¹⁶Kən məmik nisualkələh e nelmin, kən mələhəu-pən nelmin elat məmə, “Pəs Uhgın otawte-in rəhan nəwırən kəm itəmat.”

Suah kit rəhan nautə tepət

(Mat 19:16-22; Luk 18:18-23)

¹⁷Nian Iesu tinətaliwək matuwın, kən suah kit təmaiu muwa misin-pən nulin ron məmə, “?İgətun wır, oekəkəike mol naka un məmə ekos nəmegəhən lili?”

¹⁸Məto Iesu təmə, “?Tahro nakatən məmə io etəm təwır? Uhgın pisin əm un in təwır, suah kit min tikə məmə in təwır.

¹⁹Ik ninəmitun rəkis lou min rəha Moses məmə onəsohamnuən itəm, məsəkləhən, məseiüəən, məsəkləh-inən pətan, onəkəike misiai-in rəham tata ne mama.”

²⁰Məto suah un təmə, “İgətun, lou min un, ematol rafin ilat nian ematəkəku mətoarus-pa u-roiu ne.”

²¹Kən Iesu təmehm suah un molkeike pik, kən məmə, “Nat kit min əm əh-ikin onəkol. Uwin mol-salim-in rafin rəham nautə, kən mos-ipən məni lan kəm ian-rat min, kən ik onakos nautə tepət əpəh e nego e neai. Kən muwa muarisig-in io.”

²²Kən nian suah un təməto nəghatən un, kən niğanəmtin təmərou, kən nikin təmərou pik ron matuwın məto-inu rəhan natimnat tepət.

Tiəkis o etəm rəhan nautə tepət məmə otuwın ima Uhgın

(Mat 19:23-30; Luk 18:24-30)

²³Kən Iesu təmasipən məplan netəm min əh-ikin, kən mən-ipən kəm rəhan min netəmim məmə, “!Nəman! Tiəkis pahrien o netəm rəhalat nautə tepət məmə okotuwın ahgin nərəmərən rəha Uhgın.”

²⁴Kən rəhan min netəmim kəmotaut pik o nəghatən rəhan, məto Iesu təmən min məmə, “Nenetik min, tiəkis pahrien məmə suah kit otuwın ahgin nərəmərən rəha Uhgın.

²⁵Tiækis o kamel asol mämə otuwîn-pən e nîpæg nitel, mæto tiækis pik agin o etəm rəhan nautə tepət mämə otuwîn matig ahgin nərəmərəən rəha Uhgîn.”

²⁶Kən rəhan mîn netəmim kəmotaut pik ron motəmə, “?Ei, mæto pah titun nosən nəmegəhən lilin?”

²⁷Kən Iesu təmasipən məplan ilat, kən mämə, “Nat u, okol etəmim təsölən. Mæto Uhgîn, in titun nolən natimnat rafin.”

²⁸Kən Pita təmə, “Itimat emotapəs rafin rəhatimat natimnat mämə okotuarisig-in ik.”

²⁹Mæto Iesu təmə, “Iatən pahrien, etəm itəm otapəs rəhan nimə, o pian mîn, o kaka mîn, o mama, o tata, o nisualkələh, o rəhan nəptən ron io ne Namnusən Təwir,

³⁰e nəmegəhən rəha nətueintən u, in otos nitailat wan-hanrit, inu nimə mîn, ne pian mîn, ne kaka mîn, ne mama mîn, ne nisualkələh, ne nəptən mîn. Kən in otos mîn nəratən mîn itəm netəmim okotol kəm in. Kən e nəmegəhən wi itəm otəpanuwa, in otos nəmegəhən lilin.

³¹Mæto netəmim tepət u kotaupən u-roiu, okəpanotuarisig, kən netəm mîn u kotuarisig u-roiu okəpanotaupən.”

Iesu təmən mîn mämə otəpanimis

(Mat 20:17-19; Luk 18:31-34)

³²Kən Iesu ne kəmotaliwək e suatip katər-pən əpəh Jerusalem, kən Iesu təmataupən-in rəhan mîn netəmim, əmun narmilat təmiwig pik ron, kən netəm kəmotuarisig-in ilat kəmotəgin. Kən Iesu tit-irəkis rəhan mîn netəm tuelef motuwîn, kən tatən-ipən nat naka itəm okəpanol lan,

³³mämə, “Otətəlig-in wir-tu io. Roiu kînoatər mînoatuwîn əpəh Jerusalem, kən okegəhan-in-pən io Neti Etəmim e nelmi pris asol mîn ne iəgətun mîn rəha Lou. Kən okotən mämə oekimis, kən okotəhlman-pən io e nelmi Iaihlua mîn.

³⁴Kən okotol milə lak, kən motagəh io, motalis io, kən motohamnu io. Mæto e nian tatol kisil lan u, epanəmegəh mîn.”

Jemes ne Jon kəmuətapəh məmə Iesu otol nat kit kəm ilau

(Mat 20:20-23)

³⁵Kən Jemes ne Jon, neti Sepeti mil, kəmuea o Iesu, kən muən-ipən ron məmə, “Iəgətun, ekioalkeike nat kit məmə onəkol kəm itımlau.”

³⁶Kən Iesu təmə, “?Nakioalkeike naka məmə ekol kəm itəmlau?”

³⁷Məto kuəmə, “O nian nakatuwa məmə onakərəmərə e nəhag-əhagən rəha nəsanənən rəham, kən ekioalkeike məmə onakegəhan-in itımlau kit təpələh e rahm-matip kən kit təpələh e rahm-mol, ikin mil rəha nəsanənən ne nisaiiən.”

³⁸Kən Iesu təmən-ipən kəm ilau məmə, “Itəmlau nəkuəruru nat u nakatuən. ?Tahro? ?Itəmlau, nikitəlau təht məmə nəkuahmen məmə kitəhal kəhalətul e nigəm rəha nuwigi nien itəm io ekəike mətul lan? ?Kən muahmen-in min məmə okol baptais etəmlau e nahməən məmə okol mihin lak?”

³⁹Kən kuəmə, “!Əwəh, ekuahmen in!” Məto Iesu təmə, “Pahrien, onakuəkəike muətul e nigəm rəha nuwigi nien itəm io ekəike mətul lan. Kən okol baptais etəmlau e baptais itəm okol baptais lak lan.

⁴⁰Məto o nəpələhən e nikalik matip ne mol, sənəmə rəhak məmə ekən. Ikin mil əh, ilau rəha netəm min u itəm Uhgın təmol əpen-əpenə olat.”

Etəm təmə otepət e netəmim

(Mat 20:24-28)

⁴¹Nian rəhan netəm ten kəmotəto nəghatən un, kən neməha təmol ilat o Jemes ne Jon.

⁴²Kən Iesu təmaun-in rəhan min netəmim kotuwa, kən tən-ipən kəm ilat məmə, “Itəmat nəkotitun məmə netəm min u kotəmə okotepət e Iaihlua min, kotos-ipər atip ilat, kən netəm-iasol rəhalat koatalikiamtə rəhalat min netəmim.

⁴³“Məto itəmat onəkəsotolən min-nəhlan. Okəmə itəmat kit tolkeike məmə in otepət etəmat, in otəkəike muwa məmə in iolwək əm kit rəhatəmat.

⁴⁴Kən okəmә itəmat kit tolkeike məmә in otit itəmat, kən in otəkәike muwa məmә in slef kit rəhatəmat.

⁴⁵Kən io min, Neti Etənim, eməsuwamən məmә netənim okotol wək kəm io, mətō emuwa məmә ekol wək kəm netənim kən mos-ipən rəhak nəmegəhən məmә ekikis ilat e rəhalat nolən rat min.”

Iesu təmol-wir niganəmti Patimias

(Mat 20:29-34; Luk 18:35-43)

⁴⁶Kən Iesu ne rəhan min netənim, kəmotuwa əpəh Jeriko. Kən nian kinotiet moatuwin, kən netənim tepət kəmotuarisig-in ilat. Kən suah kit niganəmtin təpis, tatəpələh e nikali suatip, nərgin u Patimeas neti Timeas. Nian rafin tatətapəh-in məni o netənim.

⁴⁷Nian təmətō məmә Iesu etəm Nasaret tətaliwək e suatip matuwa, kən təmagət əfəməh məmә, “!Awi, Iesu Mipi Tefit, asəkitun io, masitu lak!”

⁴⁸Kən netənim neen kotəmərīt lan motəmә, “!Ei, əsagətən!” motən pap mətō in təməha magət əfəməh pik min məmә, “!Mipi Tefit, asəkitun io, masitu lak!”

⁴⁹Kən Iesu tətul kən mən məmә, “Otaun-in-pən-tu suah un məmә tuwa.” Kən motən-ipən kəm in məmә, “Ei, agien, mətul, mətō-inu Iesu tətaun-in ik.”

⁵⁰Kən suah un təmatipin rəhn kot, mətip mər muwin o Iesu.

⁵¹Kən Iesu təmətapəh ron məmә, “?Nakolkeike naka?” Mətō təmə, “!əgətun, ekolkeike məmә nakol-wir niganəmtək pəs ekehm nat.”

⁵²Kən Iesu təmə, “Atuwin. Rəham nahatətəən tinol-wir ik.” Kən roiu agin min niganəmtin təməwir, tinatehm nat. Kən minatətəu-pən Iesu moatan.

Mak 11

Iesu təmasuə e togki matuwin Jerusalem

(Mat 21:1-11; Luk 19:28-40; Jon 12:12-19)

¹Kəmotuwin iuəhkir o Jerusalem, iuəhkir o latuənu mil un Petfas ne Petani, moatuwin əpəh e Nitot Rəha Nig U Olif, kən Iesu təməhl-ipən rəhan kəiu etənim mil kuaupən.

²Təmən-ipən nəghatən u kəm ilau məmə, “Onakian əpəh e latuənu əh kotasipənin. O nian nakian əh-ikin, roiu aɡin onakuəplan nəti togki kit kəsasuəən əh lan kəmərüətain. Kən nəkiakis muasig mueia.

³Kən okəmə suah kit təmə, “?Onakuahro-in neti togki?” kən nakuəmə, ‘Iərəmərə tolkeike, kən otəpanahl-ipa min otəsuwəhən.’”

⁴Ilau kəmian kən muəplan neti togki un kəmərüətain e nikal suatip əpəh iuəhkir o nafiluə e nimə, kən kiakis.

⁵Məto netəmim neen kəmotətul əh-ikin kən motətəpəh olau məmə, “!Ei! ?Nakətiakis neti togki un o naka?”

⁶Kən kəmuən-ipən nəghatən rəha Iesu kəm ilat, kən ilat kəmotegəhan-in-pən neti togki kəm ilau.

⁷Kən kəmuasig togki mian o Iesu, kən muapeg rəhalau kot muəfətain noankawi togki un lan, kən Iesu təmasuə lan.

⁸Kən netəmim tēpət kəmotepin rəhalat kot əpəh e suatip, kən neen kəmotaiu kan əpəh e nikinat katəte manat motəmik motuwa motəpen əpəh e suatip.

⁹Netəm kotaupən ne netəm koatuarisig kəmotagət əfəməh məmə, “!Hosana, ənwiwi Uhgın! !Iərəmərə Uhgın tətatiɡ ilau suah u itəm tatuwa e nərgin!

¹⁰!Pəs Uhgın otawte-in rəhan nəwırən kəm nərəmərəən itəm tatuwa, tahmen-pən əm e nərəmərəən rəha pipi rat u rəhatat Tefit! !Hosana o Uhgın əpəh ilis e nego e neai!”

¹¹Kən Iesu təmuwın əpəh Jerusalem e Nimə Rəha Uhgın məplan natimnat. Məto tinapınəp rəkis, kən tiet ilat rəhan min netəm tuelef minoatuwın əpəh Petani.

Nig kit fik itəm noan tikə

(Mat 21:18-19)

¹²Kən kəmən lawigin, kinotiet min Petani minoatuwın Jerusalem, kən nəumis tinus Iesu.

¹³Kən tasipən-in nig kit fik tatətul əpəh isəu məsin nimalin tepət. Tuwin məmə otəhl noan kit, məto noan tikə, nimalin əm, məto-inu sənəmə nian rəha nig fik tatoe lan.

¹⁴Kən Iesu təməni-əpən kəm nig fik un məmə, “Okol netəmim kəsotun minən noam e nup min rafin.” Kən rəhan min netəmim kəmotəto rəhan nəghatən un təməni.

Iesu təməni-əpən netəmim e Nimə Rəha Uhgın

(Mat 21:12-17; Luk 19:45-48; Jon 2:13-22)

¹⁵Kən kəmotuwın motiet-pən əpəh Jerusalem, kən Iesu tuwin əpəh imə e Nimə Rəha Uhgın məhg-əpən netəmim kotol maket, kən məhwin tepil rəha netəm kotol senis e məni, ne stul rəha netəm koatol-salim-in mak min.

¹⁶Kən mətulosig-in netəmim məmə okəsotəmikən rəhalat natimnat motuwın-pən əpəh Nimə ikın Rəha Uhgın.

¹⁷Kən təməgətun ilat məmə, “Kəməte-pən e Naoa Rəha Uhgın məmə Uhgın təmə, ‘Rəhak nimə, in nimə rəha nəfakən məmə netəmim rəha nitən min rafin okotəfak-pa ikın kəm io.’ Məto itəmat nəmotol məmə in ‘nimə rəha iakləh min.’”

¹⁸Kən pris asol min ne iəgətun min rəha Lou kəmotəto rəhan nəghatən. Kən kınotəgin Iesu məto-inu nian nimanin netəmim kəmotəto rəhan nəgətunən, narmilat tiwig pik ron. Kən pris asol min ne iəgətun min rəha Lou kınotətuoun kateam-in suatip kit məmə okotohamnu in.

¹⁹Kən tınehnaipən, Iesu ne rəhan min netəmim kınotiet Jerusalem minoatuwin.

Nig fik təməni matəgətun nəghatən rəha netəmim

(Mat 21:20-22)

²⁰Kən kəmən lawigin, kəmotuwa min e suatip motəplan nig fik apon tınauke rəkis muwin miet əpəh e nokin.

²¹Kən Pita nıkin tınəht nəghatən rəha Iesu o nig əh, kən məni-əpən kəm in məmə, “!İəgətun, əplan-tu nig fik ilouin nəməni rat, kən tınauke rəkis!”

²²Kən Iesu təmən-ipən kəm ilat məmә, “Otahatətә әm e Uhgın.

²³Iatən pahrien kəm itəmat məmә okəmә suah kit tətahatətә pahrien e Uhgın, kən otən-ipən kəm nitot әpәh məmә, ‘Uwın, mәtipән atip әpәh itәhәi mamnim,’ kən okəmә tәsәнән e nikin kәiu, mahatətә әm e Uhgın, kən nat un otol pahrien.

²⁴O nat u inu, iakatән kəm itəmat məmә okəmә nakotәfak o nat kit kən motahatətә məmә onәkotos pahrien, kən onәpanotos rafin nat un nәmotәfak ron.

²⁵“E nian nakotәtul katәfak, mәto nikitəmat mәsin әh-ikin tәrat mәto-inu suah kit tәmol nat kit tәsahmenән etəmat, kən aluin rәhan nolән rat mәsotalpınән rәhan nitai tәfagә. Otol nәhlan pәs Uhgın әpәh e nego e neai in otaluin mafәl rәhatəmat tәfagә rat min.”

26

?Pah tәmә Iesu otol natimnat min әh?

(Mat 21:23-27; Luk 20:1-8)

²⁷Kən Iesu ne rәhan netәм tuelef kәmotitәlig-pa min әpәh Jerusalem. Kən Iesu taliwәk mәtan әpәh e Nimә Rәha Uhgın, kən pris asol neen, ne iәgәtun min rәha Lou, ne netәм-iasol rәha netәм Isrel kәmotuwa ron.

²⁸Kən katәtapәh mәмә, “?Әn-tu kәм itimat mәмә pah tәmegәhan-in ik nakatol natimnat min әh? ?Kән pah tәmegәhan-in nepәtән әh, Uhgın o etәmim әm?”

²⁹Kən Iesu təmən-ipән kәм ilat mәмә, “Oekәtapәh-in-pınә-tu nәghatән kit kәм itəmat, kән okəmә nakotuhalpın u, kән ekән-ipınә mәмә pah tәmegәhan-in nepәtән әh mәмә ekol natimnat min әh.

³⁰?Otән-tu mәмә pah tәмән mәмә Jon otol baptais e netәmim? ?Uhgın, o etәmim әm kit?”

³¹Kən әmun kинotән-ән kәм ilat min mәмә, “?Ei, okotән mәмә naka? Okәмә okotән mәмә Uhgın әh-roiu, kән tәpanән min mәмә, kән tahro kәmәsotahatәtәән e Jon.

³²Məto, okol kəsotənən məmə etəmim əm kit.” Kəmotən nəhlan məto-inu ilat kəmotəgin netəmim itəm kinotən rəkis nıpahrienən e Jon məmə in ien kit rəha Uhgın.

³³Kən kəmotən-ipən kəm Iesu məmə, “İtimat ekotəruru.” Məto Iesu təmə, “Kən io mın, okol ekəsən-iarəpən kəm itəmat məmə pah təmegəhan-in nepətən məmə ekol natımnat mın əh.”

Mak 12

Nimaa nəghatən e netəm kotasum o noa-krep

(Mat 21:33-46; Luk 20:9-19)

¹Kən Iesu təmuəh nimaa nəghatən kit kəm ilat məmə, “Suah kit təmasum-in noa-krep, u nol katol wain e noan. Kən mol fenis e kəpiel tuwın mıtəlau in, kən mol ikin kit o nolən nəme naliwək-aliwəkən e noa krep məmə nahuin otaiu kən kol wain lan. Kən mol nimə kit itəm in ilis məmə etəmim otaiu lan matehm wir nasumən o nat megəh mın ne netəmim. Kən təmegəhan-in-pən nasumən kəm netəmim məmə okotasum lan, kən motor noa krep, məsin rəhan, məsin rəhalat. Kən miet muwın o naliwəkən ik pisin kit.

²“Matuwın matuwın, kən nian nol u krep təmol noan kən kinotəmarəg, etəm-iasol in təmahl-ipa rəhan kit iolwək məmə in otuwın mehm netəm koatol wək e rəhan nasumən məmə okotəhl noa krep, kən motor kos-ipən rəha etəm-iasol neen.

³Məto netəm mın əh kəmotətul motaht iolwək əh, kən motahl-ipən titəlig məsotəmki-pənən noa krep neen ne kəm in.

⁴“Kən etəm-iasol un tahl-ipa mın rəhan kit iolwək tuwa, kən kotoh rəhn-kapə motol naulisən kəm in.

⁵Kən tahl-ipa mın rəhan kit iolwək tuwa, kən kotohamnu timis. İlat tepət kəmotuwa, kən netəm mın un kotoheain neen, kən motohamnu neen.

⁶“Kən kitiəh əm əh-ikin ilau mın kətuatig, inu netin keike otəpanahl-ipa. Namnun, təmahl-ipa nətin, kən nikin tatəht məmə, ‘İlat okotəkəike motisiai-in nətik.’

⁷Məto təmuwin kən netəm min un kotəmə, ‘Inu nəti etəm-iasol itəm otərəməərə e nasumən nian rəhan tata otimis. Pəs kotuwın motohamnu min, kən motərəməərə e nasumən rəhan.’

⁸Kən kəmotaskəlīm motohamnu, kən motiləs nipətin motuwın motərakin-pən əpəh ihluə e nasumən.”

⁹Kən Iesu təmən-ipən kəm ilat məmə, “?Etəm-iasol un otol naka? Otuwin mohamnu ilat kən mos-ipən min nasumən un kəm netəm pisin neen.”

¹⁰⁻¹¹Kən Iesu təmən-ipən kəm ilat məmə, “?Nəmotafin Naoa Rəha Uhgın u, o kəp? Tatən məmə, ‘Kəpiel u itəm netəm rəha niləkinən nimə kəsotolkeikeən motapəs, in tinuwa kəpiel keike o nolən nimə. İərəməərə təmol nat u, kən in nat təwir agın e niğanəmtitat.”

¹²Kən netəm-iasol kotolkeike məmə okotaskəlīm Iesu məto-inu kotəmə tatəghat rat elat. Məto kinotəgin nimanin netəmim kən motapəs, kagim.

?Tətuatip o nətouən takis kəm Sisa, o kəp?

(Mat 22:15-22; Luk 20:20-26)

¹³Farisi min neen ne netəmim neen e pati rəha Kig Herot Antipas, rəhalat min netəm-iasol komotahl-ipən ilat məmə okotuwa keiuə e Iesu pəs təme atip e rəhan nəghatən.

¹⁴Kəmotuwa ron kən motən-ipən kəm in məmə, “İəgətun, ekotitun məmə ik etəm ətuatip kən məsəginən, məsaulis-inən netəmim, ne netəm-iasol ne, matən niphahrienən matəgətun netəmim e suatip rəha Uhgın. ?Ən-tu məmə tətuatip məmə ekotətou-pən takis kəm Sisa, kapman asol rəha netəm Rom, o kəp? ?Oekotəkəike motətou-pən, o kəp?”

¹⁵Məto Iesu tinitun əm məmə kotən əm e nohlilat məto nikilat tol pisin, kən məmə, “?Tahro nakotəmə onəkotol məmə ekəme e rəhak nəghatən? Otos-tu mənı kit motuwa-tu pəs ekehm.”

¹⁶Kən kəmos kit motuwa, kən təmətapəh olat məmə, “?Narmi pah u, kən nərgi pah u e mənı u?” Məto kotəmə, “Sisa.”

¹⁷Kən Iesu tēmə, “Natimnat rəha Sisa, okos-ipən kəm Sisa. Məto natimnat rəha Uhgīn okos-ipən kəm Uhgīn.” Kən narmilat tēmiwig məto-inu tēmuhalpīn wīr rəhalat nəghatən.

?Tahro etəmim timis kən məmegəh min?

(Mat 22:23-33; Luk 20:27-40)

¹⁸Kən Satusi min neen kəmotuwa o Iesu. E rəhalat nətəligən, netəmim kotimis məsotəmegəh minən. Kəmoatalkut o nolən məmə rəhalat nətəligən in tətuatip, kən tol nəhlan, kəmotən kəm Iesu məmə,

¹⁹“Iəgətun, Moses təməte rəkis lou kit u tēmə, ‘Okəmə suah kit otimis, kən mapəs rəhan pətan, kən məsialəsən netilau kit ne, kən pian otəkəike mit nəutahlimis un, kən mialəs netilau kit un, kən suakəku un otos nəme rəhan tata asol əpəh tinimis rəkis.’

²⁰“Kən netəmim sepīn ilat pialat min. Etəm tēmaupən maiir tēmit pətan kit kən məsialəsən netilau kit u, kən timis.

²¹Kən itəm tuarisig tit nəutahlimis un, kən məsialəsən netilau kit ne un, kən timis min. Kən pialau itəm tatuarisig-in ilau tol əm nat kitəh.

²²Matuwīn, matuwīn kən netəm min un sepīn ilat pialat min kəmotit pətan un motuwīn kən ilat rafin minotimis, kən məsotiləsən nətilat kit ne. Kən pətan apon tinimis min.

²³?Kən o nian netəmim okotəmegəh min e rəhalat nimisən, kən pətan əh rəha pah, u ilat rafin sepīn kəmoatit?”

²⁴Məto Iesu tēmə, “Itəmat nəmotəlue. ?Nəkotitun məmə nəmotahrəlue? Məto-inu itəmat nəkotəruru Naoa Rəha Uhgīn, kən moatəruru min nəsanənən rəha Uhgīn.

²⁵Nian netəm kəmotimis okotəmegəh min, ilat okotahmen e nagelo min əpəh e neai, kən məsotit minən pətan, ne məsotətəu-pən minən iərman.

²⁶Kən oekəgətun itəmat e etəmim tatəmegəh min e rəhan nimisən. Okəmə naka itəmat nakəsotafinən əh nəghatən əh kəməte-pən e naoa rəha Moses, tatən namnusən rəha Moses nian nig kit nigəm tēmatus. Kən e nian əh, Uhgīn

təmən-ipən kəm Moses məmə, ‘Roiu əh, io Uhgın rəha Epraham, ne Uhgın rəha Aisak, ne Uhgın rəha Jekop.’

²⁷In Uhgın rəha netəm kotəmegəh, sənəmə rəha netəm kəmotimis kitiah. Itəmat nəmotəluə pahrien.”

?Lou naka un in tēpət e lou min?

(Mat 22:34-40; Luk 10:25-28)

²⁸Kən iəgətun kit rəha Lou təmatəpələh matəto ilat kotəghat, kən Iesu tətuhəlpin wir nəghatən rəha Satusi min. Kən tuwa o Iesu matətapəh ron məmə, “?Lou ahro u in ilis pik kən məwir məmə okotətəu-pən?”

²⁹Kən Iesu təmən-ipən kəm in məmə, “Lou u in ilis pik u okotətəu-pən təmə, ‘!Otətəlig wir-tu itəmat netəm Isrel! Uhgın u in rəhatat İərəməərə, in əmun in Uhgın.

³⁰Onakolkeike Uhgın u in rəham İərəməərə e nīkim rafin, ne nəmegəhən rafin rəham, ne nətəligən rafin rəham, ne nəsanənən rafin rəham.’

³¹Kən lou itəm tətuarisig-in itəm əh təmə, ‘Onakolkeike ik min neen tahmen-pən əm məmə natolkeike atip ik.’ Lou kit tikə min taprəkis-in lou mil əh.”

³²Kən iəgətun əh rəha Lou təmə, “İəgətun, rəham nəghatən tətuatip. Nəmən pahrien məmə İərəməərə əmun in Uhgın. Uhgın kit min tikə.

³³Kən okotolkeike Uhgın e nīkitat rafin, ne nətəligən rafin rəhatat, ne nəsanənən rafin rəhatat, kən motolkeike kitat min neen məmə kotolkeike atip kitat min. Təwir pik məmə okotətəu-pən lou mil əh taprəkis-in nuwaan atipən nat megəh ne sakrifais min rafin itəm Lou tatən.”

³⁴Kən Iesu təməhm məmə rəhan nəghatən tenatig pik, kən tən-ipən ron məmə, “Ik ninuwa iuəhkir o nərəməərəən rəha Uhgın.” Kən ilat rafin kinotəgin nətapəh-in minən nəghatən ron.

Mesaea sənəmə mipi Tefit əm, məto rəhan min etəm-iasol

(Mat 22:41-46; Luk 20:41-44)

³⁵Nian Iesu tēmatēgētun netēmim ēpēh e Nimē Rēha Uhgīn, kēn matētāpēh-in nēghatēn kit kēm ilat mēmā, “?Tahro iēgētun mīn rēha Lou kotēmā Mesaea u in mipi Tefit?

³⁶Narmin Rēha Uhgīn tēmos-ipēn nenatigēn kēm Tefit mēmā otēn mēmā, ‘Uhgīn tēmēn-ipēn kēm rēhak Iērēmērē mēmā, ēpēlēh u e rēhk-matip, ikīn rēha nēsānēnēn ne nisīaiiēn, mētoarus-pēn oekos-iēhau rēham tikimīr mīn mēlīn-pēn ilat ēpēh lēhau e nelkēm.’

³⁷Tefit atip tēmēn mēmā Mesaea in rēhan Iērēmērē. ?Kēn okēmā mipi Tefit atip ēm, kēn tahro matol rēhan Iērēmērē?” Kēn netēm mīn un kēmōtētēlig-in Iesu kēmōtagiēn pīk o rēhan nēghatēn.

Netēmim okoatēto wir ilat o iēgētun mīn rēha Lou

(Mat 23:1-36; Luk 20:45-47)

³⁸Nian Iesu tēmatēgētun ilat kēn mēmā, “Oatēto wir itēmat o iēgētun mīn rēha Lou itēm kotolkeike nuwinēn e kot ēfēmēh motaliwāk e suatip, kēn netēmim koatos-ipēn nisīaiiēn kēm ilat.

³⁹Kēn motolkeike mēmā okotēpēlēh aupēn e nimē rēha nuēfīmīnēn. Kēn e nian rēha lafet, ilat koatolkeike mēmā okotuwin kēpēlēh-pēn aupēn ikīn rēha nisīaiiēn.

⁴⁰Kēn motaklēh-in nimē mīn rēha nēutahlīmīs mīn, kēn moteiuē ēm katēfak kaifēmēh mēmā okotol pēs netēmim kotīsīai-in ilat, mēto okēpanol nalpīnēn kēm ilat taprēkis.”

Mēni rēha nēutahlīmīs

(Luk 21:1-4)

⁴¹Kēn Iesu tēmatēpēlēh ēpēh e Nimē Rēha Uhgīn iuēhkīr o pokīs katērakin-pēn mēni ikīn matehm netēmim tepēt kotērakin-pēn mēni rēhalat. Kēn netēm rēhalat nautē tepēt kotērakin-pēn mēni asol mīn.

⁴²Kēn nēutahlīmīs kit ian-rat tēmāii-pēn mēni ēkēku kēiu ēm.

⁴³Kən Iesu tēmaun-in rəhan min netəmim kotuwa kən mēmə, “Iatən-ipinə kəm itəmat mēmə nēutahlīmīs əh ian-rat pahrien, mətō in tēmərakin-pən mēni asol taprəkis-in rəha netəmim min rafin.

⁴⁴Ilat kəmotərakin-pən rəhalat mēni, mətō tepət min əpəh latuənu. Mətō nēutahlīmīs u itəm in ian-rat pahrien, in tēmos-ipən rafin mēni rəhan o nos-nəmtinən nigin nagwənən, kən tikə min əh-ikin.”

Mak 13

Iesu tēmə Nimə Rəha Uhgīn otisas

(Mat 24:1-2; Luk 21:5-6)

¹Nian Iesu tēmatiet e Nimə Rəha Uhgīn, kən rəhan kit netəm tuelef tēmən-ipən ron mēmə, “!Iəgətun, əplan-tu kəpiel asol min ne nimə min, kotəwir!”

²Kən mətō Iesu tēmə, “Itəmat nakoatehm natimnat min əh, mətō nian otatuwa itəm netəmim okotohalkin-ohalkin kəpiel min rəha nimə min əh, inəh kəpiel kit otəsətulən əh-ikin tatətul ikin roiu.”

Nahmēən asol otuwa

(Mat 24:3-14; Luk 21:7-19)

³Uarisig lan, Iesu tēmuwin matəpələh əpəh e Nitot Rəha Nig U Olif ikin kitun nəplanən Nimə Rəha Uhgīn entənipən-pən. Kən Jemes, Jon, Pita ne Antru kəmotuwa ron ilat pisin əm.

⁴Kən moatətapəh ron mēmə, “?Ən-tu mēmə natimnat min əh okotuwa nəghan? ?Kən nəmtətin ahro u otol pəs ekotitun mēmə tinol nian ətuatip əh-roiu rəha natimnat min əh?”

⁵Kən Iesu tēmən-ipən kəm ilat mēmə, “Onakoatəto wir itəmat o netəmim, məsotegəhan-inən mēmə koteiuə-in itəmat.

⁶Kən mətō netəmim tepət okəpanotuwa e nərgək, kit otən mēmə in Mesaea, kit otən mēmə in, kən moteiuə-in netəmim tepət.

⁷“Kən okəmə nakotəto mēmə netəmim neen koatəmou əpəh iuəhkir otəmat, kən motəto min mēmə neen min əpəh isəu kotoh min ilat min, mətō nigānməpitəmat otəsasiəpən. Natimnat min əh okotaupən motuwa pahrien, mətō sənəmə nāmnun nian əh tinatuwa.

⁸Nitən asol min okotəluagin, kən kantri min okotoh min ilat min, kən namig asol otəpanol ikin min rafin, kən nəumis asol otus netəmim, mətə natimnat min əh nətuounən əm rəha nahməən itəm otəpanuwa, kotahmen əm e pətan itəm təmol nərpin, kən mətouon matətə nahməən məmə otəsuwəhən temək.

⁹“Onakoatətə wir itəmat. Okiləs itəmat kan nakotətul e niganəmti kaonsel, kən okoh itəmat əpəh imə e nimə rəha nuəfiminən min, kən onəkotətul aupən e netəm-iasol rəha kapman ne kig min mətə-inu rəhak min u netəmim itəmat. Kən onəkotən-iarəp Namnusən Təwir kəm ilat.

¹⁰Mətə okaupən kən-iarəp Namnusən Təwir kəm netəmim ikin min rafin un, kən namnun nian təpanuwa.

¹¹“Okəmə okotuwa motiləs itəmat kətan məmə onəkotətul e kaonsel, kən nikitəmat təsəht pəkən məmə onəkotən naka. E nian ətuatip əh, onəkotən-iarəp əm nəghatən u Uhgın otos-ipinə kəm itəmat, mətə-inu nəghatən u onəkotən, sənəmə rəhatəmat nəghatən, mətə rəha Narmin Rəha Uhgın otos-ipinə.

¹²“Netəmim okotegəhan-in-pən pialat ətuatip min kəm rəhalat tikimir min məmə okotohamnu ilat, kən tata min okotol mihin min kəm nenətilat ətuatip min, kən nisualkələh okotətul motol nolən ahmen min əm kəm rəhalat tata min ne mama min məmə okotohamnu ilat.

¹³Netəmim rafin okotetəhau itəmat o nərgək. Mətə etəm otətul əskasik mətəarus-pən natimnat min un okotol namnun, kən Uhgın otosmegəh.”

Nahməən asol əpəh Jerusalem

(Mat 24:15-28; Luk 21:20-24)

¹⁴“Nian əh, onəkotəplan ‘nat itəm Uhgın tatetəhau, kən matol Nimə Rəha Uhgın tamkimik.’ (Etəm tətəfin nəghatən u, in otəkəike megəs-in mitun nipətın.) Kən e nian əh, netəm Jutia okotəkəike motaiu moatatig əpəh e nitot min.

¹⁵Etəm tətameg ihluə e rəhan nimə, kən okol təsuwın minən e nipəg noa nimə məmik rəhan natimnat. Otaiu əm magim.

¹⁶Okəmə etəm otitasum, kən okol təsuwin minən latuənu o rəhan nīməhan məmīk. Otaiu əm magim.

¹⁷“!Kəsi! Nahməən asol o nīpitan itəm kəmotol nərpilat ne nīpitan kotapinahin nisualkələh. E nian əh okotos pik nahməən.

¹⁸Otəfak əsanən kəm Uhgīn məmə natimnat min əh okəsotuwamən e nian rəha nətəpən, inəh nian rəha nalip ne nuhuən ne,

¹⁹məto-inu e nian əh, nahməən asol kəməsehmən kit ne kol mihin nəhlan e nian Uhgīn təmətuoun mol natimnat mətoarus-pa u-roiu ne. Kən okəsehm minən nahməən asol kit tol min-nəhlan.

²⁰Məto Uhgīn təmətətip əkuəkīr nian əh. Okəmə təməsətətipən, kən suah kit okol təməsəmegəhən. In təmətətip rəkis nian əh o rəhan min netəmim itəm tinəmitəpun rəkis ilat məmə rəhan min.

²¹“E nian əh, okəmə suah kit otən məmə, ‘!Əplan-tu Mesaea əpə!’ o ‘!Əplan-tu in əpəh!’ məto onakəsotahətətən lan.

²²Onakəsotahətətən lan məto-inu, Mesaea eiuə neen, ne ien eiuə min, ilat okotuwa motol nat pispis min, motol nat netəmim kotaut ron moteiuə əm. Ilat okotalkut məmə okəmə kotitun nolən, kən okotiuw-rəkis netəm min u itəm Uhgīn tinəmitəpun rəkis ilat.

²³!O natimnat min əh, oatəto! Enaupən rəkis minən-iarəp rafin natimnat min əh kəm itəmat.”

Nian rəha Neti Etəmim otuwa

(Mat 24:29-31; Luk 21:25-28)

²⁴“Kən e nian nahməən asol əh otikə, ‘kən mit otəpis, kən məwig otəsasiəən,

²⁵kən məhau min e neai okotisas kən natimnat asol min ikin e neai okotəloal.’

²⁶Kən netəmim okotəplan io Neti Etəmim oekuwa e napuə e rəhak nəsanənən ne nepətən əhag-əhag asol rəhak itəm otasiəgəpin rafin io.

²⁷Kən e nian əh, oekahl-ipən nagelo min rəhak kotuwın motəmik netəm min u Uhgin təmitəpun ilat motuwa, kargətain əm ilat kitiah. Nagelo min okotuwın e nitən min rafin agin e nətueintən məmə okotəmik ilat.

Kəruru nian itəm Neti Etəmim otuwa lan

(Mat 24:32-36; Luk 21:29-33)

²⁸“Nikitəmat otəkəike matəht nig u fik. Nian ətuatip itəm nelmin min kinotətuoun katəwiə, kən nimalin min kinoatəget, itəmat nəkotitun məmə nian əh inəh itəm nakotasum lan rəhatəmat.

²⁹Kən e nolən ahmen min əm, nian nakotehm məmə natimnat min u kinoatuwa, kən nəkotitun əm məmə otəsuwəhən ekuwa min roiu agin.

³⁰Iatən pahrien kəm itəmat məmə netəmim itəm kotatig u-roiu, okol kəsotimis rafinən mətoarus natimnat min əh okotuwa kol nıpahrienən lan.

³¹Neai ne nətueintən okiakə, məto nəghatən min rəhak okol kəsotikəən.

³²Suah kit təsitunən nian o aua ətuatip rəha natimnat min əh. Nagelo min əpəh e neai kotəruru, kən io min Neti Etəmim ekəruru. Məto Tata Uhgin əm in titun nian ətuatip əh.

Itəmat onakoatəto wir itəmat

(Mat 24:42-44)

³³“Onakoatəto wir itəmat moatair, məto-inu itəmat nəkotəruru nian əh rəhak oekuwa lan məmə otuwa nəghan.

³⁴Otahmen e etəm-iasol kit tatuwin məmə otaliwək əpəh ik pispis kit, kən məlin rəhan min iolwək məmə okotehm rəhan natimnat, kən mos-ipən rəhalat min wək kitiah kitiah. Kən mən-ipən kəm itəm e nafiluə məmə otitair.

³⁵“Kən itəmat onəkotair məto-inu itəmat nəkotəruru nian iərəməərə rəha nimə un otuwa lan. Kəruru məmə otuwa ehnaipən, o lapin, o fetukai tinatərikrik, o mit tinatər.

³⁶Kəruru, okəmə naka otuwa ueiuəhai əm. !Təsəwirən məmə nakotapil nian in otuwa!

³⁷!Məto nəghatən un itəm ekatən-ipinə kəm itəmat, ekatən min kəm netəmim min rafin məmə okotaiir!”

Mak 14

Netəm-iasol kəmotəam-in suatip o Iesu məmə okotoh

(Mat 26:1-5; Luk 22:1-2; Jon 11:45-53)

¹Nian kəiu əm əh-ikin kəpanol lafet mil lan rəha Nuhagego-inən ne Pret u is Tikə Lan. Kən pris asol min, ne iəgətun min rəha Lou kəmotəam-in suatip o Iesu məmə okotiləs anion motohamnu.

²Kən kotəmə okəsotolən e nian rəha lafet məto-inu kətah nimanin netəmim okotəmou okəmə kotitun məmə kəmotohamnu Iesu.

Pətan kit təmau rəhn-kapə Iesu e senta

(Mat 26:6-13; Jon 12:1-8)

³Kən Iesu təmətatig əpəh Petani ima Saimon u leprosi təmatol aypən. Nian təmətagwən, kən pətan kit təmos senta kit təmə e pətəl u kəmol e kəpiel itəm nəmtin tiəkis, katən məmə alapasta. Senta u, nəmiəwin təwir, kən nəmtin tiəkis, kəmol e noki nato, nig kit. Kən pətan əh təməht-irəkis, mau rəhn-kapə Iesu e senta əh.

⁴Kən netəmim neen kəmotəpələh əh-ikin, neməha təmol ilat, kən moatən-ipən kəm ilat min məmə, “?Tahro matərəkən senta?”

⁵!Okol tapol-salim-in tapos məni asol tahmen e tri-hanrit tenarius, mitun nos-ipənən kəm ian-rat min!” Kən moatəhai moatəhai.

⁶Məto Iesu təmə, “!Otapəs-ta! ?Nakotəhai o naka? In təmol nat wir kəm io.

⁷Nian min rafin itəmat ian-rat min nəkotatig, kən okəmə nakotolkeike, nəkotitun nol-wirən kəm ilat, məto io ekisatigən nian rafin kitat min itəmat.

⁸Pətan u təmol nat u in titun. Təmau nipətik məmə otol əpen-əpenə o nian okəpanitənim io.

⁹Ekatən pahrien kəm itəmat məmə, ikin min rafin okəpanamnus-iarəp Namnusən Təwir, kən kəpanamnus min nat u pətan u təmol məmə okəsaluinən.”

Jutas tēmən mēmə otegəhan-in Iesu

(Mat 26:14-16; Luk 22:3-6)

10Kən Jutas Iskariot in e netəm tuelef rəha Iesu, təmuwīn mehm pris asol mīn mēmə otegəhan-in-pən Iesu kəm ilat.

11Nian kəmotəto rəhan nəghatən, kən kəmotagien ron, motəmə okəpanotos-ipən mənī kit kəm in. Kən Jutas təmatəsahgin əm nian wīr mēmə otuwa kən otegəhan-in Iesu lan kəm ilat.

Nol əpen-əpenən o lafet rəha Nuhagego-inən

(Mat 26:17-19; Luk 22:7-13)

12Nian tinuwa o nolən lafet rəha Pret U Is Tikə Lan, kən kinatətuoun nolən lafet, kən nolən rəhalat katoh neti sipsip o lafet rəha Nuhagego-inən. E nian əh, netəmim mīn rəha Iesu kəmotuwa ron motəmə, “?Nakolkeike mēmə ekotuwin hiə motol əpen-əpenə ikin mēmə onəkol lafet ikin rəha Nuhagego-inən?”

13Kən Iesu təmahli-ipən rəhan kəiu etəmim mil mēmə, “Onakian əh taon muəplan suah kit tatəhun pətəl asol kit təmətu-pən nəhau lan, kən nakuətəu-pən.

14Əpəh e nimə itəm tatuwin-pən ikin, kən nakuətəpəh o etəm-iasol rəha nimə un mēmə, “?Iəgətun təmə noan u in hiə mēmə itimat in ne rəhan mīn netəmim ekotagwən ikin e lafet rəha Nuhagego-inən?”

15Kən in otəgətun noan asol u in ilis agin kinəməlin wīr rəkis natimnat ikin. Onakian əm mioal nigitat ikin nagwənən.”

16Kən kəmian taon muəplan natimnat tahmen-pən əm mēmə inu Iesu təmən mihin ne. Kən ilau kəmioal əpen-əpenə e nagwənən ikin rəha lafet rəha Nuhagego-inən.

Iesu tēmən-iarəp mēmə Jutas otegəhan-in-pən in

(Mat 26:20-25; Luk 22:14,21-23; Jon 13:21-30)

17Tinehnaipən, Iesu ne rəhan netəm tuelef kəmotuwa,

¹⁸motagwən e tepil. Iesu təmən-ipən kəm ilat məmə, “Ekatən pahrien kəm itəmat məmə itəmat kit u ikin-u roiu kotagwən kələh kitat min, otegəhan-in-pən io kəm rəhak min tikimir.”

¹⁹Kən rəhan min netəmim nikilat təmərou agin, kən moatətapəh kitiah kitiah ron məmə, “?Ei, Iərəmərə, pah u? ?Io?”

²⁰Kən Iesu təmən-ipən kəm ilat məmə, “Itəmat əm kit u netəm tuelef u koateer-pən pīret e pesin kitiah moatun.

²¹Kən io Neti Etəmim oekəike mimis məmə inu Naoa Rəha Uhgīn təmən mihin ne, mətə kəsi o suah əh kəut kəsua itəm otegəhan-in-pən io Neti Etəmim. !Təməwir əm məmə in təməsaiir-pa-mən!”

Iesu ne kəmotagwən e lafet rəha Nuhagego-inən

(Mat 26:26-30; Luk 22:15-20; 1 Kor 11:23-25)

²²E nian kəmoatagwən, Iesu təmos pīret məfak mən tagkiu ron kəm Uhgīn, kən məmkas mos-ipən kəm ilat məmə, “Otos, inu nipətik.”

²³Matig mos min kap wain məfak mən tagkiu ron kəm Uhgīn, mos-ipən kəm ilat, kən ilat rafin kəmotənim-pən lan.

²⁴Kən təmən-ipən kəm ilat məmə, “Inu nitak itəm tatol məmə nəniəkisən rəha nasituən in tatətul matəmegəh. Nitak u okəhtəg o netəmim tepət məmə otafəl rəkis rəhalat təfagə rat min.

²⁵Ekatən pahrien kəm itəmat məmə oekəsənim minən wain u mətəarus-pən oepənənim min ikin Uhgīn otərəmərə ikin.”

²⁶Kən motan napuən, uarisig kəpanotiet motuwīn əpəh Nitot Rəha Nig U Olif.

Iesu təmən-iarəp məmə Pita otəpanən məmə in təruru Iesu

(Mat 26:31-35; Luk 22:31-34; Jon 13:36-38)

²⁷Kən Iesu təmən-ipən kəm ilat məmə, “Itəmat rafin un onəpanotagim-tənin io mətə-inu, Naoa Rəha Uhgīn tinəmən rəkis mihin aupən məmə Uhgīn otəpanoh etəmim rəha nehmən sipsip min, kən sipsip min okotaiu kitiah kitiah.

²⁸Mətə o nian oekəmegəh min, ekaupən-in itəmat muwīn əpəh Kalili.”

²⁹Məto Pita təmə, “Nat ərnaɣin ilat rafin okotagim-tənin ik, məto io əm un okol ekəsagim-təninən ik.”

³⁰Kən Iesu təmən-ipən kəm in məmə, “Iatən pahrien kəm ik məmə o lapin huə, nian mənig otəsimnənən əh mau kəiu, kən ik onakən mau kisil məmə nəkəruru io.”

³¹Məto Pita təmən əskasik məmə, “Nat ərnaɣin ekəkəike mimis kilau min ik, okol ekəsənən məmə ekəruru ik.” Kən rəhan rafin netəmim kotən min tahmen e Pita.

Iesu təmuwin matəfak əpəh Ketsemani

(Mat 26:36-46; Luk 22:39-46)

³²Kən lapin kəmotuwın əpəh kəmahwınu ikin kit, nərgin u Ketsemani, kən Iesu təmən-ipən kəm ilat məmə, “Otəpələh u ikin-u, pəs ekuwin məfak.”

³³Kən mit Pita, Jemes ne Jon motuwın, kən nikin tinatahmə pik, kən tinəto tərət agin.

³⁴Kən məmə, “Nikik titahmə pik, kən iuəhkir ekimis lan. Atəhaləpələh u ikin-u matəhalair.”

³⁵Kən muwin məsin min meiuaiu morin e nisip matəfak məmə, “Okəmə suatip kit min əh-ikin, pəs nian əfigəm u otəsuwamən ron io.”

³⁶Kən matəfak məmə, “Apa,” (u nipətin təmə rəhak tata), “ik nəkitun nolən natimnat min rafin. Awe, os-irəkis nahməən min u itəm okəpanotuwa. Məto əsolən rəhak nətəligən, məto ol nat naka itəm ik əm nakolkeike.”

³⁷Kən mitəlig-pa məto rəhan etəmim miləhal kinəhlapil. Kən tən-ipən kəm Pita məmə, “?Saimon, nakatapil, o? ?Tahro nəsairən-tu aua kitiəh əm?”

³⁸Kən mən-ipən kəm iləhal məmə, “Onakəhlair matəhaləfak matəhalehm wir məmə onakəsəhaluwınən e nelmi ios-ipən-os-ipən. Nikitəməhal tolkeike, məto nipətitəməhal təpou.”

³⁹Kən təmapəs min iləhal, mitəlig-pən min matəfak matən əm nat kitiəh.

⁴⁰Kən mitəlig-pa min, məto kinəhlapil min, minəhaləruru naiirən, kən minəhaləruru min məmə okəhalən-ipən naka kəm in.

⁴¹Təmuwin min kən mitəlig-pa mau ksil, məto kətəhlapil, kən təmən-ipən kəm iləhal məmə, “?Nakatəhalapil əh mətəhlameg? !Nahmen! Nian tinuwa məmə io Neti Etənim okegəhan-in-pən io e nelmi netəm nol təfagə rat.

⁴²!Halətul-ta, kotuwın! Əhaləplan, etənim u tategəhan-in-pən io, in tatuwa.”

Tikimir min rəha Iesu kəmotaskəlim in

(Mat 26:47-56; Luk 22:47-53; Jon 18:3-12)

⁴³Iesu tətatahghat əh, kən Jutas in e netəm tuelef rəhan min titaupən-in nimanin netənim. Neen kotəmik naip rəha nəluaginən, ne kəsou-əsou motuwa. Netəm min un, pris asol min, ne iəgətun min rəha Lou, ne netəm-iasol rəha netəm Isrel kəmotahl-ipa ilat.

⁴⁴Suah un tategəhan-in Iesu kəm ilat tinəmən rəkis kəm ilat məmə, “Suah əh oekətuilim-pən lan u, nəkotitun əm məmə suah əh in əh. !Nakotaskəlim motos motuwın motaskəlim wir!”

⁴⁵Kən əmun Jutas təmuwa iuəhkir o Iesu, kən mən məmə, “Iəgətun,” kən mətuilim-pən lan.

⁴⁶Kən netəm min əh kəmotuwa motaskəlim tiəkis.

⁴⁷Məto ilat kit rəha Iesu təmatətul iuəhkir olat təmew rəhan naip e nəmeen mətatip rəkis matəlgi slef kit lan rəha pris asol agin.

⁴⁸Kən Iesu təmə, “?Tahro nakotəmik naip asol rəha nəluaginən ne kəsou-əsou motuwa məmə onəkotiləs io? ?Nikitəmat təht məmə io emit netənim muwin kotəluagin o kapman, o kəm-naka io iohamnu itəm kit?

⁴⁹Nian min rafin kitat min itəmat əpəh e Nimə Rəha Uhgın ekatəgətun netənim ikin. ?Kən nakotahro məsotaskəlimən io? Məto nat Naoa Rəha Uhgın təmən, otəkəike muwa mol nıpahrienən lan.”

⁵⁰Kən rəhan min rafin netənim kinotapəs in, kən motagım-tənin.

⁵¹Kən etəm aluə kit itəm təməlkəhau-in niməhan kit, matuarisig-in Iesu, kən netəmim neen kəmotiləs, kiləs-arəpən lan,

⁵²kən rəhn niməhan tikis, taiu piəpiə əm magim.

Iesu təmətul e niganəmti kaonsel min

(Mat 26:57-68; Luk 22:54-55,63-71; Jon 18:13-14,19-24)

⁵³Kən titalugin əh, kəmos Iesu motuwın əpəh ima pris asol agin u katuəfimin rafin pris asol min, ne iəgətun min rəha Lou, ne netəm-iasol rəha netəm Isrel ikin.

⁵⁴Kən Pita tan təlig-təlig muarisig-in ilat muwın əpəh latuənu ima pris asol agin ikin. Kən təmuwın əpəh e iat matəpələh ilat mopael min rəha pris asol agin moatəto nigəm.

⁵⁵Kən pris asol min ne netəmim rafin rəha kaonsel kəmoategəs-in nipegnəmtin min neen e Iesu məmə okotohamnu ron. Məto kəsotehmən kit ne.

⁵⁶Kən netəmim tepət kəmotəiuə e Iesu, məto rəhalat nəghatən tətaiu pisin-pisin.

⁵⁷Kən neen kotətul moteiuə lan məmə,

⁵⁸“Emotəto təmən məmə otərəkin Nimə Rəha Uhgın u netəmim əm kəmotol e nelmilat, məto e nian tatol kisil lan, təpaniləkin min nitain u kəsolən e nelmitəm.”

⁵⁹Kəmotən nəhlan məto ilat min, rəhalat nəghatən tətaiu pisin-pisin.

⁶⁰Kən pris asol agin təmətul aupən-in ilat kən mən-ipən kəm Iesu məmə, “?Tahro nə səghatən? ?Tahro e nəghatən min əh itəm koatən-iarəp tatiləs pikən ik?”

⁶¹Məto Iesu təpnəpın əm mə səghatən, kən pris asol agin apon təmən-ipən min məmə, “?Tahro? ?Ik Mesaea u Neti Etəm katənwiwi?”

⁶²Kən Iesu təmə, “!Əwəh, io u! Onəpanotehm io Neti Etəmim ekatəpələh e rəhn matip Uhgın u nahgın tepət, kən panotehm min io e napuə e neai ekatuwa.”

⁶³Kən pris asol agin tearəsin rəhan natimnat məto-inu nikin təmərat o nəghatən rəha Iesu, kən məmə, “Okəsotegəs-in minən suah kit məmə otən min nat kit lan.

⁶⁴!Ninəmotəto rəkis tatəghat rat e Uhgın! ?Nakotahrətəlig? ?Okotahro suah u?” Kən ilat rafin kəmotən məmə otəkəike mimis.

⁶⁵Kən kəmotol milə e Iesu, kən neen kəmotagəh lan, neen kotəlis niganəmtin motoh kən motəmə, “!Ei, ik ien rəha Uhgın! !Ən-tu məmə pah u təməh ik!” Kən mopaël min rəha pris asol agin kəmotem.

Pita təmən məmə in təruru Iesu

(Mat 26:69-75; Luk 22:56-62; Jon 18:15-27)

⁶⁶Kən Pita təmətan əh əpəh ləhau e iat. Kən slef pətan kit rəha pris asol agin təmuwa.

⁶⁷Kən məplan tatəto nigəm, kən təmisilu wır məmə, “Ik min itəmlau Iesu etəm Nasaret nəmatuan.”

⁶⁸Məto Pita təmən-iamnin, kən məmə, “!əkəruru nat un nakatən,” kən muwin matətul əpəh e ket rəha iat. Kən mənig kit təmimnən.

⁶⁹Kən pətan un təməhm min ikin əh, kən mən-ipən kəm netəm kotətul əh-ikin məmə, “Suah u in ilat kit.”

⁷⁰Məto Pita təmən-iamnin min. Kən təsuwəhən, netəm kotətul əh-ikin kəmotən-ipən min kəm in məmə, “Nipahrienən, ik min ilat kit məto-inu ekotitun məmə ik etəm Kalili.”

⁷¹Məto tinətuoun maun-in nəratən min koatisi-pən o Uhgın moatuwa ron okəmə teiuə. Kən təmos noanawil məmə, “!əkəruru suah əh nakotəghat-in!”

⁷²Kən roiu agin-əh min mənig tinimnən min, kən nikin tinəht nəghatən rəha Iesu məmə təmən minu lan məmə, “Mənig otəsimmənən əh mau kəiu, kən ik onakən mau kisil məmə nəkəruru io.” Kən Pita tinəto tərət kən mətasək.

Mak 15

Iesu tēmōtul e nīganēmti Pailat (Mat 27:1-2,11-14; Luk 23:1-5; Jon 18:28-38)

¹Kən laulaugin agin pris asol min, ne netəm-iasol rəha netəm Isrel, ne iəgətun min rəha Lou, ne netəmim min rafin rəha kaonsel kəmotuəfimin ilat min, kən moatələhəu nəghatən kit mēmə okotohamnu Iesu. Kəmotən-ipən kəm netəmim neen mēmə okotəlis Iesu kən motit motuwīn motəhlman-pən e nelmi Pailat, u kapman asol rəhalat.

²Kən Pailat tēmətapəh ron mēmə, “?Ik kig rəha netəm Isrel?” Kən mətō Iesu tēmə, “Ik nəmən mihin.”

³Kən pris asol min kəmotən-iarəp nolən tepət lan.

⁴Kən Pailat tēmətapəh ron mēmə, “?Tahro nakəsuhalpīnən? ?Nəmətō kəmotən nīpəgnəmtin tepət lam?”

⁵Mətō Iesu təsəghat minən, təmərnapīn əm, kən Pailat narmin tēmīwig ron.

Pailat tēmən mēmə Iesu otəkəike mimis (Mat 27:15-26; Luk 23:13-25; Jon 18:39–19:16)

⁶E nup min rafin, nian katol lafet lan rəha Nuhagego-inən, nolən rəha kapman u Pailat mēmə in otahl-iarəp suah ərnapīn əm kit e kalapus, suah kit itəm netəm Isrel kəmoatən.

⁷Kən suah kit u, nərgin u Parapas, tətatiɡ e kalapus ilat in min neen, mətō-inu kəmotohamnu etəmim e nian kəmatəmou o kapman.

⁸Kən nīmanin netəmim kəmotuwa o Pailat motən-ipən kəm in mēmə otol əm nat kitīəh tahmen-pən e itəm tatol nian min, mahl-iarəp suah kit e kalapus.

⁹Kən Pailat tēmətapəh olat mēmə, “?Nakotolkeike mēmə ekahl-iarəp kig rəha netəm Isrel?”

¹⁰Təmən nəhlan mətō-inu in tinitun rəkis mēmə pris asol min kəmos-ipən Iesu e nelmin mətō-inu kotetəhak.

¹¹Mæto pris asol min kəmotəkəike kəm nimanin netənim məmə okotəuhlin nətəligən rəhalat. Kən ilat kəmotətapəh o Pailat məmə otahl-iarəp Parapas, mæto sənəmə Iesu.

¹²Kən Pailat təmətapəh olat məmə, “?Mæto ekahro e suah u itəmat nəmotəmə in kig rəha netəm Isrel?”

¹³Kən kəmotagət əfəməh məmə, “!Okəht-ipən e nig kəməluau!”

¹⁴Kən Pailat təmətapəh min olat məmə, “?Nolən tərət naka u suah u təmol?” Mæto kəmotagət əfəməh min məmə, “!Okəht-ipən e nig kəməluau!”

¹⁵Kən Pailat təmolkeike məmə otol nīkilat, kən mahl-iarəp Parapas, kən məhlman-pən Iesu e nelmi rəhan mopael min məmə okotalis motətu-pər e nig kəməluau.

Mopael min kəmoatol mīlə e Iesu

(Mat 27:27-31; Jon 19:2-3)

¹⁶Kən mopael min rəha Pailat kotīləs Iesu motuwīn əpəh imə e nimə asol rəha kapman, katən məmə Praetorium. Kən kəmotəun-in rafin mopael min kotuwa kitəlau lan.

¹⁷Kən motuwīn-in-pən kot asiə tahmen əm e kot rəha kig, kən motuarin-uarin nol itəm tol nihlən-nihlən motol hat lan itəm tahmen e hat rəha kig, kən motəfauin-pən kəm in.

¹⁸Kən motol mīlə lan motəmə, “Itimat ekotos-ipinə nisaiiən kəm ik, kig rəha netəm Isrel.”

¹⁹Kən motoh rəhn-kapə e noanig, motagəh lan, motisin nulilat məmə koatos-ipən nisaiiən eiuən kəm in.

²⁰Nian kəmotahkul rəkis lan, kən motapeg rəkis kot asiə un, kən motuwīn-in-pən əh rəhan natimnat, kən motit motuwīn məmə okotəht-ipən e nig kəməluau.

Kəməht-ipən Iesu e nig kəməluau

(Mat 27:32-44; Luk 23:26-43; Jon 19:17-27)

²¹E suatip, kəmotehm suah kit etəm Saerin, nərgin u Saimon. In tata rəha Aleksanta ne Rufas. Tatuwin Jerusalem, kən moatəkəike kəm in məmə otiləs nig kəluau.

²²Kən kəmotit Iesu motuwin əpəh ikin kit katən məmə, Kolkota, u nipətin təmə Louipil-uipil.

²³Kən kəmos-ipən wain u kəmol piləh-piləh ilau mərisin u mir məmə otənim pəs təsətoən nahməən e nipətin, məto tapəs nənimən.

²⁴Kən kəmotiləs Iesu motuwin motəht-ipən e nig kəməluau. Kən motoor rəhan natimnat moturin tais ron məmə pah otos.

²⁵Kəmətu-pər Iesu e nig kəməluau e nain kilok laulaugin,

²⁶kən motəte-rəkis nipəgnəmtin u kəmotehm lan məmə, In kig rəha netəm Isrel, kən motəht-ipən nəghatən un e rəhan nig kəməluau.

²⁷Kən etənim kəiu itəm kətuəluagin o kapman mətioh netənim, kəmətu-pər ilau e nig kəluau, kit e nikalin matip, kit e nikalin mol.

28

²⁹Kən netənim itəm kotaliwək e suatip, moatanu-anu rəhn-kapəlat kəm in moatol milə lan motəmə, “Ei, ik nəməən məmə onakərəkkin Nimə Rəha Uhgın kən nian tatol kisil lan u, nəpaniləkin min in pisin.

³⁰Eiuaiu-tu e nig kəməluau un, mosmegəh atip-tu lam.”

³¹Pris asol min ne iəgətun min rəha Lou kəmotol əm nat kitəh motalah-əmnu motəmə, “Təmasitu e netənim tepət, məto okol təsasitu atipən lan.

³²Təwir pəs kitat kotehm-tu Mesaea u, kig rəha netəm Isrel, oteiuaiu e nig kəməluau pəs kitat koatəplan motahatətə lan.” Kən etənim mil u katəhaləkul iləhal Iesu kinatuən min nəghatən rat lan.

Iesu tinimis

(Mat 27:45-56; Luk 23:44-49; Jon 19:28-30)

³³Kən e tuelef klok mətoarus-pən tri klok, napinəpən təmeiuaiu mirəfin nat.

³⁴Kən e tri kilok Iesu təmagət əfəməh məmə, “!Eloi, Eloi! ?Lama sapaktani?” Nipətin rəhan nəghatən təmə, “!Uhgın rəhak, Uhgın rəhak! ?Tahro nakatapəs io?”

³⁵Netənim neen kəmoatətul əh-ikin kəməsotəto wirən nəghatən un, kəmotən məmə, “Haləto-tu. Tətaun-in Elaija.”

³⁶Kən ilat kit təmaiu muwin miuw-pən wain u tagin e nat kit tame-ame tahmen e katən, maru-pər e nuwig tuwin o Iesu məmə otənim. Kən məmə, “Pəs-tu kotehm-tu məmə Elaija otuwa mīləs-iəhau, o kəp.”

³⁷Məto Iesu təmagət əfəməh min, kən rəhan namegən tiet.

³⁸Kən əpəh e Nimə Rəha Uhgın, niməhan itəm tatəkulosig-in Ikin Tasim Agin Ikin, təməhap məsin kəiu əpəh ilis mətoarus-pa əpəh ləhau.

³⁹Kən etəm-iasol rəha mopael min itəm təmatətul e nīkali Iesu, təmehm məmə təmimis min-nulan, kən in təmən məmə, “!Nīpahrienən, suah u in Neti Uhgın pahrien!”

⁴⁰Nipitan neen kəmoatətul isəu motasipa moatehm. Ilat neen u Meri Maktala, ne iahunin iti Jemes əkəku ne Joses, ne Salome.

⁴¹Iləhal kəmatəhalətəu-pən Iesu nian təmətətig Kalili, mətəhlasitu lan. Ilat nipitan tepət kəmotər kan əpəh Jerusalem ilat Iesu.

Josep təməhluaig-in Iesu

(Mat 27:57-61; Luk 23:50-56; Jon 19:38-42)

⁴²Kən nian əh Iesu təmimis lan, in nian rəha nol əpen-əpenən natimnat rəha Sapat, kən olawigin nian rəha Sapat, kəsolən wək lan. Tinehnaipən,

⁴³Josep in etəm Aramatia tinuwa. In etənim kit rəha kaonsel itəm katisiai-in. In nīkin təməht pik nərəmərən rəha Uhgın. Kən təməsəginən muwin ima Pailat ikin matətapəh-in nipəti Iesu.

⁴⁴Nian Pailat təməto məmə Iesu tinimis rəkis, kən təmaut maun-in etəm-iasol rəha mopael min matətapəh ron məmə, “?Katən pahrien məmə Iesu tinimis rəkis?”

⁴⁵Məto etəm-iasol rəha mopael min təmə, “Nipahrienən, tinimis rəkis.” Pailat təməto nəghatən un kən megəhan-in-pən nipəti Iesu kəm Josep.

⁴⁶Kən Josep təmuwin mos-nəmtin niməhan ruən kit muwa miləs-iəhau Iesu e nig kəməluau malpin lan, miləs muwin mələhəu-pən e nipəg kəpiel u kinəmel rəkis məmə okol suwit ikin. Kən məsəupəlpəlin-pən kəpiel asol kit mahtosig-in-pən nipəg kəpiel un lan.

⁴⁷Kən Meri Maktala ne iahunin iti Joses, ilau kəmuəplan ikin-u kəmələhəu-pən Iesu ikin.

Mak 16

Iesu tinəmegəh e rəhan nimisən

(Mat 28:1-8; Luk 24:1-12; Jon 20:1-10)

¹Nian rəha Sapat tinuwa minuwın rəkis, kən Meri Maktala ne iahunin iti Jemes, ne Salome kəməhalos-nəmtin nat pien-pien min u nəmiəwilat təwir məmə okəhalol-pən e nipəti Iesu.

²Laulaugin agin mit tinatər e Sante, pətan miləhal un kəmatəhaluwın e suwit.

³Nian kəmatəhaluwın e suatip kən mətəhalən kəm iləhal min məmə, “?Karmə pah otasitu etəhal mahuin rəkis kəpiel asol əpəh e nipəg kəpiel?”

⁴Məto-inu kəpiel əh kəpiel asol. Məto nian kəməhaluwa iuəhkir, məhalətag-pən məhaləplan kinahuin rəkis kəpiel.

⁵Kəməhaluwın imə e nipəg kəpiel məhaləplan etəm aluə kit tatəpələh e rahləhal-matip, tatuwin e kot əfəməh ruən kit, kən iləhal kəmahlaut pik ron.

⁶Kən təmən-ipən kəm iləhal məmə, “Səhaləgin pikən. Natəhaleam-in Iesu etəm Nasaret, etəm kəmətu-pər e nig kəməluau, məto in tikə u ikin-u roiu. In tinəmegəh rəkis e rəhan nimisən. Halehm-tu nəmeen u kəmələhəu-pən ikin.

⁷Kən roiu onakəhaluwın məhalən-ipən kəm rəhan min netənim məsəhalapəsən Pita, məmə in otaupən matuwın Kalili, kən onəkotuarisig-in motuwın motehm əh-ikin məmə inu tinəmən rəkis mihin ne kəm itəmat.”

⁸Kəmahlaiu məhaliet e suwit məhlagim, mətō-inu kinəhaləgin pik matəhlesiəp. Kən məhaluwīn məsəhalənən nat kit ne kəm netəmim mətō-inu kinəhaləgin pik.

**[Nəghatən rəha Mak təmōl namnun ikin-u kən netəm pisin kotilpin ves 9
mətōarus-pən ves 20]
Iesu tēmiet-pa o Meri Maktala
(Mat 28:9-10; Jon 20:11-18)**

⁹Nian Iesu tēməmegəh min e Sante laulaugin agin, kən maupən miet-pa o Meri Maktala, aupən tēməhg-iarəp narmīn rat sepīn lan.

¹⁰Kən Meri tēmuwīn mən-ipən kəm rəhan min netəmim itəm kəmotan ilat min ilat aupən, mətō nīkilat titahmə pik kən motasək.

¹¹Mətō nian kəmotəto məmə Iesu tinəmegəh rəkis e rəhan nīmīsən, kən miet-pa o pətan əh, mətō ilat kəməsotənən nīpahrienən lan.

**Iesu tēmiet-pa o rəhan etəmim mil kəiu
(Luk 24:13-35)**

¹²Uarisig, Iesu tēmiet-pa o etəmim mil kəiu kəmiasipən Jerusalem mətian e suatip, mətō e nian əh nīpətīn təmōl pisin.

¹³Kən ilau kəmiatəlig min mian muən-ipən kəm ilau min neen, mətō ilat kəməsotən minən nīpahrienən elau.

**Iesu tēmiet-pa o rəhan netəm lepīn
(Mat 28:16-20; Luk 24:36-49; Jon 20:19-23; Wək 1:6-8)**

¹⁴Kən uarisig, Iesu tēmiet-pa min o rəhan netəm lepīn nian kəmotagwən matəhai ilat məmə, “Itəmat nakəsotahatətəən lak, rəhatəmat-kapə tiəkis pik.” Təməhai ilat mətō-inu kəsotahatətəən e netəm kəmotehm məmə tinəmegəh rəkis e rəhan nīmīsən.

¹⁵Kən mən-ipən kəm ilat məmə, “Otuwīn motən-iarəp Namnusən Təwīr kəm netəmim min e nītən min rafīn.

¹⁶Etəm otəto Namnusən Təwīr tahatətə lan kən mol baptais, Uhgīn otosmegəh. Mətō etəm təsahatətəən lan, Uhgīn otol nalpīnən asol kəm in.

¹⁷Kən netəm okotahatətə lak, Uhgīn otol ilat kotol nat pīspis mīn. Okotəhg-iarəp narmin rat tepət e nərgək, kən motəghat e nəghatən ik pīsin pīsin mīn.

¹⁸Ilat kotitun naskəlīmən sinek u tatus itəm, motitun nənīmən nat kətakonəlan, mətə okol təsərəkīnən ilat. Ilat motitun nələhəu-pənən nelmilat e netəm kotimis kotəmegəh.”

Iesu tinər matuwīn e neai

(Luk 24:50-53; Wək 1:9-11)

¹⁹Kən nian Iərəmərə Iesu tinəghat rəkis kəm rəhan mīn netəmim, kən Uhgīn tinos minuwīn e neai, kən in tatəpələh e nīkali Uhgīn matip, ikin rəha nəsanənən ne nisīaiiən.

²⁰Kən rəhan mīn netəmim kəmotiet motuwīn motamnus-iarəp rəhan nəghatən əpəh ikin mīn rafin. Kən Iərəmərə tətasiu elat matol nəmtətīn tepət. Kən nəmtətīn mīn əh koatol nəfigəmən məmə rəhalat nəghatən in nīpahrienən.

Luk

Luk 1

¹Teofilas, ik etəm-iasol katisiai-in ik. Netəmim tepət kəmotalkut pik məmə okotəte rəkis ətuatip namnusən rəha natimnat min itəm Uhgın təmol ilugin itimat.

²Kəmotəte rəkis natimnat itəm netəmim neen kəmotən, netəm min əh kəmotatig e nian rəha nətuounən rəha natimnat min əh, kən ilat kəmotehm ətuatip e niğanəmtilat natimnat min əh, kən moatən-iarəp.

³Kən io emitəp wir nəghatən min lan məmə ekitun wir natimnat min əh e nətuounən rəhan, kən roiu rəhak nətəligən məmə təwir io min ekəte rəkis ətuatip natimnat rafin min əh məmə onakatafin. Ekəte ətuatip natimnat itəm kəmotaurisig, kən natimnat itəm kəmotuarisig.

⁴Ekolkeike məmə ekən natimnat min əh kəm ik məmə nəkitun ətuatip nipahrienən rəha namnusən itəm kəmən rəkis.

Nagelo təməghat-in naiirən rəha Jon Baptais

⁵E nian rəha suah kit, nərgin u Herot Asol, kig rəha Jutia, inəh pris kit nərgin u Sekaraea. In kit e pris min kətaun-in ilat məmə, Pris min rəha Apia, u təmişi-pən e noanol rəha pris u Aron aupən ikin. Rəhan pətaguihl, nərgin u Elisapet, kən in min təmişi-pən e noanol rəha pris u Eron.

⁶Kən ilau kuətuatip e niğanəmti Uhgın, kən e nian rafin katuətəu-pən wir nolən rəha Lou ne nəghatən min rəhan, kən məsuərəkinən kit.

⁷Məto nətilau tikə məto-inu Elisapet, in təməseməkən mətoahgin minipitaguuhl, kən ilau kərən kinuaguuhl.

⁸Kən nian ətuatip tinuwa məmə, Pris min rəha Apia okotuwın e Nimə Rəha Uhgın motol rəhalat wək. Kən Sekaraea, in min təmuwın mol wək rəha Uhgın.

⁹E nolən rəha pris min, ilat koatərakin kəpiel əkəku min kotahmen-pən e taes məmə okotegəs-in məmə otəgətun pah otol wək e Nimə Rəha Uhgın məmə

otuwaan nat pien-pien itəm tatuwin kəm Uhgın. E nolən əh təməgətun Sekaraea.

¹⁰Kən e nian itəm təmuwin imə matuwaan nat pien-pien, nımanin netəmim tepət koatətul ihluə katəfak.

¹¹Kən nagelo kit rəha Uhgın tiet-arəpa ron matətul əh e rəhan matip ikin, itəm katuwaan nat pien-pien min ikin.

¹²Kən nian Sekaraea təməplan, kən narmin təmiwig mətasiəp minəruru əfəməh nat, kən nəginən təmərıoah e nıkin.

¹³Məto nagelo təmən-ipən məmə, “Sekaraea, əsəginən, məto-inu Uhgın tinəto rəham nəfakən. Kən rəham pətaguihl Elisapet otıləs nətin kit iərman. Kən onakəkəike maun-in nərgin məmə Jon.

¹⁴Kən onakəto təwir kən magien, kən netəmim tepət okotagien o naiirən rəhan,

¹⁵məto-inu in otuwa etəm-iasol e nıganəmti İərəmərə. Kən in otəsənimən wain ne nənimən əskasik min. Kən Narmin Rəha Uhgın otərıoah e nəmegəhən rəhan, nian otətətig əh e nərpı rəhan mama, matuwin əm nulan nian rafin.

¹⁶Kən in otıuw-pa netəm Isrel tepət kotitəlig-pa o İərəmərə, Uhgın rəhalat.

¹⁷Kən in otətaupən-in İərəmərə e narmin ne nəsanənən rəha Elaija məmə in otəuhlin nətəligən rəha tata min koatitəlig-pən min o rəhalat nisualkələh min, kən in otəuhlin min netəm koatəht nəwia Uhgın okotuwa min e nenatigən rəha netəm kotətuatip. E nolən əh, in otol nəpen-əpenən o nəmegəhən rəha netəmim o nuwamən rəha İərəmərə.”

¹⁸Kən Sekaraea təmən-ipən kəm nagelo məmə, “?Oekahro min-nulan mitun məmə nat u otuwa mol nıpahrienən? Məto-inu io enaguihl rəkis, kən rəhak pətan tinipitaguihl min.”

¹⁹Kən nagelo təmən-ipən kəm in məmə, “Io, nərgək u Kapriel, kən io iatətul e nıganəmti Uhgın e nian rafin. Kən in təmahl-ipa io məmə ekuwa məghat kəm ik, kən mən-ipinə namnusən təwir u.

²⁰!Ətəlig-in-tu! Naməm oteko kən onakəsagətən mətəarus-pa nakehm nıpəti nəghatən u, mətə-inu nəməsənən nıpahrienən e rəhak nəghatən. In otuwa mol nıpahrienən e nian ətuatıp rəhan.”

²¹Kən e nian əh, netəmim kəmoatəsahgin Sekaraea, kəmoatətəlig-in məmə tahro tınan tınuwəh-pık nəhlan e Nımə Rəha Uhgın.

²²Kən nian in təmuwa ihluə, mətə tınəruru nəghatən, kən ilat kınotıtun məmə in təmehm nat kit tahmen e nıpılaiirən. In təmasgəwın-asgəwın əm e nelmin kəm ilat, məsagətən mətə-inu namən təmeko.

²³Nian rəhan wək rəha pris e Nımə Rəha Uhgın tınol namnun, kən in təmitəlig-pən latuənu.

²⁴Kən təsuwəhən, rəhan pətəguıhl tınəpəs məwıg e suakəku. Kən e məwıg faif, pətəguıhl u in təmatəhluaig əm latuənu,

²⁵kən in təmən məmə, “Inu wək əm rəha İərəmərə. Aupən ikin, nətik tikə kən etaulis. Mətə roiu əh, Uhgın təmol təwir ron io, kən nıkin tagien məmə ekiləs nətik, kən io esaulis minən e nıganəmıti netəmim.”

Nagelo təmən-iarəp məmə İesu otair

²⁶Nian Elisapet tınəpək-əpək mınos məwıg sikis, Uhgın təmahl-ipən rəhan nagelo, nərgın u Kapriel, məmə in otuwın e nıtən Kalili e taon kit, nərgın u Nasaret.

²⁷In təmos nəghatən kit matuwın rəha pətan kit itəm İərman təsuwınən əh mehm, mətə kınən rəkis məmə okos rəhan kətım kan mə rəha suah kit, nərgın u Josep. In mıpi Kig Tefıt rat. Kən pətan əh, nərgın u Meri.

²⁸Kən nagelo təmuwın met-arəpən, kən mən kəm in məmə, “Təwir, Meri. Uhgın təmələhəu rəhan nəwırən kəm ik, kən mətatig itəmlau min.”

²⁹Mətə Meri tınatəruru əfəməh nəghatən əh, kən nıkin tınatəht pık məmə nıpəti nəghatən əh tahro.

³⁰Kən nagelo təmən-ipən kəm in məmə, “Əsəginən, Meri, mətə-inu Uhgın təmitəpun məmə in otawte-in rəhan nəwırən kəm ik.

³¹Kən inəh, ik onakəpəs-in məwig e nətim kit, kən mīləs iərman. Kən onəkaun-in nərgin məmə İesu.

³²In otuwa etəm-iasol kən etəm kəike, kən okaun-in məmə Nəti Uhgın İlis Agin. Kən İərəmərə Uhgın otol in tuwa Kig, tahmen-pən əm e tipin rat Tefit.

³³Kən in otərəmərə e noanol min rafin itəm koatisi-pən e Jekop, kən rəhan nərəmərəən otatig lilin matuwın matuwın nammun tikə.”

³⁴Kən Meri təmən-ipən kəm nagelo məmə, “?Oekahro min-nulan mīləs suakəku kit okəmə esətəu-pənən əh iərman?”

³⁵Kən nagelo təmən-ipən kəm in məmə, “Narmin Rəha Uhgın otuwa matig lam, kən nəsanənən rəha Uhgın İlis Agin otəfətain ik. Kən inəh, suakəku onəkiləs, okaun-in məmə in təmisi-pən o Uhgın, kən in Nəti Uhgın.

³⁶Kən iatən kəm ik məmə ik kit Elisapet tinəpək-əpək rəkis in nətin kit iərman, nat ənnapin in tinipətaguihl rəkis. Kəmatən lan məmə pətaguihl itəm təseməkən, məto roiu əh tinəpəs məwig sikis rəkis e nətin.

³⁷Natimnat min u tatətəu-pən nəghatən rəha Uhgın məmə, ‘Uhgın titun nolən natimnat rafin, kən nat kit təsiəkisən ron.”

³⁸Kən Meri təmən-ipən məmə, “Əwəh, io pətan iolwək əm rəha İərəmərə. Pəs in otol kəm io nat naka itəm ik ninən rəkis.” Kən nagelo təmapəs in, kən matuwın.

Meri təmaliwək matuwın məmə otətag Elisapet

³⁹Uarisig lan təsuwəhən, Meri təmiet iman ikin maliwək uəhai əm matuwın əpəh ikin e nitot min e taon kit rəha nitən Jutia məmə otətag in kit Elisapet,

⁴⁰kən in təmuwın latuənu rəha Sekaraea, muwın imə matən təwir kəm Elisapet.

⁴¹Kən e nian Elisapet təməto nəghatən rəha Meri, suakəku un itəm tətətig əpəh e nərpın təmaut, kən Narmin Rəha Uhgın təmər e niki Elisapet.

⁴²Kən təmagət əfəməh məmə, “!Uhgın təmol təwir kəm ik taprəkis-in nipitan min rafin, kən in otol təwir kəm suakəku itəm onəkiləs!

⁴³Ekisitunən məmə o naka Uhgín təmól təwír kəm io min-nulan məmə mama rəha Iərəmərə rəhak təmuwa mətág io.

⁴⁴Iatən nəhlan mətó-inu e nian ematəto rəham nəghatən, kən suakəku un itəm tətátig əpəh e nərpík təmagien maut.

⁴⁵Kən Uhgín otól təwír kəm ik mətó-inu nəmən nípahrienən e nəghatən itəm Iərəmərə təməghat-in lam.”

Napuən rəha Meri

⁴⁶Kən Meri təmən məmə, “E nəmegəhən rafín rəhak, iatənwiwi Iərəmərə,

⁴⁷kən níkik tətágien pík o Uhgín Iosmegəh rəhak,

⁴⁸mətó-inu io pətan iolwək əm rəhan itəm io nat əpnəpín əm, mətó níkin tətəht io. Kən roiu ne matuwín, netəmim rafín okotən məmə Uhgín təmól təwír kəm io;

⁴⁹mətó-inu Uhgín u nəsanənən rəhan in iahgin, in təmól nat píspis mín təwír pík agín kəm io, kən nərgín in tasim.

⁵⁰Kən in tətəsəkitun netəm mín u itəm koatisiai-in in, inu netəm rəha noanol mín aupən íkin mətóarus-pa itəm rəha noanol mín kəsotaiirən əh.

⁵¹In təmól nat píspis mín e nəsanənən e nelmín. In təmahl-iarəp netəm kotalusit e nətəligən rəhalat.

⁵²In təmos-iəhau iərəmərə mín e rəhalat nərəmərəən, kən in təmíləs-ipər netəm mín u rəhalat nətəligən teiuaiu.

⁵³Netəm itəm nəumis tatus ilat, in tətəgwən ilat e nagwənən itəm təwír, kən netəm rəhalat nautə tepət, in tətahl-iarəp ilat kən nat təkə e nelmilat.

⁵⁴Uhgín təmasitu e noanol mín rəha Isrel u rəhan iolwək mín, kən təməsaluinən məmə otasəkitun

⁵⁵Epraham ne rəhan mín noanol, matuwín matuwín nammun təkə.”

⁵⁶Kən Meri tətátig ilau Elisapet mətóarus-pən məwíg kísil, kən in təmítəlig-pən mín əpəh iman íkin.

Naiirən rəha Jon Baptais

⁵⁷Kən nian ətuatip rəha Elisapet tinuwa məmə otemək lan, kən təmiləs nətın iərman.

⁵⁸Kən netəmim itəm kotatig iuəhkir ron ne rəhan min noanol, kəmotəto namnusən əh məmə İərəmərə təmasəkitun mol təwir pik kəm in nəhlan, kən ilat kəmotuwa motol kitəh ilat min məmə okotagien kələh.

⁵⁹Nian suakəku əh tinos nian ilat eit, kən ilat kəmotuwa məmə okotəhg-ipən. Kən iuəhkir kotaun-in nərgin məmə iahuni rəhan tata Sekaraea,

⁶⁰məto rəhan mama tən məmə, “Kəpə. Okaun-in nərgin u məmə Jon.”

⁶¹Kən ilat kəmotən kəm in məmə, “?Tahro? Rəham kit noanol tikə itəm kotaun-in nərgin əh Jon.”

⁶²Kən kəmoatəghat e noanelmilat moatətapəh o Sekaraea məmə in tolkeike məmə otaun-in-pən nərgin məmə pah.

⁶³Kən in təmətapəh o nat kit məmə in otəte rəkis nat kit lan, kən təməte-pən məmə, “Nərgin u Jon.” Nian kəmotehm, narmilat təmiwig pik ron.

⁶⁴Kən e nian əm əh, namən tinəg-ətuatip, kən tinatəghat matənwiwi Uhgın.

⁶⁵Kən ilat rafin itəm kotatig iuəhkir kəmotəgin. Kən netəmim kəmotəghat-in natimnat min əh titəlau ikin min rafin e narit min nitən Jutia.

⁶⁶Kən netəmim rafin itəm kəmotəto namnusən əh, kən kəmoatətəlig-in əm, kəmoatətapəh məmə, “?Suakəku əh, otuwa etəmim naka?” Kəmoatən min-nulan məto-inu kəmotəplan əm məmə nəsanənən rəha İərəmərə tətatig lan.

Sekaraea təmən-iarəp nəghatən itəm Uhgın təmos-ipən kəm in

⁶⁷Kən Narmin Rəha Uhgın təmər e niki Sekaraea, tata rəha Jon, kən in təmən-iarəp nəghatən itəm Uhgın təmos-ipən kəm in. Kən təmən min-nulan məmə,

⁶⁸“Pəs kotənwiwi İərəmərə, u Uhgın rəha netəm Isrel, məto-inu in təmuwa məmə otasitu e rəhan min netəmim, kən təməmki-rəkis ilat e nelmi tikimər min rəhalat.

⁶⁹In tēmīlēs-ipər iosmegəh tēsanən itəm otosmegəh kitat, in tēmisi-pən e noanol rəha iolwək rəhan Tefit.

⁷⁰Kən in tahmen-pən əm e nəghatən u itəm Uhgīn tīnəmən rəkis kəm kitat e nəghatən rəha ien min rəhan aupən.

⁷¹In tīnəmən-iəkis rəkis mēmə otosmegəh kitat o tīkimīr min rəhatat ne netəmim rafin itəm kotetəhau kitat.

⁷²In tēmīlēs-ipər iosmegəh əh mēmə otasəkitun pipi rat min rəhatat, kən tēsaluinən rəhan nəghatən itəm in atip təmən e rəhan nənīəkisən rəha nasituən,

⁷³inu nənīəkisən itəm təmən kəm pipi rat Epraham.

⁷⁴In tēmīlēs-ipər iosmegəh əh mēmə otosmegəh kitat, kən mīlēs-irəkis kitat e nelmi tīkimīr min rəhatat, mēmə nian min rafin e nəmegəhən rəhatat, kitat kotitun nol wəkən rəhan e nīganəmti Uhgīn, kən məsotəginən,

⁷⁵kən kitat okotasim, kən nəmegəhən rəhatat otətuatip e nian min rafin.

⁷⁶“Kən ik, nətīk, okaun-in ik mēmə ien rəha Uhgīn Ilis Agin, mətō-inu ik onakaupən-in lərəmərə mēmə onəkōl əpen-əpenə e rəhan suatip.

⁷⁷Ik onakən-iarəp kəm rəhan min netəmim mēmə Uhgīn otosmegəh ilat nian in otafəl rəkis rəhalat təfagə rat min.

⁷⁸In otol mətō-inu, in tətəsəkitun kitat matol təwir kəm kitat. E nasəkitunən rəhan, Kristo otuwa otat tahmen-pən e mītgar təmər e neai,

⁷⁹mətasiəgəpīn kitat netəm koatatig e napinəpən ne əpəh ikin nīmīsən tatoh itəm ikin, kən matit wir nelkitat e suatip rəha nəməlinuən.”

⁸⁰Kən suakəku təmatepət e nīpətīn, kən narmīn rəhan tēsanən. Kən nian rafin in tətatiɡ əpəh ikin taruən-aruən ikin matəsahgin nian rəhan otuwa itəm otətūoun wək lan e nīganəmti netəm Isrel.

Luk 2

Naiirən rəha Iesu

(Mat 1:18-25)

¹E nian min əh, suah kit etəm Rom, nərgin u Sisa Okastas, in tatəramərə nitən min rafin rəha Rom. In təmələhəu lou kit tətətig məmə okafin rafin netəmim itəm koatatig rafin əh-ikin.

²Inu nafinən netəmim itəm kəmaupən kol, kən Kuarinias in kapman rəha Siria.

³Kən o nəghatən əh rəha nafinən, netəmim rafin kotəkəike moatitəlig-pən iməlat min ikin itəm kəmotaiir ikin məmə okafin ilat, kən kəte rəkis nərgilat e naoa rəha kapman.

⁴Kən Josep ne Meri kəmiaiet e nitən Kalili e taon kit, nərgin u Nasaret, mian əpəh nitən Jutia e taon kit, nərgin u Petlehem, imə Kig Tefit aupən. Ilau kəmian ikin əh məto-inu Josep in mipi Tefit rat.

⁵Ilau Meri katian məmə okos nərgilau. Kinagətosig-in rəkis Meri məmə in otəpanətəu-pən Josep, kən Meri in tinəpək-əpək-in rəkis suakəku kit.

⁶Nian ilau əpəh Petlehem, kən nian rəha Meri tinuwa məmə otemək-in nətən.

⁷Kən suakəku itəm in təmaupən maiir, in iərman. Kən təmalpin e niməhan, mələhəu-pən e pokis kit itəm katələhəu-pən kras u nat megəh min kotagwənpən ikin. Təmol min-nəhlan məto-inu nimə tikə məmə okuapil ikin, kən ilau kətuapil əm əh e nimə rəha nat megəh min.

Iolwək e sipsip min ne nagelo min

⁸Kən e nikali Petlehem, iolwək e sipsip min koatehm wir rəhalat sipsip min lapin.

⁹Kən nagelo kit rəha Iərəməərə təmiet-arəpa olat, kən nəhag-əhagən asol rəha Iərəməərə təmasiəgəpin ilat, kən kəmotəgin pik.

¹⁰Məto nagelo təmən kəm ilat məmə, “Əsotəginən, məto-inu io iatuwa məmə ekos-ipinə namnusən təwir kəm itəmat itəm otol niki netəmim kotagien pik, kən namnusən u in rəha netəmim rafin.

¹¹Əpəh e taon rəha Kig Tefit, suakəku kit təmaiir-pa u-roiu. In Iosmegəh, kən in Kristo itəm Uhgın təmən aupən məmə otahl-ipa otəmat, kən in Iərəməərə.

¹²Inu nāmtətin rəhatəmat: onəkotehm suakəku kəmalpin e niməhan, kən kələhəu-pən e pokis kətagwən-pən nat megəh min ikin.”

¹³Kən roiu agin-əh min, nagelo min tepət kəmotiet-arəpa moatətul ilat min, moatənwiwi Uhgīn, moatən məmə,

¹⁴“Katənwiwi Uhgīn əpəh ilis ilis agin-əh e neai. Kən əpəh ləhau e nətueintən u, netənim itəm niki Uhgīn tətagien olat, ilat okotatig e nəməlinuən.”

Iolwək e sipsip min kəmotuwīn motehm Iesu

¹⁵Nian nagelo min kəmotapəs iolwək e sipsip min motitəlig-pən əpəh e nego e neai, kən iolwək e sipsip min kəmotən kəm ilat min məmə, “Pəs kotuwīn Petlehem motehm-tu nat əh itəm Iərəmərə təmən kəm kitat.”

¹⁶Kəmotəruməhlin uəhai əm motuwīn motehm Meri ne Josep ne suakəku itəm kəmuələhəu-pən e pokis itəm kətagwən-pən nat megəh min ikin.

¹⁷Nian kəmotuwīn motehm rəkis suakəku u, kən kəmotamnus-iarəp nəghatən rəha suakəku u itəm kəmos o nagelo.

¹⁸Kən netənim rafin itəm kəmotəto nəghatən əh rəha iolwək e sipsip min, ilat kəmotaut, narmilat təmiwig pik ron.

¹⁹Məto Meri təmatos əm e nikin natimnat min u rafin, matətəlig-in e nian min.

²⁰Kən iolwək e sipsip min kəmoatitəlig, moatiləs-ipər nərgi Uhgīn moatənwiwi in o natimnat rafin itəm kəmotəto kən motehm, tahmen-pən əm e inu nagelo təmən-ipən mihin kəm ilat.

Kəmaun-in nərgi Iesu.

²¹Nian suakəku u tinos nian eit itəm təmaiir lan, kən kəhg-ipən in tatətəu-pən Lou rəhalat, kən kaun-in nərgin məmə Iesu, nərgin u itəm nagelo təmən-ipən kəm Meri aupən ikin, nian in təməsəpək-əpək-inən əh.

Josep ne Meri kəmiales Iesu mian e Nimə Rəha Uhgīn

²²Nian suakəku kit tətaiir, rəhan mama ne tata okuəike mioal sakrifais rəha naruətuəhən tatətəu-pən Lou rəha Moses. Kən inəh, tinuwa ətuatip e nian

rəha Josep ne Meri məmə okioal nəhlan. Kən kialəs suakəku un mian əpəh Jerusalem məmə okioas-ipən kəm İərəmərə.

²³Inu tatətəu-pən əsas Lou rəha İərəmərə itəm təmən məmə, “Suakəku iərman min itəm kaupən katiləs ilat, okəkəike katos-ipən ilat kəm Uhgın məmə rəhan.”

²⁴Kən ilau kəmian Jerusalem o nat kit min, məmə ilau okioas mak kəiu o iouen kəiu, kən mohamnu matioas-ipən kəm Uhgın o naruətuəhən, tahmen-pən əm e Lou rəha İərəmərə tatən mihin.

Simeon təmehm İesu

²⁵Kən inəh etəmim kit tətətig əh Jerusalem, nərgin u Simeon. Rəhan nəmegəhən in tətətip wir, kən nian rafin tatətəu-pən nəghatən rəha Uhgın. Kən in tatəsağın nuwamən rəha Kristo itəm otuwa mosmegəh netəm Isrel lan. Kən Narmin Rəha Uhgın təmuwa mərioah e nikin.

²⁶Narmin Rəha Uhgın tinən rəkis kəm in məmə otəsimisən mətoarus in otehm Kristo itəm İərəmərə təmən məmə in otahl-ipa.

²⁷Kən Narmin Rəha Uhgın təməuhlin nikin məmə in otuwın e Nimə Rəha Uhgın. Kən Josep ne Meri kəmialəs suakəku u İesu mian e Nimə Rəha Uhgın məmə ilau okioal natimnat rafin itəm Lou tatən.

²⁸Kən Simeon təməplan İesu, kən təmiləs məgəfəlin, kən matənwiwi Uhgın, mən-ipən məmə,

²⁹“İərəmərə, nəmol rafin rəham nəghatən o nəniəkisən kəm io, iolwək əm rəham. Kən roiu, egəhan-in io məmə ekimis-ta e nəməlinuən,

³⁰məto-inu enəplan e niganəmtək suakəku u itəm otosmegəh netəmim.

³¹Ik nəmol əpen-əpenə məmə in İosmegəh, kən netəmim rafin okotəplan.

³²In otuwa nəhag-əhagən, kən otəgətun rəham suatip kəm İaihlua min, kən netəmim okotiləs-ipər rəham min netəm Isrel o İosmegəh əh.”

³³Kən tata ne mama rəha suakəku u, narmilau təmiwig o nəghatən min itəm Simeon təmən lan.

³⁴Kən Simeon tēməfak mēmə nəwīrən rəha Uhgīn otuwīn olau. Kən in tēmən kəm Meri itəm in mama rəha suakəku mēmə, “Onakatehm, Uhgīn tēmītəpun mēmə suakəku u otol mēmə netəmim tepət əpəh Isrel okoteiuaiu motorin, kən tepət min okotər. Kən in otuwa nəmtətin kit itəm netəmim tepət okotəghat rat lan mēmə,

³⁵netəmim okotəplan nətəlīgən mīn e nīki netəmim tepət. Kən ik Meri, nīkim otitəgīt tahmen e suah kit təmaru nīkim e naip asol.”

Ana tēmehm Iesu

³⁶Kən pətaguīhl kit əh-ikīn tətətig, nərgīn u Ana, kən in ien kit. In nəti Fanuel, etəmim kit itəm tēmisi-pən e noanol rəha Aser aupən ikīn. Pətaguīhl əh, rəhan nup tepət. Nian təmatetəm-aluə əm, kən mətəu-pən rəhan iaguīhl. Kən ilau kəmuan o nup sepīn əm, kən rəhan iaguīhl tēmimīs.

³⁷Kən pətan u təmətətig əm nulan mətəarus-pa nian əh in tīnuwa pətaguīhl kit. Kən roiu mīnos nup eiti-fo. Nian rafin in tətətig e Nīmə Rəha Uhgīn matəfak, inəh laulaugīn ne ehnaipən tatətuakəm mətəpəs nagwənən matəfak kəm Uhgīn.

³⁸Kən in təmuwa ikīn əh e nian ətuatip itəm Simeon tatəghat-in suakəku əh. Kən pətaguīhl u tatənwiwi Uhgīn ron, kən matəghat-in suakəku əh kəm netəmim rafin itəm kəmoatəsahgīn mēmə Kristo in otikīs netəm Isrel.

Josep ne Meri kəmian Nasaret

³⁹Nian Josep ne Meri, ilau kəmioal natimnat rafin u itəm Lou rəha Iərəməərə tēmən, kən kəməhalitəlīg-pən Kalili e taon Nasaret, imələhal ikīn.

⁴⁰Kən suakəku təmatepət muwa məskasīk, kən in tenatīg tenatīg wīr, kən nian rafin nəwīrən rəha Uhgīn təmərīoah e rəhan nəmegəhən.

Etəm aluə Iesu əpəh e Nīmə Rəha Uhgīn

⁴¹E nup mīn rafin, tata ne mama rəha Iesu katian Jerusalem mēmə okotol lafet rəha Nuhagego-inən.

⁴²Nian Iesu tinos nup tuelef, tēmätəu-pən ilau məhaluwın əpəh ilis e lafet əh, tahmen-pən əm e nolən rəha netəm Isrel.

⁴³Nian lafet tinol namnun, kən rəhan mın kinotitəlig mınəatuwin iməlat ikin, məto etəm aluə Iesu in tēməsətəu-pənən rəhan tata ne mama, in mətatig əm Jerusalem, məto ilau kəməsiatunən.

⁴⁴Nikilau tatəht məmə kətah in tətaliwək ilat nımanin netəmim rəhalat, kən ilat kəmotaliwək o nian apiəpiə kit. Kən ilau kəmuətuoun matueam-in o rəhalau mın, ne netəmim itəm kiatur ilat.

⁴⁵Məto nian ilau kəməsuehmən in, kən kəmiatəlig mueam-in mian Jerusalem.

⁴⁶Kəmueam-in nian kisil, kən muəplan e Nimə Rəha Uhgın, tatəpələh ilat iəgətun mın matətəlig-in ilat, kən matətapəh olat o natimnat neen.

⁴⁷Kən netəmim rafın itəm kəmotəto in, narmilat təmiwig pik o rəhan nitunən ne rəhan nuhalpinən nəghatən mın.

⁴⁸Kən nian rəhan tata ne mama kəmuehm, kən narmilau təmiwig pik ron. Kən rəhan mama təmən-ipən kəm in məmə, “Nətik. ?Nəmahro mol mın-nulan etimlau? !Əplan-tu! Itimlau rəham tata nikitimlau təməht pik ik, kən iakatuegəs-in pik ik.”

⁴⁹Kən in təmən kəm ilau məmə, “?Natuegəs-in io o naka? ?Nakəsiatunən məmə io ekəkəike mətatig e nimə rəha rəhak Tata?”

⁵⁰Məto ilau kəməsiatunən nıpəti nəghatən itəm təmən kəm ilau.

⁵¹Kən in tēmätəu-pən ilau məhaleiuaiu məhaluwın əpəh Nasaret. Kən in təmatisiai-in ilau matol nəwialau. Məto nian rafın rəhan mama tatətəlig-in natimnat rafın mın əh e nıkin.

⁵²Kən Iesu təmatepət e nıpətin, kən rəhan nenatigən tatol iahgın, kən e nian mın rafın, Uhgın ne netəmim, nıkilat tətəgien əm ron.

Luk 3

Jon Baptais təmamnus-iarəp nəghatən rəha Uhgın

(Mat 3:1-12; Mak 1:1-8; Jon 1:19-28)

¹Kən uarisig e natimnat min əh, etəm Rom, nərgin u Sisa Taepirias, in tatərəmərə nitən min rafin rəha Rom. Kən e nian in təmatərəmərə mətoaruspa nup fiftin, kən netəm-iasol min neen koatol wək ilat min: inu Herot Antipas təmatərəmərə əpəh Kalili, ne pian Filip in təmatərəmərə əpəh Ituria ne Trakonaetas, ne Lisantias təmatərəmərə əpəh Apilin, ne Pontias Pailat u etəm Rom in kapman rəha Jutia.

²Inu e nian ətuatip rəha Anas ne Kaeafas itəm ilau pris asol agin mil. E nian əh, Jon nəti Sekaraea, itəm tınepət rəkis u-roiu, in təmətətig əpəh ikin taruən-aruən ikin, kən Uhgın təmos-ipən nəghatən kit kəm in.

³Kən in təmuwin mətan ikin min rafin iuəhkır o nəhau Jotan təmatamnusiərəp nəghatən rəha Uhgın. In təmən-ipən məmə netəmim okotəkəike motəuhlin məntaalat o nolən rat min rəhalat, kən motuwin o Uhgın, məmə in otafəl nolən rat min rəhalat. Kən e nəmtətin kit, okol baptais elat.

⁴In tahmen əm e nəghatən rəha ien u Aesea itəm təməte e naoa rəhan məmə, “Suah kit tətəun əpəh ikin taruən-aruən ikin matən məmə, ‘Itəmat, otol əpen-əpenə o suatip rəha İərəmərə, kən motol rəhan suatip tətəuatip.

⁵Napin nəhau min rafin okətouin wir, kən nitot min ne narit min rafin okosiəhau, kən suatip eko-eko min okəg-ətuatip-in, kən suatip itəm tapər-apər okəike kol təpiə.

⁶Kən netəmim rafin okotehm suatip rəha Uhgın o nosmegəhən netəmim.”

⁷Kən e nian əh, netəmim tepət kəmotuwa o Jon məmə in otol baptais elat, məto in təmən-ipən kəm ilat məmə, “!Itəmat nəkotahmen əm e sinek min! !Nikitəmat otəsəhtən məmə onəkotagim tənin neməha ne nalpinən rəha Uhgın itəm otuwa!

⁸Otol natimnat neen itəm tatəgətun məmə nəmotapəs pahrien nolən rat min kən motuwin o Uhgın. Kən sotən atipən kəm itəmat e nausitən məmə itəmat nəkotətuatip əm məto-inu itəmat noanol min rəha Epraham. !Kəp! Inu nat əpnapin əm. İatən kəm itəmat məmə nat əpnapin kəpiel min əm, məto Uhgın titun nəuhlinən ilat kotuwa noanol min rəha Epraham.

⁹Kən inəh roiu ne, Uhgín tìnətul matip rəkis məmə otahtil-pən nig əpəh e nəukətín. Kən okəmə nig kit təsoe-inən noan itəm təwír, kən in otahtil mərakin-pən e nigəm.”

¹⁰Kən nimanin netəmim kəmotətapəh o Jon məmə, “?Naka u itimat ekotəkəike motol?”

¹¹Kən Jon təmən kəm ilat məmə, “Okəmə rəham napən kəiu, os-ipən kit kəm suah kit itəm rəhan tikə, kən okəmə nigam nagwənən tatig, os-ipən məsin kəm netəmim u nigilat tikə.”

¹²Netəm neen rəha nosən məni rəha takis kəmotuwa məmə otol baptais elat, kən kəmotətapəh o Jon məmə, “?Naka u itimat ekotəkəike motol?”

¹³Kən Jon təmən-ipən kəm ilat məmə, “Sotosən məni o netəmim taprəkis-in itəm tahmen əm məmə onəkotos.”

¹⁴Kən mopael min neen kəmotətapəh min, “?Kən tahro etimat? ?Naka u itimat ekotəkəike motol?” Kən in təmən-ipən kəm ilat məmə, “Sotolən nəginən kəm netəmim məmə, ‘Okəmə nəsos-ipamən məni, kən oekotol nahmən kəm itəmat.’ Kən sotolən nəginən kəm netəmim məmə, ‘Okəmə nəsos-ipamən məni, kən oekotən-ipən kəm netəm-iasol məmə nəmotol nat kit tərat.’ Nikitəmat otəkəike magien o nos ətuatipən nətouən rəhatəmat kən in əm un.”

¹⁵Kən netəm min əh koatəsahgin, kən nikilat tatəht Jon məmə kətah in Kristo itəm Uhgín təmən məmə otahl-ipa.

¹⁶Kən Jon təmuhalpín rəhalat nətəligən məmə, “Iatol baptais etəmat e nəhau, məto etəmim kit tatuwa itəm rəhan nəsanənən ne nepətən taprəkis-in io. Kən io ləhau agin, esahmenən məmə ekuwa io slef kit rəhan o nolən rəhan wək. Kən suah əh, in otol baptais etəmat e Narmin Rəha Uhgín ne nigəm.

¹⁷In tatətul matip o nehmən nolən rəha netəmim məmə otoor ilat, netəm kotəwír ne netəm kotərat, tahmen-pən e etəm tətəsum. Tatiləs fok o nafəl rəkisən nuwigi noa wit məmə otos nipətín itəm təwír. Netəmim itəm kotəwír kotahmen e nipəti wit, tatos ilat matuwín latuənu. Məto netəmim itəm

kotərat kotahmen-pən e nuwigi noa wit, tatərakin-pən ilat e nigəm asol itəm tatuəp namnun tikə.”

¹⁸Kən Jon tāmamnus-iarəp namnusən təwir e nəghatən tepət məmə otiuw-pa nətəligən rəha netəmim kotuwın o Uhgın.

Herot təmİLəs-ipən Jon Baptais e kalapus

¹⁹E nian əh, Herot Antipas təmit-irəkis Herotias inu pətaguihl rəha pian, kən təmöl natimnat tepət itəm kotərat. Kən o nolən min əh, Jon təmən əskasik məhai Herot Antipas o nolən rat min rəhan.

²⁰Kən Herot Antipas təmatig mol min nolən rat kit min taprəkis, inəh təmİLəs Jon muwin mahtosig-in e kalapus.

Jon təmöl baptais e Iesu

(Mat 3:13-17; Mak 1:9-11)

²¹Məto e nian Jon təməsuwınən əh e kalapus, kən in təmatol baptais e netəmim min, kən Iesu min in təmuwa, kən Jon təmöl baptais lan. Kən nian Iesu təmatəfak, Uhgın təmerəh e neai,

²²kən Narmin Rəha Uhgın təmisi-pər matite, nıpətın tahmen-pən e mak muwa məpələh-pər e Iesu, kən nəwia Uhgın təmisi-pən e nego e neai matən məmə, “Ik netik keike, ekolkeike pik ik, kən nikik tagien pik agin ron ik.”

Pipi rat min rəha Iesu

(Mat 1:1-17)

²³Nian Iesu təmətuoun rəhan wək, rəhan nup tahmen-pən e tate. Netəmim nikilat tatəht məmə in nəti Josep. Kən Josep in nəti Heli,

²⁴Heli in nəti Matat, Matat in nəti Lifae, Lifae in nəti Melki, Melki in nəti Janae, Janae in nəti Josep,

²⁵Josep in nəti Matatias, Matatias in nəti Amos, Amos in nəti Neham, Neham in nəti Esli, Esli in nəti Nagae,

²⁶Nagae in nəti Mahat, Mahat in nəti Matatias, Matatias in nəti Semein, Semein in nəti Josek, Josek in nəti Jota,

²⁷Jota in nəti Joanan, Joanan in nəti Resa, Resa in nəti Serupapel, Serupapel in nəti Sealtiel, Sealtiel in nəti Neri,

²⁸Neri in nəti Melki, Melki in nəti Ati, Ati in nəti Kosam, Kosam in nəti Elmatam, Elmatam in nəti Er,

²⁹Er in nəti Josua, Josua in nəti Eliesa, Eliesa in nəti Jorim, Jorim in nəti Matat, Matat in nəti Lifae,

³⁰Lifae in nəti Simeon, Simeon in nəti Juta, Juta in nəti Josep, Josep in nəti Jonam, Jonam in nəti Eliakim,

³¹Eliakim in nəti Melea, Melea in nəti Mena, Mena in nəti Matata, Matata in nəti Natan, Natan in nəti Tefit,

³²Tefit in nəti Jese, Jese in nəti Opet, Opet in nəti Poas, Poas in nəti Salmon, Salmon in nəti Nason,

³³Nason in nəti Aminatap, Aminatap in nəti Atmin, Atmin in nəti Ani, Ani in nəti Hesron, Hesron in nəti Peres, Peres in nəti Juta,

³⁴Juta in nəti Jekop, Jekop in nəti Aisak, Aisak in nəti Epraham, Epraham in nəti Tera, Tera in nəti Nahor,

³⁵Nahor in nəti Seruk, Seruk in nəti Rehu, Rehu in nəti Pelek, Pelek in nəti Eper, Eper in nəti Sela,

³⁶Sela in nəti Kaenan, Kaenan in nəti Apaksat, Apaksat in nəti Sem, Sem in nəti Noah, Noah in nəti Lamek,

³⁷Lamek in nəti Metusela, Metusela in nəti Inok, Inok in nəti Jaret, Jaret in nəti Mahalalel, Mahalalel in nəti Kenan,

³⁸Kenan in nəti Enos, Enos in nəti Set, Set in nəti Atam, kən Atam təmisi-pən e Uhgin.

Luk 4

Setan təmos-ipən-os-ipən kəm Iesu

(Mat 4:1-11; Mak 1:12-13)

- ¹Narmin Rəha Uhgın təməríoah e nəmegəhən rəha Iesu, kən e nian in təmisi-pən e nəhau Jotan, kən Narmin Rəha Uhgın təməghat-pən e niki Iesu məmə in otuwın əpəh ikin taruən-aruən ikin.
- ²Kən e nian foti, Setan təmos-ipən-os-ipən kəm Iesu. E nian min rafin əh, in təməsagwənən, kən e namnun nian min əh, nəumis təmus wir in.
- ³Kən Setan təmən-ipən kəm Iesu məmə, “Okəmə ik Nəti Uhgın, ən-ipən kəm kəpiel u məmə otəuhlin muwa mol pıret lan.”
- ⁴Kən Iesu təmuhalpın məmə, “Kəməte e Naoa Rəha Uhgın məmə, ‘Netəmim okol kəsotatigən e nagwənən əm.’”
- ⁵Kən Setan təmit Iesu mian əpəh nitot əfəməh kit, kən roiu agin-əh min əm, təməgətun in e kantri min rafin e nətueintən, ne nəsanənən rəhalat,
- ⁶kən təmən-ipən kəm in məmə, “Io ekələhəu-pinə e nelməm nərəmərən e niməptən min, ne nautə rəhalat min rafin, məto-inu natimnat rafin əh tətatig e nelmək, kən ekitun negəhan-inən kəm etəmim pah itəm iakolkeike məmə ekos-ipən kəm in.
- ⁷Məto okəmə ik onakəfak kəm io, kən natimnat rafin min u, okotuwa rəham.”
- ⁸Kən Iesu təmuhalpın rəhan nəghatən məmə, “Naoa Rəha Uhgın tatən məmə, ‘Onəkotəfak əm kəm rəhatəmat İərəmərə Uhgın, kən in əm, onəkotol əm rəhan nətəligən.’”
- ⁹Kən Setan təmit in minuwın əpəh Jerusalem e nətuei nimə əpəh ilis agin e Nimə Rəha Uhgın. Kən təmən-ipən kəm in məmə, “Okəmə ik Nəti Uhgın, kən iwig ukin-u,
- ¹⁰məto-inu kəməte-pən e Naoa Rəha Uhgın məmə, ‘In otahl-ipa nagelo min rəhan okotuwa motehm wir ik,’
- ¹¹kən təməte-pən məmə, ‘Okotiləs ik ilis e nelmılat məmə onəkəsorinən nelkəm e kəpiel.’”

¹²Kən Iesu təmuhalpın rəhan nəghatən məmə, “Naoa Rəha Uhgın tatən min məmə, ‘Okol nəkəsotos-ipən-os-ipənən kəm rəhatəmat İərəmərə Uhgın məmə otol nat kit, kən məmə onəkotəplan məmə in tətətig itəmat min, o kəp.’”

¹³Kən nian Setan tinol namnun rafin nos-ipən-os-ipənən rəhan, in təmagim muwın isəu o Iesu matəsahgin məmə nian wır kit min rəhan otəpanuwa min.

Iesu təmətuoun rəhan wək əpəh Kalili

(Mat 4:12-17; Mak 1:14-15)

¹⁴Kən Iesu təmitəlig-pən Kalili, kən nəsanənən rəha Narmin Rəha Uhgın təmərioah e nəmegəhən rəhan. Kən kəməmnus-amnus in titəlau e niməptən əh.

¹⁵Kən Iesu təməgətun e nimə rəha nuəfiminən min, kən netəmim rafin koatənwiwi in.

Netəm Nasaret kəmotapəs Iesu

(Mat 13:53-58; Mak 6:1-6)

¹⁶Kən Iesu təmuwa Nasaret, ikin əh in təməpət ikin aupən. Kən e nian rəha Sapat, in təmuwın e nimə rəha nuəfiminən təhmen əm məmə in təmatol mihin nian min. Kən in təmətul məmə otafin Naoa Rəha Uhgın,

¹⁷kən kəmos-ipən naoa itəm kəmaiu-aiu rəha ien u Aesea. Kən in təmurapık itəm Aesea təməte-pən tatən nəhlan məmə,

¹⁸“Narmin Rəha Uhgın tətətig lak məto-inu təmitəpun io məmə ekən-iarəp namnusən təwır kəm ian-rat min. Kən təməhl-ipa io məmə ekuwın mən-ipən kəm netəm kotatig e kalapus məmə ekikis ilat, kən məhl-iarəp ilat, kən mən-ipən kəm iganəmtin əpis min məmə okotehm min nat. Kən təməhl-ipən io məmə ekuwın mikis nikin rat min itəm kotatig e nelmin netəm pisin, itəm koatol tərət kəm ilat,

¹⁹kən mən-iarəp məmə nian tinuwa rəkis məmə İərəmərə otəgətun rəhan nəwırən kən mosmegəh netəmim.”

²⁰Təmafin rəkis naoa un, kən maiuiau min mos-ipən titəlig-pən o etəm tatehm wir naoa min, kən təməpələh məmə otəgətun netəmim. Kən niğanəmti netəmim rafin e nimə rəha nuəfiminən təmatətul əm lan.

²¹Kən in təmatəghat kəm ilat matən min-nulan məmə, “Roiu agin e nian itəm nakoatətəlig lan e Naoa Rəha Uhgin, Uhgin tatol əp nəghatən min əh məmə tīnatuwa otol nīpahrienən.”

²²Netəmim rafin koatənwiwi in, kən narmilat tatiwig o nəghatən wir min itəm tatən, kən motən kəm ilat min məmə, “?Nəti Josep u, o kəp?”

²³Kən Iesu təməni-ipən kəm ilat məmə, “Ekitun məmə onakoatən nəghatən oas u kəm io u tatən min-nulan məmə, ‘Tokita, ol-wir atip-tu nīpətim,’ u nīpətin məmə, ‘Natimnat min əh itəm katən məmə nəmol rəkis ilat əpəh Kapaneam, təwir məmə nakuwa mol min ilat ikin-u imam ikin.’

²⁴Nīpahrienən, iakatən kəm itəmat məmə netəmim okol kəsotisiai-inən ien kit itəm təmisi-pən elat.

²⁵E nian rəha Elaija, nuhuən təməsəfikən mos nup kisil ne məwig sikis, kən nəumis təman ikin min rafin nagwənən təmikə. Kən ekən nīpahrienən kəm itəmat məmə, e nian əh, nəutahlimis tepət ikin-u Isrel,

²⁶məto Uhgin təməsahl-ipənən Elaija məmə otuwīn masitu elat. Kəp. In təməhl-ipən məmə otasitu əm e nəutahlimis kit əpəh ikin Saeton e taon Sarefat, kən pətan u in Iaihlua kit.

²⁷Kən e nian rəha ien Elisa, netəmim tepət kəmotatig Isrel itəm kəmoatos nimisən rəha nuwigitəm u leprosi, kən Elisa təməsol-wirən kit ne. Məto in təmol-wir əm Neman u etəm Siria, Iaihlua kit.”

²⁸Kən e nian netəmim e nimə rəha nuəfiminən kəmotəto nəghatən əh, neməha təmol pik ilat.

²⁹Kən kəmotəruapik kətul motaskəlim Iesu, motiləs motiet e taon, motuwīn əpəh lekiəkis e nikali taon məmə okotərakin-iarəp.

³⁰Məto Iesu təmaliwək əm miet ilugin-in ilat minatuwīn.

Iesu tēmahl-iarəp narmin rat e etəmim kit

(Mak 1:21-28)

31Kən Iesu tēmeiuaiu muwin əpəh Kapaneam, taon kit min rəha Kalili. Kən e nian rəha Sapat, in tēmatəgətun netəmim.

32Kən netəmim itəm kəmoatəto rəhan nəgətunən, narmilat tēmiwig pik ron mətə-inu rəhan nəghatən təfigəm, nepətən əh-ikin.

33Kən in əpəh imə e nimə rəha nuəfiminən, kən suah kit əh-ikin itəm narmin rat kit tətətig lan. Kən in tēmagət əfəməh məmə,

34“!Ei, Iesu etəm Nasaret! ?Tahro? ?Nəmatuwa məmə onakərəkin itimat? Ekitun rəkis ik. !Ik Etəm Asim rəha Uhgın!”

35Mətə Iesu tēməghat əskasik lan məmə, “!Ahh, sagətən! !Iet magim e suah un!” Kən narmin rat əh tēmol suah un tiet morin-pən e niməptən ilugin-in ilat, kən in tēmiet magim lan, mətə tēməsərəkinən suah un.

36Kən netəmim rafin ikin əh, narmilat tēmiwig kən moatən-ipən kəm ilat min məmə, “!Ei! ?Nəgətunən naka u? Suah əh, in tatəghat əskasik e narmin rat min e nəghatən rəha nepətən ne nəsanənən, kən ilat koatiet e netəmim.”

37Kən namnusən rəha Iesu tēmaiu mitəlau e nitən əh.

Iesu tēmol-wir netəmim tēpət

(Mat 8:14-17; Mak 1:29-34)

38Iesu tēmətul kən miet e nimə rəha nuəfiminən muwin əpəh e nimə rəha Saimon. E nian əh, uhu Saimon tatimis tatətəp-ətəp asol, kən ilat kəmotən-ipən kəm Iesu məmə otol-wir.

39Kən Iesu tēmətul-pən iuəhkir ron məghat əskasik kəm nətəp-ətəpən, kən nətəp-ətəpən tēmikə. Kən roiu agin-əh min əm, pətaguihl u tēmətul minatol nagwənən nigilat.

40Nian mit tēniwig rəkis, netəmim kəmos netəmim rafin itəm koatimis e nimisən pisin pisin min moatuwa o Iesu. Kən tēmələhəu-pən nelmin elat kitih kitih, kən ilat rafin kəmotəmegəh.

⁴¹Kən iərmis min kəmotiet motagim e netənim tepət motagət əfəməh məmə, “!Ik Nəti Uhgín!” Məto Iesu təmagət əskasik elat mahtosig-in ilat o nəghatən məto-inu ilat kotitun məmə in Kristo itəm Uhgín təmahl-ipa.

⁴²Kən kəmən lawigin, Iesu təmiet ikin əh muwin əpəh ikin kit itəm netənim kotikə ikin. Məto netənim kəmoteam-in, kən nian kəmotehm, kən kəmotuwa ron motalkut məmə okotən-iəhau məmə in otəsagimən mapəs ilat.

⁴³Məto in təmən-ipən kəm ilat məmə, “Kəp. Io ekəkəike muwin latuənu pisin min neen, mən-iarəp namnusən təwir rəha nərəməərən rəha Uhgín, məto-inu Uhgín təmahl-ipa io məmə ekol mihin.”

⁴⁴Kən in təmatuwın mətan nitən Jutia matən-iarəp nəghatən rəha Uhgín e nimə rəha nuəfiminən min.

Luk 5

Aposol min itəm Iesu təmaupən maun-in ilat

(Mat 4:18-22; Mak 1:16-20)

¹Nian kit, Iesu təmatətul e nikali nəhau asol, nərgin u Lek Kalili. Kən nimanin netənim kəmotuwa kətul kitəlau lan məmə okotəto nəghatən rəha Uhgín.

²Kən in təmehm pot kəiu itəm netəm rəha niuwən nəm kəmotapəs katuəməhl e noa niməkləkil, məto-inu ilat kotaikuas e rehalat net min.

³Kən Iesu təmər e pot rəha Saimon , kən in təmətəpəh o Saimon məmə otiuw-iarəp pot tuwin ihluə məsin. Nian Saimon təmətig-iarəp pot, kən Iesu təməpələh lan matəgətun netənim.

⁴Nian Iesu təməghat rəkis kəm netənim, kən mən-ipən kəm Saimon məmə, “Saimon, otasüə kotuwın əpəh lokamnim, kən nakotərakin rəhatəmat net məmə nakotos nəm neen.”

⁵Kən Saimon təmən məmə, “Etəm-iasol, lapin itimat emotalkut pik o nat u mətoahgin-pa tinian, məto eməsotosən nəm kit ne. Məto ik ninən min məmə okotuwın, kən tol nəhlan, pəs okotuwın min motərakin rəhatimat net min.”

⁶Kən e nian kəmotol min-nəhlan, kəmos nəm tepət tepət e rəhalat net, kən net min rəhalat kəmotər kasis wir e nəm min, kən net min kīnotətuoun minotəhap-əhap.

⁷Kən ilat kəmotauin-pən ilat min neen e pot kit min məmə okotuwa kasitu elat. !Kən kəmotuwa kəmki-pən nəm e pot kərən mil kuər marioah e nəm, iuəhkir əm pot mil kətuamnim!

⁸Nian Saimon Pita təmehm nat u, kən təmisin-pən nulin o Iesu e nisaiiən matən məmə, “!Iərəmərə, uwīn isəu ron io mətō-inu, io esahmenən, io iol təfagə rat!”

⁹In tatəghat min-nulan mətō-inu in ne netəm min əh e pot mil, kəmotaut pīk narmilat tiwig o nəm min itəm kotepət pīk nəhlan.

¹⁰Kən Jemes ne Jon, nəti Sepeti mil itəm kətəhalol wək iləhal Saimon, ilau min kəmuaut pīk narmilau tiwig o nəm min u. Mətō Iesu təmən-ipən kəm Saimon məmə, “Əsəginən. Ik etəmim rəha niuwən nəm, mətō roiu əh matuwīn, ik onakiuw-pa netəmim.”

¹¹Kən e nian ilat kəmotiuw-par rəhalat pot min, kən moatarəs natimnat rafin motuarisig-in əm Iesu, kən motuwa rəhan min netəmim.

Iesu təmol-wir etəm tatos nimisən u leprosi

(Mat 8:1-4; Mak 1:40-45)

¹²Nian Iesu təmətaliwək e taon kit, suah kit itəm tatos nimisən u leprosi təmaliwək muwa. Nimisən u leprosi təmirəfin nīpətīn. Kən nian in təmehm Iesu, təmeiuaiu misin-pən nīpīnəgin e nisip matos-ipən nisaiiən kəm in, kən in təmətasək matəkəike ron matən məmə, “Iərəmərə, okəmə nakolkeike, kən nəkitun nol-wirən io, kən mafəl rəkis namkimikən lak.”

¹³Kən Iesu təmæg-əfəməhin-pən nelmin mələhəu-pən lan mən məmə, “Əwəh. Iakolkeike. !Əwir-ta!” Kən roiu agin-əh əm, nimisən u leprosi təmagim mikə lan.

¹⁴Kən Iesu təmən-iəhau məmə otəsən-iarəpən natimnat min u kəm netəmim, mətō in təmən-ipən kəm in məmə, “Uwīn mehm pris kit pəs in otehm məmə

nipətim tinol min-nulan, kən os-ipən sakrifais kəm Uhgin itəm Lou rəha Moses təmən o suah kit itəm rəhan leprosi tatikə, kən netəmim okotitun məmə nīpahrienən ninəwir, kən rəham namkimikən tinikə.”

¹⁵Məto namnusən rəha Iesu tatiet matuwın ikin min rafın, kən nimanin netəmim kəmotuwa məmə okotətəlig-in rəhan nəgətunən kən məmə in otol-wır nimisən min rəhalat.

¹⁶Məto nian tepət, tatuwin ikin taruən-aruən ikin, in pisin əm, məmə otatəfak.

Iesu təmol-wır etəm nipətin məsin təmimis

(Mat 9:1-8; Mak 2:1-12)

¹⁷Nian kit, Iesu təmatəgətun əpəh imə e nimə kit, kən Farisi min, ne iəgətun min rəha Lou, ilat əh-ikin koatəpələh, kəmotisi-pən əpəh latuənu min e nitən Kalili, ne nitən Jutia, ne taon Jerusalem. Kən nəsanənən rəha İərəməərə tətətig o Iesu məmə in otol-wır netəmim u koatimis.

¹⁸E nian əh, netəmim neen kəmotiləs suah kit motuwa itəm tətəpıl əm e nimitiwın rəhan məto-inu nipətin məsin təmimis. Kən ilat kotalkeike məmə okotiləs motələhəu-pən e nelki Iesu.

¹⁹Məto ilat kotəruru nuwinən imə məto-inu netəmim tepət əh-ikin. Kən kəmotuwın əpəh ilis e nimə motos-irəkis nəhgi nimə məsin, kən motəhlman-əhlman suah un tatite e nimitiwın rəhan muwin iuəhkır əm o Iesu.

²⁰Nian Iesu təmehm rəhalat nahatətəən, kən təmən məmə, “İolik. Rəham nolən rat min, io emos-irəkis.”

²¹Kən iəgətun min rəha Lou ne Farisi min nikilat təht məmə, “?Etəmim naka u tatəghat ausit məmə in Uhgin? Uhgin əm in titun nos-irəkisən nolən rat min rəha netəmim.”

²²Iesu in titun əm rəhalat nətəligən, kən in təmən-ipən kəm ilat məmə, “?Tahro nakoatətəlig min-nulan?”

²³?Naka in timətig məmə ekən, ‘Ekos-irəkis rəham tefagə rat min,’ o ‘Ətul maliwək’?

²⁴Kən roiu onəkotehm məmә Nəti Etənim tatos nepətən o nos-irəkisən təfagə rat min ikin-u e nətueintən.” Kən in təmən kəm suah u tatimis məmә, “Ətul, miləs rəham nimitiwin maliwək matuwin imam ikin.”

²⁵Kən roiu agin-əh min, suah u təmətul miləs rəhan nimitiwin minataliwək matənwiwi Uhgın minatuwin.

²⁶Kən ilat rafin kəmotaut pik ron narmilat tiwig, kən moatənwiwi nərgi Uhgın, kən motasiəp kən moatəgin məsin moatən məmә, “Nəman, roiu kitat kəmotehm nat pispis agin.”

Iesu təmaun-in Lifae

(Mat 9:9-13; Mak 2:13-17)

²⁷Uarisig e natimnat min u, Iesu təmiet maliwək matuwin, kən in təmehm suah kit itəm tatos məni rəha takis, nərgin u Lifae, tatəpələh ikin katətou takis ikin. Kən Iesu təmən-ipən kəm in məmә, “Wa, muarisig-in io muwa rəhak etənim.”

²⁸Kən in təmapəs natimnat min rafin rəhan, mətul muarisig-in Iesu.

²⁹Kən Lifae təmol nagwənən asol kit rəha Iesu əpəh e rəhan nimə. Kən netənim tepət itəm koatos məni rəha takis, ne netənim ənəpin min kəmotuwa moatəpələh kələh ilat min ilat məmә okotagwən.

³⁰Kən Farisi min ne netənim neen min rəhalat itəm iəgətun min rəha Lou, nikilat təsagienən kən moatən-ən kəm netənim rəha Iesu məmә, “?Tahro itəmat nakotagwən kələh əm itəmat netənim itəm koatos məni rəha takis ne netəm nol təfagə rat?”

³¹Kən Iesu təmən-ipən kəm ilat məmә, “Etənim itəm in təsimisən, təsuwinən mehm tokita. Məto etəm tatimis, in otəkəike muwin mehm tokita.

³²Io eməsuwamən məmә ekaun-in netəm itəm nikilat təht məmә kotətuatip rəkis məmә okotəuhlin nətəligən rəhalat o nolən tərət min itəm koatol. Məto emuwa məmә ekaun-in netəm kotərat məmә okotəuhlin rəhalat nətəligən.”

Nolən rəha napəsən nagwənən o Uhgın

(Mat 9:14-17; Mak 2:18-22)

³³Kən ilat kəmotən-ipən kəm Iesu məmə, “Netəmim rəha Jon Baptaıs, nian rafin koatapəs nagwənən kən katəfak kəm Uhgin, kən netəmim rəha Farisi min koatol əm nat kitiəh, mətə rəham netəmim min kotagwən əm katilpın. ?Tahro?”

³⁴Kən Iesu təmən-ipən kəm ilat məmə, “?Nian itəmat nəkoatol nagwənən rəha etəmim itəm təmol əm marit, mətə nakotən kəm rəhan min məmə okotəkəike motapəs nunən nagwənən, o kəp? !Kəp!

³⁵Mətə nian tatuwa itəm netəmim okotiləs-irəkis suah u itəm təmol əm marit motiləs kan isəu o rəhan min netəmim. Kən e nian əh inəh, ilat okotapəs nagwənən lan.”

³⁶Kən Iesu təmuəh min nimaa nəghatən kit tol min-nulan məmə, “Okol suah kit təsosən napən wi rəhan məhap məsin, kən məhl-pən e napən oas məmə otəhlosig-in itəm təmerəh. Mətə okəmə tatol nəhlan, kən otərəkin rəhan napən wi, kən napən wi məsin okol təsəhl-pən wirən ilau napən oas.

³⁷“Kən okol suah kit təsosən wain wi miuw-pən e pətəl oas u təskasik, pətəl itəm kəmol e nuwigi nəni. Okəmə suah kit tatol min-nəhlan, kən wain wi otəhləpik kən mol pətəl oas in otasis kən mimerəh mahtiperəh, kən wain in otaiu meləg, kən pətəl min, in otərat.

³⁸Mətə wain wi okəkəike kiuw-pən e pətəl wi.

³⁹Kən etəmim itəm təmənım wain oas rəkis, in təsolkeikeən məmə otənım min wain wi, mətə-inu in otən məmə, ‘Wain oas in təwir.’”

Luk 6

Netəmim rəha Iesu kəmoatəhl wit e nian rəha Sapat

(Mat 12:1-8; Mak 2:23-28)

¹Nian kit e Sapat, Iesu ne rəhan min netəmim kəmotaliwək motuwa e nasumən min rəha wit, nat kit tahmen e rais, kən rəhan min netəmim kəmotəhl wit neen motawig rəkis niwin, kən moatun.

²Mətə Farisi min neen koatən məmə, “!Ei! Nian u-roiu in Sapat, kən nolən u nəkoatol tatətəghl Lou. ?Tahro itəmat nəkoatol min-nəhlan?”

³Kən Iesu təmən-ipən kəm ilat məmә, “?Itəmat nəsoṭafinən e Naoa Rəha Uhgın, natımnat mın əh itəm Kig Tefit təmol aupən? In ne rəhan mın netəmim, nəumis təmus ilat.

⁴Kən in təmuwin imə e nimə tapolən rəha Uhgın, təmos pıret u itəm pris mın kinotos-ipən rəkis kəm Uhgın. Kən Lou tatən məmә pris mın əm kotıtun nunən, məto Tefit təmun kən mos-ipən neen kəm rəhan mın netəmim məmә okotun.”

⁵Kən Iesu təmən-ipən kəm ilat məmә, “Io, Nəti Etəmim, ekatərəmərə e nian rəha Sapat.”

Iesu təmol-wir etəmim e nian rəha Sapat

(Mat 12:9-14; Mak 3:1-6)

⁶Kəne nian pısın kit mın rəha Sapat, Iesu təmuwin əpəh imə e nimə rəha nuəfiminən, matəgətun netəmim. Kən ikın əh, suah kit əh-ikın nelmin matıp təmimis, təsəg-ətuatıp-inən.

⁷Kən iəgətun mın rəha Lou, ne Fārisi mın, ilat koatalkəlik məmә okotehm-tu Iesu məmә otol-wir suah u e nian rəha Sapat, pəs ilat kotıtun nənən məmә Iesu təmətəhl Lou.

⁸Məto Iesu təmitun əm rəhalat nətəligən, kən təmən-ipən kəm suah u itəm nəlmin təmimis məmә, “Wa, mətul aupən e niğanəmti netəmim rafin.” Kən təmuwin mətul-pən əh aupən.

⁹Kən Iesu təmən-ipən kəm ilat məmә, “Iakolkeike məmә ekətapəh-in nat kit otəmat. ?Təhro? ?E nian rəha Sapat, nolən naka in tətuatıp e Lou məmә okol, okol nat wir, o okol nat tərat? ?Okosmegəh etəmim, o okohamnu etəmim?”

¹⁰Kən təmisilu ilat rafin mıtəlau, kən təmən-ipən kəm etəm nelmin təmimis məmә, “Əg-ətuatıp-in nelməm.” Kən suah əh təməg-ətuatıp-in nelmin, kən nelmin təməwir.

¹¹Məto netəm mın əh, nikilat tinərat pik aɡın, kən kınəatəghat-əghat kəm ilat mın məmә okotəhro e suah əh Iesu.

Iesu təmitəpun tuelef aposol mın rəhan

(Mat 10:1-4; Mak 3:13-19)

¹²Kən e nian min əh, Iesu təmuwin əpəh ilis e nitot məmə otəfak, kən in təmətatig matəfak kəm Uhgın e nian əh mətoarus tian.

¹³Kən tinian, təmaun-in rəhan min netəmim məmə okotuwa kehm. Kən təmitəpun rəkis tuelef, maun-in nərgilat məmə aposol min.

¹⁴Nərgi aposol min u tol min-nulan: Saimon itəm Iesu təmaun-in nərgin wi məmə Pita, ne pian Antru, ne Jemes ne Jon, ne Filip, ne Patolomiü,

¹⁵ne Matiu, ne Tomas, ne Jemes nəti Alfeas, ne Saimon u kətaun-in məmə Selot,

¹⁶ne Jutas nəti Jemes, ne Jutas Iskariot itəm təmegəhan-in-pən Iesu kəm rəhan min tikimir min.

Iesu təməgətun netəmim kən mosmegəh netəmim itəm kəmoatimis

(Mat 4:23-25)

¹⁷Kən Iesu ne rəhan aposol min kəmotiet e nitot u moteiuaiu motuwa motatig e nitən iəməhl ilat rəhan netəmim tepət, ne nimanin netəmim tepət min kəmotisi-pən nitən Jutia, ne Jerusalem, ne nikalkal nitəhəi ikin Taea ne Saeton.

¹⁸Ilat kəmotuwa məmə okotəto nəghatən rəha Iesu kən məmə in otol-wir nimisən min rəhalat. Kən in təmol-wir netəmim itəm narmin rat min kəmoatərəkın ilat.

¹⁹Kən netəmim itəm kəmotətul moatitəlau lan, kəmotalkut məmə okotek məto-inu nəsanənən tatisi-pən lan matol-wir ilat rafin.

Nagienən ne nəratən

(Mat 5:1-12)

²⁰Kən Iesu təmasipən mehm rəhan min netəmim, kən tən-ipən kəm ilat məmə, “Itəmat u ian-rat min, nakoatatig e nəwİRƏn pahrien. In nəwİRƏn pahrien məto-inu, itəmat netəmim rəha Uhgın, kən in tatərəmərə etəmat.

²¹Itəmat itəm nakoteam-in nagwənən əh-roiu, nakoatatig e nəwİRƏn pahrien. In nəwİRƏn pahrien məto-inu, onəkotən məmə, ‘Əwəh, tahmen.’ Itəmat itəm

nakotasək əh-roiu, nakoatatiḡ e nəwīrən pahrien. In nəwīrən pahrien məto-inu onəkotalah.

²²Nakoatatiḡ e nəwīrən pahrien nian netəmim koatetəhau itəmat, kən kəsegəhan-inən itəmat məmə onəkotol natimnat kitiəh itəmat min ilat, kən katən rat itəmat, kən katərəkīn-rəkīn nərgitəmat məmə itəmat rəha iərmis min, kən ilat koatol nolən min əh kəm itəmat məto-inu io Nəti Etəmim, kən itəmat rəhak min.

²³“E nian min əh, otagien, kən motətīp-ətīp e nagienən məto-inu nətouən asol rəhatəmat rəha natimnat min əh tətatiḡ əpəh e nego e neai. Nikitəmat otagien məto-inu tīpīlat min kəmoatol nolən kitiəh əm kəm ien min aupən ikin.

²⁴“Məto, kəsi, nahməən asol otuwa otəmat itəm rəhatəmat nautə tepət roiu məto-inu, ninotos rəkis nagienən rafin itəm onəkotos.

²⁵Kəsi, nahməən asol otuwa otəmat itəm nakotagwən pik moatəto təwīr lan əh-roiu məto-inu, nəumis otəpanus itəmat. Kəsi, nahməən asol otuwa otəmat itəm nakotalah əh-roiu məto-inu, nəpanotasək onəkotasək agin.

²⁶Kəsi, nahməən asol otuwa otəmat nian netəmim koatīləs-ipər nərgitəmat məto-inu, tīpīlat min kəmotīləs-ipər mihin nərgi ien eiueiuə min aupən ikin.”

Otolkeike rəhatəmat tīkimir min

(Mat 5:38-48; 7:12)

²⁷Kən təmən min məmə, “Məto ekatən kəm itəmat itəm nakoatətəlig-in motitun məmə, nəkotəkəike motolkeike rəhatəmat tīkimir min, kən motol təwīr kəm netəm koatetəhau itəmat,

²⁸kən nian netəmim koatau iərmis-in itəmat, məto itəmat onakotətapəh-in o Uhgīn məmə otos-ipən rəhan nəwīrən kəm ilat, kən onəkotəfak o netəmim itəm koatol tərət kəm itəmat.

²⁹“Okəmə suah kit tatem nīkapim, kən ahwin-pən nīkalin kit min tem. Okəmə suah kit tatīləs rəham kot, kən atətul matip o nos-ipən minən rəham sot.

³⁰Os-ipən nat naka kəm etəmim kit itəm tateasiə-in ron ik, kən etəmim itəm təmos rəham neen natimnat, apəs əm, məsətapəh-inən.

³¹Kən otol təwir kəm netəmim rafin e nolən min rafin itəm nakotolkeike məmə netəmim okotol min kəm itəmat.

³²“?Okəmə nakotolkeike əm netəm min u koatolkeike itəmat, nikitəmat təht məmə okiləs-ipər itəmat ron? Kəp. Netəm rat, ilat min koatol təwir kəm ilat min, kən moatolkeike ilat min.

³³?Kən okəmə nəkoatol əm təwir kəm netəm min əh itəm koatol təwir kəm itəmat, nikitəmat təht məmə okiləs-ipər itəmat ron? Kəp. Netəm rat, ilat min koatol əm nat kitəh min.

³⁴?Kən okəmə nakoategəhan-in natimnat kəm netəmim neen itəm ilat kotitun nos-ipa minən nitain, nikitəmat təht məmə okiləs-ipər itəmat ron? Kəp. Netəm rat, ilat min koategəhan-in natimnat kəm ilat min məmə nian kit kəpanotos-ipən min nitain tahmen.

³⁵“Məto nəkotəkəike motolkeike rəhatəmat tikimir min, kən moatol təwir kəm ilat, kən moategəhan-in natimnat itəm kəmos məmə okəsotalpinən. Okəmə nəkotol nəhlan, kən rəhatəmat nətouən asol tətətig, kən nakotuwa nenəti Uhgin Ilis Agin, məto-inu in tatol təwir kəm netəm naumis min, kən tatol təwir min kəm netəmim itəm kəsotənən məmə nikitəmat tagien o natimnat wir itəm in tatol kəm ilat.

³⁶Otasəkitun netəmim tahmen əm e rəhatəmat Tata tətəsəkitun netəmim.”

Əsənən nolən rəha etəmim

(Mat 7:1-5,17-27; 12:34-35)

³⁷Kən İesu təməm məmə, “Əsənən nolən rəha etəmim məmə in tərət, kən pəs kəsənən rəham nolən məmə in tərət; əsənən məmə suah kit otəkəike mos nalpinən o təfagə rat kit rəhan, kən pəs kəsənən məmə ik onakəkəike mos nalpinən o təfagə rat kit rəham; aluin nolən rat rəha etəmim itəm təmol kəm ik, kən pəs kaluin nolən rat rəham.

³⁸Awte kən məhan nelməm kəm netəmim, kən kos-ipinə natimnat kəm ik, natimnat tepət tepət itəm kəmai-pən kasin-asin kəgətain, tər matərioah itəm okələhəu-pən ilat e nelməm. Okəmə natos-ipən tepət, okos-ipinə tepət kəm ik, məto okəmə natos-ipən noan məsin əm, okos-ipinə noan məsin əm kəm ik.”

³⁹Kən in təmuəh nimaa nəghatən kəm ilat məmə, “Iganəmtin əpis ko təsitən iganəmtin əpis kit min. !Kəsi, okiaiwig-pən e noakimil asol!

⁴⁰Etəm tatətəlig, in təsaprəkis-inən rəhan iəgətun, məto etəmim itəm tətətəlig-in wir matətəu-pən iəgətun e nətəligən min rafin, in otuwa mahmen e rəhan iəgətun.

⁴¹“?Tahro nakatən nisip noan məsin itəm təmuwin e niganəmti piam, məto nikip təsəhtən nig asol itəm tətətig e niganəmtim?

⁴²?Okəmə nakəsehmən nig asol əpəh e niganəmtim, kən onakahro min-nulan mos-irəkis nisip e niganəmti piam? !Rəhatəmat nənən təwir, məto nikitəmat tamkimik! Aupən mos-irəkis nig asol e niganəmtim, kən mitun nehm wirən nisip e niganəmti piam kit.

⁴³“O nat əh inəh, iatən məmə, nig katun tikə itəm tatəe-in nig kəsənən, tahmen-pən əm e nig kəsənən təsoe-inən nig katun,

⁴⁴məto-inu etəmim tatitun nig e nehmən noan. Ko etəmim təsəhlən noa nig katun e nolkosik, kən ko etəmim təsəhlən noa nig tətəhen e nol e luən.

⁴⁵Etəm təwir, nikin tərīoah e natimnat wir min, kən in tatol natimnat itəm təwir. Kən etəm tərət, nikin tərīoah əm e nolən tərət min, kən in tatol əm nolən tərət; məto-inu e nian tatəghat, kən natimnat min əh e nikin koatiet.”

⁴⁶Kən Iesu təmən məmə, “?Tahro nakotaun-in io məmə ‘Iərəməərə, Iərəməərə,’ məto nəsolən nat naka itəm ekatən?

⁴⁷Pəs ekəgətun kəm itəmat nolən rəha suah kit itəm tatuwa ron io, kən matəto nəghatən min rəhak, kən matol natimnat min itəm ekatən ilat.

⁴⁸“Kən in tahmen əm e etəmim itəm təmiləkin rəhan nimə. Aupən, təmel nisip meiuaiu muwin mafəl wir kəpiel apin əpəh ləhau, kən miləkin-pən rəhan ikin nimə. Nian nuhuən təfik maiu maruəh muwa miləs pikən, məto təsəloalən lan, məto-inu təmiləkin wir tiəkis.

⁴⁹Məto etəmim itəm tatəto nəghatən rəhak kən məsolən, in tahmen-pən e etəmim itəm tatiləkin-pər rəhan nimə tatəpələh-pər əm e niməptən. Nian

nuhuən təfik maiu maruəh muwa mīləs pīkən nimə, kən əmun nimə tiet morin mīməlkin-məlkin.”

Luk 7

Nahatətəən rəha etəm-iasol kit rəha mopael min

(Mat 8:5-13)

¹Nian Iesu təməghat rəkis kəm netəmim un, kən in təmuwin əpəh e taon Kapaneam.

²Kən ikin əh, etəm-iasol kit rəha mopael min rəha netəm Rom tətətig, kən slef kit əh-ikin rəhan itəm in tolkeike pīk, mətə slef əh tatimis pīk, rəhan nahməən tərət.

³Kən e nian etəm-iasol əh təmətəo namnusən rəha Iesu, kən in təmahləpis netəm-iasol neen rəha netəm Isrel məmə okotuwin motən-ipən kəm Iesu məmə otuwin mol-wir rəhan slef.

⁴Kən nian netəm-iasol min əh kəmotuwa motehm Iesu, motətarəh əskasik ron motən məmə, “Iərəmərə, tətuatip əm məmə nakasitu e suah əh,

⁵mətə-inu in tolkeike pīk kitat netəm Isrel, kən in təmīləkin nimə rəha nuəfiminən rəhatat.”

⁶Kən Iesu təmətəu-pən ilat. Kən e nian kīnoatuwa iuəhkīr o nimə, etəm-iasol rəha mopael min təmahl-ipən rəhan min netəmim kotuwin motehm Iesu moatən-ipən məmə, “Iərəmərə, əsəlīkīamtəən ik o nuwamən, mətə-inu esahmen-pənən məmə onəkuwa imak ikin.

⁷Kən tol min-nəhlan, io esīmnəən mehm ik. Ik etəm-iasol kit, mətə io etəm ləhau əm. Mətə əghat əm, kən rəhak slef, in otəsanən min.

⁸Ekitun məmə nīmīsən əh otəkəike mol nəwīam, mətə-inu io min, rəhak netəm-iasol min kotərəmərə lak, kən iatol nəwīalat, kən mopael min neen əh-ikin itəm io ekərəmərə elat. Okəmə ekən kəm kit məmə, ‘Uwin,’ kən tuwin. Kən okəmə ekən kəm kit məmə, ‘Wa,’ kən tuwa. Kən okəmə ekən kəm rəhak slef məmə, ‘Ol nat u,’ kən in tol.”

⁹Nian Iesu tēmōto nēghatēn u, narmin tēmiwig pik o nēghatēn rēha suah u. Kēn in tēmeirair mēn-ipēn kēm nīmanin netēmim itēm koatētul uarisig in, mēmā, “Ekātēn kēm itēmat mēmā, suah u sēnēmā in etēm Isrel. Kēn nat ēpnāpīn noanol min rēha Isrel, mēto esēhmēn ilat kit itēm rēhan nahatētēn iahgin tahmen-pēn lan.”

¹⁰Kēn e nian iahlēpis min rēha etēm-iasol kēmōtītēlig-pēn imā, kēmōtehēn slef ēh tīnēsānēn rēkis.

Iesu tēmosmegēh nēti nēutahlīmīs kit

¹¹Kēn tēsūwēhēn e natīmnat min u, Iesu tēmuwīn e taon kit, nērgīn u Nain, ilat rēhan min netēmim ne nīmanin netēmim tēpēt itēm koatuarisig-in in.

¹²Kēmōl fēnis e kēpiel tītēlau e taon ēh, kēn e nian Iesu tēmuwa iūēhkīr o nafiluē rēha taon, kēn tēmehēn netēmim koatīsī-pēn e taon moatalīs etēm tēmīmīs kit. In etēm aluē iērman, nēti nēutahlīmīs kit noan kitīēh ēm. Kēn nīmanin netēmim tēpēt rēha taon koataliwāk kēlēh ilat nēutahlīmīs ēh.

¹³Kēn nian Iērēmērē tēmehēn nēutahlīmīs ēh, in tēmasēkitun pik, kēn mēn-ipēn kēm in mēmā, “Ēsasākēn.”

¹⁴Kēn tēmuwīn mek pēt itēm kētālīs suah u tēmīmīs lan, kēn kēmōtētul. Kēn Iesu tēmēn-ipēn mēmā, “!Etēm aluē! !Iatēn kēm ik mēmā, ētul!”

¹⁵Kēn etēm tēmīmīs tīnēmegēh mīnētul, kēn mētūoun matēghat. Kēn Iesu tēmos-ipēn etēm aluē ēh kēm rēhan mama.

¹⁶Netēmim rafin kēmōtēgīn motāsīēp, kēn moatēnwiwi Uhgīn mēmā, “!Ien asol kit roiu tētātīg kitat min!” Kēn motēn min mēmā, “!Uhgīn tēmuwa mēmā otāsītū e rēhan min netēmim!”

¹⁷Kēn namnūsēn rēha Iesu tēmaiu mītēlau ikīn min rafin e nītēn Jutia kēn e nīmēptēn min rafin iūēhkīr ron.

Iesu ne Jon Baptais

(Mat 11:2-19)

¹⁸Netēmim rēha Jon Baptais kēmōtēn-ipēn kēm in natīmnat rafin itēm Iesu tēmōl ilat. Kēn Jon Baptais tēmaun-in rēhan etēmim mil kēiu kuea ron,

¹⁹kən tahləpis ilau məmə okian muehm Iəramərə muətapəh ron məmə, “?Karmə ik suah əh itəm otuwa, o mətə ekotasipən o etəm pisin kit min?”

²⁰Kən nian suah mil kəmuea muehm Iesu, kəmuən-ipən kəm in məmə, “Jon Baptais təmah-l-ipa itimlau ekuea məmə ekuətapəh ron ik məmə, “?Karmə ik suah əh itəm otuwa, o mətə ekotasipən o etəm pisin kit min?””

²¹Kən e nian əm əh itəm ilau kəmuea muehm Iesu lan, mətə Iesu tatol nimisən tepət koatəwir. Neen koatos nimisən pisin pisin min, neen narmin rat tətətig elat. Kən netəmim tepət niganəmtilat təpis, mətə Iesu təmol-wir ilat.

²²Kən Iesu təmən-ipən kəm ilau məmə, “Iatəlig mian muən-ipən natimnat min u rafin kəm Jon, nat itəm nəmuəto kən muehm. Netəm niganəmtilat təpis kinoatəplan nat. Kən netəmim itəm nelkilat tərət kinotəto təwir kən minotaliwək. Kən netəm min u kəmos nimisən leprosi, nuwigilat tinəwir. Kən netəm min u matəlgilat təmalu, roiu matəlgilat tinoag, kən netəm min u kəmotimis, kinotəmegəh min. Kən ian-rat min, roiu əh suah kit tinatən-iarəp namnusən təwir kəm ilat.

²³Uhgin otawte-in rəhan nəwirən kəm netəmim itəm kəsotəmeən e rəhalat nahatətəən lak o rəhak nolən.”

²⁴E nian iahləpis mil rəha Jon ilau kəmiatəlig min, kən Iesu təmətuoun matəghat-in Jon kəm nimanin netəmim. In təmən məmə, “?Aupən ikin, itəmat nəmoatuwin əpəh ikin taruən-aruən ikin məmə onəkotehm naka? ?Nəmoatuwin məmə onəkotehm suah kit əpnapin əm itəm tahmen e nuwig itəm nimətag tətahl tatahuin-ahuin? !Kəp!

²⁵?Okəmə kəpə, kən nəmoatuwin məmə onəkotehm naka, suah kit itəm tatuwin e napən wir nəmtin tiəkis? !Kəp! Netəm itəm koatuwin e napən wir, motagien əm e rəhalat nautə, ilat kotətig e nimə wir min tahmen e rəha kig.

²⁶?Kən naka əh nəmoatuwin məmə nakotehm, ien kit, o? Əwəh, nipahrienən, mətə iatən kəm itəmat məmə in ilis taprəkis-in e ien.

²⁷Suah u inu Naoa Rəha Uhgın təmatəghat in məmə, ‘Otəplan-tu. Iatahl-ipinə rəhak iahləpis itəm otos rəhak nəghatən. In otaupən-in ik məmə otol əpen-əpenə e rəham suatip.’

²⁸Iatən kəm itəmat məmə, netəmim itəm kəmotaiir e nətueintən u, kit təsaprəkis-inən suah əh Jon. Məto etəm tətətig ləhau agın e netəmim rafin e nərəmərən rəha Uhgın, in ilis taprəkis-in Jon.”

²⁹Nian netəmim əpnəpın, ne netəmim rəha nosən məni rəha takis kəmotəto nəghatən rəha Iesu, ilat kəmotən məmə suatip rəha Uhgın in suatip ətuatip. Koatən nəhlan məto-inu Jon təmol baptais rəkis elat.

³⁰Məto Farisi min ne iəgətun min rəha Lou, ilat kəməsotegəhanən məmə Jon otol baptais elat, kən inəh kəmotərakin suatip rəha Uhgın e nəmegəhən rəhalat.

³¹Kən Iesu təmatəghat min məmə, “?Kən io ekən nolən rəha netəmim roiu, məmə tahmen e naka? ?Kən rəhalat nətəligən naka?

³²Ilat kotahmen-pən əm e nisualkələh itəm nat kit tikə otol nikilat tagien. Kən koatəpələh e suatip katol maket ikin, kən motagət əfəməh motaun-in ilat min neen məmə, ‘Itimat emotahl nau kəm itəmat məmə onakoatol danis rəha nagienən lan, məto itəmat nəkəsotolən danis. Kən itimat emoatasək eiuə rəha nimisən, məto nəsoatasəkən kitat min itimat.’

³³“Iatən min-nulan məto-inu nian Jon Baptais təmuwa, matətuakəm məsunən nagwənən nian tepət o nəfakən, məsənimən wain. Kən itəmat nakoatən məmə, ‘Suah əh, narmin rat kit tətətig lan.’

³⁴Məto io, Nəti Etəmim, emuwa mətagwən matənim wain, kən itəmat nakoatən məmə, ‘!Otəplan-tu, suah əh in etəmim rəha nagwən pikən ne etəmim rəha napisən, kən motan kələh ilat netəmim rəha nosən məni e takis, ne netəmim itəm nol təfagə!’

³⁵Nenatigən rəha Uhgın ne nalpəkəuən rəhan in tətətuatip məmə itimlau Jon ekioal nat itəm in tolkeike. Kən nəmegəhən rəha netəmim itəm kotahatətə lan, tatəgətun məmə inu nıpahrienən.”

Pətan rat kit təmau nelki Iesu e senta

³⁶Kən Farisi kit, nərgin u Saimon, in təmətapəh o Iesu məmə otuwın magwən e rəhan nimə. Kən Iesu təmuwın latuənu, muwın e nıpəgnoa nimə rəha Farisi un matəpələh məmə otagwən.

³⁷Kən pətan kit e taon əh in iol təfagə rat, təməto məmə Iesu tətəgwən əpəh imə Farisi ikin. Kən in təmos senta kit muwa itəm nəmtin tiəkis. Senta u tətətig e pətəl kəmol e kəpiel itəm nəmtin tiəkis, katən məmə alapasta.

³⁸Kən in təmuwa iuəhkır o Iesu mətul e nıkalı nelkin mətasək, nahui nəmtin tətouon mətahl-pən e nelki Iesu minol nelkin tinəpilit. Kən təmafəl nahui nəmtin e nelki Iesu e noanun, kən mətoafəl nelki Iesu matos-ipən nisaiiən kəm in, kən mol-pən senta e nelkin.

³⁹Kən Farisi u təmehm nat əh, kən tatən atıp e nıkin məmə, “Okəmə suah əh in ien pahrien, kən okol in təmitun əm nolən rəha pətan əh itəm tatek nelkin, məmə in iol təfagə rat.”

⁴⁰Kən Iesu təmən-ipən kəm in məmə, “Saimon, iakolkeike məmə ekən nat kit kəm ik.” Kən Saimon təmən məmə, “İəgətun, ən-tu kəm io.”

⁴¹Kən Iesu təmən məmə, “Suah kəiu, rəhalau məni təsahmenən, kən iərəməərə kit təmos-ipən məni neen kəm ilau, kən o nian kit ilau okualpın rəhan məni. Kit təmos faif-hanrit tenarius, kən kit tos fifti tenarius.

⁴²Nian ilau kənuəruru nos-ipənən nıtain, kən iərəməərə təmən məmə, ‘Uapəs əm nalpınən məni itəm nəmioas.’ ?Kən suah mil u in pəhrüən lan otolkeike pik iərəməərə?”

⁴³Kən Saimon in təmən məmə, “Nıkkik təht məmə etəm u itəm in təmos məni tepət, kən iərəməərə təmasəkitun pik, in otolkeike pik iərəməərə.” Kən Iesu təmən məmə, “Nəmən pahrien.”

⁴⁴Kən Iesu təmeirair məplan pətan u, kən mən-ipən kəm Saimon məmə, “?Saimon, natehm pətan u, o kəp? E nian emuwa imam ikin, ik nəməsos-ipamən nəhau kit o naikuasən e nelkək, məto pətan u, in təmau nelkək e nahui nəmtin mafəl e noanun.

⁴⁵Nian emuwa, kæn Saimon, ik nәмәsolән nәмtәtin kit itәм tatәgәtun mәмә nakolkeike io. Mәto pәtan u, tatoafәl nelkәk tatuwin әm nulan, kæn nolән rәhan tatәgәtun mәмә in tolkeike pik io.

⁴⁶Saimon, ik nәмәsauән rәhk-kapә e oel mәsin ne, mәto pәtan u, in tәmau nelkәk e senta itәм nat kit nәмtin tiәkis.

⁴⁷Kæn tol nәhlan iatән kәм ik mәмә, enafәl rafin rәkis rәhan tәfagә rat min itәм tepәt tepәt, kæn tol nәhlan, nolән min әh itәм tatol, tatәgәtun mәмә tolkeike pik io. Mәto nian iatos-irәkis tәfagә rәha etәmim noan mәsin, kæn kәsi, rәhan nolkeikeән in natiәkәku ron io.”

⁴⁸Kæn Iesu tәмән-ipән kәм pәtan u mәмә, “Reham tәfagә rat min, io enafәl rәkis.”

⁴⁹Kæn netәmim neen min itәм kәmotagwән ilat min, koatән kәм ilat min mәмә, “?Etәmim naka әh itәм tatән mәмә tatos-irәkis tәfagә rәha etәmim?”

⁵⁰Mәto Iesu tәмән-ipән kәм pәtan u mәмә, “Uhgин tәmosmegәh ik mәto-inu nәmahatәtә lak. Kæn uwин, pәs nәmәlinuән rәha Uhgин tәtatig ron ik.”

Luk 8

Nipitan itәм kәmotasitu e Iesu

¹Uarisig e natimnat min әh, Iesu in taliwәk matuwin e taon min neen ne latuәnu min neen. In tatән-iarәp nәghatән rәha Uhgин kæn mәtamnus-iarәp namnusән tәwir rәha nәрәmәрәән rәha Uhgин. Kæn e nian әh, tuelef aposol min rәhan kәmoatәtәu-pән.

²Kæn nipitan neen min kәmoatuarisig-in Iesu, inu aupән ikin ilat kәmoatimis, o kәmoatos narmin rat min tәtatig elat, mәto Iesu in tәмәhg-iarәp narmin rat min kæn tәmol-wir rәhalat nimisән. Nәrgi nipitan min u Meri u katән mәмә Maktala itәм Iesu tәмәhg-iarәp narmin rat sepin lan;

³ne Joana pәtaguihl rәha Jusa itәм in tatәрәmәрә e nimә rәha Kig Herot Antipas; ne Susana; ne nipitan tepәt min. Nipitan min u koatos-ipән rәhalat mәni o nos-nәмtinән natimnat o nasituән e Iesu ne rәhan min netәм tuelef.

Nimaa nәghatән e nimәptән

(Mat 13:1-23; Mak 4:1-20)

⁴Nïmanin netämim tepät kəmotisi-pən e taon min tepät motuwa o Iesu. Nian kəmotuwa motətul kitəlau lan, kən təmuəh nimaa nəghatən kəm ilat. In təmən məmə,

⁵“Suah kit, etəm rəha nəfeən nïkuti wit, təmuwin matərakin nïkuti wit tatisas əpəh e nasumən. Kən neen kəmotisas e suatip, kən uarisig netämim kotuwa kaliwək lan, kən mənig min kotuwa motun rəkis ilat.

⁶Kən nïkutin neen kotisas-pən e nisip noan məsin itəm kəpiel ləhau lan. Nian koatəwiə, kən motauke məto-inu nəhau tikə ləhau lan.

⁷Kən nïkutin neen kotisas-pən e niki nolkosik. Uarisig, nolkosik ne wit kuəwiə kələh, kən nolkosik tatu-atu-pən lan mətoarus-pən kotimis.

⁸Kən nïkutin neen min kəmotisas-pən e nəptən wir motəwiə motoe-in noalat tepät tepät tahmen e wan-hanrit.” Nian Iesu təmən rəkis nəghatən u, kən təmagət, mən kəm ilat məmə, “Etəm matəlgin tatig, təwir məmə in otətəlig-in wir kən mitun nəghatən min u.”

⁹Kən netämim rəha Iesu kəmotətapəh ron məmə, “Uhapik-pa nimaa nəghatən u kəm itimat.”

¹⁰Kən in təmən-ipən kəm ilat məmə, “Itəmat, Uhgın tinerəh rəkis e rəhatəmat suatip məmə itəmat onəkotitun nəghatən rəha nərəmərən rəha Uhgın itəm tatəhluaig. Məto netämim neen, ilat koatos əm e nuəhən nimaa nəghatən min, məmə ilat okoatehm, məto kotəruru, kən ilat okoatəto, məto okol kəsotitunən.”

¹¹Kən Iesu in təmatəghat məmə, “Nipəti nimaa nəghatən u tol min-nulan. Nïkuti wit, inu nəghatən rəha Uhgın.

¹²Nïkutin min itəm koatisas e suatip, inu tahmen-pən e netämim itəm kotəto nəghatən rəha Uhgın, kən Setan tatos-irəkis nəghatən rəha Uhgın e rəhalat nətəligən məmə okəsotənən nïpahrienən lan, kən Uhgın otəsosmegəhən ilat.

¹³Kən nïkutin min itəm koatisas-pən e nisip noan məsin kəpiel əh ləhau ikin, inu tahmen-pən e netämim itəm koatəto nəghatən rəha Uhgın, kən nïkilat

tətagien ron. Məto nokilat təseiuaiuən isəu, kən koatahatətə e nian əkuəkir əm. Məto nian nəəsəuən, o nəratən tuwa e nəmegəhən rəhalat, kən koatəme e rəhalat nahatətəən.

¹⁴Kən nikutin min itəm koatısas-pən e niki nolkosik, inu tahmen-pən e netəmim itəm koatətə nəghatən rəha Uhgın, məto natımnat tepət tətatu-atu-pən e nəmegəhen rəhalat, inəh koatətəlig-in pik natımnat rəha nəmegəhən rəhalat, o ilat kotolkeike nautə tepət, o kotolkeike məmə okotətə təwir e rəhalat nəmegəhən. Kən nəmegəhən rəhalat təsoe-inən nat təwir kit e nəghatən rəha Uhgın.

¹⁵Məto nikutin itəm tatisas-pən e nıməptən təwir, inu tahmen e netəmim itəm koatətə nəghatən rəha Uhgın, kən nikilat tətuatıp kən məwir, kən ilat kotaskəlim nəghatən rəha Uhgın tətətig tiəkis e nikilat. Kən ilat kotalkut matuwın matuwın, kən motoe-in nəmegəhən təwir.”

Oı wək e nat itəm nakatos

(Mak 4:21-25)

¹⁶Kən İesu təmən-ipən məmə, “?Pah tətasiəpən e lait kən mətaii-pən e pesin, o tatəhtu-pən e nıpəg pet? !Kəp! Kəsölən mihin. Nian nakotasiepən e lait, kən motətə-pər e tepıl məmə netəmim okotehm nat lan.

¹⁷Kən e nolən kitiəh min əm, okəmə suah kit tətəhluaig-in nat kit, məto Uhgın otol əp in, kən okəmə suah kit tatos nəghatən anion kit, məto Uhgın otən-iarəp.

¹⁸Nəghatən u itəm nakoatətə, otətəlig-in wir. Etəm itəm tınıtun rəkis nıpəti nəghatən rəhak, in titun nosən təhmin min. Məto etəm itəm təsitunən, in otəmkarəpən e nat itəm nikin tatəht məmə tatos.”

Mama rəha İesu ne pian min

(Mat 12:46-50; Mak 3:31-35)

¹⁹Kən e nian əh, mama rəha İesu ne pian min kəmotuwa məmə okotehm, məto okol kəsotuwinən iuəhkir motehm məto-inu nımanin netəmim tepət koatətlosig-in.

²⁰Kən netəmim kəmotən-ipən kəm in məmə, “Mama rəham ne piam min ilat əpəh ihluə koatətul, kən kətolkeike məmə okotehm ik.”

²¹Kən Iesu təmən-ipən kəm ilat məmə, “Netəmim rafin itəm koatəto nəghatən rəha Uhgın kən moatətəu-pən, ilat un rəhak netəmim min, rəhak mama ne piak min.”

Iesu təmən-iəhau nimətag asol e Lek Kalili

(Mat 8:23-27; Mak 4:35-41)

²²Nian kit Iesu ne rəhan min netəmim kəmotuwın e pot kit, kən in təmən-ipən kəm ilat məmə, “Pəs kotuwın əpəh entənipən-pən e lek u.” Kən kəmotiuw niuwən motiet.

²³Nian pot tinətaiu, kən Iesu təmuwın mapil. Kən nimətag asol kit təmeiuaiu-pa e lek u, kən nəhau təmuwın e nıpəgnoa pot, iuəhkir əm pot tətəmnim.

²⁴Kən kəmotəhgair e Iesu kən motəmə, “!Ei, Etəm-iasol! !Etəm-iasol! Aiir-ta, okotimis roiu!” Kən Iesu təmaiir məghat mən-iəhau nimətag ne peau-peau asol min məmə, “!Nahmen, uameg-ta!” Kən nimətag təmurahl nelmin, kən tinəməlinu tinəməlinu.

²⁵Kən Iesu təmən-ipən kəm ilat məmə, “?Tahro? ?Rəhatəmat hiə nahatətəən?” Məto ilat kinoatəgin, kən narmilat tinatiwig min, kən minoatən-ipən kəm ilat min məmə, “!Ei! ?Etəmim naka u? Nat əpnapın nimətag ne nəhau, məto katuətəlig-in rəhan nəghatən matioal.”

Iesu təməhg-iarəp narmın rat min e suah kit

(Mat 8:28-34; Mak 5:1-20)

²⁶Kən ilat kəmotuwa kiet-arəpa rəha netəm Kerasa ikin, inəh entənipən-pən e lek u, kən kəmotuwar əpəh ipar.

²⁷Nian Iesu təmuwar, kən əmun etəmim kit əh-ikin təmuwa mehm. Suah un, narmın rat min kotatig lan, kən nuwəh məsin in təməsuwın-inən napən, kən in təsapılən imə, məto in tətətig əm əh e nıpəg kəpiel min, ikin katitənim netəmim ikin.

28-29 Aupən ikin, nian tepət, narmin rat əh tatol in tətalməl p̄ik, kən netəmim koatəlis nelkin ne nelmin e sen məmə otaskəlīm tiəkis moatehm məmə otəsərəkin-rəkinən natimnat. Məto e nian rafin tateatip-eatip sen min əh, kən narmin rat tatəkəike kəm in məmə otiet magim muwin əpəh ikin taruən-aruən ikin. Kən nian ialməl u təmehm Iesu, təmearig əfəməh, muwa morin-pən e nelki Iesu, kən mətagət məmə, “!Iesu, Nəti Uhḡin Ilis Agin! ?Nakəmə onakahro io? !Awi, iatətapəh ron ik məmə onəsolən nalpinən asol kit kəm io!” Narmin rat u təmən nəhlan məto-inu Iesu tinən rəkis məmə in otiet magim e suah u.

30 Kən Iesu təmətapəh məmə, “?Nərgəm pah?” Kən in təmən məmə, “Nimanin Tepət.” Təmən nəhlan məto-inu narmin rat tepət kəmotatig lan.

31 Kən narmin rat min kəmotətapəh əskasik o Iesu məmə, “Onəsahl-ipənən itimat e n̄ipəg itəm namnun tikə tapinəp, u imə nalpinən.”

32 Kən ikin əh e nikali nitot, p̄ikəs min tepət kotagwən motan əh-ikin. Kən narmin rat min kəmotasək moatən-ipən kəm Iesu məmə, “Awi, egəhan-in itimat ekotuwin e p̄ikəs min əh.” Kən Iesu təmegəhan-in ilat kotuw̄in.

33 Kən narmin rat min u kəmotiet e suah un motuw̄in e p̄ikəs min, kən p̄ikəs min ilat rafin kəmotaiu moteiuaiu ikin təkul-əkul ikin, kən motiet-pən e lek motamn̄im.

34 Nian netəm kotagwən p̄ikəs min kəmotehm nat u, kəmotiet motagim motuw̄in moatən-iarəp namnusən rəha natimnat min u e taon rəhalat ne ikin min rafin titəlau lan.

35 Kən netəmim kəmotiet e taon moatuwin məmə okotehm natimnat min əh. Kən kəmotuwa motehm Iesu, kən motehm min suah un itəm narmin rat min kəmotiet rəkis lan, in tatəpələh iuəhkir e nelki Iesu, tinəsalmələn, kən minuw̄in-in rəkis rəhan napən. Kən netəmim rəha taon koatəgin.

36 Kən netəmim itəm kəmotehm ətuatip nat u e niganəmtilat, ilat kotamn̄us tatuwin kəm netəmim neen min moatən-iarəp məmə Iesu təmahro nulan mol-wir suah əh, itəm aupən ikin narmin rat min kəmotatig lan.

³⁷Kən netəmim rafin u kotatig iuəhkir ikin Kerasa, kəmotən-ipən kəm Iesu məmə otiet iməlat ikin, məto-inu ilat kīnoatəgin pīk. Kən əmun in təmuwin e pot məmə okotasuə moatuwin entənipən-pən ikin.

³⁸Məto suah u itəm narmin rat min kəmotiet lan, in təmətapəh o Iesu məmə, “!Awi, pəs ekimnə kitat!” Məto Iesu təmən-ipən kəm in məmə,

³⁹“Itəlig matuwīn imam ikin, muwin mən-iarəp natimnat min itəm Uhgīn təmōl kəm ik.” Kən suah u təmuwin ikin min rafin e taon iman ikin matən-iarəp natimnat min rafin itəm Iesu təmōl kəm in.

Pətagwəhl kit itəm tatimis ne pətan əkəku kit itəm təmimis

(Mat 9:18-26; Mak 5:21-43)

⁴⁰Nian Iesu təmitəlig-pa min e entənipən-pa lan e lek u, netəmim nikilat təmagien məmə kinotehm min Iesu, məto-inu ilat kəmoatəsahgin.

⁴¹Kən etəmim kit təmuwa mehm, nərgin u Jaeras, itəm in etəm-iasol kit rəha nimə rəha nuəfiminən. Təmuwa meiuaiu misin nulin e nisaiiən, matəkəike e nətapəhən kəm Iesu məmə in otuwīn əpəh iman ikin,

⁴²məto-inu rəhan pətan əkəku tatimis pīk rəhan nahməən tēpət, kən otəsuwəhən timis. In noan kitieh əm, rəhan nup tuelef. Kən Iesu təmaliwək matuwīn o pətan əkəku əh, kən nīmanin netəmim tēpət kəmotuwa kitəlau lan katiləs-pikən-ləs-pikən.

⁴³Kən pətan kit təmuwa o Iesu itəm tatos nīmisen rəhalat nīpitan nian rafin əm minos nup tuelef, kən təmuwin o netəmim tēpət itəm koatol mərisin, məto okol kit təsōl-wirən.

⁴⁴Kən pətan əh təmisi-pən e məntaa Iesu ikin, kən mea-pən mek nīpəgnəmti nīməhan rəha Iesu, kən əmun roiu agin-əh min əm, rəhan nīmisen təmōl namnun.

⁴⁵Kən Iesu tən məmə, “?Ei, pah təkək io?” Kən nian ilat rafin kəmotən məmə kəp, kən Pita təmə, “!Etəm-iasol, nīmanin netəmim tēpət koatiləs-pikən-ləs-pikən ik!”

⁴⁶Məto Iesu tən məmə, “Kəp. Ekitun məmə suah kit təmek io məto-inu eməto məmə nəsanənən təmiet lak.”

⁴⁷Kən e nian pətan əh tinitun məmə okol in təsəhluaigən, in təmuwa mətasiəp-asiəp pik, kən misin nulin matos-ipən nisaiiən kəm Iesu. Kən e niganəmti netəmim rafin, tatən-iarəp kəm Iesu məmə təmek in o naka, kən matən-iarəp min məmə e nian təmek in, kən roiu agin-əh min əm, rəhan nimisən təmol namnun.

⁴⁸Kən Iesu tən-ipən kəm in məmə, “Nətik pətan, rəham nahatətəən lak təmol-wir ik. Kən atuwın, pəs nəməlinuən rəha Uhgın tətətig ron ik.”

⁴⁹Nian Iesu təmatəghat əh, kən etəmim kit təmisi-pən imə Jaeras ikin met-arəpa, kən mən kəm Jaeras məmə, “Nətim pətan əkəku tinimis rəkis. Əsəlikiamtəən iəgətun.”

⁵⁰Məto nian Iesu təməto nəghatən əh, in təmən-ipən kəm Jaeras məmə, “Əsəginən. Ahatətə əm lak, kən pətan əkəku rəham, in otəwir min.”

⁵¹E nian Iesu təmuwa met-arəpa e nimə rəha suah əh, kən təmit-irəkis əm Pita, ne Jon, ne Jemes, ne mama ne tata rəha pətan əkəku itəm in təmimis, məmə ilat əm okotuwın imə.

⁵²Netəmim rafin koatasək əfəməh moatəun-əun o pətan əkəku əh, məto Iesu təmən-ipən kəm ilat məmə, “Əsotasəkən. Pətan əkəku u in təsimisən. In tətəpıl əm.”

⁵³Kən ilat kotalah-əsan lan məto-inu ilat kotitun məmə pətan əkəku əh tinimis rəkis.

⁵⁴Məto Iesu təmea-pən mıləs nelmi pətan un kən maun-in məmə, “Pətan əkəku, ətul.”

⁵⁵Kən əmun pətan əkəku apon təməmegəh min mətul. Kən Iesu təmən-ipən kəm ilat məmə, “Otos-ipən nat kit tun.”

⁵⁶Kən rəhan mama ne tata, narmılau təmiwig pik, məto Iesu tən-ipən kəm ilau məmə, “Onəkəsuən-iarəpən natimnat min u kəm suah kit.”

Luk 9

Iesu tɔmahɩ-ɩpɛn rɛhan netɛm tuelef mɛmɛ okotɛn-ɩarɛp nɛrɛmɛrɛɛn rɛha Uhgɩn

(Mat 10:5-15; 14:1-2; Mak 6:7-16)

¹Kɛn Iesu tɛmuɛfɩmɩn rɛhan netɛm tuelef kotuwa kitɩɛh, kɛn tɛmos-ɩpɛn nɛsanɛnɛn kɛm ilat kɛn mategɛhan-in rɛhan nepɛtɛn o nɛrɛmɛrɛɛn kɛm ilat mɛmɛ ilat kotɩtun nɛhg-ɩarɛpɛn narmin rat min, kɛn mɛmɛ ilat okotol-wɩr nimɩsɛn min.

²Kɛn Iesu tɛmahɩ-ɩpɛn ilat mɛmɛ okotɛn-ɩarɛp nɛrɛmɛrɛɛn rɛha Uhgɩn, kɛn mɛmɛ okotol-wɩr netɛmɩm itɛm koatɩmɩs.

³Kɛn in tɛmɛn-ɩpɛn kɛm ilat mɛmɛ, “Nian onɛkotuwɩn, mɛsotosɛn natɩmnat neen rɛha naliwɛkɛn rɛhatɛmat, natɩmnat itɛm kotahmen-pɛn e kasɩkɩn, o kɛtɩm, o nagwɛnɛn, o mɛni, kɛn mɛsotosɛn napɛn kɛɩu.

⁴Kɛn e nian itɛmat nakotuwɩn e latuɛnu kit motatɩg e nimɛ kit, nimɛ u inun onɛkotatɩg ɛm lan mɛtoarus-pɛn nian itɛmat onɛkotɩet lan.

⁵Kɛn ɩkɩn pɛhruɛn onɛkotuwɩn ɩkɩn, okɛmɛ netɛmɩm nɩkilat tɛsagɩɛnɛn mɛmɛ nakotuwa motatɩg itɛmat min ilat, kɛn otohapispɩs rɛkɩs nimoulul e nelkitɛmat motɩet. Inu nɛmtɛtɩn kit tatɛgɛtun mɛmɛ nakotapɛs ilat, kɛn nɩki Uhgɩn tɛrat olat.”

⁶Kɛn ilat kɛmotɩet motaliwɛk motuwɩn latuɛnu min moatamnus-ɩarɛp namnusɛn tɛwɩr, kɛn ɩkɩn min rafɩn koatuwɩn ɩkɩn, moatɛfak o netɛmɩm tɛpɛt, kɛn kotɛmegɛh.

⁷Kɛn Kɩg Herot Antipas u in ɩɛrɛmɛrɛ e nɩtɛn Kalili, in tɛmɛto namnusɛn rɛha natɩmnat min u itɛm Iesu tatol ilat. Kɛn tɛmɛtɛlɩg-in muwɩn minɛruru ɛfɛmɛh mɛto-inu netɛmɩm neen kotɛn mɛmɛ Jon Baptais tɩnɛmegɛh min,

⁸kɛn netɛmɩm neen min kɛmotɛn mɛmɛ Elaija tɩnuwa min, kɛn netɛmɩm neen kɛmotɛn mɛmɛ in ɩɛn kit rɛha Uhgɩn aupɛn ɩkɩn itɛm tɛmɛmegɛh min.

⁹Kɛn Herot Antipas tɛmɛn mɛmɛ, “Jon u, ɩo ɛnɛmohatɩp rɛkɩs rɛhn-kapɛ. ?Mɛto ɛtɛmɩm pah u ɩatɛto rɛhan namnusɛn?” Kɛn in tɛmategɛs-in Iesu mɛmɛ otɛplan.

Iesu tēmagwən netēmim faif-taosan

(Mat 14:13-21; Mak 6:30-44; Jon 6:1-14)

¹⁰Kən aposol min rəha Iesu kəmotitəlig-pa min ron, kən motən-ipən kəm in natimnat rafin itəm kəmotol. Kən in təmit ilat motiet rəkis e netēmim, motuwīn əpəh e taon pişin kit min, nərgin u Petsaeta.

¹¹Məto e nian netēmim kəmotəto namnusən məmə Iesu tinuwa, kən kəmotuwa motuarisig-in ilat. Kən Iesu nikin tēmagien əm nian in tēmehm ilat, kən in tatəgətun ilat e nərəmərən rəha Uhgīn, kən matol-wir netəm koatimis kotəmegəh min.

¹²Kən ehnaipən iuəhkir o napinəpən, netəm tuelef rəha Iesu kəmotuwa ron, moatən məmə, “Iərəmərə. Ahl-ipən netēmim rafin koatuwīn əpəh e latuənu min məmə okotegəs-in ikin təwir kit rəha napilən kən motegəs-in nagwənən itəm okotun məto-inu, ikin-u koatan ikin roiu, in liminan.”

¹³Məto in təmən-ipən kəm ilat məmə, “Kəp, itəmat əm. Onəkotagwən netəm min əh.” Kən ilat kotən məmə, “Itimat ekoatos əm pīret faif ne nəm kəiu. ?Tahro? ?Nakolkeike məmə ekotuwīn motos-nəmtin nagwənən kit min nigī nimanin netēmim min əh rafin?”

¹⁴Kəmotəghat nəhlan məto-inu netēmim tepət tepət itəm kəmotuwa ikin əh, okəmə kafin nəman əm, kən ilat rafin faif-taosan. Məto Iesu tən-ipən kəm rəhan min netēmim məmə, “Otuwīn motor ilat fife fife motən məmə okotəpələh.”

¹⁵Kən rəhan min netēmim kəmotor ilat mihin nəhlan, kən netēmim rafin kəmotəpələh.

¹⁶Kən Iesu təmos pīret əh faif ne nəm kəiu, masipər e neai, kən matəfak kəm Uhgīn o nagwənən, kən məmkas matos-ipən kəm rəhan min netēmim məmə okotos-ipən kəm netēmim.

¹⁷Kən netēmim rafin kəmotagwən motuwīn nərpilat tasis. Kəmotapəs nimismisi nagwənən, kən netēmim rəha Iesu kəmotaii-pən e kətim asol ilat tuelef itəm kəmotər kər wir.

Pita tēmən mēmə Iesu in Kristo

(Mat 16:13-20; Mak 8:27–9:1)

¹⁸Kən nian kit, Iesu ne rəhan min əm kotatig, kən Iesu tatəghat kəm Uhgın e nəfakən. Kən in tēmətapəh olat mēmə, “?Netəmim koatəghat-in io mēmə io pah?”

¹⁹Məto kotən mēmə, “Nen koatən mēmə ik Jon Baptaıs. Kən nen koatən mēmə ik ien Elaija. Kən nen koatən mēmə ik ien kit rəha Uhgın aıpən ikin itəm tinəmegəh min.”

²⁰Kən Iesu tēmətapəh olat mēmə, “?Məto itəmat nakotəmə pah u io?” Kən Pita tēmən mēmə, “Ik Kristo itəm Uhgın tēmən mēmə otahl-ıpa.”

²¹Məto Iesu tēmən-iəhau əskasik ilat mēmə okəsotən-ıarəpən nəghatən min əh kəm netəmim.

²²Kən in təmatig mən min kəm rəhan min netəmim mēmə, “Nat kit itəm otəkəike muwa mol nıpahrienən lan, mēmə io, Nəti Etəmim, oekəto nahməən e natımnat tərət. Kən netəm-ıasol min rəha noanol rəha Isrel, ne pris asol min, ne iəgətun min rəha Lou, ilat okotəuhlin məntaalat kəm io, kən motohamnu io, kən ekimis. Məto nian itəm tatol kisil lan, Uhgın otol ekəmegəh min e nımisən.”

²³Kən Iesu tēmən-ıpən kəm rəhan netəmim mēmə, “Etəm u tolkeike mēmə otuwa muarisig-in io, in otəkəike maluin atıp in, kən e nian rafin in otəkəike mıləs rəhan nig kəməluau muarisig-in io,

²⁴məto-inu etəmim itəm tolkeike mēmə otosmegəh rəhan nəmegəhən e nətueintən u, kən otakiəh e rəhan nəmegəhən lilin. Məto etəmim itəm otimis o nərgək, kən in otos nəmegəhən lilin.

²⁵?Okəmə suah kit tatos rafin natımnat rəha nətueintən u, kən otimis ron, in otıləs nat wir naka?

²⁶Okəmə nətaulis-in io mətaulis-in min rəhak nəghatən, kən Nəti Etəmim in ottaulis-in min ik e nian itəm in otatuwa e nepətən əhag-əhag ne nəsanənən

rəhan, ne nepətən əhag-əhag ne nəsanənən rəha Tata rəhan ne nagelo min itəm kotasim.

²⁷Məto iatən nıpahrienən kəm itəmat məmə, itəmat neen itəm nəkoatətul ikin-u, uarisig nəpanotimis məto nakotaupən motehm nərəmərən rəha Uhgın.”

Iesu ne Moses ne Elaija

(Mat 17:1-8; Mak 9:2-8)

²⁸Uarisig e nəghatən əh rəha Iesu, kən iuəhkir nian eit tinuwa minuwın rəkis, kən Iesu təmit Pita, ne Jon, ne Jemes kəmotuwın əpəh ilis e nitot məmə okotəghat kəm Uhgın e nəfakən.

²⁹Kən e nian in təmatəfak, kən rəhn-kapə tinuwa minol pisin, kən napən rəhan təmuwa məruən matipit-ipit.

³⁰Kən əmun Moses ne Elaija kəmuət-arəpa muətul mətəhaləghat iləhal Iesu,

³¹kən nəhag-əhagən asol kit təmasiə mitəlau elau, kən katəhaləghat-in nimisən rəha Iesu əpəh Jerusalem itəm otol nəghatən rəha ien min rəha Uhgın otuwa mol nıpahrienən lan.

³²Məto Pita ne təs mil, napılən tinos rəkis iləhal, kən kəməhalapıl məsin. Məto nian kəməhalaiir, kəməhalehm nəhag-əhagən asol titəlau e Iesu, kən kəməhalehm Moses ne Elaija katuətul iləhal Iesu.

³³Kən nian suah mil kinətuagım minatian isəu o Iesu, kən Pita təmən-ipən kəm Iesu məmə, “İərəmərə, təwir məmə itiməhal etəhalatig ukin-u. Pəs ekəhaliləkin makeen kisil, rəham kit, kən rəha Moses kit, kən rəha Elaija kit.” Məto in təmatəghat ənnapın əm, təsitunən məmə nəghatən naka in tatən.

³⁴Kən e nian in təmatəghat əh, nimal napuə təmuwa malpin ilat, kən nian napuə təməfətain iləhal, kəməhaləgin kəməhaləgin.

³⁵Kən ilat kəmotəto nəwia suah kit təmisi-pən e nimal napuə, tatən məmə, “Inu nətik itəm io emitəpun. !Əhalətəlig-in wir!”

³⁶Nian kinotəto rəkis nəwia Uhgın təməghat un, kən Pita ne Jon ne Jemes kəməhaləplan əm Iesu. Kən e nian min əh, kəsəhalənən natimnat min əh kəm suah kit min, kəsəhaləghat-inən natimnat min u itəm kəməhaləplan.

Iesu təmahl-iarəp narmin rat e suakəku kit

(Mat 17:14-23; Mak 9:14-32)

³⁷Kən kəmən lawig in, nian Iesu ne rəhan etənim miləhal kəmotisi-pər ilis e nitot moteiuaiu-pa, kən motehm netənim tepət kəmotuwa ron.

³⁸Kən netəm min əh kit təmaun-in əfəməh Iesu məmə, “Iakolkeike məmə nakuwa masitu e rəhak suakəku iərman, məto-inu in noanahli iouen kitəh əm.

³⁹Nian tepət, narmin rat kit tatuwa lan, kən mol in tətəgət pīk, kən mol nīpətīn tətasiəp-asiəp matol matol, nahui noan ruən min kotiet, kotahmen əm e sop. Narmin rat əh tatərəkīn pīk in, kən mətaskəlīm in, iuəhkīr təsapəsən in.

⁴⁰Kən io emətapəh o rəham min netənim məmə okotəhg-iarəp narmin rat u, məto okol kəsotəhg-iarəpən.”

⁴¹Kən Iesu in təmən-ipən kəm ilat məmə, “Itəmat netəm roiu ne, rəhatəmat nahatətən tikə. Kən rəhatəmat nətəlīgən təsətuatipən. Enərou-in itəmat. ?Oekatig kitat min itəmat nian kuwəh? It nətīm muwa ukīn-u.”

⁴²Kən nian suakəku u təmatuwa əh o Iesu, kən narmin rat təmahtīgəpis tiet morin-pən e nisip, mol nīpətīn tətasiəp-asiəp. Məto Iesu təməghat əskasik kəm narmin rat un, kən məhg-iarəp narmin rat tiet, kən mol suakəku təwir. Kən təmos-ipən suakəku titəlīg-pən mehm rəhan tata.

⁴³Kən ilat rafin, narmilat təmiwig o nəsanənən asol rəha Uhgın. Məto nian netənim narmilat təmiwig o natimnat rafin itəm Iesu təmol ilat, kən in təmən-ipən kəm rəhan min netənim məmə,

⁴⁴“Otos nəghatən u tatite mamnim e nikitəmat kən məsotaluinən. Io Nəti Etənim, suah kit oteghən-in-pən io e nelmi tikimīr min rəhak.”

⁴⁵Məto rəhan min netənim kəsotitunən nīpəti nəghatən u məto-inu Uhgīn təməhluaig-in nīpəti nəghatən u məmə ilat okəsotitunən, kən ilat kinotaulis-in nətapəh-inən nīpəti nəghatən u o Iesu.

?Pah in iahgin etəm keike?

(Mat 18:1-5; Mak 9:33-40)

⁴⁶Kən netənim rəha Iesu koatol nīkilat min məmə pah in iahgin etəm-iasol, etəm keike taprəkis-in ilat.

⁴⁷Məto Iesu təmitun rəhalat nətəligən min, kən in təmos suakəku kit mit muwa tətul e nīkalin,

⁴⁸kən tən-ipən kəm ilat məmə, “Okəmə suah kit, nīkin tagien məmə otos suakəku kit mehm wīr, kən in tatol min-nəhlan e nərgək, kən in tahmen-pən əm məmə in tatos io, matehm wīr io. Kən etəm tatos io e nīkin agien, in tatos Uhgīn itəm təmahl-ipa io. Inu nīpahrienən məto-inu etəm tatos-iəhau in ləhau agin, in otuwa in etəm-iasol, etəm keike.”

⁴⁹Kən Jon təmən məmə, “Iərəmərə. Itimat emotehm suah kit tatəhg-iarəp narmin rat min e nərgəm, kən emotən-iəhau məmə otəsəl wəkən məto-inu sənəmə in rəhatat kit etənim.”

⁵⁰Məto Iesu təmən-ipən kəm in məmə, “Əsən-iəhauən in məto-inu, okəmə suah kit təsələn tīkimīr itəmat min, kən in iolitəmat.”

Netəm Sameria neen nīkilat təməsagienən o Iesu

⁵¹Kən tīnuwa iuəhkīr o nian itəm Uhgīn otos Iesu lan muwīn əpəh e nego e neai, kən Iesu təmən-ipən atip kəm in məmə otəkəike muwīn Jerusalem, kən nat kit tīkə məmə otahtosig-in.

⁵²Kən in təmahl-ipən netənim neen kotos rəhan nəghatən motaupən-in motuwīn əpəh latuənu kit Sameria məmə okotol əpen-əpenə rəhan.

⁵³Məto netəm əh-ikin əh, kəsotolkeikeən məmə in otuwīn matig iməlat ikin məto-inu, ilat kotitun wīr məmə tatuwīn Jerusalem.

⁵⁴Kən nian rəhan etəmim mil, Jemes ne Jon, ilau kəmuehm natimnat min əh, kən kəmuən məmə, “?Iərəmərə, nakolkeike məmə ekuaun-in nigəm tisi-pən əpəh ilis e nego e neai meiuaiu muwa mus ilat?”

⁵⁵Məto Iesu təmeirair məhai ilau.

⁵⁶Kən kəmotuwın min latuənu pisin kit min.

Netəmim neen kəmoatən məmə okotuarisig-in Iesu

(Mat 8:19-22)

⁵⁷Kən e nian Iesu ne rəhan min netəmim kəmotaliwək moatuwin e suatip, kən suah kit təmən-ipən kəm in məmə, “Io ekuarisig-in ik, ikin pəhruən onəkuwin ikin.”

⁵⁸Kən Iesu təmən-ipən kəm in məmə, “Kuri iarupin min, rəhalat nipəg tatig məmə okotapil ikin. Kən mənig min, nimaalat tatig məmə okotapil ikin. Məto io Nəti Etəmim, nimə rəhak tikə o napilən.”

⁵⁹Kən Iesu təmən-ipən kəm suah kit min məmə, “Wa, kilau min ik, muwa ik rəhak etəmim.” Məto suah un tən-ipən məmə, “Iərəmərə, awi. Egəhan-in io ekuwin pitən mitənim rəhak tata.”

⁶⁰Məto Iesu təmən-ipən kəm in məmə, “Kəp, apəs-pən. Pəs netəm kinotimis rəkis e nikilat, koatitənəm atip ilat min. Məto ik, uwın mən-iarəp nərəmərəən rəha Uhgın.”

⁶¹Kən kit min tatən məmə, “Iərəmərə, ekətəu-pən ik muwa io etəmim rəham, məto awi, əpəs pitən ekıtəlig-pən min imak ikin mauiatipin rəhak min netəmim.”

⁶²Məto Iesu təmən-ipən kəm in məmə, “Okəmə suah kit tətoun matol wək rəha Uhgın, məto rəhan nətəligən tatuwin o nat pisin pisin min neen, kən suah u təsahmen-pənən məmə Uhgın otərəmərə lan.”

Luk 10

Iesu təmahı-ipən rəhan netəmim sepinte-tu kotamnus-iarəp namnusən təwir

¹Uarisig e natimnat min əh, İərəməyə təmitəpun rəkis sepinte-tu netəmin neen min rəhan, kən təmahl-ipən ilat kəiu kəiu kotaupən-in moatuwin e taon min ne ikin min neen min itəm İesu təpanuarisig muwin ikin.

²Kən təmən-ipən kəm ilat məmə, “!Otəplan-tu! Nagwənən tepət əpəh e nasumən itəm kinotimətə, məto iolwək min noan məsin əm kotəulək-in. Kən otəfak-pən o etəm-iasol rəha nasumən məmə otahl-ipa iolwək min tepət məmə okotuwın kəulək-in nasumən rəhan.

³Otuwin, məto nəkotəkəike motitun məmə io etahl-ipən itəmat məmə nakotuwın tahmen-pən e sipsip əlkələh min itəm kotaliwək moatuwin ilugin e kuri iarupın min.

⁴Kən onəkəsotosən kətim əkəku rəha məni, ne kətim, ne put, kən əsotamegən e suatip katəghat kəm netəmin.

⁵“Nimə naka itəm onəkotuwın ikin, nakotaupən motən-iarəp məmə, ‘!Pəs nəməlinuən otətətig ikin!’

⁶Okəmə etəm rəha nəməlinuən əh-ikin, kən rəham nəfakən otuwa mol nipahrienən, kən nəməlinuən otətətig ron. Məto okəmə etəm tol nəhlan tikə, kən noa rəham nəfakən otitəlig-pa min ron ik.

⁷Kən otətig əm e nimə kitih əm, sotapilən e nimə pisin pisin min. Kən nagwənən naka itəm okoatos-ipinə kəm itəmat, otun. Kən nənimən naka okotos-ipinə, otənim. Məto-inu in tətuatip əm məmə suah kit itəm tatol wək, in tətuatip məmə in otos nətouən lan.

⁸“Nian itəmat nakotuwın taon kit, okəmə nikilat tətəgien otəmat, kən otun nagwənən naka itəm koatos-ipinə kəm itəmat,

⁹kən otol-wir netəmin itəm koatimis motətig ikin, kən motən-iarəp kəm ilat məmə, ‘Nərəməyə rəha Uhgın tatuwa iuəhkir otəmat.’

¹⁰Məto okəmə nakotuwın e taon kit, kən netəmin nikilat təsəgienən otəmat, kən otuwın motaliwək e suatip asol min, kən motən məmə,

¹¹‘Nimoulul rəha nisip itəm tətətig e nelkitimat, ekoatoahapispis rəkis, in nəmtətin tatəgətun məmə nəmotol təsahmenən, kən Uhgín təmapəs itəmat. Məto nəkotəkəike motitun məmə nərəmərəən rəha Uhgín tinatuwa iuəhkír rəkis.’

¹²Kən iatən nípahrienən kəm itəmat məmə, Uhgín otol nalpínən asol kəm ilat taprəkis-in nalpínən rəha taon rat əh Sotom aupən.”

¹³“!Itəmat netəm Korasin, kəsi, nahməən asol otuwa otəmat! !Itəmat netəm Petsaeta, kəsi, nahməən asol otuwa otəmat! Məto-inu emol pap nat pispis tepət e taon mil rəhatəmat! Kən okəmə emol natimnat min əh əpəh Taea ne Saeton aupən, okol netəmim əh-ikin əh kəmotəuhlin rəhalat nətəligən e nolən rat min, kən ilat kəmotuwín e natimnat rat motuwín moatəpələh e nəmtap e nigəm motəgətun məmə koatəto tərət agín o rəhalat nolən rat min.

¹⁴Məto e nian əh itəm Uhgín otol nalpínən kəm netəmim, nalpínən rəhatəmat in otəskasík, maprəkis-in nalpínən rəha netəm Taea ne Saeton aupən ikin.

¹⁵?Kən itəmat netəm Kapaneam, níkitəmat təht məmə Uhgín otíləs-ipər itəmat e ikin rəha nisíaiiən əpəh e nego e neai? !Kəp! Məto Uhgín otíləs-iəhau itəmat nakotuwín ləhau agín, ikin itəmat onəkotaulis ikin.”

¹⁶Kən Iesu təmən-ipən kəm rəhan min məmə, “Netəmim itəm koatətəlig-in itəmat, koatətəlig-in io. Kən netəmim itəm koatəuhlin məntaalat kəm itəmat, koatəuhlin məntaalat kəm io, kən netəmim itəm koatəuhlin məntaalat kəm io, koatəuhlin məntaalat kəm suah u itəm təmahl-ipa io.”

Netəmim rəha Iesu sepínte-tu kəmoatitəlig

¹⁷Kən netəmim min rəha Iesu ilat sepínte-tu kəmotitəlig-pa min, kən níkilat tətəgien moatən kəm Iesu məmə, “!Iərəmərə, nat əpnapín narmin rat min, məto nian itimat ekotəghat e nərgəm, kən ilat koatol nəwíatimat!”

¹⁸Kən Iesu təmən-ipən kəm ilat məmə, “Io emehm Setan təmisi-pər ilis e neai meiuaiu tahmen-pən e nípitən.

¹⁹Otətəlig-tu. Io enos-ipinə rəkis nəsanənən kəm itəmat, inəh itəmat nəkotitun neguətəinən sínek min ne skopionmin. Kən nəsanənən itəm iatos-ipinə kəm

itəmat, in taprəkis-in nəsanənən rəha tikimır rəhatat, Setan. Kən okol nat kit təsərəkinən itəmat.

²⁰Inəh nıpahrienən. Məto nəsotaglienən məmə narmin rat min koatol nəwiatəmat, məto otaglien əm məto-inu Uhgın təməte rəkis nərgitəmat əpəh e nego e neai.”

²¹Kən e nian əh, Iesu nıkin tətaglien pık e naglienən itəm tatisi-pən e Narmin Rəha Uhgın, kən in təməfak mən məmə, “Tata Uhgın, ik İərəmərə rəha natımnat rafın ilis e neai ne ləhau e nətueintən. İatənwiwi ik məto-inu nəməhluaig-in nıpəti natımnat min u e nıganəmti netəmim itəm kotenatıg motıtun wır nat. Kən nəmol-arəp kəm netəmim itəm kotahmen-pən əm e nisualkələh məmə okotıtun wır. Əwəh, Tata, inu nat kit itəm nakolkeike.”

²²Kən Iesu təmatəkəike matəghat kəm ilat məmə, “Rəhak Tata təmegəhan-in-pa rəkis natımnat rafın e nelmək. Tata əm titun Netın. Kən Nətın əm ne netəmim neen, ilat min əm kotıtun Tata. İlat u netəmim itəm Nətın təmitəpun ilat məmə in otol-arəp Tata rəhan kəm ilat.”

²³Kən Iesu təmeirair məghat əm kəm rəhan min netəmim məmə, “!Nəkotatıg e nəwırən pahrien məto-inu itəmat nakoatehm e nıganəmtitəmat natımnat min əh!

²⁴İatən kəm itəmat məmə, aıpən ikın ien min tərət, ne kig min tərət, kəmotolkeike pık məmə okotehm natımnat min u itəm itəmat nakoatehm, məto kəməsotehmən. Kən ilat kəmotolkeike məmə okotəto natımnat min itəm nakoatəto, məto kəməsotətəən.”

Iesu təmuəh nımaa nəghatən e etəm təwir kit rəha Sameria

²⁵Kən e nian əh, ienatıg kit e Lou təmətul meiuə əm e nətapəhən kit kəm Iesu məmə otehm-tu okəmə Iesu in tenatıg wır o kəp. In təmən məmə, “?İəgətun, oekahro min-nulan mos nəmegəhən lılın?”

²⁶Kən Iesu təmən-ıpən kəm in məmə, “?Lou rəha Moses tatən məmə naka? ?Nian ik nətafın, kən nıpətın tatən naka kəm ik?”

²⁷Kən suah un tən-ipən məmә, “Onakəkәike molkeike Iәрәmәрә rәham Uhgin e nikiḡ rafin, ne nәmegәhән rafin rәham, ne nәsanәнән rafin rәham, ne nәtәliḡән rafin rәham; kən molkeike mīn ik mīn neen tahmen-pән әm mәмә nakatolkeike atip ik.”

²⁸Kən Iesu tән-ipән kәм in mәмә, “In әtuatip un. Okәмә nakatol nәhlan, kən ik onakos nәmegәhән lilin.”

²⁹Mәto suah әh, in tolkeike әm mәмә otәgәtun rәhan nolән mәмә in etәм әtuatip, kән in tәмәtapәh o Iesu mәмә, “?Mәto pah mīn u ilat io mīn neen?”

³⁰Kən Iesu tән-ipән kәм in mәмә, “Suah kit tәmiet Jerusalem kән maliwәk meiuaiu matuwīn әpәh Jeriko. Kән e suatip, iaklәh neen kәmotaskәlim motәmki-rәkis rәhan natimnat, kән motoh kәlәhәu timiseah mәtamәhl e suatip, kән kotagim motapәs.

³¹Kən tәpәwir әh, pris kit tatitәp suatip әh matuwa, mәto nian in tәмәplan suah әh, in tәmaliwәk mawilәk-in matuwīn.

³²Kən Lifaet kit titәp mīn әm suatip kitiәh muwa, kән nian tәмәplan suah әh tәtamәhl, in tәmol әm nat kitiәh mīn mawilәk-in.

³³Mәto etәmim kit rәha Sameria, itәм koatol tikimir ilat netәм Isrel, in mīn titәp suatip әh matuwa, kән mәplan suah әh tәtamәhl. Nian tәмәplan, nikin tәmahmә ron,

³⁴kән tәmaliwәk muwīn iuәhkir ron, mafәl rәhan nimәgәm mīn e oel ne wain, kән malpin wir ilat. Kән tәmilәs-ipәр suah әh mahtu-pәр e rәhan togki, kән milәs mian әpәh e hotel matehm wir.

³⁵Kән kәmән lawigin, in tәmos mәni neen muwīn mos-ipән kәм etәм-iasol rәha hotel, kән mән-ipән kәм in mәмә, ‘Onakatehm wir suah u, kән okәмә nәkәtuatin rәham neen mәni, kән onakән-ipa kәм io nian ekitәliḡ-pa mīn, pәs io ekos-ipinә nitain.’”

³⁶Kән nian Iesu tinol namnun nәghatән u, kән tәмәtapәh o ienatiḡ e Lou mәмә, “?E rәham nәtәliḡән, suah milәhal әh, nәkitun mәмә ilәhal pah tәmol tәwir kәм suah әh kәmoh, tahmen mәмә in in kit?”

³⁷Kən ienatig e Lou təmən-ipən məmə, “Etəmim itəm in təmasəkitun suah əh.” Kən Iesu tən-ipən kəm in məmə, “Ita. Ik uwın mol mın tahmen-pən əm məmə inu suah əh təmöl mihin ne.”

Iesu təmuwin latuənu rəha Mata ne Meri

³⁸Nian Iesu ne rəhan mın netəmim kotaliwək e suatip, kən kəmotiet-arəpən latuənu kit. Kən pətan kit, nərgin u Mata, təmos Iesu e nikin agien muwin əpəh e rəhan nimə.

³⁹Pətan əh, pian kit əh-ikin, nərgin u Meri. Kən Meri təmuwa matəpələh iuəhkir o nelki İərəməərə matətəlig-in nəgətunən mın rəhan.

⁴⁰Məto Mata, rəhan nətəligən tatuwin pik o nolən nagwənən, kən wək tınatoh in. Kən təmuwin o Iesu mən-ipən kəm in məmə, “?İərəməərə, tahro? ?Nikim təht məmə tətuatip əm, o kəp, məmə pətan u piak təsəsituən lak ne o nolən wək u, kən io pisin əm iatol? Ahl-ipa məmə otuwa masitu lak.”

⁴¹Məto İərəməərə təmən-ipən kəm in məmə, “Ei, Mata. Əsətəlig-in pikən natimnat mın tepət nəhlan.

⁴²Məto nat kitiəh əm in nat keike, kən Meri in tinitəpun rəkis nat u itəm in təwir taprəkis, kən okol io esiləs-irəkisən nat əh ron.”

Luk 11

Iesu təmatəgətun rəhan netəmim e suatip rəha nəghatən kəm Uhgın e nəfakən

(Mat 6:9-15; 7:7-11)

¹Nian kit, Iesu təmatəghat kəm Uhgın e nəfakən əpəh ikin kit. Kən nian təmöl namnun rəhan nəfakən kəm Uhgın, kən rəhan kit etəmim təmətapəh ron məmə, “İərəməərə, əgətun-tu itimat e suatip rəha nəghatən kəm Uhgın e nəfakən, tahmen-pən e Jon Baptais in təməgətun mihin rəhan mın.”

²Kən Iesu təmən-ipən kəm ilat məmə, “Nian nakotəghat kəm Uhgın e nəfakən, onəkotən məmə, “Tata Uhgın, nərgəm in ilis agin, pəs netəmim okotisiai-in. Pəs rəham nərəmərəən tuwa matig.

³Nian rafin, os-ipa nagwənən kəm itimat tahmen-in rəha nian roiu.

⁴Kən afəl rəkis rəhatimat nolən rat mīn mətō-inu itimat esotaskəlīm-iəkisən e nikitimat nolən rat mīn rəha netəmim itəm koatol kəm itimat. Kən segəhan-inən itimat ekotuwīn ima nos-ipən-os-ipənən, ikin itəm mətā oekotakiə motol təfagə rat.”

⁵⁻⁶Kən təmən-ipən kəm ilat məmə, “?Okəmə suah kit tuwa imam ikin lapīn, kən rəham nagwənən tikə, kən onəkol naka? Onəkuwīn e nimə rəha ik kit, kən mən-ipən məmə, ‘Io kit, os-ipa nagwənən məsīn, kən ekos muwīn magwən suah kit lan itəm təmisi-pən isəu muwa imak ikin roiu lapīn, kən rəhak nagwənən tikə məmə ekagwən in lan.’

⁷Kən in otuhalpīn-pīnə kəm ik məmə, ‘!Aaah! Atuwīn, səhgaiirən etimat, enotapīl rəkis itimat rəhak nisualkələh. Okol esətul mīnən mos-ipīnə nagwənən kəm ik.’

⁸Ekən kəm itəmat məmə, nat ənnapīn ik in kit, mətō suah un təsolkēikeən məmə in otos-ipīnə nagwənən kəm ik. Mətō iatən nīpahrienən, nian nakatəkēike matətəpəh ron, kən in otətul mos-ipīnə natimnat rafin kəm ik itəm nakolkēike.

⁹“Kən tol nəhlan ekən kəm itəmat məmə, otətəpəh-in kəm Uhgīn o natimnat, kən in otos-ipīnə kəm itəmat. Kən otegəs-in, kən nakotehm. Kən otəht-əht toa, kən toa oterəh otəmat.

¹⁰Ekən nəhlan mətō-inu netəmim rafin itəm koatətəpəh-in, kən okoatos. Kən netəm mīn u itəm koategəs-in, kən okoatehm. Kən netəmim itəm koatəht-əht toa, kən toa oterəh olat.

¹¹“Itəmat tata mīn. ?Itəmat kit, nian nətīn tatətəpəh-in nəm, mətō in tatos-ipən sinek? !Kəp!

¹²?O nian in tatətəpəh-in noanahli-məniḡ, mətō in tatos-ipən skopion? !Kəp!

¹³Nat ənnapīn itəmat netəm nakotərat, mətō nakoatos-ipən natimnat wir mīn kəm nenətītəmat mīn. Mətō Tata Uhgīn əpəh e nego e neai, nolən rəhan in təwir pik maprəkis-in nolən rəhatəmat, kən nīpahrienən, in otos-ipən Narmin Rəhan kəm netəm mīn u itəm koatətəpəh-in ron.”

Netəmim neen kəmoatən məmə Iesu tatol wək e nəsanənən rəha Setan

(Mat 12:22-30,43-45; Mak 3:20-27)

14Kən e nian kit, suah kit əh-ikin itəm narmin rat tətətig lan, kən tol məmə in təruru nəghatən. Kən Iesu təməhg-iarəp narmin rat əh, kən suah əh təmətuoun matəghat, kən netəmim narmilat təmiwig pīk ron.

15Məto netəmim min əh neen koatən məmə, “Pielsepul u in etəm-iasol rəha narmin rat min, in əm əh təmos-ipən nəsanənən kəm suah u məmə in otəhg-iarəp narmin rat min e netəmim.”

16Kən netəm pisin neen min kəmotətapəh o Iesu məmə in otol-tu nat pispis kit e nəsanənən itəm tətisi-pən e nego e neai məto-inu, ilat kotolkeike məmə okotitun-tu məmə Iesu in etəmim pah.

17Məto Iesu tinitun rəkis nətəligən min rəhalat, kən təmən məmə, “Okəmə netəmim e kantri kit koator ilat min, kən okotərəkin rəhalat kantri, kən nərəməərəən otisas mikə. Kən tahmen-pən əm, e latuənu kit, okəmə netəmim lan koator ilat min, kən okotərəkin agin-əh latuənu u.

18?Kən okəmə netəmim rəha Setan koator ilat min, kən otahro nulan rəhan nərəməərəən otətətig? Iatən min-nulan məto-inu nakoatən məmə iatəhg-iarəp narmin rat min e nəsanənən rəha Pielsepul.

19?Kən okəmə io, iatəhg-iarəp narmin rat min e nəsanənən rəha Pielsepul, kən tahro e rəhatəmat min netəmim, ilat koatəhg-iarəp narmin rat min e nəsanənən rəha pah? Tol nəhlan, ilat okotakil rəhatəmat min nəghatən məmə in neiueiuəən.

20Məto okəmə io iatəhg-iarəp narmin rat min e netəmim e nəsanənən rəha Uhgīn, kən tatəgətun məmə nərəməərəən rəha Uhgīn tinuwa rəkis otəmat.

21“Nian etəm rəhan nəsanənən tepət tatəmīk natimnat rəha nəluaginən, tatətul matip matehm wir rəhan nimə, inəh rəhan natimnat okotətig wir əm.

22Məto nian etəm pisin kit min itəm rəhan nəsanənən taprəkis-in in, otuwa muəmou mətian mətian tol win lan, in tatos-irəkis rafin rəhan natimnat rəha

nəluaginən itəm təmələhəu-pən rəhan nətəligən lan, kən in otoor natimnat rafin rəha suah əh kəm rəhan min netəmim.

²³“Etəm u itəm təsuarisig-inən io, in rəhak tikimir. Kən etəmim u itəm təsargətəinən sipsip min, in tatol ilat kotagim atit.”

²⁴Kən Iesu təmən məmə, “Nian narmin rat tatiet e suah kit, kən in tətən əpəh ikin kikə-kikə ikin nəhau tikə lan mategəs-in ikin otameg ikin, məto təsəplanən. Kən in tatən məmə, ‘Pəs ekitəlig-pən e rəhak nimə itəm emisi-pən ikin aupən.’

²⁵Kən nian in tatitəlig-pa, mehm rəhan nimə kəmafəl təpiə wir, kən natimnat rafin koatis wir.

²⁶Kən in otuwın mit min narmin rat sepin min motuwa itəm kotərat kotaprəkis-in in. Kən okotuwın min imə motatig e nəmegəhən rəha suah u. Kən suah u, aupən rəhan nəmegəhən tərat, məto roiu tinərat pik agin-əh.”

²⁷Nian Iesu tatən nəghatən əh, pətagwəhl kit tagət əfəməh məmə, “Pəs Uhgın otawte-in rəhan nəwirən kəm pətan itəm təmemək-in ik, kən mətapinahin ik.”

²⁸Kən Iesu təmə, “Nipahrienən, məto Uhgın otawte-in rəhan nəwirən taprəkis kəm netəmim itəm koatəto nəghatən rəhan, kən moatol.”

Nəmtətin rəha Jona

(Mat 12:38-42; Mak 8:12)

²⁹Kən nian netəmim kəmotuwa məmə okotəto nəghatən rəha Iesu, kəmotuwa tərət məsin min, kən Iesu təmə, “Itəmat netəm roiu ne, itəmat nol təfagə rat agin. Itəmat nakotolkeike məmə nakotehm nat pispis u nəmtətin kit. Məto okol Uhgın təsos-ipinəən nəmtətin kit kəm itəmat. Məto Uhgın otos-ipinə nəmtətin kitəh əm kəm itəmat, inəh nəmtətin rəha Jona.

³⁰Tahmen əm e Jona itəm təmuwa nəmtətin kit tatuwin o netəmim rəha taon u Nineva aupən, e nolən kitəh min əm, io Nəti Etəmim ekuwa nəmtətin rəha netəmim u-roiu ne.

³¹Kən e nian əh itəm Uhgın otakil netəmim rafın, kən kwin rəha nəptən pis ikin, in otətul mən-iarəp məmə itəmat netəm nakotərat. Otıtun nənən nəhlan məto-inu, in təmıet e nıkalın nəptən əpəh isəu agın, kən malıwək muwa məmə otəto nəghatən rəha Kig Solomon itəm tenatıg wır. Kən otəplan-tu, suah kit itəm ilis taprəkis-in Kig Solomon tınuwa.

³²Kən netəmim rəha Nineva okotətul e nian Uhgın otakil netəmim rafın lan, kən ilat okotən məmə itəmat nəmotol nolən tərat. Kən ilat kotıtun nənən nəhlan məto-inu, nian ilat kəmotəto nəghatən rəha Jona, ilat kəmotəuhlin ilat e nolən rat mın rəhalat. Kən roıu, suah kit ikin-u itəm in ilis taprəkis-in Jona.”

Nəhag-əhagən rəha lait

(Mat 5:15; 6:22-23)

³³Kən İesu təmən məmə, “Suah kit tıkə itəm tətasiəpən e lait, kən uarisıg in tatəhluaıg-in, o tətaii-pən e nıpəg kitəh. Kəp. Məto nian etəmim tətasiəpən e lait, otəkəıke mətu-pər e nıg rəha lait məmə netəmim itəm okotuwa e nıpəg noa nımə, kən moatehm nəhag-əhagən rəha lait o nəplanən natımnat.

³⁴Nıganəmtım in tahmen e lait itəm tatos-ıpən nəhag-əhagən kəm nıpətım. E nian nıganəmtım mil kuəwır, tahmen əm məmə nıpətım tərıoah e nəhag-əhagən. Məto nian nıganəmtım mil kuərat, tahmen əm məmə nıpətım tərıoah e napınəpən.

³⁵Kən tol nulan, ik onakəkəıke matehm wır məmə nəhag-əhagən e rəham nəmegəhən, in sənəmə napınəpən.

³⁶Kən okəmə rəham nəmegəhən in tərıoah wır e nəhag-əhagən, napınəpən in otıkə agın lam, kən nəhag-əhagən in tətasiəgəpın wır rafın rəham nəmegəhən, tahmen-pən əm e nəhag-əhagən rəha lait tətasiəgəpın ik.”

İesu təməghat əskasık kəm Farısı mın ne iəgətun mın rəha Lou

(Mat 23:1-36; Mak 12:38-40; Luk 20:45-47)

³⁷Kən nian İesu təməghat rəkis, kən Farısı kit təmuwa mən-ıpən kəm in məmə okıan muagwən e rəhan nımə. Kən İesu təmalıwək muwın əpəh imə matəpələh e nıkali tepıl o nagwənən.

³⁸Kən Farisi apon tēmaut ron narmin tēmiwig nian tēmēplan mēmē Iesu tēsaikuasēn pitēn e nelmin uarisig tēpanagwēn.

³⁹Kən Iērēmērē tēmēn kēm in mēmē, “Itēmat Farisi min, nēkotahmen əm e kap ne plet itēm nakotaikuas elat əpəh ihluə əm, mēto əpəh e nīpəgnoalat, kotapin. Itēmat nakotērioah e naumisēn ne nēratēn.

⁴⁰!Itēmat nakotalmēl pik! ?Nikitēmat tatəht o kēp mēmē, Uhgīn itēm tēmōl nīpētītēm, in tēmōl min nikitēm? !Əwəh!

⁴¹Mēto otos-ipēn kēm ian-rat min e nikitēmat agien, kən natimnat rafin ihluə ne imē kotētuatip motəwir.

⁴²“!Mēto itēmat Farisi min, nahmēən asol otuwa otēmat! Itēmat nakotētəpən wīr nīmismisi Lou min, tahmen e tait rəha nīmali nig min itēm nēmīəwīlat tatēpien o nolēn nagwēnēn. Mēto nakotəuhlin mēntaatēmat o nat asol min rəha Lou, inəh nəsotolēn nat itēm tētuatip min kēm netēmim, kən mēsotolkeikeēn Uhgīn. Nēkotəkəike motol nolēn wīr min asol əh, kən mēsotaluinēn nētəu-pēn wīr minēn nīmismisi Lou min rafin.

⁴³“Itēmat Farisi min, nahmēən asol otuwa otēmat, mēto-inu nakotolkeike mēmē onēkotuwīn motəpələh aupēn e nīmē rəha nuəfiminēn. Kən e maket, nakotolkeike mēmē netēmim okotiləs-ipər nelmīlat kēm itēmat o nisīaiiēn itēmat.

⁴⁴“Itēmat Farisi min, nahmēən asol otuwa otēmat, mēto-inu itēmat nēkotahmen e suwit itēm kotamkimik, mēto kəsītun ətuatipēn mēmē in hiə, kən netēmim kotaliwək pikēn lan motəruru, motol rəhalat nēmegəhēn tētamkimik.”

⁴⁵Kən iəgətun kit rəha Lou tēmēn-ipēn kēm Iesu mēmē, “Iəgətun. Nian nakatēn nəghatēn min u, kən tatərəkīn min itimat.”

⁴⁶Kən Iesu tēmē, “!Iəgətun min rəha Lou! Nahmēən asol otuwa otēmat mēto-inu, itēmat nakoatəlīn-pər nat figēm min itēm tiəkis mēmē netēmim okoatēmik. Mēto nəsotasituēn mēsīn e noanelmitēmat mēmē onēkotasitu elat o nēmikēn natimnat min əh.

⁴⁷“Nahmææn asol otuwa otæmat mæto-inu æpæh e suwit min ræha ien min ræha Uhgîn aupæn, nakoatilækin nimæ wir min, kæn nakoatæn mæmæ nakoatisiai-in ilat. Mæto nakoteiuæ. Tîpîtæmat min æm kæmotohamnu ilat.

⁴⁸Inæh itæmat nakoatæn-iaræp mæmæ nakotegæhan-in natimnat min æh itæm tîpîtæmat min kæmoatol aupæn, inæh kæmotohamnu ien min, kæn itæmat nækoatol namnun e ræhalat wæk nian nakoatilækin suwit min ræhalat.

⁴⁹“Kæn o nat æh, Uhgîn itæm tenatig tæmæn mæmæ, ‘Io ekahl-ipæn ræhak ien min ne aposol min kotuwîn motæghat kæm ilat, kæn ilat okotitæp motol næratæn kæm neen, kæn motohamnu neen.’

⁵⁰Tol næhlan, Uhgîn otakil itæmat tahmen mæmæ itæmat æm næmotohamnu ien min rafin ræhan, kæn in otol nalpînæn kæm itæmat o nimisæn ræhalat, ilat itæm kæmotatig e nætuounæn ræha nætueintæn mætoarus-pa u-roiu,

⁵¹ien min rafin itæm kæmotohamnu tætuoun e Epel mætoarus-pæn Sekaræea, itæm tæmimis e Nimæ Ræha Uhgîn ilugin e olta ne nimæ.Nîpahrienæn, itæmat roiu ne, Uhgîn otol nalpînæn kæm itæmat.

⁵²“Itæmat iægætun ræha Lou, nahmææn asol otuwa otæmat mæto-inu suatîp kit æh-ikin itæm tatægætun nat naka itæm Uhgîn tolkeike. Itæmat nækotitun suatîp æh, mæto nakotæhluaig-in mæmæ netæmim kotæruru. Itæmat nækæsoatætu-pænæn, kæn nakahtosig-in netæmim mæmæ ilat min kotæruru nætæu-pænæn.”

⁵³Nian Iesu tæmiet e nimæ æh minataliwæk matuwîn, kæn iægætun min ræha Lou ne Farisi min, nemæha tæmol ilat. Tætuoun e nian æh, kæmotuwa ræhan tikimîr min. Koatærakin-pæn næghatæn æskasik tepæt kæm in

⁵⁴mæmæ okoteam-in nîpægnæmtîn neen e næghatæn ræhan itæm tæsahmenæn.

Luk 12

Næghatæn min ræha nem æskasikæn

(Mat 10:19-20,26-33; 12:32)

¹Kæn e nian æh, netæmim tepæt kæmotuwa kitæh, okol kafin kæruru. Mæto netæmim tinepæt pik, kæn moatæhg-irækis-æhg-irækis ilat min. Kæn Iesu tæmætuoun matæghat kæm ræhan min netæmim mæmæ, “Itæmat, nakoatæto

itəmat o is rəha Farisi min, is u in nolən rəhalat itəm rəhalat nənən təwir, məto nīkilat tamkimik.

²Natimnat itəm etəmim tatol anion, Uhgīn təpaniləs-iarəpa tagəhag ikin. Kən natimnat itəm etəmim tatəhluaig-in, kən Uhgīn təpaniləs-iarəpa, netəmim okotəplan.

³Natimnat itəm nakoatən e napinəpən, kən netəmim okotəto e nərəuiəgən. Kən natimnat itəm nakoatən anion e nīpəgnoa nimə, kən netəmim kəpanotən-iarəp ihluə, netəmim rafin okotəto.

⁴“Rəhak min netəmim, ekən kəm itəmat məmə, əsotəginən netəmim itəm kotitun nohamnuən nīpətītəmat, məto uarisig, okol kəsotol minən nat kit tərət kəm itəmat.

⁵Məto iatən-iarəp etəmim u kəm itəmat itəm tətuatip məmə onakoatəgin. Onəkotəkəike motəgin Uhgīn, məto-inu nian in otohamnu suah kit, in titun nərakin-pənən in e nīgəm asol. Əwəh, nīpahrienən, ekən kəm itəmat məmə nakoatəkəike motəgin Uhgīn.

⁶Mənig əlkələh min, katol-salim-in ilat tepət nəmtin məni əkəku əm, məto Uhgīn təsaluin agin-əhən kit.

⁷Əsotəginən, məto-inu Uhgīn tolkeike itəmat taprəkis-in mənig min tepət. Nīpahrienən, Uhgīn təmafin mitun wir noanutəmat rafin.

⁸“Ekən kəm itəmat məmə, okəmə etəmim tatən-iarəp e nīganəmti netəmim məmə in rəhak kit, kən io Nəti Etəmim, io min ekən-iarəp e nīganəmti nagelo min rəha Uhgīn məmə in rəhak etəmim.

⁹Məto okəmə etəmim tatən-iarəp e nīganəmti netəmim məmə in sənəmə etəmim kit rəhak, kən io ekən-iarəp e nīganəmti nagelo min rəha Uhgīn məmə suah u in sənəmə etəmim kit rəhak.

¹⁰Kən etəmim itəm tatən nəghatən rat e Nəti Etəmim, Uhgīn otafəl rəkis rəhan təfagə rat. Məto etəmim itəm tatəghat rat e Narmin Rəha Uhgīn, okol Uhgīn təsafəl rəkisən rəhan təfagə tərət.

¹¹“Kæn nian koatiuw-iarəp itəmat e nimə rəha nuəfiminən, ne e niganəmti iərəmərə min, ne netəm-iasol min məmə okotiuw-iarəp itəmat motakil motuəh motələhəu nəghatən rəhatəmat, kæn nikitəmat təsəht pīkən məmə onəkotahro min-nulan kuhalpīn rəhalat nəghatən,

¹²məto-inu e nian ətuatip əh, Narmin Rəha Uhgīn otəgətun itəmat e nəghatən naka itəm itəmat onakoatəghat-in kæn moatən kəm ilat.”

Nimaa nəghatən e etəmim rəhan nautə tepət rəhn-kapə tikə

¹³Kæn netəm min əh kit təmən-ipən kəm Iesu məmə, “Iəgətun. Tata rəhak tinimis rəkis. Awi, uəh niki piak məmə otoor natimnat rəha tata rəhatimlau məmə otos-ipa rəhak neen, itəm tata təmələhəu məmə rəhak.”

¹⁴Məto Iesu təmən kəm in məmə, “Rəhak etəmim, rəhak tikə e nətəligən u rəhatəmlau o noorən rəhatəmlau natimnat.”

¹⁵Kæn Iesu təmən-ipən kəm ilat məmə, “Oatəto wir itəmat. Otahtosig-in wir itəmat məmə onəkəsotuwamən itəmat iaumis min, məto-inu nəukəti nəmegəhən, in sənəmə nautə tepət.”

¹⁶Kæn təmuəh nimaa nəghatən u məmə, “Suah kit, rəhan nautə tepət, kæn rəhan nasumən tatol nīpətīn tepət.

¹⁷Kæn təmən-ipən atip kəm in məmə, ‘?Oekahrol min-nulan, məto-inu rəhak nimə min kinəsotahmenən məmə ekəlīn-pən nigak nagwənən min lan?’

¹⁸“Kæn in təmən məmə, “Təwir məmə ekol nulan. Ekəmki-rəkis nimə min u, kæn ekiləkin nimə neen min itəm iahgīn məsin. Kæn ekəlīn-pən nigak nagwənən, ne rəhak nautə min ikin.

¹⁹Kæn ekitun nənən məmə, rəhak natimnat tepət tepət tahmen o nup tepət. Kæn roiu ekameg, mətəgwən, matənim, kæn matəto nagienən təwir əm nulan matuwīn.’

²⁰“Məto Uhgīn təmən-ipən kəm in məmə, ‘!Ik ialmə! Rōiu əm lapīn, onakimis. ?Okahrol rəham natimnat u tatəməhl nəmargətāin?’”

²¹Kən Iesu təmən məmә, “Uhgın otol әm nәhlan kәм netәmim itәм kotargәtain nautә tepәt mәмә in rәhalat, mәto nikin tәsәht pikән nolән wir min itәм Uhgın tolkeike.”

Әsotәtәlig pikән natimnat rәha nipәtitәм

(Mat 6:19-21,25-34)

²²Kən Iesu tәмән kәм rәhan netәmim min mәмә, “Mәto-inu o nolән әh, iatән kәм itәmat mәмә, nәsotәtәlig-in pikән natimnat rәha nәmegәhән rәhatәmat mәмә onәkotun naka, kән mәsotәtәlig-in pikән natimnat rәha nipәtitәmat mәмә onәkotuwın-in natimnat naka.

²³Әsotәtәlig-in pikән mәto-inu nәmegәhән rәhatәmat taprәkis-in nagwәнән, kән nipәtitәmat taprәkis-in napән min rәha nuwın-inән.

²⁴Otәplan-tu mәnig min, ilat kәsotasumән, kән mәsotәulәkән, kән rәhalat nimә rәha nagwәнән tikә, mәto Uhgın tәtagwән ilat. !Mәto Uhgın tolkeike pik itәmat taprәkis-in mәnig min!

²⁵?Nikitәmat tәht mәмә rәhatәmat nәtәligән pik titun nolән rәhatәmat nәmegәhән tәfәмәh? !Kәp! Nolән rәha nәtәligән pik tәsafin-pәнән aua kitih әm e rәhatәmat nәmegәhән.

²⁶?Mәto okәмә itәmat nәsotitunән nolән nat әkәku kit tol nәhlan, tahro nakoatәtәlig-in pik natimnat pisin pisin min e nәmegәhән rәhatәmat?

²⁷“Nikitәmat tәht-tu nolән rәha nәgui-nig min itәм koatәguin. Ilat kәsotol wәkән, mәsotәhlән rәhalat napән. Mәto ekән kәм itәmat mәмә aupән, Kig Solomon rәhan nautә tepәt, kән rәhan napән tәwir pik, mәto rәhan napән min kәsotәwirән taprәkis-in nәgui-nig min.

²⁸Nәgui-nig min әh koatәtul rәha nian kitih әm, kән olawigin, netәmim kotaan ilat e nigәм, mәto Uhgın in tatol ilat kotәwir kotәwir. ?Kән nikitәmat tәht mәмә in otos-ipinә napән kәм itәmat, o kәp? !Әwәh! Rәhak netәmim, rәhatәmat nahatәtәән in natiәkәku әm.

²⁹“Tәsәwirән mәмә nikitәmat tatәht pik natimnat o nәmegәhән rәhatәmat, kән nian rafin nakotegәs-in nagwәнән nigitәmat ne nәnimән nimitәmat.

³⁰Nikitəmat təsəht pikən natimnat min əh, məto-inu netəm kəsotahatətəən e Uhgın, ilat koategəs-in natimnat min əh. Rəhatəmat Tata in titun natimnat itəm nəkotəkəike motos o nəmegəhən rəhatəmat.

³¹Məto nakotətəlig-in pik natimnat rəha nərəməərəən rəha Uhgın motol tətul aypən e nəmegəhən rəhatəmat, kən in otos-ipinə min kəm itəmat natimnat min rəha nəmegəhən ikin-u e nətueintən.

³²“Əsotəginən, itəmat sipsip min u rəhak itəm itəmat noan məsin əm, məto-inu Tata rəhatəmat nikin tagien pik məmə onəkotatig ahgin rəhan nərəməərəən, kən in otehm wir itəmat, kən itəmat min onəkotərəməərə itəmat min.

³³Otosalim-in rəhatəmat natimnat min, kən motos-ipən məni lan kəm ian-rat min. Nian nəkotol təwir min-nulan, in tahmen-pən məmə nəkotol rəhatəmat pokis rəha məni itəm otəsəratən nian kit, kən nakotələhəu-pən rəhatəmat natimnat itəm təwir əpəh e nego e neai. Kən ikin əh, okol iakləh min kəsotuwınən iuəhkir motakləh-in, kən okol wın min kəsotərəkinən natimnat min əh.

³⁴Iatən nəhlan məto-inu, ikin pəhrəən rəhatəmat natimnat wir min koatəməhl ikin, kən nikitəmat otəkəike matəht natimnat min əh-ikin əh.”

Netənim rəha Iesu kotəkəike moatətul matip o rəhan nuwamən

³⁵Kən Iesu təməən məmə, “Pəs nəkoatətul matip nian rafın, tahmen-pən əm məmə nakoatuwin-in napən min rəha wək, kən moatehm wir məmə rəhatəmat lait otatuəp e nian rafın.

³⁶Onəkotəkəike motahmen-pən e iolwək min rəha iərəməərə kit itəm tətisi-pən e lafet kit rəha marit. Kən nian in tatuwa matəht-əht toa, kən roiu əm, ilat koaterəh e toa məmə otuwa imə.

³⁷Iolwək min itəm koatair moatətul matip nian iərəməərə tatuwa, ilat okotehm motos nəwırən rəha iərəməərə. Nipahrienən ekən kəm itəmat məmə, in otuwın-in napən rəha wək, kən maun-in ilat məmə okotuwa kəpələh, kən in otehm wir ilat mətəgwən ilat.

³⁸Kən okəmә iәрәmәrә tatuwa lapin e napinәpән tinәlis kinkin lan, e nian mәnig min kinotәtuoun kinoatimnән lan, mәto iolwәk min ilat koatәtul matip әm, kән in otol tәwir agin kәм ilat.

³⁹Kən itәmat nәkotәkәike motitun mәмә, okәмә suah kit titun nian әtuatip itәм iaklәh otuwa e rәhan nimә mәмә otaklәh, kән in okol tәsapilән, in tatәtul matip matehm wir rәhan nimә mәмә iaklәh otәsuwamән imә.

⁴⁰Kən itәmat, nian rafin nәkotәkәike moatәtul matip mәto-inu io Nәti Etәmim ekuwa min e nian itәм itәmat nakәsotitunән.”

⁴¹Kən Pita tәmән-ipән kәм in mәмә, “Iәрәmәrә. ?Nakatuәh nimaa nәghatән rәhatimat әm, o rәha netәmim rafin?”

⁴²Kən Iәрәmәrә tatән mәмә, “?Pah u in iolwәk itәм tenatig kән tatol rәhan wәk e nian min rafin e nolән itәм tәwir? ?Kән iәрәmәrә kit otilәs-ipәр pah in otuwa etәм-iasol rәha iolwәk min e nimә rәhan mәмә in otoor nagwәнән nigә iolwәk min rafin e nian әtuatip rәhan?”

⁴³Kən nian iәрәmәrә rәha suah әh tәtiet-arәpa, kән mәplan mәмә in tatol-wir rәhan wәk, kән in otol tәwir kәм iolwәk әh.

⁴⁴Nipahrienән iakatән kәм itәmat mәмә, iәрәmәrә in otilәs-ipәр iolwәk әh tuwa mol etәм-iasol lan mәмә in otәрәmәrә e natimnat rafin rәhan.

⁴⁵?Mәto tahro? Kәм-naka iolwәk un nikin otәht mәмә, ‘Rәhak etәм-iasol tәsuwamән nuwәh. Okotәsuwa uәhaiән.’ Kән iolwәk әh tinәtuoun matoh iolwәk min nipitan ne nәman, kән muwin mәtagwән matәnim mәtapis. ?Kән iәрәmәrә otol naka?”

⁴⁶Iәрәmәrә rәha suah un otiet-arәpa ron e nian kit itәм in tәmәsitunән kән mәsәtul matipән ron. Kән iәрәmәrә otos-ipән nalpinән asol kәм in, kән otilәs-ipән in tuwin matig ilat netәм min u itәм kәsotolән rәhan nәghatән.

⁴⁷“Iolwәk әh itәм tinitun rәkis nәghatән rәha iәрәmәrә rәhan, mәto in tәsәtul matipән mәмә otol wәk min әh, kән okoh in tәto nahmәән.

⁴⁸Məto iolwək itəm in təsitunən nəghatən min rəha iərəmərə, kən matol natimnat itəm təsətuatipən itəm otəkəike mos nalpinən ron, kən okoh mətīg əm iolwək u. Etəmim itəm Uhgin tatos-ipən natimnat tepət kəm in, in otəkəike mol natimnat tepət. Kən etəmim itəm katələhəu-pən natimnat tepət e nelmin, okatətapəh-in min natimnat tepət ron.”

Iesu tatol netəmim koatoor ilat min

⁴⁹Kən Iesu təmən məmə, “Emuwa məmə ekəhlman nigəm e nətueintən, kən okəmə roiu əh nigəm əh tinatuəp rəkis, kən nīkik otagien.

⁵⁰Nian əskasik kit itəm otuwa e rəhak nəmegəhən, tahmen e nolə baptais kit, kən nīkik tītahmə lan mətoarus-pən tinol namnun.

⁵¹?Nikitəmat təht məmə emuwa məmə ekələhəu nəməlinuən e nətueintən? !Kəp! Eməsuwamən məmə ekələhəu nəməlinuən, məto emuwa məmə ekol netəmim kotoor ilat min.

⁵²Kən tətuoun u-roiu, okəmə netəmim faif e latuənu kit, kən kotoor ilat min, kisil katəhaləhai kəiu, kən kəiu katuəhai kisil.

⁵³Tata in otəhai nətin iərman, kən nətin əh otəhai rəhan tata. Kən mama in otəhai nətin pətan, kən nətin əh otəhai rəhan mama. Kən pətan otəhai uhun, kən uhun otəhai nəgon.”

Netəmim okotəkəike motitun nəmtətin min

(Mat 16:1-4; Mak 8:11-13)

⁵⁴Kən in təməghat min kəm nimanin netəmim matən məmə, “Nian nakotehm nimal napuə min okotər, kən nakotən uəhai əm məmə otəfik, kən otol mihin.

⁵⁵Kən nian nəkotəplan məmə nuwig təmiləs kərpəp, nakotən məmə nape-apeən otuwa, kən otol mihin.

⁵⁶!Ei! !Rəhatəmat nənən təwīr, məto nikitəmat tamkimik! Itəmat nakoatəmə nəkotitun pik natimnat min, kən motitun nehmən nīməptən ne neai, kən nəkotitun məmə nian otuwa min-nulan, kən otol nəhlan. ?Məto tahro nakəsotitunən nīpəti nəmtətin min itəm nakoatəplan əh-roiu?

⁵⁷“?Tahro nakəsotitəpunən suatip itəm tətuatip məmə onəkotətəu-pən?

⁵⁸Nian suah kit otiləs ik nakuwin e kot, kən nian natualiwək e suatip, kən təwir məmə nakuaupən muəghat muən wir rəhatəmlau nəratən. Okəmə nəkəsioal mihinən, kən otiləs ik muwin e kot, kən etəm-iasol rəha kot otegəhan-in-pən ik e nelmi polis, kən polis otiləs ik muwin mahtosig-in ik e kalapus.

⁵⁹Iatən kəm ik məmə, okəmə tol nəhlan, okol nəsietən e kalapus mətoarus nakətou rafin agin nalpinən rəham.”

Luk 13

Netəmim okotəkəike motəuhlin ilat e rəhalat nolən rat min

¹Kən e nian əh, netəmim neen kəmotuwa kən-ipən kəm Iesu məmə netəm Kalili neen koatoh nat megəh min məmə okotol sakrifais lan kəm Uhgın, kən nian kitiəh min əm, mopael min rəha kapman u Pailat kəmotuwa motohamnu ilat, kən nitalat nat megəh min kəmotol əm kitiəh kətaiu.

²Kən Iesu təmən-ipən məmə, “?Tahro? ?Nikitəmat təht məmə nimisən əskasik tol min-nulan rəha netəm Kalili əh, tatəgətun məmə ilat netəm rat taprəkis-in netəmim rafin rəha Kalili?

³!Kəp! Iatən kəm itəmat məmə təsol mihinən nəhlan. Məto okəmə itəmat nakəsotəuhlinən itəmat e nolən rat min rəhatəmat, kən itəmat min onəkotimis.

⁴?Kən tahro e netəm eitın rəha Saeloam itəm nimə əfəməh təmiet məfətain ilat kotimis? ?Nikitəmat təht məmə natimnat min əh tatəgətun məmə nəmegəhən rəhalat tərət taprəkis-in netəmim rafin əpəh Jerusalem?

⁵!Kəp! Iatən kəm itəmat məmə təsol mihinən nəhlan. Məto okəmə itəmat nakəsotəuhlinən itəmat e nolən rat min rəhatəmat, kən itəmat min onəkotimis.”

⁶Kən təmuəh nimaa nəghatən u məmə, “Etəmim kit təməfe nig kit əpəh e rəhan nasumən, nərgin u fik. Kən nian nup min neen təmuwa minuwin rəkis, suah u təmuwin nian tepət mateam-in noa nig u, məto tikə, məto-inu təsəəən.

⁷Kən in təmən kəm suah u tatehm nasumən məmə, ‘Əplan-tu. Emuwa mateam-in noa fik u minos nup kisil, məto esehmən noa nig kit ne. Ahtihl rəkis. Təsəwirən məmə tatətulosig e nıməptən rəha nasumən.’

⁸Kən suah u tatehm nasumən tuhalpin rəhan nəghatən məmə, ‘Etəm-iasol, əpəs əm tos nup kitiəh min əm. Kən ekel nisip mitəlau e nəukətin, kən masitu lan məmki-pən nisip wir.

⁹Kən okəmə tətə e nup əh-ikin, kən təwir əm. Məto okəmə kəpə, ik nəkitun nəte rəkisən.”

Iesu təmöl-wir pətan kit e Sapat

¹⁰Kən e Sapat kit, Iesu tatəgətun netəmim əpəh imə e nımə kit rəha nuəfiminən.

¹¹Kən pətan kit əh-ikin itəm narmin rat tətətig lan e nup eitən, kən tatol məmə məntaan tatəfaiu e nian rafin, kən məsətul ətuatipən.

¹²Kən nian Iesu təmehm in, kən təmaun-in məmə otuwa ron, kən tatən kəm in məmə, “Pətan. Io iatikis rəkis rəham nımisən, kol təsaskəlīm minən ik.”

¹³Kən Iesu təmələhəu-pən nelmin lan, kən əmun roiu agin-əh min əm, təmətul ətuatip minəwir, kən minatənwiwi Uhgın.

¹⁴Məto etəm-iasol rəha nımə rəha nuəfiminən, nikin təmahmə məto-inu Iesu təmöl-wir pətan u e nian rəha Sapat. Kən in təmən-ipən kəm netəmim məmə, “Nian sikis rəhatəmat o nol wəkən. Nəkotitun nuwamən e nian min əh məmə in otol-wir itəmat lan, məto e nian rəha Sapat, okol nəsotuwamən lan.”

¹⁵Kən İərəməərə təmən-ipən kəm in məmə, “!Rəhatəmat nənən təwir, məto nikitəmat tamkimik! ?Pah u e nikitəmat e nian rəha Sapat, kən təsikisən rəhan pılik o togki itəm təməru ətain, masig muwin tətənəm nəhau? !Kəp! İtəmat rafin nəkoatol min-nəhlan.

¹⁶Məto pətan əh, in noanol kit rəha Epraham, itəm Setan təməlis o nup eitən. Tətuatip əm məmə io ekəike mikis kən mosmegəh in e nian rəha Sapat.”

¹⁷Kən nəghatən rəha Iesu təmol rəhan tikimir min kəmotaulis. Kən netənim rafin, nikilat tətəgien o wək wir agin min itəm Iesu tatol ilat.

Iesu təmuəh nimaa nəghatən kəiu e nərəmərən rəha Uhgīn

(Mat 13:31-33; Mak 4:30-32)

¹⁸Kən Iesu təmən məmə, “?Nərəmərən rəha Uhgīn in tahmen e naka? ?Kən io oekən nəghatən naka kən məgətun lan?”

¹⁹Nərəmərən rəha Uhgīn, in tahmen-pən e noa nəpikitəm natiəkəku, kən suah kit təmīləs məfe e rəhan nasumən. Kən nikutin tinəwiə minol iahgin, kən mənig ilis min kotuwa moatol-pən nimaalat e nelmin min.”

²⁰Kən təmən min məmə, “?Iatəgətun nərəmərən rəha Uhgīn məmə in tahmen-pən e naka?”

²¹In tahmen-pən e is noan məsin itəm pətan kit tətalkin e flaoa tepət itəm kəmol-pən e pesin asol, kən tətahl flaoa rafin tətasis matol iahgin.”

Toa əkəku

(Mat 7:13-14,21-23)

²²Kən nian Iesu təmaliwək matuwīn Jerusalem, kən matəgətun netənim e taon min ne latuənu min.

²³Kən suah kit təmətapəh ron məmə, “?Iərəmərə, netənim noan məsin əm itəm Uhgīn otosmegəh ilat?” Kən Iesu təmən-ipən kəm ilat məmə,

²⁴“Iatən kəm itəmat məmə onəkotəkəike motalkut pik məmə nakotuwīn-pən e toa itəm natiəkəku tatuwīn e nego e neai, mətə-inu netənim tepət itəm okotalkut məmə okotuwīn imə, mətə ko kəsotuwīnən.

²⁵Mətə o nian kit, iərəmərə rəha nimə əh in otətul mahtosig e rəhan toa. Kən itəmat itəm nəsotuwamən əh imə e toa itəm natiəkəku əh, onakoatətul ihluə moatəht-əht toa moatən məmə, ‘Awi, Iərəmərə. !Erəh e toa otimat!’ Mətə in otən məmə, ‘Ekəruru agin-əh itəmat.’

²⁶Kən itəmat nakotətuoun moatən məmə, ‘Iərəmərə, kitat kəmotagwən kələh, kən ik nəmatəgətun itimat əpəh e rəhatimat ikin.’

²⁷Məto in otən-ipinə məmə, ‘Io ekatən kəm itəmat məmə ekəruru agin-əh itəmat. Itəmat rafin netəm nakotərat agin. !Otuwin isəu ron io!’

²⁸“E nian əh itəmat onəkotehm Epraham, ne Aisak, ne Jekop, ne ien min aupən koatatig e nego e neai itəm Uhgın tatəramərə lan, məto itəmat onakoatətul ihluə kən okərakin-iarəp itəmat, kən onəkotasək, moatəgətain nəluitəmat, moatəto tərat.

²⁹Kən netəmim okotisi-par, kən motisi-pah, kən motisi-pəhap, kən motisi-pis, məmə okotuwın motəpələh motagwən e nego e neai itəm Uhgın tatəramərə lan.

³⁰Kən təwir məmə nəkotitun məmə, netəmim neen itəm koatuarisig əh-roiu, ilat okotuwa motətul aupən. Kən netəmim neen itəm koatətul aupən əh-roiu, ilat okəpanotuwa motətul uarisig.”

Herot təmolkeike məmə in otohamnu Iesu

(Mat 23:37-39)

³¹Kən e nian əh, Farisi min neen kəmotuwa motən-ipən kəm Iesu məmə, “Təwir məmə nakiet uəhai əm u ikin-u matuwın, məto-inu Herot Antipas tolkeike məmə otohamnu ik.”

³²Kən Iesu təmən-ipən kəm ilat məmə, “Herot Antipas in iol keko-eko, tahmen e kuri iarupın itəm tətəgwən mitə. Otuwın motən-ipən kəm in məmə io ekatən məmə, ‘Ehm-tu. Nian əkuəkır əm əh-ikin tətətig itəm io ekəhg-iarəp narmin rat min e netəmim, kən matol-wır nımisən rəha netəmim, kən uarisig e nian ksil lan, kən ekol namnun rəhak wək.’

³³“Nat əpnapın Herot təmən nəhlan, məto io ekəike matətəu-pən rəhak suatip matuwın u-roiu, ne olawig, ne oniəh muwın miet-pən Jerusalem. Inu ikin ətuatip itəm okotəkəike kisiain ien min ikin. Məto Jerusalem əm, katohamnu ien min rəha Uhgın ikin.

³⁴“!Awe, netəm Jerusalem, netəm Jerusalem! Itəmat nakotohamnu ien min rəha Uhgın, kən netəmim itəm Uhgın təmahl-ipa kəm itəmat, nəkotahtimnu ilat e kəpiel apın, inəh netəm u rəha Uhgın itəm koatos nəghatən rəhan. Nian tərət iatəg-əfəməh-in nelmək məmə iatəmik-əfimin wir itəmat matos wir

itəmat, tahmen-pən e mənig itəm tatu nenətin min e nikwin, məto itəmat nikitəmat təsagienən ron kən motapəs io.

³⁵Kən nəkotitun məmə Uhgın təmapəs itəmat, kən iakatən kəm itəmat məmə okol nəkəsotehmən io matuwın matuwın mətoarus nakotən məmə, ‘!Iərəmərə Uhgın tətatig ilau suah u itəm tatuwa e nərgin!’”

Luk 14

Iesu təmuwin əpəh rəha Farisi kit ikin

¹E nian rəha Sapat kit, Iesu təmuwin e nimə rəha etəm-iasol kit rəha Farisi min məmə okotagwən, kən netəmim koatisilu wir məmə okotehm-tu naka əh otol.

²Kən inəh Iesu tatəpələh ikin, suah kit tatimis e nimisən rəha kasis-asis, tatəpələh iuəhkir əm ron.

³Kən Iesu təmətapəh o iəgətun min rəha Lou ne Farisi min məmə, “?Tahro? ?Lou tategəhan-in məmə suah kit otol-wir netəm koatimis kotəmegəh min e nian rəha Sapat, o kəp?”

⁴Məto ilat kəsotənən nat kit ne. Kən Iesu təmos suah un, mol nipətin təwir min, kən mahl-ipən tatuwin.

⁵Kən təmən-ipən kəm ilat məmə, “?Okəmə itəmat kit, rəhan suakəku, o rəhan kau otiwig-pən pikən e noakimil asol e nian rəha Sapat, kən in otol naka? In otəkəike muwin miləs-irəkis uəhai əm. ?Pah u etəmat otəsol mihinən?”

⁶Kən nəghatən rəhalat təmikə məmə okotən.

⁷Kən Iesu təmehm netəmim neen itəm kəmaun-in ilat o nagwənən, kən kəmotuwa imə motitəpun ikin min rəha nisiaiien məmə okotəpələh aypən ikin. Kən təmən-ipən kəm ilat məmə,

⁸“Okəmə etəmim tətəun-in ik məmə onəkuwa o nagwənən kit rəha marit, kən nəsuwinən məpələh ikin rəha nisiaiien. Məta suah kit in ilis katisiai-in pik tuwa,

⁹kən etəm-iasol rəha nimə otən kəm ik məmə, ‘Agim. Pəs suah u in təpələh u ikin-un.’ Kən onakaulis mətə-inu nakəkəike muwin məpələh ləhau agin itəm nisaiiən tikə ikin.

¹⁰Mətə okəmə suah kit tətəun-in ik məmə nakuwin magwən e lafet kit, kən təwir məmə nakitəpun ikin nisaiiən tikə ikin. Kən tol nəhlan, nian etəm-iasol rəha nimə tatuwa, in otən kəm ik məmə, ‘Rəhak etəmim, uwin məpələh ilis, ikin rəha nisaiiən.’ Kən inu otələs-ipər nərgəm e niganəmti netəmim rafin əh imə.

¹¹Ekən nəhlan mətə-inu etəm tatələs-ipər atip in məmə in otuwa etəm-iasol, Uhgın otələs-iəhau in. Mətə etəmim itəm tatələs-iəhau atip in, Uhgın otələs-ipər mol tuwa etəm-iasol.”

¹²Kən Iesu təmən-ipən kəm etəm-iasol rəha nimə məmə, “Okəmə natol nagwənən asol kit e nərauiəgən o lapin, təsəwirən məmə nakaun-in ik min neen, ne piam min, ne rəham noanol min, ne netəm rəhalat nautə tepət itəm kotatig kitəlau lam. Okəmə natol mihin, kən mətə, ilat min okotaun-in ik məmə nakuwin motagwən itəmat min, kən ilat okotalpın nat nəmol kəm ilat.

¹³Mətə nian natol lafet kit, kən onakəkəike maun-in ian-rat min, ne netəm nipətilat məsin tərət, ne ielkin rat min, ne netəm niganəmtilat təpis, məmə okotuwa nakotagwən.

¹⁴Kən Uhgın otawte-in rəhan nəwirən kəm ik, mətə-inu okol ilat kəsotalpın agin-əhən nat nəmol kəm ilat. Mətə e namnun nian, nian netəm kotətəuatip okoatəmegəh min, kən Uhgın otətou ik lan.”

Nimaa nəghatən rəha nagwənən asol

(Mat 22:1-10)

¹⁵Kən ilat kit əh-ikin itəm tətəgwən təmətə nəghatən əh, kən təmən-ipən kəm Iesu məmə, “Təwir pik o etəmim itəm otuwin əpəh e nego e neai itəm Uhgın tatərəmərə lan, kən magwən e lafet asol rəhan.”

¹⁶Mətə Iesu təmən kəm in məmə, “Nian kit, suah kit təmol nagwənən asol kit rəhan, kən maun-in netəmim tepət məmə okotuwa kəgwən kələh ilat min.

¹⁷Kən e nian rəha nagwənən, in təmahl-ipən rəhan iolwək məmə otuwīn mən-iarəp kəm netəmim itəm təmaun-in rəkis ilat. Kən tən-ipən kəm ilat məmə, ‘Otuwa kagwən, mətō-inu enol əpenə-penə rəkis e nagwənən.’

¹⁸Mətō ilat rafin kəmotapəs nuwīnən moatən məmə okol kəsotuwamən. Kit təmaupən mən kəm in məmə, ‘Kəsi. Ən-tu kəm rəham iərəmərə məmə ko esimnən mətō-inu, emos-nəmtin əm nīməptən kit, kən ekəike muwīn mətəg.’

¹⁹“Kən kit min təmə, ‘Kəsi. Ən-tu kəm rəham iərəmərə məmə ko esimnən mətō-inu, emos-nəmtin əm kau ten rəha niuwən kat, kən ekəike muwīn mehm pitən rəhalat min wək.’

²⁰“Kən kit min təmə, ‘Ən-tu kəm rəham iərəmərə məmə ko esimnən mətō-inu, kəmit rəhak pətan ka latuənu əh-roiu.’

²¹“Kən iolwək təmuwa mən-ipən kəm rəhan etəm-iasol. Kən etəm-iasol un nikin təmahmə təmahmə, kən təmən kəm rəhan iolwək məmə, ‘Uwīn uəhai e suatip ne ikin min neen e taon meam-in ian-rat min, ne netəm nīpətīlat məsīn tərət, ne netəm nīganəmtīlat təpis, ne ielkin rat min, kən mit ilat motuwa.’

²²Kən in təmōl əm məmə rəhan etəm-iasol təmən mihin ne, kən təmitəlīg-pa mən-ipən məmə, ‘Etəm-iasol. Natimnat rafin itəm nəmən, io enol rəkis, mətō nagwənən tepət əh-ikin kən nīmə tahmen e netəmim neen min.’

²³“Kən etəm-iasol təmən kəm iolwək məmə, ‘Kən uwīn e suatip, ne ikin min rafin ihluə e taon, kən uwīn muəh nīkilat məmə ilat okotuwa imə, məmə nīmə u rəhak otəkəike mər wir.

²⁴Mətō ekən kəm ik məmə netəm emaun-in ilat aupən, ko kəsotun asgəwīnən nagwənən məsīn rəhak.”

Nolən rəha nətəu-pənən Iesu

²⁵Netəmim tepət tepət koatuarisig-in Iesu e suatip. Kən in təmeirair mən-ipən kəm ilat məmə,

²⁶“Okəmə suah kit tolkeike məmə otuwa muarisig-in io, in otəkəike mos io ekətul aupən e rəhan nəmegəhən. In otəkəike molkeike io maprəkis-in rəhan

tata ne mama ne rəhan pətagwəhl ne nətin min ne pian min ne winin min, ne in atip min. Okəmə təsol mihinən, kən ko in təsahmenən məmə otuwa mol rəhak lan etəmim.

²⁷Kən etəmim pah itəm təsiləsən rəhan nig kəluau mətəu-pa io, kən ko in təsahmenən məmə otuwa mol rəhak lan etəmim.

²⁸“Okəmə itəmat kit tolkeike məmə otiləkin nimə asol kit kaifəməh, kən in otaupən məpələh mehm wir məni rəha natimnat min məmə otehm rəhan məni məmə tahmen, o kəp.

²⁹In tatol nəhlan mətə-inu okəmə in təsaupənən mehm wir məni ron, kən in tatətuoun matol fautesen əm, mətə tinəruru nol rafinən, kən netəmim rafin itəm okotuwa motehm, kən okotalah-əmnu moatən məmə,

³⁰‘Əplan-tu. Suah u təmətuoun əm rəhan nimə, mətə tinəruru nol rafinən.’

³¹“Kən okəmə kig kit rəhan mopael ilat ten-taosan əm, tatəto namnusən məmə kig pisin kit min itəm rəhan mopael min tuente-taosan tatuwa məmə okuəluagin, kən otəsuwın uəhaiən o nəluaginən. Aupən ikin, otəkəike məpələh mehm wir məmə in titun nol winən, o kəp.

³²Okəmə titun məmə okol təsol winən, in otəkəike mahl-ipən netəmim neen kotuwın motehm rəhan tikimir nian in əpəh isəu əh, kən okotətapəh o nəməlinuən.

³³Kən e nolən ahmen min əm, itəmat nəkotəkəike motəpələh motehm wir nəmegəhən rəhatəmat. Okəmə itəmat kit təsapəsən əh rəhan natimnat min rafin, kən ko in təsahmenən məmə otuwa mol rəhak lan etəmim.”

³⁴“Nian etəmim kit takiəh nien, kən nipəti nien in təwir o nawirən nagwənən. Mətə nian kinawir rəkis nagwənən lan, kən nipatin təsəwir minən o nunən.

³⁵Kən okol kəsölən nat wir kit lan, kən netəmim okotərakin əm. Etəm matəlgin tatig, təwir məmə in otətəlig-in wir kən mitun nəghatən min u.”

Luk 15

Nimaa nəghatən e sipsip itəm təməlue

(Mat 18:10-14)

¹E nian əh, netəmim tepət itəm koatos məni rəha takis, ne netəmim tepət itəm nol təfagə rat, kəmotuwa məmə okotətəlig-in Iesu.

²Kən Farisi min ne iəgətun min rəha Lou koatəghat rat Iesu o netəm nol təfagə rat min əh, moatən məmə, “Suah əh, nikin tətəgien əm məmə nol təfagə rat min koatuwin ron, kən motəgwən kələh.”

³Kən e nəghatən min u, Iesu təmuəh nimaa nəghatən u məmə,

⁴“?Itəmat pah u, rəhan sipsip wan-hanrit, kən kitəh təməluə, məto in nikin təsəhtən? Okəmə itəmat kit rəhan sipsip təmikə nəhlan, kən in otəkəike mapəs rəhan nainti-nain sipsip koatun kras moatətul əpəh təpiə ikin, kən in otuwin mategəs-in itəm təməluə mətoarus-pən in otehm.

⁵Kən nian in təmehm, təmiləs-ipər məhun, kən nikin tətəgien.

⁶Kən nian in təmiet-arəpa latuənu, in otəkəike maun-in in min neen, ne netəm kotatig motitəlau lan, kən mən-ipən kəm ilat məmə, ‘Otuwa kotəgien kələh, məto-inu emehm min rəhak sipsip itəm təməluə.’”

⁷Kən nian Iesu təmol namnun nimaa nəghatən, təmən-ipən kəm ilat məmə, “Kən iatən kəm itəmat məmə, tahmen-pən əm əpəh e nego e neai. Okəmə iol təfagə rat kit tatəuhlin rəhan nəmegəhən kəm Uhgın, kən nagienən əpəh ilis e nego e neai o suah əh in tepət, taprəkis-in nagienən o netəmim nainti-nain itəm nīkilat təht məmə kotətuatip məsotolən nat kit tərət itəm okotəkəike motəuhlin nəmegəhən rəhalat ron.”

Nimaa nəghatən e məni təmikə

⁸Kən Iesu təmatig məghat min məmə, “?Okəmə pətan kit rəhan məni ten kəmol e silfa, kən in təmikil kitəh, kən in otol naka? In otasiepən e lait kit, kən mol pīrum megəs-in wir əpəh imə matuwin matuwin mehm.

⁹Kən nian təmehm məni əh, in otaun-in rəhan min neen ne netəm kotatig motitəlau lan, matən məmə, ‘Otuwa kotəgien kələh məto-inu emehm rəkis məni ilou rəhak təmikə.’”

¹⁰Kən nian Iesu təmol namnun nimaa nəghatən, təmən-ipən kəm ilat məmə, “Kən ekolkeike məmə ekən kəm itəmat məmə, e nolən kitieh min əm, nagienən asol e niganəmti nagelo min əpəh ilis e nego e neai, nian iol təfagə rat kit tatəuhlin rəhan nətəligən matuwīn o Uhgīn.”

Nimaa nəghatən rəha nətī suah kit iərman itəm təməlue

¹¹Kən Iesu təmatəkəike matən məmə, “Suah kit, nətīn iərman kəiu.

¹²In əkəku lan tən-ipən kəm rəhalau tata məmə, ‘Tata. Oor nautə min rəham, mos-ipa rəhak u-roiu.’ Kən rəhalau tata toor rəhan natimnat mos-ipən kəm ilau.

¹³“Kən təsuwəhən, nətīn in əkəku lan tos rəhan lan muwīn mol-salim-in ilat, kən mos mənī e nautə min un miet iməlat ikin muwīn e nəptən pişin kit min isəu. Kən ikin əh, təmatərəkīn rəhan mənī e nolən rat min matuwīn matuwīn.

¹⁴Kən nian rəhan mənī tinikə rafin, nəumis asol tinitan e nitən əh, kən nəumis tinatus suah un, nigīn nagwənən tinikə.

¹⁵Kən təmuwīn matol wək kəm suah kit əh-ikin əh, kən suah u təmahl-ipən məmə otuwīn mətəgwən rəhan pikəs min.

¹⁶Kən nəumis təmus pik məmə in tolkeike məmə otun nagwənən nigī pikəs min, mətə etəmim tikə itəm otos-ipən nat kit kəm in.

¹⁷“Kən nətəligən wir tinuwa min lan, kən matətəlig-in məmə, ‘Kəsi. Roiu əh iolwək min rəha tata, nigilat nagwənən tepət maprəkis, mətə io ekətətig u ikin-u, otəsuwəhən kən ekimis e nəumis.

¹⁸Oekiet u ikin-u mitəlig-pən o rəhak tata, kən mən-ipən kəm in məmə, “Tata. Io emol tefagə tərət kəm Uhgīn ne ik.

¹⁹Roiu əh esahmenən məmə onəkaun-in io məmə nətīm. Mətə aun-in io ekahmen-pən əm məmə io iolwək əm kit rəham.”

²⁰Kən təmətul maliwək minatuwīn məmə otehm rəhan tata. “Mətə nian təmatuwa əh əpəh isəu, rəhan tata təmasipən məplan, kən təmasəkitun, maiu muwīn miləs muətāin mətəgien ron.

²¹Kən netin tən-ipən kəm in məmə, ‘Tata. Io emol tefagə tərət kəm Uhgın ne ik. Roiu əh esahmenən məmə onəkaun-in io məmə nətım.’

²²“Məto rəhan tata taun-in rəhan iolwək min mən-ipən kəm ilat məmə, ‘!Ei! Otuwin uəhai motos kot itəm in təwir maprəkis motuwa kuwin-in-pən kəm in, kən motos rig motarigın-pən e noanelmin, kən motos put ka kuwin-in-pən e nelkin,

²³kən motiləs pılik itəm tasis-asis məwir motuwa koh, pəs kotol kələh lafet lan rəha nətık,

²⁴məto-inu nətık u, in tahmen əm məmə təmimis rəkis, məto roiu in tınəmegəh min. In təməluə, məto enehm min.’ Kən ilat kinoatol lafet.

²⁵“Kən e nian əh, netin asol lan in əpəh e nasumən. Kən e nian təmatuwa minuwa iuəhkır o latuənu, kən minəto netəmim koatol napuən min, moatol tanis.

²⁶Kən təmaun-in iolwək kit tuwa tətəpəh ron məmə, ‘?Ei, naka əh netəmim koatol?’

²⁷Kən tən-ipən kəm in məmə, ‘Piam təmuwa, kən rəham tata təmoh pılik itəm tasis-asis məto-inu piam tınıtəlig-pa min, kən in təsanən əm.’

²⁸“Kən nikin təmahmə, kən məmə, ‘Okol esuwınən imə.’ Kən rəhan tata təmuwa ihluə matəkəike kəm in məmə otuwin imə.

²⁹Məto tən-ipən kəm rəhan tata məmə, ‘Əplan-tu. Kəmuatig nup tepət rəkis, kən iatol wək u ikin-u tahmen-pən əm məmə rəham kit iolwək, kən məsəhtən nəwiam kit ne. ?Məto tahro, tata? Nəməsos-ipamən nat əkəku kit kəm io tahmen-pən e nəni, məmə ekol nagwənən lan itimat io min neen.

³⁰Məto nətım əh itəm təmərəkin rafin rəham nautə o nətouən nıpitan min lan rəha suatıp, kən nian tınıtəlig-pən latuənu, kən nakətul matoh pılik tasis-asis matol lafet lan rəhan.’

³¹“Kən rəhan tata tən-ipən məmə, ‘Nətık. Nian rafin kilau min ik kətuatig, kən natımnat rafin rəhak in rəham.

³²Məto tətuatip əm məmə okotol lafet u motagien, məto-inu piam u tahmen-pən əm məmə təmimis rəkis, məto roiu in tinəmegəh min. In təmikə, məto roiu kinotehm min.”

Luk 16

Nimaa nəghatən rəha etəm-iasol itəm tatol nolən teko-eko

¹Kən Iesu təmən kəm rəhan min netəmim məmə, “Suah kit rəhan nautə tepət, kən in təmos suah kit tuwa etəm-iasol o rəhan iolwək min. Kən rəhan iolwək min neen kəmotuwa moatən-ipən nəratən rəha etəm-iasol əh kəm iərəmərə, moatən məmə, ‘Ei, suah əh tatərəkin rəham natimnat.’

²Kən təmaun-in suah əh tuwa tatəghat kəm in məmə, ‘?Ei, nəghatən naka min u iakatəto katən lam? Ekolkeike məmə nakos rafin nəghatən min rəha wək rəham muwa, məto-inu roiu ekahl-iarəp ik e wək.’

³“Kən etəm-iasol əh təmuwin matətəlig-in məmə, ‘Awe. Rəhak iərəmərə tolkeike məmə otərakin io e rəhak wək u-roiu. ?Kən ekol naka əh-roiu? Nahgik təsahmenən məmə ekel nisip mos mənə ikin, kən io iaulis pik o neasiə-inən mənə o netəmim.

⁴!Ei! Roiu əh enitun nat naka itəm io ekol pəs netəmim okotit io motuwin iməlat ikin moatehm wir io nian rəhak iərəmərə otərakin io e rəhak wək.’

⁵“Kən in təmaun-in rafin netəmim itəm kəmotol kaon kəm iərəmərə kotuwa ron kitəh kitəh. Kən təmən-ipən kəm itəm təmaupən muwa məmə, ‘?Ik nəmol kaon e naka?’

⁶Kən suah əh təmən məmə, ‘Eməmik tram rəha oel o noahən ilat wan-hanrit.’ Kən etəm-iasol təmən kəm in məmə, ‘Inu ma pepe rəha kaon rəham. Əpələh uəhai əm-tu, kən əte-pən fifti tram əm e rəham pepe.’

⁷“Kən təmən-ipən kəm suah kit min məmə, ‘?Ik nəmol kaon e naka?’ Kən in təmə, ‘Emol kaon e wan-taosan pak wit.’ Kən etəm-iasol təmə, ‘Os ma pepe rəha kaon rəham, kən əte-pən əm eit-hanrit pak wit.’

⁸“Kən uarisig lan, iərəmərə rəha etəm-iasol apon itəm təmatol tərət kəm in, təmatənwiwi in o rəhan nolən rəha neiueiuəən məmə in otehm wir atip in.

Nat u tatəgətun məmə netəmim rəha nətueintən, ilat kotenatig wir o nolən min rəha nətueintən nian ilat koatəghat kəm ilat min, taprəkis-in nenatigən rəha netəmim rəha nəhag-əhagən.

⁹“Kən iatən kəm itəmat məmə, otasitu wir e netəmim e məni rəha nətueintən məmə ilat okotuwa iolitəmat min. Kən nian məni rəha nətueintən otikə, kən Uhgın otos itəmat muwin əpəh e nego e neai itəm otətətig lilin.

¹⁰“Okəmə nəkitun məmə suah kit tatehm wir nat əkəku kit, kən nəkitun məmə in titun nehm wirən nat itəm iahgin. Kən okəmə nəkitun məmə suah kit tatol nolən itəm təsətuatipən e nat əkəku kit, kən nəkitun məmə in otol nolən təsətuatipən e nat itəm iahgin.

¹¹?Kən tol nəhlan, okəmə itəmat nəkəsotehm wirən məni rəha nətueintən u, kən pah otegəhan-in itəmat məmə nakotos nat itəm təwir pahrien, inəh natimnat rəha Uhgın?

¹²Kən okəmə itəmat nəkəsotehm wirən natimnat rəha suah kit min, kən nikitəmat təsəhtən məmə okos-ipən əh min kəm itəmat rəhatəmat atip natimnat məto-inu, katəplan məmə onəkəsotehm wir minən natimnat min əh.

¹³“Etəmim tikə itəm titun nuwamən in slef rəha etəm-iasol kəiu. Okəmə in tətalkut məmə otol nəhlan, kən otolkeike kit mol nəwian, kən metəhau kit məsolən nəwian. Okol nəsolən slef rəha Uhgın ne məni e nian kitiəh əm.”

¹⁴Farisi min kotolkeike pik məni, kən nian kəmotəto nəghatən min u, kən kəmotalah-əsan e Iesu.

¹⁵Məto in təmən kəm ilat məmə, “Itəmat nəkoatol nolən min itəm koatol netəmim koatən məmə nəkotətətip. Məto Uhgın titun nikitəmat məmə kotərat. Iatən nəhlan məto-inu nat naka itəm netəmim koatiləs-ipər məmə in nat keike, məto e niganəmti Uhgın in nat ənnapin əm.”

¹⁶Kən in təmatəkəike matən məmə, “Kəmən-iarəp Lou ne nəghatən rəha ien min rəha Uhgın mətoarus-pa Jon Baptais, kən uarisig lan, katən-iarəp namnusən təwir rəha nərəmərən rəha Uhgın, kən netəmim rafin kotalkut pik məmə okotuwın motatig ahgin.

¹⁷Məto kəsənən məmə wək rəha Lou ne nəsanənən rəhan təmikə. Nəghatən rafin rəhan kotatig, in asol min mətoarus-pən in əkəku agin. Lou otətatig taprəkis-in neai ne nətueintən.

¹⁸“Kən tahmen-pən əm nulan: okəmə suah kit tatol tifos mətapəs rəhan pətan, kən matit pətan pisin kit min mətuatig, kən in tategoafəl rəhan pətan matol təfagə rat. Kən okəmə suah kit tatit pətan kit itəm rəhan iərman təmapəs kən ilau mətuatig, kən in tatol təfagə rat məto-inu in tətəkləh-in pətan rəha suah pisin kit.”

Nimaa nəghatən rəha Lasaros ne suah kit rəhan nautə tepət

¹⁹Kən Iesu təmən məmə, “Suah kit rəhan nautə tepət tatuwin e napən wir min nəgui-naris itəm nəmtin tiəkis, kən nian rafin tatun pik nagwənən wir min.

²⁰Kən ian-rat kit, nərgin u Lasaros, niməgəm təmirafin nipətin. Kən kəmiləs kan kələhəu əpəh e nafiluə rəha latuənu.

²¹In tolkeike pik məmə otun nimismisi nagwənən itəm təmisas e tepil rəha etəm-iasol əh. Kən nat kit tərət min, kuri min kotuwa moatəpəh-əpəh niməgəm min rəhan.

²²“Kən ian-rat əh təmimis, kən nagelo min kəmotiləs motuwin əpəh e nikali Epraham, ikin rəha nisaiiən. Suah un rəhan nautə tepət, in təmimis min, kən kəmitənim.

²³Kən in tuwin əpəh e nigəm asol, kən tatəto nahməən asol, kən nian təmasipər, təməplan Epraham əpəh isəu. Kən Lasaros əpəh e nikalin.

²⁴Kən təmaun-in əfəməh məmə, ‘!Tata Epraham! Awi, asəkitun io. Ahl-ipən Lasaros məmə oteer əm noanelmin e nəhau kən mos muwa mek namək lan məmə otətəp, məto-inu iatəto nahməən asol e nigəm ukin-u roiu.’

²⁵“Məto Epraham təmə, ‘Nətik, nikim təht-tu rəham nəmegəhən aupən. Ik nəmatos natimnat wir rəham tepət, məto Lasaros təmatəto nahməən tepət e nipətin. Məto roiu əh, in tatəto təwir ikin-u, kən ik, natəto nahməən tepət e nipətim.

²⁶Kən nat kit min. Ilugin-in kitat, noakimil asol itəm tatoor kitat, ik un, kən itimat u. Okəmә itimat kit tolkeike mēmә otimnә mehm ik, mәto okol tәsimnәn. Kən okәмә itәmat kit tolkeike mēmә otuwa mehm itimat, mәto okol tәsuwamән.’

²⁷“Kən etәм rәhan nautә tepәt tәмән mēmә, ‘Tata. Iakatәkәike kәм ik, awi, kәsi. Ahl-ipән Lasaros tuwin e nimә rәha tata rәhak,

²⁸mәto-inu piak faif әh-ikin. Tәwir mēmә in otuwin mәghat mem әskasik ilat mēmә okoatәto ilat mēmә okәsotuwamән ukin-u itәм iatәto nahmәn asol agin ikin.’

²⁹“Mәto Epraham tәмә, ‘Kәp. Nәghatән rәha Moses ne ien min rәha Uhgин tәtatig. Pәs piam min okotәto nәghatән min әh.’

³⁰“Kən etәм rәhan nautә tepәt tәмән mēmә, ‘Kәp, Tata Epraham. Tәsahmenән. Mәto okәмә suah kit otәmegәh min e nimisән otuwin mәghat kәм ilat, kән nipahrienән, ilat okotәuhlin rәhalat nәtәligән kән motapәs tәfagә rat min rәhalat.’

³¹“Kән Epraham tәмә, ‘Okәмә kәsotәtәlig-inән nәghatән rәha Moses ne ien min rәha Uhgин, kән in nat әnnapin okәмә suah kit tәmegәh pәp e nimisән kән muwin matәghat kәм ilat, mәto okol kәsotән minән nipahrienән lan.’”

Luk 17

Oatәto itәmat

(Mat 18:6-7,21-22; Mak 9:42)

¹Kән Iesu tәмән kәм rәhan min netәmim mēmә, “Nipahrienән, nos-ipән-os-ipәнән rәha tәfagә tәrat min itәм koatiuw-pән netәmim e nәratән, ilat okotuwa. !Mәto nahmәn asol tatuwin o etәmim itәм tatos-ipән-os-ipән netәmim, o in suatip rәha nos-ipән-os-ipәнән!

²Mәto okәмә etәmim kit tatiuw-pән rәhak kit etәmim u tahmen e suakәku, mēmә otol tәfagә rat, kән suah әh, Uhgин otol nalpinән asol kәм in. Kән nalpinән әh otәskasik taprәkis okәмә kәtu-pән kәpiel kit e nentou, kән kәrakin-pән әpәh itәhәi lokamnim mēmә otamnim.

³Kən tol nəhlan, oatəto moatehm wir rəhatəmat nəmegəhən. “Okəmə piam tatol təfagə tərət kəm ik, kən ən-ipən rəhan nolən rat e niganəmtin, kən okəmə tatəuhlin rəhan nətəligən, kən aluin rəhan nolən rat məsosən tatig e nikiim.

⁴Kən nat ərnaḡin in tatol təfagə rat kəm ik mau seḡin e nian kitəh, kən muwa mau seḡin mən-ipinə kəm ik məmə, ‘Kəsi, emol təfagə rat kəm ik. Ekəuhlin rəhak nətəligən mapəs rəhak təfagə rat,’ kən ik onakəkəike maluin rəhan nolən rat min, kən məsosən tatig e nikiim.”

⁵Kən aposol min kəmotətapəh o Iərəməərə məmə, “Ol rəhatimat nahatətəən təkasiik təhmin min.”

⁶Kən Iərəməərə təmən məmə, “Nat ərnaḡin okəmə rəhatəmat nahatətəən in təkəku aḡin əm tahmen e nimismisi niməkləkil, kən nəkotitun nənən kəm nig u neeḡin məmə, ‘Euw atip ik, kən muwin miwig-pən itəhəi,’ kən nig u otol nəwiatəmat.

⁷“Ən-tu. ?Okəmə suah kit rəhan iolwək tətəsum, o in tatehm sipsip min, kən in tatitəlig-pa latuənu, kən nikitəmat təht məmə etəm-iasol otən kəm in məmə, ‘!Ei! Wa uəhai məpələh mun nagwənən əh’? !Kəp!

⁸Məto in otən kəm rəhan iolwək məmə, ‘Uwin mol nigak nagwənən, kən uwin muwin e rəham naḡən təwir, kən mos-ipa nigak nagwənən ne nimək nənimən. Nian nəmol rafin rəham wək, nəkitun nuwinən magwən kən mənim.’

⁹?Kən nikitəmat təht məmə etəm-iasol, in otən tagkiu kəm rəhan iolwək o wək asol rəhan itəm in otəkəike mol? !Kəp!

¹⁰Kən itəmat un, nəkotahmen əm e iolwək min rəha Uḡin. Nian nəmotol rəkis natimnat rafin itəm Uḡin təmən kəm itəmat məmə onəkotəkəike motol, onəkotəkəike motən əm məmə, ‘Itimat iolwək min əm. Nolən rəhatimat təsahmenən o nənwiwiən. Itimat emotol əm wək itəm itimat ekotəkəike moatol.’”

Iesu təmol-wir netəmim ten itəm leprosi təmol ilat

¹¹Nian Iesu tǎmaluwǎk matuwǎn Jerusalem, in tǎmaluwǎk muwǎn-pǎn ilugin i nǎptǎn mil u Sameria ne Kalili.

¹²Kǎn nian in tǎmiet-arǎpa latuǎnu kit, netǎmim ten itǎm nimisǎn u leprosi tǎmol ilat kǎmotuwa motǎtul isǎu mǎsin,

¹³kǎn motaun-in mǎmǎ, “!Iesu, Etǎm-iasol, asǎkitun itimat!”

¹⁴Kǎn nian in tǎmehm ilat, tǎmǎn-ipǎn kǎm ilat mǎmǎ, “Onǎkotuwǎn o pris mǎmǎ in otehm nipǎtǎtǎmat.” Kǎn nian ilat kǎmotaliwǎk ǎh e suatǎp, kǎn kǎmotǎwir, nimisǎn tǎmikǎ.

¹⁵Kǎn ilat kit tǎmǎplan mǎmǎ leprosi rǎhan tinikǎ, kǎn in tǎmǎuhlin mitǎlig-pǎn o Iesu, matǎn ǎfǎmǎh mǎmǎ, “!Iatǎnwiwi Uhgǎn! !Iatǎnwiwi Uhgǎn!”

¹⁶Kǎn in tǎmeiuaiu e nelki Iesu misin nulin nipǎnǎgin tatek nisip, kǎn matǎn kǎm Iesu mǎmǎ nǎkin tǎtagien mǎmǎ in tǎmol-wir rǎhan nimisǎn. Kǎn suah u in etǎm Sameria.

¹⁷Kǎn Iesu tǎmǎn mǎmǎ, “?Emol-wir netǎm ten maruǎtuǎh-in rǎkis rǎhalat nimisǎn, o kǎp? ?Mǎto nain hiǎ?”

¹⁸?Suah u in iapǎspǎ ǎm, mǎto in pisin ǎm tǎmitǎlig-pa matǎnwiwi Uhgǎn?”

¹⁹Kǎn Iesu tǎmǎn kǎm suah u mǎmǎ, “ǎtul maliwǎk matuwǎn. Rǎham nahatǎtǎn tǎmol-wir ik.”

Nuwamǎn rǎha nǎrǎmǎrǎn rǎha Uhgǎn

(Mat 24:23-28,36-41)

²⁰Nian kit, Farisi min kǎmotǎtapǎh o Iesu mǎmǎ, “?Onǎghan nǎrǎmǎrǎn rǎha Uhgǎn otuwa?” Kǎn in tǎmǎn-ipǎn kǎm ilat mǎmǎ, “Nǎrǎmǎrǎn rǎha Uhgǎn otǎsuwamǎn mǎmǎ netǎmim okotehm e nǎganǎmtǎlat.

²¹Kǎn etǎmim tikǎ itǎm otǎn mǎmǎ, ‘!Asi-pa mehm, in huǎ!’ o ‘!Asipǎn mehm, in ǎpǎh!’ mǎto-inu nǎrǎmǎrǎn rǎha Uhgǎn tinuwa rǎkis mǎtatig e nǎkitǎmat.”

²²Kǎn Iesu tǎmǎn kǎm rǎhan min netǎmim mǎmǎ, “Nian min koatuwa itǎm itǎmat onakoatolkeike mǎmǎ onǎkotehm nian min rǎha Nǎti Etǎmim, mǎto okol nǎkǎsotehmǎn.

²³Kən netəmim okotən kəm itəmat məmə, ‘!Asi-pa, in huə!’ o ‘!Asipən, in əpəh!’ Məto əsotuwinən motətəu-pən ilat,

²⁴məto-inu e nian io Nəti Etəmim oekuwa lan, in otahmen-pən e nipitən itəm tatipit kən mətasiəgəpin neai e nikalin kit mətoarus-pən nikalin kit min, kən netəmim rafin koatəplan motitun.

²⁵Məto aupən, io ekəkəike məto nahmən tepət, kən netəm kotatig roiu, ilat okotəuhlin məntaalat motapəs io.

²⁶“E nian io, Nəti Etəmim, ekuwa lan, otahmen-pən əm e nian rəha suah əh Noah aupən, itəm netəmim kəmoatol natimnat min məsotitunən məmə Uhgın otol nat kit lan.

²⁷E nian əh, netəmim kəmotagwən, moatənim, moatol marit, inəh natimnat rafin kəmoatol e nəmegəhən rəhalat, mətoarus-pa nian itəm Noah tinuwın imə e nipəgnoa nego asol rəhan. Kən nuhuən təməfik naruəh asol təmuwa maiu əlimin rafin netəmim itəm kəsotuwinən e nego.

²⁸“In tahmen-pən əm e nian rəha suah əh Lot. Netəmim kəmotagwən, moatənim, moatol-salim-in natimnat min, moatos-nəmtim natimnat min, moatasum, moatiləkin nimə min, inəh natimnat rafin kəmoatol e nəmegəhən rəhalat.

²⁹Məto e nian itəm Lot təmiet lan e taon əh Sotom, kən nigəm ne kəpiel min itəm koatuəp kəmotisi-pər e neai motoamnu ilat rafin əpəh e taon.

³⁰“Kən otahmen əm e nian io Nəti Etəmim oekuwa min lan kən Uhgın otol əp io kəm netəmim.

³¹E nian əh, okəmə suah kit tatəpələh ihluə e rəhan nimə, pəs in otagim məsuwın minən imə məmə in otos rəhan natimnat, kən okəmə suah kit in əpəh e nasumən, pəs in otagim məsuwa minən latuənu.

³²!Onəkəsotaluinən pətaguihl rəha Lot!

³³Etəm tolkeike mēmə in otaskəlīm rəhan nəmegəhən e nətueintən u məsətəu-pa-mən io, in otəsosən nəmegəhən lilin. Məto etəmim itəm tətəpəs natimnat rəha nəmegəhən e nətueintən u kən matətəu-pa io, in otos nəmegəhən lilin.

³⁴Iatən kəm itəmat mēmə, e nian əh lapin, etəmim kəiu okətuapil e pet kitəh əm, kən okos-irəkis kit, kapəs kit.

³⁵⁻³⁶Pətan kəiu okətioal nagwənən, kən okos-irəkis kit, kapəs kit.”

³⁷Kən rəhan iolwək min kəmotən-ipən kəm in mēmə, “?Iərəmərə, onəkuwa hiə?” Kən in təmən-ipən kəm ilat mēmə, “Onəkotitun əm. Tahmen e nian ligkai min koatiwig ilis moteiuaiu moatər itəhəi, kən nəkotitun mēmə nəm min əh-ikin əh.”

Luk 18

Nimaa nəghatən rəha nəutahlimis kit itəm tətəsək o nasituən

¹Kən Iesu təmuəh nimaa nəghatən kəm ilat matəgətun ilat lan mēmə okotəkəike moatəfak nian rafin məsotapəsən, məsotolən mēmə nīkilat otatite.

²In təmən mēmə, “Latuənu kit, ien kit əh-ikin rəha nələhəuən nəghatən min. Kən təsisiai-inən Uhgın, kən təsisiai-in minən netəmim.

³Kən e latuənu əh, nəutahlimis kit əh-ikin, kən nian rafin tatuwa matəplan ien un matən-ipən kəm in mēmə, ‘Awi. Okol nakasitu lak məghat o nəratən itəm rəhak tikimır tatol kəm io.’

⁴Məto ien təməsuwinən, kən mos nian əfəməh mēmə otəghat mol-wir nəratən əh rəha nəutahlimis. Məto pətan əh təmətapəh o suah əh nian rafin matuwın matuwın, kən ien tinatətəlig-in mēmə, ‘Nat əpnəpın esisiai-inən Uhgın, kən məsisiai-in minən netəmim,

⁵məto pətan əh tatən nat kitəh mətaləkiamtə io o rəhan nəghatən, matuwın matuwın. Io ekəkəike muwin mən wir rəhan nəratən kən mələhəu nəwirən. Okəmə ekapəs, kən in otatuwa ron io matuwın matuwın kən ekəpou in.”

⁶Kən nian Iərəmərə təmuəh rəkis nimaa nəghatən əh, kən təmən mēmə, “Otətəlig-in-tu nəghatən rəha ien əpəh itəm tərat təhmin.

⁷?Məto tahro e Uhgín? In təmitəpun rəhan min netəmim, kən ilat koatasək-pən kəm in nian rafin e nərauiəgən min ne lapin min rafin. ?Kən nikitəmat təht məmə in otən-ipən kəm ilat məmə, ‘Onakoatəsaḡin pitən’? Kəp. ?Kən nikitəmat təht məmə in otasitu uəhai əm e rəhan min?

⁸Iatən kəm itəmat məmə nīpahrienən, in otasitu uəhai əm e rəhan min, kən mol-wir rəhalat nəratən. ?Məto nian io Nəti Etəmim oekitəlig-pa min lan e nətueintən, oekehm netəmim neen itəm koatahatətə e Uhgín, o kəp?”

Nimaa nəghatən rəha Farisi ne etəm tatos məni rəha takis

⁹Kən Iesu təmuəh nimaa nəghatən kit e netəmim neen itəm nikilat tatəht məmə ilat kotətuatip taprəkis-in netəmim rafin, kən motasil-iəhau-in netəmim rafin.

¹⁰In təmən məmə, “Suah mil kəiu kəmian əpəh e Nimə Rəha Uhgín məmə okuəghat kəm in e nəfakən. Kit, in Farisi, kən kit in etəm tatos məni rəha takis.

¹¹Kən Farisi təmətul mateiuə məmə in tatəfak kəm Uhgín, məto nīpahrienən tatən atip in, matən məmə, ‘Uhgín, iatən tagkiu kəm ik məto-inu nəmol məmə ekol etəm pisin lak, inəh io min neen kotolkeike pik məni kən moateiuə məmə kotakləh-in, kən moatol tərat, kən motakləh-in pətan rəha etəm pisin. Kən io esolən məmə suah əh etəm tatos məni rəha takis.

¹²Nian kəiu e wik kitieh, iatətuakəm mətapəs nagwənən matəfak kəm ik. Kən okəmə ekos natimnat ten, ekatos-irəkis kitieh matos-ipinə kəm ik.’

¹³“Məto suah əh, etəm tatos məni rəha takis, in tatətul-pən isəu, kən mətaulis məsasipərən e neai məfak. Kən nikin tatitəgit mətasək mətaht manikiləhan matən məmə, ‘Uhgín, io etəm tərat. !Asəkitun io!”

¹⁴Kən Iesu təmə, “Iaten kəm itəmat. Nian suah mil u okatiatəlig-pən latuənu, etəm rəha takis, rəhan nəmegəhən in otətuatip e niganəmti Uhgín. Məto Farisi təsol mihinən, məto-inu etəmim itəm tatiləs-ipər atip in, Uhgín otiləs-iəhau, məto etəmim itəm tatos-iəhau atip in, Uhgín otiləs-ipər.”

Nisualkələh kəmotuwa o Iesu

(Mat 19:13-15; Mak 10:13-16)

¹⁵Kən netəmim neen kəmotəmik rəhalat nisualkələh mətmətig motuwa kəm Iesu məmə in otələhəu-pən nelmin elat kən məfak olat. Məto nian rəhan min netəmim kəmotəhm ilat, kən kəmotən-iəhau ilat.

¹⁶Məto Iesu təmatən-iarəp məmə nisualkələh min un okotuwa ron, kən təmən-ipən kəm rəhan min netəmim məmə, “Əsotahtosiğ-inən nisualkələh məmə okəsotuwamən ron io, pəs ilat okotuwa ron io, məto-inu nərəmərəən rəha Uhgın in rəha netəmim itəm kotahmen e nisualkələh min u.

¹⁷Okəmə suah kit tolkeike məmə in otuwa matig ahgın nərəmərəən rəha Uhgın, kən in təike muwa tahmen e suakəku. Məto okəmə təsol mihinən, kol in təsuwamən.”

Suah kit rəhan nautə tepət

(Mat 19:16-30; Mak 10:17-31)

¹⁸Kən etəm-iasol kit təmən-ipən kəm Iesu məmə, “Təgətun, ik etəm təwır. ?Oekol naka məmə ekos nəmegəhən lilin?”

¹⁹Kən Iesu təmən-ipən kəm in məmə, “?Tahro nakatən kəm io məmə io etəm təwır? Suah kit tikə in etəm təwır, məto Uhgın əm in təwır.

²⁰Ik nəkitun nəghatən min e Lou rəha Uhgın koatən məmə, ‘Əsakləh-inən pətan pisin, əsohamnuən etəmim, əsakləh-inən natimnat, əseiueiuəən e kot, isiai-in rəham mama ne tata.”

²¹Kən suah u təmən məmə, “Natimnat rafın u, io emol rafın ilat, nian ematəkəku mətoarus-pa u-roiu.”

²²Nian Iesu təməto nəghatən əh, təmən-ipən kəm in məmə, “Nat kitiağ əm əh-ikin itəm ik nəməsolən əh. Uwın mol-salim-in nautə rafın rəham, kən mos məni lan muwın mos-ipən kəm ian-rat min, kən ik onakos natimnat wır əpəh e nego e neai. Kən wa, muarisig-in io məmə ik rəhak etəmim.”

²³Məto nian təməto nəghatən min əh, nikin təməpou məto-inu rəhan nautə tepət.

²⁴Kən Iesu tēmasipən mēplan, tēmən mēmə, “!Awi, tiəkis pik o etəm rəhan nautə tepət mēmə in otuwīn matig ahgin nērēmərēən rəha Uhgīn!

²⁵Tiəkis mēmə kau otuwīn-pən e nipəg nitel, mətō tiəkis pik mēmə etəm rəhan nautə tepət otuwīn matig ahgin nērēmərēən rəha Uhgīn.”

²⁶Kən netəm kəmotətō nəghatən əh kəmotən mēmə, “?Okəmā in tiəkis o etəm rəhan nautə tepət, mətō pah əh in tahmen mēmə otos nəmegəhən əh?”

²⁷Mətō in tēmən mēmə, “Natimnat itəm tiəkis, ko netəmim kəsotolən, mətō Uhgīn in titun nolən.”

²⁸Kən Pita tēmən-ipən kəm in mēmə, “?Mətō tahro etimat? Emotapəs rafin rəhatimat natimnat kən moatuwa mēmə ekotuarisig-in ik.”

²⁹Kən Iesu tēmən-ipən kəm ilat mēmə, “Iatən pahrien kəm itəmat mēmə, etəm tēmapəs rəhan nimə, o rəhan pətan, o pian min, o rəhan tata ne mama, o rəhan nisualkələh mətō-inu in tatətəu-pən nērēmərēən rəha Uhgīn,

³⁰kən e nətueintən u, in otos natimnat tepət nəhlan taprəkis-in ilat min u tēmapəs ilat, kən uarisig, in otos min nəmegəhən lilin.”

Iesu tēmən-iarəp min rəhan nimisən

(Mat 20:17-19; Mak 10:32-34)

³¹Kən Iesu tēmən-ipən kəm rəhan netəm tuelef mēmə okotiet e nimanin netəmim motuwa kitiəh kuəfimin ilat min, kən tēmən-ipən kəm ilat mēmə, “Otətəlig-tu. Roiu koatuwin əpəh ilis Jerusalem, kən natimnat min itəm ien min rəha Uhgīn aupən kəmoatən lak, Nəti Etəmim, ilat okotuwa kol nipahrienən.

³²Netəmim okotegəhan-in-pən io e nelmi Iaihlua min, kən netəmim okotəghat motalah əsan lak, motoh io, motol naulisən kəm io, kən motagəh-əpis io, motagəh e nipətik.

³³Kən okalis io, kən kohamnu io, mətō e nian tatol kisil lan, oekəmegəh min.”

³⁴Mətō kəsotitunən rəhan nəghatən min. In tahmen-pən e nəghatən itəm nipətīn tatəhluaig, kən kəsotitunən nipəti nəghatən min əh.

Iesu t̄amol-wir igan̄əmtin əpis kit

(Mat 20:29-34; Mak 10:46-52)

³⁵Nian Iesu tatuwa iuəhkir o taon əh Jeriko, igan̄əmtin əpis kit əh-ikin tatəpələh e n̄ikal̄i suatip. Nian rafin in tateasiə-in m̄əni o netəmim.

³⁶Kən nian igan̄əmtin əpis t̄əm̄əto m̄əm̄ə netəmim tepət kotaliwək e suatip, kən in t̄əm̄ətapəh m̄əm̄ə, “?Naka əh katol?”

³⁷Netəmim k̄əmotən-ipən k̄əm in m̄əm̄ə, “Iesu əpəh, etəm Nasaret, t̄ətaliwək e suatip.”

³⁸Kən t̄əmagət əf̄əm̄əh m̄əm̄ə, “!Iesu! !Mipi Kig Tefit! !Asəkitun io!”

³⁹Kən netəm m̄in u koataliwək motaupən-in Iesu, k̄əmotagət lan, moatən m̄əm̄ə, “!Əsagətən!” M̄əto in t̄əmagət əf̄əm̄əh m̄əs̄in m̄in m̄əm̄ə, “!Mipi Kig Tefit! !Asəkitun io!”

⁴⁰Kən Iesu t̄əm̄ətul m̄ən-ipən k̄əm ilat m̄əm̄ə okotiləs motuwa. Kən nian k̄əmotiləs motuwa iuəhkir, Iesu t̄əm̄ətapəh ron m̄əm̄ə,

⁴¹“?Naka un nakolkeike m̄əm̄ə io ekol k̄əm ik?” Kən in t̄əm̄ən m̄əm̄ə, “!ər̄əm̄ərə, ekolkeike m̄əm̄ə oekaiir mehm nat.”

⁴²Kən Iesu t̄əm̄ən-ipən k̄əm in m̄əm̄ə, “Aiir mehm nat. R̄əham nahatət̄əən t̄əmol-wir n̄igan̄əmtin.”

⁴³Kən roiu agin-əh m̄in əm, t̄əmaiir m̄inatehm nat, kən m̄inatuarisig-in Iesu, matənwiwi Uhḡin. Kən nian netəmim rafin k̄əmotəplan nat əh, ilat k̄əmoatənwiwi Uhḡin.

Luk 19

Iesu ne Sakias

¹Kən Iesu t̄əm̄aliwək muwin imə e taon u Jeriko matuwin m̄əm̄ə otiet-arəpən e n̄əwtain m̄əs̄in.

²Kən e taon əh, suah kit əh-ikin, n̄ərḡin u Sakias. In etəm-iasol kit r̄əha netəm koatos m̄əni r̄əha takis, kən r̄əhan nautə tepət.

³Kən in tolkeike məmə otəplan-tu məmə Iesu in pah, mətə təruru nəplanən mətə-inu in natiəkuəkir, kən netəmim koatətulosig-in.

⁴Kən in təmaiu aupən muwın maiu e nig kit, nərgin u sikamo, məmə otitun nəplanən Iesu nian in otuwa-pa ikin.

⁵Kən nian Iesu təmuwa ətuatip əh in ikin, təmasipər məplan, kən mən-ipən kəm in məmə, “Sakias. Eiuaiu uəhai, mətə-inu roiu ekəkəike muwın matig əpəh e rəham nimə.”

⁶Kən Sakias təmeiuaiu uəhai əm, kən mit Iesu mian əpəh iman ikin imə, kən nikin təmagien.

⁷Mətə nian netəmim kəmotəplan natimnat min əh, kən koatasiwən-in nolən min əh moatən nikali Iesu məmə, “Suah əh tatuwin e nimə rəha iol təfagə rat.”

⁸Kən nian kinotuwın e nipəgnoa nimə rəha Sakias, in tətul mən-ipən məmə, “Iərəmərə, atətəlig-in-tu. Oekoor rəhak natimnat mol niel kəiu, kit rəhak, kən kit oekos-ipən kəm ian-rat min. Kən natimnat itəm emakləh-in o suah kit, oekalpin mau kuwit.”

⁹Kən Iesu tən-ipən kəm in məmə, “Roiu Uhgın tinosmegəh rəkis ik ne rəham min, mətə-inu ik min, nəmahatətə e Uhgın, kən ik noanol pahrien kit rəha Epraham.

¹⁰Kən io, Nəti Etəmim, emuwa məmə ekeam-in netəmim itəm koatəluə, kən mosmegəh ilat.”

Nimaa nəghatən rəha netəmim itəm koatos mənə rəha iərəmərə rəhalat

¹¹Nian netəmim koatətəlig-in Iesu, in təmatəkəike matuəh nimaa nəghatən kəm ilat mətə-inu in tınatuwa iuəhkir o Jerusalem, kən nikilat təht məmə nərəmərəən rəha Uhgın otəsuwəhən tuwa.

¹²Kən təmən-ipən kəm ilat məmə, “Etəm-iasol kit tolkeike məmə in otuwın isəu məplan kig asol agin məmə kig asol otıləs-ipər in mol kig lan əpəh iman ikin, kən otəpanitəlig-pa min.

¹³Kən təmaun-in rəhan iolwək ten, kən moor mənī kitiəh kitiəh kəm ilat. Kən in təmən-ipən kəm ilat məmə, ‘Itəmat onəkotəkəike motol wək e mənī u o nosən ətain mətəarus-pən io ekitəlig-pa min.’

¹⁴“Məto ilat əpəh iman ikin koatətəhau suah əh, kən motahl-ipən nəghatən kəm kig asol aɡin məmə, ‘Itimat esotolkeikeən məmə suah u otərəməərə etimat.’

¹⁵Məto kəmīləs-ipər in kol kig lan, kən in təmitəlig-pa min. Kən in təmaun-in rəhan iolwək min itəm təmoor rəhan mənī kəm ilat. In tolkeike məmə otitun məmə ilat kəmotol win e mənī naka nian in təmətətig əpəh isəu.

¹⁶“Kən etəm tətəupən təmuwa mən-ipən kəm in məmə, ‘Iərəməərə, nəmələhəu-pa mənī kitiəh e nelmək, kən emol win e mənī ten min.’

¹⁷Kən rəhan etəm-iasol təmən-ipən kəm in məmə, ‘Ik iolwək təwīr, nəmol wək itəm in təwīr. Məto-inu nəmol wək təwīr o nehm wīrən nat itəm natiəkəku, kən roiu oekegəhan-in min ik məmə onakərəməərə taon ilat ten.’

¹⁸“Kən etəm tatuarişig lan təmuwa mən-ipən məmə, ‘Iərəməərə, nəmələhəu-pa mənī kitiəh e nelmək, kən emol win e mənī faif min.’

¹⁹Kən etəm-iasol təmən-ipən kəm in məmə, ‘Ik onakərəməərə e taon ilat faif.’

²⁰“Kən iolwək kit min təmuwa mən-ipən kəm in məmə, ‘Iərəməərə, inu rəham mənī. Eməlis ətain e napən, kən məhluəig-in wīr,

²¹məto-inu io iatəgin ik itəm rəham nolən tiəkis. Nakatos natimnat itəm kəsənəmə rəham, kən matəulək e nasumən min itəm ik nəməsəfəən ilat.’

²²“Kən etəm-iasol təmən-ipən kəm in məmə, ‘!Ik iolwək rat! Nəghatən əm rəham tatəgətun məmə nəmol tərət aɡin. Nīnitun rəkis məmə io etəm-iəkis, kən iakatos natimnat itəm kəsənəmə rəhak, kən iatəulək e nasumən min itəm eməsəfəən ilat.

²³?Təhro nəməsosən rəhak mənī muwīn mələhəu-pən e pag, kən nian ekitəlig lan, ekitun nosən rəhak mənī ilau profit rəhan?’

24“Kæn tæmæn-ipæn kæm rəhan min əh mæmə, ‘Otos-irækis rəhan mæni, kæn motos-ipæn kæm suah u rəhan mæni ten.’

25“Kæn ilat kæmotæn mæmə, ‘!Iærəmərə, tæsətuatipæn mæto-inu rəhan mæni ten rækis!’

26“Kæn etəm-iasol tæmæn-ipæn kæm ilat mæmə, ‘Iatæn kæm itəmat mæmə, etəmim itəm tatos nat kit, kəpanos-ipæn min neen min. Mæto etəm rəhan nat kit tikə, kəpanos-irækis rəhan natimnat rafin.

27Kæn roiu, rəhak tikimir min itəm kəməsotolkeikeən mæmə ekuwa kig rəhalat, onəkotit ilat motuwa, kæn onəkotohamnu ilat e niġanəmtək.”

Iesu tæmuwin Jerusalem

(Mat 21:1-11; Mak 11:1-11; Jon 12:12-19)

28Kæn nian Iesu tæməghat rækis un, kæn in tæmaliwæk maupæn matuwin Jerusalem, kæn netəmim koatuarisig in.

29Nian kinotuwa iuəhkir o latuənu mil u kəiu, Petfas ne Petani e Nitot Rəha Niġ U Olif, kæn in tæmæn-ipæn kæm rəhan mil etəmim kəiu mæmə,

30“Ian əpəh latuənu itəm kotisi-pæn ikin. Ikin əh, onakuehm nəti togki kit itəm kəsasuəən əh lan. Iakis nol lan muasig muea ikin-u.

31Kæn okəmə suah kit tətəpəh otəmlau mæmə, ‘?Nakətiakis togki o naka?’ kæn onəkuən-ipæn kæm in mæmə, ‘Iærəmərə rəhatat, in tolkeike mæmə otol nat kit lan.”

32Kæn kəmian muehm natimnat rafin tol əm mæmə inu Iesu tæmæn mihin ne.

33Kæn nian kəmətiakis nəti togki, kæn netəmim min rəha togki kəmotətəpəh olau mæmə, “!Ei! ?Nətiakis nəti togki o naka?”

34Kæn ilau kəmuən-ipæn mæmə, “Kəp. Iærəmərə tolkeike mæmə otol nat kit lan.”

35Kæn kəmuasig muea kæm Iesu, kæn kəmuapeg rəhalau kot muəfətain məntaa nəti togki lan, kæn muasitu e Iesu tər masuə e nəti togki.

³⁶Nian tēmasuə lan minatuwin, kən rəhan netəmim kotapeg rəhalat min kot motəpen-pən e suatip.

³⁷Nian Iesu tīnatuwa iuəhkir o Jerusalem mətasuə e togki mateiuaiu e Nītot Rəha Nīg U Olif, kən netəmim rafin rəhan nikilat tətāgien, kən minətuoun moatənwiwi Uhgīn motagət əfəməh o nat pīspīs min itəm kəmoatehm in təmatol.

³⁸Kən koatən məmə, “!Iərəmərə Uhgīn tətātīg ilau Kīg u itəm tatuwa e nərgīn! !Pəs nəməlinuən tətātīg əpəh e nego e neai, kən əpəh ilīs ilīs agīn e nego e neai, katiləs-ipər nərgī Iərəmərə Uhgīn!”

³⁹Kən Farisi min neen itəm kəmotātīg əh-ikīn kəmotən-ipən kəm in məmə, “!əgətun. Ən-iəhau rəham min netəmim məmə okotakəm nohlilat.”

⁴⁰Məto in təmən-ipən kəm ilat məmə, “Okəmə netəm min u kəsotagətən, kən kəpiel min u, ilat okotagət əfəməh.”

Iesu tēmasək o netəm Jerusalem

⁴¹Kən nian Iesu təmuwa iuəhkir tēmehm taon əh Jerusalem, kən tēmasək o netəm min əh-ikīn əh.

⁴²Kən tatən məmə, “Ei, nat əpnapīn nəmotapəs natimnat itəm tatos-ipa nəməlinuən mətoarus-pa u-roiu, məto okəmə nəkotitun ilat roiu əm, kən Uhgīn otos-ipīnə kəm itəmat. Məto kəp. Natimnat min əh koatəhluaiɡ okol nəkəsotehmən.

⁴³Məto e nian min itəm tatuwa otəmat, rəhatəmat tikimīr min okotuwa kətul kitəlau-in itəmat, okotel niməptən kətu-pər kol əpətīn rəhatəmat taon, kən motahtosīg-in itəmat lan məmə nəkəsotietən.

⁴⁴Kən ilat okotərəkīn rafin nimə e taon rəhatəmat, kən okotohamnu itəmat rafin təlmin nisualkələh min rəhatəmat. Okol kəpiel kit ne rəha nimə min osətətulən. Natimnat rafin u otatuwa məto-inu itəmat nəmotəruru nian itəm Uhgīn təmuwa məmə in otosmegəh itəmat lan.”

Iesu tēməhg-iarəp netəmim itəm koatol maket e Nimə Rəha Uhgīn

(Mat 21:12-17; Mak 11:15-19; Jon 2:13-22)

⁴⁵Kən Iesu təmuwin minatəhg-iarəp netənim itəm koatol maket e Nimə Rəha Uhgīn.

⁴⁶Kən in təmən-ipən kəm ilat məmə, “Kəməte rəkis e Naoa Rəha Uhgīn məmə, ‘Rəhak nimə, in nimə rəha nəfakən kəm io,’ mətə itəmat ninoatol tinuwa in ‘nimə kit itəm iakləh mīn koatəhluaig ikin.’”

⁴⁷Kən uarisig lan, e nian mīn rafin, Iesu təmatəgətun əpəh imə e Nimə Rəha Uhgīn. Kən pris asol mīn, ne iəgətun mīn rəha Lou, ne netəm-iasol mīn rəha noanol mīn rəha Isrel, kəmotegəs-in suatip məmə okotohamnu Iesu,

⁴⁸mətə kəməsotehmən suatip kit mətə-inu netənim rafin kotolkeike pik məmə okoatəto nəghatən mīn rəhan, kən nəghatən rəhan tətəskəlīm wir rəhalat nətəligən.

Luk 20

Nətapəhən məmə pah təmegəhan-in Iesu məmə otol wək

(Mat 21:23-27; Mak 11:27-33)

¹Nian kit, Iesu təmatəgətun netənim əpəh e Nimə Rəha Uhgīn, kən matən-iarəp namnusən təwir rəha Uhgīn kəm netənim. Kən pris asol mīn, ne iəgətun mīn rəha Lou, ne netəm-iasol mīn rəha noanol rəha Isrel kəmotuwa kehm in,

²kən kəmotətapəh rən məmə, “?Ən-tu kəm itimat məmə pah təmegəhan-in ik nakatol natimnat mīn əh? ?Kən pah təmegəhan-in nepətən əh, Uhgīn o etənim əm?”

³Kən Iesu təmən-ipən kəm ilat məmə, “Təwir əm. Io ekətapəh-in mīn nəghatən kit kəm itəmat, kən itəmat onəkotaupən motuhalpīn-pa kəm io.

⁴?Pah təmegəhan-in nepətən kəm Jon məmə in otol baptais e netənim, Uhgīn o etənim əm?”

⁵Kən kīnoatən-ən nəghatən u kəm ilat mīn, mīnoatən məmə, “Okəmə kotən məmə Uhgīn təmegəhan-in, kən in otən məmə, ‘?Mətə tahro nəkəsotənən nīpahrien e Jon?’

⁶Məto okəmə kitat kotən məmə netəmim əm kəmotegəhan-in, kən netəm min əh okotaht kitat e kəpiel məto-inu ilat kınotən rəkis nıpahrienən e Jon məmə in ien kit rəha Uhgın.”

⁷Kən ilat kəmotuhalpın məmə, “İtimat esotıtunən məmə pah təmegəhan-in.”

⁸Kən İesu təmən-ıpən kəm ilat məmə, “Kən io min, ko esənən məmə pah təmegəhan-in nepətən kəm io məmə ekatol natımnat min u.”

Nımaa nəghatən rəha nasumən rəha krep

(Mat 21:33-46; 22:15-22; Mak 12:1-17)

⁹Kən İesu təmuəh nımaa nəghatən kit kəm netəmim məmə, “Etəm-iasol kit təməfe nol u krep e nasumən asol rəhan. Kən in təmələhəu-pən nasumən u e nelmi netəmim neen, kən ilat okotol wək lan, kən nıan rəha nəulək-inən, okotos-ıpən məsın kəm in. Kən təmuwın əpəh e nıməptən pısın kit matıg mınos nıan tepət.

¹⁰Kən nıan krep təmol noan kən kınotəmarəg, etəm-iasol in təməhl-ıpa rəhan kit iolwək məmə in otuwın mehm netəm koatol wək e rəhan nasumən məmə okotəhl noa krep, kən motor kos-ıpən rəha etəm-iasol neen. Məto netəm min əh kəmotətul motaht iolwək əh, kən motahl-ıpən tıtəlıg məsotəmki-pənən noa krep neen ne kəm in.

¹¹Kən etəm-iasol təməhl-ıpa min rəhan kit iolwək min. Kən ilat kotaht min, motol naulısən rat kəm in, kən motahl-ıpən tıtəlıg məsotəmki-pənən noa krep neen ne kəm in.

¹²Kən in tahl-ıpən min kit min, kən ilat kəmoatoh katoh kos-ıpən nıməgəm kəm in, kən motahl-ıarəp.

¹³“Kən etəm-iasol rəha nasumən təmə, ‘?Ekol naka əh-roiu? Təwir məmə ekahl-ıpən nətik ətuatıp itəm iakolkeike pik, okəm-naka ilat okotısıai-in.’ Kən in təməhl-ıpən.

¹⁴“Məto nıan netəm min əh kəmotehm, kəmotən kəm ilat min məmə, ‘Nəti etəm-iasol ilouın tatuwa itəm o nıan kit nasumən tuwa məmə rəhan. Pəs kotuwın motohamnu, kən kitat okotos nasumən rəhan məmə rəhatat.’

¹⁵Kən kəmotaskəlīm motewkəkan motuwīn əpəh ihluə e nasumən, kən motoh kohamnu. “?Kən iəramərə otol naka kəm netəm mīn əh?”

¹⁶In otuwa moh netəm mīn əh kotīmīs, kən in otələhəu-pən nasumən asol əh otuwīn e nelmi netəm pīsīn.” Kən nīan netəm kəmoatətəlig-in in kəmotəto nəghatən əh, kəmotən məmə, “!Pəs okol kəsol agīn-əhən nat əh!”

¹⁷Məto Iesu təmasipən ətuatip əm olat, kən mən məmə, “Naoa Rəha Uhgīn tatən məmə, ‘Kəpiel əh itəm netəm rəha niləkinən nīmə kəmotərakin, in təmuwa kəpiel keike rəha nolən nīmə.’ “?Məto nəghatən u nīpətīn naka?”

¹⁸Netəmim rafīn itəm okotiet motorin-pən ilat e kəpiel əh, kən okotorapitpīt ilat motol nīmīsmīsīn. Məto okəmə kəpiel əh otiet maht suah kit, kən in otawtəwītə mərəat agīn.”

¹⁹Kən iəgətun mīn rəha Lou, ne pris asol mīn kəmotitun məmə nīmāa nəghatən rəhan tatən ilat, kən tol nəhlan, kəmoategəs-in suatip məmə okotaskəlīm uəhai əm, kīləs-ipən e kalapus, məto kīnoatəgīn netəmim, kən motapəs.

?Tətuatip məmə netəmim okotətou takīs kəm Sīsā, o kəp?

(Mat 22:15-22; Mak 12:13-17)

²⁰Kən iəgətun mīn rəha Lou, ne pris asol mīn koatalkəlīk wīr o Iesu, moatolkeike məmə okotətu-pən nīpəgnəmtīn mīn neen e nəghatən kit rəhan məmə okotīləs-ipən in e nelmi etəm Rom, kapman rəhalat. Kən kəmotahl-ipən netəmim neen məmə ilat okotuwīn motol kəut kəsua kəm Iesu.

²¹Kən kəut kəsua mīn kəmotuwīn motətəpəh o Iesu məmə, “Iəgətun. Itīmat ekotitun natīmnat mīn itəm nakatən ne natīmnat itəm nakəgətun netəmim lan, kotətuatip wīr. Ik onakəsolən nolən pīsīn kəm suah kit, kən matīg mol pīsīn mīn kəm suah kit. Məto onəkol tahmen ahmen əm kəm ilat rafīn. Kən ik nakatəghat-in əm nīpahriənən matəgətun netəmim e suatip rəha Uhgīn.

²²?Ən-tu kəm itīmat məmə, tətuatip e Lou rəhatat məmə okotətou takīs kəm Sīsā u in kapman rəha Rom, o kəp?”

²³Mæto Iesu tæmitun æm mæmæ koatol kæut kæsua kəm in, kæn in tæmæn-ipæn kəm ilat mæmæ,

²⁴“Otægætun-tu mæni kit kəm io. ?Narmi pah u tətatig e mæni u? ?Kæn nærgi pah u tətatig e mæni u?” Kæn kæmotæn mæmæ, “Narmi Sisa, ne nærgi Sisa.”

²⁵Kæn in tæmæn-ipæn kəm ilat mæmæ, “Inæh natimnat ræha Sisa, os-ipæn kəm Sisa. Kæn natimnat ræha Uhgîn, os-ipæn kəm Uhgîn.”

²⁶Kæn e niganæmti netæmim rafin, næghatæn min itəm koatətapəh-in, okol kəsotiləs-iəhauæn Iesu lan. Mæto narmilat tæmiwig pik o næghatæn itəm Iesu tæmuhalpin, kæn kæmæsotəghatæn.

?Tahro o etəm otimis kæn mæmegəh min?

(Mat 22:23-33; Mak 12:18-27)

²⁷Kæn Satusi min neen kæmotuwa o Iesu. Ilat koatæn mæmæ netəm kæmotimis, okol kəsotəmegəh minæn.

²⁸Kæn kæmotətapəh-in næghatæn kit kəm Iesu mæmæ, “Iægætun. Moses tæmæte-pæn e Lou rəhatat mæmæ okəmæ suah kit otimis, kæn rəhan pətaguihl tətatig mæto kæmæsialəsæn nətīlau kit, kæn inəh pian kit otəkæike mit nəutahlimis un. E nolæn əh, ilau okuemək, kæn nisualkələh min okotaskəlim nærig min rəha etəm tikə.

²⁹“Tol nəhlan, pian ilat sepîn. Kæn itəm tepət elat təmaupæn mit pətan kit, kæn uarisig timis, mæto kæsialəsæn nətīlau kit.

³⁰Pian itəm taturisig in, tæmit min nəutahlimis un, mæto in min tæmimis, kæn kæsialəsæn nətīlau kit.

³¹Kæn uarisig lan, pialat kit min tit min nəutahlimis un, mæto tæmimis min. Kæn pian min əh ilat rafin sepîn kæmotit pətan un, mæto kəsotiləsæn nətīlat kit, kæn kæmotimis rafin.

³²Kæn uarisig lan, nəutahlimis tæmimis min.

³³Inəh netəm sepîn, ilat pialat min kæmotit pətan əh. ?Mæto e Namnun Nian, nian netæmim okotəmegəh min e nīmīsən, pətan əh in rəha pah lan?”

³⁴Kən Iesu təmən-ipən kəm ilat məmә, “E nətueintən u, nəman ne nīpitan koatol marit.

³⁵Məto e nian rəha natigən wi, netəmim itəm Uhgın nıkin tətāgien olat məmә ilat okotəmegəh min e nimisən kən mos ilat muwin kotatig e natigən wi, ko ilat kəsotol minən marit.

³⁶Ilat okol kəsotimis minən məto-inu ilat okotahmen əm e nagelo min. Kən ilat nenəti Uhgın məto-inu in təmol ilat kotəmegəh min e nimisən.

³⁷Kən kotitun məmә inu otuwa mol nīpahrienən lan məto-inu, naoa rəha Moses tatəgətun min məmә nian netəmim okotimis, ilat okotəmegəh min. E namsu rəha nīg itəm nīgəm təmatuəpən lan, Moses tətəun-in İəramərə Uhgın məmә in ‘Uhgın rəha Epraham, Uhgın rəha Aisak, ne Uhgın rəha Jekop,’ nat əpnapın iləhal kəməhalimis rəkis nuwəh məsin.

³⁸Uhgın u, in Uhgın rəha netəm koatəmegəh, məto sənəmә in Uhgın rəha netəm kəmotimis, məto-inu in tatehm netəmim rafin məmә ilat koatəmegəh, nat əpnapın okəmә kəmotimis rəkis o koatəmegəh əh.”

³⁹Kən iəgətun min rəha Lou neen kəmotən-ipən kəm Iesu məmә, “İəgətun, nəmuhalpın wir pahrien.”

⁴⁰Kən kəmotəgin o nətapəh-inən nəghatən kit min tol min-nəhlan.

Kig Tefit ne Kristo itəm Uhgın təmən məmә otahl-ipa

(Mat 22:41-46; Mak 12:35-37)

⁴¹Kən Iesu təmən-ipən kəm ilat məmә, “?Tahro netəmim koatən məmә Kristo itəm Uhgın təmən məmә otahl-ipa, in mipi Kig Tefit rat?

⁴²Məto-inu e Naoa Rəha Napuən Min, Kig Tefit atip əm təmən məmә, ‘İəramərə Uhgın təmən kəm rəhak İəramərə Kristo məmә, “Əpələh e nıkalik matip, ikın rəha nəsanənən ne nisaiiən,

⁴³mətoarus-pa io ekos-iəhau rəham tikimir min, mol ilat kotahmen e niməhan kit itəm nateguafəl nelkəm lan.”

⁴⁴Kig Tefit atip təmən məmә Mesaea in rəhan İəramərə. ?Kən okəmә mipi Tefit atip əm, kən tahro matol rəhan İəramərə?”

Iesu tēməghat-in iəgətun min rəha Lou

(Mat 23:1-36; Mak 12:38-40; Luk 11:37-54)

⁴⁵Nian netəmim kəmoatətəlig, Iesu təmən-ipən kəm rəhan min netəmim məmə,

⁴⁶“Itəmat onəkotəkəike moatəto wir itəmat kən məsotətəu-pənən nolən min rəha iəgətun min rəha Lou. Nīkilat tətəgien məmə okoatuwin-in napən əfəməh min rəha nausitən məmə netəmim okoatehm ilat ron. Kən nīkilat tətəgien nian netəmim koatos-ipər nelmilat e maket e nisaiiən kəm ilat. Kən əpəh imə e nimə rəha nuəfiminən, kotolkeike məmə okotəpələh aupən əpəh təwir ikin. Kən e nian rəha lafet, ilat koatolkeike məmə okotuwin kəpələh-pən aupən ikin rəha nisaiiən.

⁴⁷Kən ilat koatol tərət kən motakləh-in nimə min rəha nəutahlimis min. Kən ilat koatəfak əfəməh moateiuə əm məmə netəmim okoatəplan ilat ron. Nalpinən rəha netəm min u in otəskasik maprəkis.”

Luk 21

Nəutahlimis kit təmos-ipən rəhan mənī kəm Uhgīn

(Mak 12:41-44)

¹Kən Iesu təmatehm tatisilu wir netəm rəhalat nautə tepət itəm koataii-pən mənī e pokis rəha mənī əpəh e Nimə Rəha Uhgīn,

²kən in təmehm nəutahlimis kit ian-rat təmāii-pən mənī əkəku kəiu əm.

³Kən Iesu təmən məmə, “Nīpahrienən iatən kəm itəmat məmə, mənī itəm pətan u təmāii-pən, in taprəkis-in rəha netəmim rafin,

⁴məto-inu netəm rəhalat nautə tepət kəmotāii-pən mənī neen məto in nat əpnapīn əm olat, rəhalat tepət min əh-ikin. Məto nəutahlimis u itəm in ian-rat pahrien, in təmos-ipən rafin mənī rəhan o nos-nəmtinən nīgīn nagwənən, kən tikə min əh-ikin.”

Nəmtətīn min rəha Namnun Nian

(Mat 24:1-35,42-44; Mak 13:1-37)

⁵Kən rəhan min neen netəmim koatəghat-in Nimə Rəha Uhgīn itəm rəhan kəpiel asol min kotəwir, ne natimnat wir min əh imə itəm netəmim kəmotos-
ipən kəm Uhgīn. Kən Iesu təmən məmə,

⁶“Itəmat nakoatehm natimnat min əh, mətə nian otatuwa itəm netəmim okotohalkin-ohalkin kəpiel min rəha nimə əh, inəh kəpiel kit otəsətulən əh-
ikin tatətul ikin roiu.”

⁷Kən kəmotətapəh ron məmə, “Iəgətun. ?Natimnat min əh onəghan kotuwa?
?Kən nəmtətin naka otəgətun məmə otəsuwəhən natimnat min əh okotuwa?”

⁸Kən Iesu tatən məmə, “Onəkotəkəike moatəto wir itəmat məmə suah kit
otəseiū-inən itəmat, mətə-inu netəmim tepət okotuwa motən məmə, ‘!Io, io
Kristo u!’ kən neen okotən məmə, ‘Nian rəha natimnat əh tinatuwa iuəhkīr.’
Mətə əsotuarisig-inən ilat.

⁹Kən nian onəkotəto namnusən məmə netəmim koatəluagin, o netəmim
koatətul moatəmou ilat rəhalat kapman, mətə itəmat onəsotəginən. Natimnat
min əh okotaupən ka pitən, mətə sənəmə in Namnun Nian.”

¹⁰Kən Iesu təmən-ipən kəm ilat məmə, “Noanol min neen okotoh noanol pişin
neen min, kən kapman kit otoh kapman kit.

¹¹Kən namig asol min okotan, kən nəumis otan ikin min tepət e nətueintən,
kən nimisən əskasik min okotan e nətueintən, kən əpəh ilis e neai, natimnat
okotuwa motol niki netəmim otəgin, kən ilat okotəplan nəmtətin asol min e
neai.

¹²“Mətə nian natimnat min u okəsotuwamən əh, netəmim okotaskəlim itəmat,
kən motoh itəmat, kən motiləs itəmat kan əpəh e nimə min rəha nuəfiminən,
ne əpəh e kalapus, kən onakoatətul e niganəmti kig min ne netəm-iasol min
rəha kapman mətə-inu itəmat nakoatos nərgək moatən nīpahrien lak.

¹³Inəh nian ətuatip məmə nakotən-iarəp namnusən təwir kəm ilat.

¹⁴Mətə əsotətəlig-in paupənən məmə nəghatən naka itəm onəkotən kəm ilat,

¹⁵məto-inu io ekos-ipinə nəghatən ətuatip kəm itəmat kən mos-ipinə nenatigən kəm itəmat, kən mol rəhatəmat nəghatən təsanən, kən rəhatəmat tikimir min okol kəsotuhəlpinən, kən okol kəsotənən məmə nakoateiuə.

¹⁶Kən rəhatəmat tata ne mama min, ne piatəmat min, ne rəhatəmat noanol min, ne iolitəmat min okotiləs-ipən itəmat e nelmi tikimir min. Kən okotohamnu itəmat neen.

¹⁷Netənim rafin okotetəhau itəmat o nərgək.

¹⁸Məto noanutəmat ne huə, kit otəsikəən.

¹⁹Nian onakoatətul əskasik motahətətə lak e nian iəkis min itəm okoatuwa e rəhatəmat nəmegəhən, kən onəkotos nəmegəhən lili lan.

²⁰“Məto nian onakehm mopael min okotuwa tepət motitəlau e taon u Jerusalem, kən itəmat onəkotəkəike motitun məmə otəsuwəhən kən kərəkin agin taon əh Jerusalem.

²¹Kən itəmat netəm nəkotatig Jutia, onəkotəkəike motaiu motagim motuwın motəhluaig əpəh nitot min. Kən itəmat netəm nəkotatig e taon əh, onəkotəkəike motiet. Kən itəmat netəm nəkotatig ikin min titəlau e taon əh, onəkəsotuwın minən əh imə e taon əh,

²²məto-inu nian əh, in nian rəha Uhgın otol nalpənən lan kəm netəm koatol nolən tərət, kən mol əp nəghatən itəm kəmətə-pən e naoa rəhan tuwa mol nipahriənən.

²³Awe, nahməən asol rəha mama min itəm nərpilat əh-ikin, ne itəm min u koatəpinahin nisualkələh, məto-inu nəratən asol otuwa e nətueintən, kən neməha ne nalpənən rəha Uhgın otuwın kəm netənim rafin rəha Isrel.

²⁴Kən okagimnu netənim e naip, kən nian rəhalat tikimir min kəmotol win elat, kən okotit ilat motuwın ikin pisin pisin min kən ilat okotuwa slef min rəhalat. Kən Iaihlua min okotaliwək kən katewig-ewig e Jerusalem motiləs-iəhau netənim ikin itəm koatatig əh, motərəməərə elat, kətoarus-pən nian rəhalat otol namnun.

²⁵“Kən nəmtətin neen okotuwa e mitgar, ne məwig, ne məhau min. Kən ikin-u e nətueintən, netəmim rafin okotəgin nərəkərikən rəha nitəhəi ne peau-peau asol min.

²⁶Netəmim okotəgin pik moatimiseah o nərətən asol min itəm koatuwa e nətueintən, məto-inu natimnat rəha neai itəm kotəskasik pik, məto Uhgın otəloal-əloal elat.

²⁷Kən e nian əh, okotehm Nəti Etəmim tateiuaiu e mal napuə kit e nəsanənən ne nepətən əhag-əhag asol rəhan.

²⁸Kən nian natimnat min u kinotətuoun moatuwa katol nīpahrienən lan, otətul motasipər e neai, məto-inu otəsuwəhən rəhatəmat Kristo otuwa mikis itəmat.”

²⁹Kən in təmuəh nimaa nəghatən kəm ilat məmə, “Nakotitun-tu nig u fik ne nig neen min.

³⁰Okəmə kotalpətəg minotapilpil min, kən nəkotitun məmə in nian rəha nasumən.

³¹E nolən kitəh əm, okəmə nakotehm natimnat min u koatol nəhlan, onəkotitun məmə otəsuwəhən, nərəmərəən rəha Uhgın tuwa.

³²“Nīpahrienən ekatən kəm itəmat məmə noanol rəha Isrel otəsikəən mətoarus-pən natimnat rafin əh okotol nīpahrienən.

³³Neai ne nətueintən okiakə, məto nəghatən min rəhak okol kəsotikəən.”

³⁴Kən Iesu tatən məmə, “Nəkotəkəike moatəto itəmat. Əsotərəkinən rəhatəmat nian min o nolən əmən lafet, motapis lan, kən moatətəlig-in pik natimnat rəha nətueintən u. Təsəwirən məmə nian rəhak otuwa mos kaut kəm itəmat tahmen-pən məmə noanikulu təmohasin itəmat,

³⁵məto-inu nian əh otuwa miləs netəmim rafin rəha nətueintən.

³⁶Məto nian rafin onəkotəkəike moatətul matip, kən motəkəike katəfak məmə nakotos nəsanənən tahmen məmə nəkoatətul əskasik əm e nian natimnat

rafin əh koatuwa, kən inəh niki Nəti Etəmim otagien otəmat nian onəkotətul e niganəmtin.”

³⁷Kən nian rafin Iesu tatəgətun netəmim əpəh e Nimə Rəha Uhgın, kən lapın mın in tiet muwin əpəh Nitot Rəha Nig U Olif mətapıl əh-ikin.

³⁸Kən nian mın rafin laulaugin agın, netəmim koatuwa məmə okotətəlig-in rəhan nəghatən əpəh e Nimə Rəha Uhgın.

Luk 22

Jutas təmol-salim-in Iesu

(Mat 26:1-5,14-16; Mak 14:1-2,10-11; Jon 11:45-53)

¹Kən nian rəha lafet rəha Pret U Is Tikə Lan tınatuwa iuəhkir, kən in tınətuoun e lafet rəha Nuhagego-inən.

²Kən pris asol mın ne iəgətun mın rəha Lou koateam-in anion suatıp məmə okotohamnu Iesu lan. Koateam-in anion suatıp məto-inu ilat koatəgin netəmim məmə, kətah nimanin netəmim okotəmou okəmə kotitun məmə kəmotohamnu Iesu.

³“Kən Setan təmos niki Jutas, u nərgin kit mın u Iskariot, in e netəm tuelef rəha Iesu.

⁴Kən in təmuwin matəghat kəm pris asol mın ne netəm-iasol mın rəha mopael rəha Nimə Rəha Uhgın, mateam-in suatıp məmə otegəhan-in Iesu tuwin e nelmilat.

⁵Kən nikilat təmagien, kən kəmotən-iəkis məmə okotos-ipən məni kit kəm in.

⁶Kən Jutas təmegəhan lan məmə in otol, kən mateam-in suatıp məmə otegəhan-in Iesu tuwin e nelmilat nian netəmim okotikə lan.

Etəmim kəiu rəha Iesu kəmioal əpen-əpenə o lafet rəha Nuhagego-inən

(Mat 26:17-29; Mak 14:12-25; Jon 13:21-30; 1 Kor 11:23-26)

⁷Kən nian rəha lafet rəha Pret U Is Tikə Lan tınuwa, kən e nian əh, netəmim okotəkəike motoh nəti sipsip rəha lafet rəha Nuhagego-inən.

⁸Kən Iesu tēmaun-in Pita ne Jon, kən mən-ipən kəm ilau mēmā, “Ian kən mioal əpen-əpenə nagwənən rəha lafet rəha Nuhagego-inən mēmā okotuwīn motagwən ikin.”

⁹Kən kəmuən-ipən kəm in mēmā, “?Nakolkeike mēmā itīmlau oekian hiə mioal əpen-əpenə e nagwənən ikin?”

¹⁰Kən tēmən-ipən kəm ilau mēmā, “Uətəlig wir-tu. Nian itēmlau onakuet-arəpən e taon, kən onakuehm suah kit tatəhun pətəl asol kəmətu-pən nəhau lan. Kən nəkiauarisig-in məhaluwīn e nimə kit itəm otuwīn ikin.

¹¹Kən nəkuən-ipən kəm etəm-iasol rəha nimə mēmā, ‘?Iəgətun tēmahl-ipa itīmlau mēmā ekuea muətapəh ron ik mēmā noan u in hiə itəm in ne rəhan mīn netəmim okotuwa motol nagwənən ikin rəha lafet rəha Nuhagego-inən?’

¹²Kən in otit itēmlau nakian əpəh e noan ilis ikin itəm kinəlin wir rəkis natimnat rafin rəha nagwənən əh-ikin. Kən nakioal əpen-əpenə nagwənən əh-ikin.”

¹³Kən kəmian muehm natimnat rafin tahmen əm mēmā inu Iesu tēmən mihin ne. Kən kəmioal əpen-əpenə e nagwənən ikin rəha lafet rəha Nuhagego-inən.

Namnun nagwənən rəha Iesu ne rəhan mīn

¹⁴Kən e nian rəha nagwənən, Iesu tēmuwīn məpələh e tepil ilat rəhan aposol mīn.

¹⁵Kən tēmən-ipən kəm ilat mēmā, “Otəsuwəhən, okol nahməən kəm io. Məto nikik tinolkeike pik mēmā okotaupən kun nagwənən rəha lafet rəha Nuhagego-inən.

¹⁶Iakolkeike pik mēmā kitat okotagwən min-nulan məto-inu, okol esagwən mīnən e nagwənən rəha Nuhagego-inən mətoarus nīpəti lafet u tuwa mol nīpahrienən lan e nərəmərəən rəha Uhgīn.”

¹⁷Kən Iesu tēmos kap wain mən tagkiu ron kəm Uhgīn, kən mən mēmā, “Otos itəmat rafin, kən motənim,

¹⁸məto-inu roiu iatən kəm itəmat məmə esənimən wain mətoarus-pən nian natimnat rafin kotatig ahgin nərəmərəən rəha Uhgīn.”

¹⁹Kən təmos pīret mən tagkiu ron kəm Uhgīn, kən məmkas mos-ipən kəm rəhan min netəmim, kən mən məmə, “Inu nipətik itəm iakatos-ipinə otəmat. Nian rafin onəkotəkəike motol nat u məmə nikitəmat tatəht io.”

²⁰Kən e nolən kitīəh əm, nian kəmotagwən rəkis, Iesu təmos kap wain kən təmən məmə, “Kap wain u in nitak itəm otaiu otəmat, kən tatəgətun nəniəkisən wi rəha nasituən rəha Uhgīn kəm netəmim.

²¹Məto onəkotətəlig wir-tu. Suah kit ukīn-u kotagwən kitat min e tepīl, kən in otəpanegəhan-in-pən io e nelmi rəhak min tikimir.

²²Io Nəti Etəmim oekəkəike mīmīs məmə inu Uhgīn təmən mihin ne. !Məto awe, nahməən asol tatuwin o etəm tategəhan-in-pən io e nelmi tikimir min!”

²³Kən kinoatətapəh-ətapəh olat min məmə, “?Kitat pah otol nat əh?”

²⁴Kən nat kit min, ilat kinoatol nīkilat min məmə pah u in ilis pīk taprəkis-in ilat.

²⁵Kən Iesu təmən-ipən kəm ilat məmə, “Kig min rəha nətueintən u koatərəmərə e netəmim e rəhalat nəsanənən, kən koataun-in atip ilat məmə ilat ‘Netəm rəha Nasituən.’

²⁶Məto itəmat onəkəsotolən min-nəhlan. Okəmə itəmat kit in ilis, in otīləs-iəhau in tahmen-pən e suakəku. Kən okəmə itəmat kit tatətul aupən, kən in otuwa iolwək əm kit.

²⁷?Pah u in ilis pīk, etəmim itəm tətəgwən e tepīl, o iolwək itəm tatos nagwənən matuwa? Nəkotitun məmə etəm tətəgwən e tepīl in ilis taprəkis. Məto io, etəm-iasol rəhatəmat, nian emətaliwək kitat min itəmat, emahmen-pən e iolwək əm kit.

²⁸“Itəmat u, nian rafin nəkotatig iuəhkir ron io e nian ekətatig e nian əskasik min.

²⁹Kən tahmen-pən əm məmə Tata rəhak tatiləs-ipər io məmə ekuwa kig, kən io min iatiləs-ipər itəmat məmə nakotuwa kig min,

³⁰məmə nakotuwa kəpələh kitat min io, kotagwən kələh e nian ekuwa mol kig lan. Kən e nian əh, itəmat min onəkotəpələh e jea min rəha kig, kən itəmat onəkotuwa motətul aupən e noanol min tuelef rəha Isrel moatakil ilat moatərəməərə elat.”

³¹Kən Iesu təmən-ipən kəm Saimon Pita məmə, “Kəsi. Saimon. Ətəlig-in-tu io. Setan tinətapəh rəkis o Uhgın məmə otegəhan-in məmə in otuwa mos-ipən-os-ipən kəm itəmat mol nərətən kəm itəmat məmə otəgətun rəhatəmat nahatətən in təskasik lak o kəp.

³²Məto enəfak rəkis ron ik məmə rəham nahatətən otəsətiteən. Kən nian nakatəuhlin rəham nətəligən tatitəlig-pa min, ik onakəkəike mol nətəligən rəha piam min okotəskasik.”

³³Məto Saimon Pita təmən-ipən kəm in məmə, “Iərəməərə. Iatətul matip məmə ekimnə kilau min ik e kalapus, kən mimis kilau min ik.”

³⁴Kən Iesu təmən-ipən kəm in məmə, “Pita, ekatən kəm ik məmə, o lapin huə, nian mənig otəsimmənən əh, kən ik onakən mau kisil məmə nəkəruru io.”

³⁵Kən Iesu təmən-ipən kəm ilat məmə, “Aupən, emətahl-iarəp itəmat, nəməsotosən mənə e paos, ne kətım, ne put. ?Tahro? ?Rəhatəmat natimnat təsahmenən, o kəp?” Kən ilat kəmotən məmə, “Kəp.”

³⁶Kən təmən-ipən kəm ilat məmə, “Məto roiu, okəmə suah kit tatos rəhan mənə e paos o kətım, otəkəike mos. Kən etəm təsosən naip rəha nəluaginən, pəs otol-salim-in rəhan kot mos-nəmti rəhan kit.

³⁷Iatən kəm itəmat məmə nəghatən u e Naoa Rəha Uhgın tatəghat-in io, kən in otəkəike mol nipahrienən. In tatən məmə, ‘Netəmim nikilat təht məmə in etəmim kit itəm tatərəkın Lou.’ Əwəh, nəghatən u tatol nipahrienən əh-roiu.”

³⁸Kən ilat kəmotən məmə, “Iərəməərə, əplan-tu. Naip rəha nəluaginən kəiu əpəh.” Kən in təmən kəm ilat məmə, “Ah, nahmen. Otapəs-ta.”

Iesu tēmuwin matēfak ēpēh e Nitot Rēha Nig U Olif

(Mat 26:36-46; Mak 14:32-42)

³⁹Kən Iesu tēmiet e taon muwin ēpēh e Nitot Rēha Nig U Olif tahmen-pən əm mēmə in tatol mihin e nian rafin, kən rēhan min netəmim koatətəu-pən.

⁴⁰Kən nian in tēmuwin mētoarus-pən əh-ikin əh, tēmən-ipən kəm ilat mēmə, “Onəkotəkəike moatēfak mēmə nat kit otəsos-ipən-os-ipənən kəm itəmat motol rəhatəmat nahatətəən otatite lak.”

⁴¹Kən in tēmaliwək mapəs ilat muwin mēsīn, kən mīsīn nulan matēfak matən mēmə,

⁴²“Tata, okēmə nīkim tagien, awi, os-irəkis nahməən min u itəm okəpanotuwa. Məto əsolən rəhak nətəligən, məto ol nat naka itəm ik əm nakolkeike.”

⁴³Kən nagelo kit tēmisi-pən e neai muwa mos-ipən nəsanənən kəm Iesu.

⁴⁴Kən məto-inu nīkin titahmə pīk, kən rēhan nətəligən tinatol wək pīk, kən tēməfak əskasik pīk, kən noəh tēmaiu lan məhl matəht nisip tahmen e nita.

⁴⁵Nian tēməfak rəkis, in tēmətul mītəlig-pən mēmə otehm rēhan min netəmim, kən tēməplan ilat kinotapil rəkis. Kinotəpou məto-inu nīkilat titahmə.

⁴⁶Kən tēmən-ipən kəm ilat mēmə, “?Tahro nakotapil? Otaiir motēfak mēmə nat kit otəsos-ipən-os-ipənən kəm itəmat motol rəhatəmat nahatətəən otatite lak.”

Tikimīr min rēha Iesu kəmotuwa kiləs

(Mat 26:47-56; Mak 14:43-50; Jon 18:2-11)

⁴⁷Nian Iesu tēmatəghat əh, nīmanin netəmim kəmotiet-arəpa ikin əh, kən suah əh Jutas, u in etəmim kit e netəm tuelef rēha Iesu, in tēmit ilat motuwa, kən tēmuwa iuəhkīr mēmə otatuilim e Iesu.

⁴⁸Məto Iesu tēmən-ipən kəm in mēmə, “?Jutas, io Nəti Etəmim, məto tahro nəmuwa mēmə onəkātuilim-pa lak kən e nolən əh megəhan-in-pən io e nelmi rəhak tikimīr min?”

⁴⁹Kən nian netəmim min rəha Iesu kinotehm natimnat min əh minotitun məmə naka əh okol, kəmotən-ipən kəm in məmə, “?İərəmərə, oekotahro? ?Ekotəte ilat e naip, o?”

⁵⁰Kən ilat kit təmoahin naip tətə-rəkis matəlgin matip rəha slef rəha pris asol agin.

⁵¹Məto Iesu təmə, “!Ei! !Nahmen, otapəs əm!” Kən in təmələhəu-pən nelmin e matəlgi suah u, kən mol-wir min.

⁵²Kən Iesu təməghat kəm pris asol min, ne netəm-iasol min rəha mopaël rəha Nimə Rəha Uhgın, ne etəm-iasol min rəha noanol rəha Isrel, u kəmotuwa məmə okotaskəlīm Iesu. In təmən məmə, “?Tahro, nəman? ?Nikitəmat təht məmə io emit netəmim muwin kotəluagin o kapman, o kəm-naka io iohamnu itəm kit, kən nakotəmik naip asol min rəha nəluaginən ne nəlnal min moatuwa məmə onəkotaskəlīm?

⁵³?Nian rafin etan əm kitat min itəmat e Nimə Rəha Uhgın, məto tahro nəotaskəlīmən io? Məto roiu əh, in nian ətuatip rəhatəmat, kən nəsanənən rəha napinəpən in tatərəmərə.”

Pita təmən məmə in təruru Iesu

(Mat 26:57-58,69-75; Mak 14:53-54,66-72; Jon 18:12-18,25-27)

⁵⁴Kən kəmotuwa motaskəlīm Iesu motiləs motuwın e latuənu rəha pris asol agin. Kən Pita tuarisig-in ilat məto təsuwinən iuəhkir olat.

⁵⁵Netəm min əh kəmotahl nigəm kit əpəh e iat rəha pris asol agin, kən motəpələh kitəlau e nigəm. Kən Pita tuwa matəpələh ilat min.

⁵⁶Kən pətan əkəku kit u slef rəha pris asol agin, təmuwa mehm Pita tatəpələh, kən nəhag-əhagən rəha nigəm tətasiəgəpın in, kən nigənəmti pətan əh təmətul lan, kən təmən-ipən kəm ilat məmə, “Suah u, in min ilau Iesu kəmatuan.”

⁵⁷Məto Pita təmən-ipən kəm pətan un məmə, “Esitunən suah un nakatən.”

⁵⁸Kən uarisig lan təsuwəhən, suah kit min tuwa mən-ipən kəm Pita məmə, “Ei, ik min, ik etəmim kit rəhan.” Məto Pita təmə, “Ei, sənəmə io etəmim rəhan.”

⁵⁹Uarisig lan, aua kit tinuwa minuwin rəkis, kən suah kit təməghat əskasik kəm ilat məmə, “!Nipahrienən məmə suah u təmatuarisig-in Iesu, məto-inu in etəm Kalili!”

⁶⁰Məto Pita təmə, “!Ei! !Esitun agin-əhən nəghatən u nakatən!” Kən nian Pita təmatəghat əh, kən mənig təmimnən.

⁶¹Kən Iərəmərə təməuhlin masipən ətuatip matehm Pita. Kən Pita, nikin təməht nəghatən rəha Iərəmərə itəm təmən lan məmə, “O lapin əm u, nian mənig otəsimmənən əh, ik onakən mau kisil məmə nəkəruru io.”

⁶²Kən Pita təmiet muwin ihluə, təmasək təmasək.

Netəmim kəmotəsan-əsan e Iesu

(Mat 26:67-68; Mak 14:65)

⁶³Kən e nian əh, netəmim itəm kəmotaskəlim Iesu kəmotəghat əsan lan, kən moatoh.

⁶⁴Kən kəmotəlis ətain niganəmtin kən motoh, moatən-ipən məmə, “!Ei, ien! ?Ən-tu məmə pah tatoh ik?”

⁶⁵Kən kəmoatən nəghatən rat tepət moatərəkən in lan.

Kəmiuw-iarəp Iesu e kaonsel

(Mat 26:59-66; Mak 14:55-64; Jon 18:19-24)

⁶⁶Kən laulaugin agin, netəm-iasol rəha noanol rəha Isrel, ne pris asol min, ne iəgəton min rəha Lou kəmotuwa kuəfimən e kaonsel rəhalat, kən netəmim kəmotiləs Iesu motuwa tətul e niganəmti kaonsel əh. Kən netəm rəha kaonsel kəmotətapəh ron məmə,

⁶⁷“Okəmə ik Kristo itəm Uhgən təmən məmə otahl-ipa, ən kəm itimat.” Məto Iesu təmən-ipən kəm ilat məmə, “Okəmə ekən kəm itəmat, kən nəsotənən nipahrienən lak.

⁶⁸Kən okəmə ekətapəh otəmat, kən okol nəkəsotuhəlpinən.

⁶⁹Məto tətououn roiu, io Nəti Etənim, io oekuwin məpələh əh-ikin rəha nəsanənən ne nisaiiən, inəh e nīkali Uhgīn matip, Uhgīn u itəm rəhan nəsanənən iahgin.”

⁷⁰Kən ilat rafin kəmotətapəh ron məmə, “?Tahro? ?Ik Nəti Uhgīn?” Kən Iesu təmən-ipən məmə, “Nakoatən məmə io u inu.”

⁷¹Kən kotən məmə, “?Tahro kitat koateam-in nəghatən kit mīn məmə otasitu e rəhatat nəghatən? Kīnotəto ətuatip nəghatən əh e nohlin.”

Luk 23

Iesu tēmətul e nīganəmti Pailat

(Mat 27:1-2,11-14; Mak 15:1-5; Jon 18:28-38)

¹Kən netənim rafin rəha kaonsel kəmotətul motit Iesu motuwin kəm Pailat.

²Kən moatən-iarəp nīpəgnəmtin mīn itəm otoh Iesu məmə, “Emotehm məmə suah u tatit rəhatat netənim mīn, kən mol ilat kotalməl, kən matəuhlin rəhalat nətəligən koatol tīkimir ilat kapman rəha Rom, mətəhtosig-in itimat məmə esotətouən takis kəm Sisa itəm tatərəmərə e nīməptən u. Kən in matən-iarəp məmə in Kristo itəm Uhgīn təmahl-ipa məmə in kig kit.”

³Kən Pailat təmətapəh ron məmə, “?Tahro? ?Ik kig rəha netəm Isrel?” Məto Iesu tən-ipən kəm in məmə, “Ik nəmən mihin.”

⁴Kən Pailat təmən-ipən kəm pris asol mīn ne netənim rafin məmə, “Esehmən nīpəgnəmtin kit ne, itəm tatən məmə suah u təmərəkin lou.”

⁵Məto ilat kotagət əfəməh moatən məmə, “Kəp. Məto suah u tətən əpnapin matəgətun netənim rafin ikin mīn əh Jutia təmətuoun əpəh Kalili muwa mətəarus-pa ukin-u, kən mol nətəligən rəha netənim koatəluə motalməl.”

⁶Kən nian Pailat təməto nəghatən əh, təmətapəh məmə, “?Tahro? ?Suah u in etəm Kalili?”

⁷Kən nian təməto məmə Iesu tēmiet ikin əh itəm Herot Antipas tatərəmərə ikin, in təmahl-ipən Iesu məmə otuwin mehm Herot, məto-inu e nian əh, Herot mīn in tətətig Jerusalem.

Iesu tēmətul e nīganəmti Herot Antipas

⁸Kən nian Herot Antipas tēmehm Iesu, nikin tēmagien pik, mēto-inu nuwəh mēsīn in tēmolkeike mēmə otehm. Herot tēmatəto əm namnusən rəhan, kən in tēmolkeike pik mēmə in otehm Iesu otol nat pīspīs kit.

⁹Kən o natimnat min u, Herot Antipas tēmətapəh-in nəghatən min tepət kəm Iesu, mēto Iesu tēməpnarīn əm mēsuhalpīnən rəhan nəghatən.

¹⁰Kən pris asol min ne iəgətun min rəha Lou kəmotətul motəghat əskasik e nīpəgnəmtīn min rəhalat moatoh Iesu lan.

¹¹Kən uarisig lan, Herot Antipas ne rəhan min mopael kotagət ausit e Iesu, kən moatəsan lan. Kən Herot tēmən-ipən kəm rəhan mopael min mēmə okotuwīn-in-pən kot wīr kit rəha kīg kəm in, kən motit motuwīn min kəm Pailat.

¹²Aupən ikin, Herot Antipas ne Pailat kəmətioal tīkimīr kəm ilau min, mēto e nian əh, ilau kəmuea minioalkeike ilau min.

Pailat tēmən mēmə Iesu otəkəike mīmīs

(Mat 27:15-26; Mak 15:6-15; Jon 18:39–19:16)

¹³Kən Pailat tēmaun-in pris asol min, ne netəm-iasol rəha netəm Isrel, ne netəmim rafin, kən ilat rafin kəmotuwa kitīəh.

¹⁴Kən in tēmən-ipən kəm ilat mēmə, “Suah u, nəmotīlēs motuwa tətul e nīganəmtək, kən nəmotən mēmə tatəuhlin nətəlīgən rəha netəmim rəhatəmat koatol tīkimīr kəm kapman. Mēto emakil rəkīs nətəlīgən u e nīganəmtitəmat, kən məsehmən mēmə tēmətghl lou kit, kən nīpəgnəmtīn min itəm nakoatən lan təsolən nīpahrienən.

¹⁵Kən Herot Antipas min, in tēmakil mehm mēmə nolən rat kit təsəkul-pənən lan. Tol nəhlan, in tahl-ipa tuwa min o kitat, kən tēpīə əm mēmə suah u in tēməsolən nat kit itəm tərət mēmə in otīmīs ron.

¹⁶⁻¹⁷Kən o nat əh inəh, rəhak min mopael okotalis əm, kən uarisig kotahl-iarəp tatuwīn.”

¹⁸Mēto ilat rafin kəmotagət əfəməh moatən mēmə, “!Otilēs-iarəp suah un kən kohamnu! !Mēto ahl-iarəp Parapas tuwa mehm itimat!”

¹⁹(Suah u Parapas, kəmiləs-ipən e kalapus məto-inu in təmol netəmim kotəluagin o kapman e taon əh, kən in iohamnu itəm.)

²⁰Məto Pailat in tolkeike məmə otahl-iarəp Iesu tatuwin, kən in təməghat min kəm ilat.

²¹Məto ilat kəmotagət əfəməh pik məmə, “!Ətu-pər in e nig kəluau! !Ətu-pər in e nig kəluau!”

²²Məto Pailat təməghat min kəm ilat minətau kisil lan əh-roiu məmə, “?Tahro? ?Suah u in təmol nat tərət naka? Io esəhmən məmə in təmol nat kit itəm tətuatip məmə in otimis ron. Məto rəhak mopael min, ilat okotalis əm, kən uarisig lan kotahl-iarəp tatuwin.”

²³Məto ilat koatəkəike motəghat əskasik, kən motagət əfəməh e Pailat məmə otətə-pər Iesu e nig kəluau. Kən motagət pik moatuwin moatuwin, kinol win e nətəligən rəha Pailat.

²⁴Kən Pailat təkəkil Iesu məmə otəkəike mimis tahmen-pən məmə inəh ilat kəmotən mihin ne.

²⁵Kən in təmol nətəligən rəhalat, kən təmahl-iarəp Parapas u aupən in təmətətig e kalapus o nəluaginən o kapman ne nohamnuən itəm. Məto təmegəhan-in Iesu tuwin e nelmi rəhan mopael min məmə ilat okotos motuwin kitəp nətəligən rəha nimanin netəmim.

Kəmit Iesu kan məmə otimis

(Mat 27:32-44; Mak 15:21-32; Jon 19:17-27)

²⁶Kən nian mopael min kəmotit Iesu motiet e taon, kən kəmotəplan etəm Saerin kit, nərgin u Saimon. In təmisi-pən isəu maliwək matuwa e taon. Kən kəmotaskəlim motələhəu-pər nig kəluau rəha Iesu e nuwegin məmə otiləs, kən motən-ipən məmə otətə-pən Iesu.

²⁷Kən nimanin netəmim tepət kəmotaliwək katuarisig-in Iesu e suatip, kən nipitan tepət min koatuarisig-in ilat, koatasək moatəun-əun o Iesu.

²⁸Məto Iesu tēməuhlin masipən məplan ilat, kən mən-ipən kəm ilat məmə, “Nipitan Jerusalem. Əsotasəkən ron io, məto otasək atip otəmat, ne nenətitəmat min.

²⁹Otətəlig-in-tu io. Nian tatuwa itəm okəpanən məmə, ‘!Otagien itəmat netəm nəsotheməkən o nəsoəpinahinən suakəku!’

³⁰E nian əh, netəmim okotən-ipən kəm nitot asol min məmə, ‘Awi, otisas-pa etimat,’ kən okotən-ipən kəm narit min məmə, ‘Awi, otəfətain itimat.’

³¹?Məto okəmə nigəm tatuəp nəhlan nian nig nimalin tətamiəmitə əh, kən tahro e nian nig tinəmətu?”

Mopael min kəmotətu-pər Iesu e nig kəməluau

³²Kən mopael min kəmotiləs suah mil kəiu itəm kəmuətəghl lou kan məmə okotohamnu iləhal Iesu.

³³Kən kəmotuwa ikin kit, nərgin u Louipil-uipil. Ikin əh, kəmotətu-pər Iesu e nig kəməluau. Kən kəmotətu-pər iətəghl lou mil əh-ikin, kit e nikali Iesu matip, kən kit e nikalin mol.

³⁴Kən Iesu təmə, “Tata. Aluin rəhalat nolən rat min itəm koatol kəm io, kən məsalpinən, məto-inu kəsotitunən nat naka itəm koatol.” Kən kəmotoor rəhan natimnat moaturin taes ron.

³⁵Kən netəm min u koatətul əh-ikin, moatehm natimnat min u, məto etəm-iasol min rəha noanol rəha Isrel kotalah əsan e Iesu moatən məmə, “!In təmosmegəh netəmim tepət rəkis. Məto okəmə in Kristo itəm Uhgın təmən məmə otahl-ipa, kən in Etəm Uhgın Təmitəpun, kən pəs in otosmegəh atip in!”

³⁶Kən mopael min, ilat min koatəghat əsan e Iesu, kən motuwa iuəhkır ron moatətapəh məmə in tolkeike wain u itəm tagin,

³⁷moatən məmə, “!Okəmə nipahrienən ik kig rəha noanol min rəha Isrel, osmegəh atip ik əh-roiu!”

³⁸Kən nəghatən kit əh-ikin kəməte kətu-pər e rəhn-kapə nig kəluau, tatən məmə, Inu kig rəha netəm Isrel.

³⁹Kən iətgəhl lou mil kit itəm katəkul-pər e nig kəluau, in tatəghat rat e Iesu, matən məmə, “!Ei! ?Ik Kristo itəm Uhgın təmən məmə otahl-ipa, o kəp? !Okəmə tol mihin, osmegəh ik kən mosmegəh min itimlau!”

⁴⁰Məto iətgəhl lou əh kit min təmən-ipən kəm in kit, kən mahtosig-in məmə, “?Tahro? ?Nəsəginən Uhgın, nat əpnarın onakimis? Nalpinən u rəhatəhal in tahmen-ahmen əm.

⁴¹Məto təmətuatip əm məmə kilau okiamis o rəhalau nolən rat min itəm kəmioal. Məto suah u, in təsələn nat tərət kit ne.”

⁴²Kən təmən-ipən kəm Iesu məmə, “Iesu, o nian onəkuwa matol kig lan, kən nikim otatəht io.”

⁴³Kən Iesu təmən-ipən kəm in məmə, “Nipahrienən iatən kəm ik, məmə roiu əm kilau min ik əpəh e nego e neai.”

Iesu təmimis

(Mat 27:45-56; Mak 15:33-41; Jon 19:28-30)

⁴⁴⁻⁴⁵Kən iuəhkir tuelef klok e nərauiəgən, mit nəsasieən, kən napinəpən tınan rafın ikin əh mətoarus-pən tri klok ehnaipən. Kən niməhan itəm tatəkulosig-in-pən İkin Tasim Agın İkin e Nimə Rəha Uhgın, təməhap məsin kəiu.

⁴⁶Kən Iesu təmagət əfəməh məmə, “!Tata. İatələhəu-pən nəmegəhən rəhak e nelməm!” Nian təmən rəkis nəghatən əh u, kən rəhan namegən tiet.

⁴⁷Kən nian etəm-iasol rəha mopael min rəha netəm Rom təmehm natimnat min əh, kən in təmənwiwi Uhgın matən məmə, “!Nipahrienən, suah u in tətuatip pahrien!”

⁴⁸Kən netəmim itəm kəmotuwa ikin əh məmə okotəplan, nian kəmotəplan natimnat min əh, kəmoatuwin moatəto tərət e nikilat, kən motahtaht manikiləhalat.

⁴⁹Kən ioli Iesu min, ne nipitan itəm kəmotisi-pən Kalili motətəu-pən Iesu motuwa, ilat kəmoatətul isəu məsin kən moatehm natimnat min əh.

Josep tæmitænim Iesu

(Mat 27:57-61; Mak 15:42-47; Jon 19:38-42)

50-51 Kæn etæm Aramatia kit æh-ikin, nærgin u Josep. Aramatia in taon kit ræha Isrel, kæn suah æh in etæmim kit ræha kaonsel ræha netæm Isrel. In etæm tæwir, ræhan næmegæhan tætuatip, kæn in etæmim kit tæmatæsaugin mæmæ otæplan næræmæraæn ræha Uhgin. Kæn in tæmæsegæhanæn e næghatæn ræha kaonsel itæm kæmoategæhan-in Iesu mæmæ okoh.

52 Kæn in tæmuwin mehm Pailat mætæpæh ron mæmæ otegæhan-in nipæti Iesu tos.

53 Kæn Josep tæmuwin mælæs-iæhau nipæti Iesu e nig kæmæluau, mos muwa malpin e nimæhan wir kit, nærgin u linen. Kæn tæmilæs muwin mælæhæu-pæn e nipæg kæpiel itæm kinæmæte rækis o nolæn suwit ikin, mæto kæsitænimæn æh suah kit ikin.

54 In æh e nian ræha noanol min ræha Isrel itæm koatol æpen-æpenæ lan o nian ræha Sapat, kæn iuæhkir Sapat tætuoun.

55 Kæn nipitan itæm kæmotisi-pæn Kalili kæmotuarisig-in Iesu, kæmotætæu-pæn suah un, motuwin motæplan nipæg kæpiel, kæn motæplan nolæn itæm in tatælæhæu-pæn min Iesu ikin.

56 Kæn uarisig, nipitan kæmotitælig-pæn latuænu, kæn kæmoatol æpen-æpenæ manat min neen ne fomat itæm næmiæwilat tæwir mæmæ okol-pæn e nipæti Iesu. Kæn e nian ræha Sapat, ilat kæmotameg moatætæu-pæn næghatæn ræha Lou.

Luk 24

Iesu tæmæmegæh min e nimisæn

(Mat 28:1-10; Mak 16:1-8; Jon 20:1-10)

1 Kæn e Sante laulaugin agin, nipitan kæmotuwin æpæh e suwit, motæmik nat pien-pien min u næmiæwilat tæwir itæm kæmotol æpen-æpenæ rækis lan.

2 Nian kæmotuwa e suwit, kæmotehm kæpiel itæm kætæhtosisig-in nipæg kæpiel lan, mæto kæmahwin rækis.

3 E nian kæmotuwin e nipæg kæpiel, mæto kæsotehmæn nipæti Iæramæra Iesu.

⁴Kən ilat kinotəruru əfəməh moatətəlig-in natimnat min əh. Kən əmun etəmim kəiu əh-ikin, katuətul ilat min nīpitan, kəmian e napən itəm tatipit-ipit.

⁵Kən nīpitan kəmotəgin pik, kəmotisin nulilat motasil-iəhau moatehm nīməptən, kən suah mil kuəmə, “?Tahro nakoategəs-in etəm tatəmegəh u ikin-u ima netəm kəmotimis?

⁶In tikə ukin-u. !In tinəmegəh min! Nīkitəmat otəkəike matəht nəghatən itəm təmən kəm itəmat nian in təmətətig əh əpəh Kalili məmə,

⁷‘Natimnat min u okotəkəike motuwa motol nīpahrienən lan. Okegəhan-in-pən Nəti Etəmim tuwin e nelmi iol təfagə rat min, kən okətu-pər e nig kəluau timis, məto e nian tatol kisil lan, kən in otəmegəh min.’”

⁸Kən nīkilat tinəht nəghatən rəha Iesu.

⁹Kən kəmotiet e suwit motuwin motən-ipən natimnat min əh kəm netəm lefen rəha Iesu, ne rəhan min rafin.

¹⁰Kən nīpitan min əh itəm kəmotən-iarəp natimnat min u kəm aposol min, inəh Meri Maktala, Joana, Meri mama rəha Jemes, ne nīpitan neen min itəm kəmotuwin e suwit.

¹¹Məto aposol min kəmotəto nəghatən əh tahmen-pən əm e nəghatən alməl kit itəm nīpətin tikə, kən məsotənən nīpahrienən lan.

¹²Məto Pita təmətul maiu muwin əpəh suwit ikin, moeg-oeg masipən e nīpəg kəpiel kən təmehm əm napən itəm kəmalpin nīpəti Iesu lan, məto nat kit min tikə əh-ikin. Kən in təmaliwək mītəlig minatuwin latuənu, kən matətəlig-in pik natimnat min əh.

E suatip tatuwin Emeas

(Mak 16:12-13)

¹³E nian əm əh inəh, suah mil kəiu rəha Iesu kəmualiwək mətian latuənu kit, nərgin u Emeas. Latuənu un mətoarus-pən Jerusalem, in iuəhkir o lepen kilometa.

¹⁴Kən e nian ilau kəmualiwək mətian, kən ilau kəmatuəghat-in natimnat min itəm kəmol ilat.

¹⁵Nian ilau kəmatuəghat nəhlan, kən Iesu təmuwa iuəhkir olau, məhlaliwək kələh mətəhaluwın.

¹⁶Məto kəməsiatunən məmə pah əh iləhal min kəmətəhlaliwək məto-inu Uhgın təmahtosig-in nətəligən rəhalau.

¹⁷Kən Iesu təmən-ipən kəm ilau məmə, “Təs mil. ?Naka un nakatuən?” Kən əmun kəmuelahl muətul, niganəmtilau təmərou.

¹⁸Kən suah mil əh kit, nərgin u Kleopas, təmən-ipən kəm in məmə, “Okəm-naka ik əm un iapispis kit u Jerusalem itəm nəsitunən natimnat min itəm kəmol ilat e nian min itəm kinotuwın rəkis.”

¹⁹Kən in təmən-ipən kəm ilau məmə, “?Natimnat naka min əh?” Kən kəmuən-ipən kəm in məmə, “Natimnat min itəm kəmol e etəm Nasaret əh Iesu. In ien kit rəha Uhgın, kən rəhan wək təsanən wir ne rəhan min nəghatən kotəfigəm, kən niki Uhgın ne niki netəmim tətəgien lan.

²⁰Məto rəhatimat pris asol min ne iəgətun min rəha Lou kəmotiləs-ipən e nelmi netəm Rom məmə okotakil məmə in otimis. Kən kəmotətu-pər e nig kəluau timis.

²¹“Məto itimat emotələhəu-pən pap rəhatimat nətəligən tətətig əskasik lan məmə in otiləs-irəkis itimat noanol min rəha Isrel e nelmi tikimir min rəhatimat. Kən roiu in nian tatol kisil lan.

²²Kən nat kit min, nipitan neen itəm emotan, kəmotol məmə narmitimat təmiwig o nəghatən kit. Roiu laulaugin agin-əh, kəmotuwın əpəh e suwit itəm kəmitənım Iesu ikin,

²³məto kəməsotehmən nipətin. Kən kəmotitəlig-pa moatən məmə, ‘Emotehm nat kit tahmen e napilairən, inəh nagelo mil kəiu katuən-ipa kəm itimat məmə Iesu tatəmegəh.’

²⁴Kən rəhatimat neen netəmim kəmotuwīn e suwit, kəmotehm natimnat rafīn agīn tətuatīp tahmen-pən əm e nəghatən əh nīpitan mīn əh kəmotən mihīn ne, mətō kəsotehmən Iesu.”

²⁵Kən in təmən-ipən kəm ilau məmə, “Təs mil. !Rəhatəmlau-kapə tikə, kən nakatiaiūw nīfagə matialəs pīk o nənən nīpahrienən o natimnat itəm ien mīn rəha Uhgīn kəmotən!

²⁶?Nəkiatun o kəp məmə, Kristo itəm Uhgīn təmən məmə otahl-ipa otəkəike mos nahmən e nīpətīn, kən uarisīg lan, in təpanuwīn əpəh e nego e neai mos nərgīn rəha nisīaiiən?”

²⁷Kən Iesu təmən-ipən wīr kəm ilau Naoa Rəha Uhgīn itəm koatəghat-in in, təmətuoun e naoa rəha Moses kən muwīn mətōarus-pən naoa mīn rəha ien mīn rəha Uhgīn.

²⁸Kən kīnətəhaluwa iuəhkir o latuənu itəm suah mil katian ikin. Kən kənuəplan məmə Iesu tīnətaliwək minatuwīn məsətulən,

²⁹mətō ilau kətīauəh nīkin məmə, “Ei, təwīr məmə nəkətātīg kitəhal mīn ik, mətō-inu tīnapīnəp rəkīs, otəsuwəhən roiu mīt taht.” Kən təmuwīn minehm ilau mətəhaləpələh.

³⁰Kən kīnatəhaləpələh məmə okəhlagwən, kən in təmos pīret mən tagkiu ron kəm Uhgīn, kən məmkas mos-ipən kəm ilau.

³¹Kən əmun Uhgīn təmōl kəniatun məmə in Iesu, kən əmun in təmīkə mīn, kən kənəsūplanən.

³²Kən kəmuən-ipən kəm ilau mīn məmə, “!Ei! ?Nian in təmatən-ipa wīr Naoa Rəha Uhgīn kəm kilau e suatīp, kən katuəto təwīr lan nīkilau tətāgīen pīk, o kəp?”

³³Kən roiu agīn-əh mīn, kəmuətul miaiet ikin əh miatəlig-pən mīn Jerusalem. Kən ikin əh, ilau kəmuehm netəm lepen rəha Iesu ne netəmim neen mīn rəhan kəmotuwa kuəfīmīn rəkīs ilat mīn katəpələh,

³⁴kən moatən məmə, “!Nīpahrienən! !Iərəmərə tēməmegəh mīn, kən Saimon Pita tēmehm rəkis!”

³⁵Kən ilau kəmuən-ipən rafin natimnat itəm kəmol kəm ilau e suatip, kən muən-ipən nian ilau kəmatiatun Iesu lan e nian itəm in tēmatəmkas pīret matos-ipən kəm ilau.

Netəmim rəha Iesu mīn kəmotehm

(Mat 28:16-20; Mak 16:14-18; Jon 20:19-23)

³⁶Kən nian katuən əh nəghatən mīn əh, Iesu təmuwa mətul ilugin-in ilat matən kəm ilat məmə, “Nəməlinuən tətatiḡ otəmat.”

³⁷Məto ilat kəmotaut lan kən mīnoatəḡin, nīkilat təht məmə kīnotəplan narmin kit.

³⁸Məto in təmən-ipən kəm ilat məmə, “?Tahro rəhatəmat nətəliḡən tatərat nəhlan? ?Tahro rəhatəmat nətəliḡən tatətul pagpag?”

³⁹Otehm-tu nelmək ne nelkək məmə io əm u. Otea-pa motek nīpətīk kən motitun məmə io. Narmi etəmim nīpətīn ne nīkīlkīlin tīkə, təsolən məmə inu nakoatehm io, nīpətīk ne nīkīlkīlik əh-ikīn.”

⁴⁰Təmən nəghatən əh, kən tēməḡətun nelmin ne nelkin kəm ilat.

⁴¹Ilat kəsotən wīrən nīpahrienən lan məto-inu nīkilat tətəḡien pīk, kən narmīlat tatiwīḡ. Kən in təmən-ipən kəm ilat məmə, “?Nagwənən kit un nakoatos, o?”

⁴²Kən kəmotos nəm məsīn itəm kəmwaan rəkis motos-ipən kəm in,

⁴³kən e nīḡanəmtīlat, təmos mun.

⁴⁴Kən Iesu təmən-ipən kəm ilat məmə, “Aupən ikīn, nian emətatiḡ əh kitat mīn itəmat, emən nəghatən u kəm itəmat məmə, natimnat rafin itəm koatəḡhat-in io e Naoa Rəha Uḡīn, okotəkəike motuwa motol nīpahrienən lan, inəh nəghatən mīn e naoa rəha Moses, ne naoa mīn rəha ien mīn rəha Uḡīn, ne Naoa Rəha Napuən Mīn.”

⁴⁵Kən in tamerəh e rəhalat nətəligən məmə okotitun nəghatən min itəm tətətig e Naoa Rəha Uhgīn.

⁴⁶Kən təmən-ipən kəm ilat məmə, “Nəghatən itəm tətətig e Naoa Rəha Uhgīn tatən məmə netəmim okotol tərət kəm Kristo itəm Uhgīn təmahl-ipa, motol tatəto nahməən e nīpətīn matuwīn matuwīn tīmīs, mətō e nian itəm tatol kīsil lan, in otəmegəh min e nīmīsən.

⁴⁷Kən e nərgī Kristo itəm Uhgīn təmahl-ipa, netəmim okotəkəike motən-iarəp nəghatən əh məmə netəmim okotəkəike motəuhlin kən motitəlig e rəhalat təfagə rat min, kən Uhgīn in otəsalpīnən nītai təfagə, kən maluin rəhalat nolən rat min. Nəghatən u otəkəike muwīn kəm noanol min rafīn əpəh ikīn min rafīn, otətuoun Jerusalem kən muwīn mətōahgīn-pən ikīn min rafīn e nətueintən.

⁴⁸Itəmat nəmotehm natīmnat min u, kən onəkotən-iarəp ətuatīp nəghatən min lan.

⁴⁹Kən ekahl-ipa suah u itəm rəhak Tata təmən-iəkīs məmə in otahl-ipa kəm itəmat, inu rəhan Narmin. Mətō onakoatəsahgīn e taon əh mətōahgīn-pən nakotos nəsənənən rəha Narmin Rəha Uhgīn, kən tərīoah e nəmegəhən rəhatəmat.”

Uhgīn təmīlēs Iesu muwīn e neai

(Mak 16:19-20)

⁵⁰Kən Iesu təmit ilat motiet e taon motuwīn əh latuənu Petani. Kən təmīlēs-īpər nelmin məfak olat.

⁵¹Kən nian təmatəfak olat, kən təmapəs ilat nian Uhgīn təmīlēs minatuwīn əpəh ilīs e nego e neai.

⁵²Kən kəmotēiuaiu motəfak-pən kəm in, kən uarisīg lan, kotitəlig-pən Jerusalem nīkilat tətāgīn.

⁵³Kən nian rafīn, koatuwīn e Nīmə Rəha Uhgīn moatənwiwi Uhgīn.

Jon

Jon 1

Nəghatən Rəha Uhgın Təmuwa Etəmim, in Iesu

¹Aupən agin, e nətuounən nian, Nəghatən tinatig rəkis. Nəghatən u təmətatiğ ilau Uhgın, kən Nəghatən u, in Uhgın.

²E nəukəti nian, in tinəmatig rəkis ilau Uhgın,

³kən Uhgın təmol natimnat rafin e Nəghatən u, kən natimnat rafin itəm Uhgın təmol, nat kitəh ne tikə məmə Nəghatən u təsolən.

⁴Inu, in Nəukəti Nəmegəhən, kən Nəmegəhən u, in Nəhag-əhagən rəha netəmim rafin.

⁵Nəhag-əhagən əh, tətasiəgəpın napinəpən, kən napinəpən okol təsaprəkis-inən.

⁶Etəmim kit itəm Uhgın təmahl-ipa tuwa, nərgin u, Jon.

⁷Təmətul-arəp məmə otamnus-iarəp Nəhag-əhagən əh kəm netəmim, pəs ilat rafin kotən nıpahrienən lan.

⁸Sənəmə Jon in Nəhag-əhagən əh, məto in təmuwa əm məmə otətul-arəp mən-iarəp Nəhag-əhagən əh kəm netəmim rafin.

⁹Nəghatən əh təmatuwa e nətueintən, kən in Nəhag-əhagən pahrien, itəm in tətasiəgəpın netəmim rafin.

¹⁰Nat əpnapın məmə Uhgın təmol nətueintən u e Nəghatən əh, kən təmətatiğ e nətueintən u, məto netəmim rəha nətueintən kotəruru in.

¹¹Təmuwa iman ikin, məto natiman min koatəuhlin məntaalat kəm in, məsotolkeikeən.

¹²Məto netəmim rafin itəm kəmos in nikilat tagien ron, kən motahatətə e nərgin, kən in təmegəhan-in ilat koatuwa nenəti Uhgın min.

¹³Nenəti Uhgın min əh, ilat kəsotaiirən e nolən itəm nisualkələh kotaiir mihin, kən sənəmə e nətəligən rəha etəmim, o rəha tata min, məto ilat kotaiir wi min e Uhgın, e rəhan nəsanənən əm.

¹⁴Nəghatən əh, in təmuwa etəmim, mətatig kitat min. Kən itimat emotəplan rəhan nepətən, kən nəsanənən asol ne nəhag-əhagən rəhan e niğanəmtitimat. Inu, in nəsanənən asol ne nəhag-əhagən rəha Noan Kitiəh Əm, itəm in təmisi-pən e Tata Uhgın. In tərıoah e nəwıwıwıw itəm tətawte-in kəm kitat, kən mərioah min e nıpahrienən.

¹⁵Jon tatətul-arəp matən əfəməh məmə, “Etəmim u inu itəm io ematən məmə, ‘Io etaupən, kən suah kit min əh-ikin tatarisig-in io, məto in ilis taprəkis-in io, məto-inun, nian eməsaiirən əh, in tinəmatig lilin rəkis.”

¹⁶Kən in tərıoah e nəwıwıwıw itəm in tətawte-in kəm kitat, kən e nəwıwıwıw əh rəhan, nian rafin in tatos-ıpa, matos-ıpa, matos-ıpa, kəm kitat rafin.

¹⁷Tol nəhlan məto-inu Lou itəm Uhgın təmos-ıpa aupən, Moses in suatıp ron, məto İesu Kristo in suatıp rəha nawte-inən nəwıwıwıw əh ne nıpahrienən rəha Uhgın kəm kitat.

¹⁸Suah kit təsehmən Uhgın nian kit ne. Məto Noan Kitiəh Əm, in Uhgın, itəm in iuəhkır o noanenau rəha Tata Uhgın, in təmol əp Uhgın kəm kitat kən kotıtun.

Jon təmən məmə sənəmə in Kristo itəm Uhgın təmən məmə otahl-ıpa

(Mat 3:11-12; Mak 1:7-8; Luk 3:15-17)

¹⁹Kən netəm-iasol min e noanol rəha İsrıl itəm kotatig Jerusalem, kəmotahl-ıpən pris min neen ne Lifaet min un, netəm kotasıtu e pris min e Nımə Rəha Uhgın, məmə okotuwa motehm Jon motətəpəh ron, məmə, “?Ik etəmim pah un?” Kən o nat u, Jon təmətul-arəp matən-ıarəp in.

²⁰Nian ilat kəmotətəpəh ron, in təməsəhluaig-inən, məto təmən-ıpən ətuatıp əm in kəm ilat məmə, “Sənəmə io Kristo itəm Uhgın təmən məmə otahl-ıpa.”

²¹Kən ilat kəmotən məmə, “?Okəmə sənəmə ik Kristo, kən ik pah? ?Ik Elaija?” Məto Jon təmə, “Kəpə, sənəmə io Elaija.” Kən ilat kəmotətəpəh min ron məmə, “?Okəmə sənəmə ik Elaija, kən ik pah? ?Ik ien rəha Uhgın itəm kəmatən aupən məmə otəpanuwa?” Məto Jon təmə, “Kəpə.”

²²Kən ilat kəmotən məmә, “Ik onəkəike mən-iarəp ik kəm itimat, pəs itimat ekotuwin motən-ipən kəm netəm kəmotahl-ipa itimat ekotuwa.”

²³Kən tən-ipən kəm ilat məmә, “Io u itəm ien rəha Uhgın Aesea tinəmən-iarəp rəkis aupən məmә, ‘Suah kit tətagət əfəmäh əpäh ikin taruən-aruən ikin, matən məmә, Otol-wir suatip rəha İərəmərə.’”

²⁴Nətənim itəm kəmahl-ipa ilat, Fərisi min neen əh-ikin,

²⁵kən ilat kəmotətapəh min o Jon məmә, “?Okəmә sənəmә ik Kristo itəm Uhgın təmən məmә otahl-ipa, kən sənəmә ik Elaija, kən sənəmә ik ien itəm kəmatən-iarəp aupən, kən təhrol nakatol baptais e netənim?”

²⁶Kən tuhalpın matən məmә, “Io iatol baptais e netənim e nəhau, mətö suah kit u ikin ilugın etəmat, itəm itəmat nəkotəruru in.

²⁷Io etaupən, suah un in tatuarisig, mətö in ilis, kən io ləhau ləhau əm, kən esahmen agın-əhən məmә ekol wək kit rəhan.”

²⁸Natimnat min u, kəmol əpäh e latuənu kit, nərgın u Petani, in tətətig əpäh entənipən e nəhau Jotan. İkin əh Jon tatol baptais e netənim ikin.

Iesu in tahmen e nəti sipsip rəha Uhgın

²⁹Kəmən lawıgin, Jon təməplan Iesu taliwək matuwa, kən in tən məmә, “!Ei! !Otəplan-tu! Suah u inu, in Nəti Sipsip rəha Uhgın. Kən in otəpanos-irəkis nolən rat min rəha nətueintən u.

³⁰Etənim u inu, io ematən kəm itəmat məmә, ‘Io etaupən, kən suah kit min əh-ikin tatuarisig-in io, mətö in ilis taprəkis-in io, mətö-inu nian eməsaiirən əh, in tinəmatig lilin rəkis.’

³¹Nian io ematəghat-in, kən io min eməruru məmә in etənim pah; mətö emuwa matol baptais e netənim e nəhau məmә ekol əp suah u kəm noanol min rəha İsrəl.”

³²⁻³³Jon təmatətul-arəp matən məmә, “Uhgın təmahl-ipa io məmә io ekol baptais e netənim e nəhau, kən nian ematəghat-in, io min eməruru məmә suah u inu. Mətö Uhgın təmən-ipa kəm io məmә, ‘Onəkəplan Narmin Rəhak

oteiuaiu matig e etəmim kit. Kənu suah u inun, in otol baptais e netəmim e Narmin Rəha Uhgın.' Kən əmun, uarisig eməplan Narmin Rəha Uhgın təmisi-pər e neai tahmen e mak, muwa, meiuaiu məpələh-pər lan.

³⁴Io ətuatip eməplan nat u, kən ematətul-arəp matən-iarəp məmə, 'Suah u inu, in Nəti Uhgın pahrien.'

Iesu təmətuoun mətaun-in rəhan netəmim

³⁵Kəmən lawigin, Jon tətətig əpəh ikin kitiəh əm iləhal rəhan kəiu etəmim.

³⁶Kən nian niğanəmti Jon təmətul e Iesu taliwək matuwa kən təmə, "Ei! Otəplan-tu! Suah u inu, in Nəti Sipsip rəha Uhgın!"

³⁷Kən nian rəhan etəmim mil kəmuəto nəghatən əh, kəmuətul matiauarisig-in Iesu.

³⁸Kən Iesu teirair məplan suah mil un katuətəu-pən-in, kən in təmə, "Ei! Suah mil! Natuegəs-in naka?" Kən ilau kuəmə, "Rapai. Ik nətətig hiə?" (Nəghatən u "Rapai," nipətin u "Iəgətun.")

³⁹Kən Iesu təmən-ipən məmə, "Pəs kəhaluwın nakuəplan-tu." Kən ilau kəmiauarisig-in məhaluwın kuəplan ikin in tətətig ikin. Iuəhkir mitgar tiwig ehnaipən, ilau kəmətuan iləhal min mətəarus tapinəp.

⁴⁰Suah mil u kit itəm təməto Jon, nərgin u Antru, pian u Saimon Pita.

⁴¹Kən roiu aɡin-əh min, in təmuwın mehm pian Saimon mit muwa, kən mən-ipən kəm in məmə, "Ei! Enotəplan rəkis Mesaea!" (Nəghatən u, Mesaea, nipətin u məmə, "Kristo," itəm Uhgın təmən məmə otahl-ipa.)

⁴²Kən təmit Saimon muwa o Iesu. Kən nian niğanəmti Iesu təmətul lan, kən mən-ipən kəm in məmə, "Ik u inu Saimon, nəti Jon, mətə roiu okaun-in ətəgtəg ik məmə 'Kefas.'" (In "Pita" e nəghatən Kris).

Iesu təmaun-in Filip ne Nataniel

⁴³Kəmən lawigin min, Iesu nikin tinəht məmə otuwın-tu Kalili. Kən nian in təməplan Filip, kən tən-ipən kəm in məmə, "Wa-tu, mətəu-pa io."

⁴⁴Filip u, in etəm Petsaeta, ima Antru ne Pita.

⁴⁵Kən in tēmehm Nataniel, kən tən-ipən kəm in mēmə, “Itimat enotəplan suah ilouin, aupən Moses tēməte rəkis rəhan nəghatən min itəm tatəghat-in e naoa rəha Lou. Kən ien min rəha Uhgin aupən ilat min kəmotəte rəkis nəghatən min itəm tatəghat-in. In etəm Nasaret, in nəti Josep, kən nərgin u, Iesu.”

⁴⁶Məto Nataniel tēmə, “?Naka lan? ?Nikim təht mēmə nat wir kit otisi-pən e Nasaret? !Kəp!” Kən Filip tēmə, “Ita, təwir əm, pəs-tu kian nakəplan-tu.”

⁴⁷Nian Iesu tēməplan Nataniel taliwək matuwa, kən tēmə, “!Suah u, in noanol ətuatip rəha Isrel! !Neiueiuəən tikə lan!”

⁴⁸Kən əmun Nataniel tətəpəh o Iesu mēmə, “?Nəmahro mitun mēmə io etəm tol nulan?” Kən Iesu tən-ipən kəm in mēmə, “Nian ik nəmatəpələh e nəukət nig fik, kən Filip təsaun-inən əh ik, məto io enəməplan rəkis ik.”

⁴⁹Kən Nataniel tēmə, “!Iəgətun! !Ik Nəti Uhgin! !Ik Kig rəha noanol min rəha Isrel!”

⁵⁰Iesu təmən-ipən kəm in mēmə, “?Ik nəmatahatətə lak məto-inu io emən əm mēmə enəməplan rəkis ik, nian nəmatəpələh-pən əh e nəukəti nig fik? Ik onəpanəplan nat asol min taprəkis-in itəm u.”

⁵¹Kən mən min mēmə, “Nipahrienən agin u iatən-ipinə kəm itəmat mēmə, onəpanotəplan napuə oterəh, kən nagelo min rəha Uhgin koatər moatuwin e neai, kən moteiuaiu moatuwa o Nəti Etənim.”

Jon 2

Marit kit əpəh Kena

¹Kəmən niəh in, katol marit kit əpəh Kena, latuənu kit e Kalili. Kən mama rəha Iesu in əpəh ikin ilat min.

²Kən ilat kotaun-in-pən min Iesu ne rəhan min netənim, mēmə ilat min okotuwin e marit əh.

³Kən e nian əh, kəmotənim rafin wain, kən mama rəha Iesu tən-ipən kəm in mēmə, “Rəhalat wain təmikə.”

⁴Məto Iesu tən-ipən kəm in məmə, “?Pətan, təhrol nakatələhəu-pa nat u kəm io? Nian rəhak təsuwamən əh.”

⁵Məto rəhan mama tən-ipən kəm iolwək min rəha marit məmə, “Itəmat onəkotəkəike motol natimnat rafin itəm in otən.”

⁶Nuwigi nat asol ilat sikis, kəməlin əh-ikin əh o nəhau, məmə netəm Isrel ilat kotəike motaikuas e nelmilat məmə ilat okotaruətuəh e niganəmti Uhgın. Nuwigi nat min un, kəmol e kəpiel, kən okəmə naka kitiəh titun nosən wanhanrit lita nəhau.

⁷Kən Iesu tən-ipən kəm netəm koatol wək məmə, “Otətu-pən nəhau e nuwigi nat min un.” Kən kəmotətu ilat kotərioah wir.

⁸Kən tən-ipən kəm ilat məmə, “Otətu rəkis nəhau neen motos motuwın kəm etəm tərəmərə e marit.” Kən ilat kəmotol mihin.

⁹Kən nian suah un təmənım asgəwın, məto nəhau tinol rəkis wain lan. Məto etəmim itəm tərəmərə e marit u, in təruru məmə kəmos hiə wain u. Netəm min əm un itəm kəmos nəhau motuwa, ilat əm kotitun. Kən etəm tərəmərə e marit təmaun-in etəm təmol marit,

¹⁰mən-ipən məmə, “Nian rafin netəmim kotaupən motos-iarəp wain wir, kən uarisig netəmim kotənım tepət un, kənu kəpanos-iarəp itəm u təsəwir pikən. Məto ik natos əh itəm təwir muwa mətoarus-pa u-roiu.”

¹¹Kən inu nəmtətin itəm Iesu təmətuoun agın-əh lan mol. Kən in təmol ikin Kena, latuənu kit e Kalili. Nəmtətin əh, in təməgətun nepətən rəha Uhgın lan, kən rəhan netəmim min, kəmotahatətə əskasik lan.

Iesu təməhg-iarəp netəmim itəm kotal maket e Nimə Rəha Uhgın

(Mat 21:12-13; Mak 11:15-18; Luk 19:45-46)

¹²Uarisig e marit əh, in təmeiuaiu muwın e taon əh Kapaneam ilat rəhan mama ne pian min ne rəhan netəmim min. Kən kəmotatig nian əkuəkır əm əh-ikin əh.

¹³Kən tinuwa iuəhkir o nian rəha lafet kit rəha noanol min rəha Isrel itəm katən məmə lafet rəha Nuhagego-inən. Kən Iesu təmər muwin əpəh Jerusalem.

¹⁴E Nimə Rəha Uhgın, Iesu təməplan netəmim itəm koatos məni e kau, ne sipsip, ne iouen, məmə netəmim okotos-nəmtin. Kən netəmim neen əh-ikin, ilat koatol senis e məni rəha netəm ik pisin pisin min.

¹⁵Kən in tos təulə neen, mətəl o nalis-alisən itəm. Kən in mitəp netəm min un ilat rəhalat kau min ne sipsip min məmə okotiet e Nimə Rəha Uhgın. Kən in təməhtəg məni rəha netəm min u itəm koatol senis lan, kən təmähwin-ahwin rəhalat tepil min.

¹⁶Kən məhai ilat min u itəm koatol-salim-in iouen mən-ipən məmə, “!Otəmik nat min un motiet! !Itəmat sotolən Nimə Rəha Tata rəhak tuwa in nimə kit rəha nolən makit!”

¹⁷Kən netəmim rəhan, nikipat tuəh nəghatən kit e Naoa Rəha Uhgın, itəm tatən məmə, “!o ekolkeike pik Nimə Rəham e nikip, nikip tatimis-pən lan.”

¹⁸Kən netəm-iasol min rəha netəm Isrel kotətapəh ron məmə, “?Pah təmol məmə nəkitun nolən nat u? !Ol nəmtətin məmə otəgətun ətuatip kəm itimat!”

¹⁹Məto Iesu təmə, “Okəmə itəmat nakotərəkin Nimə u Rəha Uhgın, kən nian kisil əm, io ekiləkin min tətul.”

²⁰Kən netəm-iasol min un kotəmə, “!Ei, nəman! Netəmim kəmotol wək pik e nup ilat rafin foti-sikis motiləkin Nimə u Rəha Uhgın. ?Onakahrol nulan miləkin e nian kisil əm?”

²¹Məto Nimə əh Rəha Uhgın itəm Iesu tatəghat-in, in nipətin.

²²Kən uarisig, nian in tinimis rəkis, kən minəmegəh min, kən rəhan netəmim min, nikipat tuəh nəghatən əh rəhan itəm təmən. Kən ilat kəmotahatətə e Naoa Rəha Uhgın, ne nəghatən itəm Iesu təmatən-ipən kəm ilat.

Iesu tinəmitun rəkis nətəligən min rəha netəmim

²³Nian əh Iesu təmətətig e Jerusalem e nian rəha lafet rəha Nuhagego-inən, netəmim tepət kəmotəplan nəmtətin mīn itəm in təmöl, kən kəmotahətətə e nərgin.

²⁴Məto Iesu in təmitun nat itəm tətətig e nikilat, kən məsatahətətən elat.

²⁵Okol suah kit təsətul-arəpən məghat rəha netəmim lan, məto-inu Iesu titun rafin nətəligən rəha netəmim.

Jon 3

Nikotimas təmuwin məplan Iesu

¹Etəm-iasol kit e noanol rəha Isrel, nərgin u, Nikotimas. In Farisi kit.

²Kən nian kit lapin, in təmuwin məmə otəghat ilau Iesu. In təmən-ipən məmə, “İəgətun, itimat ekotitun məmə ik iəgətun kit itəm Uhgın təmahl-ipa ik nakuwa, məto-inu suah kit okol təsölən nəmtətin mīn un ik nakatol okəmə Uhgın təsətigən ron.”

³Kən Iesu tən-ipən kəm in məmə, “Nipahrienən agin u iatən-ipinə kəm ik məmə, okəmə etəmim kit təsaiir wiən, okol in təsəplanən nərəmərəən rəha Uhgın.”

⁴Kən Nikotimas, narmin təmiwig pīk, kən mətapəh ron məmə, “?Etəm tīnol iahgin rəkis, otəhrol maiir mətmətig mīn? !In okol təsüwin mīnən e nərpī rəhan mama kən maiir-pa mīn!”

⁵Kən Iesu tən-ipən kəm in məmə, “Nipahrienən agin u iatən-ipinə kəm ik məmə, okəmə etəmim təsaiir-wiən e nəhau ne Narmin Rəha Uhgın, okol təsüwinən matig ahgin nərəmərəən rəha Uhgın.

⁶Nipətītəm tətaiir əm e nīta rəha etəmim əm, məto Narmin Rəha Uhgın əm un in tatol məmə narmitəm tətaiir wi mīn.

⁷Təsəwirən məmə narməm otiwig məto-inu emən-ipinə kəm ik məmə, ‘Onəkotəkəike motaiir wi mīn.’

⁸Tahmen əm e nīmətag tətisi-pə ikin kit, matelel nat matuwin ikin kit itəm in tolkeike məmə otuwin-pən ikin. Natəto əm, məto ik nəkəruru məmə təmisi-pə

hiə, kən matuwə hiə. Kən e suatip kitiəh əm, kitat kəsotəplanən Narmin Rəha Uhgin, məto koatəplan əm rəhan wək e nəmegəhən rəha etəmim itəm təmaiir wi min.”

⁹Kən əmun, Nikotimas tətəpəh o Iesu məmə, “?Natimnat min un, otəhrol nulan muwa?”

¹⁰Kən Iesu təmə, “Ik iəgətun asol rəha netəm Isrel. ?Təhrol nəkəruru natimnat min u?”

¹¹Nipahrienən agin u iatən-ipinə kəm ik məmə, nəghatən min u itəm ekoatən ilat, itimat ekotitun wir, kən natimnat itəm ioatən-iarəp, itimat enotəplan rəkis. Məto itəmat nəsohatətəən e nəghatən min rəhatimat.

¹²Io iatən əm natimnat min itəm katol e nətueintən əm u, məto itəmat nəsohatətəən e rəhak nəghatən. ?Kən okəmə ekən natimnat min itəm katol e Nego e Neai, nakotəhrol nulan motahatətə lan?

¹³Suah kit təsuwinən əpəh ilis e Nego e Neai, meiuaiu-pa, mən-iarəp nian kit ne. Məto Nəti Etəmim əm, təmişipən iman ikin e Nego e Neai, meiuaiu-pa, titun nən-iarəpən.

¹⁴“Aupən, əpəh ikin taruən-aruən ikin, Moses təmiləs narmi sinek kit, mətu-pər ilis e nig əfəməh kit, kən miləs-ipər. Kən e nolən kitiəh əm, okəike kiləs-ipər mihin Nəti Etəmim,

¹⁵məmə netəm min u itəm okotahatətə lan, ilat okotos nəmegəhən itulin.

¹⁶Tol nəhlan, Uhgin təmolkeike pik netəmim e nətueintən, tol-pən in təmos-ipa Nətin Noan Kitiəh Əm, məmə netəm min u itəm koatahatətə lan, ilat okol kəsotimisən, məto okotos nəmegəhən itulin.

¹⁷Uhgin in təməsahl-ipamən Nətin tuwa e nətueintən u məmə otən-iarəp nalpinən rəha nolən rəha netəmim rəha nətueintən, məto in təməahl-ipa, məmə otuwa mol suatip o nosmegəhən netəmim e nətueintən.

¹⁸“Etəmim itəm tətahatətə lan, Uhgın okol təsənən nalpınən rəhan, məto etəmim itəm təsahatətəən lan, Uhgın tinən rəkis nalpınən rəhan, məto-inu in təsahatətəən e Nəti Uhgın Noan Kitiəh Əm.

¹⁹Uhgın tətakil netəmim e nolən u məmə, Nəhag-əhagən tinuwa rəkis e nətueintən, məto netəmim kəsotolkeikeən Nəhag-əhagən. Ilat kəmoatolkeike Napinəpən ilə, məto-inu nian rafin rəhalat nolən, təsətuatipən.

²⁰Etəmim itəm tatol nolən itəm təsətuatipən, in tetəhau Nəhag-əhagən. Kən in təsuwamən e Nəhag-əhagən, məto-inu in tapəs məmə Nəhag-əhagən əh otasiəgəpın rəhan nolən mın.

²¹Məto etəmim itəm tatətəu-pən suatip rəha nıpahrienən in otuwa e Nəhag-əhagən, məmə Nəhag-əhagən əh, in otasiəgəpın rəhan nolən kən matəgətun məmə in təmol ilat e nəsanənən əm rəha Uhgın.”

Jon Təməghat-in Min Iesu

²²Uarisig e natimnat mın əh, Iesu ne rəhan mın netəmim kəmotuwın e nıtən Jutia. Təmatig nuwəh məsın ilat mın ikin əh, kən matol baptais e netəmim.

²³Məto e nian əh, Jon mın, in tatol baptais e netəmim əpəh ikin kit iuəhkir əm o Salim, nərgın u, Aenon, məto-inu, ikin əh, nəhau tepət ikin. Kən netəmim koatuwin ikin əh, məmə Jon otol baptais elat.

²⁴E nian əh, kəməsıləs-ipənən əh Jon e kalapus.

²⁵Kən netəmim neen rəha Jon, ilat kəmotərgəhəu ilat etəm Isrel kit, o nolən ətuatip itəm etəmim otəkəike maikuas məmə in otaruətuəh e nıganəmıti Uhgın.

²⁶Kən ilat kəmotuwın kehm Jon, motən-ipən kəm in məmə, “İəgətun, ik nəkitun etəmim kit u aupən itəlau mın əpəh entənıpən-pən ikin e nəhau Jotan, kən ik nəmətul-arəp matəghat-in kəm netəmim. Roiu əh, in tinatol baptais e netəmim. Kən ilat rafin kınəotuwin ron.”

²⁷Kən Jon tən-ipən məmə, “Etəmim təruru nolən nat kitiəh ne, okəmə Uhgın əpəh e Nego e Neai təsos-ipənən wək əh kəm in.

²⁸Itəmat u noatətul-pa ron io. Itəmat nəkotitun məmə iatən nulan məmə, ‘Sənəmə io Kristo itəm Uhgın təmən məmə otahl-ipa.’ Məto Uhgın təmahl-ipa io məmə iakaupən muwa, kən Kristo in otəpanuarisig.

²⁹Ekuəh nimaa nəghatən kit kəm itəmat. Etəmim itəm in otol marit e pətan kit, pətan əh tatətəu-pən əm in. Kən etəmim u, netəmim koatəsahgin məmə in otuwa e lafet rəha marit, kən nīkilat kotagien lan kən motəto nəwian, ilat kəsotetətən in. Kən io u, ekahmen e in kit itəm tatəsahgin əm matətəlig-in o nətoən nəwian, kən io mīn esetəhakən kəm in o netəmim itəm koatuarisig-in, məto nīkik tagien mərioah ron.

³⁰Kristo əh, in otəkəike muwa mə in ilis taprəkis-in io, kənu io ekəike meiuaiu.”

³¹Etəmim itəm təmisi-pən ilis e Nego e Neai, in ilis taprəkis-in netəmim rafin. Etəmim itəm tətan əm e nətueintən, in etəmim əm rəha nətueintən, kən in tītun əm nənən natimnat mīn u e nətueintən u. Məto, etəmim itəm tətisi-pən ilis e neai in ilis taprəkis netəmim rafin.

³²In tatətul-arəp o nən-iarəpən natimnat itəm in təməplan kən mīnəto rəkis, məto etəmim kit ne təsahatətən e rəhan nəghatən.

³³Məto etəmim itəm təmos rəhan nəghatən kən mətahatətə lan, in tatətul-arəp məmə nəghatən itəm Uhgın təmən, in nīpahrienən.

³⁴Tol nəhlan məto-inu etəmim əh itəm Uhgın təmahl-ipa tuwa, in tatən-iarəp əm nəghatən mīn rəha Uhgın. Kotitun məmə in tatən-iarəp əm nəghatən mīn rəha Uhgın məto-inu Uhgın təmos-ipən Narmin Rəhan tərīoah lan, okol kəsolən mak lan kəsehmən namnun.

³⁵Əwəh, Tata Uhgın in tolkeike pik Nətīn əh, kən in tīnələhəu-pən rəkis natimnat rafin e nelmīn.

³⁶Etəmim u itəm tətəhatətə e Nətī Uhgın u, in tatos nəmegəhən itulīn u, namnun tīkə. Kən məto, etəm tatəht nəwīa Nətīn u, in okol təsosən nəmegəhən itulīn u nīan kit ne, məto-inu etəmim itəm tol nəhlan, neməha rəha Uhgın tatuwīn ron namnun tīkə.

Jon 4

Iesu tēmatēghat kēm pētan Sameria

¹Farisi min kēmōtēto nēghatēn, mēmē Iesu in tinatiuw-pa netēmim tepēt kinotuwa ron, kēn in tatol baptais elat tepēt. Rēhalat nampa taprēkis-in nampa rēha netēmim rēha Jon.

²(Mēto nipahrienēn sēnēmē Iesu in tatol baptais elat, netēmim min ēm rēhan ilat kotal baptais e netēmim.)

³Kēn nian Iesu tinitun mēmē Farisi min kīnotēto nēghatēn ēh, kēn in tēmiet e Jutia mitēlig-pēn ēpēh Kalili.

⁴Kēn nian in tēmatuwīn ikīn ēh, tēmēn mē otēkēike muwīn-pēn Sameria ikīn.

⁵Kēn in tēmuwīn-pēn e taon kit e Sameria, nērgīn un, Saeka. Taon ēh, in iuēhkir o nīmēptēn kit itēm aupēn Jekop in tēmētātipēn kēm nētīn u Josep.

⁶Kēn wel rēha Jekop ēh-ikīn. Kēn Iesu tinērou agīn, mēto-inu in tēmaliwāk e suatīp ēfēmēh, kēn tuwa mēpēlēh-pēr iuēhkir o wel, mitameg. E nian ēh, in tinol tina.

⁷⁻⁸Kēn rēhan netēmim min kēmōtuwīn ēpēh e taon, mēmē okotos-nēmīn nagwēnēn. Kēn pētan Sameria kit, tēmuwa mēmē otētū nēhau. Kēn Iesu tēn-īpēn kēm in mēmē, “Eh. Os-īpa-tu nēhau noan mēsīn kēm io. Ekolkeike mēmē ekēnīm.”

⁹Kēn pētan Sameria u, tēn-īpēn kēm in mēmē, “!Ei! Ik etēm Isrel un, kēn io pētan Sameria. ?Tēhrol nakatētapēh-in-pa nēhau kēm io?” Tēmēn-īpēn nēhlan mēto-inun etēm Jutia ne etēm Sameria kēsūēnīm kēlēhēn nēhau e panīkīn kitīēh.

¹⁰Kēn Iesu tēn-īpēn kēm in mēmē, “Ik nēkēruru nat naka itēm Uhgīn tolkeike mēmē otos-īpīnē kēm ik. Kēn ik mēruru min io, io u, iatētapēh-in-pīnē nēhau kēm ik. Okēmē ik nēkītun, ik onakētapēh-in-pa nēhau ron io. Kēn io oekos-īpīnē nēhau megēh.”

¹¹Kən pətan un, tən-ipən kəm in məmə, “Etəm-iasol, ik rəham pəkit tikə, kən wel u, in əpəh ləhau isəu. ?Nəhau megəh un nakatən mə onakətu ahrol minu lan?”

¹²Rəhatat pipi Jekop u aupən, in təmos-ipa wel u kəm itat, kən in təmatətu nəhau ikin nīmīn, ilat nenətīn mīn, ne rəhan mīn kau mīn. ?Kən təhrol? ?Ik nakaprəkis-in Jekop, o?”

¹³Kən Iesu təmən-ipən kəm in məmə, “Netəm koatənīm nəhau e wel u, ilat okəpanotoaoa mīn.

¹⁴Məto etəmīm itəm otənīm nəhau itəm io ekos-ipən kəm in, okol təsoaoa mīnən nian kit ne. Nəhau itəm io oekos-ipən kəm in, in tahmen e nəmti nəhau kit itəm titapuəl-apuəl mətaiu əpəh imə e nīkin nian rafīn, matos-ipən nəmegəhən itulīn kəm in, itəm otəsələn namnun.”

¹⁵Kən pətan un tən-ipən kəm in məmə, “!Etəm-iasol, awi! Os-ipa-tu nəhau un kit kəm io, məmə io ekəsoaoa mīnən nian kit, kən məsuwa mīnən u ikin-u, mətu nəhau.”

¹⁶Kən Iesu tən-ipən kəm in məmə, “Uwīn maun-in-pən rəham iaguīhl, kən muea ikin-u.”

¹⁷Kən pətan un tən-ipən kəm in məmə, “Io rəhak iaguīhl tikə.” Məto Iesu tən-ipən kəm in məmə, “Nakatən pahrien məmə rəham iaguīhl tikə.

¹⁸Məto-inu ik, nəmətəu-pən rəkis nəman faif, kən iərman u itəm itəmlau mīn nakatuatig u-roiu, sənəmə rəham ətuatip iaguīhl. Nəghatən rəham u-roiu, in nīpahrienən.”

¹⁹Kən pətan u, tən-ipən kəm in məmə, “Etəm-iasol, iatəplan məmə ik ien kit rəha Uhgin.

²⁰Tīpītimat mīn aupən, ilat kəmotəfak kəm Uhgin əpəh ilis e nitot əpəh, məto itəmat netəm Isrel, nakoatən məmə Jerusalem əm un, okəkəike kan ikin katəfak.”

²¹Məto Iesu tən-ipən kəm in məmə, “Pətan, ik onakəkəike mən nīpahrienən e rəhak nəghatən. Nian əh-ikin tatuwa, məmə itəmat onəsotəfak mīnən kəm Tata Uhgīn əpəh e nitot asol əh, ne Jerusalem mīn.

²²Itəmat netəm Sameria, itəmat noatəfak kəm Uhgīn məto itəmat nəkotəruru in. Məto itimat ioatəfak kəm Uhgīn u, ekotitun in, məto-inun suatīp rəha Uhgīn o nosmegəhən netəmim in təmisi-pa etimat, netəm Isrel.

²³Məto otəsuwəhən, nīpahrienən məmə nian əh tinuwa rəkis, nian Narmin Rəha Uhgīn in otasitu e iəfak pahrien mīn, mol ilat məmə ilat okotitun wīr Uhgīn məmə Uhgīn u, in Uhgīn pahrien, kən mol ilat məmə ilat okotəfak kəm in e nīkilat pahrien. Məto-inu Tata Uhgīn in tategəs-in iəfak mīn itəm koatol nəhlan.

²⁴Uhgīn in sənəmə etəmim. Kəpə. In narmin. Tol nəhlan, kən netəmim itəm koatəfak kəm in, ilat kotəkəike motəfak kəm Uhgīn məmə Uhgīn u, in Uhgīn pahrien, kən ilat kotəkəike motəfak kəm in e nīkilat pahrien e nəsanənən rəha Narmin Rəhan.”

²⁵Kən pətan u, təmən-ipən kəm in məmə, “Io enitun məmə Mesaea u, otəkəike muwa. Inu, kətaun-in məmə Kristo itəm Uhgīn təmən məmə otahl-ipa. Kən nian otuwa, kən in titun nən-iarəpən natimnat rafin kəm kitat.”

²⁶Iesu tən-ipən kəm in məmə, “Io u inu, iatəghat kəm ik.”

²⁷Kən roiu agin-əh, netəmim rəha Iesu kəmotitəlig-pa mīn. Kən narmilat təmiwig pīk nian kəmotəplan in tatəghat ilau pətan kit. Məto ilat kit təməsətapəhən ron məmə, “?Ik nakolkeike naka?” o “?Ik natəghat kəm pətan əh o naka?”

²⁸Kən pətan u, təmapəs rəhan nuwigi nəhau tatəpələh, mitəlig muwīn əpəh e taon. Təmuwīn matən-ipən kəm netəmim ikin əh məmə,

²⁹“Eh. Otuwīn-tu motəplan-tu suah kit əh-ikin əh, in təmən-iarəp rafin natimnat mīn itəm io ematol. ?Okəmə naka in Kristo itəm Uhgīn təmən məmə otahl-ipa?”

³⁰Kən ilat kəmotiet e taon əh, minoatuwīn məmə okotəplan-tu Iesu.

Iesu tēmuəh nīmaa nēghatēn e nagwənən

³¹Kən e nīan əh, netēmim rəha Iesu koatuəh nīkin mēmə, “Iəgətun, ik agwən kit.”

³²Məto in tən-ipən kəm ilat mēmə, “Io nīgak əpəh nagwənən itəm itəmat nəkotəruru.”

³³Tol nəhlan, rəhan netēmim kīnoatətapəh-ətapəh olat mīn mēmə, “?Tahro? ?Okəm-naka suah kit tēmos-ipən nagwənən kit kəm in, o?”

³⁴Məto Iesu tən-ipən kəm ilat mēmə, “Uhgīn tēmahl-ipa io iakuwa, kən nagwənən u nīgak, mēmə iakatol natīmnat itəm in tolkeike mēmə oekol. Kənu iakol rafin wək mīn itəm in tēmos-ipa mēmə oekol, o nol namnunən rəhan wək.

³⁵“Itəmat nəkotitun-tu nēghatēn kit u katēn mēmə, ‘Məwig kuwit əh-ikīn tətətig mēmə okotoarus nīan rəha nəulək-inən nagwənən e nasumən.’ Məto io iatən-ipinə kəm itəmat, otəplan-tu nagwənən u e nasumən. Roiu əh, nīmalīlat tīnapə rəkis. Nīan rəha nəuləkən əh-roiu.

³⁶“Etēmim rəha nəuləkən tīnuwa, mīnətuoun mīnatos rəkis rəhan nətəuən. Kən nagwənən u, in tēməulək in o nəmegəhən līlīn. E nolən u, etēmim itəm tətəsum ne etēmim itəm tatəulək in mos matuwa, ilau kərən nīkilau otagien.

³⁷Nēghatēn kit u katēn mēmə, ‘Suah kit tuwīn mə otəsum, məto etəm pīsīn kit mīn otəulək-in mēmīk muwa.’ Nēghatēn u, in nīpahriənən.

³⁸Io emahl-ipən itəmat mēmə onəkotuwīn motəulək e nasumən itəm itəmat nəməsotəsum-inən. Netəm pīsīn mīn, ilat kəmotəsum in. Kən itəmat nīnoatəhl noa rəhalat wək.”

Netəm Sameria tēpət kəmotahatətə e Iesu

³⁹Kən e taon u, netəm Sameria tēpət, ilat kəmotahatətə e Iesu məto-inu pətan əh təmatətul-arəp matən-ipən kəm ilat mēmə, “Iesu tēmən-iarəp natīmnat rafin itəm io ematol.”

⁴⁰Kən nian netəm Sameria kəmotuwīn motehm, kən kəmotəkəike kəm in mēmə otuwīn motatig ilat min. Kən Iesu təmuwīn moatatig o nian kəiu.

⁴¹Kən netənim tepət min kəmotahatətə lan e rəhan min nəghatən.

⁴²Kən moatən-ipən kəm pətan u mēmə, “Itimat emotahatətə lan o nəghatən u itəm ik nəmən-ipa, mətə roiu əh, ekoatahatətə lan mətə-inu itimat əm emotətə rəhan nəghatən min, kən motitun pahrien mēmə in Iosmegəh rəha nətueintən.”

Iesu təmol-wīr nətī etəm-iasol kit rəha kig

⁴³Nian Iesu təmatig mos nian kəiu rəkis ikin əh, in təmiet muwīn Kalili.

⁴⁴Mətə-inu aupən, in təmatən mēmə ien min rəha Uhgīn, natiməlat min, ilat kəsotisiai-inən ilat.

⁴⁵Netəm Kalili, aupən ilat kəmotuwīn Jerusalem moatol lafet rəha Nuhagego-inən, kən e nian əh, ilat kəmotəplan natimnat min itəm in təmol ikin əh. Kən nian Iesu təmuwīn Kalili, nīkilat təmagien ron.

⁴⁶Kən Iesu təmitəlig-pən min e latuənu Kena, əpəh Kalili. Ikin əh aupən, in təmol nəhau tuwa mol wain. Kən e Kapaneam, etəm-iasol rəha kig tətatig ikin. Kən nətīn kit tatimis.

⁴⁷Kən nian suah u təmətə mēmə Iesu təmisi-pən u Jutia minuwa rəkis Kalili, kən in təmuwa məplan Iesu. Kən mən-ipən ron mēmə oteiuaiu muwīn əpəh Kapaneam kən mol-wīr nətīn. Mətə-inu suakəku nol otimis.

⁴⁸Kən Iesu tən-ipən kəm suah un mēmə, “!Nəman! Itəmat u, nakotəmə onəkotəplan əm nəmtətīn min ne natimnat min itəm narmitəmat otiwīg ron aupən, kənu uarisig un, nəpanotahatətə lak. Mətə okəmə nəsoṭəplanən, okol nəsoṭahatətəən lak.”

⁴⁹Kən suah un təmə, “!Etəm-iasol, awi! !Pəs kian uəhai əm! !Otəsuwəhən roiu nətīk timis!”

⁵⁰Kən Iesu təmən-ipən kəm in mēmə, “Uwīn; nətīm otəpanəmegəh.” Kən suah un təmāhatətə e nəghatən rəha Iesu kən mitəlig.

⁵¹Nian in tēmatuwīn əh e suatip, tēməplan rəhan iolwək min, kən ilat kotən-ipən kəm in mēmə, “Rəham suakəku tinəmegəh rəkis.”

⁵²Kən in tēmətapəh olat mēmə, “?Tēməwir e nian naka?” Kən ilat kəmotən-ipən kəm in mēmə, “Nəniəp ehnaipən e wan klok rəhan nəgəpanən tēmikə.”

⁵³Kən suah un, tēmītun mēmə, e nian ətuatip əh inəh, Iesu təmən-ipən kəm in mēmə, “Rəham suakəku otəpanəmegəh.” Kən in ne rəhan min, kəmotahatətə e Iesu.

⁵⁴Inu nian tatol kəiu lan itəm Iesu tēmiet Jutia, muwa Kalili kən mol nəmtətin kit.

Jon 5

Iesu təmol-wir suah kit əpəh iuəhkir e nəhau Petseta

¹Uarisig e nian əh, Iesu təmər muwīn e taon u Jerusalem, mətə-inu katol lafet kit rəha netəm Isrel əh-ikin əh.

²E Jerusalem, noan asol kit əpəh ikin, itəm kətaig lan. E nəghatən rəha netəm Isrel katən nərgin mēmə Petseta. Kən nimə kit tatətul iuəhkir o noan əh. Nimə un, feranta lan, faif. In əh iuəhkir o ket u e fenis rəha taon u, nərgin u, Ket rəha Sipsip.

³⁻⁴Kən ikin əh, e feranta min, netəm koatimis tepət koatəpəl əh-ikin. Neen niganəmtilat təpis, kən neen nelkilat tərat, neen min nīpətilat nəwtain tēmimis.

⁵Kən suah kit əh-ikin əh tətəpəl. In təmatimis minos rəkis nup tate-eit.

⁶Kən Iesu təplan suah un tətəpəl, kən in minitun mēmə suah u tēmimis nuwəh məsin, kən tətəpəh ron mēmə, “?Tahro? ?Nakolkeike mēmə onakəwir?”

⁷Etəm tatimis un tən-ipən kəm in mēmə, “Etəm-iasol, etəmim tikə mēmə otīləs io meiuaiu muwīn e noan əh nian nəhau tatəloal. Nian rafin, io etalkut pik mēmə ekeiuaiu muwīn e noan əh, mətə netəmim neen ilat kotəprəkis-in io moteiuaiu motuwīn. Kən ilat motəupən motek nəhau.”

⁸Kən Iesu tən-ipən kəm in məmə, “!Ətul! Mos rəham nimitiwin maliwək matuwin.”

⁹Kən roiu agin suah apon təməwir min. Kən maiuaiu rəhan nimitiwin mos matuwin. Nat u kəmol e nian rəha Sapat,

¹⁰kən netəm-iasol min rəha Isrel kəmotəhai suah un itəm tinəmegəh e rəhan nimisən, motəmə, “Nian u-roiu rəha Sapat; kən təsətuatipən e Lou rəhatat məmə onakos nulan rəham nimitiwin.”

¹¹Kən in tən-ipən kəm netəm min u məmə, “Məto suah u təmol-wir io, in təmən-ipa məmə ekos rəhak nimitiwin maliwək matuwin.”

¹²Kən ilat kəmotətapəh ron məmə, “?Suah pah apon təmən-ipinə kəm ik məmə onəkol nat un?”

¹³Məto suah un təruru nərgi Iesu, məto-inu netəmim tepət ikin əh, kən Iesu təmikə-pən əm əh ilugin elat.

¹⁴Kən uarisig, Iesu təməplan suah un e Nimə Rəha Uhgın, kən tən-ipən kəm in məmə, “!Ei! !Əplan-tu! !Ik ninəwir rəkis! Məto onatəto ik məmə nəsol minən təfagə rat min. Okəmə nakol, nəratən kit otıləs min ik, itəm tərat təhmin min.”

¹⁵Kən suah apon təmuwin mən-ipən kəm netəm-iasol min rəha Isrel məmə, “Suah u itəm təmol-wir io, nərgin un, Iesu.”

¹⁶Kən tol nəhlan, netəm-iasol rəha netəm Isrel, ilat kinoatitəp-itəp Iesu məmə okotol nəratən kəm in, məto-inu ilat kotəplan in tatol natimnat min tol nəhlan e nian rəha Sapat.

¹⁷Məto Iesu təmən-ipən kəm ilat məmə, “Nian rafin rəhak Tata tatol əh wək, kən io min oekatol wək.”

¹⁸Kən nəghatən u, tol nətəligən rəhalat təkaskik təhmin min, məmə okotohamnu in timis. Məto-inu roiu əh, sənəmə məmə tatətgəhl əm Lou rəha Sapat, məto nat in iahgin pik, in tatən məmə rəhan u Tata ətuatip Uhgın, kən tol nulan, in matol məmə in tahmen ətuatip e Uhgın.

Iesu in tərəmərə mətō-inu in Nəti Uhgīn

¹⁹Kən Iesu tən-ipən kəm ilat məmə, “Nīpahrienən agin un iatən kəm itəmat, Nəti Uhgīn təruru nolən nat kit e rəhan atip əm nətəligən. Titun əm nolən natimnat min un itəm Tata Uhgīn tatol, mətō-inu natimnat rafin u itəm Tata Uhgīn tatol, Nətin, in min in tatol.

²⁰Nətin titun nolən nəhlan, mətō-inu Tata Uhgīn tolkeike pik Nətin, kən in tatəgətun kəm in natimnat rafin itəm in tatol. Kən in otəpanəgətun min natimnat min kəm in itəm iahgin min kotaprəkis-in in min u, məmə otol itəmat narmitəmat tatiwig pik ron.

²¹“Mətō-inu Tata Uhgīn tatol netəm kəmotimis ilat koatəmegəh min, kən e nolən kitəh əm, Nətin titun nos-ipənən nəmegəhən kəm netənim itəm nīkin tagien məmə otos-ipən kəm ilat.

²²Mətō-inu sənəmə Tata Uhgīn itəm in otakil netənim, mətō in təmələhəu-pən rafin nakilən e nelmi Nətin,

²³məmə netənim ilat rafin okotisiai-in Nətin, təhmen əm məmə inun koatisiai-in mihin Tata Uhgīn. Etənim itəm təsisiai-inən Nətin, okol təsisiai-inən Tata Uhgīn u itəm təmahl-ipa Nətin.

²⁴“Nīpahrienən agin u iatən kəm itəmat məmə, etənim itəm tatəto rəhak nəghatən, kən mətahatətə e Uhgīn itəm təmahl-ipa io iakuwa, in tinatos nəmegəhən itulin. In okol təsətulən e niganəmtək məmə oekən-iarəp nalpinən rəhan. In tinagin rəkis e nīmisen, kən minuwa o nəmegəhən.

²⁵Nīpahrienən agin u iatən kəm itəmat, məmə o nian kit itəm tatuwa, kən tinuwa rəkis, netəm min u kəmotimis, ilat okotəto nəwia Nəti Uhgīn, kən netəm min u ilat kotətəlig-in, ilat okotos nəmegəhən.

²⁶Tata Uhgīn in Nəukəti Nəmegəhən, kən e nolən kitəh əm, in təmol mə Nətin in min Nəukəti Nəmegəhən,

²⁷kən in təmələhəu-pən nəsanənən ne nepətən e nelmi Nətin məmə in otakil nolən min rəha netənim, mətō-inu in Nəti Etənim.

²⁸“Təsəwirən məmə narmitəmat otiwig pik o nat u, məto-inu nian əh-ikin tatuwa itəm netəm kəmotimis okotəto nəwia Nətin,

²⁹kən ilat okotətul e rəhalat min suwit, ilat min u aupən kəmoatol nolən wır min okotəkəike motətul min motos min nəmegəhən, məto itəm min aupən ilat kəmoatol nolən rat min, ilat okotəkəike motətul min e nımısən kən motətul e niganəmti Tata Uhgın məmə Nətin otən-iarəp rəhalat nalpınən.

³⁰“Io ekəruru nolən nat kit e rəhak atip əm nəsanənən. Io iakatakil nolən min rəha netəmim min, məto iatol ətuatip əm məmə rəhak Tata tatən mihin ne məmə oekol. Kən nian iakakil nolən rəha netəmim, ekitun mə ekol tətuatip, məto-inun oesalkutən məmə ekol əm e rəhak nəsanənən. Məto io, ekəike malkut məmə iakol tahmen e nətəligən rəha Uhgın itəm təmahl-ipa io ekuwa.”

Nətul-arəpən o naruəsanən İesu

³¹Okəmə io pisin əm iakəghat-in io, kən rəhak nəghatən okol təsətulən.

³²Məto suah kit min əh-ikin in tatətul-arəp kən matol nəfigəmən ron io, kən io ekitun məmə nəghatən min u rəhan itəm tatən lak in nıpahrienən.

³³“Aupən, itəmat nəmotahl-ipən rəhatəmat min netəmim məmə okotuwin motətəlig-in nəghatən rəha Jon, kən in təmatətul-arəp o nıpahrienən.

³⁴Iatəghat nulan, məto esagileən e nəghatən rəha etəmim əm kit məmə titun nolən nəfigəmən ron io. Kəpə. Təsolən nulan. Iatəghat-in nəghatən rəha Jon nulan məto-inu ekolkeike məmə Uhgın otosmegəh itəmat.

³⁵Jon u, tahmen e lait kit. Tatuəp məhag-əhag wır, kən nikitəmat təmagien ron o nian təküəkır əm.

³⁶“Məto rəhak wək min, ilat min koatol nəfigəmən ron io. Kən ilat kotəsanən motaprəkis-in nəghatən min un Jon təmatən. Wək min un, rəhak Tata təmos-ipa kəm io mə oekol namnun elat. Kən wək min u rəhak, ilat koatən-iarəp io, kən ilat moatol əp io məmə rəhak Tata in təmahl-ipa io.

³⁷Kən Tata Uhgín itəm təmahl-ipa io, inun itəm tinatətul-arəp ron io. In tatən-iarəp io pap, məto itəmat nəsotətoən nəwian, kən itəmat nəsotəplanən niganəmtin.

³⁸Kən nəghatən rəhan təsatiɡ wirən e nikitəmat, məto-inun itəmat nəsotahatətən lak, io u, itəm in təmahl-ipa io iakuwa.

³⁹“Itəmat noatafin pik nəghatən min e Naoa Rəha Uhgín, kən motahatətə e nəghatən min əh məmə itəmat onəkotos nəmegəhən itəm namnun tikə. Məto otəplan-tu. Nəghatən min əh e Naoa Rəha Uhgín, ilat koatəghat-in io, moatən-iarəp io.

⁴⁰Məto itəmat nakotapəs nuwamən ron io məmə nakotos nəmegəhən ron io.

⁴¹Esolən nat agin-əh e nənwiwiən rəha netəmim. Kəpə.

⁴²Məto itəmat u inun, io ekitun wir itəmat, kən io ekitun wir məmə nolkeikeən rəha Uhgín tikə e nikitəmat.

⁴³Io emuwa e nərgi Tata rəhak, məto itəmat nəsotosən io e nikitəmat, nikitəmat təsagienən ron io; məto okəmə etəmim kit tatuwa e nərgin atip əm, kən nikitəmat tos, kən motagien ron.

⁴⁴Nian rafin itəmat nakotolkeike məmə nakotos nənwiwiən rəhatəmat min, məto nəsotalkut agin-əhən məmə onəkotol nat kit itəm Uhgín u, in pisin əm in Uhgín, otənwiwi itəmat ron. ?Onəkotahatətə ahro nulan lak e nolən əh?

⁴⁵“Təsəwirən məmə nikitəmat otəht məmə, io oekən-iarəp nolən rat min rəhatəmat e niganəmti Tata Uhgín. Kəpə. Məto Moses ilə, nian rafin itəmat noatuag-pən ron, in otən-iarəp nolən rat min rəhatəmat.

⁴⁶Məto-inu okəmə itəmat nəmotahatətə pahrien e nəghatən min rəha Moses, kən itəmat onəkotahatətə min e rəhak nəghatən min. Məto-inun, nəghatən min itəm in təməte rəkis, ilat koatəghat-in io.

⁴⁷Məto itəmat nəsotahatətən e nəghatən min itəm in təməte, tol nəhlan, suatip tikə agin məmə onəkotahatətə lak.

Jon 6

Iesu tēmagwēn netēmim tepēt
(Mat 14:13-21; Mak 6:30-44; Luk 9:10-17)

- ¹Uarisig e natimnat min u, Iesu tēmuwin ēpēh entēnipēn e nēhau asol nērgin un, Lek Kalili. Kēn nērgin kit min un, Lek Taepirias.
- ²Kēn nīmanin netēmim kēmoatuarisig-in, mēto-inun koatēplan nēmtētīn min rēhan, itēm tatol netēmim koatimīs koatēto tēwīr.
- ³Kēn Iesu tēmuwin ēpēh ilīs e nitot kit, kēn matēpēlēh ikin ēh ilat rēhan min netēmim.
- ⁴E nian ēh, lafet kit rēha netēm Isrel u, kētaun-in mēmē lafet rēha Nuhagego-inēn tīnatuwa iuēhkir.
- ⁵Kēn nian Iesu tasipēn ēpēh isēu, kēn mēplan nīmanin netēmim tepēt ilat koatuwa, kēn in tētapēh o Filip mēmē, “?Okotēhrol motos pīret tepēt tahmen-in netēm min u mēmē ilat okotun?”
- ⁶In tēmēn asgēwīn ēm mēmē otēplan nahatētēn rēha Filip, mēto in tīnitun rēkis nat naka itēm in otēpanol.
- ⁷Kēn Filip tēn-ipēn kēm in mēmē, “!Ei! Okēmē okos-nēmtīn pīret mēni lan tahmen e tu-hanrit tenarius pap, mēto okol tēsahmenēn. Netēm min u rafin ilat okotun ēm noan mēsīn noan mēsīn.”
- ⁸Kēn etēmim kit rēha Iesu, pian u Saimon Pita, nērgin u Antru, in tēmēn-ipēn kēm Iesu mēmē,
- ⁹“Suakēku kit ēh-ikin ēh, in tatos pīret faif kēmōl e pale, ne nēm kēiu. Mēto okol tēsahmen-in agin-ēhēn netēm min ēh.”
- ¹⁰Kēn Iesu tēmē, “Otēn-ipēn-tu kēm netēmim kotēpēlēh.” Kēn ikin ēh, manuwīhl tepēt, kēn ilat kēmōtēpēlēh. Kēn nampa rēha nēman ēm, in nat kit tahmen e faif-taosan.
- ¹¹Kēn Iesu tēmos pīret, mēn tagkiu kēm Uhgin ron, kēn mos-ipēn pīret un kēm ilat rafin u koatēpēlēh, kēn matīg mol min nat kitīēh ēm e nēm. Kēn ilat kēmōtun tahmen-in nērpīlat.

¹²Kən nian kinotagwən rəkis, nərpilat tasis, kən Iesu təmən-ipən kəm rəhan min netəmim məmə, “Otuwin motuwər nimismisi pīret min əh koatis. Təsəwirən məmə okotərəkīn.”

¹³Kən ilat kəmotuwīn motuwər nimismisi pīret kən motaii-pən e kətim asol min ilat tuelef kotərioah wir. Pīret u, in nimismisi pīret ilat faif kəmol e pale itəm netəmim kəmotun kapəs.

¹⁴Kən nian netəmim kəmotəplan nəmtətin əh itəm Iesu təmol, kən ilat kəmotən məmə, “Nīpahrienən. !Ien pahrien u rəha Uhgīn itəm aupən kəmatən məmə in otuwa e nətueintən!”

¹⁵Kən Iesu təmitun məmə netəm min u kotəmə okotuwa motos in motuwīn motəkəike kəm in məmə in otuwa mol kig rəhalat. Kən in təmagim min, mapəs ilat muwīn əpəh e nītot, mətān in pīsīn əm.

Iesu təmaliwək e nətuei nəhau

(Mat 14:22-27; Mak 6:45-52)

¹⁶Nian mītgar təmeiuaiu, netəmim rəha Iesu min kəmotēiuaiu motuwīn e lek əh.

¹⁷Kən tīnapinəp, mətō Iesu tikə, təsuwamən əh. Kən əmun, ilat kəmotuwīn motər e pot kit, kən minotasuə lan motaulego min e lek un, məmə ilat okotuwīn Kapaneam.

¹⁸Kən nimətag asol kit təmətul minol nəhau tīnərat-nərat.

¹⁹Kən nian ilat kəmotasuə motuwīn, tahmen e faif o sikis kilomita, kən ilat kotəplan Iesu taliwək e nətuei nəhau matuwa iuəhkīr o rəhalat pot. Kən ilat kəmotəgin pīk,

²⁰mətō in təmən-ipən kəm ilat məmə, “Əsotəgin pīkən, io u inu. ”

²¹!Kən nīkilat təmagien o nīləsən in e pot, moatol əmun, roiu agīn, mətō pot tīnuwīn e nəwtain nəhau entənīpən-pən ikin-un kəmotən məmə okotuwīn ikin!

Netəmim kəmoategəs-in Iesu

²²Kəmən lawigin, netəmim min itəm kotatig əh entənipən-pa ikin e lek asol u, ilat kəmotəplan məmə aupən, pot kitiəh əm tatətul ukin-u. Kən ilat kotitun məmə Iesu təsuwinən e pot u ilat rəhan min netəmim, məto-inun nian kəmotiet, ilat pisin əm moatuwin.

²³Kən pot min neen, kəmotisi-pən e taon u Taepirias, ilat kəmotuwa. Ilat kəmotuwar iuəhkir əm o ikin-u itəm Ierəmərə təmətul ikin məfak matən tagkiu o pıret, kən netəmim kəmotun.

²⁴Kən tol nəhlan, nian ilat kəmotəplan məmə Iesu tınikə u ikin-u, kən rəhan min netəmim kotikə, ilat min kəmotasuə min e pot kit, motuwın e Kapaneam, moategəs-in.

Iesu in pıret rəha nəmegəhən

²⁵Nian netəm min u kəmotəplan Iesu əpəh entənipən-pən əpəh e lek u, kotətapəh ron məmə, “?İəgətun, ik nəmuwa ikin-u nəghan?”

²⁶Məto Iesu təmən-ipən kəm ilat məmə, “Nıpahrienən agin iatən kəm itəmat məmə, itəmat noategəs-in io, sənəmə nəmotəplan nəmtətin min u itəm emol, məto itəmat nəmotun əm pıret, nərpıtəmat tasis.

²⁷Məto təsəwirən məmə itəmat nahgitəmat otikə o nosən pıret itəm otəpanəmnəmit mikə. Itəmat, nahgitəmat otəkəike mikə o nosən pıret itəm tətatig lilin u, rəha nəmegəhən itəm namnun tikə. Pıret u, inu, Nəti Etəmim otəpanos-ipinə kəm itəmat; məto-inu Tata Uhgın, in təməgətun məmə nıkin tagien o Nətin.”

²⁸Kən ilat kəmotətapəh ron məmə, “?Nolən naka min un itəm Uhgın tolkeike məmə itimat oekotol?”

²⁹Kən Iesu tən-ipən kəm ilat məmə, “Itəmat nəkotəkəike motahatətə lak, məmə Uhgın təmahl-ipa io. Nat u inu Uhgın in tolkeike.”

³⁰Kən ilat kəmotətapəh min ron məmə, “?Məto ik onəkol nəmtətin naka, məmə itimat ekotəplan kən ekotahatətə lam? ?Ik onəkol nat naka?”

³¹Nian rəhatat pipi min u aupən, ilat kəmotan ikin taruən-aruən ikin, ilat kəmotun ‘mana.’ Nəghatən kit e Naoa Rəha Uhgın tatən məmə, ‘In tatos-ipən pıret itəm tatisi-pən e Nego e Neai məmə ilat okotun.’”

³²Məto Iesu təmən-ipən kəm ilat məmə, “Nıpahrienən agın u iatən kəm itəmat məmə, sənəmə Moses təmos-ipən pıret u itəm tatisi-pən e Nego e Neai məmə nakotun. Rəhak Tata ilə in tatos-ipınə. Kən inun tatos-ipən pıret pahrien itəm tatisi-pən e Nego e Neai, məmə itəmat onəkotun.

³³Məto-inu pıret rəha Uhgın, inu in itəm tatisi-pən e Nego e Neai, mateiuaiu-pa e nətueintən. Kən pıret u tatos-ipən nəmegəhən kəm netəmim e nətueintən.”

³⁴Kən ilat kəmotən-ipən kəm in məmə, “Etəm-iasol, awi os-ipa-tu pıret u kəm itimat nian rafın.”

³⁵Kən Iesu təmən-ipən kəm ilat məmə, “Io u, io Pıret itəm tatos-ipən nəmegəhən. Etəmim otuwa ron io, in nəumis otəsus minən. Kən etəmim itəm otahatətə lak, in otəsoaoa minən.

³⁶Məto io emən-ipınə rəkis kəm itəmat, məmə nat əpnapın nəkotəplan io, məto itəmat nəsohatətən əh lak.

³⁷Netəmim itəm rəhak Tata tatos-ipa ilat kəm io, ilat okotuwa ron io. Kən etəmim itəm otuwa ron io, okol iakəsahl-iarəp-ən.

³⁸Məto-inu io eməsisipənən e Nego e Neai meiuaiu-pa e nətueintən məmə iakol natimnat min u io əm ekolkeike. Məto emuwa məmə ekol natimnat min u itəm rəhak Tata təmahl-ipa io ekuwa ron.

³⁹Kən in tolkeike məmə io esəmkarəpən-inən netəm min un itəm in təməmki-pa ilat kəm io. In tolkeike məmə e namnun nian, io oekol netəm min u ilat okotəmegəh min e nimisən.

⁴⁰Məto-inu rəhak Tata in tolkeike məmə netəmim rafın itəm kotuag-pən o Netin, kən motahatətə lan, ilat okotos nəmegəhən itulin. Kən e namnun nian, io oekol netəm min u ilat okotəmegəh min e nimisən.”

- ⁴¹O nat u, netəmim nikilat tinətuoun mətagət, məto-inu in tatən məmə, “Io u, Piret itəm tətisi-pən e Nego e Neai, meiuaiu-pa e nətueintən.”
- ⁴²Ilət koatən məmə, “?Təhrol? Suah u in Iesu, nəti Josep, kitat kotitun əm rəhan tata ne mama. ?Təhrol in tatən nulan məmə, ‘Io emisi-pən e Nego e Neai, matuwa e nətueintən?’”
- ⁴³Iesu təmən-ipən kəm ilat məmə, “Nikitəmat təsagət-agətən nulan.
- ⁴⁴Okəmə Tata Uhgın itəm təmahl-ipa io ekuwa, in təsiuw-pamən etəmim kit tuwa ron io, kən okol etəmim un təsuwa atipən ron io məmə io oekol in otəmegəh min e nımisən e namnun nian.
- ⁴⁵Nəghatən itəm ien kit təməte aupən e Naoa rəha Uhgın, tatən nulan məmə, ‘Uhgın in otəgətun netəmim rafin.’ Etəmim itəm tatətəlig-in nəgətunən rəha Tata Uhgın, in tatuwa ron io.
- ⁴⁶Etəmim kitiəh ne tikə, itəm təməplan Tata Uhgın. In pisin əm un itəm təmisi-pən lan, təməplan in.
- ⁴⁷Nipahrienən agin u iatən-ipinə kəm itəmat məmə, etəmim itəm tətahatətə lak, in tinos nəmegəhən lili.
- ⁴⁸Io un, Piret rəha nəmegəhən.
- ⁴⁹Nat əpnapin tipitəmat min aupən, ilat kəmotun piret u ‘mana’ əpəh ikin taruən-aruən ikin, məto ilat kinotimis rəkis.
- ⁵⁰Məto Piret itəm tətisi-pən e Nego e Neai meiuaiu-pa u-roiu, in tol pisin. Piret u, təmeiuaiu-pa məmə etəmim itəm tatun, okol təsimisən.
- ⁵¹Io u, io Piret itəm tatəmegəh, təmisi-pən e Nego e Neai, meiuaiu-pa e nətueintən. Etəmim itəm otun Piret u, in otəmegəh matuwın, matuwın, namnun tikə; kən Piret u, itəm io oekos-ipən o nəmegəhən rəha netəmim e nətueintən, inun, noanuwəhgək.”
- ⁵²Nəghatən u təmöl netəmim kinotətul minoatərgəhəu kəm ilat min, motəmə, “?Təhrol? ?Suah u titun nos-ipamən noanuwəhgın kitat kotun?”

⁵³Kən Iesu təmən-ipən kəm ilat məmә, “Nipahrienən agin u iatən-ipinә kəm itəmat məmә, okəmә itəmat nəsotunən noanuwəhgi Nəti Etənim, kən məsotənimən nitan, okol nakəsotosən nəmegəhən.

⁵⁴Etənim itəm tatun әm noanuwəhgək matənim nitak, in otos nəmegəhən lilin, kən e namnun nian, io oekol in otəmegəh min e nimisən.

⁵⁵Emən nəhlan, mətə-inu noanuwehgək in piret pahrien nigi netənim. Kənu nitak, in nənimən pahrien nimi netənim.

⁵⁶Etənim itəm tatun noanuwəhgək, kən matənim nitak, in otatig lak. Kən iakətatig lan.

⁵⁷“Rəhak Tata itəm təmahl-ipa io ekuwa, in nəukəti nəmegəhən. Kən io iatos nəmegəhən ron. Kən e nolən kitieh әm, etənim itəm tatun io, inu tatos nəmegəhən ron io.

⁵⁸Io u piret pahrien, itəm təmisi-pən e Nego e Neai, meiuaiu-pa e nətueintən. In təsahmenən e piret u, itəm tipitəmat min aupən kəmoatun. Nat әrnapin məmә ilat kəmoatun piret әh, mətə ilat kinotimis rəkis. Mətə etənim itəm tatun piret u, in otos nəmegəhən lilin, itəm namnun tikә.”

⁵⁹Iesu təmən-iarəp nəghatən min u, nian təmatəgətun netənim әрәh e nimә rəha nuəfiminən e Kapaneam.

Netənim min rəha Iesu kəmotapəs nahatətəen lan

⁶⁰Netənim tepət rəha Iesu kəmotəto nəghatən u rəha Iesu, kən ilat kotəmə, “!Nəman! !Nəghatən u tiəkis pik! ?Pah u titun nosən nəghatən tol nəhlan?”

⁶¹Kən Iesu təmitun atip məmә netənim min rəhan, kinotasiwin-asiwin-in nəghatən әh rəhan. Kən in təmən-ipən kəm ilat məmә, “?Təhrol әh? ?Nətəligən rəhatəmat təmeiuaiu o nat u?

⁶²?Mətə okəmә naka nəkotəplan Nəti Etənim tər matuwın min ikin әh, in təmisi-pən ikin aupən, təhrol u-roiu?

⁶³Narmin Rəha Uhgın әm titun nos-ipənən nəmegəhən kəm etənim. Nəsanənən rəha etənim təruru nolən nat u. Nəghatən min u ematən

kəm itəmat, ilat nəghatən min rəha Narmin Rəha Uhgīn itəm tatos-ipən nəmegəhən kəm netəmim.

⁶⁴Məto itəmat neen u ikin-u, itəmat nəsohatətəən əh lak.” (Iesu təmən nulan məto-inu in tinitun rəkis e nətuounən məmə netəm pah min u kəsotahatətəən lan, kən pah un in otegəhan-in-pən in e nelmi tikimīr min rəhan.)

⁶⁵Kən in təmən məmə, “O nat u inu, io enəmən rəkis kəm itəmat, məmə okol etəmim kit təsuwamən ron io okəmə Tata Uhgīn təsolən suatip ron.”

⁶⁶Uarisig e nəghatən əh, netəmim rəhan tepət kəmotagim, minotapəs nətəupənən.

Pita təmən-iarəp məmə in tətahatətə e Iesu

⁶⁷Kən Iesu təmətapah o rəhan netəmim tuelef məmə, “?Təhrol etəmat? ?Itəmat min nakotən məmə nakotagim kapəs io?”

⁶⁸Kən Saimon Pita təmən-ipən kəm in məmə, “?Iərəmərə, itimat oekotuwīn o pah? Ik əm un, rəham əm nəghatən in tatos-ipən nəmegəhən itəm namnun tikə.

⁶⁹Kən itimat enotahatətə rəkis lam, kən itimat enotitun rəkis məmə ik Etəm Asim rəha Uhgīn.”

⁷⁰Kən Iesu təmən-ipən kəm ilat məmə, “Itəmat u, netəm tuelef rəhak. Io u, emitəpun itəmat, məto itəmat kitīəh u ikin, in iərmis.”

⁷¹In tatən Jutas, nəti Saimon Iskariot, məto-inu in min in etəm tuelef kit rəha Iesu, məto uarisig ikin, in otəpanegəhan-in-pən in e nelmi rəhan tikimīr min.

Jon 7

Iesu təməghat ilat pian min

¹Uarisig e natimnat min u, Iesu təsolkeikeən məmə otuwīn latuənu min e Jutia məmə otol rəhan wək əh-ikin əh, məto-inun, netəm-iasol rəha netəm Jutia kəmoatəte noa anion kit ron. Kən titəlig muwīn latuənu min e nitən Kalili.

²Məto nian tinuəkir e nian rəha nolən lafet kit rəha netəm Isrel, nərgin un, lafet rəha Nolən Makeen.

³Kən pia Iesu min kəmotən-ipən kəm in məmə, “Təwir məmə nakiet muwin əpəh Jutia, mə pəs netəmim min rəham əh-ikin əh, ilat kotəplan nat pispis min rəham itəm natol.

⁴Məto-inu etəmim itəm tolkeike məmə netəmim okotitun in, okol təsəhluaignən rəhan wək min. Okəmə natol natimnat min u, uwin mol əp ik, kən təwir agin məmə onəkol pəs netəmim min e nətueintən kotəplan.”

⁵Pian agin-əh min pap, ilat min kəsotahatətən lan, kən mol koatən nəhlan.

⁶Kən Iesu təmən-ipən kəm ilat məmə, “Nian ətuatip rəhak təsuwamən əh, məto itəmat, nian min rafin əm tətuatip otəmat.

⁷Netəmim rəha nətueintən u, ilat okol kəsotətəhauən itəmat, məto io, ilat kotətəhau io, məto-inun io iatən-iarəp məmə rəhalat nolən təsətuatipən.

⁸Itəmat onəkotuwın e lafet, məto io okol esuwın paupənən e lafet əh məto-inun, nian ətuatip rəhak təsuwamən əh.”

⁹In təmatən nəghatən u, kən mətatig əpəh Kalili.

Iesu təmuwin min e lafet rəha Nolən Makeen

¹⁰Kən pia Iesu min kəmotəupən motuwın e lafet əh, uarisig un, Iesu təmuwin min. Məto nian təmuwin, in təmətan anion əm o netəmim məmə okəsotehmən.

¹¹Kən e lafet əh, netəm-iasol rəha netəm Jerusalem, koategəs-in in moatətapəh-in əpnapin əm o netəmim məmə, “?Suah əpəh in hiə?”

¹²Kən ikin əh, nimanin netəmim kəmotasiwın-asiwın in. Ilat neen kotəmə, “In etəm wir kit,” məto neen kotəmə, “Kəpə, in tateiuə-in əm netəmim əpəh.”

¹³Məto ilat koatəgin rəhalat netəm-iasol min, kən kit təməsən-iarəpən Iesu əpəh e niki netəmim məmə netəmim okotəto.

¹⁴Lafet əh, kəmol o wik apiəpiə kit, kən ilugin e lafet u, Iesu in təmuwin əpəh e Nimə Rəha Uhgın, matəgətun netəmim.

¹⁵Kən netəm-iasol rəha netəm Isrel, narmilat təmiwig pik, kən kotəmə, “?Suah u təmahrol mitun natimnat min u e Naoa Rəha Uhgın? Rəhatat kit etəm-iasol təsəgətunən lan, ne.”

¹⁶Kən Iesu təmən-ipən kəm ilat məmə, “Nəghatən min u itəm iatəgətun netəmim lan, sənəmə rəhak əm. Ilat kotisi-pən e Tata Uhgın itəm təmahl-ipa io ekuwa.

¹⁷“Kən okəmə suah kit rəhan nətəligən təkaskik məmə otol natimnat min itəm Uhgın tolkeike, kən in otitun məmə nəghatən min u rəhak, ilat koatisi-pən o Uhgın, sənəmə rəhak atip əm.

¹⁸Etəmim itəm tatəghat-in atip əm rəhan nepətən, in tətalkut atip əm ron, məmə otuw rəkis netəmim, kən kotos-ipər nərgin ron. Məto etəmim itəm tolkeike məmə netəmim okotiləs-ipər nərgi etəm təmahl-ipən in tuwa, in etəmim rəha nənən niphahrienən, in sənəmə etəm tateiuə.

¹⁹Moses təmos-ipinə Lou kəm itəmat, məto itəmat kitəh ne təsəl-wirən Lou əh ne. ?Itəmat nakotəmə onəkotohamnu io o naka?”

²⁰Kən nimanin netəmim kotəmə, “!Nəman! !Narmin rat kit un tətətig lam! ?Pah təmə otoh ik ne?”

²¹Kən Iesu təmən-ipən kəm ilat məmə, “Io emol wək kitəh əm, kən itəmat rafin, narmitəmat tatiwig ron.

²²Məto itəmat min nəkotol wək e Sapat, noatəhg-ipən nisualkələh e nian əh, moatətəu-pən Lou rəha Moses. (Niphahrienən, sənəmə Moses ətuatip in təmətuoun nolən əh, məto tipitəmat min ilat kəmotətəuoun.)

²³Məto nian rafin, itəmat noatəhg-ipən nisualkələh e nian rəha Sapat moatol məmə onasotətgəhlən Lou rəha Moses.?Kən təhrol neməha tatol itəmat məto-inu io emol-wir agin nipəti etəmim e nian rəha Sapat?

²⁴Otapəs nakilən nolən rəhak u itəm nəmotəplan əm e niganəmtitəmat, məto itəmat onəkotəkəike motakil rəhak nolən e nətəligən itəm tətəuatip.”

Netəmim kəmoatəghat-in Kristo

²⁵Kən e nian əh, netəm Jerusalem neen kotəmə, “?Təhrol əh? ?Suah u inu, netəm-iasol kotəmə okotohamnu?”

²⁶Məto otəplan-tu. In tinatəgətun-arəp əm netəmim əpəh e niğanəmti netəmim məto suah kit təsəhaiən in ron. ?Təhrol okəm-naka netəm-iasol min kinotitun rəkis məmə in Kristo itəm Uhgın təmən məmə otahl-ipa?

²⁷Məto kitat kotitun ikin suah u təmiş-pən ikin. Məto nian Kristo in otuwa, okol suah kit təsitunən ikin in tətisi-pən ikin.”

²⁸Kən e nian əh, Iesu in tatəgətun netəmim e Nimə Rəha Uhgın. Kən in təmagət əfəməh matən-iarəp məmə, “Nikitəmat təht məmə nəkotitun io, kən motitun min ikin emisi-pən ikin, məto itəmat nəkotəruru. Io, eməsuwamən e nətəligən əm rəhak. Uhgın təmahl-ipa io ekuwa. Kən Uhgın, in nıpahrienən. Itəmat nəkotəruru in,

²⁹məto io ekitun, məto-inu io emisi-pən lan. Kən in təmahl-ipa io ekuwa.”

³⁰O nat u, ilat kəmotolkeike məmə mopael min okotaskəlīm Iesu, məto kit təməsea-pənən mek, məto-inun təsölən əh nian rəhan.

³¹Məto e nımanin netəmim ikin əh, ilat tepət kəmotahatətə lan, kən motəmə, “Okəmə Kristo tuwa, kən in okol təsölən nəmtətin tepət taprəkis-in itəm suah u Iesu tatol.”

Mopael min rəha Nimə Rəha Uhgın kəmotuwa məmə okotaskəlīm Iesu

³²Kən nian Fārisi min kəmotəto nımanin netəmim kotasiwın-asiwın e Iesu nulan, ilat ne pris asol min kəmotahl-ipən mopael min itəm kotətul o Nimə Rəha Uhgın məmə okotaskəlīm Iesu.

³³Kən Iesu təmən-ipən kəm ilat məmə, “Io ekətətig nian təküəkir əm kitat min itəmat, kən uarisig, ekitəlig-pən min o etəm təmahl-ipa io.

³⁴E nian u, itəmat onəpanotegəs-in io, məto okol nəsotehmən io; məto-inu ikin əh, itəm oekuwin ikin, okol itəmat nəsotuwamən ikin.”

³⁵Kən netəm-iasol min rəha netəm Isrel kinotətapəh-ətapəh olat min məmə, “?In otuwın hiə əh məmə kitat okəsotəplanən in? ?Otuwin o noanol min neen

rəha netəm Isrel itəm kotatig e nəptən pisin pisin min ilat netəm Kris, məmə otəgətun netəm Kris?

³⁶In tatən məmə e nian əh, kitat okotegəs-in in, məto kəsotehmən in, məto-inun ikin əh in tatuwin ikin, okol kitat kəsotuwınən ikin. ?Nəghatən u, nipətın tatən naka?”

Nəhau itəm tatos-ipa nəmegəhən pahrien

³⁷Namnun nian rəha lafet əh, in iahgin taprəkis-in nian min neen rəha lafet. Kən e nian əh, Iesu təmətul əpəh e niganəmti netəmim magət əfəməh məmə, “!Etəmim itəm tatoaoa, pəs in otuwa ron io, mənım!

³⁸Etəmim itəm tətahatətə lak, in tahmen e nəghatən rəha Naoa Rəha Uhgın u tatən nulan məmə, ‘Nəhau itəm tatos-ipən nəmegəhən pahrien, in otisi-pən e nikin, tahmen e nəmti nəhau itəm titapuəl-apuəl matər mətaiu e nikin.’”

³⁹Iesu təmən nəghatən u, matəghat-in Narmin Rəha Uhgın u uarisig in otəpanos-ipən kəm netəm min u itəm kotahatətə lan. Məto e nian əh, Narmin Rəha Uhgın, təsuwamən əh e netəmim, məto-inu kəsıləs-ipərən əh Iesu.

Netəmim kəmotoor ilat min o Iesu

⁴⁰Nian netəmim əh-ikin kəmotətə nəghatən u, kən neen kotəmə, “Suah u, in ien rəha Uhgın u, aupən kəmatəghat-in.”

⁴¹Məto neen min ilat kotəmə, “Suah u, in Kristo itəm Uhgın təmən məmə otahl-ipa.” Məto in pisin min neen kotən məmə, “?Nikitəmat təht məmə Kristo itəm Uhgın təmən məmə otahl-ipa titun nisi-pənən e netəm Kalili?

⁴²Naoa Rəha Uhgın tatən məmə Kristo itəm Uhgın təmən məmə otahl-ipa otəkəike masipən e noanol rəha Tefit, e taon u Petlehem, imə Tefit aupən.”

⁴³Tol nəhlan, kən nımanın netəmim min u, kəmotoor ilat min o Iesu.

⁴⁴Kən neen kotəmə okotaskəlim in, məto etəmim kit təməsea-pənən mek.

Netəm-iasol min rəha netəm Isrel kəməsotahatətəən e Iesu

⁴⁵Kən mopael min kəmotitəlig motuwīn o pris asol min ne Farisi min, kən netəm-iasol min əh kəmotətapəh olat məmə, “?Təhrol nəsoṭiləsən Iesu motuwa?”

⁴⁶Kən mopael min un kotən-ipən kəm ilat məmə, “!Eməsotiləsən mətō-inun suah kit təsəghatən tahmen e suah əh!”

⁴⁷Kən Farisi min kəmotən-ipən kəm ilat məmə, “?Tahro? ?In tineiuə-in min itəmat?”

⁴⁸?Nəmotəplan rəkis rəhatat kit etəm-iasol o Farisi kit təmatahatətə lan?

⁴⁹Mətō netəm əpnəpīn min, ilat kotəruru agin Lou rəha Moses, tol nəhlan, Uhgīn otərəkīn ilat.”

⁵⁰Kən Nikotimas u in Farisi kit, in əh-ikīn ilat min. Suah u inu aupən təmuwīn matəghat kəm Iesu. Kən in təmən-ipən kəm ilat məmə,

⁵¹“?Təhrol? ?Tətuatip e Lou rəhatat məmə kitat okotən-iarəp nalpīnən rəha etəmim itəm kitat kəsotaupənən motitun wir, kənu, məsotehm ətuatipən nat naka itəm in tatol?”

⁵²Kən ilat kəmotən-ipən kəm in məmə, “?Təhrol? ?Ik min un ik etəm Kalili? Uwīn-tu mafin min Naoa Rəha Uhgīn. Ik onəkəplan məmə ien kit okol təsisi-pənən Kalili.”

[E kopi oas min neen rəha Niutesteman itəm kəməte e nəghatən Kris aupən, nəghatən u Jon 7:53–8:11 tīkə.]

⁵³Kən netəmim kinotitəlig-pən min motuwīn latuənu min.

Jon 8

¹Mətō Iesu təmuwīn əpəh e nitot u, nərgin un, Nitot Rəha Nig U Olif.

Pətan itəm təmapil ilau iərman pisin u sənəmə rəhan iərman

²Kəmən lawigin, laulaugin agin-əh, kən Iesu təmitəlig-pən min e Nimə Rəha Uhgīn. Kən netəmim tepət kəmotuwa, motuəfimin ilat min ron, kən Iesu təməpələh minətuoun matəgətun ilat.

³Kən nэгəтun min rəha Lou ne Farisi min kəmotiləs pətan kit motuwa ron. Kən motol in tətul aupən e niganəmtilat. Pətan un, netənim kəmotəplan məmə in tətəpīl ilau iərman kit sənəmə rəhan ətuatip iərman.

⁴Kən ilat kəmotən-ipən kəm Iesu məmə, “Iəgəтun, pətan u netənim kəmotəhtimis in məmə in tətəpīl ilau iərman kit u, məto sənəmə rəhan iərman ətuatip.

⁵E Lou rəhatat, Moses təmələhəu nəghatən kit tatən məmə, pətan tol nulan, kitat kotəkəike motaht e kəpiel apin motahtimnu. ?Məto ik, rəham nətəligən təhrol?”

⁶Ilat kəmotətapəh nəhlan, məmə okotol noa eko-eko, pəs ilat motəplan-pən nolən rat neen lan, kən ilat kotitun nakilən nolən rəhan ron. Məto Iesu tərnapin əm, moeg-oeg matəte nat e nisip e noanelmin.

⁷Ilat kəmoatətapəh-in nəghatən u kəm in, moatuwin moatuwin, kən in tətul, kən mən-ipən kəm ilat məmə, “Okəmə itəmat kit u ikin-u, in təsolən nolən rat nian kit ne, pəs in otaupən maht pətan u.”

⁸Kən in təmoeg-oeg min, matəte nat e nisip e noanelmin.

⁹Kən nian ilat kəmotəto nəghatən rəhan, kinotan kitieh kitieh, moatagim. Naguihl-aguihl min kotaupən moatiet kitieh kitieh, motapəs əm Iesu ne pətan un.

¹⁰Kən Iesu təmэг-ətuatip min mən-ipən kəm pətan un məmə, “?Pətan, netəm min u kəmotahruwin? ?Kit təsuwamən məmə otən-iarəp rəham nalpinən?”

¹¹Kən pətan un təmən-ipən kəm in məmə, “Etəm-iasol, ilat kotikə.” Kən Iesu tən-ipən məmə, “Io min, okol esən-iarəpən rəham nalpinən. Məto atuwin, mol namnun e nolən rat min.”

Iesu in nəhag-əhagən rəha netənim e nətueintən

¹²Kən Iesu təmatəghat min kəm ilat, matən məmə, “Io u, io Nəhag-əhagən rəha netənim u e nətueintən. Etənim itəm tatətəu-pa io, okol in təsaliwəkən e napinəpən nian kit ne, məto in otos nəhag-əhagən e nəmegəhən rəhan.”

¹³Kən Farisi min kəmotən-ipən kəm in motəmə, “!Ik nəkatən-iarəp ik nulan, məto suah kit təsələn rəham nəfigəmən, kən tol nəhlan, rəham nəghatən okol təsətulən!”

¹⁴Kən Iesu tən-ipən məmə, “Əwəh, nıpahrienən məmə io atip əm iatən-iarəp io. Məto rəhak nəghatən in tatətul əh, məto-inun, io ekitun ikin iatısi-pən ikin, kən mitun min ikin iatuwin min ikin, məto itəmat nəkotəruru ikin iatuwin ikin, kən motəruru ikin iatısi-pən ikin.

¹⁵Itəmat u, nakotakil nolən rəha etəmim e nətəligən rəha etəmim əm. Məto io esakilən nolən rəha etəmim nəhlan.

¹⁶Məto okəmə io, iakakil nolən rəha netəmim, oekol e nolən itəm tətuatip, məto-inu sənəmə ekakil e nətəligən əm rəhak, məto itımlau Tata Uhgın itəm təmahl-ıpa io, rəhatımlau nakilən in kitiəh əm.

¹⁷E Lou rəhatəmat, kəməte məmə, okəmə etəmim kəiu, kətıoal nəfigəmən o nəghatən kit, kən nəghatən u, in otatətul.

¹⁸Kən roiu əh, io iatən-iarəp io, məto rəhak Tata itəm in təmahl-ıpa io iakuwa, in min tatol nəfigəmən ron io.”

¹⁹Kən tol nəhlan, ilat kınotətapəh ron məmə, “?Məto rəham Tata in hiə?” Kən in təmə, “Itəmat nəkotəruru io, kən itəmat nəkotəruru min rəhak Tata. Okəmə itəmat nəkotıtun io un, kən nəkotıtun min rəhak Tata.”

²⁰Iesu təmən nəghatən u, nian in təməgətun netəmim əpəh e ikin kit itəm katələhəu-pən məni ikin e Nimə Rəha Uhgın. Məto suah kit təməsuwinən maskəlım in, məto-inun təsələn əh nian rəhan.

Iesu təmisi-pən ilis

²¹Kən Iesu təmatən-ipən min kəm ilat məmə, “Io ekagım tənın itəmat, kən itəmat onakoategəs-in io. Məto itəmat onəkotımis, kən təfagə rat u rəhatəmat otatıg əh etəmat. İkin əh iakatuwin ikin, okol itəmat nəsotuwmən ikin.”

²²Kən netəm Isrel, ilat kotəmə, “?Nəghatən əh Iesu tatən məmə, ikin əh in tatuwin ikin, okol kitat kəsotuwınən ikin, nipətin tatən naka? ?Okəm-naka in otohamnu atip in, o?”

²³Kən Iesu təmən-ipən kəm ilat məmə, “Imatəmat u ikin-u, mətə io, io imak əh ilis ikin əh, kən emisi-pən ikin, meiuaiu-pa. Itəmat netəmim rəha nətueintən u. Mətə io, sənəmə etəm rəha nətueintən u.

²⁴Tol nəhlan, iatən-ipinə kəm itəmat məmə, itəmat onəpanotimis e nolən rat min rəhatəmat, mətə-inu okəmə itəmat nəsotahatətən lak məmə Io u inu, kən itəmat onəkotimis, kən nolən rat min rəhatəmat okotatig agin-əh etəmat.”

²⁵Kən ilat kəmotətapəh ron motəmə, “!Ei! ?Ik pah un?” Kən in təmən-ipən kəm ilat məmə, “Io ekahmen əm məmə inun ematən kəm itəmat aupən, mətəarus-pa u-roiu.

²⁶Natimnat tepət itəm ekitun nənən etəmat, kən mitun nakilən nolən min rəhatəmat ron, mətə etəmim itəm təmahl-ipa io, rəhan nəghatən in nipahrienən əm. Io iatən-iarəp əm natimnat min itəm emətə ron, məmə netəmim rəha nətueintən ilat okotətə.”

²⁷Mətə ilat kəsotitunən məmə Iesu in tatəghat-in Tata Ughin.

²⁸Tol nəhlan, in tən-ipən kəm ilat məmə, “Nian nəmotiləs-ipər rəkis Neti Etəmim un, nəpanotitun məmə Io u inu. Kən onəpanotitun min məmə esol atipən nat kit e rəhak əm nətəligən. Iatən əm natimnat itəm Tata Ughin təməgətun io lan.

²⁹Etəm təmahl-ipa io ekuwa, in tətətig itimlau min. In təsapəsən io ekan pisin, mətə-inu, nian rafin, iatol natimnat min itəm nikin tagien ron.”

³⁰Nian Iesu təmatən nəghatən min əh, netəmim tepət kəmotən nipahrienən lan.

Noanol rəha Epraham

³¹Kən Iesu təmən-ipən kəm netəm Isrel min itəm kəmotən nīpahrienən lan məmə, “Okəmə nakotaskəlīm əskasik nəghatən min u rəhak, itəm iatən-ipinə kəm itəmat, itəmat ətuatip un, rəhak netəmim min.

³²Kən itəmat onəkotitun nīpahrienən, kən nīpahrienən u, otikis itəmat məmə nakəsotuwa-minən kol slef.”

³³Kən ilat kəmotən-ipən kəm in məmə, “Itimat u noanol min rəha Epraham, itimat u esotol agin-əhən slef min rəha suah kit. ?Təhrol nəmən nəghatən u məmə, ‘Nīpahrienən otikis itəmat, nakotapiə.’?”

³⁴Kən Iesu tən-ipən kəm ilat məmə, “Nīpahrienən agin u iatən-ipinə kəm itəmat, netəmim itəm koatol nolən rat, kən nolən rat u, in tatərəmərə elat, kən mətaskəlīm ilat matol ilat koatuwa rəhan slef min.

³⁵Kən slef, rəhan etəm-iasol təsegəhan-inən məmə otatig e nimə rəhan. Məto iərəmerə tategəhan-in məmə nətin otətatig e nimə rəhan nian rafin matuwīn matuwīn namnun tikə.

³⁶!Tol nəhlan, okəmə Nəti Uhgīn tatikis itəmat, kən tatikis agin pahrien itəmat, kən itəmat nakəsotuwa-minən kol slef!

³⁷Ekitun məmə itəmat noanol min rəha Epraham, məto noategəs-in suatip məmə onəkotohamnu io, məto-inu nəsolkeikeən məmə onəkotətəlig-in rəhak nəghatən.

³⁸Io iatən natimnat min un, itəm eməplan rəhak Tata təmol. Məto itəmat noatol natimnat min u itəm rəhatəmat əm tata təmən kəm itəmat.”

³⁹Kən ilat kəmotən-ipən kəm in məmə, “Məto tata rəhatimat, in Epraham.” Kən Iesu təmən-ipən kəm ilat məmə, “Okəmə itəmat noanol ətuatip min rəha Epraham, kən itəmat onəkotos rəhan nolən min, tahmen lan təmatol aupən. Məto itəmat sənəmə noanol ətuatip rəhan.

⁴⁰Io iatən-iarəp nəghatən pahrien kəm itəmat itəm iakatəto o Uhgīn, məto itəmat nakotən məmə onəkotohamnu io. ?Nikitəmat təht məmə nolən rəha Epraham tol nəhlan?

⁴¹Itəmat nakotətəu-pən əm nolən rəha tata rəhatəmat əm.” Kən ilat kəmotən-ipən kəm in məmə, “Itimat u sənəmə nisualkələh lapin. Uhgın əm in Tata rəhatimat.”

Nenəti Setan

⁴²Kən Iesu tən-ipən kəm ilat məmə, “Okəmə Uhgın pahrien in Tata rəhatəmat, kən itəmat onəkotolkeike io, mətə-inu io emisi-pən lan, muwa ikin-u. Mətə in sənəmə rəhatəmat Tata. Io esuwamən ikin-u e rəhak atip əm nətəligən, emuwa mətə-inu in təmahl-ipa io.

⁴³?Mətə təhrol nakəsotitunən nıpəti nəghatən rəhak? !Mətə-inun nəsolkeike agin-əhən məmə onəkotəto rəhak nəghatən!

⁴⁴Itəmat, rəhatəmat nolən tahmen əm e nolən rəha tata rəhatəmat, Setan. Kən nian rafin itəmat nakotolkeike nolən noan. Nolən rəhan itəm təmatol e nətuounən, tatol əh, in etəmim rəha nohamnuən itəm. In tatətəhau nıpahrienən, mətə-inu nıpahrienən tikə lan. Nian in tateiuə, in tatol əm rəhan nolən, mətə-inu in etəmim rəha neiuəən, kən in tata rəha neiuə min.

⁴⁵Mətə io iatən nıpahrienən əm kəm itəmat, kən tol nəhlan, itəmat nəsohatətəən e rəhak nəghatən.

⁴⁶?Təhrol? ?Itəmat kit u ikin-u titun nəgətunən məmə io emol nolən rat kit? ?Okəmə io ekatən əm nəghatən pahrien min, kən təhrol itəmat nəsohatətəən lak?

⁴⁷Etəmim rəha Uhgın, in tatətəlig-in nəghatən rəha Uhgın, mətə itəmat sənəmə netəmim rəha Uhgın. Tol nəhlan, nəsohatətəlig-inən nəghatən rəha Uhgın.”

Iesu ne Epraham

⁴⁸Kən netəm Isrel kəmotəhai Iesu motəmə, “!Nəman! !Itimat enotəplan ətuatip ik! Ik etəm Sameria kit. !Ik, narmin rat kit tətətig lam!”

⁴⁹Mətə Iesu təmə, “Narmin rat tikə lak, mətə io iatiləs-ipər nərgi rəhak Tata, kən mətə itəmat, nakotərəkin nərgək.

⁵⁰Io esalkutən o rəhak nəriḡ asol, məto suah kit in tətalkut ron io. Kən in otəpanakil netəmim rafin.

⁵¹Nipahrienən aḡin u iatən-ipinə kəm itəmat məmə, etəmim itəm tatol nəwīak, okol in təsīmīsən nian kit ne.”

⁵²Kən netəm min un kotən-ipən kəm in məmə, “!Roiu enotitun məmə narmin rat kit tətatiḡ lam! Epraham tēmimis, kən ien min kəmotimis min, məto ik nakatən məmə, etəmim itəm tatol nəwīam, in okol təsīmīsən nian kit. ?Nəghatən naka u?

⁵³?Ik nakaprəkis-in Epraham u tipitimat tinēmimis rəkis? ?Kən ne ien min u kəmotimis? ?Ik nakəmə ik etəmim naka?”

⁵⁴Kən Iesu tən-ipən məmə, “Okəmə io əm iatiləs-ipər atip io, kən rəhak nisiiən in nat ərnapin əm. Məto rəhak Tata u itəmat nakoatən məmə in Uhgīn rəhatəmat, inun in tatiləs-ipər io matos-ipən nisiiən kəm io.

⁵⁵Itəmat nəkotəruru in, məto io ekitun. Okəmə ekən məmə ekəruru in, kən in otol io məmə io etəmim rəha neiuəən, tahmen əm etəmat. Məto io ekitun in, kən io matol nəwīan.

⁵⁶Tipitəmat u Epraham, nikin təmagien pik məmə in otəpanəplan nian rəhak otuwa. Kən nian in təmitun məmə rəhak nian otəkəike muwa, kən nikin təmagien təmagien.”

⁵⁷Kən netəm min u kəmotəhai motəmə, “!Nəman! !Ik nəsosən əh nup fifti ne! ?Nəmahrol məplan Epraham?”

⁵⁸Kən Iesu təmə, “Nipahrienən aḡin u iatən-ipinə kəm itəmat məmə, nian Epraham təməsaiirən əh, məto Io Etatiḡ.”

⁵⁹Kən əmun, ilat kəmotəmik kəpiel apin, motəmə okotaht Iesu lan; məto Iesu təməhluaig, kən miet e Nimə Rəha Uhgīn, minatuwin.

Jon 9

Iesu təmol-wir niḡanəmti suah kit

- ¹Kən nian kit, Iesu tēmaliwək mētan, kən mēplan suah kit. Nian tēmaiir, mēto niganēm̄tin tēpis.
- ²Kən netēmim mīn rēha Iesu kēmōtēn-ipēn kēm in mēmā, “Iēgētun, suah u tēmaiir mēto niganēm̄tin tēpis. ?O naka? ?O nolēn rat rēhan, o nolēn rat rēha tata ne mama rēhan?”
- ³Mēto Iesu tēmā, “Niganēm̄ti suah u tēmērat, mēto sēnēmā e nolēn rat rēhan, o e nolēn rat rēha tata ne mama rēhan. Mēto, niganēm̄ti suah u tēmēpis nēhlan mēmā Uhgīn otēgētun rēhan wək e nēmēgēhēn rēhan.
- ⁴Nian tatian ēh, kitat kotēkēike kol wək rēha Uhgīn, itēm tēmahl-ipa io ekuwa. Nian lapīn otēpanuwa, kən etēmim in tēruru nolēn wək.
- ⁵Nian io etatīg ēh e nētueintēn u, io Nēhag-ēhagēn rēha netēmim e nētueintēn.”
- ⁶Nian Iesu tēmēn rēkis nēghatēn ēh, tēmāgēh nisip, kən mol nēmīt ēkēku lan, kən mos nēmīt un, mol-pēn e niganēm̄ti suah un.
- ⁷Kən Iesu mēn-ipēn kēm in mēmā, “Onēkuwīn e noan nēhau Saeloam, kən mau niganēm̄tim.” (Nērgīn u Sailom, nīpētīn tēmā, “Kēmahl-ipēn”). Kən suah un tēmūwīn, mau niganēm̄tin. Nian tēmītēlig-pa, mēto niganēm̄tin tīnēwīr, kən tīnatehm nat.
- ⁸Kən netēmim iman ikīn, ne netēm mīn u itēm kotītun in, mēmā in etēmim kit nian rafin tateasiā o mēni o netēmim, ilat narmīlat tēmīwīg pīk ron. Kən kinotētapēh-ētapēh olat mīn mēmā, “!Ei! !Otēplan-tu! ?Suah u inu, nian rafin tatēpēlēh mateasiā o mēni o netēmim?”
- ⁹Kən netēmim neen koatēmā, “Əwēh, in ēh.” Kən mēto neen kotēmā, “Kēpē. Tahmen əm lan, mēto sēnēmā in.” Mēto suah un tēmā, “!Io u inu!”
- ¹⁰Kən ilat kēmōtētapēh ron mēmā, “?Nīganēm̄tim tēmāhrol mēwīr?”
- ¹¹Kən in tēmā, “Suah u, nērgīn u Iesu, in tēmōl nēmīt neen kən mol-pēn e niganēm̄tēk, kən mēn mēmā, ‘Uwīn ēpēh Saeloam, mau niganēm̄tim.’ Kən

əmun, emuwın. Nian emau niganəmtək, məto niganəmtək tinəwir, enatehm nat.”

¹²Kən ilat kəmotətapəh ron məmə, “?Məto suah un tətətig hiə?” Kən in təmə, “Io ekəruru.”

¹³Kən netənim kəmotiləs suah u itəm niganəmtin təməpis aupən, motuwın kəm Farisi min.

¹⁴Nian u, itəm Iesu təmol-pən nəmit e niganəmti suah kit lan təwir, in nian rəha Sapat.

¹⁵Kən Farisi min kəmotətapəh ron məmə, “?Nəmahrol niganəmtim təwir?” Kən suah un təmənipən kəm ilat məmə, “Iesu təmol-pən nəmit e niganəmtək, kən ekuwın mau rəkis, kən niganəmtək təwir, iatəplan nat.”

¹⁶Kən Farisi min neen kəmotən-ipən məmə, “Suah un təsisi-pənən o Uhgın, məto-inun, in təsətəu-pənən Lou rəha Sapat.” Məto Farisi min neen min kotəmə, “?Məto tahro? Suah əh sənəmə in iol təfagə rat. Iol təfagə rat təruru nolən nəmtətin kit nulan.” Kən ilat kəmotoor ilat min o nəghatən u.

¹⁷Kən ilat kəmotətapəh min ron məmə, “?Suah əh təmol-wir niganəmtim, kən nikim təht məmə in etənim naka?” Kən in təmənipən kəm ilat məmə, “In ien kit.”

¹⁸Məto netəm-iasol rəha netəm Isrel kəsotənən nıpahrienən lan məmə suah u aupən niganəmtin təməpis, məto roiu əh, tinətair. Tol nəhlan, ilat kəmotəun-in-pən rəhan tata ne mama kueia,

¹⁹kən kəmotətapəh olau məmə, “?Təhrol? ?Nətitəmlau u suah u? ?Itəmlau onakuən-tu məmə nian in təmaiir-pa, kən niganəmtin təpis? ?Okəmə nıpahrienən, kən niganəmtin təmahrol məwir?”

²⁰Kən rəhan mama ne tata kuəmə, “Itimlau ekiatun məmə nətitimlau əh, kən itimlau ekiatun məmə təmaiir-pa, niganəmtin təpis.

²¹Məto itimlau ekuəruru məmə, roiu əh, kəmahrol niganəmtin taiir. Kən itimlau ekuəruru min məmə etənim pah təmol niganəmtin təwir. Təwir

məmə itəmat nakotətapəh ron. In tinepət rəkis, in titun nənən natimnat min rafin kəm itəmat.”

²²Rəhan tata ne mama, kəmuən nəhlan, mətə-inu ilau katuəgin netəm-iasol min rəha Isrel, mətə-inu ilat kinotələhəu rəkis nəghatən kit məmə, etəmim itəm tatən-iarəp məmə Iesu in Kristo itəm Uhgīn təmən məmə otahl-ipa, kən ilat okotahl-iarəp in e nimə rəha nuəfiminən.

²³Tol nəhlan, rəhan tata ne mama, ilau kəmuən məmə, “In tinepət rəkis, təwir məmə itəmat nakotətapəh ron, pəs in tən.”

²⁴O nat u, ilat kəmotəun-in-pən min suah un itəm niganəmtin təməpis aupən, məmə otuwa mətul aupən e niganəmtilat. Kən kəmotəhai motən məmə, “Ən nīpahrienən kən ləs-ipər nərgi Uhgīn. Itimat ekotitun məmə suah u, in iol təfagə rat.”

²⁵Mətə suah u təmə, “Io ekəruru məmə suah u in iol təfagə rat, o kəp. Nat kitiəh əm itəm io ekitun. Aupən niganəmtək təməpis, mətə roiu enataiir.”

²⁶Kən ilat kinotətapəh min ron məmə, “?Təmahrol ik? ?Təmahrol mol-wir ik, kən niganəmtin təwir?”

²⁷Mətə in təmə, “Enəmən-ipinə rəkis kəm itəmat, mətə itəmat nəsoətətəlig-inən io. ?Təhrol nakotəmə iakən min? ?Itəmat min nakotəmə rəhan u itəmat?”

²⁸Kən ilat kəmotəhai in motən rat, motəmə, “!Ah! !Ik u rəhan etəmim! !Mətə itimat u, netəmim rəha Moses!

²⁹Itimat ekotitun wir məmə Uhgīn təmatəghat kəm Moses, mətə suah un, ekotəruru məmə təmisi-pən hiə.”

³⁰Kən suah apon təmə, “!Nəman! !Narmək təmiwig pik! !Suah u in təmol-wir niganəmtək, mətə itəmat nəkotəruru ikin təmisi-pən ikin!

³¹Kitat kotitun məmə Uhgīn təsətəlig-inən netəm koatol nolən rat. !Mətə etəm tatisiai-in Uhgīn, kən matol nəwian, Uhgīn tatətəlig-in!

³²E nētounən nian, mētoarus-pa u-roiu, kēsətoən əh suah kit mēmə tēmōl-wir iganəmtin əpis kit itəm tēmaiir-pa tol mihin, mēto niganəmtin tinəwir.

³³Okəmə suah u tēməsisipənən o Uhgin, okol tēsōl agin-əh nat kit. Mēto tētūatip əm mēmə in tātisi-pən o Uhgin.”

³⁴Kən ilat kēmōtəhai min motəmə, “!Nəman! Ik etəmim rəha nolən rat nian rafin əm, tētoun e nian nēmaiir-pa mētoarus-pa u-roiu. ?Nakahrol mēmə nakəgətun itimat?” Kən ilat kēmōtahl-iarəp in e nimə rəha nuəfiminən.

Nētəligən rəha Farisi min, tahmen e etəm niganəmtin tēpis

³⁵Kən Iesu tēmōto nəghatən mēmə kēmahl-iarəp suah u e nimə rəha nuəfiminən, kən in tēmuwin mēplan, kən tətəpəh ron mēmə, “?Təhrol? ?Ik nəkatahatətə e Nəti Etəmim?”

³⁶Kən suah un tēmə, “?Etəm-iasol, etəmim un in pah? !Awi! Ən-ipa-tu kəm io, pəs io ekahatətə lan.”

³⁷Kən Iesu tən-ipən kəm in mēmə, “Roiu əh, ik nīnehm rəkis in. Suah u, mē inu io, iatəghat kəm ik u-roiu.”

³⁸Kən suah un tən-ipən kəm Iesu mēmə, “!ərəmərə, io enatahatətə lam.” Kən in tēmisin-pən nulin ron, kən matəfak kəm in.

³⁹Kən Iesu tēmən-ipən kəm in mēmə, “!o emuwa e nētueintən u mēmə ekakil netəmim motor ilat, kən tol nəhlan, netəm niganəmtilat tēməpis, okotehm nat, kən netəm min u koatehm nat, niganəmtilat otəpis.”

⁴⁰Kən Farisi min neen əh-ikin, kēmōtətō nəghatən lan, kən kotən-ipən kəm in mēmə, “?Təhrol? ?Ik nakatən mēmə niganəmtitimat min tēpis?”

⁴¹Kən Iesu tēmən-ipən kəm ilat mēmə, “Okəmə niganəmtitəmat tēpis, oesənən mēmə itəmat nəkotəkəike motos nalpinən o təfagə rat min rəhatəmat. Mēto itəmat nakotəmə niganəmtitəmat təwir, nakotehm nat, kən tol nəhlan, təfagə rat min rəhatəmat tətətig əh etəmat.”

Jon 10

Iesu tēmuəh nimaa nəghatən e etəmim rəha nehmen sipsip

¹Kən tən məmə, “Nipahrienən agin u iatən kəm itəmat məmə, etənim itəm tatuwin imə e noanikulu rəha sipsip, təsuwin-pənən e ket, mətə in tətaiu əm lan kən matiwigego in məmə otuwin imə e noanikulu rəha sipsip, in iakläh ne iohamnu itəm kit.

²Mətə etənim itəm tatuwin-pən e ket, in etəm tatehm sipsip.

³Etənim itəm tatətul e ket, nian rafin in taterəh e ket o suah u, kən sipsip min kotitun nəwian. Nian rafin in tətaun-in nərgi sipsip min kitiəh kitiəh, kən in matit ilat moatiet.

⁴Nian in tatit rəhan min rafin sipsip moatiet e noanikulu, in tətaupən-in ilat, kən sipsip min koatuarisig-in, mətə-inu kotitun nəwian.

⁵Mətə ilat kəsotətəu-pənən suah kit u itəm kotəruru, ilat okotəkəike kagim kapəs, mətə-inu ilat kotəruru nəwian.”

⁶Iesu təmuəh nimaa nəghatən u, mətə ilat kotəruru nipətin məmə tatən naka.

Iesu in etənim ətuatip rəha nehmən sipsip

⁷Tol nəhlan, kən Iesu təmən-ipən min kəm ilat məmə, “Nipahrienən agin u iatən kəm itəmat məmə, io u, io Ket rəha sipsip min itəm koatuwin-pən ikin.

⁸Netəm min u itəm kotaupən-in io, ilat rafin netənim rəha naklähən əm ne nohamnuən itəm. Mətə sipsip min kol kəsotətəlig-inən ilat.

⁹Io un, io Ket u. Etəm tatuwa-pa io ikin, məmə otuwin imə, in otos nəmegəhən. In otuwa imə, miet muwin ihluə e io, kən mos manuwihl wir itəm tamiəmitə lan.

¹⁰Mətə iakläh, in tatuwa əm o nat kitiəh əm. In tatuwa məmə otakläh kən mohamnu itəm, kən mərəkin-ərəkin natimnat rafin. Mətə io, emuwa məmə iakol suatip o nosən nəmegəhən, kən nəmegəhən u, in tərīoah wir e nəwīrən rafin.

¹¹“Io u, Etənim rəha Nehm Wirən Sipsip Min. Etəm wir un, itəm tatehm wir sipsip min, in nikin tagien əm məmə otos-ipən nəmegəhən rəhan o sipsip min.

¹²Məto etəmim un itəm katətou məmə in otatehm sipsip min, in sənəmə etəm ətuatip rəha nehmən sipsip. Sənəmə in rəhan əh sipsip min. Kən okəmə tarəplan kuri iarupin kit tatuwa məmə otus ilat, kən in otaiu mapəs ilat. Kən kuri iarupin u, tuwin mus sipsip min neen, kən məhɡatit ilat kotagim kititəh kititəh.

¹³Etəm nəhlan, in otagim məto-inun katətou əm in o nehmən sipsip min, məto e nikin, in təsolən nat aɡin e sipsip min.

¹⁴⁻¹⁵“Io u inu, io Etəmim rəha Nehm Wirən Sipsip Min. Tata Uhgın in titun io, kən io ekitun in, kən e nolən kititəh əm, io ekitun rəhak sipsip min, kən rəhak sipsip min ilat kotitun io. Io nikiɡ tagien əm, məmə oekimis o nosmegəhən ilat.

¹⁶Kənu rəhak min neen əpəh ikin sipsip min, itəm kəsotatigən e noanikulu u, məto io ekəkəike mit min ilat kotuwa. Ilat min, okəpanotitun nətoən nəwiak. Kənu sipsip min u ilat rafin u, okotuwa motuəfimin əm ilat min motol kititəh. Kən etəmim kititəh əm, in otatehm ilat.

¹⁷“Rəhak Tata in tolkeike pik io, məto-inu nikiɡ tagien əm məmə oekos-ipən rəhak nəmegəhən o netəmim, məmə uarisig lan, io ekos min nəmegəhən rəhak.

¹⁸Etəmim kit tikə məmə otos-irəkis nəmegəhən rəhak, məto io atip əm ekos-ipən rəhak nəmegəhən məto-inun io əm iakolkeike mihin. Io atip əm iatos nepətən məmə ekəhlman rəhak nəmegəhən, kən io atip əm matos min nepətən məmə ekaskəlim min rəhak nəmegəhən. Nat u inu, itəm rəhak Tata təmən-ipa kəm io məmə ekəkəike mol mihin.”

¹⁹Kən netəm Isrel u, ilat kəmotoor min ilat min o nəghatən min u.

²⁰Ilat tepət kotən məmə, “!Suah u narmin rat kit tətatiɡ lan! !Rəhn-kapə tətalməl! ?Təhrol itəmat nakoatətəlig-in?”

²¹Məto neen min, ilat koatən məmə, “Nəghatən u, sənəmə nəghatən rəha etəm narmin rat tətatiɡ lan. ?Nikitəmat təht məmə, narmin rat titun nol-wirən iganəmtin əpis, təwir min?”

Netəmim kəmoatetəhau Iesu, məto-inu in təmən məmə in Nəti Uhgın

²²Tinuwa e nian rəha netəm Isrel itəm koatol lafet kit lan Jerusalem. Nərgi lafet u, in lafet rəha Nol-Wirən Mın Nimə Rəha Uhgın.

²³In əh e nian rəha nətəpən. Kən Iesu təmətaliwək e feranta e Nimə Rəha Uhgın, nərgin u, Feranta Rəha Kig Solomon.

²⁴Kən netəm Isrel neen kəmotuwa motətul, motitəlau in. Kəmotən-ipən kəm in məmə, “?Onəghan kən ik nəpanol itimat ekotitun ik? Okəmə ik Kristo pahrien itəm Uhgın təmən məmə otahl-ipa, nakən-ipa wir kəm itimat.”

²⁵Kən Iesu tən-ipən kəm ilat məmə, “Io enəmən-ipinə rəkis kəm itəmat, məto itəmat nəsotahatətən lak. Nəmtətin mın u itəm iatol e nərgi rəhak Tata, ilat koatol nəfigəmən e nəghatən rəhak,

²⁶məto itəmat nəsotahatətən lak, məto-inun itəmat sənəmə rəhak mın sipsip mın.

²⁷Rəhak sipsip mın ilat koatəto nəwiak kən motitun. Io ekıtun wir ilat, kən ilat koatuarisig-in io.

²⁸Kən io iatos-ipən nəmegəhən lilin u namnun tikə kəm ilat, ilat okol kəsotisimisən nian kit ne. Kən etəmim kit ne okol təsiuw rəkisən ilat e nelmək.

²⁹Rəhak Tata itəm təmos-ipa ilat kəm io, in təsanən taprəkis-in natimnat rafin. Tol nəhlan, kən suah kit okol təsiuw rəkisən ilat e nelмін.

³⁰Itimlau rəhak Tata, itimlau kitəh əm.”

³¹Kən netəm Isrel kəmotəmik mın kəpiel apın, məmə okotaht in lan.

³²Məto Iesu tən-ipən kəm ilat məmə, “Io enamol rəkis nəmtətin wir mın tepət e niganəmtitəmat. Nəmtətin mın əh ilat əh, rəhak Tata təmos-ipa məmə io ekol. ?Məto nəmtətin ahrol un itəmat nakotəmə onəkotaht io ron e kəpiel apın?”

³³Kən ilat kotəmә, “Itimat esotәнән mәмә ekotaht ik e kәpiel apin o nat pispis wir min u ik natol. Itimat ekotәмә ekotaht ik mәto-inu nakatән rat Uhgın. Ik etәmim әm, mәto ik nakatән mәмә ik Uhgın.”

³⁴Kən Iesu tән-ipән kәм ilat mәмә, “Kәмәte-pән aupән, e rәhatәmat әtuatip Lou, mәмә Uhgın tәмән-ipән kәм ilat mәмә, ‘Itәmat uhgın min.’

³⁵Kən kitat kotitun mәмә Naoa Rәha Uhgın, okol tәsәuhlinән. Uhgın tәmos-ipән nәghatән rәhan kәм netәmim neen. ?Tol nәhlan, okәмә Uhgın tәmatәghat-in netәm min u, kән mән ilat mәмә uhgın min,

³⁶kән nakotәhrol motәhai io moatән mәмә io iatән rat Uhgın mәto-inu iatән mәмә io Nәti Uhgın? Io u inu, itәm Tata Uhgın in tәmәlәhәu-pән io mәмә rәhan pisin әm, kән mol әpen-әpenә lak, mәмә otahl-ipa io ekuwa e nәtueintән.

³⁷Okәмә esolән nәmtәtin min itәm rәhak Tata tatol, kән sotahatәtәән lak.

³⁸Mәto okәмә iatol nәmtәtin min u rәhak Tata tatol, kән nat әnnapin mәмә itәmat nәsotahatәtәән e rәhak nәghatән min, mәto tәwir mәмә onәkotahatәtә e nәmtәtin min rәhak. Kән tol nәhlan, itәmat onәpanotitun wir agin mәмә Tata Uhgın tәtatig lak, kән iakәtatig e Tata Uhgın.”

³⁹Tol nәhlan, o nәghatән min u, ilat kәmotolkeike min mәмә okotaskәlim in, mәto in tәmiet elat, magim.

⁴⁰In tәmeguәfimin-pән min e nәwtain nәhau Jotan, muwin әpәh, aupән, Jon tәmol baptais e netәmim ikin. Kән mәtatig ikin әh.

⁴¹Kән netәmim tepәt kәmotuwa ron, kән moatән mәмә, “Jon tәmәsolән nәmtәtin kit ne. Mәto nәghatән min itәm in tәmatән e suah u, ilat rafin nipahrienән әm.”

⁴²Kән ikin әh, netәmim tepәt kәmotahatәtә e Iesu.

Jon 11

Lasaros tәmimis

- ¹Etəm Petani kit, nərgin u Lasaros, tatimis. Petani, in latuənu kit, ima Meri ne pian Mata.
- ²Meri u, inu, uarisig otəpənau nelki Iərəmərə rəhatat e senta, kən mafəl e noanun, təmiəg. Kən pətan u, rəhan u kaka Lasaros u tatimis.
- ³Tol nəhlan, wini Lasaros mil kuahl-ipən nəghatən o Iesu məmə, “Etəm-iasol, ik kit u itəm nakolkeike pik, in tatimis.”
- ⁴Nian Iesu təməto nəghatən u, kən in təmə, “Lasaros tatimis, məto rəhan nimisən əh, okol təsolən in timis agin-əh. Nimisən əh rəhan otol məmə netəmim okotiləs-ipər motənwiwi Uhgın ron. Kən nimisən əh otol məmə netəmim okotiləs-ipər motənwiwi Nəti Uhgın ron.”
- ⁵Iesu tolkeike pik Mata ne pian, ne rəhalau kaka Lasaros.
- ⁶Tol nulan, nian tatəto pap məmə Lasaros tatimis, in təmatig min mos nian kəiu əpəh ikin tətətig ikin.
- ⁷Kən uarisig, tən-ipən kəm rəhan netəmim min məmə, “Pəs kotitəlig-pən min Jutia.”
- ⁸Məto rəhan netəmim min kotən-ipən kəm in məmə, “Iəgətun, roiu əm huə, netəm-iasol rəha Jutia kəmotəmə okotahtimnu ik e kəpiel apin. ?Məto ik nakən məmə onakitəlig-pən min ikin əh?”
- ⁹Kən Iesu tən-ipən kəm ilat məmə, “Itəmat nəkotitun məmə tuelef aua e nərauiəgən. Okəmə etəmim tətaliwək e nərauiəgən, okol təsorinən nelkin e kəpiel kit, məto-inu tatəplan nat e nəhag-əhagən rəha nətueintən.
- ¹⁰Məto okəmə in tətaliwək lapin, in titun norinən nelkin e kəpiel kit, məto-inu rəhan nəhag-əhagən tikə.”
- ¹¹Iesu tinən rəkis nəghatən əh, kən in mən-ipən kəm ilat məmə, “Kitat kit u Lasaros, in tətəpil. Məto io oekuwin əh-ikin məhgaiir lan.”
- ¹²Kən rəhan min netəmim kotən-ipən kəm in məmə, “Etəm-iasol, okəmə in tətəpil, kən rəhan nimisən otikə. !In otəto təwir min!”

¹³E nəghatən u rəha Iesu, nipətin u məmə Lasaros tinimis rəkis. Məto ilat nikilat təht məmə Lasaros in tətəpəl əm.

¹⁴Kən Iesu təmən-ipən wir məmə, “Lasaros tinimis rəkis.

¹⁵Nian nikik tatuəh itəmat, nikik tagien məmə eməsətigən itimlau min, məto-inu nat u, otasitu etəmat məmə onəkotahətətə lak. Məto təwir məmə pəs kotuwīn motehm in.”

¹⁶Kən Tomas u, kətaun-in məmə Mil Mil, in tən-ipən kəm netəmim neen min rəha Iesu məmə, “Təwir, pəs kitat rafin kotuwīn, məmə kitat rafin okotimis əm kitat min.”

Iesu in nəukəti naiir-pa min e nimisən

¹⁷Nian Iesu təmīet-arəpən Petani, kən təməto məmə kəmitənim Lasaros, tinos nian kuwit rəkis.

¹⁸Latuənu u Petani, in iuəhkir əm o Jerusalem, okəmə naka suatip lan tahmen e kilomita kisil,

¹⁹kən netəm Isrel tepət kəmotuwa məmə okotehm Mata ne Meri motiləs-ipər nətəligən rəhalau məto-inun katuəto tərat o rəhalau kaka təmimis.

²⁰Kən nian Mata təməto məmə Iesu tatuwa, in təmətul muwīn məmə otəplan. Məto Meri, in təmatəpələh əm imə.

²¹Kən Mata təmən-ipən kəm Iesu məmə, “Etəm-iasol, okəmə ik nəmətatig ikin-u, okol rəhak kaka təməsimisən.

²²Məto io enitun əh məmə nat naka onəkətapəh-in kəm Uhgīn, kən Uhgīn otəpanos-ipinə kəm ik.”

²³Kən Iesu tən-ipən kəm in məmə, “Rəham kaka otəpanəmegəh min.”

²⁴Mata təmə, “Io ekitun məmə Lasaros otəpanəmegəh min e Namnun Nian, itəm netəmim rafin kəmotimis okotaiir-pa min.”

²⁵Kən Iesu tən-ipən kəm in məmə, “Io u, io Nəukəti Naiir-pa Minən e Nimisən, kən io min, io Nəukəti Nəmegəhən. Etəmim itəm in otahətətə lak, nat ərnapīn məmə in təmimis, məto in otəmegəh min.

²⁶Kən etəmim itəm tatəmegəh kən mətahatətə lak, in okol təsimis agin-əhən nian kit ne. ?Nəkatahatətə e nəghatən u rəhak?”

²⁷Mata tən-ipən kəm in məmə, “Əwəh, İərəməyə. İo enatahatətə lam, məmə ik Kristo itəm Uhgın təmən məmə otahl-ıpa. İk Nəti Uhgın. İk u inun, aupən netəmim kəmoatən məmə ik onəpanuwa e nətueintən.”

Iesu təmasək

²⁸Nian Mata tinən rəkis nəghatən u, kən muwın məmə otən-ipən kəm pian Meri tuwa. Təmuwın kən masiwən-in-pən e matəlgın məmə, “İəgətun tinuwa rəkis. Tolkeike məmə otəplan ik.”

²⁹Kən nian Meri təməto nəghatən u, təmətul uəhai əm, matuwın məmə otəplan İesu.

³⁰İesu in təsuwamən əh latuənu, in tatətul əh-ikin Mata təmuwın ikin mehm.

³¹Kən nian netəm İsrəl mın u itəm kəmoatəpələh imə ilat Meri, moatıləs-ıpər rəhan nətəlgən, kəmotəplan in təmətul uəhai əm matuwın ihluə, kən ilat kotuarisig-in. Nıkilat təht məmə tatuwın e suwıt, otasək.

³²Meri təmıet-arəpən u ikin İesu tatətul ikin, kən nian təməplan İesu, in təmısın nulin mən-ipən kəm in məmə, “Etəm-iasol, okəmə ik nəmətatıg ikin-u, kən okol rəhak kaka təsımısən.”

³³Nian İesu təməplan məmə pətan u ne netəmim mın un ilat mın koatasək, in təməto tərət pık, nıkin tıfım.

³⁴Kən in təmətapəh olat məmə, “?Nəmotitənım hıə?” Kən ilat kəmotən-ipən kəm in məmə, “Etəm-iasol, wa-tu məplan.”

³⁵İesu, nahwi nəmtın təməiəh.

³⁶Kən netəm İsrəl mın u, ilat kotəmə, “Ei, netəmim. !In təmolkeike pık agin-əh suah u taprəkis!”

³⁷Məto ilat neen mın koatən məmə, “Suah əh in əh aupən, təmol-wır ıganəmtın əpıs. ?Kən təhrol məsən-ıəhauən Lasaros məmə təsımısən?”

Iesu təmosmegəh mın Lasaros

³⁸Kən Iesu tēməto min tərət pik, kən in tēmuwin əpəh e suwit. Ilat kəmotitənīm Lasaros əpəh e nīpəg kəpiel kit, kən motiləs-ipən min kəpiel kit min motahtosig-in-pən nīpəg kəpiel lan.

³⁹Kən Iesu tən-ipən mēmə, “Otahwin rəkis-tu kəpiel.” Kən Mata u, wini Lasaros, tən-ipən kəm Iesu mēmə, “Etəm-iasol, in tinəpien rəkis. Kəmitənīm tinos nian kuwit rəkis.”

⁴⁰Məto Iesu tən-ipən kəm in mēmə, “?Təhrol? ?Ik ninaluin mēmə emən-ipinə rəkis kəm ik mēmə okəmə nakahatətə lak kən onəkəplan nəsanənən asol ne nepətən əhag-əhag rəha Uhgīn?”

⁴¹Tol nəhlan, ilat kəmotahwin rəkis kəpiel. Kən Iesu tēmuag-pər kən mēmə, “Tata, io iatən tagkiu kəm ik məto-inu nəməto rəkis rəhak nəghatən.

⁴²Kən ekitun mēmə e nian rafin, natəto io. Məto iatən nəghatən u, o netəm min u, itəm koatətul titəlau-in io, mēmə ilat okotahatətə mēmə ik nəmahl-ipa io.”

⁴³Kən əmun, nian Iesu tinən rəkis nəghatən u, in tēmaun əfəməh mēmə, “!Lasaros, ətul miet!”

⁴⁴Kən Lasaros tēmətul miet, matəmīk mətmətīg əm nīməhan min u itəm kəməlis ətain nelmin ne nelkin ne niganəmtin ne lan. Kən Iesu tən-ipən kəm ilat mēmə, “Otikis rəkis nīməhan min əh, pəs in taliwək.”

Netəm-iasol min rəha Isrel kəmotegəs-in suatip mēmə okotoh Iesu

(Mat 26:1-5; Mak 14:1-2; Luk 22:1-2)

⁴⁵Netəm Isrel itəm kəmotuwa o Meri kən motehm natimnat min u itəm Iesu təmöl, ilat tepət kəmotahatətə lan.

⁴⁶Məto ilat min neen kəmotuwin o Farisi min, kən motən-iarəp kəm ilat rafin natimnat min itəm Iesu təmöl.

⁴⁷Kən o nat u, Farisi min u ne pris asol min ilat kəmotaskəlim nuəfiminən asol kit rəhalat, kən ilat kəmotən kəm ilat min mēmə, “?Okotəhrol nulan? Suah əh tinatol nəmtətin tepət.

⁴⁸Okəmə okotapəs əm, tatol nəhlan, kən netəmim rafin okotahatətə lan, kən netəm Rom ilat okotuwa motərəkīn Nimə Rəha Uhgīn ne kantri rəhatat kən motos-irəkis ilau e nelmitat.”

⁴⁹Kən ilat kit u, nərgin u Kaeafas, in pris asol agin e nup əh. Tol nulan, in təmən məmə, “Itəmat nəkotəruru agin-əh nat u.

⁵⁰?Təhrol itəmat nəsoṭitunən? ?Itəmat nəsoṭitunən məmə təwir məsin otəmat məmə etəmim kitəh əm otimis o netəmim, taprəkis-in məmə kantri apiəpiə otimis?”

⁵¹Nian in tinən nəghatən u, in təməsən atipən e nətəligən əm rəhan. In pris asol agin e nup əh, kən in təmaupən mən-iarəp nəghatən itəm Uhgīn təmos-ipən kəm in. Kən in təmən məmə Iesu in otimis o nosmegəhən netəm Isrel.

⁵²Kən mətə rəhan nimisən, sənəmə o nosmegəhən netəm Isrel əm, mətə o nosməgəh minən nenəti Uhgīn min itəm kotan atit e nətueintən, kən mol ilat kotuwa motol kitəh əm.

⁵³Tol nəhlan, e nian əh, ilat kəmotegəhan-in məmə okotəkəike kegəs-in suatip kit o nohamnuən Iesu.

⁵⁴Kən o nat u, Iesu təsaliwək-arəp minən ikin min e Jutia, in təmagim ikin-u, muwīn əpəh e taon kit, nərgin u Efraim. Taon u, in iuəhkīr əm o ikin taruən-aruən ikin. Kən in mətətig ikin əh, ilat rəhan min netəmim.

Netəmim kəmoatol əpen-əpenə o nolən lafet rəha Nuhagego-inən

⁵⁵Tīnatuwa iuəhkīr o nian rəha lafet kit rəha netəm Isrel, nərgin u, lafet rəha Nuhagego-inən. Kən netəmim tepət kinoatiet ikin pişin pişin min minoatuwa Jerusalem məmə okotol natimnat min məmə ilat okotarətuəh e niğanəmti Uhgīn, paupən un, məpanotuwīn e lafet əh.

⁵⁶Kən netəm min əh kinoategəs-in Iesu. Kən nian kəmotuəfimin e Nimə Rəha Uhgīn, kinoatətapəh-ətapəh olat min məmə, “?Kəruru mə Iesu otuwa e lafet u, o kəp?”

⁵⁷Mæto e nian əh, pris asol min ne Farisi min kəmotələhəu nəghatən kit, məmə okəmə etəmim kit titun ikin Iesu tətatiḡ ikin, in otəkəike muwa mən-iarəpən kəm ilat, pəs mopael min kotuwīn motaskəlīm.

Jon 12

Meri təmau nelki Iesu e senta

(Mat 26:6-13; Mak 14:3-9)

¹Nian sikis əh-ikin tətatiḡ əh kəpənən e nian rəha lafet rəha Nuhagego-inən, kən Iesu tinitəliḡ-pa min Petani, imə Lasaros ikin. Suah u inu, Iesu in təmol in təmegəh min.

²Kən netəmim ikin-u, kəmotol nagwənən kit rəha Iesu. Kən Mata in tos nagwənən, muwa. Kən Lasaros min əh-ikin e nagwənən əh, ilat Iesu ne, koatəməhl-pən, moatagwən.

³Kən Meri təmos senta kit tatər e nuwigi nat, muwa. Senta u, kəmol e noki nato. Senta əh, nəmiəwīn təwir, kən nəmtin tiəkis. Kən in təmau nelki Iesu e senta u, kən mafəl e noanun. Nəmiəwi senta u, təmirəfin nīpəgnoa nimə.

⁴Mæto etəmim kit rəha Iesu, nərgin u Jutas Iskariot, suah un uarisig otəpanegəhan-in-pən Iesu e nelmi rəhan tikimir min, in təməhai ron. In təmən məmə,

⁵“?Ik nəkəruru nol-salim-in senta u, mos mənī lan, kən mos-ipən kəm ian-rat min? Senta u, in tahmen e tri-hanrit tenarius.

⁶In təmən nəhlan, mæto sənəmə in tatol nat aḡin e ian-rat min, mæto in təmən əm, mæto-inu in iakləh. In tatos kətim rəha mənī rəhalat, kən nian neen, in tətakləh-in.

⁷Mæto Iesu təmə, “Əpəs-tu pətan u. Sərəkinən rəhan nətəliḡən. In təmatələhəu wir senta u, məmə otau nīpətik, o nian əh itəm okitənim io lan.

⁸Ian rat min, nian rafin itəmat min ilat nəkotatiḡ. Mæto io, okol esatiḡən nian rafin kitat min itəmat.”

Pris asol min kəmotegəs-in min suatip o nohamnuən Lasaros

⁹Kən nian nīmanin netəm Jutia kəmotəto məmə Iesu tətatiḡ latuənu Petani, kən ilat kīnoatuwa ikin. Kəsotuwa əmən məmə okotehm Iesu, mətō ilat kotuwa mīn məmə okotəplan-tu Lasaros u təmīmis, kən Iesu tol mīn təmegəh.

¹⁰Kən əmun, pris asol mīn, kəmotegəhan-in mīn məmə okəkəike kohamnu mīn Lasaros,

¹¹mətō-inun nian netəm Isrel tepət kəmotəplan Lasaros təməmegəh mīn, kən ilat kəmotahatətə e Iesu, kən mīnotapəs rəhalat netəm-iasol mīn.

Iesu təmuwa Jerusalem matol əp in məmə in kig

(Mat 21:1-11; Mak 11:1-11; Luk 19:28-40)

¹²Kəmən lawiḡin, nīmanin netəmim itəm kəmoatuwa Jerusalem məmə okotol lafet rəha Nuhagego-inən, kəmotəto məmə Iesu tətaliwək mīnatuwa e taon.

¹³Kən tol nəhlan, ilat kəmotiet e taon u, moatəmīk nat kit tahmen e nīmali nəmīl moatuwin mə okotəplan Iesu. Kən moatagət əfəməh moatən məmə, “!Hosana! !Iərəmərə Uhgīn tətatiḡ ilau suah u itəm tatuwa e nərgīn! !Iərəmərə Uhgīn tətatiḡ ilau Kig u rəha netəm Isrel!”

¹⁴Kən Iesu təməplan nəti togki kit, kən tasuə lan maliwək matuwin. Natimnat mīn u, Naoa Rəha Uhgīn tīnəmən rəkis məmə,

¹⁵“Netəm Saeon, itəmat sotəḡinən. !Otəplan-tu! !Kig rəhatəmat tatuwa, in tītasuə e nəti togki maliwək matuwa!”

¹⁶E nian əh, netəmim rəha Iesu ilat kotəruru nīpəti nat u. Mətō uarisīḡ, nian Iesu tīnəmegəh mīn e nīmīsən, kən Uhgīn tīnol əp rəkis nepətən rəha Iesu, kən nīkīlat təpənəht məmə aupən, kəməte rəkis nəghatən lan e Naoa Rəha Uhgīn, kənu netəmim kīnotol nəghatən mīn əh tīnuwa mīnol nīpahrienən lan.

¹⁷E nian Iesu təmaun-in Lasaros, kən Lasaros tiet e nīpəḡ kəpiel məmegəh mīn, nīmanin netəmim tepət kəmotatiḡ ilat əh-ikin. Kən ilat əh kəmotətul-arəp mīnotən-iarəp natimnat mīn u in təmōl.

¹⁸Tol nəhlan, netəmim tepət kəmotuwa məmə okotəplan Iesu, mətō-inu koatətō məmə in təmōl nəmtətīn əh.

¹⁹Kən Farisi min kinoatən-ən kəm ilat min məmә, “!Otəplan-tu, okol kitat kəsotol agin-əhən nat kit. Roiu əh, netəmim rafin e nətuounən kinoatuarisig-in!”

Netəm Kris neen kəmotolkeike məmә okotəplan Iesu

²⁰Kən nian netəmim kəmotuwın Jerusalem məmә okotəfak e nian rəha lafet u, kən netəm Kris neen min əh-ikin ilat min, kəmoatəfak.

²¹Netəm Kris min u kəmotuwa motehm Filip. Filip in etəm Petsaeta əpəh Kalili. Kən ilat kəmotən-ipən kəm in məmә, “Etəm-iasol, iakotolkeike məmә ekotəplan Iesu.”

²²Kən Filip tətul muwın mən-ipən kəm Antru, kən ilau kəmian muən-ipən kəm Iesu.

²³Kən Iesu təmən-ipən kəm ilat məmә, “Roiu əh, Nəti Etəmim, rəhan nian tinuwa rəkis, məmә Uhgın otol əp rəhan nepətən əhag-əhag.

²⁴Nipahrienən agin u iatən kəm itəmat məmә, etəmim otəkəike mıtənim nikuti nat e nisip kən otimis. Okəmә təsimisən, kən okol təsəwiəən kən məsoeən. Məto okəmә otimis, kən otoe-in noan tərət, tərət.

²⁵Etəm nikin tatəht pık rəhan nəmegəhən e nətueintən u, in otəmkarəpən-in. Məto etəmim itəm nikin təsəht pıkən nəhlan rəhan nəmegəhən e nətueintən u, in otaskəlim wir nəmegəhən rəhan o nəmegəhən lilin.

²⁶Etəm tolkeike məmә otol wək rəhak, in otəkəike muarisig-in io, kən okəmә ikin pəhruən io ekatig ikin, kən in min, in otatig ikin-u. Kən etəm tatol wək rəhak, Tata Uhgın otisiai-in.”

Iesu təməghat-in nimisən rəhan

²⁷Kən Iesu təmən-ipən kəm ilat məmә, “Roiu əh, nıkik titahmə pık. ?Oekahrol min-nulan? Okol esənən məmә, “Tata, ohrəkis nahməən itəm tatuwa ron io.’ Natimnat u inu, io emuwa ron.

²⁸Tata, ik os-ipær atip nærgæm.” Kæn æmun, roiu agin-æh, ilat kæmotæto næwian kit tæmisi-pæn e neai tatæn mæmæ, “Io enilæs-ipær rækis nærgæk, kæn roiu æh, oekilæs-ipær min.”

²⁹Kæn netæmim itæm kæmotætul iuæhkir ron kæmotæto næwian æh, kæn ilat neen kotæmæ, “!Netæmim! ?Naka u? ?Kaluæluæ kit, o?” Mæto neen kotæmæ, “Nagelo kit æh tatæghat kæm in.”

³⁰Mæto Iesu tæn-ipæn kæm ilat mæmæ, “Næwian u, tæmæsuwamæn mæmæ io ekæto. Mæto tæmuwa mæmæ itæmat onækotæto.

³¹Roiu æh tinol nian itæm Uhgîn otakil nolæn ræha netæmim e nætueintæn. Roiu æh, in otoh-iæhau næsanænæn ræha Setan, iæræmæra ræha nætueintæn u.

³²Nian katilæs-ipær io ilis, kæn io oekiuw-pa netæmim rafin kotuwa ron io.”

³³E næghatæn u, in tinuhapik e nimisæn ræhan.

³⁴Kæn netæmim kæmotæn-ipæn kæm in motæn mæmæ, “Itimat enotæto rækis e Lou ræhatat, mæmæ nian Kristo itæm Uhgîn tæmæn mæmæ otahl-ipa tuwa, in otætätig lilin æm, matuwîn namnun tikæ. ?Tæhrol ik nakatæn mæmæ netæmim okotækæike motilæs-ipær Næti Etæmim? ?Mæto Næti Etæmim u, in pah?”

³⁵Kæn Iesu tæmæn-ipæn kæm ilat mæmæ, “Næhag-æhagæn u, tætätig otæmat o nian tækæku æm. Kæn nian næhag-æhagæn u tætätig otæmat, itæmat nækotækæike motaliwæk lan. Okæmæ kæpæ, kæn napinæpæn otiræfin itæmat. Kæn etæmim itæm tætalIWæk e napinæpæn, in tæruru ikin in tatuwîn ikin.

³⁶Nian næhag-æhagæn u tætätig æh otæmat, itæmat nækotækæike motahatætæ e næhag-æhagæn u mæmæ itæmat nakotuwa nenæti næhag-æhagæn.”

Netæm Isrel ilat kæmæsothahatætæn e Iesu

Nian Iesu tæmæn rækis næghatæn u kæm ilat, kæn magim mapæs ilat muwîn matæhluaig.

³⁷Nat æpnæpin mæmæ in tinol rækis næmtætin tepæt e niganæmti netæm Isrel, mæto ilat kæsothahatætæn lan.

³⁸Ien rəha Uhgín u Aesea, təmaupən matəghat-in rəhalat nolən. Kən nat u təmuwa məmə otol nəghatən rəhan tuwa mol nīpahrienən lan. In təmən məmə, “?Iərəmərə, pah otahatətə e nəghatən rəhatimat?

?Ekoatən-iarəp, kən pah otahatətə lan?

?Kən Iərəmərə otol əp kəm pah nahgín itəm təsanən pīk o nosmegəhən?”

³⁹Kənu ilat kotəruru nahatətən lan mətə-inu tahmen-pən əm məmə Aesea təmən-iarəp mīn aupən məmə,

⁴⁰“In təmol ilat məmə nīganəmtilat otəpīs. Okəmə təsəpīsən, kən ilat okotəplan nat kən motitun. Kən in tinahtosig-in rəkīs nīkilat. Okəmə təsələn, kən ilat okotenatīg kən motitun nəuhlinən nətəlīgən rəhalat, kən motahatətə lak, ekol nəmegəhən rəhalat tuwiwi mīn.”

⁴¹Ien rəha Uhgín, Aesea u aupən, təmən nulan mətə-inun in təməplan nepətən əhag-əhag rəha Iesu, kən tol nəhlan, in tatəghat-in.

⁴²Kən mətə, netəm-iasol mīn tepət məsīn, ilat mīn kəmotahatətə e Iesu. Mətə ilat koatəgín nən-iarəpən məmə ilat kəmotahatətə lan, mətə-inun koatəgín Farisi mīn məmə okotahl-iarəp ilat e nīmə rəha nuəfīmīnən,

⁴³mətə-inu netəm iasol mīn u, ilat kotolkeike pīk məmə netəmim okotənwiwi ilat, taprəkīs-in məmə Uhgín nīkin otagien olat.

Nəghatən rəha Iesu tītun nakilən nolən rəha netəmim

⁴⁴Kən Iesu təmagət əfəməh məmə, “Etəmim itəm tətahatətə lak, sənəmə tətahatətə pīsīn əm lak, mətə tətahatətə mīn e Uhgín itəm təmahl-ipa io.

⁴⁵Kən etəmim u itəm təməplan io, sənəmə təməplan əm io. In təməplan mīn Uhgín u təmahl-ipa io.

⁴⁶Io u nəhag-əhagən.Emuwa e nətueintən u, məmə etəmim itəm otahatətə lak, otəsətīgən e napinəpən.

⁴⁷Etəmim itəm tatətə rəhak nəghatən, məsolən, okol esən-iarəpən rəhan nalpīnən, mətə-inun eməsuwamən e nətueintən u məmə ekən-iarəp nalpīnən rəha netəmim. Mətə emuwa məmə ekosmegəh ilat.

⁴⁸Məto etəmim itəm tatəuhlin-pa məntaan kəm io, məsosən rəhak nəghatən, nat kit əh-ikin tətətig məmə in otən-iarəp rəhan nalpənən. O Namnun Nian, nəghatən min u rəhak, ilat okotən-iarəp nalpənən rəhan.

⁴⁹Tol nəhlan məto-inu nəghatən min u, sənəmə rəhak pisin əm, məto Tata Uhgın u təmahl-ipa io, kən in təmən məmə ekəkəike muwın mən nəhlan, kən mol nəhlan.

⁵⁰Kən io enəmitun rəkis məmə nəghatən min u, itəm in təmən-ipa kəm io, nəmegəhən lili tətətig lan. Kən tol nəhlan, nəghatən min u iakatən ilat, Tata Uhgın təmən-ipa kən məgətun io elat, məmə ekən mihin.”

Jon 13

Iesu təmau nelki rəhan netəmim

¹Tinuwa mətoarus nian netəm Isrel kotol lafet lan, lafet rəha Nuhagego-inən, kən Iesu tinitun məmə rəhan nian tinuwa rəkis məmə otiet e nətueintən u, muwın mehm Tata Uhgın. Nian rafin in təmatolkeike pik rəhan netəmim u kotətig e nətueintən, kən məto roiu in tatəgətun əsas rəhan nolkeikeən rafin kəm ilat.

²Tinehnaipən, Iesu ne rəhan netəmim min kəmoatəgwən, kən Setan tinatos-ipən-os-ipən rəkis kəm Jutas Iskariot, nəti Saimon, məmə in otosalim-in Iesu tuwın e nelmi tikimir min rəhan.

³Iesu təmitun məmə Tata Uhgın təmələhəu-pən rəkis natimnat rafin u e nelmin, kən tinitun min məmə in təmisi-pən o Uhgın, kən in otəpanitəlig-pən min o Uhgın.

⁴Tol nəhlan, in təmətul, kən mapeg rəkis rəhan sot asol, kən mətət-in tawil kit.

⁵Kən mİLəs pesin kit, mətu-pən nəhau lan, kən əmun mətuoun mətau nelki rəhan min netəmim, kən mətafəl e tawil, tawil u itəm in tatətət-in.

⁶Təmol mihin, muwın e Saimon Pita, kən Pita tən-ipən kəm in məmə, “?İərəmərə, təhrol? Təsəwirən məmə ik onakau nelkək.”

⁷Məto Iesu tən-ipən kəm in məmə, “Roiu ik nəkəruru nipəti nat u io iatol, məto uarisig un, onəpanitun nipətin.”

⁸Kən Pita tən-ipən kəm in məmə, “Okol nəsauən nelkək nian kit ne.” Məto Iesu təmə, “Okəmə ekəsauən nelkəm, kən okol ik nəkəsuwamən mol rəhak etəmim.”

⁹Kən Saimon Pita təməni-ipən kəm in məmə, “!Iərəmərə, okəmə tol nəhlan, kən onasauən əm nelkək, məto onakau min nelmək ne rəhk-kapə!”

¹⁰Kən Iesu tən-ipən kəm in məmə, “!Kəp! Etəm un tinaig rəkis, in tinəruən rəkis, tinahmen. Təwir əm məmə okəsau minən nipətin; məto io oekəike mau min əm nelkin. Itəmat ninotəruən rəkis. Məto sənəmə itəmat rafin agin-əh.”

¹¹Iesu tinitun rəkis məmə ilat pah un otegəhan-in-pən in e nelmi rəhan tikimir min. Tol nəhlan, kən in tən məmə, “Sənəmə itəmat rafin agin-əh.”

¹²Nian Iesu tinau rəkis nelki rəhan netəmim min, kən muwin min e rəhan napən, kən muwin min məpələh e nəmeen e tepil. Kən əmun mətapəh olat məmə, “?Itəmat nəkotitun nipəti nat u emol roiu agin etəmat?

¹³Itəmat nakotaun-in io məmə İəgətun ne İərəmərə, kən tətuatip əm nulan, məto-inun nipahrienən məmə io u, rəhatəmat İəgətun ne rəhatəmat İərəmərə.

¹⁴“Məto-inu io, io u rəhatəmat İərəmərə ne io İəgətun rəhatəmat, kənu io ekau nelkitəmat, kənu itəmat min, onəkotau nelkitəmat min.

¹⁵Io emol məgətun itəmat lan, məmə itəmat onəkotol nolən kitəh əm, məmə inu, emol mihin etəmat.

¹⁶Nipahrienən agin u iatən-ipinə kəm itəmat məmə, iolwək kit, in təsaprəkis-inən rəhan etəm-iasol, kənu iaht-ipən in təsaprəkis-inən etəm titahləpis.

¹⁷Roiu əh, itəmat nəkotitun wir natimnat min u. Kən o nat u, okəmə nəkoatol nulan, kən itəmat onəkotos nəwirən o Uhgın.

¹⁸“Io esənən itəmat rafin. Io ekitun wir itəmat min un itəm io emitəpun itəmat. Məto nəghatən u rəha Naoa Rəha Uhgın, otəkəike muwa mol nipahrienən lan. Nəghatən u tatən məmə, ‘Etəmim u, aypən itimlau

ematuagwən kələh e plet kitəh, məto roiu, in tinəuhlin rəhan nətəligən, minatol noa kəm io.’

¹⁹Io iatən-iarəp natimnat min u kəm itəmat u-roiu, nian okəsolən əh. Məto nian okatol, kən itəmat onəkotahatətə lak, məmə Io u inu.

²⁰Nipahrienən agin u iatən-ipinə kəm itəmat məmə, etənim pah itəm tatos rəhak iahləpis kən nikin tagien ron, tahmen-pən əm məmə in tatos min io, kən nikin tagien ron io. Kənu etənim itəm tatos wir io, kən nikin tagien ron io, tahmen-pən əm məmə in tatos wir min rəhak Tata, kən nikin tagien ron.”

Iesu təmən-iarəp məmə Jutas in otegəhan-in-pən in e nelmi tikimir min

(Mat 26:20-25; Mak 14:17-21; Luk 22:21-23)

²¹Nian Iesu tinən-iarəp rəkis nəghatən əh, kən nikin təməfigəm pik, kən in təmə, “Nipahrienən agin u iatən-ipinə kəm itəmat məmə, itəmat kit u ikin-u, otegəhan-in-pən io e nelmi tikimir min rəhak.”

²²Kən rəhan netənim min kəmotətag-pən motəplan ilat min. Nikilat natəht məmə kəruru məmə in tatən pah.

²³Kən ilat kit u itəm Iesu in tolkeike pik, in tataməhl iuəhkir əm o Iesu.

²⁴Kən Saimon Pita, in təmasgəwin-pən anion kəm in məmə, “Ətapəh-tu ron, məmə etənim pah əh in tatən.”

²⁵Kən suah əh təmiəu-iəu muwa iuəhkir o Iesu, kən mətapəh ron məmə, “?Iərəmərə, pah un nakatən?”

²⁶Kən Iesu təmə, “Io ekəmkas pīret məsin, kənu meer-pən e sup, kən mos-ipən kəm in, kənu suah u, inun.” Kən əmun, in təməmkas pīret kit, meer-pən e sup, kən mos-ipən kəm Jutas, nəti Saimon Iskariot.

²⁷Kən Jutas təmos pīret un. Kən Setan tinalpin rəhan nətəligən. Kən Iesu tən-ipən kəm in məmə, “Nat u nakəmə nakol, uwīn uəhai əm mol.”

²⁸Netənim min un rəha Iesu itəm kotəməhl titəlau e tepil moatagwən, ilat kəsotitunən məmə Iesu təmən-ipən nəghatən u kəm in o naka.

²⁹Jutas in titahtu kətim rəha məni rəhalat, kən ilat neen nikilat təht məmə Iesu təmən-ipən kəm in məmə otuwın mos-nəmtin nagwənən neen nigilat o lafet, o okəm-naka tatuwın otos-ipən məni neen kəm ian-rat min.

³⁰Kən nian Jutas təmos rəkis pıret u, təmətul miet uəhai əm. Kən tinapınəp rəkis.

Iesu təmən nəghatən wi kit məmə okotol

³¹Nian Jutas tiniət rəkis, kən Iesu təmə, “Roiu əh, Uhgın tinatıləs-ipər nərgi Nəti Etəmim, kən Nəti Etəmim tinatıləs-ipər nərgi Uhgın.

³²Məto nian Nəti Etəmim tinol əp rəkis nepətən rəha Uhgın, kən Uhgın atıp əm in otol əp min nepətən rəha Nəti Etəmim. Kən in otol əm huə roiu əm.

³³“Nenətik min, okol esatigən tuwəh kitat min itəmat. Kən itəmat onəpanotegəs-in io, məto io iakatən min əm nəghatən kitıəh əm kəm itəmat u-roiu, itəm ematən-ipən kəm netəm-iasol min rəha Isrel aupən. Ematən-ipən kəm ilat məmə, ‘İkin əh ekatuwın ikin, itəmat nəkotəruru nuwınən ikin.’

³⁴“Io iatən-ipinə nəghatən wi kit kəm itəmat məmə nəkotəkəike moatol. Itəmat nəkotəkəike motolkeike itəmat min. Tahmen-pən əm məmə io emolkeike mihin itəmat, kənu e nolən kitıəh əm, itəmat nəkotəkəike motolkeike itəmat min.

³⁵Kən okəmə nakolkeike nulan itəmat min, kən netəmim rafin okotıtun məmə itəmat rəhak min netəmim.”

Iesu təmən-iarəp məmə Pita otəpanən məmə in təruru Iesu

(Mat 26:31-35; Mak 14:27-31; Luk 22:31-34)

³⁶Kən Saimon Pita tətəpəh ron məmə, “?İərəmərə, ik onəkuwın hiə?” Kən Iesu tən-ipən kəm in məmə, “İkin əh io ekatuwın ikin, ik nəkəruru nətəu-pa-mən io roiu, məto uarisig un, onəpanuwa.”

³⁷Kən Pita tətəpəh ron məmə, “?İərəmərə, oekəsətəu-pənən ik u-roiu o naka? Io, nıkik tagien əm məmə ekimis ron ik.”

³⁸Kən Iesu tən-ipən kəm in məmə, “?Ik nakəmə nīkim tagien əm məmə onakimis ron io? Nīpahrienən agin u iatən kəm ik məmə, mənig otəsimmənən əh, kən ik onakən mau kīsil məmə nəkəruru io.”

Jon 14

Iesu in Suatip o nuwinən o Tata Uhgin

¹Kən Iesu təmən-ipən kəm ilat məmə, “Nikitəmat təsahməən. Itəmat nəkotəkəike motahatətə e Uhgin, kən motahatətə mīn lak.

²E nimə rəha Tata rəhak, noan tərət əh-ikin. Nəghatən u in nīpahrienən. Okəmə təsəl mihinən, okol enən-ipinə rəkis kəm itəmat. Roiu əh, io ekatuwin, ekol əpen-əpenə rəhatəmat.

³Kən mətə-inu ekuwin mol apen-pena otəmat, kən io oepanītəlig-pa mīn mos itəmat nakotuwa moatatig kitat mīn io, məmə itəmat onəkotatig ikin-u itəm io mīn iakətatig ikin.

⁴Ikin əh iakatuwin ikin, itəmat nīnotitun rəkis suatip rəhan.”

⁵Mətə Tomas tən-ipən kəm in məmə, “Iərəmərə, itimat ekotəruru ikin-un nakatuwin ikin. ?Ekotəhrol nulan motitun suatip tatuwin ikin əh?”

⁶Kən Iesu tən-ipən kəm in məmə, “Io u, suatip ron. Kən io un, nəukəti nīpahrienən, kənu io un, nəukəti nəmegəhən. Etənim kit okol təsuwamən o rəhak Tata okəmə io ekəsosən in muwin.

⁷Okəmə nəmotitun io, kən nəmotitun mīn rəhak Tata. Kən tol nəhlan, tətoun roiu, nīnotitun rəkis in, kən minotəplan.”

⁸Kən Filip tən-ipən kəm in məmə, “Iərəmərə, awi əgətun-tu Tata Uhgin kəm itimat. Nat əm u inu, itimat ekotolkeike.”

⁹Kən Iesu tən-ipən kəm in məmə, “Filip, io emətatig təfəməh kitat mīn itəmat. Mətə ik nəkəruru əh io. Etənim itəm tatəplan io, in tatəplan Tata Uhgin. ?Təhrol ik nakatən məmə, ‘Awi, əgətun Tata Uhgin kəm itimat?’

¹⁰?Ik nəsahatətəən məmə iakatig e Tata Uhgın, kənu Tata Uhgın tətatig lak? Nəghatən min u iakatən kəm itəmat, sənəmə rəhak əm. Tata Uhgın u, nian rafin, tətatig lak, inun in tatol rəhan min u wək.

¹¹Itəmat onəkotəike motahatətə lak nian io iatən məmə iakətatig e Tata Uhgın, kənu Tata Uhgın tətatig lak. Məto okəmə kəpə, təwir məmə nakotahatətə lak o nəfigəmən rəha nəmtətin min itəm ematol.

¹²Nipahrienən agin u iatən kəm itəmat məmə, etənim itəm tətahatətə lak, in otol nolən wək min un itəm io ematol. Əwəh, in otol nolən wək tər təhmin min taprəkis-in wək min un itəm io emol, məto-inun io oekatuwin o Tata Uhgın.

¹³Io Nətin, kən okəmə nakoteasiə-in nat kit e nərgək, nat ərnapın okəmə nakoteasiə-in nat naka, io epanol, məmə wək u rəha Nətin otıləs-ipər nərgi Tata Uhgın.

¹⁴Kən okəmə onəkoteasiə-in nat kit ron io, e nərgək, kən io ekol.”

Iesu təmən məmə Narmin Rəha Uhgın otuwa

¹⁵Kən Iesu təməghat əh matuwin, matən məmə, “Okəmə itəmat nakotolkeike io, kənu itəmat onəkotol nəghatən rəhak.

¹⁶Kən io, oekeasiə o Tata Uhgın məmə in otahl-ipa Iasitu kit min otəmat. Kən in otətatig lilin itəmat min.

¹⁷Suah un inun, in Narmin rəha Nipahrienən. Netənim rəha nətueintən u, okol kəsotosən in e nikilat, məto-inu ilat kəsotəplanən in, motəruru in. Məto itəmat, nəkotitun in, məto-inun in tətatig itəmat min. Kən in otəpanatig e nikitəmat.

¹⁸“Nian io ekiet etəmat, okol esapəsən itəmat nəkotatig pisin əm, tahmen e suakəlh. Io epanitəlig-pa min otəmat.

¹⁹Otəsuwəhən, netənim rəha nətueintən u ilat okəsotəplanən io. Məto itəmat onəpanotəplan io. Kən məto-inun io epanəmegəh, itəmat min onəpanotəmegəh.

²⁰O nian rəha natimnat min u, kən itəmat onəkotitun məmə iakətətig e rəhak Tata. Kən itəmat nəkotətig lak, kənu io ekətətig etəmat.

²¹“Etənim itəm təmos wir nəghatən rəhak, kən matol, etənim u inun in tolkeike io. Kən etənim itəm tolkeike io, rəhak Tata in otolkeike min in. Kən io min oekolkeike in. Kən io oekol əp io kəm in, məmə in otitun əsas io.”

²²Kən Jutas u, (sənəmə Jutas Iskariot, məto iahunin kit), in təmətapəh ron məmə, “?Iərəmərə, ik onakahrol nulan kən mol əp ik kəm itimat əm, məto onəsol əpən ik kəm netənim rəha nətueintən?”

²³Məto Iesu tən-ipən kəm in məmə, “Etənim itəm tolkeike io, in otatol nəwiak, kənu rəhak Tata in otolkeike in. Kənu io ne rəhak Tata, itimlau ekueia mətuatig itiməhal min. Kən itimlau ekioal imatimlau əh-ikin.

²⁴Etənim itəm təsolkeikeən io, in təsolən nəwiak. Nəghatən min u itəm nəmotəto ematən, eməsən atipən ilat. Məto emos ilat o rəhak Tata itəm in təmahl-ipa io ekuwa.

²⁵“Io iatən-iarəp nəghatən min u kəm itəmat nian etatig əh kitat min itəmat.

²⁶Məto Narmin Rəha Uhgin u, in Iasitu, itəm Tata Uhgin otahl-ipa e nərgək, in otəgətun itəmat e natimnat min rafin. Kən in otatol itəmat məmə nikitəmat otatəht natimnat min u itəm iatən kəm itəmat, məsotaluinən.

²⁷“Roiu əh tinuəkir məmə io oekapəs itəmat. Io iatələhəu nəməlinuən rəhak tətətig otəmat. Kənu nəməlinuən u, itəm iakatos-ipinə, təsahmenən e nəməlinuən itəm nətueintən u tatos-ipinə. Itəmat, nikitəmat təsahməən kən məsotəginən.

²⁸Itəmat ninəmotəto rəkis rəhak nəghatən, emən-ipinə kəm itəmat məmə, ‘Io oepanapəs itəmat, məto uarisig, oepanitəlig-pa min otəmat.’ Okəmə nakotolkeike pahrien io, kən nikitəmat otagien əm məmə nəkotəplan io iakatuwin o rəhak Tata, məto-inu in ilis taprəkis-in io.

²⁹Io iatən-iarəp rəkis əm natimnat min u kəm itəmat u-roiu, nian ilat kəsotolən əh, məmə nian ilat kinotuwa moatol nipahrien lan, kən itəmat onəkotahatətə lak.

³⁰Roiu əh, okol esəghatən təfəməh min kəm itəmat, məto-inun Setan u iərəmərə rəha nətueintən u, in tīnatuwa. In təsosən nəsanənən məmə otol win lak.

³¹Məto io iatol ətuatip əm nəwia Tata Uhgın məmə netəmim rəha nətueintən okotitun məmə io ekolkeike in. “Itəla, pəs kotətul motagım ikin-u, moatuwin.”

Jon 15

Iesu in tahmen e nəukət nig pahrien

¹Kən Iesu tatən məmə, “Io un, io ekahmen e nokət nig pahrien. Kən rəhak Tata in tahmen e etəmim itəm tatitasilin nig u.

²Nelmi nig min rafin itəm kəsotoeən, in tatəte rəkis ilat, kən nelmi nig min rafin u itəm koatəe, in tətəfəl wir ilat, məmə ilat okotəe-in noalat tərət.

³Itəmat nəkotahmen e nelmi nig u. Kən io enafəl wir rəkis itəmat e nəghatən min itəm iatən-ipinə kəm itəmat.

⁴Otəper-ipa lak, kən io oekəper-ipən etəmat. Nelmi nig otəsoeən okəmə in təsəper-ipənən e nəukətin. E nolən kitəh əm, itəmat okol nəmegəhən rəhatəmat təsoe-inən noan okəmə nəsoəper-ipamən lak.

⁵“Io u, io nokət nig. Kən itəmat nelmi nig min, nelmi nig min itəm koatətul-pən wir lak, moatəper-ipa. Nəmegəhən rəha etəmim itəm tatəper-ipa lak kən iatəper-ipən lan, in oəe-in noan tərət. Məto itəmat u, okəmə nəsoəper-ipamən lak, okol nəsolən nat kit.

⁶Okəmə etəmim təsəper-ipamən lak, in tahmen e nelmi nig kit, itəm kinəra kin kən tīnapə rəkis. Nelmi nig min tol nəhlan, kitun nəmikən kəra kin-pən e nigəm, kuwaan ətip.

⁷Okəmə itəmat nakotəper-ipa lak, kən nəghatən min rəhak kotəper-ipən etəmat, nat naka itəmat nakotolkeike, nəkotitun neasiə-inən. Kən Uhgın otol kəm ik.

⁸Nian nəmegəhən rəhatəmat oəe-in noan tərət, nat əh in tatiləs-ipər nərği rəhak Tata, kən e nolən u, tatəgətun məmə itəmat rəhak min netəmim.

⁹“Tata Uhgín in tolkeike pik io. E nolən kitiəh əm, io ekolkeike mihin itəmat. Otəper-ipən e rəhak nolkeikeən.

¹⁰Okəmə itəmat nəkoatol rəhak nəghatən, kən onəkotəper-ipa e rəhak nolkeikeən, tahmen ətuatip əm mə inun io emol nəghatən min rəha Tata Uhgín, kən iatəper-ipən e rəhan nolkeikeən.

¹¹Io ematən-iarəp nəghatən min u kəm itəmat, məmə nikitəmat otətagien, tahmen əm məmə io nīkik tətəgien. Kənu nikitəmat otəgien otəgien mərioah.

¹²Itəmat nəkotəkəike moatol nəghatən u rəhak. Tatən məmə itəmat onəkotolkeike itəmat min, tahmen əm məmə io ekolkeike mihin itəmat.

¹³Suah kit tikə itəm tolkeike pik in kit taprəkis-in etəmim un itəm tategəhan-in rəhan nəmegəhən məmə otosmegəh in min neen.

¹⁴Kən okəmə itəmat nəkotol natimnat min u iatən kəm itəmat, tatəgətun məmə itəmat un, io min neen.

¹⁵Io oesaun-in minən itəmat məmə iolwək min rəhak, məto-inun etəm tatol wək, in təruru natimnat min itəm rəhan etəm-iasol tatol. Məto roiu əh, io ekaun-in itəmat, məmə io min neen, məto-inun natimnat min rafin u itəm eməto o rəhak Tata, enən-iarəp rəkis kəm itəmat.

¹⁶Itəmat nəməsotitəpunən io, məto io emitəpun itəmat. Kən io emələhəu-pən itəmat məmə itəmat onəkotuwīn motol wək, kən wək rəhatəmat otəe-in noan. Kən noan un, in otətətig. Tol nəhlan, kən okəmə nakoteasiə-in natimnat min kəm Tata Uhgín e nərgək, kən in otos-ipinə kəm itəmat.

¹⁷Iatos-ipinə nəghatən kit kəm itəmat in tol nulan. Itəmat onəkotəike motolkeike itəmat min.”

Netəmim rəha nətueintən, ilat koatətəhau netəmim rəha Iesu

¹⁸Kən Iesu tən-ipən məmə, “Okəmə netəmim rəha nətueintən u koatətəhau itəmat, nikitəmat otəkəike muwəh məmə aupən, ilat kəmotətəhau mihin io.

¹⁹Okəmə itəmat netəmim rəha nətueintən u, kən netəmim rəha nətueintən okotolkeike itəmat, məto-inu rəhalat u itəmat. Məto sənəmə itəmat netəmim

rəha nətueintən u. Io enimitəpun rəkis itəmat, kən mos-irəkis itəmat o nətueintən. Kən o nat u inu, netəmim rəha nətueintən, kotetəhau itəmat.

²⁰Nikitəmat otəkəike matəht nəghatən u emən-ipinə rəkis kəm itəmat məmə, ‘Iolwək əm kit, təsaprəkis-inən rəhan etəm-iasol.’ Kən mətə-inu netəm rəha nətueintən u, ilat koatol tərət agin ron io, kən tol nəhlan, ilat okotol nolən kitiəh əm etəmat. Okəmə ilat kəmotol rəhak nəghatən, kən ilat okotol rəhatəmat nəghatən. Mətə ilat kəməsotol agin-əhən rəhak nəghatən min.

²¹Ilat okotol natimnat min nulan etəmat, mətə-inun itəmat rəhak min netəmim. Ilat okotol nəhlan, mətə-inu ilat kotəruru Uhgīn itəm təmahl-ipa io.

²²“Emuwa kən məghat kəm ilat. Tol nəhlan e noa nəghatən u, ilat kəmotəplan əsas rəhalat nolən rat min. Mətə kəmoatəuhlin məntalat ron io moatapəs rəhak nəghatən. Kən roiu, kol kəsotənən məmə rəhalat nolən rat tikə.

²³Etəmim itəm tetəhau io, in tetəhau min rəhak Tata.

²⁴Emuwa mol wək min u e niganəmtilat itəm kol etəm pisin kit təməsolən. Tol nəhlan, ilat kəmotitun məmə pah u io. Kən nat əpnəpin kəmotitun io, mətə koatetəhau io, kən tol nəhlan məmə koatetəhau min rəhak Tata. Kən roiu, kol kəsotənən məmə rəhalat nolən rat tikə.

²⁵Mətə natimnat min əh otəkəike mol nəhlan, kən mol məmə nəghatən u otuwa pahrien itəm netəm aupən kəmotəte rəkis e naoa rəha Lou. Rəhalat u Lou tatən məmə, ‘Io esolən nat kit elat, mətə ilat kotetəhau agin-əh io, moatol timəht kəm io.’

²⁶“Mətə nian Iasitu otuwa, in otatən-iarəp io. Narmin rəha Nipahrienən u, tətisi-pən o Tata Uhgīn. Io ekahl-ipa in tuwa otəmat.

²⁷Kənu itəmat min, onəkotəkəike motən-iarəp io, mətə-inu itəmat noatatig kitat min io e nətuounən e wək rəhak muwa mətəorus-pa u-roiu.

Jon 16

¹“Io enatən-iarəp natimnat min u kəm itəmat məmə rəhatəmat nahatətəən otəseiuaiuən.

²Ilat okəpanotəhg-iarəp itəmat e nimə min rəha nuəfiminən rəhalat; kən nipahrienən agin, nian əh-ikin tatuwa itəm netəm okotohamnu itəmat, kən nikilat təht məmə ilat koatol wək wir kit rəha Uhgīn.

³Ilat okotol natimnat min u, mətə-inun ilat kotəruru Tata Uhgīn, kən motəruru min io.

⁴Mətə io ekaupən matən-iarəp natimnat min u kəm itəmat. Kən nian ilat kinotətuoun minatol etəmat, kən nikitəmat otuəh məmə io enəmən rəkis natimnat min u kəm itəmat.”

Wək min itəm Narmin Rəha Uhgīn otəpanol

Kən Iesu təghat əh matuwīn, matən məmə, “Io eməsən-iarəpən natimnat min u kəm itəmat aupən, mətə-inu emətətig kitat min itəmat.

⁵Mətə roiu ekitəlig-pən min o rəhak Tata itəm təmahl-ipa io, mətə itəmat kit təsətapəhən ron io məmə, ‘?Ik onəkuwīn hiə?’

⁶Mətə roiu, tol nulan məmə emən natimnat min u kəm itəmat, kən nikitəmat təmāhmə.

⁷Mətə io iatən pahrien kəm itəmat məmə, otəwir pik otəmat məmə io ekagim tənīn itəmat. Mətə-inu okəmə esagim tənīnən itəmat, kən Iasitu okol təsuwamən matig itəmat min. Mətə okəmə io ekagim, muwīn, kən io ekahl-ipa in tuwa mətətig otəmat.

⁸Kən nian in otuwa, kən otəgətun netəmim rəha nətueintən məmə ilat iol təfagə rat, kən nətəligən rəhalat təsahmenən o nolən itəm tətuatip e niganəmti Uhgīn, kən nətəligən rəhalat təsahmenən o nakilən nolən rəha netəmim.

⁹Narmin u otəgətun ilat məmə ilat iol təfagə rat, mətə-inu kəsotahatətəən lak.

¹⁰Narmin u otəgətun kəm ilat məmə nətəligən rəhalat in təsahmenən o rəhalat nətuatipən e niganəmti Uhgīn, mətə-inu io ekitəlig-pən min o rəhak Tata, kən itəmat onəsotehmən io.

¹¹Narmin u otəgətun kəm ilat məmə nətəligən rəhalat in təsahmenən o nakilən nolən rəha netənim, məto-inu Uhgın in tinakil rəkis iəməmə rəha nətueintən u, Setan.

¹²“Io iatos natimnat tepət min əh-ikin məmə epanən kəm itəmat. Məto roiu əh, okol nəsotos rafinən ilat. Ilat kotiəkis pək əh otəmat.

¹³Məto nian Narmin rəha Nipahrienən otuwa, in otit itəmat, tol mə itəmat nəkotitun nipahrienən rafin. In okol təsən atipən rəhan əm nəghatən. In otən-iarəpən əm natimnat min u itəm in tatəto e Tata Uhgın. Kən in otən-iarəpənə min kəm itəmat natimnat min u itəm nian kit okəpanotuwa.

¹⁴In otəto nəghatən pahrien ron io kən matən-iarəp kəm itəmat. E nolən u, in otıləs-ipər io.

¹⁵Natimnat min rafin rəha Tata Uhgın, in rəhak. Tol nəhlan, kən io ekatən məmə, Narmin u, in otəto nəghatən pahrien ron io kən matol əp nipətin kəm itəmat.”

Otəsuwəhən okotəplan min Iesu

¹⁶Kən Iesu tən-ipən məmə, “Otəsuwəhən onəsotəplanən io, məto uarisig un, təsuwəhən, kən onəpanotəplan min io.”

¹⁷Kən netənim min neen rəhan, ilat koatətapəh-ətapəh kəm ilat min məmə, “?Nəghatən u, nipətin naka? In tatən kəm itat məmə, ‘Otəsuwəhən onəsotəplanən io, məto uarisig, otəsuwəhən, nəpanotəplan min io.’ Kən in tən məmə, ‘Məto-inu io iakatuwin o Tata Uhgın.’

¹⁸?Nəghatən u, ‘otəsuwəhən’ nipətin naka? Kitat kotəruru nəghatən min əh in tatən.”

¹⁹Kən Iesu tinitun rəkis məmə ilat kotalkeike məmə okotətapəh-in nat kit ron, kən in tən-ipən kəm ilat məmə, “?Tahro? Io emən məmə, ‘Otəsuwəhən itəmat nəsotəplanən io. Məto uarisig, təsuwəhən onəpanotəplan min io.’ ?Kən roiu nakotətapəh otəmat min o nipəti nəghatən u?

²⁰Nipahrienən agin u iatən kəm itəmat məmə, itəmat nikitəmat otahmə, itəmat onəkotasək pik, məto nətueintən, nikin otagien. Itəmat onəkotəto tərət pik agin, məto nahməən rəhatəmat otəuhlin-pa e nagienən.

²¹Nian okəmə tinuəhkir məmə pətan kit otemək, kən in tatəto tərət, məto-inun tinol nian rəhan məmə otəto nahməən e nipətın. Məto uarisig, okəmə nətın tinaiir rəkis, kən in nikin təsəht minən nahməən əh. In nikin tətagien pik məto-inu nətın tinaiir-pa e nətueintən.

²²E nolən kitiəh əm, roiu əh itəmat nakotəto tərət. Məto uarisig, kənu io ekəplan min itəmat. Kənu nikitəmat otagien otagien, okol etənim kit təsəl minən itəmat nikitəmat tahmə min.

²³O nian əh, itəmat onəsotətapəh-in minən nat kit ron io. Nipahrienən agin u iatən kəm itəmat məmə, okəmə itəmat nakotətapəh-in nat kit o Tata Uhgın e nərgək, kən in otos-ipinə kəm itəmat.

²⁴Mətoarus-pa u-roiu, itəmat nəsotətapəh-inən əh nat kit ron e nərgək. Otətapəh-in e nərgək, kən onəkotos, məmə nikitəmat otagien otagien mərioah.”

Iesu tinol win rəkis e natimnat min rəha nətueintən

²⁵Kən Iesu tatəghat əh matuwın matən məmə, “Io ematuəh nimaa nəghatən e natimnat min u, matən kəm itəmat. Məto nian əh-ikin tatuwa, itəm io ekəsueh minən nimaa nəghatən lan, məto oekəghat-in rəhak Tata kəm itəmat e nolən kit itəm itəmat onəkotıtun wir in.

²⁶E nian əh, itəmat onəkoteasiə-in natimnat kəm rəhak Tata e nərgək, məto io esənən məmə io ekuwin e nərgitəmat measiə-in natimnat ron

²⁷məto-inu Tata Uhgın, in əmun tolkeike pik itəmat. In tolkeike itəmat məto-inu itəmat nakotolkeike io, kən itəmat nəmotahatətə məmə io emisi-pən lan.

²⁸Io emisi-pən o Tata Uhgın, muwa e nətueintən u. Kənu roiu otəsuwəhən kən ekiet min e nətueintən u, mitəlig-pən min o Tata Uhgın.”

²⁹Kən netəmim rəhan min koatən məmə, “!In un! !Roiu əh ik nəsuəh minən nimaa nəghatən! Ik nakatən ətuatip əm kəm itimat.

³⁰Roiu əh enotitun məmə okəmə suah kit təsətapəh-inən əh nat kit ron ik, mətəo ik nəkitun nuhalpinən nəghatən min rafin itəm kəsətapəhinən əh. O nat u, tol kən itimat ekotitun məmə ik nəmisi-pən o Uhgın.”

³¹Kən Iesu tən-ipən kəm ilat məmə, “?Nipahrienən, itəmat nakotahatətə lak u-roiu?

³²Itəmat otətəlig-in-tu, nian əh-ikin tatuwa, nipahrienən məmə nian əh tinietarəpa rəkis, itəm netəmim okotitəp itəmat rafin, nakotaiu atit, motuwın imatəmat min ikin, motapəs io, io pisin əm. Mətəo okol io esan pisin əmən, mətəo-inu nian rafin rəhak Tata tətətig itimlau min.

³³Io enəmən-iarəp rəkis natimnat min u kəm itəmat, məmə rəhatəmat nətəligən oteiuaiu mətəo-inu nəkotatig lak. E nətueintən u, nahməən otepət otəmat, mətəo sotəginən, motətul məha-məha, mətəo-inu io enol win rəkis e nəsanənən rəha nətueintən.”

Jon 17

Iesu təməfak atip ron

¹Nian Iesu təməghat rəkis, kən mətəg-pər ilis e neai, kən matəfak matən məmə, “Tata, rəhak nian tinuwa rəkis. Io iakolkeike məmə ik onakiləs-ipər nərgi Nətim, məmə in min otəpaniləs-ipər nərgəm,

²mətəo-inu ik nəmos-ipən nəsanənən ne nepətən kəm in, məmə in otərəməərə e netəmim rafin, kən mitun min nos-ipənən nəmegəhən lilin kəm ilat min u, itəm ik nəmos-ipən ilat min kəm in.

³Kən nəmegəhən lilin u, nipətin u məmə netəmim okotitun ik, itəm ik əm un ik Uhgın pahrien, kən motitun min Iesu Kristo u, ik nəmahl-ipa.

⁴Io ematiləs-ipər nərgəm e nətueintən u, kən enol rafin rəkis wək itəm ik nəmos-ipa kəm io məmə iakol.

⁵Tata, roiu əh, tinol nian rəham məmə onakos io ekimnə mətətig kilau min ik. Ləs-ipər io mos-ipa nepətən əhag-əhag kəm io, tahmen əm mə inun, emos aupən kilau min ik e nian nətueintən u təmatikə əh.

Iesu təməfak o rəhan min

⁶“Netəm min u itəm ik nəmos-irəkis ilat o nətueintən mos-ipa ilat kəm io, io ematol əp nərgəm kəm ilat, məmə ilat okotitun ik. Aupən, ilat rəham min netəmim, mətə roiu ik nəmələhəu-pən ilat e nelmək, məmə ilat rəhak min netəmim. Ilat kəmoatətəu-pən rəham nəghatən,

⁷kən roiu əh, ilat kotitun məmə, natimnat min u itəm ik nəmos-ipa kəm io, ilat koatisi-pən əm ron ik.

⁸Ilat kotitun natimnat min u, mətə-inu ik nənəmən-ipa rəkis nəghatən kəm io, kən io emən-ipən kəm ilat, kən ilat koatos e nīkilat. Kən ilat motitun məmə nīpahrienən agin məmə io emisi-pinə ron ik, kən moatahatətə lak məmə ik nəmahl-ipa io.

⁹“Io iatəfak olat min u. Io esəfakən o netəmim rəha nətueintən, iatəfak əm o netəm min u itəm ik nəmos-ipa ilat kəm io, mətə-inun ilat u rəham min.

¹⁰Netəm min u iatos, ilat rafin rəham, kənu ilat rafin u itəm ik natos, ilat rəhak. Kən netəm min u, ik nəmol ilat məmə nəmegəhən rəhalat tatiləs-ipər nərgək.

¹¹Roiu əh iakatuwa ron ik, kən otəsuwəhən io esatigən u e nətueintən u. Mətə netəm min u, ilat okotatig əh e nətueintən u. Tata, ik nakətuatip agin. Awi, nakaskəlīm netəm min u kotatig wir e nəsanənən rəha nərgəm u itəm ik nəmos-ipa kəm io, məmə ilat okotatig kitiəh əm, tahmen məmə inu, kilau min ik kitiəh.

¹²Nian io emətətig itimat min ilat, kən ematipal wir olat, e nəsanənən rəha nərgəm əm itəm ik nəmos-ipa kəm io. Io ematehm wir ilat, esaiiroauinən kit. Kitiəh əm u itəm təməluə, inun itəm Uhgīn otəkəike mərəkin, kənu nat əh otol nəhlan, məmə otol nəghatən rəha Naoa Rəha Uhgīn otuwa mol nīpahrienən.

¹³“Roiu əh, iatuwa ron ik, məto iatən nəghatən min u nian etatig əh e nətueintən, məmə ilat min, nikilat otagien otagien, tahmen əm məmə io nīkik tətagien.

¹⁴Io emən-iarəp rəham nəghatən min kəm ilat. Kən tol nəhlan, netəmim rəha nətueintən u, kəsotolkeikeən ilat, koatətəhau ilat, məto-inun ilat sənəmə netəmim rəha nətueintən, tahmen əm məmə io sənəmə etəmim rəha nətueintən.

¹⁵Io esətapəhən ron ik məmə onakos-irəkis ilat e nətueintən u. Məto ekolkeike məmə ik onakahtosig-in etəm rat u, Setan, məmə in otəsuwamən mərəkin ilat. Ik onakīpal wir olat.

¹⁶Io, sənəmə etəmim rəha nətueintən u. Kən tol nəhlan, ilat min sənəmə netəmim rəha nətueintən.

¹⁷Rəham nəghatən in nīpahrienən rafin. Onəkol rəham nəghatən məmə in otol wək e nəmegəhən rəhalat məmə ilat netəmim pahrien rəham motasim motətuatip.

¹⁸Ik nəməhl-ipa io, ekuwa e nətueintən u, kən e nolən kitiəh əm, io enatahl-iarəp min ilat, kotuwīn e nətueintən.

¹⁹Kən io iatos-ipinə atip io məmə iakatasim o nolən nalpəkəuən rəham, məmə ekasitu e netəm min u, məmə ilat min okotasim motətuatip, kən ilat netəmim pahrien rəham.

Iesu təməfak o netəm okəpanotahatətə lan

²⁰“Io esəfakən əm o netəm min u, məto iatəfak min o netəm min u itəm okəpanotahatətə lak e nəghatən rəha netəm min u.

²¹Tata, io iatəfak olat, məmə ilat rafin okotuwa kitiəh əm, tahmen-pən əm məmə inun kilau kitiəh əm, kən iakətətig-pinə lam, kən ik nəkətətig lak. Iatəfak məmə ilat okotuwa kitiəh əm kitat min ik, məmə netəmim rəha nətueintən okotahatətə məmə ik nəməhl-ipa io.

²²Ik ninəmos-ipa rəkis nepətən kəm io, kən io iatawte-in kələh nepətən rəhak kəm ilat, məmə ilat okotuwa kitəh əm tahmen əm məmə kilau kətioal kitəh.

²³Iakətətig e nīkilat, kən ik nəkətətig lak. Tol nəhlan, iatəfak məmə, ilat okotuwa kitəh əm e natimnat min rafin məmə netəm min u rəha nətueintən, ilat okotəplan motitun məmə ik nəmahl-ipa io, kən məmə ik nəmolkeike rəham netəmimtahmen əm məmə inu, ik nəmolkeike mihin io.

²⁴“Tata, ik nəmos-ipa ilat u e nelmək məmə ilat rəhak min, kən io ekolkeike məmə ilat okotitun nuwamən ikin-u itəm io min ekuwin ikin, məmə ilat okotəplan nepətən əhag-əhag rəhak itəm io ekatos. Nepətən əhag-əhag u, ik nəmos-ipa kəm io, məto-inu ik nəmolkeike io aupən agin nian nətueintən u təmatikə əh.

²⁵“Tata, ik nakətuatip agin. Netəmim rəha nətueintən u, ilat kotəruru ik, məto io ekitun ik. Kən netəm min u rəhak min, ilat kotitun məmə ik nəmahl-ipa io.

²⁶Io emol əp ik kəm ilat, məmə ilat okotitun wir ik, kənu io, oiakatəkəike matol əp ik nəhlan, məmə nolkeikeən rəham otinip wir nīkilat, kən məmə io atip oiakətətig e nīkilat. Nolkeikeən u iakatəghat-in, in nolkeikeən rəham, tahmen mə inu ik nakolkeike mihin io.”

Jon 18

Tikimīr min rəha Iesu kəmotuwa motaskəlīm in

(Mat 26:7-56; Mak 14:43-50; Luk 22:47-53)

¹Nian Iesu təmaupən məfak, kəmotiet e taon u, kən moteguəfimin-pən entənipən-pən e noanapinat kit, nərgin un, Ketron. Kən ikin əh, kəmahwinu kit ikin. Kən Iesu ne rəhan netəmim min kəmotuwīn e niki nig min əh.

²Kən Jutas u, etəm u uarisig in otəpanegəhan-in Iesu kəm rəhan tikimīr min, in tinitun rəkis ikin əh, məto-inu nian neen, Iesu ne rəhan min netəmim ilat koatuəfimin ilat min ikin.

³Kən pris asol min ne Farisi min kəmotahl-ipən mopael min itəm koatətul o Nimə Rəha Ughin kotuwa motehm Jutas. Kən Jutas təmit netəm min əh ilat

mopael min neen rəha netəm Rom, mit ilat motuwın e niki nig olif əh. Ilat koatəmik noanisiə, ne lait min, ne natimnat rəha nəluaginən.

⁴Iesu tinəmitun rəkis məmə natimnat min u, in otuwa tol nulan, mətə in təmaliwək muwin olat, kən mətəpəh olat məmə, “?Itəmat noategəs-in pah un?”

⁵Ilat kəmotən-ipən kəm in məmə, “Etəm Nasaret kit, nərgin u Iesu.” Kən in tən-ipən kəm ilat məmə, “Io u inu.” (Kən Jutas, suah u itəm təmegəhan-in-pən Iesu e nelmilat, in tatətul ilat min.)

⁶Kən nian Iesu təmən məmə, “Io u inu,” ilat kəmotani məntaalat motitəlig, moteiuaiu motorin ilat e nisip.

⁷Kən Iesu tatig mətəpəh min olat məmə, “?Itəmat nakotegəs-in pah un?” Kən ilat kotəmə, “Etəm Nasaret kit, nərgin u Iesu.”

⁸Kən Iesu tən-ipən məmə, “Enən-ipinə rəkis kəm itəmat məmə, ‘Io u inu.’ Okəmə itəmat nakoategəs-in io, kən təwir məmə nakotəpəs netəmim min u, koatuwin latuənu.”

⁹In təmən nəhlan məmə nəghatən u itəm in tinəmən rəkis in otol nıpahrienən. Nəghatən u təmən məmə, “Tata, netəm min u itəm nəmələhəu-pən ilat e nelmək, okol esaiiroauinən kit.”

¹⁰Saimon Pita təmatiləs rəhan kit nisa rəha nəluaginən. Kən əmun, in təmiuw-iarəp rəhan nisa, mətə rəkis matelgi slef kit rəha pris asol agin, matəlgin matip. Nərgi suah un, Malkas.

¹¹Mətə Iesu tən-ipən kəm Pita məmə, “Aii-pən rəham nisa u e rəhan sipa. Ik onəkəike mitun məmə nahmən u rəhak, itəm Tata Uhgın in təmos-ipa kəm io, kən io ekəike mətəlig-in əm, mol.”

Ilat kəmotiləs Iesu motuwın tətul aupən e niganəmti Anas

(Mat 26:57-58; Mak 14:53-54; Luk 22:54)

¹²Kən mopael min rəha netəm Rom ne etəm-iasol rəhalat, ne mopael min rəha netəm Isrel, kəmotaskəlim Iesu, kən motəlis ətain nelmin.

¹³Kən kəmotaupən motiləs in motuwın tətul e niganəmti Anas. Anas un, in etəmaa Kaeafas. Kaeafas un, in pris asol agin e nup əh.

¹⁴Kən Kaeafas u inu, in aupən təmən kəm netəm-iasol rəha netəm Isrel məmə təwir pik məmə etəmim kitiah əm otimis o netəmim, taprəkis-in məmə netəmim rafin okotimis.

Pita təmən məmə in təruru Iesu

(Mat 26:69-70; Mak 14:66-68; Luk 22:55-57)

¹⁵Kən Saimon Pita ne etəmim kit min rəha Iesu, ilau kəmiauarisig-in Iesu. Etəmim u kit min rəha Iesu, pris asol agin in titun wir. Tol nəhlan, in təmətəu-pən Iesu, mian əpəh imə e iat rəha nimə rəha pris asol agin un.

¹⁶Məto Pita in təmatətul əm e ket. Kən etəmim kit min u rəha Iesu, itəm pris asol agin titun wir, in təmiet muwa ihluə, kən mən-ipən kəm pətan u itəm tatətul o ket. Kən in təmit Pita mian imə.

¹⁷Kən əmun, pətan un itəm tatətul o ket, təməplan Pita kən tətəpəh ron məmə, “?Ei, ik min un etəmim rəha suah əh?” Məto Pita təmə, “Kəpə, sənəmə io rəhan etəmim.”

¹⁸Kən e nian əh, in nian rəha nətəpən, kən iolwək min rəha pris asol agin, ne mopael min, ilat kəmotasiepən e noanəmkilip e nigəm, kən moatətul titəlau in, moatəto. Kən Pita min, in təmuwın motətul, moatəto nigəm.

Pris asol agin təməghat kəm Iesu

(Mat 26:59-66; Mak 14:55-64; Luk 22:66-71)

¹⁹Kən pris asol agin tatətapəh-in natimnat min o Iesu. Tatətapəh o netəmim min rəhan ne nəghatən min rəhan itəm təmatən matəgətun ilat lan.

²⁰Kən Iesu tən-ipən kəm in məmə, “Io ematən rəhak nəghatən min e niganəmti netəmim. Nian rafin, iatəgətun netəmim lan, əpəh e nimə min rəha nuəfiminən, kən əpəh e Nimə Rəha Uhgın, itəm netəm Isrel koatəpələh ikin nian rafin. Io esəhluaig-inən rəhak nəghatən min.

²¹?Təhrol nakətapəh-in nulan kəm io? Təwir mə nakuwin mətapəh o netəm kəmoatəto rəhak nəghatən min. Təwir nakuwin mətapəh o nəghatən min un emən-ipən kəm ilat. Ilat kotitun wir natimnat min u itəm ematən.”

²²Nian Iesu təmatən nəghatən əh, kən mopaēl kit itəm in tatətul e Nimə Rəha Uhgīn, in tatətul əh-ikīn, tēmēm nīkapīn, kən mēmə, “?Nakatən nulan e pris asol agīn o naka?”

²³Kən Iesu tən-ipən kəm in mēmə, “Okəmə emən nəghatən neen itəm təsətuatipən, təwir mēmə onakən-iarəp. ?Məto okəmə rəhak nəghatən min kotətuatip əm, təhrol nakatem io?”

²⁴Kən əmun Anas tahl-ipən Iesu tuwin o pris asol agīn u Kaeafas. Kən tatəmīk mətmətīg əm nol itəm kəməlis lan.

Pita tinən min mēmə təruru Iesu

(Mat 26:71-75; Mak 14:69-72; Luk 22:58-62)

²⁵Kən Saimon Pita tətul əh matəto nīgəm. Kən koatətapəh ron mēmə, “?Ei, ik min un, ik etəmim rəha suah əh?” Məto Pita təmə, “Kəpə, sənəmə io rəhan etəmim.”

²⁶Kən əmun, iolwək kit rəha pris asol agīn, in noanol kit rəha suah u Pita təmətatip matəlgin aupən, in təmən mēmə, “?Nīkik təht mēmə eməplan ik itəmat min əpəh e nīki nahwinuən, o kəpə?”

²⁷Məto Pita təmə, “Kəpə. Sənəmə io.” Kən roiu agīn-əh min, mənīg kit tīmnən.

Iesu in tēmətul aupən e nīganəmti Pailat

(Mat 27:1-2,11-14; Mak 15:1-5; Luk 23:1-5)

²⁸Kən laulaugin agīn-əh, kəmotīləs Iesu motiet e nimə rəha Kaeafas, motuwin e nimə rəha Pailat. Pailat in etəm Rom, məto in tatos nərəmərəən asol Isrel. Netəm Isrel koatos nətuakəmən kit rəhalat, ilat kəsotuwinən e nimə rəha etəm ik pīsin kit. Okəmə okotuwin imə, kən ilat koatən mēmə ilat kotamkīmīk e nīganəmti Uhgīn, kən ilat okol kəsotunən nagwənən rəha lafet rəha Nuhagego-inən.

²⁹O nātuakəmən u rəhalat, tol kən Pailat in tēmiet e rəhan nimə, muwa ihluə mə otəplan ilat. Kən in tēmətapəh məmə, “?Nipəgnəmti naka un itəmat noatehm-pən e suah u?”

³⁰Kən ilat kəmotən-ipən kəm in məmə, “Okəmə suah u in təsətğəhlən lou, okol esotiləsən in motuwa kəm ik.”

³¹Kən Pailat tən-ipən kəm ilat məmə, “Təwīr məmə itəmat onəkotiləs in motuwīn, kən itəmat motakil, tətəu-pən lou mīn rəhatəmat.” Məto ilat kotən-ipən kəm in məmə, “Məto netəm Rom əm ilat kotegəhan-in məmə kitun nohamnuən etəmim.”

³²Iesu təmatən aupən məmə in otimis nəhlan, kən natimnat mīn u kəmol məmə nəghatən mīn u rəhan okotuwa motol nipahrienən.

³³Kən əmun Pailat tuwīn mīn imə, kən maun-in Iesu tuwa mətul aupən-in niganəmtin, kən tətəpəh ron məmə, “?Təhrol? ?Ik kig rəha netəm Isrel?”

³⁴Kən Iesu tən-ipən kəm in məmə, “?Ik atip əm nakatətapəh nulan, o ik nakatətapəh məto-inu netəmim koatən-ipinə io kəm ik?”

³⁵Kən Pailat tən-ipən məmə, “?Təhrol? ?Ik nikim təht mə io etəm Isrel kit? Netəmim imam ikin əm ne pris asol mīn rəham, ilat kəmotegəhan-in-pa ik e nelmək. ?Ik nəmol nat naka?”

³⁶Kən Iesu təmə, “Io, esolən kig rəha nətueintən u. Okəmə io kig kit tahmen e kig mīn rəha nətueintən u, kən rəhak netəmim mīn okotəmou, motoh netəm mīn un itəm kotalkeike məmə okotos-ipən io e nelmi netəm-iasol rəha netəm Isrel. Məto io sənəmə kig kit rəha nətueintən u.”

³⁷Kən Pailat tətəpəh ron məmə, “?Məto nipahrienən məmə ik kig kit?” Kən Iesu təmə, “Ik nəmən məmə io kig kit. Io emaiir-pa e nətueintən u o nat kitiəh əm, məmə ekatətul-arəp matən-iarəp nipahrienən. Kən etəmim itəm nikin tagien məmə otətəu-pən nipahrienən, kən in tatətəlig-in rəhak nəghatən.”

³⁸Məto Pailat tən-ipən kəm in məmə, “?Naka un, nipahrienən?”

Pailat tēmakił mēmə Iesu in tēike mimis

(Mat 27:15-31; Mak 15:6-20; Luk 23:13-25)

Kən Pailat tēmiet min muwin mehm netəm-iasol min rəha netəm Isrel, mən-
ipən kəm ilat mēmə, “Io esəplanən nolən rat kit ne e suah u, itəm tatən mēmə
suah u tēmərəkin lou.

³⁹Meto e nolən rəhatəmat, e nian rəha lafet rəha Nuhagego-inən, nian rafin
iatikis suah kit mahl-iarəpən e kalapus. ?Kən təhrol? ?Itəmat nakotolkeike
mēmə io ekegəhan-in kən mikis kig rəha netəm Isrel?”

⁴⁰Kən ilat kotagət əfəməh motən mēmə, “!Kəpə! !Itimat ekotapəs suah un,
ekototolkeike Parapas!” Parapas un, in iakləh kit, kən in təmatəluagin
matohamnu itəm mēmə otəhg-iarəp kapman rəha Rom.

Jon 19

¹Kən Pailat təmos-ipən Iesu e nelmi rəhan mopael min, kən ilat kəmotalis-
alis.

²Kən kəmotəmik nol itəm tol nihlən-nihlən, motol hat lan, tahmen e hat rəha
kig, kən motəfauin-pən e rəhn-kapə. Kən motuwın-in-pən kot əfəməh kit kəm
in, tol nəgui-naris lan, tahmen e kot rəha kig.

³Kən ilat motuwa ron, moatol mīləh lan, kən moatən mēmə, “Ik u inu, kig
rəha netəm Isrel. Itimat ekotos-ipən nisiiəən kəm ik.” Kən ilat moatem-pən
əm nikapin.

⁴Kən Pailat tiet min muwin ihluə, kən matən-ipən kəm netəmim mēmə, “Ei,
netəmim. Io ekahl-iarəp min suah u tuwa ihluə, mēmə itəmat onəkotəplan-tu
mēmə io esəhmən nolən rat lan ne.”

⁵Kən Iesu tēmiet min muwa ihluə. In tatəfauin hat u itəm kəmol e nol itəm tol
nihlən-nihlən, tahmen e hat rəha kig, kən matuwın e kot əfəməh tol nəgui-
naris, tahmen e kot rəha kig, kən Pailat tən-ipən kəm ilat mēmə, “!Netəmim!
!Otəplan-tu! !Suah u inu!”

⁶Məto nian pris asol min ne mopael min itəm koatehm Nimə Rəha Uhgın
kəmotəplan, ilat kəmotagət əfəməh moatən mēmə, “!Okəht-ipən e nig

kəməluau! !Okəht-ipən e nig kəməluau!” Kən Pailat təmən-ipən kəm ilat məmə, “Itəla, itəmat pisin əm, otıləs motuwın, motəht-ipən in e nig kəməluau. Məto io esəplanən nolən rat kit ne lan.”

⁷Məto ilat kotəmə, “Rəhatimat kit əh-ikin lou tatən məmə in otəkəike mimis, məto-inu in tatən məmə in Nəti Uhgın.”

⁸Kən nian Pailat təməto nəghatən u, in təməgin pik təhmin min.

⁹Kən in təmatig muwın min imə, mətapəh o Iesu məmə, “?Ik etəm hiə?” Məto Iesu təsuhəlpinən rəhan nəghatən.

¹⁰Kən Pailat tən-ipən kəm in məmə, “?Təhrol nəsən-ipamən kəm io? ?Ik nəsitunən məmə io iatos nəsanənən məmə ekahl-iarəp ik, kən matos min nəsanənən məmə okəht-ipən ik e nig kəməluau?”

¹¹Kən Iesu tən-ipən kəm in məmə, “Okəmə Uhgın təməsölən nat u, okol ik onəsos agın-əhən nəsanənən məmə onakakil io. Tol nəhlan, nolən rat rəha suah un itəm təmos-ipinə io e nelməm, in tərət maprəkis-in rəham.”

¹²Kən tətouon e nian əh, Pailat təmolkeike məmə otikis Iesu. Məto netəm-iasol min rəha netəm Isrel koatagət əfəməh moatən məmə, “Okəmə nakikis suah u mahl-iarəp, kən ik sənəmə etəmim rəha Sisa. Etəmim u itəm tatən məmə in kig, in tikimir rəha Sisa.”

¹³Kən nian Pailat təməto nəghatən u, kən təmit Iesu muwa min ihluə. Kən in təmuwın e ikin kit, nərgin un, Lou Kəpiel Epin-Epin, e nəghatən Isrel, in Kapata, kən matəpələh-pər jea rəha nakilən.

¹⁴Tinuəkir mitgar tətul e tina, e nian ətuatip rəha nol əpen-əpenən o nolən lafet rəha Nuhagego-inən. Kən Pailat tən-ipən kəm netəm Isrel məmə, “!Ei netəm min əpə! !Otəplan-tu! !Suah u in kig rəhatəmat!”

¹⁵Məto ilat kəmotagət əfəməh, motən məmə, “!Ohamnu! !Ohamnu! !Əht-ipən e nig kəməluau!” Kən Pailat təmən-ipən kəm ilat məmə, “?Itəmat nakotolkeike mə io ekəht-ipən kig rəhatəmat e nig kəməluau?” Məto pris asol min kotəmə, “!Sisa əm un, in rəhatimat kig!”

¹⁶Kən Pailat təmegəhan-in-pən Iesu tuwin e nelmilat, məmə mopael min rəha Rom okotuwın motəht-ipən e nig kəməluau.

Mopael min kəmotətu-pər Iesu e nig kəməluau

(Mat 27:32-44; Mak 15:21-32; Luk 23:26-43)

Kən ilat kəmotiləs Iesu motuwın.

¹⁷In tatiləs nig kəməluau rəhan, matiet matuwın ikin kit min, nərgin un, Kolkota e nəghatən rəha netəm Isrel. Nipətın u, “Louipil-uipil.”

¹⁸Kən ikin əh, kəmotəht-ipən Iesu e nig kəməluau. Kən kəmotatig motəht-ipən min etəmim kəiu, kit e nikalın matip, kit e nikalın mol, kən Iesu in tatəkul ilugin elau.

¹⁹Kən Pailat təmən kəte rəkis nəghatən kit, kiləs kan kəht-ipən e rəhn-kapə nig kəməluau. Nəghatən u tatən məmə, Iesu, etəm Nasaret, kig rəha netəm Isrel.

²⁰Kən netəm Isrel tepət, ilat kotafin nəghatən u, məto-inu ikin əh kəmotəht-ipən Iesu ikin, in iuəhkir əm o taon. Kən nəghatən u, kəməte rəkis e nəghatən rəha netəm Isrel, ne nəghatən rəha netəm Rom, ne nəghatən rəha netəm Kris.

²¹Kən pris asol min rəha netəm Isrel, kəmotuwın motən-ipən kəm Pailat məmə, “Onəkəsəteən məmə, ‘Kig rəha netəm Isrel.’ Təwir mə onakəte ilə məmə, ‘Suah u in tatən məmə in kig rəha netəm Isrel.’”

²²Məto Pailat təmə, “Nat itəm eməte, eməte.”

Mopael min kəmotoor natimnat rəha Iesu

²³Kən nian mopael min kəmotəht-ipən rəkis Iesu e nig kəməluau, kən motəmik rəhan natimnat, kən kəmotoor ilat nəmtin kuwit, məto-inun mopael min ilat kuwit. Məto kot əfəməh rəhan, etəmim itəm in təmol niməhan, in təmisilpın-ilpınən niməhan lan, in təmol apiəpiə əm niməhan əh.

²⁴Kən mopael min u kinotən-ən kəm ilat min məmə, “Ei, təsəwirən məmə okotearəsin nat u. Təwir məmə okotatipin əm tais ron. Kən etəm tatol win lan, in titol rəhan u kot.” Nat u təmiet məmə otol nəghatən rəha Naoa Rəha Uhgın tuwa mol nipahrienən, u təmən məmə, “Ilat kəmotəmki-rəkis rəhak

natimnat. Ilat kəmotoor elat min. Kən ilat kəmotatipin tais məmə otəgətun məmə pah otos natimnat min əh.” Kən tol nəhlan, mopael min kəmotol mihin pahrien.

Iesu ne rəhan Mama

²⁵Kən iuəhkir əm o nig kəməluau rəha Iesu, nipitan kuwit kəmoatətul əh-ikin. Mama rəha Iesu, ne pia rəhan mama, ne Meri kit min, pətan rəha Klopas, kən iahunin kit min Meri pətan Maktala.

²⁶Kən nian Iesu təməplan rəhan mama ne suah un itəm in tolkeike pikkatuətul e nikalin, kən tən-ipən kəm rəhan mama məmə, “!Pətan, nətim un!”

²⁷Kən mən-ipən kəm suah u məmə, “Ik rəham u mama.” Kən tətoun e nian əh, suah u təmit pətan un mian iman ikin, kən in təmātehm wir in, tahmen e rəhan mama ətuatip.

Iesu tinimis

(Mat 27:45-56; Mak 14:33-41; Luk 23:44-49)

²⁸Kən uarisig lan, Iesu təmitun məmə wək min itəm in təmuwa məmə otol, tinol namnun rəkis. Kən o nolən nəghatən min e Naoa Rəha Uhgın tuwa mol nipahrienən lan, in təmən məmə, “Enoaoa.”

²⁹Kən pesin əkəku kit əh-ikin tatəpələh, kəmiuw-pən wain lan u tagin. Kən ilat kəmotiləs nat kit tame-ame tahmen e katən, kən moteer-pən e wain un, kən motatu-pən e nelmi nig katən mə hisop, kən motiləs-ipər tuwin iuəhkir o nohli Iesu, məmə otirim.

³⁰Kən nian in təmənım wain u məsin, kən məmə, “!Natimnat rafin tinol namnun!” Kən təmətag-iəhau, megəhan-in-pən rəhan namegən tiet, kən mimis.

Suah kit təmaru nikali Iesu

³¹Nian əh rəha nol əpen-əpenən, məto-inu okən lawigin un, nian rəha Sapat. (Kən Sapat u, in Sapat keike kit.) Kən netəm-iasol rəha netəm Isrel kəsotolkeikeən məmə nipəti suah miləhal əh okətəhaləkul e nig kəməluau

mətoarus-pən nian əh. Kən o nat əh, ilat kəmotuwın motətapəh o Pailat məmə otahl-ipa rəhan mın netəmim, kotuwın, motətgəhl nelkiləhal, pəs iləhal kəhalimis uəhai əm. Kənu ilat kotiləs-irəkis nıpətıləhal.

³²Kən mopael mın kəmotaupən motətgəhl nelki suah mil un kəiu itəm kəmotəht-ipən ilau e nig kəməluau iləhal Iesu.

³³Məto nian kəmotuwa o Iesu, motəplan məmə in tinimis rəkis. Kən əmun, ilat kəsotətgəhlən nelkin.

³⁴Kən mopael kit təmaru əm nıkalın e rəhan nıro, kən roiu agın-əh, nıta ne nəhau kəmuaıəh ahmen-ahmen əm, mətuatite e nıpətin.

³⁵(Kən suah kit əh-ikın tatətul, in təmehm natımnat mın u e nıganəmtın. Kən nəghatən mın rəha suah u, in tətuatıp, kən in titun məmə in tatən pahrien. Kən in tatən-ıarəp məmə itəmat mın onəkotıtun motahatətə lan.)

³⁶Natımnat mın u kəmotuwa məmə okotol nəghatən e Naoa Rəha Uhgın tuwa mol nıpahrienən lan, u tatən məmə, “Okol nıkilıkilin kit təsıtəgıtən.”

³⁷Kən nəghatən kit mın e Naoa Rəha Uhgın tatən məmə, “Ilat okotəplan suah u itəm kəmotaru.”

Josep ne Nikotimas, ilau kəmiatənım Iesu

³⁸Kən uarisig e natımnat mın u, etəm Aramatia kit, nərgın u, Josep. Josep u, in etəmim kit rəha Iesu, məto tatəhluaig-in nat u, məto-inun tatəgin netəm-iasol rəha netəm Isrel. In təmuwın məplan Pailat, kən tətəpəh ron məmə otegəhan-in pəs tiləs-irəkis nıpəti Iesu. Kən əmun, Pailat təmegəhan-in, kən in təmuwın mıləs-irəkis.

³⁹Kən Nikotimas, u aupən in təmuwın məplan Iesu lapın, in təmuwın ilau Josep. In tatıtıl kətım kit, təmərioah e nat pien-pien mın u mır ne alos. Kətım u təfıgəm tahmen e tate kilo.

⁴⁰Kən ilau kəmiäləs-irəkis nıpəti Iesu, mualpın e nıməhan wır kit, nərgın u linen. Kən ilau kəmiöal-pən mır ne alos e nıməhan u, tahmen ətuatıp əm mə inun netəm Isrel kotalpın mihın nıpəti etəmim, moatıtənım.

⁴¹Kən ikin əh kəməht-ipən Iesu ikin e nig kəməluau, kəmahwinu ikin, kən e ikin əh, nipəg kəpiel kit əh-ikin, itəm katitənim itəm ikin. Kən ikin əh, kəsitənim-pənən əh suah kit ikin.

⁴²Kən ilau kəmuələhəu-pən nipəti Iesu e nipəg kəpiel u, mətə-inu nian əh in nian rəha netəm Isrel koatol əpen-əpenə lan o Sapat, kən nipəg kəpiel itəm katitənim itəm ikin, in iuəhkir əm.

Jon 20

Iesu tinəmegəh min

(Mat 28:1-10; Mak 16:1-8; Luk 24:1-12)

¹E Sante, laulaugin agin, titapinəp-əpinəp əh, Meri u pətan Maktala, təmuwin e nipəg kəpiel, kən məplan məmə kəpiel asol itəm kəmahtosiğ-in nipəg kəpiel lan, in kəmahwin rəkis.

²Tol nəhlan, kən in təmaiu mitəlig muwin o Saimon Pita ne etəmim u kit min rəha Iesu, u Iesu tolkeike pək, kən mən-ipən kəm ilau məmə, “Ilat kəmotiləs-irəkis nipəti İərəməərə əpəh e nipəg kəpiel. Kən ekotəruru məmə kəmotələhəu hiə nipətin.”

³Kən Pita ne etəmim kit min u rəha Iesu, kəmiaiet mətian məmə okuəplan nipəg əh.

⁴Kəmuaiu əsanən mian, mətə suah u kit in təmaiu maupən maprəkis-in Pita, maupən muwin əpəh nipəg u ikin.

⁵Kən in təməməhl-əməhl mətag-pən əpəh imə, kən məplan niməhan wir u linen tatəməhl, mətə in təməsuwinən imə.

⁶Kən Saimon Pita in təmiet-arəpa min, kən megupən uəhai əm imə e nipəg kəpiel u, kən təməplan niməhan u koatəməhl,

⁷kən məplan min niməhan u kəmotəlpin rəhn-kapə Iesu lan aupən. Niməhan u, in təsəməhl-pənən ilat niməhan min un neen, mətə in kəmaiu-aiu wir kələhəu pisin.

⁸Etəmim u rəha Iesu itəm təmaupən, in min təmuwin imə e nipəg kəpiel, kən in təməplan natimnat min u, kən in təmatahatətə məmə Iesu tinəmegəh min.

⁹(Naoa Rəha Uhgın tatən məmə İesu otəkəike məmegəh min e nımısən, məto ilat kəsotıtun wırən əh nəghatən əh.)

Meri u pətan Maktala in təməplan İesu

(Mak 16:9-11)

¹⁰Kən etəmim mil un rəha İesu kəmiatəlig mətian iməlau ikin,

¹¹məto Meri in tatətul iuəhkır e nıpəg kəpiel u mətasək. Kən nian in təmətasək əh, kən məməhl-əməhl mətuag-pən əpəh e nıpəg.

¹²Kən əmun təməplan nagelo kəiu əpəh imə. Natımnat rəhalau in tərüən tərüən. İlau katuəpələh u ikin-u kəmələhəu-pən İesu ikin. Kitıəh tatəpələh e nəme rəhn-kapə, kən kitıəh e nəme nelkin.

¹³Kən ilau kəmuətapəh ron məmə, “Pətan. ?Ik natasək o naka?” Kən in təmən-ipən kəm ilau məmə, “İlat kəmotıləs-irəkis nıpəti İərəmərə rəhak, kən ekəruru məmə kəmotələhəu-pən hiə.”

¹⁴Nian in tınən rəkis nəghatən u, kən meirair, kən təməplan İesu tatətul əm u ikin-un, məto in təruru məmə İesu.

¹⁵Kən İesu təmətapəh ron məmə, “Pətan. ?Nakətasək o naka? ?Ik nategəs-in pah?” Məto pətan u, nıkin təht məmə okəmə naka suah u itəm tatıtasilin nahwınuən, kən in təmən-ipən kəm in məmə, “Etəm-iasol, okəmə ik nəmıləs-irəkis nıpətin, kən mələhəu-pən əh kit, awi, ən-ıpa-tu kəm io, pəs io ekuwin mıləs.”

¹⁶Kən İesu tən-ipən məmə, “Meri.” Kən Meri təmeirair, mətag-pən məplan, kən məmə, “!Raponi!” (İnu nəghatən rəha netəm İsrəl u, nıpətin təmə, “Rəhak İəgətun.”)

¹⁷Kən İesu təmən-ipən kəm in məmə, “Saskəlimən io, məto-inu io esuwınən əh əpəh ilıs o rəhak Tata. Məto ik, uwın, mehm piak min kən mən-ipən kəm ilat məmə io enatitəlig-pən ilıs o rəhak Tata, kən in min rəhatəmat Tata. In Uhgın rəhak, kən in Uhgın min rəhatəmat.”

¹⁸Kən Meri Maktala təmuwin məplan netəmim min rəha Iesu, kən tən-ipən kəm ilat məmə, “!Suah min əpə! !Io eməplan Iərəmə!” Kən in təmən-iarəp nəghatən min itəm Iesu in təmən-ipən kəm in.

Netəmim min rəha Iesu kəmotəplan Iesu

(Mat 28:16-20; Mak 16:14-18; Luk 24:36-49)

¹⁹E Santei ehnaipən, netəmim min rəha Iesu kəmotargəfimin ilat min əpəh e nimə kit, kən motahtosig e toa motol lok lan, məto-inu ilat koatəgin netəmiasol rəha netəm Isrel. Kən əmun, Iesu təmuwa mətul ilugin elat, kən mən-ipən kəm ilat məmə, “Pəs nəməlinuən tətətig otəmat.”

²⁰Kən in təmuraṗik nelmin kən mol-pən nīkalin kəm ilat, kən nīkilat təmagien ṗik məto-inu kinotəplan Iərəmə.

²¹Kən Iesu tən-ipən min kəm ilat məmə, “Pəs nəməlinuən tətətig otəmat. Tol mə rəhak Tata təmahl-ipa io, e nolən kitiah əm io etahl-ipən itəmat nakoatuwin e nətueintən.”

²²Kən nian in tinən rəkis nəghatən u, kən in təmehag-pən elat, kən məmə, “Itəmat, otos Narmin Rəha Uhgın.

²³Okəmə nəkotaluin nolən rat rəha etəmim, kən Uhgın min in otafəl rəkis nolən rat rəhan. Məto okəmə itəmat nəsotaluinən nolən rat rəha etəmim, kən Uhgın otəsaluinən kən məsafəl rəkisən.”

Iesu ne Tomas

²⁴Kən etəm tuelef u kit rəha Iesu, nərgin u Tomas, u kətaun-in məmə, Mil Mil, in təmikə e nian Iesu təmiet-arəpa olat.

²⁵Kən in min neen, ilat kəmotən-ipən kəm in məmə, “!Ei, emotəplan rəhatat Iərəmə!” Məto Tomas təmən-ipən kəm ilat məmə, “Okəmə ekəplan nəme nil e nelmin mil, kənu ekek e noanelmik, kənu mea-pən e nəme niro e nīkalin, kənu panahatətə lan. Məto okəmə esəplanən, okol esahatətən lan.”

²⁶Kən tinos wik kitiah rəkis, netəmim min rəha Iesu koatəpələh min əpəh imə, e nimə kitiah əm, kən motahtosig e toa, motol lok. Kən Tomas əh-ikin ilat

min. Nat əpnapin kəmol lok e toa, məto Iesu tatig muwa min mətul ilugin elat mən-ipən məmə, “Pəs nəməlinuən tətatig otəmat.”

²⁷Kən mən-ipən kəm Tomas məmə, “Əplan-tu nelmək. Wa mek e noanelməmə. Kən mæg-ətuatip-in nelməm kən meə-pən e nəme niro u e nikalik. Səmik mətmətigən rəham nahatətəən rəun, məto ik onəkəike mətahatətə lak.”

²⁸Kən Tomas tən-ipən kəm in məmə, “Ik rəhak İərəmərə, kən ik rəhak Uhgın.”

²⁹Kən Iesu tən-ipən kəm in məmə, “Ik nəmahatətə lak, məto-inu nəməplan io. Məto netəm min un kəsotəplanən io, kən ilat kotahatətə lak, ilat okotos nəwİRən pahrien, nİkilat tagien pahrien.”

Naoa u, kəməte məmə netəmim okotahatətə e Iesu

³⁰Iesu təmol nəmtətin min tepət e nİganəmtİ rəhan netəmim, itəm kəsəte rəkİsən e naoa u.

³¹Məto kəməte nəghatən min u məmə itəmat onəkotahatətə məmə Iesu in Kristo itəm Uhgın təmən məmə otahl-İpa, İnu Nəti Uhgın. Kəməte nəhlan, məmə itəmat onəkotos nəmegəhən e nərgın, məto-inu itəmat noatahatətə lan.

Jon 21

Iesu təmol əp in kəm rəhan netəmim ilat sepin

¹Uarisig e natİmnat min u, Iesu təmol əp min in o rəhan min netəmim, əpəh e nİməkləkil e nİkali lek asol, katən mə Lek Kalili. Kən təmol əp in nulan.

²E nİan əh, netəmim min u rəha Iesu kəmotaliwək kitİəh: Saimon Pita, ne Tomas u kətaun-in məmə Mil Mil, ne Nataniel u, etəm Kalili iman latuənu Kena, ne nəti Sepeti mil, ne etəmim mil kəİu min rəha Iesu.

³Saimon Pita tən-ipən olat məmə, “Io enatuwin ekatipin net.” Kən ilat kotəmə, “Itəla, pəs kitat rafin kotuwin.” Kən ilat rafin kəmotatite, motuwin e pot kit. Kən Pita təmapeg rəhan natİmnat o wək. Kən ilat kəmotuwin, motatipin net, motətoarus tian. Məto kəsotosən nəm kit ne.

⁴Kən tİnatian, kən Iesu tuwa matətul İpar, məto rəhan min netəmim, ilat kotəruru məmə Iesu.

⁵In tətəpəh olat məmə, “!Nəman! ?Nəsotosən nəm kit, o?” Kən ilat kotəmə, “Kəpə, nəm tikə.”

⁶Kən in tən-ipən kəm ilat məmə, “Itəla, otatipin-pən-tu net e matip ikin e nikali pot u, kən onəkotiuw nəm neen.” Kən əmun, kotatipin-iarəp net, əmun, minotəruru niuw-pərən, məto-inu net tınər minər minərrioah e nəm.

⁷Kən suah u itəm Iesu tolkeike pik, in tən-ipən kəm Pita məmə, “!Ei! !Iərəmərə ətuatip əh!” Kən nian Pita təməto nəghatən u, təmətəut uəhai əm, kən mətipən itəhəi, meai muwin ipar.

⁸Kən netəmim min u neen rəha Iesu, ilat kəmotuwar e pot, moatiuw net apon təmərrioah e nəm, məto-inu bot in iuəhkir əm məsin o niməkləkil, tahmen əm hanrit mita.

⁹Kən nian ilat kəmotuwın ipar, motəplan nigəm əkəku kit əh-ikin, nəmtahlın tatuəp əh, kən nəm neen əh-ikin, katuwan e nigəm, ne pıret əh-ikin.

¹⁰Kən Iesu tən-ipən kəm ilat məmə, “Otəmik nəm min un neen itəm nəmos motuwa.”

¹¹Kən Saimon Pita təmuwin min e pot, kən mewkəkan net muwin əpəh ipar. Net u tərrioah e nəm asol min, ilat rafin wan-hanrit-fifti-tri. Kən nat ərnapın məmə net u təmərrioah pap e nəm, məto in təməsəhapən.

¹²Kən Iesu təmən-ipən kəm ilat məmə, “Otuwa motagwən.” Kən ilat kit nıkin təsəhtən məmə otətəpəh ron məmə, “?Ik pah un?” məto-inu ilat kinotitun əsas məmə in Iərəmərə.

¹³Kən Iesu təmos pıret muwa mos-ipən kəm ilat, kən mos-ipən min nəm.

¹⁴Kən inu, nian tatol kışil lan, itəm Iesu təmol əp in o rəhan min netəmim uarisig e nian in təmimis, kən məmegəh min.

Iesu ne Pita

¹⁵Nian ilat kinotagwən rəkis, Iesu təmətəpəh o Saimon Pita, məmə, “Saimon, nəti Jon. ?Ik nakolkeike io taprəkis-in netəm min un?” Pita tən-ipən kəm in

məmə, “Əwəh, İərəmərə, ik nəkitun məmə io ekolkeike pik ik.” Kən İesu tən-ipən kəm in məmə, “İtəla, ik onakatagwən rəhak nenəti sipsip mın.”

¹⁶Kən İesu tatig mətapəh mın ron məmə, “Saimon, nəti Jon. ?Ik nakolkeike io?” In tən-ipən kəm İesu məmə, “Əwəh İərəmərə, ik nəkitun məmə iakolkeike ik.” Kən İesu tən-ipən kəm in məmə, “İtəla, ik onakatehm wir rəhak sipsip mın.”

¹⁷Kən mətau kisil lan, İesu tatig mətapəh mın ron məmə, “Saimon, nəti Jon. ?Ik nakolkeike io?” Kən Pita, nıkin təmahmə, məto-inu İesu təmətapəh ron mau kisil, məmə, “?Ik nakolkeike io?” Kən in tən-ipən kəm in məmə, “İərəmərə, ik nəkitun natımnat rafın. Ik nəkitun məmə io ekolkeike ik.” Kən İesu tən-ipən kəm in məmə, “İtəla, ik atagwən rəhak sipsip mın.

¹⁸“Nıpahrienən agın u iatən kəm ik məmə, aupən, e rəham netəm-aluəən, nəmatıargin atıp rəham kətət, kən mətalıwək matuwın ikin mın rafın itəm nakolkeike məmə nakuwın ikin. Məto nian ik onakaguıhl, onakəg-ətuatıp-in nelməm, kən etəm pısın kit otəlis ətain rəham kətət, kən mit ik nakian ikin ik nəsolkeikeən məmə nakuwın ikin.”

¹⁹E nəghatən u, İesu təmaupən matən-iarəp rəkis əm, nolən itəm Pita otımis, kən rəhan nımisən, in otıləs-ipər nərgi Uhgın. Kən İesu tən-ipən kəm in məmə, “İtəla, uarisig-in io.”

İesu ne suah un itəm İesu təmolkeike pik

²⁰Kən Pita teirair məplan etəmim kit rəha İesu u, İesu tolkeike pik, tatuarisig-in ilau. Suah əh inəh, itəm təmiəu-iəu muwa iuəhkır o İesu e nian kəmotagwən e lafet rəha Nuhagego-inən, kən mətətapəh ron məmə, “?İərəmərə, pah un otegəhan-in-pən ik e nelmi rəham tikimir mın?”

²¹Nian Pita təməplan in, kən tətəpəh o İesu məmə, “?İərəmərə, məto tahro e suah əh?”

²²Kən İesu tən-ipən kəm in məmə, “?Okəmə io ekolkeike məmə in otatəmegəh muwın mətoarus nian iakitəlig-pa mın, ik onəkıtun o naka? Ik un, ik onəkəike muarisig-in io.”

²³Kən tol nəhlan o nat u Iesu təmən, nəghatən kit əh-ikin katən titəlau-itəlau e piatat mīn məmə, “Etəmim u rəha Iesu otəsimisən,” mətə Iesu təməsənən kəm Pita məmə suah u otəsimisən. In təmən əm məmə, “?Okəmə, io ekolkeike məmə in otatəmegəh, mətəarus-pən iakitəlig-pa mīn, ik onəkītun o naka?”

²⁴Etəmim u rəha Iesu in etəmim kitəh əm itəm tatən-iarəp natimnat mīn u, kən in mətə rəkis nəghatən mīn u. Kən itimat ekotitun məmə nəghatən mīn u tatən, in nīpahrienən əm.

Namnun nəghatən

²⁵Kən natimnat tərət mīn əpəh ikin itəm Iesu təmol kən okəmə netəmim kəpoatəte rəkis natimnat mīn u ilat rafin e naoa mīn, io, nīkik təht məmə rum otikə e nətueintən rafin o nəlinən naoa mīn u.

Wək Mīn

Wək Mīn 1

Uhgīn tēmən mēmə otahl-ipa Narmin rəhan

¹Teofilas, e rəhak naoa itəm eməte aupən, eməte nolən mīn rəha natimnat rafin itəm Iesu tēmatol ne matəgətun netəmim lan.

²Naoa əh tatən-iarəp nian Iesu tēmətuoun rəhan wək mətəarus Uhgīn tēmīləs matuwīn e Nego e Neai. Mətə aupən, tēməsuwīnən əh e Nego e Neai, Narmin Rəha Uhgīn tēmətasiu lan mēmə otəgətun rəhan aposol mīn.

³E nian tēməmegəh mīn e nīmīsən, nian tepət tatuwa olat kən ilat kotəplan in e nian kitīəh kitīəh e nian foti, kən matol əp in kəm ilat mēmə okotitun mēmə in tēməmegəh pahrien e nīmīsən. Kən e nian mīn əh, tēmatəgətun ilat e nərəmərəən rəha Uhgīn.

⁴Nian Iesu tēmətatiɡ əh ilat mīn ilat, in tēmən-ipən nəghaten kit kəm ilat mēmə, “Itəmat onəsotaupənən motiet u e Jerusalem. Onəkotəkəike kətatiɡ motətoarus onəkotos Narmin Rəha Uhgīn, u rəhak tata tīnəmən-iəkis rəkis mēmə otos-ipīnə kəm itəmat, tahmen mīn mēmə inu io iatən-ipīnə kəm itəmat.

⁵Aupən Jon tēmatol baptais e netəmim e nəhau, mətə otəsuwəhən, Uhgīn in otol baptais etəmat e Narmin Rəhan.”

Uhgīn tēmīləs Iesu muwīn e Nego e Neai

⁶E nian mīn əh, itəm aposol mīn kəmotatiɡ ilat Iesu, kəmotətapəh ron mēmə, “?Iərəmərə, tīnuwa e nian ətuatīp əh-roiu mēmə ik onəkol kitat netəm Isrel okotərəmərə mīn e nītən mīn rəhatat, o kəp?”

⁷Mətə Iesu tēmən-ipən kəm ilat mēmə, “E nian mīn rəha natimnat mīn əh, Uhgīn tēməhluaig-in otəmat, okol itəmat nəsotitunən. Rəhak tata pīsīn əm, in tīnitəpun rəkis e rəhan nəsanənən.

⁸Mətə e nian Narmin Rəha Uhgīn otuwa matiɡ etəmat, itəmat onəkotos nəsanənən. Kən itəmat onəkotəkəike motuwīn motən-iarəp rəhak nəghatən

əpəh Jerusalem, ne ikin min əpəh Jutia, ne Sameria, kən ne ikin min rafin e nətueintən.”

⁹Nian təmən rəkis əm nəghatən əh kəm ilat, kən Uhgın təmİLəs-irəkis in tınər matuwın e neai. Nian ilat kəmoatəplan, kən napuə kit təmuwa malpin, kən ilat kəməsotəplan minən.

¹⁰Nian kəmotitagpər əh e neai moategəs-in, roiu agin-əh, suah mil kəiu kəmian e natimnat ruən kəmuet-arəpa muətul ilugin elat,

¹¹kən muən-ipən kəm ilat məmə, “!Netəm Kalili! ?Təhrol nəkoatətul ikin-u moatətagpər nəpo lan e napuə? Iesu əh itəm Uhgın təmİLəs-irəkis otəmat mİLəs mər matuwın e neai, in otəpanitəlig-pa min tahmen-pən əm e itəm əh, itəm tər matuwın.”

Aposol min

¹²Kən aposol min kəmotiet e nitot u katən məmə, Nitot Rəha Nig U Olif, motitəlig-pən Jerusalem itəm sənəmə in isəu pİK, in iuəhkir əm.

¹³Nian kəmotiet-arəpən Jerusalem, kəmotuwın e nİpəgnoa nimə kit əpəh ilis lan itəm koatatig ikin. Aposol min əh, nərgilat u Pita ne Jon ne Jemes ne Antru, kən Filip ne Tomas, kən Patolomiu ne Matiu, kən Jemes nəti Alfeas, kən Saimon Selot, kən Jutas nəti Jemes.

¹⁴Netəm min əh ne nİpitan min, ne Meri u mama rəha Iesu, ne pia Iesu min, ilat koatuwa moatəfak kitiəh nian tepət.

Etənim itəm otos nəme Jutas

¹⁵Nian neen tinuwa minuwın rəkis, kən netəm min u itəm koatahatətə e Iesu kəmotuwa kitiəh. Ilat tepət, tahmen e wan-hanrit-tuente ilat rafin. Kən Pita təmətul matəghat kəm ilat məmə,

¹⁶“Piak min ne winik min. Nəghatən rəha Naoa Rəha Uhgın otəkəike muwa mol nİpahrienən lan, itəm nuwəh aupən Narmin Rəha Uhgın təmos-ipən nəghatən kəm Kig Tefit, kən Kig Tefit təmən-iarəp suah u Jutas məmə in otit

netəmim motuwın kaskəlīm Iesu. Kən nəghatən əh tinuwa əh-roiu minol nipahrienən lan.

¹⁷Jutas kitat min kitiəh əm. Kən in rəhan əh-ikin wək itəm təmatol mətasitu etat.”

¹⁸(Jutas u inu təmos-nəmtin nəptən kit e məni u təmos e nolən rat itəm təmol. E nəptən əh, təmiet morin kən kəhap nərpın nisgan tiet.

¹⁹Kən netəm Jerusalem kəmotəto nəghatən əh, kəmotəun-in nəptən əh e nəghatən ikin məmə, “Akeltama,” nıpətın u məmə Nəptən e Nita.)

²⁰Kən Pita təmən məmə, “E Naoa Rəha Napuən Mın, nəghatən kit tatən məmə, ‘Təwir məmə rəhan nimə tatətul ənnapın əm, okol etəmim kit təsatığən ikin.’ “Kən nəghatən kit mın tatən min-nulan məmə, ‘Təwir məmə etəm pısın kit otuwa mos nəmeen mol wək rəhan.’

²¹⁻²²“Kən tol nəhlan, okotəkəike kilesipər suah kit itəm təmehm e nıganəmtin nəmegəhən rəha Iesu e nımisən, kən in otuwa mın mehm kitat məmə otən-iarəp Iesu məmə in İərəməərə rəhatat. Suah u, in suah kit itəm kitat min kəmoatan aupən e nian mın u itəm İərəməərə Iesu təmətaliwək lan. Suah un in suah kit itəm təmətatiğ nian Jon təmatən-iarəp nəghatən rəha nolən baptais etəm, muwa mətoarus-pən nian itəm Uhgın təmos-irəkis Iesu o kitat mıləs mər muwın e Nego e Neai.”

²³Kən ilat kəmotən-iarəp nərgi etəmim kəiu, kit nərgin u Josep u nian neen kətaun-in məmə Pasapas o Jastas, kən kit mın, nərgin u Matias.

²⁴Kən ilat kəmotəfak motən məmə, “İərəməərə, ik nəkitun niki netəmim rafın. Ik asitu etimat məmə suah mil u, in pəhrəun ik nınəmitəpun rəkis

²⁵məmə otaskəlīm wək u rəha aposol itəm Jutas təmapəs məmə otuwın e suatıp itəm tərat, iman ətuatıp ikin.”

²⁶Nian kəmotəfak rəkis, ilat kəmoturin kəpiel neen, kotahmen e tais, məmə otəgətun məmə pah otos wək əh, kən nərgi Matias təmiet. Kən ilat kəmotiləs-ıpən Matias məmə in aposol kit, kən roiu tinol mın tuelef aposol ilat rafın.

Wək Min 2

Narmin Rəha Uhgın təmuwa e nəmegəhən rəhalat

¹E nian rəha Pentekos, lafet kit rəha noanol min rəha Isrel, netəm min u itəm koatahatətə e Iesu kəmotuwa kitiəh.

²Kən roiu agın min, kəmotətə nat kit təmiş-i-pər e neai tahmen e nımətag asol kit tatelel nat, kən nat əh kəmotətə təmuwa mər rafin e nıpəgnoa nımə itəm koatəpələh ikin.

³Kən ilat kəmotəplan nat kit tahmen e nığəm təmuəp. Kən ləpləpin nığəm min əh, kəmotiwig motan ahmen-in netəmim rafin itəm koatəpələh əh imə.

⁴Kən ilat rafin, Narmin Rəha Uhgın təmuwa mərıoah mətatıg elat, kən minos-ıpən nəsanənən kəm ilat, mol ilat kinoatəghat e nəghatən ik pisin min.

⁵Kən noanol min neen əh-ikin rəha netəm Isrel itəm koatəfak kəm Uhgın. Ilat kəmotisi-pən ik pisin pisin min məto kotatıg Jerusalem.

⁶Nian ilat kəmotətə nəghatən min əh, netəmim tepət kəmotuwa. Kən ilat kəmotaut pik məto-inu kəmotətə nəghatən min rəhalat itəm netəm min əh koatən.

⁷Kəmotaut pik agın kən motən məmə, “!Ei! ?Netəm Kalili əm əh koatəghat, o kəp?”

⁸?Tahro kitat rafin koatətə rəhatat nəghatən min itəm ilat koatən?

⁹⁻¹¹Kitat u netəm ik pisin pisin min tepət. Ikin-u netəm Patia əh-ikin, ne netəm Metia, ne netəm Elam, ne netəm Mesopotemia, ne netəm Jutia, ne netəm Kapatosia, ne netəm Pontas, ne netəm Esia, ne netəm Fritia, ne netəm Pamfilia, ne netəm İjip, ne netəm Lipia e nıkalın-pən əh Saerin ikin, ne netəm Rom, neen noanol ətuatıp rəha netəm Isrel, neen netəm pisin məto koatəfak kəm Uhgın, ne netəm Krit, ne netəm Arepia. Məto kitat rafin kəmotətə ilat koatən nat asol itəm Uhgın təmol e nəghatən ik pisin min rəhatat.”

¹²Narmilat təmiwig pik, rehalat-kapə təmikə, kən kəmoatətapəh olat min məmə, “!Ei! ?Naka u tol nulan?”

¹³Məto neen kəmotalah-əmnu ilat, motən məmə, “Nat koatapis əpəh.”

Pita tēməghat kəm netəmim

¹⁴Kən Pita tēmətul ilat lepen aposol mīn, tēmagət əfəməh matən-ipən kəm netəmim məmə, “Itəmat rafin noanol mīn rəha Isrel ne netəm pisin pisin mīn u nakoatətig Jerusalem, otətəlig-in wir-tu io, pəs ekuhapik e nipəti nat əh kəm itəmat.

¹⁵Itəmat nakoatən məmə netəm mīn u koatapis. Məto kəp, kəsotapisən. Nain kilok əm əh-roiu laulaugin. ?Kən tahro ilat koatapis?

¹⁶“Məto in tol nulan. Ien rəha Uhgīn aupən, nərgīn u Joel, təmən rəkis nat u itəm itəmat nakoatəplan. In təmən məmə,

¹⁷Uhgīn təmən məmə, “E namnun nian mīn, ekos-ipən rəhak Narmin kəm netəmim rafin. Ilat rafin okotos nəsanənən lan. Nenətītəmat mīn, nəman ne nipitan, ilat okotən-iarəp nəghatən mīn rəhak itəm io iatos-ipən kəm ilat. Netəm aluə mīn rəhatəmat, Uhgīn otos-ipən nat kit tahmen e napilairən kəm ilat. Kən naguihl-aguihl mīn rəhatəmat okotapilair e napilairən pisin pisin mīn.

¹⁸Sənəmə netəm-iasol mīn əm, məto nəman ne nipitan ilat nolwək mīn əm rəhak, kən ekos-ipən Narmin rəhak kəm ilat. Kən ilat okotən-iarəp nəghatən mīn rəhak itəm iatos-ipən kəm ilat.

¹⁹Oekol nat pispis mīn əpəh e neai, ne nəmtətin pisin pisin mīn e nīməptən. Onəkotəplan nita ne nigəm ne nəhaniəm okotər motol napuə lan.

²⁰Aupən, mitgar otapinəp kən məwig otasiə tahmen e nita. Kən uarisig, Nian asol asol agin rəha Iərəmərə otuwa.

²¹E nian əh, netəmim rafin itəm okotaun-in Nərgək, io ekosmegəh ilat.”

²²“Noanol mīn rəha Isrel, itəmat otətəlig-in nəghatən u. Itəmat nəkotitun wir nat pispis mīn, ne nəmtətin pisin pisin mīn itəm Iesu təmol e nəsanənən rəha Uhgīn, itəm itəmat nəmotəplan. Natimnat mīn əh tatəgətun məmə Uhgīn in pisin əm təmahl-ipa Iesu tuwa.

²³E nalpəkauən rəha Uhgın itəm təmol mələhəu aupən, in təmos-ıpinə suah u e nelmitəmat. Kən itəmat nəmotohamnu in e nian nəmotegəhan-in-pən in tuwin e nelmi netəm rat kəsotəfakən. Kəmotoh kətu-pər e nig kəməluau.

²⁴“Məto Uhgın təmikis İesu e nahməən rəha nimisən, kən mol in təmegəh min e nimisən, məto-inu nimisən, rəhan nəsanənən tikə o naskəlīmən.

²⁵Tefit təmən nulan e İesu aupən məmə, ‘Nian rafin ekitun məmə İərəməərə tətətig itımlau min. Okol esəginən məto-inu tətətig e nıkalik itımlau min.

²⁶Məto-inu o nat əh, io nıkkik tagien pıkk, matənwiwi ik e nohlik. Kən nıkkik təməlinu məto-inu ekitun məmə Uhgın otosmegəh nıpətik.

²⁷Kən okol nəsapısən narmək tətətig ima netəm kəmotımis ikin. Kən okol nəsegəhan-in mınən nıpəti rəham Etəmim Ətuatıp məmə otəmnəmit.

²⁸Ik nəməgətun rəkis suatıp rəha nəmegəhən kəm io, kən ik onəkol io nıkkik tətəgien pıkk nian ekətətig kilau min ik.’ In əh nəghatən itəm Tefit təmən e İesu aupən.

²⁹“Piak min. İakolkeike məmə ekən nat ətuatıp kəm itəmat. İaguihl u pipi rəhatat aupən, Kig Tefit, in təmimis rəkis, kən kəmitənim, kən rəhan suwit tətətig imətət ikin mətoarus-pa u-roiu.

³⁰Məto in ien kit rəha Uhgın, kən in titun məmə Uhgın təmos noanawıl kit kəm in mən-ıəkis nəghatən kit kəm in məmə etəmim kit e nıta rəhan otuarisig-in otəkəike muwa mol Kig.

³¹Kig Tefit təməplan məmə nat u otəkəike muwa mol nıpahrienən lan. In təmən məmə Kristo əh, itəm Uhgın təmən məmə otahl-ıpa, in otol təmegəh min e nimisən, kən Uhgın otəsapəsən narmin tətətig ima netəm kəmotımis ikin, kən nıpətın okol təsəmnəmitən.

³²Kən nəghatən u tatəghat e İesu itəm Uhgın təmol rəkis təmegəh min e nimisən. !Kən itimat emotəplan e nıganəmtitimat!

³³İesu, rəhan tata təmıləs in mər muwin e nıkalın matıp e ikin rəha nisıaiiən ne nəsanənən. Kən tahmen-pən əm məmə Uhgın təmən-ıəkis mihin aupən, in

təmos-ipən Narmin rəhan kəm Iesu məmə Iesu otos-ipən kəm rəhan min. Kən natimnat min u, noatəplan, moatəto, Narmin Rəha Uhgın tatol.

³⁴Kig Tefit təməsuwinən e Nego e Neai tahmen e Iesu. Kən Tefit təməsəghat-in atipən in nian in təmən nəghatən min əh məmə, ‘Iərəməərə təmən kəm rəhak Iərəməərə məmə, “Əpələh e nıkalik matıp, ikin rəha nisaiiən ne nəsanənən, matəsahgin.

³⁵Oekol rəham tikimir min məmə okotahmen e nimoulul itəm nategotain e nəptən, kən ik matərəməərə elat.”

³⁶Itəmat rafin noanol min rəha Isrel onəkotəkəike motitun wir məmə Iesu əh itəm itəmat nəmotətu-pər e nig kəməluau, in əh, Uhgın təmol məmə in Iərəməərə ne Kristo - etəm itəm Uhgın təmən məmə otahl-ıpa.”

Netənim tepət kəmoatən nıpahrienən e Iesu

³⁷Nəghatən u rəha Pita təmek pahrien nıkilat, kən kotətapəh o Pita ne aposol min məmə, “Piatimat min. ?Oekol tahro nulan?”

³⁸Kən Pita təmən-ipən kəm ilat məmə, “Onəkotəkəike kəuhlin nətəligən rəhatəmat, kən kol baptais etəmat e nərgi Iesu Kristo, məmə Uhgın otafəl rəkis nolən rat min rəhatəmat. Kən Uhgın otos-ıpinə Narmin u kəm itəmat,

³⁹məto Uhgın təmən-ıəkis nəghatən u otəmat, ne nenətıtəmat min, ne namıpitəmat min itəm okəpanotuwa. Nəniəkisən u tətətig o netəm min u itəm Iərəməərə Uhgın rəhatat tətəun-in ilat.”

⁴⁰Kən Pita tatən nəghatən wir tepət məmə otiuw-pa ilat kotuwa, kən matən kəm ilat məmə, “Onəkotiet rəkis e netəm un, netəm kotərat məmə Uhgın otəsölən nalpinən kəm itəmat min ilat.”

⁴¹Kən ilat tepət itəm kəmotəto nəghatən rəha Pita kəmotən nıpahrienən lan, kən kəmol baptais elat. E nian əh, netənim tepət tahmen e tri-taosan kəmotuwa moatuarisig-in ilat u koatahatətə e Iesu.

Naliwəkən rəha netəm min u kəmoatən nıpahrienən e Iesu

⁴²Nian rafin netəm min u koatən nīpahrienən e Iesu, koatətəlig-in nəghatən itəm aposol min koatəgətun ilat lan. E naliwəkən rəhalat kəmoatuwa kitīəh, e nagwənən ne Nagwənən Rəha Nəmtətin Rəha Iesu, ne nəfakən. Kən nian rafin nikilat tiəkis məmə okotəkəike moatol nat əh.

⁴³Aposol min kəmotol nat pispis ne nəmtətin pisin pisin min e nəsanənən rəha Uhgīn. Kən netəmim narmilat təmiwig pik ron.

⁴⁴Netəm min u koatahatətə e Iesu, nian rafin koatuwa kitīəh moatawte-in rəhalat nautə min kəm ilat min,

⁴⁵tahmen e okəmə suah kit rəhan nat kit tikə, kən kit otol-salim-in rəhan kit nautə kən masitu lan.

⁴⁶Nian rafin kotuwīn katəfak kitīəh e Nimə Rəha Uhgīn. Kən kəmotuwīn e nimə pisin pisin min moatoor nagwənən nigilat e nagienən ne nikilat pahrien, kən kəmotagwən min e Nagwənən Rəha Nəmtətin Rəha Iesu.

⁴⁷Kən nian rafin koatənwiwi Uhgīn, kən netəmim koatenwiwi ilat o rəhalat nolən. Kən nian rafin Iərəməərə Uhgīn tatosmegəh netəmim kotuwa kitīəh ilat netəm koatahatətə e Iesu.

Wək Min 3

Uhgīn təmol nat pispis e etəm u nelkin tərət

¹Nian kit e tri kilok ehnaipən, nian rəha nəfakən, Pita ne Jon kəmuwalīwək mətian e Nimə Rəha Uhgīn.

²Suah kit itəm təsalīwəkən e nian təmaiir mətoarus-pa nian əh, kəmiləs ka kahtu e nafiluə e Nimə Rəha Uhgīn u katən məmə Nafiluə Təwir. Nian rafin tateasiə-in məni o netəmim itəm koatuwīn imə.

³Nian təməplan Pita ne Jon kinatian məmə okia imə, in təmətapəh olau məmə okios-ipən məni kit kəm in.

⁴Kən Pita ne Jon niganəmtīlau təmətul lan. Kən Pita təmə, “Ətag-pa mehm itīmlau.”

⁵Kən təmətag-pən məplan ilau nikin tatəht məmə otos məni kit olau.

⁶Kən Pita təmən-ipən kəm in məmə, “Rəhak məni tikə agin. Məto nat naka itəm io iatos, ekos-ipinə kəm ik. !E nərği İesu Kristo etəm Nasaret, iatən-ipinə kəm ik, ətul maliwək!”

⁷Kən in təmasitu lan, miləs nelmin matip miuw-pər məmə otətul. Kən roiu agin nelkin mil kəmuəg-ətuatip.

⁸Kən təmətīp mər mətul minataliwək, matətəu-pən ilau mətəhaluwın e Nimə Rəha Uhgın, kən minataliwək matətīpər-ətīpər matənwiwi Uhgın.

⁹Kən netəmim rafin kəmotəplan in tətaliwək matənwiwi Uhgın.

¹⁰Nian ilat kınotitun məmə suah ilouin inəh itəm tateasiə o məni nian rafin e nafiluə rəha Nimə Rəha Uhgın, kəmotaut pīk, narmilat təmiwig e suah əh.

Pita təməghat kəm netəmim əpəh e Nimə Rəha Uhgın

¹¹Nian təmatəkul-pən e Pita ne Jon, netəmim narmilat təmiwig ron, kotaiu motuwa məmə okotəplan iləhal e ikin kit e Nimə Rəha Uhgın u katən məmə Fəranta rəha Kig Solomon.

¹²Nian Pita təməplan ilat, kən təmən-ipən kəm ilat məmə, “Noanol min rəha Isrel. ?Tahro narmitəmat tatiwig pīk o nat pispis u? ?Noatarəplan itiməhal nikitəmat təht məmə itimlau etəm iasim mil kəiu emioal-wir suah u e nəsanənən əm rəhatimlau? !Kəp!

¹³O nat pispis u itəm nəmotəplan, Uhgın rəha Epraham, ne Aisak, ne Jekop, ne tīpītat min rafin, in təmīləs-ipər nərği rəhan iolwək lan, İesu. Inu etəm kitiəh əm İesu itəm nəmotīləs motuwın o netəm-iasol min rəha kapman məmə ilat okotohamnu, kən Pailat təmən rəkis məmə okisohamnuən okəhlman əm, məto itəmat nəmotən-ipən kəm Pailat məmə nəsolkeikeən in.

¹⁴Itəmat nəmotapəs İesu itəm in iol ətuatip ne etəm təwir e niganəmti Uhgın, kən nəmotətapəh o Pailat məmə otəhlman suah əh iohamnu itəm.

¹⁵Kən e nolən əh, itəmat nəmotohamnu İesu, itəm nəmegəhən rafin tətisi-pən ron. Məto Uhgın təmol təmegəh min e nimisən. Kən itimat emotəplan e niganəmtitimat məmə in nīpahrienən.

¹⁶Suah u itəm itəmat nəkotitun moatəplan, in təməsanən əm məto-inu itimat iotahatətə e Iesu ne nəsanənən rəhan. In nəsanənən rəha Iesu ne nahatətəən itəm təmos-ipa kəm itimat təmöl-wir suah u, kən itəmat rafin nakoatəplan.

¹⁷“Piak min. Io ekitun məmə nat un nəmotol e Iesu itəmat rəhatəmat netəm-iasol min, itəmat rafin nəmotol məto-inu nəsoititun wirən məmə Iesu in pah.

¹⁸Məto suatip u inu rəha Uhgın o nuhapikən rəhan nəghatən itəm təmən aupən. E nəghatən rəha rəhan min ien min, in təmən rəkis məmə rəhan Kristo itəm təmən rəkis aupən məmə otahl-ipa, in otəkəike məto nahməən e nıpətın.

¹⁹“Itəla, roiu əh, onəkotəkəike motəuhlin itəmat e rəhatəmat nolən rat min kən motitəlig-pən o Uhgın məmə in otafəl rəhatəmat nolən rat min, kən məmə İərəmərə Uhgın otos-ipinə namegən ne nəsanənən wi e nəmegəhən rəhatəmat,

²⁰kən məmə in otahl-ipa Kristo titəlig-pa min, etəm itəm Uhgın təmən rəkis aupən. İatəghat-in Kristo u Iesu.

²¹Məto Iesu otətətig pitən e Nego e Neai mətoarus Uhgın otol-wir min natimnat rafin tahmen-pən e itəm Uhgın təmən-İəkis kəm itəmat, itəm rəhan ien min aupən agın kəmotən-iarəp.

²²“Kən Moses təmən-iarəp məmə, ‘İərəmərə Uhgın otıləs-ipər ien kit min etəmat tahmen lak. Onəkotəkəike motətəlig-in natimnat rafin itəm otən kəm itəmat motol nəwian.

²³Netəm min u itəm okotəht nəwia ien əh, Uhgın otıləs-irəkis ilat o rəhan min netəmim kən ilat okotimis.’

²⁴Inu nıpahrienən. İen min rafin kəmotən əm nəghatən kitıəh, təmətuoun e ien u Samuel, muwa mətoarus-pa u-roiu.

²⁵“Nəniəkisən min u itəm Uhgın təmən-ipən kəm rəhan ien min aupən, in rəhatəmat. Kən nəniəkisən rəha nasituən itəm Uhgın təmən kəm tipitəmat min aupən, in rəhatəmat min, məto-inu Uhgın təmən-ipən kəm Epraham məmə, ‘Ekol təwir kəm netəmim rafin e nətueintən, kən nat kit itəm mipim İosmegəh otol, otos-ipən nəwirən əh kəm netəmim rafin.’

²⁶Nian Uhgín tēmīlēs-ipēr rəhan iolwək u Iesu Iosmegəh, tēmaupən mahl-
ipīnə kəm itəmat mēmə in otəuhlin itəmat e rəhatəmat nolən rat min, kən e
nolən əh, in otol təwīr kəm itəmat.”

Wək Min 4

¹Nian Pita ne Jon kəmatuəghat əh kəm netəmim, kən pris min, ne etəm
tərəmərə e mopael min itəm koatehm Nimə Rəha Uhgín, ne Satusi
min, kəmotiet-arəpa.

²Nikilat təmahmə pīk mətō-inu ilau katuəgətun netəmim mēmə Iesu tēmimīs
kən məmegəh min. Kən inu tatəgətun mēmə netəm u kəmotimīs, Uhgín
otosmegəh min ilat.

³Kən kəmotaskəlīm ilau, kīlēs-ipən ilau e kalapus mətō-inu tinapīnəp rəkīs,
kən okuəməhl əm mətōarus olauwig.

⁴Mətō netəmim tepət itəm kəmotətō nəghatən itəm kəmuən kəmotən
nīpahrienən lan. Kən netəmim rafin itəm kəmotən nīpahrienən e Iesu, ilat
iuəhkīr tahmen e faif-taosan.

Pita ne Jon kəmuətul e nīganəmti kaonsel

⁵Kəmən lawigin, pris asol, ne netəm-iasol rəha noanol min rəha Isrel, ne
iəgətun min rəha Lou rəha Moses, kəmotargəfimin ilat min əpəh Jerusalem.

⁶Kəmotəpələh ilat Anas u pris asol agin, ne Kaeafas, ne Jon, ne Aleksanta, ne
netəmim neen e noanol rəha suah u pris asol agin, kəmotəpələh e kaonsel.

⁷Kəmotən Pita ne Jon kian muətul aupən elat, kən kotətapəh olau mēmə,
“?Nəmios hiə nəsanənən u mioal nat u, o nəmioal e nərgi pah?”

⁸Kən Narmin Rəha Uhgín təmərīoah e niki Pita, kən Pita təmən-ipən kəm ilat
mēmə, “Itəmat u itəm noatərəmərə e noanol min rəha Isrel, ne netəm-iasol
min.

⁹Itəmat noategəs-in-pa otimlau mēmə suah u itəm nelkin təmərət təmos hiə
nəwīrən, o emuahrol nulan mioal-wīr nelkin.

¹⁰Itəmat rafin ikin-u ne noanol min rafin rəha Isrel, onəkotəkəike motitun məmə suah u itəm nelkin tinəwir rəkis tatətul aupən-in itəmat e nəsanənən əm e nərgi Iesu Kristo, etəm Nasaret. Suah əh inəh, itəmat nəmotətu-pər e nig kəməluau, in təmimis. Məto Uhgın təmol təmegəh min.

¹¹Suah əh inəh, itəm Naoa Rəha Uhgın təmən lan məmə, ‘Kəpiel u itəm itəmat netəm rəha niləkinən nimə, nakotəmə tərət motərakin, məto roiu in tinuwa kəpiel keike itəm nimə tatətul-pər lan.’

¹²Nərig kit tikə e nətueintən itəm Uhgın təmos-ipa məmə titun nosmegəhən netəmim, məto Iesu pisin əm titun nosmegəhən netəmim.”

¹³Netəm-iasol rəha kaonsel kəmotaut pik nian kəmotəplan məmə kəsuəginən ilat, nat əpnəpin kəsioalən skul, ilau etəmim əm. Kəmotitun ətuatip məmə suah mil əh ilat pahrien Iesu kəmotaliwək moatan.

¹⁴Kən kinotəruru nuhalpinən nəghatən rəhalau məto-inu suah u nelkin tinəwir rəkis tatətul iləhal min ilau.

¹⁵Kən kəmotən-ipən kəm iləhal məmə okəhaliət məhaluwın ihluə pəs ilat əm kotəghat pitən.

¹⁶Kən kəmoatətapəh-ətapəh olat min məmə, “?Okotahro suah mil əh? Netəmim rafin u Jerusalem kinotitun rəkis məmə nat pispis u kəmol e suah u, in iahgin pik, okol kəsotən-iamninən.

¹⁷Məto pəs kotən-iəhau əskasik ilau məmə okəsüən-iarəp minən nərgi Iesu kəm netəmim, kən nəghatən e nat pispis əh otəsiet minən netəmim kotəto.”

kaonsel təmegəhan-in ilau məmə okiaiet

¹⁸Kən kəmotəun-in iləhal kəhaluwa min imə, kən kəmotən-ipən kəm Pita ne Jon məmə okəsüən-iarəp minən nərgi Iesu, kən məsuəgətun minən netəmim lan.

¹⁹Məto ilau kəmuən-ipən kəm ilat məmə, “Itəmat əm otakil məmə tətəuətəp e niganəmti Uhgın məmə ekioal nəwiatəmat o nəwia Uhgın.

²⁰Mæto itimlau okol esuakimən nohlitimlau. Oekuæike muən-iarəp natimnat itəm emuəplan e niġanəmtitimlau kən muəto e matəlgitimlau.”

²¹Kən kaonsel təmən-ipən min kəm Pita ne Jon məmə ilat okotol nalpənən kit kəm ilau okəmə ilau okatuəkæike matuən-iarəp Iesu kəm netəmim, kən motahl-iarəp ilau. Kəmotahl-iarəp ilau mæto-inu kinotəruru məmə okotahruəh ilau. Kəmotitun məmə netəmim nikilat otahmə okəmə ilat okotol nalpənən kəm ilau, mæto-inu netəmim rafin koatənwiwi Uhgīn o nat piŋpiŋ itəm Uhgīn təmōl e etəm nelkin təməfaiu

²²nian təmāiir mætoarus-pa əh-roiu. Rəhan nup taprəkis-in foti.

Nəfakən rəha netəm kəmoatahatətə e Iesu

²³Nian netəm-iasol rəha kaonsel kəmotegəhan-in ilau məmə ilau okatian, kəmiaiet uəhai əm mian əpəh netəm koatahatətə e Iesu koatatig ikin, kən muən-iarəp rafin nəghatən itəm pris asol min ne netəm-iasol rəha kaonsel kəmotən-ipən kəm ilau.

²⁴Nian kəmotətə nəghatən əh, ilat rafin kəmotuwa kitih motəfak-pən kəm Uhgīn motən məmə, “Iərəmərə Uhgīn, ik nəmōl neai, ne niməptən, ne nitəhəi, ne natimnat rafin elat.

²⁵Ik nəməghat e nəsanənən e Narmin rəham kəm tipitimat u aupən Kig Tefit, u in rəham iolwək, kən in təmən-iarəp rəham nəghatən məmə, ‘?Tahro netəm e nəptən piŋin piŋin min nikilat titahmə pik nəhlan? Tahro ilat koatəte noa məmə okotol nəratən min əh, u itəm okol koatol pap, təsuwinən miet, otikəpən əm olat.

²⁶Netəm koatərəmərə e nitən min, koatol əpen-əpenə okotəmou, kən netəm-iasol min rəha nətueintən koatuwa kitih ilat min ilat, məmə okotəmou ilat Iərəmərə Uhgīn ne Iosmegəh itəm in təmən’

²⁷Iərəmərə Uhgīn, in nipahrienən nəghatən itəm Kig Tefit təmən tinuwa minet-arəp, mæto-inu Kig Herot Antipas, ne Pontias Pailat, ne noanol min rəha Isrel, ne Iaihlua min, ilat rafin kəmotuwa kitih ikin-u latuənu

Jerusalem, moatol noa eko-eko mēmā okotohamnu Iesu, itəm in rəham iol ətuatip itəm nəmitəpun.

²⁸Kəmoatəte noa rəhalat tatətəu-pən əsas əm rəham nəghatən itəm ik ninəmən rəkis e nəsanənən ne nenatigən rəham aupən.

²⁹Tol nəhlan, Iərəmərə, nikim tatəht nəghatən itəm ilat kəmoatən mēmā okotoh itimat, ol itimat rəham iolwək min mēmā esotəginən mēmā ekotən-iarəp rəham nəghatən.

³⁰Əgəfəməhin-pa nelməm mēmā otol-wir netəm koatimis, kən mol nat pişpiş min ne nəmtətin pişin pişin min e nərgi Iesu, rəham iol ətuatip.”

³¹Nian kəmotəfak rəkis, kən nat kit təməloal e nimə, kən Narmin Rəha Uhgın təmuwa mərioah mətatig elat, kən kinoatən-iarəp nəghatən rəha Uhgın məsotəginən.

Netəm kəmoatən nipharienən e Iesu koatoor nautə rəhalat kəm ilat min

³²Netəm koatən nipharienən e Iesu rəhalat nətəligən təmuwa kitəh. Kit təməsaumisən məhluaig-in rəhan nautə məto kəmoatoor nautə rəhalat kəm ilat min.

³³Kən aposol min kəmosos nəsanənən e Narmin Rəha Uhgın kən moatən-iarəp mēmā Iərəmərə Iesu təmegəh min e nimisən. Kən e nəwirən rəha Uhgın, in tətəsitə elat rafin itəm koatəfak.

³⁴Kən ilat kit, rəhan kit nat kit təməsikəən, məto-inu netənim neen kəmososalim-in rəhalat nəptən o nimə, kən motos-ipən məni lan kəm aposol min,

³⁵kən ilat kəmoatoor kəm itəm min u rəhalat nat kit tikə.

³⁶Tol nəhlan, suah kit əh-ikin nərgin u Josep, noanol kit rəha Lifae, etəm Saepras, aposol min kəmosos-ipən nərig wi kit kəm in, nərgin u Panapas, u nipətin təmə, “etəm tətəsitə matiləs-ipər nətəligən.”

³⁷In təmosalim-in rəhan kit nəptən, kən məmik məni lan muwa məmki-pən kəm aposol min mēmā ilat okotoor kəm ilat min.

Wək Min 5

Ananaeas ne Safaera

¹Məto suah kit min əh-ikin, nərgin u Ananaeas, ne rəhan pətan nərgin u Safaera. Ilau min kəmioal-salim-in rəhalau kit nıməptən.

²In təmaskəlīm anion məni məsin, kən rəhan pətan əm titun. Kən məmik əm məsin muwin məmki-pən kəm aposol min məmə məni e nəptən rafin.

³Məto Pita təmən-ipən kəm in məmə, “Ananaeas. ?Tahro nategəhan-in iərmis u Setan tatuwa e nıkim? Nakateiuə-in Narmin Rəha Uhgın kən mətaskəlīm anion məni məsin rəha nıməptən məmə rəham.

⁴?Aupən nıməsosalim-inən nıməptən u, in rəham o kəp? ?Kən nian nəmosalim-in, rəham məni lan o kəp? ?Tahro natol nuhlan? !Ik niseiuə-inən etəmim, məto nateiuə-in Uhgın!”

⁵Nian Ananaeas təməto nəghatən əh, əmun misi-pər morin rəhan namegən tiet. Kən netəmim itəm kəmotəto nat əh, kəmotəgin motasiəp.

⁶Kən netəm aluə min kəmotuwa motalpin nıpətin motiləs motiet motuwin kitənim.

⁷Iuəhkır aua kisil təmuwa muwin rəkis, kən rəhan pətan Safaera təmıet-arəpa məruru məmə rəhan iərman tinimis rəkis.

⁸Kən Pita təmətapəh ron məmə, “?Ən-tu kəm io məmə məni e nəptən rafin əh rəhatəlau itəm nəmiosalim-in?” Kən in tən məmə, “Əwəh. Məni rafin un.”

⁹Kən Pita təmən-ipən kəm in məmə, “?Tahro nəmatioal anion noa kit məmə nakueiuə-in Narmin Rəha İərəmərə məmə okol təsitunən nat u nəmioal? !Əto-tu! Netəm kəmotitənim rəham iərman, ilat u e nafiluə koatuwa məmə okotiləs min ik.”

¹⁰Kən roiu agın tisi-pər morin-pən əpəh nelki Pita ikin, mımis namegən tiet. Nian netəm aluə min kəmotuwa imə, motəplan tinimis rəkis, kən kotiləs motiet motuwin kitənim e nıkali rəhan iərman.

¹¹Nian netəmim rəha nıməfak ne netəm əpnəpın kəmotəto nat əh, kəmotəgin kəmotəgin.

Aposol min kəmotasitu e netəmim tepət motol-wir rəhalat nimisən

¹²Kən aposol min kəmotol nəmtətin tepət ne nat pispis min e niġanəmti netəmim. Kən netəmim min u itəm koatən nīpahrienən e Iesu kəmoatuwa kitiəh əm e Feranta rəha Kig Solomon e Nimə Rəha Uġin.

¹³Netəmim kəmoatisiai-in ilat, məto netəm min u kəsotənən nīpahrienən e Iesu kəmotəgin nuwinən ikin əh mehm ilat.

¹⁴Məto nian rafin netəmim tepət koatuwa moatən nīpahrienən e Iesu, nəman ne nīpitan, kən ilat tatepət.

¹⁵Məto-inu e nat pispis min itəm aposol min kəmoatol, netəmim koatos rəhalat nimisən min moatuwa, kən moatəlin ilat kotapil e rəhalat pet ne nimitiwīn e suatip məmə nian Pita otaliwək mapikalīn ilat, in otek neen o kəm-naka nəghanpīs in əm tos neen kən məmə ilat okotəmegəh.

¹⁶Kən netəmim tepət tepət kəmotisi-pən e latuənu min iuəhkir o Jerusalem kəmotuwa. Kəmotəmik rəhalat netəm koatimis ne netəm itəm narmin rat tətatiġ elat motuwa, kən aposol min kəmotəfak elat kən ilat rafin kotəwir.

Netəm-iasol min kəmotəmki-pən aposol min e kalapus

¹⁷Kən suah u pris asol aġin ne rəhan min netəmim Satusi min u, ilat e pati kitiəh, kəmotol pik timəht elat məto-inu netəmim tepət kinoatapəs ilat minoatuwin o aposol min.

¹⁸Kən kəmotaut kaskəlīm aposol min kəmki-pən ilat e kalapus.

¹⁹Məto lapin-in, nagelo kit rəha Iərəməərə təmuwa merəh e nafiluə e kalapus mit ilat motiet.

²⁰Kən mən-ipən kəm ilat məmə, “Otuwin e Nimə Rəha Uġin motən-iarəp nəghatən pahrien rəha nəmegəhən wi u kəm netəmim.”

²¹Kən kəmən lawiġin, kəmotol nəwia nagelo kən minotuwīn əpəh e Nimə Rəha Uġin moatən-iarəp nərgi Iesu kəm netəmim.

Aposol min kəmotuwīn e kot

Kən pris asol agin ne rəhan min, kəmotauin-in netəm-iasol min rəha noanol min rəha Isrel, kən ilat kəmotuwa kitiah məmə ilat okotəpələh e kaonsel asol rəha noanol min rəha Isrel. Kən motahl-ipən nəghatən kəm netəm kotərəmə e kalapus məmə okotahl-ipa aposol min kotuwa e kot əpəh e kaonsel.

²²Məto nian mopael min kəmotuwın e kalapus, məto aposol min kotikə. Kən kotitəlig-pa e kaonsel motən məmə,

²³“Nian emotuwın ket-arəpən e kalapus, motəplan toa tətəhtosig, lok tatəkul-pən wir əm lan, kən mopael min rəha kalapus koatətul katehm wir əm nafiluə e kalapus, məto nian emoterəh motuwın imə, məto kikə-kikə əh imə.”

²⁴Nian etəm tatərəmə e mopael min itəm koatehm Nimə Rəha Uhgın, ne pris asol min kəmotəto nəghatən əh, kəmotaut pik, rəhalat-kapə təmikə, minotəruru ənəpən əm məmə nat naka otuwa min.

²⁵Kən əmun etənim kit tiet-arəpa məmə, “!Ei, nəman! !Netəm min ilouin itəm nəmotəmki-pən ilat e kalapus, ilat əpəh e Nimə Rəha Uhgın koatəgətun netənim!”

²⁶Kən etəm tərəmə e mopael min təmit mopael min rəhan motuwın motəmik aposol min motuwa. Məto kəməsotewkəkanən ilat məto-inu koatəgin məmə netəm ənəpən okotaht ilat e kəpiel apın okəmə okotewkəkan ilat.

²⁷Nian kəmotit ilat motuwa imə, kən motən məmə ilat okotətul aupən-in netəm-iasol rəha kaonsel. Kən pris asol agin təmən-ipən kəm ilat məmə,

²⁸“Emotən-iəhau əskasik agin itəmat məmə onəsətəgətunən netənim e nərgi suah əh Iesu. Məto nəgətunən rəhatəmat tinaiu rafin əpəh Jerusalem. Kən moatol məmə netənim okotən məmə itimat emotoh suah əh.”

²⁹Məto Pita təməghat rəhalat aposol min lan məmə, “Itimat ekotəkəike motol nəwia Uhgın, sənəmə nəwia netənim əm.

³⁰Itəmat nəmotəhamnu rəkis Iesu motətu-pər e nig kəməluau, məto Uhgın u rəha tipitat min aupən təmol təmegəh min e nimisən.

³¹Uhgin u inu tēmīlēs-ipēr rækis Iesu mēmē otuwīn matēpēlēh e nīkalīn matīp, īkīn rēha nīsiāiīēn ne nēsanēnēn, mēmē in Iērēmērē ne Iosmegēh. Uhgin tēmōl nat əh mēmē in otol suatīp mēmē noanol mīn rēha Isrel kotitun nēuhlinēn ilat e rēhalat nolēn rat mīn, kēn in otafēl rækis nolēn rat mīn rēhalat.

³²Kēn itīmat Narmin Rēha Uhgin ekoatēn-iarēp natimnat mīn u, kēn Uhgin tatos-ipēn Narmin rēhan kēm netēmim itēm koatol nēwian.”

³³Nian netēmim rēha kaonsel kēmōtētō nēghatēn əh, tēmew pik rēhalat nemēha, kēn kotolkeike mēmē okotohamnu əm ilat.

³⁴Mētō suah kit tēmētul, nērgīn u Kamaliel, in Fārisi kit ne iēgētun kit rēha Lou, u itēm netēmim rafin koatīsiāiīēn. Kēn tēmētapēh o mopael mīn mēmē okotit aposol mīn motuwīn ihluē pitēn.

³⁵Kēn in tēmēn-ipēn kēm ilat mēmē, “Natimak mīn, netēm Isrel. Otakil wīr noa rehatēmat mēmē onēkotahro netēm mīn u.

³⁶Wi agīn huē suah kit nērgīn u Teutas, tēmīet-arēp matēn mēmē in etēm-iasol kit, kēn iuēhkīr netēmim fo-hanrit kēmōtuarisīg-in. Mētō kēmohamnu in, kēn rēhan netēmim kēmōtan kitīēh kitīēh, kēn rēhan nētēlīgēn tēmūwīn mīkē.

³⁷Uarisīg lan, nian kapman tēmētafin netēmim, suah kit mīn nērgīn u Jutas, etēm Kalili, in mīn tēmīw netēmim koatuarisīg-in. Mētō netēmim neen kēmotohamnu mīn, kēn rēhan netēmim kēmōtan kitīēh kitīēh.

³⁸Kēn inu rēhak nētēlīgēn e nēnēn u. !Ekēn kēm itēmat, pēs kotapēs əm ilat motegēhan-in ilat kotiet! Mētō okēmē nat koatol in rēha etēmim əm, otēpanīsas.

³⁹Mētō okēmē tatīsi-pēn o Uhgin, okol kēsotosēn nēsanēnēn mēmē okotēn-iēhau ilat. Okotēplan əm mēmē kitat Uhgin koatēmou.” Kēn ilat rafin kēmōtegēhan-in rēhan nēghatēn.

⁴⁰Kən kəmotəun-in aposol min məmə okotuwa imə, kən motən məmə mopael min okotalis ilat. Kən motən-iəhau əskasik min ilat məmə okəsotəghat minən kəm netəmim e nərgi İesu kən motəhlman ilat kotiet.

⁴¹Nian aposol min kəmotiet e kaonsel, nikilat tətəgien, məto-inu Uhgın təmisiəi-in ilat kən megəhan-in məmə netəmim okotoh ilat məto-inu koatuarisig-in İesu.

⁴²Kən nian rafin e Nimə Rəha Uhgın ne nimə min, ilat kəməsotapəsən kəmoatəkəike katən-iarəp kən moatəgətun nəghatən wır məmə İesu in Kristo itəm Uhgın təmən məmə otahl-ipa.

Wək Min 6

Kəmos-ipər netəm sepın

¹Nian neen tinuwa minuwın rəkis, kən netəm rəha İesu tinatər minatəpət. Neen rəhalat kəmotisi-pən ikin pisin pisin min, kən koatən əm nəghatən Kris. Kən tərət, ilat netəm İsrəl əm. Məto iəfak min itəm koatən əm nəghatən Kris kinoatən nikali iəfak min u netəm İsrəl, moatən məmə nian koatoor məni ne nagwənən kəm nəutahlimis min, məto kəsotehm wırən nəutahlimis min rəha itəm min u koatən nəghatən Kris.

²Kən tuwelef aposol min kəmotəun-in netəm rəha İesu məmə okotuwa-tu. Kən kəmotən-ipən kəm ilat məmə, “Piak min. Təsəwirən məmə itimat ekotapəs nən-iarəpən ne nəgətunən nəghatən rəha Uhgın məmə itimat ekotimnə katoor məni ne nagwənən kəm nəutahlimis min.

³Məto roiu, otətgi-arəp-tu etəmat min, netəmim sepın u itəm noatisiəi-in ilat, kən kotenatig, ne Narmin Rəha Uhgın tərıoah e nəmegəhən rəhalat. Kən itimat ekotos-ipən nat u kəm ilat məmə ilat okoatol.

⁴Mapəs itimat e nəfakən kəm Uhgın ne nən-iarəpən ne nəgətunən nəghatən rəha Uhgın.”

⁵Kən ilat rafin nikilat təmagiən, kən motegəhan e nəghatən əh. Kən kəmotətig-iarəp Stipen u rəhan nahatətəən təkəsik e Uhgın ne Narmin Rəha Uhgın tərıoah mətatig lan, kəmotətig-iarəp min Filip, ne Prokoras, ne Nikano,

ne Timon, ne Pamenas, ne Nikolas etəm Antiok u aupən təmapəs nəfakən rəha netəm iman ikin minuwa matətəu-pən nəfakən rəha netəm Isrel.

⁶Kəmotit ilat motuwın kəm aposol min, kən aposol min kəmotələhəu-pən nelmilat elat motəfak elat.

⁷Kən netəm rəha Iesu koatən-iarəp nəghatən rəha Uhgın kəm netəmim, kən netəm rəha Iesu u Jerusalem tinatepət-natepət. E netəm əh, pris min tepət kəmotahatətə e Iesu.

Kəmaskəlim Stipən

⁸Kən Stipen u etəm tərıoah e nəwırən ne nəsanənən rəha Uhgın, təmöl nəmtətin tepət ne nat pıspıs min e nıganəmti netəmim.

⁹Məto netəmim neen e nimə rəha nuəfımınən rəha Netəm Kəmikis İlat, kəmotəghat ilat Stipen. Netəm min u noanol min rəha Isrel u kəmotisi-pən Saerin ne Aleksantria. Kən netəmim neen min u noanol min rəha Isrel u kəmotisi-pən Silisia ne Esia, ilat kəmotuwa kitıəh, kən mınəatərgəhəu ilat Stipen. Kotəmə nəghatən rəha Stipen təsətuatıpən, meto rəhalat tətəuatıp.

¹⁰Məto Narmin Rəha Uhgın təmöl Stipen tenatıg-pık, kən nian in otəghat, rəhan nəghatən tatəh-ıəhau rəhalat.

¹¹Kən ilat kəmotətəu anion netəmim neen məmə okotasıtu elat motən-iarəp məmə, “İtımət emotətə məmə Stipen təmən rat Moses ne Uhgın.”

¹²Kən rəhalat nəghatən təmöl nıki netəmim, ne netəm-iasol rəha Isrel ne ıəgətun min rəha Lou, kəmotətəhau Stipen. Kən kəmotuwın kaskəlim motıləs motuwın məmə otətul e nıganəmti kaonsel.

¹³Kən kəmotəmık netəmim neen motuwa məmə okoteıuə e Stipen. Kən netəm min un kotən məmə, “Nian rafın tatən nəghatən rat e Nimə Rəha Uhgın, kən matən rat Lou rəha Moses.

¹⁴İtımət emotətə in təmən məmə Iesu u etəm Nasaret, in otıləs-ıəhau Nimə Rəha Uhgın, kən məuhlin nolən min itəm Moses təmos-ıpa kəm kitat aupən ıkin.”

¹⁵Kən netəmim rafin itəm kəmoatəpələh e kaonsel kəmotətag-pən ətuatip o Stipen, kən kəmotəplan məmə niganəmtin tinəhag-əhag tahmen e rəha nagelo.

Wək Mīn 7

Stipen tēməghat-in Epraham

¹Kən pris asol agin tēmətapəh o Stipen məmə, “?Tahro, nəghatən mīn əh nīpahrienən?”

²Kən Stipen tēmən məmə, “Piak mīn ne tata mīn. Otətəlig-in-tu io. Uhgīn u itəm in ilis ilis pīk, tēmiet-arəpa o tipitat Epraham nian in tēmətatiḡ əpəh Mesopotemia, məsuwīnən əh əpəh Haran.

³Uhgīn tēmən-ipən kəm in məmə, ‘Apəs rəham mīn, ne ikin nətatiḡ ikin, muwīn e ikin kit itəm io epanəḡətun kəm ik.’

⁴Kən Epraham tēmiet əh Kaltia muwīn mətatiḡ əpəh Haran. Tēmətatiḡ ikin-u kən rəhan tata tēmimis, kən Uhgīn tēmiləs muwa e nəptən u itəmat noatatiḡ lan əh-roiu.

⁵Məto tēmisos-ipənən nəptən məsin huə tahmen e nuwigi iar ne kəm in məmə in rəhan ətuatip. Məto Uhgīn tēmən-iəkis kəm in məmə otəpanos-ipən rafin nitən əh kəm in ne namipin rat mīn. Kən in otuwa iməlat agin ikin, nat əpnəpin e nian əh Epraham tēmisiłəsən əh nətīn kit.

⁶Nəghatən itəm Uhgīn tēmən kəm in tol nulan, in tēmən məmə, ‘O nian kit, noanol mīn rəham okotuwin katig e nəptən pişin kit. Okol iapişpis elat kotol wək kəm netəmim e nəptən pişin, okol nahməən kəm ilat kətoarus nup fo-hanrit.

⁷Məto ekol nalpinən kəm netəmim itəm koatərəməre elat. Kən uarisig, noanol mīn rəham okotiet e nitən mīn əh motuwa kəfak kəm io e nitən u.’

⁸Kən Uhgīn tēmən-iəkis məmə in otehm wir Epraham ne noanol mīn rəhan. Kən mən-ipən kəm in məmə in otəhg-ipən nisualkələh nəman məmə in nəmtətīn kit məmə ilat netəmim rəha Uhgīn. Kən nian Epraham tēmiləs Aisak, kən məhg-ipən nian təmos nian eit. Kən nian Aisak tēmiləs Jekop, kən

matig mæhg-ipən min. Kən nian Jekop tēmämik nenətin ilat tuwelef, kən tēmæhg-ipən min ilat. Ilat tuwelef əh, nəukəti nita rəhatat.”

Stipen tēməghat-in tipilat min

⁹Kən Stipən təmən-ipən min kəm ilat məmə, “Məto-inu netəm min əh, nəukəti nita min u rəhatat, kəmotetəhak e Josep, kəmotosalim-in-pən kəm netəm Ijip, məmə otuwa slef rəhalat, məto ilau Uhgın e nian rafin,

¹⁰kən Uhgın tiləs-irəkis in e nəratən. Nian təmətul e niğanəmti kig rəha netəm Ijip, kən Uhgın təmos-ipən nenatigən kəm in kən matig mol min məmə kig otolkeike in, kən mol in tatərəmərə e nitən Ijip ne netəmim ne natimnat rafin rəhan.

¹¹“Kən əmun nəumis təman e nitən əpəh Ijip ne Kenan mol nagwənən tikə, kən nəumis natus asol netəmim, kən tipitat min nigilat nagwənən təmikə.

¹²Nian Jekop tinəto məmə nagwənən əpəh Ijip, təmahl-ipən tipitat min əh kotuwın, kən inu nətuounən ilat kəmotuwın Ijip.

¹³Kən uarisig ilat kəmotuwın min, kən təmən-iarəp in kəm ilat, məto-inu ilat kəsotitunən məmə in Josep pialat. Kən kig rəha Ijip təməto namnusən rəha Josep ne pian min.

¹⁴Kən Josep təmahl-ipən nəghatən kəm rəhan tata Jekop ne rəhan min məmə okotuwa motatig ilat min. E netəm əh, ilat rafin sepınte faif.

¹⁵Kən Jekop ne rəhan min kəmotuwın kətatig Ijip, kən nian kəmotatig kətatig kimis ikin.

¹⁶Kən kəmämik ilat kan əpəh Sekem kitənim ilat ikin e nipəg kəpiel kit itəm Epraham tinos-nəmtin rəkis o noanol min rəha Hamor.”

Stipen tēməghat-in Moses

¹⁷Kən Stipen təmatəkəike matən-ipən kəm ilat məmə, “Tinatıwa iuəhkir məmə Uhgın otosmegəh rəhan netəmim itəm təmən-iəkis kəm Epraham, kən noanol min rəhatat itəm kəmotatig Ijip aupən, roiu əh tinepət-nepət.

¹⁸Kən kig kit min rəha Ijip təmətul, in təruru ağın Josep.

¹⁹In tamos-iəhau tipitat min e neiuəən, matol nahməən kəm ilat. Kən in təmol lou kit məmə okotəmki-arəp nenətīlat min ihluə məmə okotimis.

²⁰“Kən e nian əh, Moses təmaiir, kən in suakəku wir kit e niganəmti Uhgīn. Rəhan mama ne tata kəmuəhluaig-in anion əpəh imə mios məwig kisil.

²¹Nian kəmiləs-iarəp ihluə, nəti kig pətan təməplan, kən tīləs məmə otehm wir rəhan.

²²Kəmotəgətun in e nenatigən rafin rəha netəm Ijip, kən nian in təmepət, in təsanən e nəghatən ne nolən nat.

²³“Nian tinos nup foti, nīkin təht məmə otuwīn-tu muag natiman min, netəm Isrel,

²⁴kən məplan kit etəm Ijip kit tatoh. Kən in təmuwīn məmə otasitu e in kit əmun mohamnu etəm Ijip apon.

²⁵Kən Moses nīkin təməht məmə kəm-naka in min neen netəm Isrel okotitun məmə Uhgīn təmahl-ipən in məmə otuwīn məmki-rəkis ilat e nahməən katol elat. Məto ilat kotəruru.

²⁶Kən lawigin təməplan min noanol kəiu rəha Isrel kətioh ilau min, kən tuwīn məghat kəm ilau məmə otoor rəkis ilau, kən məmə otol ilau kioal-wir ilau min. Kən mən-ipən kəm ilau məmə, ‘Suah mil. Itəlau piatəlau agin mil. ?Tahro natioh itəlau min?’

²⁷Məto suah u təmətuoun nəmohən təmətgi-pən Moses isəu, kən mən-ipən kəm in məmə, ‘?Pah təmiləs-ipər ik məmə nakatərəmərə kən matiūw-iarəp itimat?’

²⁸!Okəm-naka nakolkeike məmə onakohamnu min io tahmen e etəm Ijip u nəmoh nənīər!’

²⁹Nian Moses təməto nəghatən əh, kən təməgin miet Ijip magim muwīn əpəh Mitian mətatig ikin mahmen e iapīspīs kit. Nian təmətatig mətatig mit pətan ikin kit, kən mialəs nətīlau kəiu iərman mil.

³⁰“Nian tēmətatiḡ Mitian minos nup foti, kən nian kit tuwin mētan iuəhkir o nitot asol əh Sinae əpəh ikin taruən-aruən ikin. Kən nagelo kit tēmiet-arəpa ron e niḡəm itəm tatuəp e niḡ əkəku kit.

³¹Nian tēməplan niḡəm əh, narmin tēmiwig pik ron, kən muwin iuəhkir mēmə otəplan wir, kən mətə Iərəmərə Uhgīn tēməghat kəm in mēmə,

³²‘Io Uhgīn rəha tipim min, Uhgīn rəha Epraham, ne Aisak, ne Jekop.’ Kən Moses tēməḡin minətasiəp minatəḡin nətəḡ-pənən əh niḡəm ikin.

³³Kən Iərəmərə Uhgīn tēmən-ipən kəm in mēmə, ‘Oh-rəkis rəham put e nelkəm mətə-inu nəptən ik natətul ikin in tol pišin aḡin, mətə-inu io əh-ikin.

³⁴Eməplan nərətən itəm katol e rəhak netəmim əpəh Ijip, emətə nasəkən rəhalat, kən minatite muwa mēmə ekəmki-rəkis ilat o netəm Ijip. Wa. Roiu əh ekahl-ipən ik nakitəliḡ muwin min Ijip.’”

Noanol min rəha Isrel kəməsotolkeikeən Moses

³⁵Kən Stipen tēmatəkəike matən mēmə, “Inu etəm kitəh əm Moses itəm ilat kəmotapəs nəwian nian ilat kəmotən-ipən kəm in mēmə, ‘?Pah tēmiləs-ipər ik mēmə nakatərəmərə kən matiuw-iarəp itimat?’ Mətə Uhgīn pišin əm tēmahl-ipən suah əh Moses mēmə otərəmərə kən mosmegəh ilat. Tēmahl-ipən nian nagelo tēmiet-pa ron e niḡəm itəm tatuəp e niḡ əkəku kit.

³⁶Kən Moses tēmit ilat motiet Ijip, kən in təmōl nat pišpis ne nəmtətin tēpət, təmōl əpəh Ijip, ne nian kəmoateguəfimīn e nitəhəi u katən mēmə Nitəhəi Asiə, ne nup foti e ikin taruən-aruən ikin.

³⁷Inu etəm kitəh əm Moses u tēmən-ipən kəm netəm Isrel mēmə, ‘Uhgīn otiləs-ipər ien kit min etəmat tahmen lak.’

³⁸“Inu Moses itəm noanol min rəha Isrel kəmoatan kitəh ilat min, kən nagelo tēməghat kəm in e Nitot Sinae, kən ilat tipitat min kəmoatan. Kən Uhgīn tēmos-ipən nəghatən keike min itəm koatəmegəh, kən in otəhlman tuwa kəm kitat.

³⁹“Məto nian in təmətatiḡ əh əpəh e Nitot Sinae, tīpītat mīn kəmotəht nəwian, motapəs nətəliḡ-inən məto nikilat təmitəliḡ-pən o nat Ijip.

⁴⁰Kən kəmotən-ipən kəm Eron məmə, ‘Ol narmi nat kit məmə in otuwa uhḡin rəhatat. ?Məto Moses əh inəh, itəm təməmīk itat kotiet Ijip, kinotəruru məmə in tinahruwīn?’

⁴¹Kən e nian əh, ilat kəmotol narmi nətī kau kit məmə in otuwa uhḡin rəhalat, kən kəmotol sakrifais e nat megəh mīn məmə okotəfak kəm in. Kən kəmotol lafet rəha narmi nətī kau itəm ilat əm kəmotol.

⁴²Məto Uhḡin təməuhlin-pən məntaan kəm ilat, kən megəhan-in ilat məmə okotəfak kəm mitḡar ne məwīḡ ne məhau mīn e napuə. Kən nat əh tatəḡətun əsas əm nəḡhatən rəha Uhḡin itəm kəməte e naoa rəha ien mīn rəha Uhḡin. Tatən məmə, ‘!Netəm Isrel! ?Nian rafin e nup foti e ikin taruən-aruən ikin, itəmat nakoatoh nat megəh mīn məmə nakoatol-pa sakrifais kəm io? !Kəp!’

⁴³Məto itəmat nəmoatīləs nimə tapolen rəha uhḡin eiūə u Molek, ne narmi məhau rəha uhḡin eiūə u Refan. Nat mil u nəmoatol məmə onokotəfak kəm ilau. O nat əh ekahl-iarəp itəmat nakotuwīn isəu motaprəkis-in Papiilon.”

Stipən təməḡhat e Nimə Rəha Uhḡin

⁴⁴Stipen təmatəkəike matən məmə, “Nian tīpītat mīn kəmotatiḡ ikin taruən-aruən ikin aupən, ilat kəmotos rəhalat nat kit, Nimə Tapolən rəha Uhḡin itəm tatəḡətun məmə Uhḡin tətatiḡ ilat mīn. Kən Moses təmol Nimə Tapolən əh tətəu-pən əm nətəliḡən rəha Uhḡin u təmən-ipən rəkis kəm in.

⁴⁵Kən nup tepət uarisīḡ, e nian Josua təmit ilat motuwa məmə okotos-irəkis nītən əh o netəm Kenan, kən kəmotīləs Nimə Tapolən u motuwīn e nītən u Uhḡin təməhg-irəkis netəmim ikin. Kən ilat kəmotīləs motuwīn motatiḡ ilat mīn kətoarus-pa e nian rəha Tefit təmol kīḡ lan.

⁴⁶Uhḡin təmol təwīr kəm Tefit, kən Tefit təmətapəh ron məmə Uhḡin oteḡəhan in pəs tol nimə kit itəm Uhḡin otətatiḡ ikin.

⁴⁷Məto nimə əh, Kīḡ Tefit təməsolən, məto nətīn Kīḡ Solomon təmol.

⁴⁸Məto Uhgín itəm ilis agín, təsətigən e nimə itəm etəmim əm təmöl, tahmen e nəghatən rəha Uhgín itəm ien rəhan təmən məmə,

⁴⁹‘İkin min rafin e neai tahmen in əm io məmə iakəpələh ikin mərəmə, kən nətueintən rafin tahmen in əm məmə ekəf-pən nelkək ikin.

?Məto nimə-naka itəm nəkotitun nolən məmə otahmen-in io?

?Kən ikin pəhrüən nəkotitun nolən məmə ekuwin mameg ikin?

⁵⁰Otən-tu. ?Pah təmöl rafin natimnat min əh? Io pisin əm, io Uhgín emol rafin ilat.’”

Stipen təməhai netəm-iasol rəha kaonsel

⁵¹Kən Stipen təmatəkəike matən məmə, “!İtəmat u! Rəhatəmat-kapə təskasik. Rəhatəmat nətəligən tapinəp tahmen e rəha netəm kəsotəfakən. İtəmat nəsolkeikeən məmə onəkotol nəwia Uhgín. !İtəmat nəkotahmen e tipitat min itəm koatəht nəwia Narmin Rəha Uhgín!

⁵²?Ien min rəha Uhgín aupən, pah tipitəmat min kəməsolən nəratən kəm in? !Tikə! Kəmotol nəratən kəm ilat rafin. Kəmotohamnu min itəm min u koatən-iarəp nuwamən rəha Etəm Ətuatip. Kən itəmat nəmotegəhan-in-pən Etəm Ətuatip u e nelmi rəhan tikimir min kən kotohamnu.

⁵³İtəmat nəmos rəkis Lou rəha Uhgín u aupən nagelo min kəmos motuwa, məto itəmat nəməsotətəu-pən aginən Lou əh.’”

Kəmahtimnu Stipen

⁵⁴Nian kəmoatəto nəghatən min rəha Stipen, niganəmtilat təmapinəp, nikilat nahmə nahmə, kən moatəgətain-pən nəluilat kəm in məto-inu nikilat nahmə agin.

⁵⁵Məto Narmin Rəha Uhgín təməríoah e Stipen, kən titəgpər e Nego e Neai məplan nəhag-əhagən itəm təsənən pik təmiet imə Uhgín ikin, kən məplan İesu tatətul e nikali Uhgín matip, ikin rəha nəməməəən ne nəsanənən.

⁵⁶Kən Stipen təmən-ipən kəm ilat məmə, “!Ei, nəman! Iatəplan Nego e Neai rəha Uhgin taterəh, kən Nəti Etəmim tatətul e nīkali Uhgin matip, ikin rəha nərəmərən ne nəsanənən.”

⁵⁷Nian netəm-iasol rəha kaonsel kəmotəto nəghatən əh, kəmotasitig matəlgilat min e noanelməlat, kən motearig e Stipen e nəwialat rafin motaut motaiu motuwīn kea-pən ahmən-ahmen əm ron,

⁵⁸motewkəkan ka kərakin-iarəp e taon, kən minoatətuoun kətaht e kəpiel apin. Kən ilat kəmotapeg rəhalat sot asol min, motəlīn-pən iuəhkīr o nelki etəm aluə kit, nərgin u Sol.

⁵⁹Nian kəmotəht Stipen e kəpiel apin, in təməfak məmə, “Iərəmərə Iesu, os narmək.”

⁶⁰Kən təmeiuaiu misin nulin kən masək əfəməh məmə, “Iərəmərə, afəl nolən rat itəm ilat koatol lak.” Nian təmōl namnun rəhan nəfakən, kən rəhan namegən tiet.

Wək Mīn 8

¹Kən Sol tatətul əm nīkin tətəgien məmə ilat kəmotəhtimnu Stipen.

Sol təmōh netəm koatəfak

Mətuoun e nian əh, nəratən asol kīnatol e nīməfak əpəh Jerusalem. Kən ilat kəmotiet Jerusalem motəgim-pən Jutia ne Sameria, motapəs pīsīn əm aposol min koatatig Jerusalem.

²Netəmim neen itəm koatəfak əskasik kəmotuwa motiləs Stipen motuwīn kītənim, kən ilat kəmotasək pik ron.

³Məto Sol təmətuoun minatərəkīn-ərəkīn nīməfak, matuwīn e nīmə min matewkəkan-iarəp nəman ne nīpitan itəm koatəfak, kən matəmki-pən ilat e kalapus.

Filip təmən-iarəp namnusən təwir əpəh Sameria

⁴Kən netəm koatəfak itəm kəmotiet Jerusalem moatəgim, kəmotən-iarəp nəghatən rəha Uhgin ikin min rafin itəm ilat koatuwīn ikin.

⁵Filip tēmuwin e taon kit rēha Sameria, kēn matēn-iarēp namnusēn rēha Kristo itēm Uhgīn tēmēn mēmē otahl-ipa.

⁶Nian nīmanin netēmim kēmotēto Filip, kēn motēplan nat pīspīs min itēm in tatol, ilat rafin kēmotuwa iuēhkir katētēlig-in nat naka in tatēn.

⁷Netēmim tepēt narmin rat min kēmotiet elat. Nian narmin rat min kēmoatiet, kēmotearig ēfēmēh. Kēn netēmim tepēt itēm nīpētīlat tēmimīs, o itēm kēsotaliwākēn, kēmotēwir min.

⁸Kēn netēmim rafin e taon ēh, ilat rafin koatagien.

Saimon u tēmōl natīmnat e nēsanēnēn rēha iērmīs min

⁹Kēn e taon ēh, suah kit nērgīn u Saimon, in tēmātol nat pīspīs tepēt e nēsanēnēn rēha iērmīs min, kēn netēmim rafin rēha Sameria, narmīlat tēmīwig ron. Tēmōl nuwēh mēsīn. In matos-ipēr atīp in mēmē in etēm-iasol kit.

¹⁰Kēn netēmim rafin, netēm-iasol mētoarus-pa iolwāk min ēm, kēmoatētag-pēn pīk ron kēn moatēn mēmē, “Suah u in uhgīn kit u nērgīn u Uhgīn Itēm Rēhan Nēsanēnēn Ilīs.”

¹¹Kēmoatētēu-pēn in nuwēh mēsīn mēto-inu narmīlat tatiwig o natīmnat min itēm in tatol.

¹²Mēto nian netēmim kēmotēto nēghatēn itēm Filip tatēn-iarēp e namnusēn tēwir rēha nērēmērēn rēha Uhgīn ne nēghatēn rēha Iesu Kristo, kēmotēn nīpahriēnēn lan, kēn kēmōl baptais elat, nēman ne nīpītan.

¹³Suah min u Saimon, tēmēn min nīpahriēnēn e Iesu, kēn kol baptais min lan. Kēn in tatētēu-pēn Filip ikīn min rafin. Narmin tatiwig o nat pīspīs min ne nēmētīn min itēm in tatēplan Filip tatol.

¹⁴Nian aposol min ēpēh Jerusalem kēmotēto mēmē netēm Sameria kinotahatētē e nēghatēn rēha Uhgīn, kēn kēmotahl-ipēn Pita ne Jon mēmē okian olat.

¹⁵Nian ilau kəmian muet-arəpən olat, kəmuəfak olat məmə Narmin Rəha Uhgīn otərioah mətatiḡ elat,

¹⁶məto-inu kəmol baptais əm elat e nərgi Iərəməərə Iesu, məto Narmin Rəha Uhgīn təsərioahən əh e nəmegəhən rəhalat.

¹⁷Kən Pita ne Jon kəmuələhəu-pən nelmilau elat muəfak elat, kən Narmin Rəha Uhgīn təmərioah mətatiḡ elat.

¹⁸Nian Saimon təməplan məmə Narmin Rəha Uhgīn tatuwin e nəmegəhən rəha netəmim nian aposol mil katuələhəu-pən nelmilau elat matuəfak elat, kən in təməmki-arəp mənī məmə otos-ipən kəm ilau,

¹⁹kən mən-ipən kəm ilau məmə, “Ios-ipa min nəsanənən u kəm io məmə nian iakələhəu-pən nelmək e netəmim, kən ilat kotitun nosən Narmin Rəha Uhgīn.”

²⁰Məto Pita təmən-ipən kəm in məmə, “!Ik ne rəham mənī onakian e niḡəm asol! Məto-inu ik nikim təht məmə nəkitun nos-nəmtinən e mənī nat u itəm Uhgīn tatos-ipən əm kəm netəmim.

²¹Okol ik nəsolən wək u məsin ne, məto-inu rəham nətəliḡən təsətuatipən e niḡanəmti Uhgīn.

²²Əuhlin ik e rəham nolən rat min kən məfak-pən kəm Iərəməərə, məta in tafəl rəkis rəham nolən rat min itəm nikim tatuəhl-uəhl ilat.

²³Eməplan məmə nian rafin netəhakən təmöl rəham nətəliḡən tuwin ik pişin, kən nolən rat əh təməlis ik tiəkis.”

²⁴Kən Saimon təmən-ipən məmə, “!Awi! Uəfak-pən kəm Iərəməərə ron io məmə natimnat itəm itəlau nəmuən, kit otəsuwamən ron io.”

²⁵Nian ilau kəmuən-iarəp nəḡhatən rəha Iərəməərə ne natimnat itəm in təmöl, kən ilau kəmiaiet Sameria mətian Jerusalem, muətul əḡmagim e latuənu min rəha Sameria matuən-iarəp min namnusən təwir rəha Iərəməərə.

Filip təməḡhat kəm etəm Itiopia kit

²⁶Kən nagelo kit rəha İerəmərə təmən-ipən kəm Filip məmə, “Əsou pis muwin e suatip tətisi-pən Jerusalem matuwın Kasa.” (Suatip əh tatəməhl əpəh ikin taruən-aruən ikin.)

²⁷Kən in təmatuwın əmun məplan etəm İtiopia kit e suatip. Suah əh in etəm-iasol kit rəha kwin rəha netəm İtiopia. Kən in tatərəmərə e məni rafın rəha kwin. Suah u təmisi-pən Jerusalem e nəfakən,

²⁸kən minitəlig matuwın iman ikin. Kən in tatəpələh-pər e nat kit katən məmə, “kat” itəm hos tatiuw. Kən mətafin naoa itəm ien rəha Uhgın Aesea təməte.

²⁹Kən Narmin Rəha Uhgın təmən-ipən kəm Filip məmə, “Uwin maliwək iuəhkir o kat əh.”

³⁰Kən Filip təmaiu muwin iuəhkir ron, məto suah u tətəfin naoa itəm ien rəha Uhgın Aesea təməte. Kən təmətapəh ron məmə, “?Nəkitun nıpəti nat un nakatafin, o kəp?”

³¹Kən suah un təmən-ipən kəm Filip məmə, “?Ekahro mitun? Məto-inu suah kit tikə itəm otuhapik nıpəti nəghatən u kəm io.” Kən in mətapəh məmə Filip otər muwin ilau min muəpələh.

³²In təmətafin nəghatən u e Naoa Rəha Uhgın, tatən məmə, “Kəmit tahmen e sipsip kan məmə okohamnu. Kən tahmen e nəti sipsip, təsəghatən nian katəte noanun, Kən in təmərnapin əm, məsəghatən.

³³Kəmol aulis in, kən nian kəmakil e kot, kisakil ətuatipən. Nian kəmotohamnu, in etəm aluə əm kit, itəm nətin tikə.”

³⁴Kən suah u təmətapəh o Filip məmə, “?Karmə Aesea təmatəghat atip in, o etəm pisin kit?”

³⁵Kən Filip təmətuoun e nəghatən kitiəh əm itəm təmətafin, matən-ipən namnusən təwir rəha İesu.

³⁶Nian kəmatian e suatip muea ikin kit nəhau əh-ikin, kən suah un təmən-ipən kəm Filip məmə, “!Əplan-tu! Nəhau kit əpəh. ?Tahro? ?Pəs nakol baptais lak lan?”

37

³⁸Kən təmən-iəhau kat məmə otətul, kən ilau kərən kəmian əpəh ləhau e nəhau, kən Filip tol baptais lan.

³⁹Nian kəmuər e nəhau muea ilis, Narmin rəha İərəməərə tiləs-irəkis Filip. Kən suah un təmisəplan minən, məto təmitəlig matuwın iman ikin e nagienən asol e nikin.

⁴⁰Məto Filip təmaut əm, məplan tatətul əpəh e nitən pəhap ikin əpəh Astot. Kən in təmatuwın əpəh e taon min matən-iarəp namnusən təwir rəha İesu mətoarus in təmiet-pən əpəh Sisaria.

Wək Min 9

Sol təməplan İesu e suatip rəha Tamaskes

(Wək 22:6-16; 26:12-18)

¹Kən e nian əh, Sol təmatəghat əskasik matən-iəkis məmə otohamnu netəmim rəha İesu. In təmuwın məplan pris asol agin

²mətapəh ron məmə otəte naoa kit kəm nimə rəha nuəfiminən rəha netəm İsrəl əpəh Tamaskes, məmə okəmə otəplan kit tatətəu-pən Suatip Rəha İesu, nat əpnarın iərman o pətan, otaskəlim ilat məlis ilat məmik ilat muwın e kalapus əpəh Jerusalem.

³Nian Sol təmuwa iuəhkır o Tamaskes, roiu agin min nəhag-əhagən kit təmisi-pər e neai tatuəp tahmen e nipitən muwa masiəgəpın in ne ikin min titəlau lan.

⁴Kən in təmiet morin e nəptən, kən məto nəwia suah kit tatən-ipən kəm in məmə, “!Sol! !Sol! ?Tahro natol nəratən kəm io?”

⁵Kən Sol tətapəh məmə, “?Ik pah, İərəməərə?” Kən nəwia suah un təmən-ipən kəm in məmə, “!o İesu itəm ik natol tərət kəm io.

⁶Məto roiu ətul muwin əpəh e taon. İkin əh, suah kit əh-ikin otəpanən-ipinə məmə nat naka onəkol.”

⁷Kən netəmim itəm koatuarisig-in Sol, kəmotaut kətul kəsəghatən, kəmotəto əm nəwia suah un, məto kəsotəplanən.

⁸Kən Sol tətul, məto niğanəmtin tinoapoap, tinəruru nehmən nat. Kən kəmos əm nelmin motit motuwin Tamaskes.

⁹Təmos nian kisil təmisehmən nat, kən təməsəgwənən kən məsənimən nəhau ne.

¹⁰Əpəh e Tamaskes, etəm rəha İesu kit əh-ikin, nərgin u Ananaeas. İərəməyə təmaun-in e nat kit tahmen e napilairən, kən mən-ipən kəm in məmə, “!Ananaeas!” Kən in tagət məmə, “İərəməyə, io əpəh.”

¹¹Kən İərəməyə tən-ipən kəm in məmə, “Uwin əh e nimə rəha Jutas e suatip asol itəm katən məmə Tətuatip, kən mətapəh o etəmim kit, etəm Tasas, nərgin u Sol. In tatəghat roiu kəm Uhgın e nəfakən,

¹²kən Uhgın təmos-ipən napilairən kit, kən təməplan etəmim kit, nərgin u Ananaeas, təmuwa mələhəu-pən nelmin lan məmə niğanəmtin otəwir min.”

¹³Məto Ananaeas təmə, “İərəməyə, eməto nənən tepət e suah əh e rəhan nolən rat min itəm tatol e netəm koatahatətə lam əpəh Jerusalem.

¹⁴Kən in təmuwa ikin-u e nərgi pris asol min məmə otaskəlim, məlis netəm koatahatətə lam.”

¹⁵Məto İərəməyə təmən kəm Ananaeas məmə, “!Uwin! Məto-inu suah u in rəhak etəmim itəm enəmaun-in rəkis məmə otən-iarəp nərgək kəm netəm İaihlua u sənəmə netəm İsrel, ne rəhalat kig min, ne netəm İsrel.

¹⁶Kən io epanəgətun in məmə otos nahməən o nərgək.”

¹⁷Kən Ananaeas təmuwin latuənu muwin imə, kən mələhəu-pən nelmin e Sol, mən-ipən kəm in məmə, “Piak Sol. İərəməyə İesu itəm təmiet-arəp ron ik e suatip nian nəmoatuwa ikin-u, in təmah-İpa io məmə ik onakehm min nat, kən Narmin Rəha Uhgın otərioah mətatig lam.”

¹⁸Roiu agin, nat kit tahmen e nuwiligi nəm tēmiet rəkis e niganəmti Sol, kən in tinaiir min minatehm nat. Kən in tēmətul minataliwək, kən kol baptais lan məmə in nəmtətin rəha nahatətəən.

¹⁹Kən nian təmūn nagwənən neen, kən nipətin təməsanən min.

Sol tinətuoun matən-iarəp nərgi Iesu əpəh Tamaskes

Kən Sol tēmatig mos nian neen min ilat netəm rəha Iesu əpəh Tamaskes.

²⁰Tēmətuoun min əm e nian əh, matən-iarəp nərgi Iesu əpəh e nimə rəha nuəfiminən rəha netəm Isrel, məmə Iesu in Nəti Uhgīn pahrien.

²¹Kən netənim rafin itəm kəmotəto in, kəmotaut pik ron, kən motən məmə, “!Ei! ?Suah u inu tēmatol nərətən kəm netəm koatahatətə e Iesu əpəh Jerusalem aupən, o kəp? Kən in tēmuwa ikin-u məmə otaskəlīm ilat məlis ilat məmīk muwīn kəm pris asol min. ?In əh, o kəp?”

²²Kən nəghatən itəm Sol tatən-iarəp, in təsanən pik maprəkis-in nəghatən rəha netəm Isrel itəm koatatig Tamaskes, kən matəgətun wir məmə Iesu in Kristo itəm Uhgīn təmən məmə otahl-ipa. Kən ilat kīnotəruru nat okotən.

²³Nian tepət tēmuwa muwīn rəkis, kən netəm Isrel neen kəmoatətə anion noa kit məmə okotohamnu Sol,

²⁴məto Sol tēməto noa anion rəhalat. Kən roiu e nərəuiəgən ne lapīn min, netəm Isrel kotətlosig əpəh e nafiluə rəha fenis kəmol e kəpiel məmə okotohamnu Sol.

²⁵Məto in min neen kəmotiləs lapīn motaii-pən e kətim asol kit itəm kəmətu-pən təulə lan, motuwīn motiləs-iarəp e nakuhā e fenis. Kən in tēmagīm muwīn Jerusalem.

Sol əpəh Jerusalem

²⁶Nian Sol tēmuwīn Jerusalem, tēmalkut məmə otuwīn mətəu-pən netəm rəha Iesu, məto ilat koatəgin, nīkilat təht məmə tateiuə-in əm ilat məmə in etəm rəha Iesu.

²⁷Məto Panapas təmit muwin mit-ipən kəm aposol min, mən-ipən kəm ilat məmə təmahro nulan Sol təməplan İləməərə İesu e suatip nian təmatuwın Tamaskes. Kən təmən-ipən min kəm ilat məmə İləməərə təməghat kəm Sol, kən tahro nulan in tınatən-iarəp nərgi İesu əpəh Tamaskes, məsəginən.

²⁸Kən ilat Sol kəmotatig kən tatuwin ikin min əpəh Jerusalem matən-iarəp nərgi İləməərə İesu məsəginən.

²⁹Kəmotəghat ilat netəm İşrel itəm kotən nəghatən rəha netəm Kris, kəmotoh ilat min e nəghatən. Kən kınəotol məmə okotohamnu Sol.

³⁰Nian in min neen rəha nıməfak kəmotəto, kəmotuwın motit Sol motuwın əpəh ləhau iuəhkır o itəhəi e taon əh Sisaria, kən motahl-ipən məmə otagım muwin əpəh isəu e taon əh Tasas.

³¹Kən netəm koatəfak əpəh Jutia, ne Kalili, ne Sameria kəmotatig e nəməlinuən, etəmim tikə itəm otol nəginən kəm ilat. Kən Narmin Rəha Uhgın təmətasitu elat mol ilat koatətul əskasik, kən ilat rafin koatatig kətisiai-in İləməərə. Kən ilat tınatəpət.

Pita təmol nelki Aeneas təwir min

³²Pita təmaliwək muwin ikin min məmə otuag netəm koatahatətə e İesu. E rəhan naliwəkən, təmuwin məplan netəmim rəha İləməərə əpəh e taon əh Lita.

³³Təmuwin ikin əh məplan suah kit nərgin u Aeneas, nıpətın təmimis tinos nup eit, təsaliwəkən mətapıl əm e rəhan pet.

³⁴Kən Pita təmən-ipən kəm in məmə, “Aeneas. İesu Kristo tosmegəh ik əh-roiu e rəham nımisən. Ətul, maiu-aiu rəham nımitiwin.” Kən roiu agin min, Aeneas təməwir min mətul.

³⁵Kən netəmim rafin Lita ne ikin min rafin əpəh Saron kəmotəplan suah u təmaliwək mətan, kən ilat rafin kınətəuhlin rəhalat nətəligən kən minəotəfak kəm İləməərə.

Pita təmol Tokas təmegəh min

³⁶E taon kit Jopa, pətan kit əh-ikin itəm in etəm rəha Iesu, nərgin u Tapita, u nipətin təmə, “tia,” u in nat megəh kit. E nəghatən rəha netəm Kris, koatən məmə Tokas. Pətan u, nian rafin tatol təwir kəm netəmim kən mətəsitu min e ian-rat min.

³⁷Məto e nian əh, nimisən kit təmöl kən timis. Kən kəmotau kol senis kəm in, kələhəu e nimə əpəh ilis agin.

³⁸Ikin əh Lita iuəhkir əm o taon əh Jopa. Kən nian netəm rəha Iesu kəmotəto məmə Pita əpəh Lita, kəmotahl-ipən suah mil kəiu məmə okian mən-ipən kəm in məmə, “!Otuwa uəhai əm-tu!”

³⁹Kən Pita təmətəu-pən ilau. Nian kəməhalet-arəpa latuənu, kəmotit motuwın əpəh ilis agin. Məto nəutahlimis min tərıoah əpəh ikin koatasək ron, kən kəmoatəgətun kəm Pita rəhalat natimnat itəm pətan əh təməhl nian təmatəmegəh.

⁴⁰Kən Pita təmahl-iarəp rafin ilat, kən meiuaiu misin nulin matəfak. Kən mətəg-pən o pətan əh təmimis məmə, “Tapita, ətul.” Kən pətan apon təmair məplan Pita, kən mətul matəpələh.

⁴¹Kən Pita təmea-pən ron maskəlim miuw-pər məmə otətul e nelkin mil. Kən maun-in-pən netəm koatahatətə e Iesu ne nəutahlimis min məmə okotuwa imə, kən mit-ipən pətan əh kəm ilat.

⁴²Kən nəghatən e nat əh təmai u mıtəlau e taon əh Jopa. Kən tepət kəmotən nipahrienən e İərəmərə Iesu.

⁴³Kən Pita təmatig əh Jopa məsin ilau suah kit nərgin u Saimon itəm tatol natimnat e nuwigi kau.

Wək Min 10

Uhgin təməghat kəm Konilias

¹E taon Sisaria, suah kit əh-ikin nərgin u Konilias. In etəm Rom, kən in etəm-iasol rəha mopael ilat rafin wan-hanrit. Kən ilat koatısi-pən e “Mopael rəha Itali.”

²In etəmim kit itəm tatisiai-in Uhgın rəha netəm Isrel, in ne rəhan min ne rəhan iolwək min. In tatos-ipən rəhan məni tepət kəm ian-rat min, kən matəfak kəm Uhgın rəha Isrel nian rafin.

³Nian kit əmun e tri kilok ehnaipən e nian tatəfak lan, təməplan nat kit tahmen e napilairən. In təməplan wir nagelo kit rəha Uhgın tatuwa ron, kən maun-in məmə, “!Konilias!”

⁴Nian niğanəmti Konilias təmətul lan, in təməgin kən mən məmə, “?İərəmərə, tahro?” Kən nagelo təmən-ipən kəm in məmə, “Uhgın tınəplan rəkis nəfakən rəham ne nəwirən itəm natol kəm ian-rat min.

⁵Ahl-ipən netəmim neen kotuwın əpəh Jopa, motiləs suah kit motuwa, nərgin u Saimon Pita.

⁶In tətətig ilau suah kit nərgin u Saimon u tatol natimnat e nuwigi kau. Rəhan nimə tatətul iuəhkir o itəhəi.”

⁷Nian nagelo itəm təmatəghat kəm in təmagim, kən Konilias təmaun-in rəhan iolwək kəiu ne mopael kit itəm tatol wək kəm in, kən in etəm rəha nəfakən.

⁸In təmən-ipən rafin natimnat itəm təməplan kəm iləhal, kən mahl-ipən iləhal məmə okəhaluwın Jopa.

Uhgın təməghat kəm Pita e napilairən

⁹Kən kəmən lawigin, nian mitgar tinalalin, kən suah miləhal əh kəmatəhaluwa e suatip iuəhkir o taon əh Jopa, Pita təmuwın əpəh ilis e nətuei nimə itəm tepin-epin ikin məmə otəghat kəm Uhgın e nəfakən.

¹⁰Məto nəumis tinus, kən nian kəmatol əh niğin nagwənən, in taiir məto təməplan napilairən kit itəm Uhgın tatos-ipa.

¹¹E napilairən əh, təməplan neai təmerəh, kən nat kit tahmen e tapolən asol kətəskəlim nipəgnəmtin min, kən kəhlman-əhlman teiuaiu matuwa e nəptən.

¹²E nipəg nat əh, təməplan nat megəh pisin pisin min əh-ikin itəm kotaliwək ne motəkioah, ne məniğ pisin pisin min.

¹³Kən nəwia suah kit təmən-ipən kəm in məmə, “Pita, ətul. Ohamnu neen mon.”

¹⁴Məto Pita təmə, “!İərəmərə, kəp! E rəhak nəmegəhən esonən əh nat kit nulan itəm Lou rəham təmən-iəhau məmə kəsunən tamkimik e niganəmtim.”

¹⁵Kən nəwia suah u təməghat min kəm in məmə, “Əsənən məmə nat kit tamkimik itəm io Uhgın iatən məmə təwir əm, təsamkimikən.”

¹⁶Kəmuəghat o natimnat min əh mau kisil, kən roiu agin min, tapolən apon təmər muwın əpəh e neai.

Pita təmos nıpəti napılaiirən

¹⁷Kən Pita nikin təmatəht pık məmə otıtun nıpəti nat əh tahmen e napılaiirən itəm təməplan. Məto suah miləhal un itəm Konilias təmahləpis iləhal, kəməhalətapəh o nimə rəha Saimon, kən minəhaluwa minəhaləplan. Kən minəhaluwın mətəhalətul əpəh e nafiluə.

¹⁸Kən məhlaun əfəməh məmə, “!Ei! ?Suah kit u ikin-u nərgin u Saimon Pita?”

¹⁹Kən nian Pita tətalkut əh məmə otıtun nıpəti nat əh tahmen e napılaiirən, kən Narmin Rəha Uhgın təmən-ipən kəm in məmə, “!Ei, əto-tu! Suah miləhal kisil əpəh katəhalegəs-in ik.

²⁰Ətul uəhai matite muwın məplan iləhal. Kən məsəginən o nətəu-pənən iləhal məto-inu io emahl-ipa iləhal məmə okəhaluwa.”

²¹Kən Pita təmeiuaiu muwın mən-ipən kəm iləhal məmə, “!Io u inu itəm itəməhal natəhalegəs-in. ?Nakəhalolkeike io o naka?”

²²Kən kəhalən-ipən kəm in məmə, “Əwəh. Etəm tatərəmərə e mopael min, u Konilias, təmahl-ipa itiməhal məmə ekəhaluwa. In suah kit itəm tətuatıp e niganəmti Uhgın, kən in matəfak min kəm Uhgın. Kən noanol min rəha netəm Isrel koatisiai-in pık. Nagelo kit rəha İərəmərə təmən-ipən kəm in məmə ik onəkuwın əh iman ikin, kən mamnus nəghatən kəm in pəs in otəto.”

²³Kən Pita təmit iləhal motuwın imə məmə ilat okotapıl əh-ikin.

Pita təmuwın e nimə rəha Konilias

Kən kəmən lawigin, Pita tēmətəu-pən iləhal, kən iəfak min neen rəha Jopa, kəmotətəu-pən ilat.

²⁴Kəmən lawigin min, kəmotiet-arəpən əpəh Sisaria. Ikin əh Konilias tēmətapəh o rəhan min ne netəmim neen məmə okotuwa katəsahgin Pita.

²⁵Nian Pita tēmatuwīn məmə otuwīn imə, kən Konilias tēmiet misin nulīn e nelki Pita ikin məmə otəfak kəm in.

²⁶Məto Pita tēmītol-ipər min mən-ipən kəm in məmə, “Ətul, io etəmim əm tahmen lam.”

²⁷Kən Pita tēmatəghat ilau Konilias kən kəmian imə. Pita tēplan məmə netəmim tēpət kinotuwa rəkis katəpələh.

²⁸Kən Pita tēmən-ipən kəm ilat məmə, “Itəmat rafin nəkotitun wir məmə tasim e Lou rəha netəm Isrel məmə okotuwa mətan kitəh ilat netəm sənəmə netəm Isrel o kotuwīn motətəg ilat. Məto Uhgīn tēmən kəm io e napilairən məmə esənən məmə suah kit in tamkimik e niganəmtin.

²⁹Tol-pən nəhlan, nian nēmotahl-ipinə nəghatən ron io, eməsənən nat kit, nikik təmagien əm məmə ekuwa. ?Məto iakolkeike məmə ekətapəh məmə nēmotahl-ipinə nəghatən ron io məmə ekuwa o naka?”

³⁰Kən Konilias tēmə, “Nian kisil tinuwīn rəkis tahmen əh-roiu e tri kilok ehnaipən, ematəfak əpəh e rəhak nimə. Kən roiu agin suah kit itəm rəhan natimnat təhag-əhag tətul aupən-in io,

³¹kən mən məmə, ‘Konilias. Uhgīn tēməto rəkis rəham nəfakən, kən məsaluinən nat wir min itəm ik natol kəm ian-rat min.

³²Ahl-ipən netəmim neen kotuwīn əpəh Jopa o suah kit əh-ikin, nərgin u Saimon Pita məmə otuwa. In tətətig e nimə rəha suah kit, nərgin u Saimon, u itəm tatol natimnat min e nuwigi kau. Rəhan nimə tatətul iuəhkir o itəhəi.’

³³Kən ekahl-ipinə uəhai əm nəghatən ron ik. Kən təwir pik məmə ik nəmuwa. Itimat rafin u ikin-u e niganəmti Uhgīn ioatətəlig-in ik məmə onakən-ipa rafin natimnat itəm İərəmərə tēmos-ipinə məmə onakən-ipa kəm itimat.”

Pita tēməghat

³⁴Kən Pita tēməghat mən məmə, “Roiu enitun məmə sənəmə noanol rəha Isrel əm itəm Uhgın nikin tagien olat,

³⁵məto nikin tagien o netəmim ikin min rafin itəm koatisiai-in ne moatol nat itəm tətuatip.

³⁶“Itəmat nəkotitun rəkis nəghatən itəm Uhgın təmos-ipən kəm netəm Isrel itəm tatən namnusən təwir rəha nəməlinuən ilat Uhgın e Iesu Kristo itəm in İərəmərə rəha netəm rafin.

³⁷Itəmat nəkotitun natimnat min itəm Iesu etəm Nasaret təmol əpəh ikin min e Jutia təmətuoun e Kalili. In təmol natimnat min əh uarisig e wək rəha Jon Baptais itəm tatən-iarəp kəm netəmim məmə okəike kol baptais elat.

³⁸Iesu əh, Uhgın təmitəpun mos-ipən Narmin Rəha Uhgın ne nəsanənən kəm in, kən məto-inu Uhgın tətətig ilau min, in təmuwin e ikin min matol nat wir min, kən matol-wir netəmim itəm Setan təməlis ilat.

³⁹“Itimat emotəplan natimnat itəm in təmol əpəh Jerusalem ne ikin min əpəh Jutia. Kən itimat emotəplan nian netəmim kəmotəh kətətu-pər e nig kəməluau kən timis.

⁴⁰Məto Uhgın təmol təmegəh min e nian itəm tatol kisil lan, kən matol əp in kəm netəmim neen məmə okotəplan məmə in təməmegəh min.

⁴¹Sənəmə netəmim rafin kəmotəplan in, məto netəm əm un itəm Uhgın təmitəpun ilat məmə okotəplan, itimat əh inəh emotəgwən kitiəh itimat min nian təməmegəh min e nimisən.

⁴²“Kən in təmən-ipa kəm itimat məmə ekotən Iesu kəm netəmim, kən motən-iarəp məmə Uhgın təmiləs-ipər rəkis in məmə in otakil nolən rəha netəmim rafin itəm koatəmegəh ne itəm kinotimis rəkis.

⁴³Ien min rafin rəha Uhgın aupən kəmoatən-iarəp in məmə, netəmim rafin itəm koatən nipahrienən lan, Uhgın otafəl rəkis rəhalat min nolən rat min e nərgi in Iesu.”

Narmin Rəha Uhgın təmuwa o laihluə min, netəm u sənəmə netəm Isrel

⁴⁴Nian Pita təmatəghat əh, Narmin Rəha Uhgın təmuwa mərioah mətətiḡ elat u itəm koatəto nəghatən əh.

⁴⁵Kən netəm Isrel itəm koatən nīpahrienən e Iesu itəm kəmotətəu-pən Pita əpəh Jopa motuwa, kəmotaut pīk nian kəmotəplan nat əh məmə Uhgın təmawte-in min Narmin Rəhan kəm netəm u sənəmə netəm Isrel.

⁴⁶Kinotitun məmə təmos-ipən Narmin Rəhan kəm ilat məto-inu kəmotəto netəmim koatəghat e nəghatən ik pīsīn min moatīləs-ipər nərgi Uhgın. Kən Pita təmə,

⁴⁷“?Pah titun nən-iəhauən netəm min u məmə okəsolən bəptais elat? Məto ilat kinotos rəkis Narmin Rəha Uhgın tahmen etat.”

⁴⁸Kən in təmən-ipən məmə okol bəptais elat e nərgi Iesu Kristo. Kən ilat kəmotətapəh o Pita məmə otatīḡ məsīn ilat min.

Wək Mīn 11

Pita təmamnus kəm netəm koatəfak əpəh Jerusalem

¹Kən aposol min ne netəm koatəfak əpəh ikin min e nītən Jutia kəmotəto məmə laihluə min, ilat min kīnoatən nīpahrienən e nəghatən rəha Uhgın.

²Kən nian Pita təmə r muwīn Jerusalem, məto netəm rəha iəfak min itəm koatən məmə okəkəike katəhg-ipən netəmim, ilat kīnoatən nīkalīn,

³moatən məmə, “?Tahro ik nəmuwīn mətətiḡ e nīmə rəha netəm kəsəhg-ipənən ilat, mətəḡwən itəmat min ilat?”

⁴Kən Pita tīnətəuoun matən wīr kəm ilat namnusən rəha natīmnat rafīn əpəh Sisaria,

⁵təmatən kəm ilat məmə, “Nian emətətiḡ Jopa matəfak məplan nat kit tahmen e napīlaiirən. E nat əh, eməplan nat kit tahmen e tapolen asol kit itəm təmīet e neai kətəskəlīm nīpəḡnəmtīn min kəhlman-əhlman teiuaiu matuwa ron io.

⁶Emətag-pən wir e nipəgnoa nat əh məplan nat megəh pisin pisin min əh-ikin itəm kotaliwək ne motəkioah, ne nat megəh iarupin min, ne mənig pisin pisin min.

⁷Kən eməto nəwia suah kit tatən-ipa kəm io məmə, ‘Pita, ətul mohamnu neen mon.’

⁸“Məto ekən-ipən kəm in məmə, ‘!Iərəmərə, kəp! E rəhak nəmegəhən esunən nat kit nulan itəm Lou rəham təmən-iəhau məmə ekisunən tamkimik e niganəmtim.’

⁹“Eməto min nəwia suah un təmisi-pən e neai matən-ipa kəm io məmə, ‘Əsənən məmə nat kit tamkimik itəm io Uhgın iakən məmə təwir əm təsamkimikən.’

¹⁰Emuəghat o natimnat min əh mau kisil, kən tapolən apon təmər muwin əpəh e neai.

¹¹“Kən roiu agin e nian əh, suah kisil kəhaliət-arəpa e nimə itəm iotatig ikin. Netəm Sisaria kəmotahl-ipa iləhal məmə okəhaluwa ron io, kit io kan.

¹²Kən Narmin Rəha Uhgın təmən-ipa kəm io məmə ekətəu-pən iləhal, nat ərnapin iləhal sənəmə netəm Isrel. Piatat min ilat sikis itəm kəmotətəu-pa io, emotuwın kiet-pən əpəh e nimə rəha suah əh Konilias motuwın imə.

¹³Kən in təmən-ipa kəm itimat məmə təhrol nulan in təməplan nagelo kit rəha Uhgın təmuwa miet-arəpa ron e rəhan nimə, kən mən-ipən kəm in məmə, ‘Ahl-ipən netəmin neen kotuwın əpəh Jopa o suah kit nərgin u Saimon Pita.

¹⁴In otən-ipinə nəghatən kit kəm itəmat məmə itəmat rafin, ik ne rəham min, ne rəham iolwək min, məmə Uhgın otosmegəh itəmat rafin.’

¹⁵“Kən nian emətuoun matəghat, Narmin Rəha Uhgın təmeiuaiu mərioah matig elat tahmen əm e inu təmuwa min etat aupən.

¹⁶Kən nīkik tatəht nəghatən itəm Iərəmərə təmən məmə, ‘Jon tatol baptais e netəmim e nəhau, mətō otəsuwəhən Uhgīn tol baptais etəmat e Narmin Rəhan.’

¹⁷Kən okəmə Uhgīn tatos-ipən kəm ilat Narmin kitīəh əm itəm təmos-ipa kəm kitat nian kitat kəmotən nīpahrienən e Iərəmərə Iesu Kristo, io etəmim əm, okol esən-iəhauən Uhgīn o nat naka itəm in tolkeike məmə otol kəm ilat.”

¹⁸Nian kəmotətō nəghatən rəha Pita, ilat kəməsotetəhau mīnən, mətō kəmotənwiwi Uhgīn motəmə, “Nat əh tol nulan məmə Uhgīn tīnol rəkis suatīp rəha Iaihlūə mīn məmə ilat mīn okotəuhlin ilat e rəhalat nolən rat mīn məmə Uhgīn otosmegəh ilat.”

Niməfak əpəh Antiok

¹⁹Nian Sol ne rəhan mīn kəmotohamnu Stipen, kəmatol tərət kəm netəm koatən nīpahrienən e Iesu. Kən iəfak mīn əh kəmotagīm motuwīn əpəh ikin mīn əpəh Fonisia ne Saepras ne Antiok, motən-iarəp nərgi Iesu kəm netəm əm u, netəm Isrel.

²⁰Mətō ilat neen netəm Saepras ne Saerin kəmotuwīn Antiok motən-iarəp mīn namnusən təwīr rəha Iərəmərə Iesu kəm netəm əpnarīn əm, sənəmə netəm Isrel əm.

²¹Kən Iərəmərə təmatol wək tepət e rəhan nəsanənən kən mətasiu pīk elat, kən netəmim tepət tepət kəmotəuhlin ilat motən nīpahrienən e Iərəmərə Iesu.

²²Netəm rəha niməfak əpəh Jerusalem kəmotətō namnusən rəha nat əh, kən kəmotahl-ipən Panapas məmə otuwīn əpəh Antiok.

²³Nian təmīet-arəpən, təməplan məmə Uhgīn təmolkeike pīk ilat matol təwīr kəm ilat, kən netəmim tepət kəmotən nīpahrienən e Iesu, kən Panapas nīkin təmagien masitu elat məmə ilat okoatətul əskasik e Iərəmərə e nīkilat rafin.

²⁴Panapas in etəm wir kit itəm Narmin Rəha Uhgīn tərīoah mətatiɡ lan, kən rəhan nahatətəən in təkaskik o Uhgīn. Kən in təmasitu e netəmim tepət ikin əh məmə ilat okotən nīpahrienən e Iərəmərə Iesu.

²⁵Kən Panapas tēmiet muwin Tasas mategəs-in Sol.

²⁶Nian tēməplan Sol, tēmit mian əpəh Antiok, kəmuatig ikin o nup kitiah muatəfak ilat netəm rəha niməfak əh matuəgətun netəmim tepət. Ikin əh Antiok kəmətuoun kaun-in netəm rəha Iesu Kristo məmə, “Kristin.”

²⁷E nian əh, ien neen rəha Uhgın kəmotiet Jerusalem motuwın əpəh Antiok.

²⁸Kit nərgin u Akapus tēmətul məghat e nəsanənən e Narmin Rəha Uhgın məmə otəsuwəhən nəumis otan e nitən Rom apiəpiə. (Nəumis təman nian Klotias təmatərəmərə e netəm Rom.)

²⁹Kən netəm rəha Iesu əpəh Antiok kəmotolkeike məmə okotasitu e netəm rəha Iesu əpəh Jutia. Kit tahl-ipən məni naka, tepət o noan məsin, itəm titun nahl-ipənən.

³⁰Kən kəmotol məni min əh, motəmki-pən kəm Panapas ne Sol məmə okuəmik mian kəm elta min rəha niməfak əpəh Jerusalem.

Wək Min 12

Kig Herot Akripa Kitiah təmol nəratən kəm niməfak

¹E nian əh, nian Panapas ne Sol kəmatuəgətun əpəh Antiok, Kig Herot Akripa Kitiah təmahl-ipən rəhan mopael min məmə okotaskəlim netəmim neen rəha niməfak əpəh Jerusalem məmə otol ilat kotəto nahməən e nipətilat.

²Təmahl-ipən rəhan min netəmim kəmotuwın kaskəlim Jemes pia Jon kən motətamnu e rəhalat naip asol.

³Nian təmətamnu Jemes, məplan məmə netəm Isrel nīkilat təmagien pik ron. Kən in təmatig maskəlim min Pita. Təmatol nat u e nian kəmatol lafet mil lan Rəha Nuhagego-inən ne Pret U Is Tikə Lan.

⁴Nian tinaskəlim rəkis Pita, kən təmiləs-ipən e kalapus. Kən Herot təmən məmə mopael sikistin okoatətlosig-in, kuwit kuwit e aua min rafin e nərauiəgən ne lapin. Kən Herot tolkeike məmə otiuw-iarəp tətul e niğanəmti netəmim nian lafet tinol namnun.

⁵Məto nian Pita təmətatiḡ e kalapus, kən netəm rəha niməfak kəmotəfak-pən əskasik ron kəm Uhḡin.

Uhḡin tēmīləs-iarəp Pita e kalapus

⁶E lapin itəm olawig in, kən Herot tiuw-iarəp, Pita təmətapil ilugin e mopael kəiu, kəməlis nelmin mil e sen kəiu, kətu-pən kit e mopael kit, kən kətu-pən kit e mopael kit min. Kən mopael kəiu katuətul matuehm nafiluə e kalapus.

⁷Roiu aḡin-əh, nagelo kit rəha Iərəmərə tiet-pa, kən təmasiə məhag-əhag e nipəḡnoa kalapus. Təmekek nīkali Pita kən məḡaiir lan. Kən məmə, “!Ətul uəhai!” Kən sen mil kəmuisas atip e nelmi Pita mil.

⁸Kən nagelo tən-ipən kəm in məmə, “Uwin e rəham put ne natimnat.” Kən Pita tuwin elat. Kən tən-ipən min kəm in məmə, “Uwinin rəham kot, kən mətəu-pa io.”

⁹Kən Pita təmətəu-pən miaiet e nipəḡnoa kalapus, məto in təsitunən məmə natimnat min u nagelo tatol lan in nipahrienən. Nikin təht məmə tatehm nat kit tahmen e napīlaiirən.

¹⁰Kəmualiwək muaprəkis-in mopael kit itəm tatehm kalapus, kən mualiwək muaprəkis-in min mopael kit min, kən kəmuea e namnu toa itəm kəmiləkin e iaen. Toa u tatuag-pən e taon asol. Nian kəmuea iuəhkir ron kən təmerəh atip kən kəmiaiet-pən ikin. Nian kəmualiwək məsin mian e suatip, kən əmun nagelo təmīkə min.

¹¹Kən Pita in tinitun məmə sənəmə napīlaiirən, kən tən məmə, “Roiu enitun ətuatip məmə Iərəmərə təmahl-ipa rəhan nagelo təmuwa mīləs-irəkis io e nat naka itəm Herot tolkeike məmə otol lak itəm netəm Isrel kəmoatolkeike məmə okotəplan.”

¹²Nian Pita tinitun məmə Uhḡin tēmīləs-irəkis in, kən təmuwin əpəh e nimə rəha Meri, mama rəha Jon Mak. Netəm koatahatətə e Uhḡin tepət kəmotuwa kitiəh moatəfak-pən kəm Uhḡin məmə otasitu lan.

¹³Kən Pita təməht-əht toa e iat rəha nimə əh, kən pətan iolwək kit, nəḡin u Rota, təmaiu muwin məmə karmə pah əh tatəht-əht toa.

¹⁴Nian tēməto nəwīa Pita, kən tēmītun mēmə in Pita pahrien. Kən nīkin tēmāgien pīk agīn-əh kən taluin nerəhən e toa mətə tēmāiu mītəlīg muwīn mēplan netəmim u koatəfak, kən tēmən mēmə, “!Ei, netəmim, Pita əpəh ihluə e toa tatətul!”

¹⁵Mətə kotəmə, “Ah. Ik ialməl.” Mətə in tēmatəkəike matən mēmə, “!Kəp! latən pahrien.” Kən ilat kotən mēmə, “Okəmə naka rəhan nagelo tiə.”

¹⁶Mətə Pita tatəkəike matəht-əht toa. Kən kəmotuwīn kerəh e toa, kən nian kəmotəplan in, nīkilat tēmāut pīk ron.

¹⁷Mətə Pita tēmīləs-ipər nelmīn mēfətutu ilat mēmə okəsotəghatən. Kən matən-iarəp kəm ilat mēmə tēmāhro nulan Iərəmərə tēmīləs-iarəp in e kalapus. Kən mən-ipən kəm ilat mēmə, “Otən-ipən nəghatən u kəm Jemes ne piatat mīn e nīməfak.” Kən tēmīet magīm matuwīn ik pīsīn kit mīn.

¹⁸Kəmən lawīgin, mopael mīn itəm kəmoatehm Pita e kalapus, kəmotətapəh-ətapəh olat mīn, kən mīnotəruru əfəməh mēmə Pita tēmāhruwīn.

¹⁹Kən nian Herot tēməto mēmə Pita tēmīkə, kən tēmāhl-ipən mopael mīn mēmə okotegəs-in. Mətə nian mopael mīn kəməsotəplanən, kən Herot tēmaun-in mopael mīn itəm kəmotehm kalapus mətəpəh olat mēmə Pita tēmāhrol magīm. Mətə ilat kotəruru kən in tēmən mēmə okəmīk mopael mīn əh kan kohamnu ilat. Kən Herot tēmīet Jutia muwīn e taon kit Sisaria matīg ikin o nian neen.

Kig Herot Akripa Kitiəh tēmimis

²⁰E nian əh, Kig Herot Akripa Kitiəh neməha tēmōl pīk tēmētəhau netəm kotatīg e taon mil əh, Taea ne Saeton. Kən netəm-iasol mīn rəha taon mil əh kəmotuwa kitīəh kən motuwīn mēmə okotəplan kig mēmə okotaru nego, mətə-inu netəm iməlat ikin kotuwīn katos-nəmtīn nagwənən imə kig ikin. Mətə aupən ilat kəmotuwīn motəplan kig, kəmotəghat ilat suah kit nərgīn u Plastus, itəm tatehm wir natimnat e nīmə rəha Kig Herot, motiuw-pən mēmə otətəu-pən ilat.

²¹E nian itəm Kig Herot tēmitēpun lan mēmə otuwīn mēplan ilat, kən tēmuwīn e rēhan natimnat wir min itəm tatēgētun mēmə in tatērēmərə. Kən tēmuwa mēpələh e ikin imə kig, kən matēghat kəm netəmim.

²²Kən netəmim kēmotagət əfēməh mēmə, “!Suah u tatēghat sənəmə in etəmim mēto uhgīn kit!”

²³Kən roiu agīn min nagelo kit rēha Iērēmərə tēmoh e nīmīsən əskasik kit mēto-inu Herot tēmos nənwiwīən o netəmim, kən mēsos-ipənən nənwiwīən kəm Uhgīn, kən wom min kēmoton nisgan kən timīs.

²⁴Kən e nian əh, netəm koatən nīpahriēnən e Iesu kēmoatəkēike kētamnusiārəp nəghatən rēha Uhgīn e ikin min tēpət, kən netəmim tēpət kēmotuwa katən nīpahriēnən e Iesu.

²⁵Nian Panapas ne Sol kēmioal namnun rēhalau wək əpəh Jerusalem, miatəlīg mian Antiok iləhal Jon Mak.

Wək Min 13

Uhgīn tēmitēpun Panapas ne Sol mēmə okioal rēhan wək

¹E nīməfak Antiok, ien min əh-ikin ne iēgētun min. Ilat u Panapas, ne Simeon katən mēmə etəm iapīn, ne Lusias etəm Saerin, ne Manaen u tēmepət ilau Herot Antipas u tēmatērēmərə e Kalili aupən, ne Sol.

²E nian kit ilat kēmotapəs nagwənən kən moatəfak-pən kəm Iērēmərə, kən Narmin Rēha Uhgīn tēmən-ipən kəm ilat mēmə, “!akolkeike mēmə roiu əh onəkotiləs-ipər Panapas ne Sol mēmə ilau okioal wək u itəm emaun-in ilau ron.”

³Kən nian kinotapəs rəkis nagwənən motəfak, kən motələhəu-pən nelmilat e rēhalau-kapə mēmə okotiləs-ipər ilau, kən motahl-ipən ilau mēmə okian mioal wək.

Panapas ne Sol kēmuən-iarəp nəghatən rēha Uhgīn əpəh Saepras

(Əplan map rəha naliwəkən rəha Pol e namnu naoa u.)

⁴Kən məto-inu Narmin Rəha Uhgın təmahl-ipən ilau məmə okioal wək u, kən ilau kəmian əpəh e taon Selusia, kən ikin əh kəmian e nego kit mian əpəh e nəptən kit Saepras.

⁵Nian kəmiet-arəpən e taon Salamis, kəmian e nimə rəha nuəfiminən rəha netəm Isrel matuən-iarəp nəghatən rəha Uhgın. Kən Jon Mak tatətəu-pən ilau mətasitu elau.

⁶Kən kəməhlaliwək əm e nəptən un mətoarus məhaliət-arəpa e taon Pafos. Ikin əh kəməhaləplan noanol kit rəha Isrel itəm tatol nat pispis e nəsanənən rəha iərmis min, kən in ien eiuə, nərgin u Patisas.

⁷Suah u tətaliwək nian tərət ilau Setias Polas u kapman asol rəha netəm Saepras. Setias Polas in tenatig, rəhan nətəligən təwir. Kən in təmahl-ipən nəghatən məmə Panapas ne Sol okuea muəplan, məto-inu tolkeike məmə otəto nəghatən rəha Uhgın.

⁸Məto suah u Patisas təmatən rat ilau. (Nərgin e nəghatən Kris katən məmə Elimas). Kən mətalkut məmə otəuhlin nətəligən rəha Setias Polas məmə otəsənən niphahrienən e Iesu.

⁹Kən Sol u kətaun-in min məmə Pol, Narmin Rəha Uhgın təmərioah e nikin, kən təmətag-pən ətuatip o Elimas kən mən məmə,

¹⁰“!Ei! Ik nəti Setan. Ik tikimir rəha natimnat rafin itəm kotətuatip. Ik nakərioah əm e neiuəiuən ne nəratən. ?Onəghan nəpanapəs nən ratən suatip pahrien rəha İəməmə itəm natəuhlin?

¹¹Roiu əh, İəməmə otol nalpinən kit kəm ik məmə niganəmtim otəpis, onəsəplanən nəhag-əhagən kit ne o nian neen.” Kən roiu agin min təməplan norəu ne napinəpən kəmuea mualpin niganəmtin, kən niganəmtin təpis agin. Kən təmətul matea-pən əpnəpin əm məmə suah kit otasitu lan mit.

¹²Nian kapman Setias Polas təməplan nat əh, təmən niphahrienən e Iesu məto-inu təməut magien o nəgətunən rəha suah mil e İəməmə.

Panapas ne Pol kəmian Antiok əpəh ikin Pisitia

¹³Kən Pol ne rəhan min netənim kəmotiet Pafos motuwīn e nego kit motuwīn əpəh taon Perka e ikin Pamfilia. Ikin əh Jon Mak təmapəs ilat mītəlig-pən əpəh Jerusalem.

¹⁴Kən ilat kəmotiet Perka motuwīn əpəh taon Antiok əh-ikin Pisitia. Kən e nian rəha Sapat, kəmotuwīn imə e nimə rəha nuəfiminən rəha netəm Isrel moatəpələh.

¹⁵Nian kəmotəto nafinən rəha Lou ne Ien Min, kən netəm-iasol rəha nimə əh kəmotahl-ipən nəghatən kəm Pol ne Panapas motən məmə, “Piak min. Okəmə itəmat kit tatos nəghatən wir məmə otən tasitu e netənim, tətul mən-iarəp.”

¹⁶Kən Pol təmətul mefətutu ilat məmə okəsotəghatən, kən mən məmə, “Noanol min rəha netəm Isrel ne itəmat Iaihlua min itəm noatəfak-pən kəm Uhgīn, otətəlig-in-tu io.

¹⁷Uhgīn rəha noanol min rəha Isrel təmitəpun timitat min aupən kən mol ilat kotepət nian ilat kəmoatatig əpəh ikin Ijip. Kən e nəsanənən asol rəhan, təmit-iarəp ilat e nəptən əh.

¹⁸Kən matehm wir ilat o nup foti nian kəmotan əpəh ikin taruən-aruən ikin.

¹⁹In təmol noanol min rəha netəm Isrel kəmotoh kapman min rəha nəptən sepin itəm kotatig e nitən əh Kenan, kən mos-ipən nəptən əh rəhalat kəm tīpītat min məmə rəhatat.

²⁰Natimnat min əh kəmol nup fo-hanrit-fifti tinuwa minuwīn rəkis. Uarisig e natimnat min əh, Uhgīn təmos-ipən kəm noanol min rəha Isrel netəm-iasol min məmə ilat okotərəmərə elat mətəarus-pa e nian rəha ien rəha Uhgīn Samuel.

²¹Kən netənim kəmotətapəh kəm Samuel o kig, kən Uhgīn təmos-ipən kəm ilat Sol u nəti Kis, təmisi-pən e noanol rəha Benjamin. Kən in təmərəmərə elat o nup foti.

²²Kən nian Uhgīn təmiləs-irəkis Sol, kən in mol Tefit təmuwa kig. In təmən-iarəp nat kit təwir lan məmə, ‘Eməplan suah kit Tefit nəti Jese, in etəm

tətuatip itəm io iakolkeike. Kən in otol natimnat rafin itəm io iakolkeike məmə otol.’

²³“Kən Uhgín təmól məmə Iosmegəh kit, inu Iesu, otisi-pən e noanol rəha suah u Kig Tefit, məmə otosmegəh netəm Isrel tahmen-pən əm məmə in təmən-iəkis mihin.

²⁴Məto uarisig Iesu tətuoun rəhan wək, Jon təmaupən mən-iarəp kəm noanol min rəha Isrel məmə okotəkəike motəuhlin ilat e rəhalat nolən rat min kən kol baptais elat.

²⁵Nian Jon təmatuwa iuəhkir o nolən namnun rəhan wək, in təmən məmə, ‘?Nikitəmat təht məmə io pah? Io sənəmə etəm ilouin itəm Uhgín təmən rəkis. !Kəp! In tatarisig lak itəm io esahmenən məmə ekapeg rəkis rəhan put.’

²⁶“Piak min itəm nəmotisi-pən e noanol rəha Epraham, ne itəmat Iaihlua min itəm nəkoatəfak kəm Uhgín, otətəlig-in wir, Uhgín təmahl-ipa kəm kitat nəghatən u e Iesu məmə in otosmegəh kitat.

²⁷Kən netəmim itəm kotatig Jerusalem ne rəhalat netəm-iasol min kəməsotitunən məmə suah əh inəh Iesu, Uhgín təmahl-ipa məmə otosmegəh ilat. Kən nat ənnapin kəmatafin-iarəp kəm ilat e Sapat min rafin nəghatən rəha ien min rəha Uhgín itəm kəmoatən e Iesu, məto ilat kəməsotitunən. Kən ilat kəmotən məmə okohamnu Iesu tahmen-pən əm itəm ien min rəha Uhgín kəmotən aupən məmə netəmim okotol mihin.

²⁸Nat ənnapin kəməsotəplanən nat kit məmə otimis ron, məto kəmotətarəh məmə Pailat otohamnu.

²⁹“Nian kəmol rafin natimnat itəm Nəghatən rəha Uhgín təmən məmə okol mihin lan, kən rəhan min netəmim kəmotiləs-iəhau e nig kəluau motiləs ka kitənim e nipəg kəpiel.

³⁰Məto Uhgín təmól in təmegəh min e nimisən.

³¹Kən e nian tepət tatiet-arəpa o rəhan min netəmim. Netəm əh, ilat Iesu kəmotan aupən əpəh Kalili mətoarus-pa Jerusalem. Kən roiu əh netəm əh

koatən-iarəp kəm piatat min u noanol min rəha Isrel, məmə ilat kəmotəplan pahrien Iesu, kən in təməmegəh pahrien.

³²“Kən roiu əh, itimat ioatən-ipinə kəm itəmat namnusən təwir əh, məmə nəniəkisən itəm Uhgın təmol kəm tipitat min aupən,

³³roiu əh, tinol rafin nəghatən rəhan kəm kitat noanol min rəhalat nian təmosmegəh Iesu e nimisən. Tahmen-pən əm e Naoa Rəha Uhgın e Naoa Rəha Napuən Min kəiu tatən məmə, ‘Ik nətik. Roiu enuwa rəham tata ətuatip.’

³⁴“Uhgın təmən-iəkis rəkis e rəhan Naoa məmə otəpanosmegəh Iesu e nimisən, kən okol təsimis minən, kən nipətin otəsəmnəmitən. Tatən məmə, ‘Nipahrienən, oekos-ipinə nat wir agin min kəm ik itəm emən-iəkis rəkis kəm Kig Tefit aupən.’

³⁵“Kən e ik pisin min kit min e Naoa Rəha Uhgın, Kig Tefit təmən kəm Uhgın e Iosmegəh məmə, ‘Kən onisegəhan-inən məmə nipəti Iolwək Ətuatip rəham otəmnəmit məpien.’

³⁶“Nian Tefit təmatəmegəh, təmol natimnat min itəm Uhgın tolkeike. Uarisig ikin timis, kən kəmitənim ilat tipin min, kən nipətin təməmnəmit.

³⁷Kən nəghatən əh, təməsəghat-inən Tefit, məto təmatəghat-in Iesu məmə in min təmimis, məto Uhgın təmol təmegəh min, kən nipətin təmisəmnəmitən.

³⁸“Kən piak min, iakolkeike məmə onəkotitun məmə roiu iatən-ipinə kəm itəmat məmə e Iesu, Uhgın otos-irəkis nolən rat min rəhatəmat.

³⁹Kən itəmat onəkotəkəike motitun məmə Iesu pisin əm titun nos-irəkisən nolən rat rəha netəm u itəm koatahatətə lan. In otikis ilat o nolən rat min rəhalat. Məto suatip rəha nətəu-pənən Lou rəha Moses təsahmenən o nosmegəhən etənim.

⁴⁰Kən itəmat onəkotəkəike moatəto itəmat məmə nəghatən rəha ien min rəha Uhgın otəsuwamən etəmat.

⁴¹Kən in tatən məmə, ‘Ei, otətəlig-in-tu, itəmat itəm noatəghat nausit moatən rat natimnat rafin. Onəkotaut kən motimis, məto-inu e nian nakoatəmegəh,

oekol nat kit tērat pik otēmat itēm okol nēsotēnēn nīpahrienēn lan, nat ēpnarīn okēmā suah kit otēn ētuatīp kēm itēmat.”

Netēmim kēmotagien o namnusēn tēwir

⁴²Nian Pol ne Panapas kinatīaiet e nimēfak, netēmim kēmotētapēh olau mēmā, “Awi, okol nakuea mīn e Sapat u tatuwa, muēn-iarēp mīn nēghatēn ēh neen kēm itīmat.”

⁴³Kēn nian netēmim kēmotiet e nimā, ilat tepēt kēmotētēu-pēn Pol ne Panapas. Netēm ēh, neen noanol mīn rēha Isrel, kēn neen netēm rēha ikīn mīn itēm kēmotapēs rēhalat nahatētēn moatētēu-pēn nahatētēn rēha netēm Isrel. Kēn ilau kēmuēghat kēm ilat matuēn-ipēn ēskasik kēm ilat mēmā, “Onēkotēkēike motaskēlim nahatētēn rēhatēmat e Uhgīn.”

⁴⁴Kēn e Sapat itēm tatuwa, iuēhkīr netēmim rafin e taon asol ēh kēmotuwa mēmā okotēto nēghatēn rēha Uhgīn.

⁴⁵Kēn nian netēm Isrel kēmotēplan nīmanin netēmim kēmotuwa o nēghatēn rēha Pol, kēn kēmotētēhak pik olat, kēn mīnotētūoun moatēn rat Pol ne nat naka itēm in tatēn.

⁴⁶Kēn Pol ne Panapas kēmēsuaginēn kēmuēn mēmā, “Itīmlau oekuēike muēn-iarēp nēghatēn u rēha Uhgīn kēm itēmat pītēn, noanol mīn rēha Isrel. Kēn itēmat nēmotapēs nēghatēn rēha Uhgīn, kēn itēmat nakoatēn atīp ēm mēmā itēmat nēsotahmēnēn o nosēn nēmēgēhēn līlīn. Kēn roiu itīmlau enatīan mēmā ekuēn-iarēp namnusēn tēwir u kēm Iaihlūē mīn itēm sēnēmā noanol mīn rēha Isrel,

⁴⁷kēn inu, inu nēghatēn itēm Iērēmērē tēmos-ipa rēkis kēm itīmlau mēmā ekīoal, in tatēn e Naoa Rēha Uhgīn mēmā, ‘Io emol ik mēmā onēkuwa ik nēhag-ēhagēn kit rēha Iaihlūē mīn, mēmā natēn-iarēp kēm netēmim rafin mēmā iakolkeike mēmā ekosmēgēh ilat.”

⁴⁸Nian Iaihlūē mīn kēmotēto nēghatēn ēh, nīkilat tēmagien rōn, kēn mīnoatamnus-amnus kēm ilat mīn mēmā nēghatēn rēha Iesu Iērēmērē in

təwir p̄ik. Kən netəm u itəm Uhḡin təmaun-in rəkis ilat məmə okotos nəmegəhən u itəm namnun t̄ikə, ilat kəmotən n̄ipahrienən lan.

⁴⁹Kən nəghatən rəha Iərəmərə təmaiu mitəlau e n̄itən əh rafin e taon əh.

Noanol min rəha Isrel kəmotəhg-iarəp Pol ne Panapas

⁵⁰Məto noanol min rəha Isrel neen kəmotuw̄in motəplan n̄ip̄itan asol rəha taon əh itəm koatəfak ilat netəm Isrel, ne netəm-iasol min e taon əh, motiuw-
pa ilat moatol neməha kəm Pol ne Panapas. Kən kəmotəhg-iarəp ilau iməlat
ikin.

⁵¹Məto ilau kəmioah p̄ispis nəptən e nelkilau tahmen e nəmtətin kit məmə
Uhḡin təməuhlin məntaan kəm ilat kən otol nalp̄inən kəm ilat. Kən ilau
kəmiaiet mian e taon əh Ikoniam.

⁵²Məto netəm rəha Iesu əpəh Antiok, Narmin Rəha Uhḡin tatərioah elat, kən
ilat nikilat tətəgien p̄ik.

Wək M̄in 14

Pol ne Panapas kəmian Ikoniam

¹E Ikoniam kəmian min əpəh e nimə rəha nuəf̄iminən rəha netəm Isrel, kən
matuən-iarəp nəghatən rəha Uhḡin, kən nəghatən rəhalau təwir p̄ik məmə
təmiuw-pa netem Isrel tepət ne netəm Iaihlua tepət min, məmə ilat kəmoatən
n̄ipahrienən e Iesu.

²Məto netəm Isrel itəm kəsotənən n̄ipahrienən e rəhalau nəghatən,
kəmotuw̄in o Iaihlua min, motol ilat kotetəhau p̄ik netəm u koatən
n̄ipahrienən e Iesu, moatol neməha kəm ilat.

³Məto Pol ne Panapas kəmuatig ikin tuwəh, məsuəginən ilat, kəmatuəkəike
matuən-iarəp nəghatən rəha nəwirən rəha Uhḡin kəm netəmim rafin. Kən
Iərəmərə təmol ilau kioal nat p̄ispis ne nəmtətin tepət məmə netəmim
okotitun məmə rəhalau nəghatən rəha nosmegəhən in nəghatən pahrien.

⁴Kən netəm ikin əh, kəmotəhap ilat min, neen kəmotətəu-pən netəm Isrel itəm kəsotənən nīpahrienən e Iesu, kən neen kəmotətəu-pən aposol mil əh, Pol ne Panapas.

⁵Kən netəm Isrel ne Iaihlua min, ne netəm-iasol min rəhalat min, kinoatol nəghatən anion kit məmə okotərəkin ilau, kən motahtimnu ilau e kəpiel.

⁶Məto nian kəmotətə nəghatən anion rəhalat, kəmuagim mian əpəh e ikin Likaonia, kən mian mətuatig e taon mil əh, Listra ne Tepe.

⁷Kən e taon mil əh ne ikin min titəlau e taon mil əh, ilau katuən-iarəp namnusən təwir rəha Iesu Iosmegəh.

Pol ne Panapas əpəh Listra

⁸Kən e Listra, suah kit əh-ikin. Nian təmaiir məto nelkin təməfaiu təruru naliwəkən, tatəpələh əm, kən in tatəpələh ikin əh

⁹matətəlig-in nəghatən rəha Pol. Pol təmətag-pən ətuatip o suah əh, minutun məmə suah əh tinatahatətə rəkis məmə nelkin titun nəwirən,

¹⁰kən magət əfəməh lan məmə, “!Ei piak, ətul!” Kən əmun, suah apon təmətip mər kən minataliwək.

¹¹Nian nīmanin netəmim kəmotəplan nat əh itəm Pol təmol, kəmotən əfəməh e nəghatən Likaonia məmə, “!Ei! Otəplan-tu. Uhgın min rəhatat kınotol netəmim in, ilat minotuwa imətət ikin.”

¹²Kən kəmotəuhlin nərgi Panapas məmə Sus u nīpətın təmə in iərəməərə rəha uhgın min rəhalat. Kən kəmotəuhlin min nərgi Pol məmə Heremes, nīpətın u məmə in iəghat asol rəha uhgın min rəhalat.

¹³Nimə rəha narmi nat rəha uhgın əh Sus, in tatətul ihluə e taon əh. Kən pris rəha uhgın əh Sus təmasig kau min neen itəm tinətu-pən rəkis nəgui-nig elat. Kən məmik ilat muwa e nafiluə rəha latuənu rəhalat itəm kəmotol əpətın e kəpiel. Məto in ne nīmanin netəmim kotolkeike məmə kotol sakrifais kəm ilau motol nənwiwiən lan kəm Pol ne Panapas.

¹⁴Məto nian aposol mil kəmuəto nəghatən e nat əh, kəmuəhap rəhalau natimnat. Kən kəmuaiu mian əpəh ilugin elat. Kən muagət əfəməh məmə,

¹⁵“!Ei, nəman! ?Nakotəmə nəkotoł nat un o naka? Itimlau etəmim əm tahmen etəmat. Etios namnusən təwir matuea kəm itəmat, kən ekioalkeike məmə ekuəuhlin nətəligən rəhatəmat məmə nakotapəs nəfakən kəm uhgin min u itəm rəhalat nəsanənən tikə. Məto onəkotəfak əm kəm Uhgın itəm tatəmegəh, mətətig namnun tikə. In pisin əm təmol neai, nəptən, nitəhəi, ne natimnat rafin itəm koatatig ikin min rafin.

¹⁶Aupən in təmegəhan-in məmə netəmim e ikin min rafin məmə ilat okotətəupən atip əm suatip min rəhalat.

¹⁷Məto nian rafin in tatol suatip kəm ilat məmə ilat kotitun nəplanən rəhan nəwirən itəm in tatol. In tatol nuhəən tatəfik, matol nagwənən min e nasumən, kən koatol nipətilat e nian ətuatip rəhalat. In tatos-ipən nagwənən kəm itəmat mol itəmat nakoatəto təwir.”

¹⁸Məto kəmatuən pap nəghatən əh kəm ilat, iuəhkir əm kuakiə o nən-iəhauən ilat o nolən sakrifais, o nos-ipənən nənwiwiən kəm ilau.

¹⁹Kən netəmim neen e noanol min rəha netəm Isrel kəmotiet e Antiok əh Pisitia ne Ikoniam motiet-pa Listra motiuw-pa netəmim tepət məmə okotuwa kəplan ilat. Kən kəmotiləs Pol kən motaht e kəpiel, kən motewkəkan ka kərakin-iarəp e taon motapəs tətaməhl. Nīkilat təht məmə təmimis.

²⁰Məto nian netəm rəha Iesu kəmotuwa kətul kitəlau in, kən tətul əmun muwin min əpəh imə e taon. Kən kəmən lawigin, in ne Panapas kəmiaiet mian Tepe.

Pol ne Panapas kəmietəlig-pən Antiok əh Siria

²¹Kən Pol ne Panapas kəmuən-iarəp namnusən təwir e taon əh Tepe, kən kəmiaiuw-pa netəmim tepət kotuwa o Iesu. Kən kəmietəlig muea Listra, kən uarisig u, kiaiet min muea Ikoniam, kən miaiet min muea Antiok əh Pisitia.

²²Kən ikin əh, kəmatuem əskasik netəm rəha Iesu. Kən matioas-ipən nəghatən məmə okotətul əskasik e nahatətəən e Iesu. Kən matuən məmə, “Kitat

okotatig e nēratēn tēpēt nian koatuwin e suatip rēha nuwinēn matig ahgin nērēmārēn rēha Uhgīn. Mēto nat ēpnarīn ēm, kitat okotēkēike moatētul askasik.”

²³Kēn e nimēfak min e ikin min rafin itēm ilau katian ikin, katuēmki-pēr elta min rēhalat. Kēn matuapēs nagwēnēn matioal nēfakēn, kēn matuēlēhēu e nelmi lērēmārē netēmim itēm kīnoatēn rēkis nīpahriēnēn lan.

²⁴Kēn ilau kēmian-pēn Pisitia ikin muatite-pa Pamfilia ikin e taon ēh Peka,

²⁵ikin ēh ilau kēmuēn-iarēp namnusēn tēwir ikin. Kēn ilau kēmuatite-pa min e taon kit min Atalia,

²⁶kēn kēmios nego ikin miatēlig-pa Antiok ēh Siria. Netēm Antiok ēh inēh, aupēn ikin ilat kēmotahl-ipēn Pol ne Panapas mēmē okian muēn-iarēp nēghatēn rēha Uhgīn, kēn motēfak mēmē Uhgīn otehm wir ilau e ikin min itēm ilau katian ikin. Kēn roiu kinioal namnun wēk rēhalau.

²⁷Nian ilau kēmiatēlig-pa min, kēmuāun-in netēmim rēha nimēfak mēmē okotuwa kitīēh. Kēn ilau kēmuēn-iarēp kēm ilat natimnat itēm Uhgīn tēmōl elau e nēsānēnēn rēhan, kēn mēmē tēmāhro nulan laihluē min, ilat kēmotuwa moatēn nīpahriēnēn e Iesu.

²⁸Kēn ikin ēh, ilau kēmuatig tuwēh ilat netēm rēha Iesu.

Wək Mīn 15

lēfak min neen kēmoatēn mēmē netēmim okotētēu-pēn Lou rēha Moses

¹Kēn netēmim neen kēmotiet ēpēh Jutia motatite-pa Antiok moatēgētun piatat min moatēn mēmē, “Okēmē kēsēhg-ipēnēn itēmat, tahmen e inu itēm Lou rēha Moses tatēn mihin, okol Uhgīn tēsōsmegēhēn itēmat.”

²Kēn Pol ne Panapas ilat netēm ēh koatērgēhēu o nēghatēn ēh, kēn kēmotēghat ēfēmēh e nēnēn ēh. Kēn uarisig, netēm rēha nimēfak ēh Antiok kēmotitēpun Pol ne Panapas ne ilat neen min mēmē okotuwin Jerusalem motēplan aposol min ne elta min rēha nimēfak o nēnēn ēh.

³Netēm rēha nimēfak kēmotahl-ipēn ilat kotuwin, kēn nian ilat kēmoatiet-pēn Fonisia ne Sameria, kēmoatēn-iarēp mēmē tahro nulan Uhgīn tatiuw-pa

Iaihlua min koatuwa rəhan netənim. Kən nəghatən əh təmol piatat min ikin əh nikilat tətagien pik.

⁴Nian kəmotiet-pa Jerusalem, netəm rəha niməfak ne aposol min ne elta min rəha niməfak, kəmotagien məmə okotos ilat motuwın iməlat min ikin. Kən Pol ne netəm əh kəmotən-iarəp natimnat itəm Uhgın təmasitu elat lan.

⁵Məto Farisi neen əh-ikin itəm koatən nıpahrienən e Iesu, kəmotətul motən məmə, “Iaihlua min, okəike kəhg-ipən ilat, kən onəkotəkəike kəgətun ilat məmə okotətəu-pən Lou rəha Moses.”

Aposol min ne netəm-iasol min kəmotəghat əpəh Jerusalem

⁶Kən aposol min ne elta min rəha niməfak kəmotəpələh kəmotəghat-in nənən əh.

⁷Kən nian kəmotəghat nəfəməh məsin, kən Pita təmətul mən məmə, “Piak min. Itəmat nəkotitun wir məmə nuwəh rəkis Uhgın təmitəpun io e nikitat məmə ekən-iarəp namnusən təwir rəha Iesu kəm Iaihlua min məmə okotən nıpahrienən lan.

⁸Uhgın titun nətəligən rəha netənim, kən in tınəgətun rəkis məmə nıkin tagien məmə otosmegəh netəm u sənəmə noanol min rəha Isrel, məto-inu təmos-ipa Narmın Rəha Uhgın kəm ilat e suatıp kitəh əm itəm təmos-ipa kəm kitat.

⁹In təməsol pisinən kəm ilat. !Kəp! In təmafəl rəkis rəhalat nolən rat min məto-inu koatən nıpahrienən lan tahmen-pən əm e itəm tınol rəkis kəm kitat.

¹⁰“?Məto tahro itəmat nakoatuwin e suatıp pisin məmə Uhgın nıkin otahmə? ?Tahro itəmat ninoatıləs-ipən Lou kəm ilat məmə in nat təfigəm kit itəm ilat kotalis? !Kəp! Itəmat, otəplan-tu. Kitat ne tıpitat min kitat rafin kəsotahmenən məmə okotıləs nat figəm əh.

¹¹Məto kitat koatahatətə məmə Iesu in İərəmərə rəhatat, kən in tatosmegəh kitat e rəhan nəwırən əm, kən in matol əm nəhlan kəm ilat.”

¹²Nəghatən əh təmol ilat kotəruru nat okotən, kən moatətəlig-in Pol ne Panapas kinatuamnus-iarəp nat pispis min ne nəmtətın pisin pisin min itəm Uhgın təmol ilau kioal e niganəmti Iaihlua min.

Jemes təmahtosig-in nəghatən

¹³Nian kəmioal namnun nən-iarəpən wək min rəhalau, kən Jemes tətul mən məmə, “Piak min. Otətəlig-in wir-tu rəhak nəghatən.

¹⁴Pita təmən wir agin kəm kitat məmə tahro nulan Uhgın təmiet-pa pitən o Iaihlua min məmki-rəkis ilat neen məmə rəhan min.

¹⁵Məto nat əh tahmen-pən əm e nəghatən itəm ien rəha Uhgın təmən itəm kəməte e Naoa Rəha Uhgın. Uhgın tatən məmə,

¹⁶“Uarisig e natımnat min əh, oekitəlig-pa min. Oekol-wir nego rəha nərəmərən rəha Kig Tefit u təməhap aupən iuəhkir tamnim. Nat ərnapın iuəhkir tamnim, məto ekiləs-ipər milpın mafəl mol təkaskik min,

¹⁷məmə netəm ərnapın e nitən min u Iaihlua min, itəm ninəmitəpən rəkis ilat məmə rəhak netəmim min, ilat okotegəs-in io.

¹⁸Io İərəmərə iatən mihin kən emol netəmim kotitun rəkis nat əh aupən.”

¹⁹Kən Jemes təmən məmə, “Kən tol nəhlan, io iakən məmə roiu Iaihlua min kinoatəuhlin nətəligən rəhalat minoatuwa o Uhgın. Kən təsəwirən məmə kitat okotol tiəkis pik min olat.

²⁰Məto pəs okotəte naoa kit tuwın kəm ilat məmə okəsotunən nagwənən min u itəm kinol rəkis sakrifais lan kəm narmi nat min u iərmis min, kən kotamkimik e niganəmti Uhgın. Kən məsotolən təfagə e pətan. Kən məsotunən nat megəh itəm kəmaril nentou məto-inu nitən əh-ikin e nipətin. Kən okəsotunən nitən.

²¹Okotəkəike motən-iəhau ilat nəhlan o nələhəuən nəməlinuən tətətig, məto-inu təmətuoun rəkis e Sapat min rafin, netəmim koatafin Lou rəha Moses əpəh e nimə rəha nuəfiminən rəha netəm Isrel. Kən katən-iarəp nəghatən min əh e taon min rafin.”

Kəməte naoa kəm iəfak min u laihluə min

²²Kən aposol min ne elta min ne netəm rəha niməfak kəmotegəhan məmə okotahl-ipən ilat min neen kotətəu-pən Pol ne Panapas motuwīn Antiok. Kən kəmotətgi-arəp Saelas ne Jutas u katən məmə Pasapas. Suah mil əh netəmim koatisiai-in ilau.

²³Kən kəmos-ipən naoa kəm ilat məmə okotos motuwīn. Naoa tatən məmə, “Itimat aposol min ne elta min rəha niməfak, itimat piatimat u itəmat. Iakotən təwīr kəm itəmat əpəh Antiok, ne Siria, ne Silisia u laihluə min, mətə roiu nīnotuwa piatimat min.

²⁴Itimat emotətə məmə netəmim neen u e nikitimat kəmotol tiəkis pīk kəm itəmat, kən itəmat nəmotətə tərət e nəghatən rəhalat. Mətə itimat emisotos-ipənən nəghatən məmə okotuwīn kən mihin.

²⁵Tol nəhlan kən itimat emotaun-in nəghatən kit, kən motegəhan məmə itimat kəiu okioas nəghatən rəhatimat muətəu-pən Pol ne Panapas u ilau kuəwīr pīk otat.

²⁶Iuəhkīr kiamis o wək u rəha Iərəmərə rəhatat, Iesu Kristo.

²⁷Kən itimat ioatahl-ipinə Jutas ne Saelas məmə okiamnə muehm itəmat. Ilau okuən əsas kəm itəmat nəghatən kitəh əm itəm itimat emotətə.

²⁸Kən Narmin Rəha Uhgīn nīkin tagien ne nikitimat tagien məmə esotos-ipinə minən lou kit kəm itəmat məmə otəfigəm pīk otəmat, mətə in əm u nəkotəkəike motol:

²⁹onīsotunən nagwənən min u itəm kīnol rəkis sakrifais lan kəm narmi nat min u iərmis min; kən məsotunən nītan; kən məsotunən nat megəh itəm kəmaril nentou mətə-inu nītan əh-ikīn e nīpətīn; kən məsotolən təfagə e pətan. Okəmə nakotətəu-pən nəghatən min əh, onəkotuwīn e suatip təwīr. Inu namnun rəhatimat nəghatən.”

³⁰Kən netəm-iasol min əh kəmotahl-ipən netəm əh ilat kuwīt məmə okotuwīn əpəh Antiok. Nian kəmotiet-pən Antiok, kəmotəun-in netəmim rəha niməfak e ikīn min əh, kən kotuwa kitəh, kən kotos-ipən naoa un kəm ilat.

³¹Kən nian kəmotafin naoa un, nikilat təmagien məto-inu nəghatən əh təmiləs-ipər nikilat.

³²Jutas ne Saelas ilau ien mil rəha Uhgın. Kəmuəghat təfəməh kəm piatat min əh mətialəs-ipər nətəligən rəhalat matioal ilat koatətul əskasik.

³³Kəmuatig tuwəh məsin ikin əh, kən piatat min kəmotauiatipin ilau kən motətapəh məmə Uhgın otos-ipən rəhan nəməlinuən kəm ilau, kən motahl-ipən ilau kiətəlig-pən o netəm u kəmotahl-ipa ilau.

³⁴⁻³⁵Kən Pol ne Panapas kəmuatig tuwəh məsin əpəh Antiok, kən ilat netəmim tərət kəmoatən-iarəp ne moatəgətun netəmim e İərəmərə.

Pol ne Panapas kəmuəhap ilau min

³⁶Nian neen uarisig, Pol təmən-ipən kəm Panapas məmə, “Təwir məmə kiətəlig min mian muəplan pialau min e taon min itəm kəmuən-iarəp nəghatən ikin rəha İərəmərə kəm ilat, muəplan-tu məmə koatahratig.”

³⁷Kən Panapas tolkeike məmə otit min Jon Mak.

³⁸Məto Pol təplan məmə təsətuatipən, məto-inu Jon Mak tinapəs rəkis ilau əpəh Pamfilia mitəlig məsətəu-pənən ilau mətoarus kioal namnun e wək.

³⁹Kən kəmuən təkəsik e nənən əh, kən muəhap ilau min. Kən Panapas təmit Mak kən mios nego kit mian əpəh Saepras.

⁴⁰Məto Pol təmit Saelas ilau min. Kən netəm koatəfak kəmotəfak məmə İərəmərə otehm wir ilau e rəhan nəwirən, kən motahl-iarəp ilau.

⁴¹Kən kəmuəliwək mian-pən Siria ne Silisia ikin kən matuem əskasik niməfak min.

Wək Min 16

Timoti təmətəu-pən Pol ne Saelas

¹Kən Pol təmaliwək min muwin əpəh Tepe ne Listra. Kən ikin əh, etəmim kit əh-ikin rəha İesu, nərgin u Timoti. Mama rəhan in noanol kit rəha İsrəl, məto rəhan tata in etəm Kris.

²Netəm koatəfak əpəh Listra ne Ikoniam kəmotən məmə Timoti in etəm təwir kit.

³Kən Pol tolkeike məmə otit ilau min. Kən təməhg-ipən in məto-inu təməsolkeikeən məmə noanol min rəha Isrel nikilat otəht rat məto-inu kotitun məmə tata rəha Timoti in etəm Kris.

⁴Kən nian iləhal kəməhaluwın e taon min, kəmətəhalən-iarəp kəm netənim rəha Uhgın nəghatən rəha aposol min ne elta min itəm kəmotələhəu əpəh Jerusalem. Kən mītəhaləgətun ilat məmə okotəkəike katətəu-pən nəghatən min əh.

⁵Kən e nolən əh, niməfak min kəmotəskasik e rəhalat nahatətən, kən nian rafin netənim koatuwa moatepət e niməfak.

Pol təməplan napilairən kit rəha Uhgın

⁶Kən iləhal kəməhaluwın-pən əpəh Fritia ne Kalesia ikin, məto-inu Narmin Rəha Uhgın təməsegəhan-inən iləhal məmə okəhaluwın-pən Esia ikin məhalən-iarəp nəghatən u əh-ikin.

⁷Nian kəməhaluwa iuəhkir e ikin Misia ne ikin Pitinia, məhalolkeike məmə okəhaluwın Pitinia. Məto Narmin rəha Iesu təsegəhan-inən məmə okəhaluwın.

⁸Kən kəməhalaliwək məhaluwın-pən Misia ikin, kən məhalatite-pa e taon əh Troas.

⁹Kən lapin in, Pol təməplan nat kit tahmen e napilairən. Təməplan məmə etəm Masetonia kit tatətul matətapəh əskasik ron məmə, “Awi, okol nakuwa Masetonia masitu etimat.”

¹⁰Nian Pol tinəplan rəkis əm nat əh, kən enoataii-pən rəhatimat natimnat məmə ekotuwin Masetonia, məto-inu enoatitun məmə Uhgın tətaun-in itimat məmə ekotən-iarəp namnusən təwir rəha Iesu kəm netəm ikin əh.

Litia əpəh Filipae təmən niphrienən e Iesu

¹¹Kən emotos nego kit motiet əpəh Troas motaiu ətuatip əm o nitən Samotres. Kən kəmən lawigin emotuwin motuar e taon Neapolis.

¹²Kən emotiet ikin-u motaliwək əm motuwın əpəh e taon əh Filipae, u tatəməhl aupən e nitən asol Masetonia. Netəm ikin əh, netəm Rom ətuatip. Kən emotatig məsin əh-ikin.

¹³Kən e Sapat, nian rəha nəfakən, emotiet e taon əh kən motuwın əpəh ləhau e nəhau kit itəm emotəto məmə netəmim kotuwın ikin katəfak. Kən emotuwin moatəpələh katəghat itimat nıpitan itəm kəmotaurən motuwa katəpələh.

¹⁴Kən pətan Tuatira kit əh-ikin tatətəlig-in itimat, nərgin u Litia. In pətan itəm tatol-salim-in nıməhan nəgui-naris u nian rafin nıməhan əh nəmtin tiəkis pik. Pətan əh nian rafin in tatəfak kəm Uhgin, kən İərəməərə təmol nikin tımətmətig məmə otən nıpahrienən e nəghatən itəm Pol tatən.

¹⁵Kən kəmol baptais lan ne rəhan min, ne rəhan iolwək min. Kən in təmən-ıpa kəm itimat məmə, “Awi, okol nakotuwa imak ikin kotatig məsin məto-inu itəmat ninotitun rəkis məmə io iatən nıpahrienən e İərəməərə.” Kən in təmatəkəike kəm itimat, kən ekotuwin iman ikin.

Kəmiləs-ipən Pol ne Saelas e kalapus əpəh Filipae

¹⁶Kən nian kit, nian emoatuwin ikin rəha nəfakən əh, kən pətan əkəku kit təməplan itimat e suatip. In slef rəha netəmim neen itəm kəmos-nəmtin. Pətan əh narmin rat kit tətətig lan itəm tol in tatən-ıarəp natimnat itəm otəpanuwa. Kən matol win e məni tepət rəha rəhan netəm-iasol min məto-inu netəmim kotətou ilat məmə ilat okotəto rəhan nəghatən.

¹⁷Kən in təmatuarisig-in itimat Pol, kən matən əfəməh məmə, “Netəm u, netəm rəha Uhgin u in ilis, ilis pik. Koatən-ıpinə kəm itəmat suatip rəha Uhgin məmə in otosmegəh netəmim lan.”

¹⁸Təmatol nəhlan etimat nian tepət, mətoarus nian kit Pol tinəto tərət o nat əh minərou in. Kən in təmeirair magət e narmin rat apon məmə, “E nərgi

Iesu Kristo iatən-ipinə kəm ik məmə onakiet rəkis e pətan əkəku un.” Kən roiu agin min, narmin rat apon təmiet e pətan əkəku əh.

¹⁹Kən nian rəhan netəm-iasol itəm koatərəmərə lan kinotitun məmə kinotakiə e suatip rəhalat o nolən win e məni, kəmotəto tərat. Kən kəmotaskəlīm Pol ne Saelas motiləs ilau motuwın əpəh e ikin rəha kaonsel rəha taon əh,

²⁰məmə okuətul e niganəmti netəm Rom, netəm rəha kot. Kən ilat kəmotən məmə, “Suah mil u ilau noanol rəha netəm Isrel. Ilau kətioal nat tərat tepət u imətat ikin.

²¹Ilau katuən məmə kitat okotəkəike kətəu-pən suatip pisin min. Məto suatip min əh kəsotətuatipən e lou rəhatat. Kitat netəm Rom. Okol kitat kəsotolən nəhlan.”

²²Kən netəm ikin əh kəmotuwa motəplan ilat minoatən rat ilau. Kən suah mil u rəha kot kuən-ipən kəm mopael min məmə okotapeg rəhalau natimnat motalis ilau.

²³Kən kəmotalis ilau mau tepət, kən uarisig kotiləs-ipən ilau e kalapus. Kən motən-ipən kəm etəm tatehm kalapus məmə otəsəmkarəpənən elau kiaiet muagin.

²⁴Nian etəm rəha nehmən kalapus təməto nəghatən əh, təmiləs ilau muwin e rum kit əpəh imə agin, kən mətu-pən nig e nelkilau tahmen e hankap.

Etəm tatehm kalapus təmən niphrienən e Iesu

²⁵Kən nian tinəlis kinkin lapin, Pol ne Saelas katuəfak, kən ilau katuan napuən min rəha nənwiwiən Uhgın. Kən netəmim min e kalapus koatətəlig-in ilau.

²⁶Kən roiu agin-əh min, namig asol kit təməloal e nəptən kən mol nimə kalapus təməloal pik, kən nafiluə min e kalapus kəmoterəh, kən sen itəm kəməlis netəmim lan kəmotisas.

²⁷Kən nian etəm rəha nehmən kalapus təmaiir, məplan məmə nafiluə min rəha kalapus kəmoterəh, nikin təməht məmə netəm koatəməhl e kalapus kinotagim rafin. Kən miləs-ipər rəhan naip məmə otagimnu atip in lan.

²⁸Məto Pol təmagət əfəməh məmə, “!Ei! !Əsaruan ik! Itimat rafin əpəh ikin.”

²⁹Kən suah əh təmaun məmə okiləs lait ka, kən in təmaiu muwin əpəh imə, misin-pən nulin əpəh e nelki Pol ne Saelas ikin mətasiəp.

³⁰Kən mit ilau məhaliet əpəh ihluə kən mətapəh olau məmə, “!Suah mil! ?Ekahro nulan məmə Uhgın otosmegəh io?”

³¹Kən kuən-ipən kəm in məmə, “Onəkəike mən nīpahrienən e İərəməərə İesu, kən məmə Uhgın otosmegəh ik ne rəham min.”

³²Kən kəmuən-ipən nəghatən rəha İərəməərə kəm in ne netəmim itəm kotatig ilat min.

³³Nat əpnarın lapın agın, məto suah əh təmit ilau muwin maikuas e nıməgəm min e nīpətılau itəm kəmalis ilau ikin. Kən e nian əm əh, kəmol bartaıs lan ilat rəhan min.

³⁴Kən in təmit Pol ne Saelas muwin əpəh iman ikin mos-ipən nagwənən kəm ilau. Kən in ne rəhan min rafin nīkilat təmagien mərioaħ məto-inu kəmotən nīpahrienən e Uhgın.

³⁵Nian təmian, etəm rəha kot mil əh kuən-ipən kəm mopael min məmə, “Okotuwin kerəh e suah mil əh katian.”

³⁶Kən suah əh etəm rəha kalapus təmən-ipən kəm Pol məmə, “Etəm rəha kot mil kəmuən məmə ekoterəh etəlau nakatian, kən iaıet mətian kən muətul mətig.”

³⁷Məto Pol təmən-ipən kəm mopael min əh məmə, “?Ei, məto naka əh? İtımlau etəm Rom mil. Kən etəm rəha kot mil əh kəsüəplanən nat kit məmə emioal tərət, məto e nıganəmti netəmim kəmotalis itımlau, kən kıləs-ipən itımlau e kalapus. ?Kən roiu kioalkeike məmə oekiaıet anıon əm? !Kəp! İlau əm okuəike muea ikin-u kən mialəs-ıarəp itımlau.”

³⁸Kən mopael min əh kəmotuwın kən-ipən kəm etəm rəha kot mil əh. Kən nian kəmuəto məmə Pol ne Saelas ilau etəm Rom mil, ilau kəmuəgin p̄ik.

³⁹Kən kəmian muən-ipən kəm Pol ne Saelas məmə, “!Ei, kəsi! Emioal tərət etəmlau.” Kən uarisig kiaiet ilau motiet e n̄ipəg noa kalapus, kən muən-ipən wir kəm ilau məmə okiaiet e taon əh.

⁴⁰Kən Pol ne Saelas, ilau kəmiaiet e kalapus mian e nimə rəha Litia. Ikin əh kəmuəplan piatat ne winitat min rəha niməfak, kən muəghat məsin kəm ilat mətialəs-ipər n̄ikilat. Kən uarisig u, kiaiet mətian.

Wək Min 17

Pol ne Saelas kəmian əpəh Tesalonaeka

¹Kən Pol ne Saelas kəmualiwək mian-pən əpəh e taon mil əh Amfipolis ne Apolonia, mueia miaet-pa e taon əh Tesalonaeka. Ikin əh, nimə rəha nuəfiminən kit əh-ikin rəha netəm Isrel.

²Kən Pol təmol tahmen əm e itəm tatol nian min, təmuwın əpəh imə e nimə əh. Kən e Sapat kisil ilat netəm əh noanol min rəha Isrel kəmoatol nəghatən tepət o Naoa Rəha Uhgın.

³In tatən kəm ilat məmə, “Naoa Rəha Uhgın tatən wir agin-əh məmə Kristo itəm Uhgın təmən məmə otahl-ipa, otəpanəto nahməən e n̄ipətin, muwa mətəarus mimis, kən Uhgın otəpanosmegəh min in e nimisən. Iesu u itəm iatən kəm itəmat, inu Kristo əh.”

⁴Ilat neen kəmotən n̄ipahrienən e nəghatən əh, kən kəmotətəu-pən Pol ne Saelas. Kən netəm Kris tepət itəm koatəfak kəm Uhgın, ne n̄ipitan asol tepət itəm koatərəmərə e n̄ipitan min, kəmotətəu-pən ilau.

⁵Məto netəm-iasol rəha noanol min rəha Isrel, kəmotetəhak, kən motuwın moategəs-in netəm nol təfagə, əpəh e n̄ikal suatip min ne ikin min, motuwa minoatos ilat min, kən minoatol nəratən tepət əpəh e taon əh. Kən kəmotuwın e nimə rəha suah kit nərgin u Jeson, moteatəp nafiluə e nimə, moategəs-in Pol ne Saelas. Kəmotolkeike məmə okotiləs-ipən ilau e nelmi kaonsel əh-ikin əh.

⁶Nian kəməsoṭəplanən ilau, kən kəmotaskəlīm Jeson ne piatat min neen motəmki-pən ilat məmə okotətul aupən in netəm-iasol min rəha kaonsel. Kən kəmotagət əfəməh moatən məmə, “Suah mil əh Pol ne Saelas kətioal nat tərət tərət e ikin min, kən minuea e taon rəhatat.

⁷Kən suah u Jeson təmaun-in ilau kian iman ikin, məto ilat koatətghl lou rəha Sisa itəm tatərəmərə e nitən min. Ilat koatən məmə lərəmərə kit min əh-ikin tətatiḡ, nərgin u Iesu.”

⁸Nian noanol min rəha Isrel kəmotən nəghatən əh, motol netəmim ne netəm-iasol min əh kinotəruru əfəməh məmə okotol naka.

⁹Kən netəm-iasol min əh kəmotol Jeson ne piatat min kəmos-ipən məni neen, məmə in nəniəkisən kit məmə okəsotol minən nat əh, kən motahl-ipən ilat koatuwin.

Pol ne Saelas kəmian əpəh Perea

¹⁰Nian tinapinəp, kən piatat min ikin əh kəmotahl-ipən Pol ne Saelas məmə okian e taon əh Perea. Nian kəmiaiet-pa ikin əh, kəmian e nimə rəha nuəfiminən rəha netəm Isrel.

¹¹Noanol min rəha Isrel ikin əh nətəliḡən rəhalat təwir, maprəkis-in netəm Tesalonaeka, məto-inu kotolkeike pik məmə okotətəliḡ-in nəghatən rəhalau. Kən nian rafin, koatafin wir e Naoa Rəha Ughin, moategəs-in məmə nəghatən rəhalau tətuatip o kəp.

¹²Məto-inu e nolən əh, kən tərət kəmotən niphahrienən e Iesu. Kən nipitan asol min Kris tərət, ne netəm Kris tərət kəmotən niphahrienən e Iesu.

¹³Məto nian noanol min rəha Isrel əpəh Tesalonaeka kəmotəto məmə Pol tatən-iarəp min nəghatən rəha Ughin əpəh Perea, kən ilat kəmotuwa min əpəh ikin minoatol netəm Perea kinotol min təməht kəm ilau.

¹⁴Kən e nian əm əh, piatat min kəmotahl-ipən min Pol tuwin əpəh itəhəi muwin e nego muwin Atens, mapəs əm Saelas ne Timoti kətuatig əpəh Perea.

¹⁵Kən netəmim itəm kəmotit Pol moatuwin Atens, kinoatitəlig-pa min Perea, Pol tahləpis ilat məmə okotən-ipən kəm Saelas ne Timoti məmə okuaut uəhai əm mian muəplan min in.

Pol əpəh Atens

¹⁶Nian Pol təmatəsahgin Saelas ne Timoti əpəh Atens, in təməto tərət pik məto-inu nian taliwək mətan ikin əh, məplan ikin əh tərtoah e narmi nat min.

¹⁷Məto-inu o nat əh, kən in tuwin əpəh e nimə rəha nuəfiminən rəha netəm Isrel ilat netəm Isrel ne Iaihlua min itəm koatəfak kəm Uhgın, moatəghat pik o nat əh. Kən nian rafın in tatuwin ikin katol maket ikin matəghat kəm netəm əpnarın min əm.

¹⁸Kən iəgətun min neen netəm Kris, kətaun-in ilat Epikiurien ne Sitoik, ilat min koatəghat. Ilat neen koatən məmə, “?Suah əh təmiləs əm nəghatən əpəh kit e suatıp matən, kahrmə tatən naka əpəh?” Kən netəmim neen kotəmə, “Itimat ekotəto məmə tatəghat-in uhgın min rəha ikin pisin pisin min.” Koatəghat nəhlan məto-inu Pol tatəghat-in Iesu, matən məmə təmimis məto Uhgın təmosmegəh min.

¹⁹Kən kəmotəun-in-pən Pol məmə otuwa mətul e niganəmti kaonsel rəha netəm koatəpələh e nitot əh Areopakus. Kən kaonsel əh təmən-ipən kəm in məmə, “Ekotolkeike məmə ekotitun nıpəti nəghatən wi itəm nakatən.

²⁰Nəghatən min əh neen, ekotəto məmə tol pisin agın-əh, kən ekotolkeike məmə ekotitun nıpətin.”

²¹Kəmotəghat nəhlan məto-inu netəm Atens ne netəm ik pisin min itəm kəmotuwa Atens, kotolkeike məmə okotəpələh əm katətəlig-in nəghatən wi min əh, kən motəuhlin wir nənən lan.

²²Kən Pol tətul e niganəmti netəm rəha kaonsel əh məmə, “Netəm Atens. Io enəplan rəkis məmə rəhatəmat nətəligən tepət tatuwin o uhgın min.

²³Nian io etaliwək ikin-u imatəmat ikin, matəplan ikin nəkoatəfak min ikin ne narmi nat min, kən eməplan nəghatən kit itəm itəmat nəmotəte-pən rəkis e kəpiel kit məmə, Inu ikin katəfak-pən kəm uhgın kit itəm itimat ekotəruru.

Məto uhgin itəm itəmat nəkoatəfak kəm in, itəm nəkotəruru, Uhgin əh inəh itəm io iatən-ipinə kəm itəmat.

²⁴Uhgin əh inəh təmol nəptən u, ne natimnat rafin itəm koatatig lan, kən in matərəmərə e neai ne nəptən, in təsətigən e niməfak min itəm kitat əm netəmim kəmotol.

²⁵Nat kit təsikəən ron itəm kitat netəmim kotitun nolən kos-ipən kəm in. Məto-inu in pisin əm tatos-ipa nəmegəhən kəm kitat kitəh kitəh, matos-ipa natimnat rafin kəm kitat.

²⁶Aupən, aupən agin-əh, in təmol əm suah kitəh əm. Kən netəm rafin ikin min kəmotiet əm e suah əh, kən in pisin əm təmələhəu ilat rafin e ikin min, kən in pisin əm təmən nian itəm ilat okotan lan, ne nuantən min rəhalat.

²⁷Uhgin əh təmol nəhlan məmə kitat rafin okotəkəike kegəs-in məmə okotehm, tahmen e etəmim itəm tateameam əpnəpən əm məmə otehm nat kit. Məto niphahrienən məmə Uhgin əh, sənəmə in isəu o kitat.

²⁸Tahmen e itəm suah kit təmən aupən məmə, ‘Məto-inu kitat koatəkul-pən əm e Uhgin, kən moatos nəmegəhən, moataliwək, moatol natimnat rafin.’ Kən mahmen e suah kit rəhatəmat itəm təməte rəkis napuən kit məmə, ‘Kitat min kitat nenətin min.’

²⁹“Məto-inu kitat nenəti Uhgin, okol kitat kəsotənən məmə in tahmen e natimnat itəm netəmim koatol ilat e iaen u kol tatipit-ipit, ne silfa ne kəpiel. In sənəmə nat kit itəm suah kit titun nol əmən e nelmin o e rəhan nenatigən. !Kəp!

³⁰“E nian əh aupən itəm netəmim kotəruru Uhgin, tahmen e itəm Uhgin təmahtosig-in niganəmtin məmə otəsəplanən nolən rat min əh. Məto roiu tatən kəm kitat rafin e ikin min rafin məmə, ‘Itəmat rafin onəkotəuhlin itəmat e rəhatəmat min nolən rat min.’

³¹In təmən nəhlan, meto inu in tinəmitəpun rəkis nian itəm in otakil nolən lan rəha netəmim, kən in otol əm e suatip itəm tətuatip. Uhgin tinitəpun rəkis etəmim itəm otakil nolən min rəha netəmim, kən in tinəmol rəkis kəm

netəmim mēmə in otol nəhlan, mətō-inu tinol rəkis suah əh təmegəh e nimisən.”

³²Nian ilat kəmotəto nəghatən mēmə Uhgīn təmol suah kit təmegəh mīn e nimisən, neen kəmotalah-əmnū, mətō neen katən mēmə, “Itimat ekotolkeike mēmə ekotəto mīn rəham nəghatən.”

³³Kən Pol tēmiet e nəghatən əh rəha kaonsel.

³⁴Kən netəmim neen kotuwīn kəkul-pən lan, moatən nīpahrienən e Iesu. Netəm əh kit nərgīn u Taionisiəs, in etəm kit rəha kaonsel əh, ne pətan kit mīn nərgīn u Tamaris, ne netəmim neen mīn.

Wək Mīn 18

Pol tēmuwīn Korin

¹Uarisig e natimnat mīn əh, Pol tēmiet əh Atens, muwīn e taon pisin kit mīn, nərgīn u Korin.

²Ikin əh, tēməplan suah kit, in noanol rəha Isrel, nərgīn u Akwila. Təmaiir əpəh Pontas, mətō tēmuwīn mətətig əpəh Itali e taon asol əh Rom. Uarisig, kən etəm Rom əh, Klotias itəm tatərəmərə e ikin mīn, təmol lou kit mēmə noanol mīn rəha Isrel okotəkəike motiet Rom. Kən Akwila ne rəhan pətan Prisila kəmiaet mueia mətətig əpəh Korin. Kəməsuatigən təfəməh kən Pol tiet-pa, məplan ilau.

³Kən mətətig iləhal mīn ilau, matəkul-pən elau e wək rəhalau, mətō-inu wək rəhan rəha nosən mēni tahmen əm əh wək rəhalau. Ilat netəm rəha nəhlən nimə tapolən.

⁴Kən e nian rafin e Sapat, nian rəha nəfakən, Pol ne noanol mīn rəha Isrel ne netəm Kris koatol nəghatən tepət əpəh e nimə rəha nuəfiminən rəha netəm Isrel, mətō-inu Pol tolkeike mēmə otiuw-pa ilat mēmə okotən nīpahrienən e Iesu.

⁵Kən Saelas ne Timoti kəmiaiet Masetonia, kən nian kəmiaiet-pa ikin əh, Pol tēmapəs wək kən matən-iarəp əm nian rafin namnusən təwīr matən wīr kəm noanol mīn rəha Isrel mēmə Iesu in Kristo itəm Uhgīn tēmən mēmə otahl-ipa.

⁶Məto ilat kəmotetəhau, kən moatəhai. Kən Pol təmorautin-oraubin rəhan sot asol e niganəmtilat. Kən mən məmə, “Okəmə nəkotatig e nəratən lan nian Uhgın otakil netəmim e Namnun Nian, məto rəhatəmat atip. Tətuoun əh-roiu, ekuwin mən-iarəp namnusən təwir o Iaihlua min.”

⁷Kən in təmiet elat muwin mətatig e nimə rəha suah kit sənəmə noanol rəha Isrel, məto in tatəfak kəm Uhgın, nərgin u Titias Jastas. Rəhan nimə in e nıkal nimə rəha nuəfiminən rəha netəm Isrel.

⁸Kən Krispas u in tatərəmərə e nimə əh, in ne rəhan min, ilat kəmotahatətə e İərəməərə. Kən netəm Korin tepət min kəmotətə nəghatən rəha Pol, kən kəmotahatətə e İesu, kən kol baptais elat.

⁹Kən nian kit lapin, Pol təməplan nat kit tahmen e napılaiirən. E napılaiirən əh, İərəməərə təməghat kəm in məmə, “Əsəginən ilat. Uwin mən-iarəp rəhak nəghatən məsamegən,

¹⁰məto-inu kilau min ik. Netəmim okol kəsotərəkinən ik, məto-inu netəmim tepət e taon əh ilat rəhak netəmim min.”

¹¹Kən Pol təmatig ikin əh nup kitiəh kən məwig sikis, matəgətuun netəmim e nəghatən rəha Uhgın.

Netəm Isrel kəmotiləs-ipən Pol e kot

¹²Kən nian Kalio, in kapman rəha netəm Akaea, kən netəm Isrel kəmotuwa kitiəh motaskəlim Pol motiləs motuwin e kot.

¹³Kən motən məmə, “Suah u tətalkut məmə otiuw-pən netəmim məmə okotəfak kəm Uhgın e nolən kit itəm təsətuatipən e Lou.”

¹⁴Kən Pol təmətul məmə otəghat, məto Kalio təmənen-ipən kəm ilat məmə, “Netəm Isrel. Otətəlig-in-tu. Okəmə nat u in nat kit təsətuatipən, o təsətəu-pənən lou, itəmat nəkotitun rəkis məmə ekəike məto nəghatən rəhatəmat.

¹⁵Məto, nəghatən u in musmus əm kit rəhatəmat e nərig min ne natimnat min rəha Lou rəhatəmat, kən tətətig əm etəmat məmə onəkotən kələhəu wir. Io nikik təsəgienən məmə ekakil nat tol nəhlan kit.”

¹⁶Kən in mahl-iarəp ilat e kot.

¹⁷Kən nian kəmotuwīn ihluə, əmun kəmotaskəlim Sostenes u etəm-iasol rəha nimə rəha nuəfiminən rəha netəm Isrel. Kən kəmotoh kəmotoh əpəh e nafiluə e nimə kot. Məto Kalio təsolən nat kit məmə otən-iəhau ilat.

Pol təmitəlig Antiok əpəh Siria

¹⁸Pol təmatig nian tepət əpəh Korin ilat piatat min. Kən uarisig tapəs ilat muwīn ikin əh-ikin Kegkria. Aupən Pol təmol nəniəkisən kit kəm Uhgin, kən ikin-u in təməte min əm noanun matol namnun nəniəkisən lan rəhan. Kən in təmos min nego kit ikin əh mitəlig-pa Siria. Kən Akwila ne Prisila kəmuətəupən in.

¹⁹⁻²¹Nian kəmotuwa e taon əh Efesas, iləhal kəməhaluar. Kən Pol təmuwīn əpəh imə e nimə rəha nuəfiminən rəha netəm Isrel, kən kəmotən nəghatən tepət. Ilat kəmotətapəh ron məmə otatig məsin ilat min ilat. Məto in təmə, “Ei kəsi, kəpə. Okol esatigən.” Məto nian in təmiet təməni-pən kəm ilat məmə, “Okəmə Uhgin tolkeike məmə ekuwa min, kən epanuwa min məplan itəmat.” Kən in təmos nego kit miet Efesas, məto təmapəs Akwila ne Prisila kətuatig ikin əh.

²²Nian Pol təmuwa e taon əh Sisaria, kən muar. Kən maliwək muwīn məmə otəplan netəm rəha niməfak əpəh Jerusalem. Kən uarisig, təmitəlig-pa min əpəh Antiok.

²³Təmatig məsin ikin əh, kən miet min maliwək muwīn-pən əpəh Kalesia ne Fritia ikin matem əskasik netəm rəha Iesu.

Apolos təmuwīn Efesas ne Korin

²⁴Kən suah kit təmuwa əpəh Efesas, in noanol kit rəha Isrel, nərgin u Apolos. In təmaiir əpəh Aleksantria, kən in etəm wir kit rəha nəghatən, kən mitun wir min nəghatən min e Naoa Rəha Uhgin.

²⁵Ilat kəmoatəgətun rəkis in e suatip rəha Iərəməərə. Kən nian rafin nigəm tatuəp e nikin o nən-iarəpən nəghatən rəha Uhgin. Kən nəghatən rəhan e Iesu in tətuatip tətuatip. Məto in titun əm nolən baptais itəm Jon təmatol aupən.

²⁶Kən in təmatən-iarəp əskasik nəghatən rəha Uhgin əpəh e nimə rəha nuəfiminən rəha netəm Isrel. Nian Prisila ne Akwila kəmuəto in, kəmiait məhaluwın əpəh e rəhalau nimə, kən muən-iarəp wir kəm in suatip rəha Uhgin.

²⁷Kən nian Apolos tolkeike məmə otuwın əpəh Akaea, kən piatat min əpəh Efesas kəmotasitu lan motəte naoa kit tuwın kəm netəm rəha Iesu əpəh Akaea, motətapəh olat məmə kotitun nosən Apolos motuwın əpəh iməlat ikin. Kən nian in təmuwın ikin əh, in təmasitu wir elat. Ilat min əh, ilat kəmotahatətə e Iesu e nəwırən rəha Uhgin.

²⁸Apolos təmasitu elat nəhlan məto-inu in etəm wir kit rəha nəghatən, kən in matən-iarəp wir e Naoa Rəha Uhgin məmə Iesu in Kristo itəm Uhgin təmən məmə otahl-ipa. Kən e niganəmti netəmim, təmatoh-iəhau nəghatən rəha netəm Isrel.

Wək Min 19

Pol təmuwın min Efesas

¹Nian Apolos təmətatig əh əpəh Korin, Pol təmətip suatip kit əpəh ilis ikin e nitot min miet-pa əpəh Efesas. Ikin əh təməplan netəmim neen rəha Iesu.

²Kən təmətapəh olat məmə, “?Tahro? ?Narmin Rəha Uhgin tinuwa mərioah mətatig etəmat nian nəmotahatətə e Iesu, o kəpə?” Kən kəmotən-ipən kəm in məmə, “İtimat esotəto aginən məmə nat kit min əh-ikin Narmin Rəha Uhgin.”

³Kən Pol təmətapəh olat məmə, “?Məto kəmol baptais ahro nulan etəmat?” Kən kəmotən-ipən kəm in məmə, “Kəmol baptais etimat e nolən baptais itəm Jon təmatol.”

⁴Kən Pol təmə, “Nolən baptais itəm Jon təmatol tatol e netəmim itəm koatəuhlin ilat e rəhalat nolən rat min. Məto Jon təmatən-iarəp məmə netəmim okotəkəike motahatətə e etəmim itəm otəpanuarisig in. Suah u in Iesu.”

⁵Kən nian netəmim kəmotəto nəghatən əh, kən kəmol baptais elat e nərgi İərəmərə Iesu.

⁶Kən nian Pol təmələhəu-pən nelmin e rəhalat-kapə, Narmin Rəha Uhgın təmuwa mərīoah mətatiḡ elat. Kən kīnoatəḡhat e nəḡhatən ik pīsīn mīn, kən moatən-iarəp nəḡhatən itəm Uhgın tatos-ipən kəm ilat.

⁷Kən netəm əh, ilat rafīn tuelef.

⁸Kən Pol təmatuwīn e nīmə rəha nuəfīmīnən rəha netəm Isrel e məwīḡ kīsīl matən-iarəp əskasīk nəḡhatən e namnusən təwīr rəha Uhgın məsəḡīnən. Kən ilat mīn ilat, kəmotol nəḡhatən tēpət mətō-inu in tolkeike məmə otiuw-pa ilat o nərəmərəən rəha Uhgın.

⁹Mətō netəmīm neen, rəhalat-kapə tiəkis pik məmə okotən nīpahriēnən e rəhan nəḡhatən. Kən kəmoatəḡhat rat e suatīp rəha Iərəmərə rəhatat e nīḡanəmti netəmīm rafīn. Mətō-inu o nolən mīn əh, kən Pol tēmīet elat kən mit netəm rəha Iesu kotuwa koatuarisīḡ-in. Kən nian rafīn ilat netəmīm koatəḡhat əpəh e nīma sīkul asol kit itəm suah kit, nəḡḡīn u Tīranas, təmatəḡətun ikīn aupən.

¹⁰Kən Pol təmatol wək əh o nup kəiu apīəpiə. Mətō-inu təmatol nəhlan, kən netəmīm itəm koatatīḡ e ikīn əh Esia, noanol mīn rəha Isrel ne netəm əpnāpīn əm, ilat rafīn kəmotətō nəḡhatən rəha Iərəmərə.

Nenəti Skefa mīn

¹¹Kən Uhgın təmol Pol tatol nat pīsīp mīn itəm tol pīsīn aḡīn-əh.

¹²Natīmnat rəha Pol tahmen e iāḡkəsīp ne natīmnat itəm təmatuwīn lan, netəmīm koatəmīk moatuwīn moatek netəm koatīmīs lan. Kən nīmīsən mīn kəmotəwīr, kən narmin rat mīn kəmotīet elat.

¹³Kən netəm Isrel neen koatuwīn ikīn pīsīn pīsīn mīn neen, moatəḡḡ-iarəp narmin rat mīn e netəmīm, kən netəm əh kəmotalkut məmə okotol nat əh e nəḡḡi Iərəmərə Iesu. Kən kəmoatən-ipən kəm narmin rat mīn məmə, “E nəḡḡi Iesu, etəm kitiəh əm itəm Pol tatən-iarəp, otīet.”

¹⁴Kən e netəm kəmoatol nat əh, sepīn əh-ikīn nenəti suah kit, nəḡḡīn u Skefa, u in pris asol aḡīn rəha Isrel.

¹⁵Məto narmin rat təmən-ipən kəm ilat məmə, “Ekitun suah u Iesu, kən mitun min Pol. ?Məto itəmat pah min un?”

¹⁶Kən suah apon narmin rat tətətig lan, təmətul maht ilat mərəkin ilat, məhap-əhap rəhalat natimnat məpeg rəkis, kən kotaipiəpiə əm motəgim e rəhan nimə kəmotəig e nita kəməhap-əhap ilat.

¹⁷Nian noanol min rəha Isrel ne netəm Kris kəmotəto nat əh, kəmotəgin pīk. Kən netənim komotiləs-ipər nərgi İərəməərə Iesu tər pīk.

¹⁸Kən netənim tepət itəm kotahətətə e Iesu, kəmotən-iarəp kəm netənim nat tərət min itəm kəmoatol.

¹⁹Neen itəm kəmoatəmik nərik, ilat min kəmotəmik naoa min rəhalat e nat əh moatuwa, moatan-ətip e niganəmti netənim. Nian netənim kəmotəfin e nəmti naoa min əh, təhmen e fifti-milian fatu ilat rafin.

²⁰Kən nəghatən rəha İərəməərə təmaiu iahgin e nəsanənən asol rəha Uhgın.

Nərgəhəuən asol kit əpəh Efesas

²¹Kən uarisig e nat əh, Pol tinən e nikin məmə otitəlig-pən əpəh Jerusalem, məto otuwın-pən Masetonia ne Akaea ikin. Kən in tən məmə, “Nian emuwın rəkis Jerusalem, ekəike muwın min Rom.”

²²Kən in təmahl-ipən Timoti ne Erastas itəm katuasitu lan, məmə okuaupən mian əpəh Masetonia. Məto in otətig pitən məsin əpəh ikin Esia.

²³Kən e nian əh, nərgəhəuən asol kit təmər əpəh Efesas o Suatip rəha İərəməərə.

²⁴Suah kit əh-ikin itəm tatol natimnat e iaen kit katən məmə silfa, nərgin u Temetrius. İkin-u netənim tepət koatəfak kəm uhgin kit pətan, nərgin u Atemis. Kən Temetrius tatol narmi nimə min e silfa itəm təhmen e nimə rəha narmi nat rəha Atemis. Kən nian tatol-salim-in ilat, matos məni asol ilat rəhan netənim min.

²⁵Kən tēmaun-in rəhan netəmim min ne netəm pişin itəm koatol wək kitiaħ əm mēmə okotuwa kitiaħ. Kən tən mēmə, “Io min, nəkotitun rəkis mēmə koatol win e mēni asol e wək u rəhatat.

²⁶Məto itəmat nəmotəplan ne motəto mēmə tahro nulan suah əh Pol tatərəkin netəmim tepət kən kinoatətəu-pən, sənəmə e Efesas əm, məto iuəhkir ikin min rafin e nitən əh Esia. In tatən-iarəp mēmə uhgin min itəm netəmim əm koatol e nelmilat, sənəmə uhgin min pahrien.

²⁷Kən roiu əh, iuəhkir əm tatərəkin suatip rəhatat o nosən mēni, kən iuəhkir əm min in tatol mēmə netəmim okotəplan rat nimə rəha Atemis, u itəm in ilis pik. Kən namnun, okəmə naka nəghatən rəhan otərəkin nərgin Atemis itəm ilis pik tuwa mol nat ərnapin əm lan. Məto ikin-u Esia ne ikin min rafin, netəmim koatəfak kəm uhgin u rəhatat.”

²⁸Nian kəmotəto nəghatən əh, nikilat təmahmə təmahmə, kən əmun minotagət əfəməh mēmə, “!Ure e Atemis u Efesas!”

²⁹Kən nat əh təmaiu mirəfin taon. Kən netəmim tepət kəmotuwa kitiaħ motuwın kaskəlim etəm Masetonia mil əh itəm katualiwək iləhal Pol, nərgilau u, Kaeas ne Aristakas. Kən kəmotuwın kələh kiuw-pən ilau əpəh ikin nian rafin koatol mitig asol ikin.

³⁰Kən Pol tolkeike mēmə otuwın məghat kəm netəm əh, məto netəm rəha Iesu kəsotegəhan-inən.

³¹Ne netəm-iasol neen rəha kaonsel asol əpəh Esia itəm kotolkeike Pol, kəmotahl-ipən nəghatən kəm in moatən-iəhau əskasik mēmə otəsuwınen əh netəm əh-ikin.

³²Kən ikin əh, netəmim koatol wilig wilig tepət motagət əfəməh. Neen koatən nat pişin, kən neen koatən nat pişin. Məto tepət kotəruru mēmə kəmotuwa o naka.

³³Kən noanol min neen rəha Isrel kəmotətgi-pən suah kit nərgin u Aleksanta mēmə otuwın mətul aupən-in ilat. Kən təmos-ipər nelmin matefətutu ilat mēmə otən-iarəp nehmən rəhan.

³⁴Mæto nian netəmim kəmotitun məmə in noanol kit rəha Isrel, kəmotagət əfəməh min məmə, “!Ure e Atemis əpəh Efesas! !Ure e Atemis əpəh Efesas!” Kəmotagət əfəməh motos aua kəiu.

³⁵Kən etəm-iasol kit u kapman asol rəha taon Efesas, təmətul mən-iəhau ilat məmə, “!Okəsotagətən-tu!” Kən mən məmə, “!Ei, netəmim! Atemis u, in uhgin rəhatat. Kən nərgin in ilis. Kən netəm ikin min rafin kotitun məmə in wək rəhatat netəm Efesas məmə okotehm wir niməfak rəhan, kən motehm wir kəpiel asim rəhan itəm təmisi-pən e neai muwa.

³⁶Kən suah kit tikə itəm otən məmə iateiuə. Kən tol nəhlan, təwir məmə nətəligən rəhatəmat teiuaiu. Təsəwirən məmə nakotalməl nulan.

³⁷“Nəmosos suah mil un motuwa ikin-u, mæto ilau kəsuaqləh-inən nat kit e nimə rəha narmi nat rəhatat, kən məsuəghat ratən e nərgi pətan əh, uhgin rəhatat.

³⁸Okəmə Temetrius ne rəhan iolwək min koatəplan-pən nəghatən rat e suah kit, nian əh-ikin rəha kot ne netəm u kot əh-ikin. Təwir məmə okotuwin kən-iarəp nəghatən rat min əh itəm kəmotəto kəm ilat.

³⁹Mæto okəmə nat kit min əh-ikin itəm nakotolkeike məmə onəkotol, onəkotəkəike motiləs motuwin e mitig ətuatip rəhan.

⁴⁰Timətig əm məmə okotiləs-ipən kitat e kot o nolən u-roiu məmə koatərgəhəu pik. Iuəhkir kotəmu təpiə əm ikin. ?Kən okol kəsotənən nat kit məmə kəmotuwa ikin-u e nəpələhən u-roiu o naka? Mæto-inu nəpələhən u, nipətın tikə.”

⁴¹Nian təmən rəkis nəghatən əh, kən mən-iəhau nəghatən mahl-ipən ilat məmə okotagim min.

Wək Min 20

Pol təmuwin əpəh Masetonia ne Akæa

¹Nian nəratən əh təmol namnun, Pol təmaun-in netəm rəha Iesu məmə okotuwa kitəh. Kən matəghat kəm ilat o nem əskasikən elat. Kən uarisig in, tauiatipin ilat miet maliwək muwin əpəh Masetonia.

²Təmuwin əh-ikin əh tepət ikin kən matos-ipən nəghatən tepət kəm netəmim rəha Iesu matem əskasik ilat, kən miet-pa Kris.

³Matig mos məwig kisil ikin əh, kən uarisig təmə otos nego kit mitəlig-pa Siria. Məto təməto məmə noanol min rəha Isrel kinoatol noa anion kit məmə okotohamnu əpəh e nego. Kən təməuhlin rəhan nətəligən, kən mapəs nego mətaliwək əm mitəlig-pən Masetonia.

⁴Netəmim itəm kəmoatətəu-pən e nian əh, kit u Sopata nəti Piras etəm Perea, ne Aristakas, ne Sekantas, etəm Tesalonaeka mil, ne Kaeas etəm Tepe, ne Timoti, ne netəm Esia mil u Tikikas ne Trofimas.

⁵Kən e Filipae, netəm əh kəmotəupən motuwın katəsahgin itimat əpəh Troas.

⁶Nian lafet rəha Pret U Is Tikə Lan təmol namnun, itimat emotos nego kit motiet əpəh Filipae motaiu nian faif kən panotuwın əpəh Troas, motuwın motəplan ilat kən mətatig motos wik apiəpiə.

Iutikas təmimis kən məmegəh min əpəh Troas

⁷E Sarare lapın, emotuwa kitiəh məmə ekotəfak, kən moatəgwən, kən moatun Nagwənən Rəha Nəmtətin Rəha Iesu. Kən Pol təməghat kəm netəmim məto-inu titun məmə olawig tatuwin mapəs ilat. Kən təməghat mətoarus nalugi nian lapın.

⁸Nipəgnoa nimə itəm ioatəpələh ikin, in e nimə kəmol kilpın-ilpın tər. Kən kəmasiepən e lait tepət əh-ikin.

⁹Kən etəm aluə kit, nərgin u Iutikas, tatəpələh e winta ikin. Nian Pol tatən-iarəp nəghatən rəha Uhgın matən matən, kən Iutikas, napılən tınatos, tınatiuw nəm, əmun məmə e winta misi-pər muwin morin əpəh ləhau e nəptən. Kən nipəg noa nimə itəm təməmə ikin, in tatol kisil lan. Kən nian kəmotəiuaiu motuwın, məto tınimis rəkis.

¹⁰Kən Pol təmuwin min əpəh ləhau muwin misin nulin e nıkali etəm əluə əh, kən miləs mago-ipa e nelmin mil, kən mən-ipən kəm ilat məmə, “Nikitəmat təsahmən. In tınəmegəh min.”

¹¹Kən Pol təmər min muwin əpəh ilis kən mol Nagwənən Rəha Nəmtətin Rəha Iesu ilat min ilat, kənu motagwən kitiəh. Kən tatəghat min kəm ilat mətəarus tian, əmun tatuwin mapəs ilat.

¹²Kən ilat kəmotit etəm aluə un motuwin latuənu. Nikilat tətəgien mətə-inu netəm aluə təməmegəh min.

Kəmotiet Troas motuwin Maelitas

¹³Kən Pol təmən məmə otaliwək əm muwin əpəh e taon əh Asos, mətə itimat ekotuwin e nego motuwin kiləs in əh-ikin. Kən itimat ekotos nego kaupən kan əpəh Asos, kən in tuarisig muwa.

¹⁴Nian təmiet-pa, ekotit motuwin e nego. Kən itimat rafin motuwin əpəh Mitilen.

¹⁵Emotiet motuwin ikin əh, kən lawigin ekotuwa katəməhl ihluə e nəptən əh Kios. Kən lawigin min ekotuwa e nəptən əkəku Samos. Kən lawigin min epanotuwa Maelitas kən motuwar ikin.

¹⁶Pol təmən rəkis məmə esotətulən Efesas mətə-inu tətəsolkeikeən məmə ekotan pik əh e nitən Esia. In təmalkut məmə ekotuwin uəhai Jerusalem məmə in otuwin e lafet rəha Nagwənən Wi katən məmə Pentekos.

Pol təmauiatipin netəm-iasol min rəha niməfak əpəh Efesas

¹⁷Kən nian emotuwar əpəh Maelitas, Pol təmahl-ipən nəghatən əpəh Efesas məmə elta min rəha niməfak okotuwa-tu kəplan.

¹⁸Nian kəmotuwa, təməghat kəm ilat məmə, “Itəmat nəkotitun rəkis rəhak nolən itəm iatol nian emuwa əpis ikin-u Esia mətəarus-pa roiu.

¹⁹Io iolwək əm rəha İərəmərə. Kən rəhak nətəligən in ləhau əm. Kən nian rafin nahui nəmtək tətaiu otəmat. Kən nian rafin etatig e nian əskasik min, mətə-inu noanol min rəha Isrel kotolkeike məmə okotohamnu io.

²⁰Itəmat nəkotitun məmə o nian iatəghat kəm itəmat ne matəgətun itəmat e niki netəmim natimnat min itəm otasitu etəmat, məsəhluaig-inən nat kit

otəmat, iatən-ipinə rafin e nipəgnoa nimə min kən ihluə e nigamnəmti netənim.

²¹Iatən-ipən ətuatip kəm netəm Isrel ne netəm Kris məmə okotəkəike motəuhlin ilat e rehalat nəmegəhən motuwa o Uhgın, kən motahatətə e rəhatat İərəməərə İesu Kristo.

²²“Kən roiu əh, enatuwin Jerusalem məto-inu Narmin Rəha Uhgın təmən kəm io məmə ekuwin. Esitunən məmə ekahratig əh-ikin.

²³Nat kitiəh əm ekitun məmə taon min rafin itəm iatuwin-pən ikin, Narmin Rəha Uhgın tatən-ipa kəm io məmə nian ekuwin ikin əh ekatig e nəratən kit kən muwin e kalapus.

²⁴Kən esəginən natimnat min əh. Nəmegəhən rəhak in nat əpnarın əm. Məto iakolkeike pik məmə ekol namnun wək itəm İərəməərə İesu təmos-ipa məmə ekol o nən-iarəpən namnusən təwir e nəwirən rəha Uhgın.

²⁵“Emuwin e ikin min rafin matəghat kəm itəmat e nəərəməərəən rəha Uhgın, kən roiu əh ekitun məmə okol nəsotəplan minən io nian kit.

²⁶Kən iatən-ipinə kəm itəmat əh-roiu e nigənəmti Uhgın məmə, okəmə itəmat kit otuwin tərət ikin, məto sənəmə io emol.

²⁷Emən-ipinə rafin natimnat kəm itəmat itəm Uhgın tolkeike məmə onəkotitun.

²⁸“Onakoatəto wir itəmat. Kən netənim itəm Narmin Rəha Uhgın təmos-ipinə e nelmitəmat, onəkotəkəike kehm wir ilat e niməfak rəha Uhgın tahmen e etəm rəha sipsip itəm tatehm wir rəhan sipsip min. Ilat min əh, Uhgın təmos-nəmtin ilat e nita nətın.

²⁹Enitun rəkis məmə nian ekiet rəkis etəmat, netənim neen itəm kotahmen e kuri iarupın min okotuwa məmə okotus itəmat netənim rəha İesu.

³⁰Itəmat atip min əm neen okəpanotətul moteiuə məmə okotit-irəkis netəm rəha İesu.

³¹Kən onakoatəto wir itəmat kən məsotaluinən məmə e nup kisil eməsapəsən nən-ipinəən nəghatən u kəm itəmat e nian min rafin. Kən nian neen, emitasək otəmat.

³²“Kən roiu əh, iatos-ipən itəmat e nelmi Uhgin, ne nəghatən rəhan kəm itəmat məmə in təmolkeike pik itəmat. Nəghatən u nəsanənən lan əh-ikin məmə otol itəmat nakotəskasik, kən mos-ipinə nəwirən itəm Uhgin təmən rəkis məmə otos-ipən kəm rəhan netəmim min.

³³“Io sənəmə etəmim itəm iakolkeike pik məni rəha etəm pisin, o natimnat itəm koatuwin lan.

³⁴Itəmat nəkotitun rəkis məmə io atip əm, iatol wək o nosən natimnat itəm io ne netəm koatuarisig-in io kotalkeike o natigən.

³⁵Nian nəmotehm rəhak nolən min, eməgətun suatip min əh kəm itəmat məmə onəkotol mihin motasitu e netəm u kəsotəskasikən. Kən onəsotaluinən nəghatən rəha Iərəməərə Iesu itəm təmən məmə, “Təwir agin o netəm u itəm koatos-ipən kəm netəmim maprəkis-in itəm koatəzahgin məmə okos-ipən kəm ilat.”

³⁶Nian Pol təmol namnun rəhan nəghatən, təmeiuaiu misin nulın kən məfak ilat min ilat.

³⁷Kən kəmotasək pik motaskəlim Pol katəpah nikapin motauiatipin.

³⁸Kəmoatəto tərət pik məmə təmən kəm ilat məmə okol kəsotehm minən niganəmtin. Kən ilat min kəmotaliwək motuwin əpəh nego ikin.

Wək Min 21

Pol təmuwin Jerusalem

¹Nian emotauiatipin rəkis ilat, emotuwin e nego kən motiet, motaiu ətuatip əm o nitən əkəku əh, Kos. Kən lawigin ekotuwa e nitən əkəku əh, Rotes. Kən emotiet min ikin əh motuwa min e ikin kit katən məmə Patara, kən motuwar ikin.

²Ikin əh emotəplan nego kit, kinatən məmə otiet muwin əpəh Fonisia. Kən ekotətipən lan motiet min.

³Itimat emotuwa kəplan nitən asol əh Saepras, kən motaiu-pən e nikalın u pis ikin kən motaiu e nitən Siria. Nego əh təmuwa e taon əh Taea məmə otəmki-par natimnat ikin. Kən ekotuwar ikin.

⁴Ikin əh emotuwın kəplan netəm rəha Iesu. Kən motatig itimat min ilat, kos wik apiəpiə kit. Kən Narmin Rəha Uhgın təghat kəm ilat, kən ilat kəmotən-ipən əskasik kəm Pol məmə otəsuwinən Jerusalem.

⁵Məto nian rəhatimat natigən ikin-u tinol namnun, kən ekotiet minoatuwin, kən netəm rəha Iesu ikin əh, ne rəhalat nıpitan min, ne nətilat min kəmotətəu-pa itimat ekotuwın əpəh itəhəi e nıməkləkil. Kən motisin nulitimat ikin motəfak, kən motaiuatipin itimat min.

⁶Kən ekotuwın e nego, ilat kotitəlig-pən iməlat ikin.

⁷Kən nego təmıet Taea maiu o nitən Toleme. Kən ekotuwar ikin motuwın kəplan piatimat min, kos nian kitəh.

⁸Kən lawigin, ekotiet min motuwın kuwar əpəh e taon Sisaria kən motuwın kətatig e nımə rəha Filip u itəm tatuwin ikin min matən-iarəp namnusən təwir. Kən in tatol sepın lan e netəmim itəm kəməmki-pər ilat aıpən o nasituen e aposol min.

⁹Netin pətan kuwit kəsotətəu-pənən iərman. Nıpitan əh koatən-iarəp nəghatən itəm Uhgın tatos-ipən kəm ilat.

¹⁰Emotatig nian kışil o kuwit ikin əh, kən ien kit rəha Uhgın əpəh Jutia təmuwa, nərgin u Akapus.

¹¹Təmuwa məplan itimat kən mİLəs-irəkis kətəut rəha Pol, kən məlis əfımən atip nelmin ne nelkin lan, kən mən-iarəp məmə Narmin Rəha Uhgın təmən kəm in məmə, “Netəm-iasol neen rəha Isrel okotəlis nəhlan suah əh rəhan u kətəut, kən motİLəs-ipən e nelmi İaihluə min.”

¹²Nian emotəto nəghatən əh, itimat netəm ikin əh, emotən-İəhau əskasik Pol məmə otəsuwinən Jerusalem.

¹³Məto Pol tən-ipin kəm ilat məmə, “?Tahro nakotasək? Nəkotol katətghəl nikik o nuwinən ikin əh. Io esəgin əmən o nuwinən e kalapus o nərgi İəramərə İesu, məto iategəhan min məmə ekimis ron əpəh Jerusalem.”

¹⁴Nian emotəplan məmə okol Pol təsəuhlinən rəhan nətəligən, kən ekotapəs əm, moatən məmə, “Pəs İəramərə otol əm nulan itəm in tolkeike mihin.”

¹⁵Emotatig məsin ikin-u, kən uarisig ekotaii-pən rəhatimat natimnat, moataliwək əm motuwın Jerusalem.

¹⁶Netənim neen rəha İesu əpəh Sisaria kəmotətəu-pa itimat motit itimat motuwın e nimə rəha etəm Saepras kit u in etəm rəha İesu nuwəh rəkis mətoarus-pa əh-roiu, nərgin u Nason. Kən motapıl ikin.

Pol təmuwin məplan Jemes

¹⁷Nian emotuwa Jerusalem, piatat min nikilat təmagien pİK məmə okotəplan itimat.

¹⁸Kən lawigin Pol ne itimat rafin ekotuwın məmə ekotəplan Jemes. Kən elta min rafin rəha niməfak kəmotuwa.

¹⁹Pol təmən təwir kəm ilat kən mən-iarəp wir kəm ilat natimnat rafin aɡin-əh e rəhan naliwəkən itəm Uhgın təmol kəm İaihlua min.

²⁰Nian kəmotəto nəghatən əh, ilat rafin nikilat təmagien, kən kotənwiwi Uhgın motən-ipən kəm Pol məmə, “İk ninitun rəkis məmə roiu əh netəm İsrel tahmen e taosan tepət kinotitun İesu, kən ilat rafin kotaskəlim pİK Lou rəha Moses.

²¹İlat kinəmotəto rəkis nəghatən neen itəm katən məmə nakatəgətun noanol min rəha İsrel əpəh ikin rəha netəm pisin pisin min məmə okotapəs Lou rəha Moses. Kən motəto məmə ik nakatən kəm ilat məmə okəsəhg-ipənən nenətilat min, kən kəsətəu-pən minən kastom rəhatat.

²²Roiu əh ilat okotəto məmə ik ninuwa ikin-u mətatig. ?Kən okotahro nulan əh-roiu?

²³Təwir məmə onəkol nat u itəm ekotən-ipinə kəm ik əh-roiu. Nəman kuwit ikin-u itəm kəmotol nəniəkisən kit ilat Uhgin.

²⁴Olawig nəkəike mit ilat motuwın, kən mos-nəmtin rəhalat nat megəh min rəha sakrifais, kən itəmat min ilat motol sakrifais rəha nafələn itəm Lou rəhatat tatən. Kən ilat kotitun nakən rəhalat-kapə təpiə. Nian natol natimnat rafin əh, kən netəmim okotitun məmə kateiuə lam, məto nıpahrienən, ik nataskəlim əh Lou rəha Moses.

²⁵Itimat emotahl-ipən rəkis naoa kit kəm Iaihlua min itəm kotahatətə e Iesu. Naoa tatən nəhlan məmə ilat okəsotunən nita, ne nagwənən itəm katol sakrifais lan kəm narmi nat min, kən məsotunən nat megəh itəm kəmaril nentou məto-inu nitan əpəh ikin e nıpətın, kən məsotolən təfagə e pətan.”

²⁶Kən lawigin, Pol ne netəm əh kuwit kotuwın kol natimnat itəm Lou tatən. Kən Pol tuwın əpəh e Nimə Rəha Uhgin məmə otən-ipən kəm pris min məmə nian kuwəh əh-ikin tətətig əh məmə Lou tatən, kən pris min okotol sakrifais kuwit tinahmen-in netəm min əh.

Netəm Isrel kəmotaskəlim Pol əpəh e Nimə Rəha Uhgin

²⁷Nian tinuwa iuəhkir o nian sepin itəm sakrifais rəha nafələn otol namnun lan, netəm Isrel neen itəm kəmotisi-pən Esia aupən, kəmotəplan Pol əpəh e niməfak, kən kinotos nımanin netəmim rafin əh, kən motaskəlim Pol,

²⁸motagət əfəməh lan məmə, “!Ei, netəm Isrel! !Otuwa kasitu etimat! Suah ilouin əpə itəm tatuwın ikin min matəgətun netəmim məmə okotetəhau kitat matən kəm ilat min məmə Lou rəha Moses in nat ənnapın əm ne Nimə Rəha Uhgin. Kən mit netəm Kris neen u Iaihlua min motuwa ikin-u imətət pisin əm ikin e Nimə Rəha Uhgin, kən nolən əh təmətğəhl Lou kən minol tinamkimik ikin-u.”

²⁹Kəmotən nəhlan məto-inu kəmotəplan suah əh Trofimas etəm Efesas təmətaliwək ilau Pol əpəh i taon. Kən nikilat təht məmə okəm-naka Pol təmit muea e ikin rəha netəm Isrel e Nimə Rəha Uhgin.

³⁰Kən netəmim rafin e taon kəmotagət əfəmäh o nat əh, motaiu motuwın kaskəlim Pol motewkəkan-iarəp əpäh e Nimə Rəha Uhgın. Kən pris mın kotahtosig uəhai əm e nafiluə e Nimə Rəha Uhgın.

³¹Nian kəmotalkut məmə okotohamnu Pol, kən etəm tatərəmərə e mopael mın rəha Rom əpäh Jerusalem, təmos nəghatən məmə katol nat asol kit əpäh e taon.

³²Kən təmaut məmik rəhan neen mopael mın ne netəm-iasol mın lan motaiu motuwın əpäh netəmim koatəmou ikin. Nian netəmim kəmotəplan ilat, kən kotapəs nohən Pol, kətul kəpnarın əm.

³³Kən etəm tatərəmərə e mopael mın təmuwa o Pol maskəlim, kən magət e rəhan mopael mın kotuwa motəlis e sen kəiu. Kən motətapäh o netəmim məmə, “?Etəmim pah u? ?Təmol nat tərət naka?”

³⁴Kən nımanın netəmim neen koatən nəghatən pisin, neen koatən nəghatən pisin. Məto-inu kinotəruru ətuatıp nəukəti nəghatən, kən nagətən tınepət. Etəm tərəmərə e mopael mın apon tınəruru məmə kəmahrol nulan, kən magət e rəhan mopael mın məmə otıləs Pol kan e nimə rəhalat.

³⁵Nian Pol tinategupər-egupər məmə otuwın imə, kən mopael mın kəmotəpən ron kiləs-ipər, məto-inu netəmim nikilat təmahmäh pik məmə okotoh.

³⁶Ilat rafin kəmoatuarisig-in moatən əfəmäh məmə, “!Otohamnu! Otohamnu!”

Pol təmən nəwtain nəghatən

³⁷Nian kəmotıləs motuwın məmə okotegu-pən imə, kən tən-ipən kəm etəm tərəmərə e mopael mın məmə, “!akolkeike məmə ekən nat kit kəm ik.” Kən etəm tərəmərə e mopael mın təmə, “?Nakahro mıtun nəghatən Kris?”

³⁸?Okəmə naka ik etəm Ijip ilouin itəm nəmatol nəratən kəm rəhatimat kapman aupən, kən məmik netəmim fo-taosan ilat Netəm Rəha Neim Arın itəm kotohamnu netəmim, kən motuwın kətatisig əpäh ikin taruən-aruən ikin?”

³⁹Məto Pol təmə, “Kəp. Io noanol kit rəha Isrel. Emaiir əpəh Silisia e taon keike Tasas, kən io iatos nərəməərəən rəha ikin əh e taon əh. Awi, kol nakegəhan-in io pəs ekəghat-tu kəm netəm min əh.”

⁴⁰Kən tegəhan in. Kən Pol tətul-pər əpəh kategupər-egupər ikin miləs-ipər nelmin mefətutu ilat lan məmə okəsotagətən. Nian kəməsotagətən, kən təghat kəm ilat e nəghatən Isrel məmə,

Wək Min 22

¹“Tata min ne piak min. Otətəlig-in-tu io. Pəs ekən rəhak kəm itəmat.”

²Nian kəmotəto məmə təməghat kəm ilat e nəghatən ətuatip rəhalat, kən nəghatən təmikə agin-əh, moatətəlig-in. Kən tən məmə,

³“Io noanol kit rəha Isrel. Emaiir əpəh Silisia e taon əh Tasas, məto emepət u Jerusalem. Kamaliel təməgətun io. Təməgətun wir io e Lou rəha tīpitat min məmə ekətəu-pən ətuatip. Kən e nian əh, ematəsanən o nolən natimnat itəm Uhgīn tolkeike tahmen etəmat u-roiu.

⁴Aupən ematoh netəmim itəm kotətəu-pən Suatip Rəha Iesu. Kən mətaskəlim ilat, nəman ne nīpitan, matəmki-pən ilat e kalapus.

⁵Nəghatən min u pris asol agin ne netəm-iasol min rəha kaonsel rəhatat kotitun nənən məmə nīpahrienən. E nian əh, emos naoa rəhalat muwīn əpəh o netəm Isrel əpəh Tamaskes. Kən ematuwīn ikin əh məmə ekaskəlim netəm min əh rəha Iesu məmik ilat muwa məmki-pən ilat e kalapus əpəh Jerusalem mol nalpīnən kəm ilat.

Pol təmən-iarəp məmə təmahro mətəu-pən Iesu

(Wək 9:1-19; 26:12-18)

⁶“E nian mitgar tinalalin əm, kən enuwa iuəhkir o Tamaskes, kən nəhag-əhagən kit tatuəp tərūən tərūən, təmisi-pən e neai, masiəgəpīn-pīnə io ikin.

⁷Kən ekisi-pər morin e nəptən. Məto nəwia suah kit tatən-ipa kəm io məmə, ‘!Sol! !Sol! ?Tahro natol tərət kəm io nulan?’

⁸Kən ekəmә, ‘?Məto İərəmərə, ik pah?’ Kən tәмә, ‘Io Iesu, etəm Nasaret u itəm ik natol tərat lan.’

⁹Netəm itəm kəmoatuarisig-in io e suatip, kəmotəplan nəhag-əhagən əh, məto kəməsotətoən nəwia suah əh itəm təməghat kəm io.

¹⁰Kən ekətapəh ron məmә, ‘?İərəmərə, ekahro nulan əh-roiu?’ Kən İərəmərə tən-ipa kəm io məmә, ‘Ətul maliwək muwin əpəh Tamaskes. İkin əh, suah kit əh-ikin itəm otən-ipinə kəm ik natimnat itəm Uhgın tinəmən rəkis məmә ik onəkol.’

¹¹Məto-inu nəhag-əhagən əh təsanən pik, kən mol niganəmtək təpis, kən netəmim itəm koatuarisig-in io kotos əm nelmək motit io ekotuwin Tamaskes.

¹²“Kən ikin əh, suah kit əh-ikin, nərgin u Ananaeas, in suah kit itəm tətəskəlīm wir Lou rəhatat, kən netəm Isrel əh-ikin əh kotisiai-in pik.

¹³Kən təmuwa məplan io mətul-pa iuəhkir ron io məmә, ‘Piak Sol, roiu əh niganəmtim otəwir min.’ Kən e nian əm əh, niganəmtək təmaiir min enatəplan in.

¹⁴Kən tən-ipa kəm io məmә, ‘Uhgın rəha tıpitat min aupən, in təmitəpun rəkis ik məmә ik onəkitun natimnat itəm in tolkeike. Kən ik məplan Etəm Ətuatip əh rəhan, kən məto ətuatip rəhan nəghatən e nohlin.

¹⁵Onəkəike mən-iarəp kəm netəmim rafin natimnat itəm ik nəməto kən məplan.

¹⁶?Kən roiu əh, nakatəzahgin naka? Ətul muwin məfak-pən kəm Iesu, kən kol baptais lam, kən in otafəl rəham nolən rat min.”

Uhgın təmahl-ipən Pol kəm netəm u sənəmә netəm Isrel

¹⁷Kən təmatən məmә, “Uarisig e nat u, kən ekuwin Jerusalem. İkin əh, emuwin e Nimə Rəha Uhgın matəfak, kən məplan napilairən kit itəm Uhgın təmos-ipa.

¹⁸E napilairēn əh, eməplan Iərəmərə tatən-ipa kəm io məmə, ‘Ətul uəhai əh-roiu agin miet Jerusalem. Məto-inu netəm ikin-u okol kəsotətəlig-inən rəhak nəghatən itəm ik natən.’

¹⁹Məto ekəmə, ‘Iərəmərə, netəm əh kotitun wir məmə aupən ematuwin əpəh e nimə rəha nəfakən rəhalat mətaskəlim netəm u kotahatətə lam muwa mətəlis ilat matəmki-pən ilat e kalapus.

²⁰Kən nian netəmim kəmotəhtimnu Stipen, kən nitan təmaiu məto-inu təmatən-iarəp ik. Məto io min, ematətul itimat min ilat. Kən nīkik tətəgien məto-inu kotaht Stipen e kəpiel, kən matehm rəhalat natimnat.’

²¹Məto Iərəmərə təmən-ipa kəm io məmə, ‘Uwin. Məto-inu io etahl-ipən ik ikin əh kəm Iaihlua min.’”

²²Kən kəmoatətəlig-in wir kətoarus tən namnun. Məto nian kəmotətə nəghatən əh, motagət əfəməh məmə, “!Otiləs-iarəp suah un, kohamnu! !Təsəwirən məmə otatig!”

²³Kəmoatəkəike motagət əfəməh motərakin əpnəpən əm rəhalat natimnat, moatəmīk nimoulul katərakin əpnəpən əm.

²⁴Kən etəm Rom itəm tərəmərə mopael min tən məmə okiləs kan əpəh e nimə rəha mopael min. Kən təmə okalis məto-inu tolkeike məmə Pol otən kəm in məmə netəmim kotagət pik lan nəhlan o naka.

²⁵Məto nian kəmoatietain wir Pol məmə okotalis, kən tən-ipən kəm netəm-iasol min əh kit rəha mopael min itəm tatətul iuəhkīr ron məmə, “!Ei! Io etəm Rom u. ?Tətuatip məmə onəkotalis io nian esuwīnən əh e kot?”

²⁶Nian etəm-iasol rəha mopael min təməto nəghatən əh, təmuwin məplan etəm tərəmərə elat mən-ipən kəm in məmə, “!Ei! !Okəmə naka ik nəkəruru suah əh in etəm Rom!”

²⁷Kən etəm tərəmərə e mopael min əh tətəpəh o Pol məmə, “!Ei! Ən wir-tu məmə ik etəm Rom pahrien o kəp.” Kən Pol tən məmə, “Əwəh. Iatən pahrien.”

²⁸Kən etəm tərəmərə e mopael min tēmā, “Emətou mēni pik o negəhan-inən io mēmā ekuwa io etəm Rom.” Məto Pol tēmā, “Rəhak tata in etəm Rom. Kən tol nəhlan, io etəm Rom.”

²⁹Kən əmun mopael min itəm kəmoatətul matip mēmā okotalis Pol kəmotaut kani mēntaalat ka isəu. Kən nian etəm-iasol əh tēmitun mēmā Pol in etəm Rom, kən tēməgin məto-inu tinəlis rəkis e sen.

Pol tēmətul aupən e kaonsel

³⁰Kən lawigin, kən etəm tərəmərə e mopael min əh tolkeike mēmā otitun ətuatip mēmā tahro netəm Isrel koatol nəhlan e Pol. Kən mən kikis rəkis sen lan, kən maun-in pris asol min ne netəm-iasol rəha kaonsel rəha netəm Isrel mēmā okotəpələh kəghat, kən muwin miləs Pol muwa tətul aupən in ilat.

Wək Min 23

¹Kən Pol tēmətag-pən ətuatip əm o netəm rəha kaonsel, kən mən mēmā, “Piak min. E rəhak nəmegəhən aupən mətoarus-pa u-roiu, esətoən mēmā nikik otəgin mēmā emol nat tərət kit e niganəmti Uhgīn.”

²Kən pris asol agin əh Ananaeas tən-ipən kəm netəm koatətul iuəhkir ron mēmā kit otem-pən nohlīn.

³Məto Pol tēmən-ipən kəm in mēmā, “!Uhgīn otol mihin min lam! Ik nakahmen e nimə itəm kəmol pen lan tərūən pik əm ihluə, məto tamkimik əpəh imə. ?Tahro natəpələh ikin-u mətakil io e Lou rəhatat, məto ik nəmən mēmā kit otem io? Ik ninətgəhl rəkis Lou əh.”

⁴Netəm koatəpələh iuəhkir o Pol kotəmā, “?Tahro natəghat rat e pris asol agin rəha Uhgīn?”

⁵Kən Pol tēmā, “Piak min. Io esitun agin-əhən mēmā in pris asol agin rəha Uhgīn. Məto io ekitun mēmā Naoa Rəha Uhgīn tatən nəhlan mēmā, ‘Əsəghat ratən e netəm itəm kotepət lam.’”

⁶Kən tēməplan mēmā nəwtain kaonsel məsin ilat Satusi min, kən nəwtain məsin ilat Farisi min. Kən in tēməghat əfəməh mēmā, “Piak min. Io Farisi kit.

Rəhak tata ne tipik min, ilat Farisi min. Məto netəm u kotołkeike əm məmə okotiuw-iarəp io e kot məto-inu emələhəu-pən rəhak nətəligən e nahatətən u rəhatat məmə etəm təmimis otəpanəmegəh min.”

⁷Nian təmən rəkis əm nəghatən əh, kən Farisi ne Satusi min kəmotərgəhəu asol əpəh imə e kaonsel, kən minotəhap ilat min, minotol nənən kəiu.

⁸Məto-inu Satusi min koatən məmə nian etəmim otimis, okol təsəmegəh minən. Kən moatən məmə nagelo tikə, kən narmin tikə. Məto Farisi min koatən məmə, nat miləhal əh, in niphrienən.

⁹Məto-inu o nat əh, kən ilat kəmotagət pik ron. Kən nəghatən rəhalat təmər muwin ilis. Kən iəgətun min neen rəha Lou u Farisi min, kəmotən əskasik məmə, “Itimat esotəplan-pənən nəghatən rat kit ne e suah u. Okəm-naka niphrienən məmə narmin kit o nagelo kit təməghat kəm in.”

¹⁰Kən nərgəhəuən təməskasik pik. Kən etəm tərəmərə e mopael min əh, təgin məmə okəmə okotiləs Pol əh-roiu, okotearəsin-earəsin. Kən tahl-ipən rəhan mopael min məmə okotuwın kiləs-irəkis Pol kiləs kan min əpəh iməlat ikin.

¹¹Kən lapin əmun, İərəmərə tuwa o Pol mən-ipən kəm in məmə, “Nat əh, nat ərnapin əm. Əsəginən. Ik nəmən-iarəp rəkis io ikin-u Jerusalem. Kən onəkol mihin min əpəh Rom.”

Netəm Isrel neen kəmotən anion məmə okotohamnu Pol

¹²Kən lawigin, netəm Isrel neen kəmotəpələh e nəghatən kit, kən motən anion məmə okotohamnu Pol. Kən motol nəniəkisən kit məmə okəsotagwənən ne motənim nəhau kətoarus okotohamnu Pol. Kən okəmə okotətəghl nəniəkisən əh, pəs Uhgın otoh ilat kotimis.

¹³Ilat taprəkis-in foti itəm kəmoatol anion noa əh.

¹⁴Kən kəmotuwın o pris asol min, ne netəm-iasol min rəha niməfak rəha netəm Isrel, motən-ipən kəm ilat məmə, “Emotol nəniəkisən kit məmə esotunən nat kit mətoarus ekotohamnu Pol.

¹⁵Kən itəmat ne netəm rəha kaonsel onəkotəkəike kahl-ipən nəghatən kəm etəm tərəmərə e mopael min rəha Rom motətarəh ron məmə, otəkəike miləs min Pol muwa u ikin-u, kən moteiuə lan məmə onəkotəplan o natimnat min əh rəhan. Kən itimat ekotəhluaig e suatip kətalkəlik məmə okotiləs kətah u, kən ekotaskəlim kohamnu.”

¹⁶Məto rəhn ioanian Pol kit iərman, nəti winin, təməto nəghatən əh, kən muwin əpəh imə mopael min ikin mən-iarəp kəm Pol.

¹⁷Kən Pol taun-in etəm-iasol kit rəha mopael min tuwa, kən tən-ipən kəm in məmə, “Awi, okol nakit etəm aluə u muwin tehm etəm tərəmərə e mopael min. In tatos nəghatən kit məmə otən kəm in.”

¹⁸Kən mopael əh tit mian o etəm tərəmərə elat. Kən mən-ipən kəm in məmə, “Suah u Pol itəm tətətig e kalapus, təmaun-in io məmə oekit etəm aluə u muwa kəm ik. In tatos nəghatən kit məmə otən kəm ik.”

¹⁹Kən etəm tərəmərə e mopael min əh, tos nelmi suah apon mian əpəh ikin kit ilau pisin əm, kən mətəpəh ron məmə, “?Naka əh nakəmə nakehm io ron?”

²⁰Kən suah un təmə, “Netəm-iasol min əpəh Isrel kəmotegəhan rəkis məmə olawig kotuwa kətarəh ron ik məmə onakit Pol mian əpəh e kaonsel rəhalat. Okoteiuə-in ik məmə kaonsel tolkeike məmə otəplan wir min-tu nəghatən min rəha suah əh.

²¹Məto awi, əsegəhan-inən ilat kotiuw-pən ik. Məto-inu rəhalat netəmim taprəkisi foti okotuwa katəhluaig e suatip katəsahgin. Ilat kəmotol nənəkisən kit məmə okəsotagwənən məsotənimən nəhau mətoarus okotohamnu pitən Pol. Kən minoatətul matip əm əh-roiu məmə okotol nat əh, moatəsahgin əm rəham nəghatən.”

²²Kən etəm tərəmərə e mopael min apon təmə, “Əsən minən kəm suah kit məmə nəmən-ipa nəghatən u kəm io.” Kən mahl-ipən tatuwin.

Kəmahl-ipən Pol kəm Filiks u kapman rəha Rom

²³Kən etəm tərəmərə e mopael min taun-in rəhan etəm-iasol kəiu mən-ipən kəm ilau məmә, “Okian muən kəm mopael min ilat rafin fo-hanrit-sepinte məmә okotətul matip o nuwinən Sisaria. Kən tu-hanrit okotaliwək әm, kən sepinte okotasuә e hos, kən tu-hanrit itəm okotәmik niro okotətul matip. Okotiet e nain klok әh-roiu lapin.

²⁴Kən motəkәike kiləs hos neen məmә Pol otəpələh elat, kən motiləs motuwın kəm kapman әh Filiks, kən moatehm wir məmә okәsolən nat kit lan e suatip.”

²⁵Kən etəm-iasol rəha mopael min tәмәte naoa kit mos-ipən kəm itəm mil un məmә okotiləs kan kəm kapman asol әh Filiks. Naoa un tatən məmә,

²⁶“Filiks. Ik etəm ilis pik pahrien. Io Klotias Lisias iatәte naoa kəm ik itəm ik natərəmərə e kapman, kən iatən tәwir kəm ik.

²⁷Suah u, noanol min rəha Isrel kinotaskәlim rәkis, kən iuәhkir kotohamnu. Mәto io emәto məmә in etəm Rom, kən ekuwin itimat rəhak mopael min kiləs-irәkis olat.

²⁸Emolkeike məmә ekegәs-in-tu məmә nat naka tәmol tәsәtuatipən itəm koatәplan-pән lan, mol kotiləs motuwın e kaonsel rәhalat.

²⁹Kən emәplan məmә in tәsolən nat tәrat kit ne itəm otimis ron, o məmә otuwın o kalapus ron. Nәghatən min itəm koatәtu-pән lan in nat kit e rәhalat atip әm lou.

³⁰Mәto uarisig suah kit tәmuwa mән-ipa kəm io məmә netәм Isrel koatol anion noa kit məmә okotohamnu, kən nikik tәht məmә tәwir məmә ekahl-ipinә kəm ik. Enән-ipән rәkis kәм netәм әh itәм koatol timәht kәм in mәмә okotimnә kән-ipinә kәм ik nat tәrat min itәм koatәplan-pән lan. Inәh namnu rәhak nәghatән.”

³¹Kən mopael min kәmotol әm mәмә inu ne etәм tərəmərə elat tәмән mihin. Kәmotiləs Pol motuwın e taon әh Antipatris lapin.

³²Kən lawigin, mopael min itәм kәmotaiu e hos min, ilat әm kotiləs Pol motuwın. Kən mopael neen min kәmotitәlig-pa imәlat ikin.

³³Mopael min əh kəmotiləs motuwīn əpəh Sisaria, kən motiləs-ipən naoa kəm etəm-iasol əh Filiks, kən motələhəu-pən Pol e nelmin.

³⁴Nian kapman u təmafin naoa, kən mətəpəh o Pol məmə, “?Ik etəm hiə?” Kən nian təməto məmə Pol in etəm Silisia,

³⁵in təmən məmə, “Nian netəmim okotuwa kən-iarəp natimnat itəm koatəplan-pən əh lam, io ekən kot otəpələh o nətəligən u rəham, kən io ekakil.” Kən mən-ipən kəm rəhan mopael min məmə okotiləs-ipən Pol e nimə rəha kapman rəha Rom itəm Kig Herot Asol təmīləkin aupən, motaskəlīm əh-ikin.

Wək Min 24

Pol təmətul aupən e Filiks e kot

¹Nian faif tinuwīn rəkis, kən pris asol agin, nərgin u Ananaeas, təmuwīn Sisaria ilat netəm-iasol min neen rəha Isrel ne ienatig e lou, nərgin u Tetalas. Nian kəmotiet-pa, kən motuwīn kətul e niganəm̄ti Filiks kən motən-iarəp nəghatən min itəm nīkilat təht məmə Pol təmōl təsətuatipən.

²Kən kəmotəun-in Pol məmə otuwa imə e nəghatən, kən Tetalas tatən-ipən nəghatən min rəhalat kəm Filiks məmə, “Etəm-iasol. Ekotisiai-in pīk ik mətō-inu ik ilis pahrien. Kən nolən rəham o nəmīkən itimat in tatətuatip wir. Imatimat ikin təməməlinu nuwəh rəkis mətōarus-pa u-roiu. Kən ik nəməgətuatip-in rəkis nolən u ikin-u məmə otol nəmegəhən ne natigən rəhatimat təwir.

³Kən nian rafin kitat koatəto təwir o natimnat min əh, kən ekotənwiwi pīk ik ron.

⁴Esotolkeikeən məmə ekaskəlīm pīk ik, mətō ekətapəh ron ik məmə onakasəkitun itimat mətəlig-in wir-tu nəghatən əkuəkīr u rəhatimat.

⁵“Itimat emotəplan rəkis məmə suah əh in etəm tərət kit. In nəukəti nəratən tərət e ikin min e nītən min. In tatol itimat netəm Isrel ekoatərgəhəu pīk, kən etəm-iasol rəha netəm koatuarisig-in suah ilouin etəm Nasaret.

⁶Kən in mətalkut məmə otol Nimə Rəha Uhgīn tamkimik e niganəmti Uhgīn, kən ekotaskəlīm.

7

⁸Kən okəmə nakətapəh ron, nəkitun nətoən nəghatən min u tiet e nohlin itəm iatən-ipinə kəm ik.”

⁹Kən netəm Isrel kəmotegəhan e nəghatən rəha loea əh moatən məmə, “Nəghatən min rafin əh, in nīpahrienən.”

Pol təmuhalpin nəghatən

¹⁰Kən Filiks torin-pən rəhn-kapə kəm Pol məmə otəghat. Kən Pol təghat məmə, “Etəm-iasol Filiks. Io ekitun wir məmə ik nəmatakil e kot netəm u ikin-u imatimat ikin e nup tepət rəkis. Kən tol nəhlan nikik tagien məmə ekən-iarəp nəwtain nəghatən rəhak kəm ik.

¹¹Io emuwīn Jerusalem minos əm nian tuelef əm məmə ekuwīn məfak. Kən ik nəkitun natətapəh-inən nat u məmə in nīpahrienən o neiuəən.

¹²Netəm u koatətu-pa nəghatən u lak, kəsotəplanən ne məmə ekuərgəhəu itimlau suah kit əpəh e Nimə Rəha Uhgīn. Kən məsotəplanən məmə iatol netənim koatərgəhəu əpəh e nimə rəha nuəfiminən rəha netəm Isrel, o ikin min əpəh e taon. !Kəp!

¹³Kən okol təsəgətuən ətuatipən kəm ik məmə nəghatən itəm koatən lak u-roiu in nīpahrienən, məto-inu in neiuəuəən.

¹⁴“Məto ekitun nən-ipinən kəm ik məmə nīpahrienən məmə nian iatətəu-pən Suatip Rəha Iesu itəm netəm Isrel kotəmə in nəfakən neiuəən, io iatəfak kəm Uhgīn rəha tipitimat min, kən io iatən nīpahrienən e nəghatən min itəm kəməte e Lou rəha Moses ne nəghatən rəha ien min rəha Uhgīn aupən.

¹⁵Io iatələhəu-pən əm rəhak nətəligən kəm Uhgīn məmə in otol kəm netəm kəmotimis məmə okotəmegəh min, netəm u kotətuatip ne netəm kəsotətuatipən. Inu nətəligən kitieh əm itəm nikilat tatəht.

¹⁶Məto-inu tol nəhlan, kən etalkut pik məmə ekol nat naka itəm io ekitun məmə tətuatip e niganəmti Uhgın ne netəmim.

¹⁷“Uarisig e nup neen itəm emiet u ikin-u Jerusalem, kən emitəlig-pa min məmə ekos məni muwin kəm netəm imak ikin, kən mol sakrifais min əpəh e Nimə Rəha Uhgın.

¹⁸Kən nian ematol əh nat əh, kən enətuatip rəkis e niganəmti Uhgın, kəmotəplan io əpəh e Nimə Rəha Uhgın. Kən sənəmə itimat netəmim tepət, kən məsotərgəhəu minən.

¹⁹Məto netəm Isrel neen itəm kəmotisi-pən Esia, kəmoatətul əh-ikin e nian əh. Kən okəmə koatos nəghatən kit tərət lak, təwir əm məmə ilat okotuwa kətul e niganəmtim kən-iarəp.

²⁰Məto okəmə kəpə, təwir məmə netəm Isrel min u itəm koatətul ikin-u, okotən-ipinə ətuatip kəm ik nat naka itəm emol təsahmenən e nian emətul e niganəmti kaonsel rəhalat.

²¹Kəmotetəhau io o nəghatən kitiəh əm məmə nian emətul aupən-in elat, magət əfəməh elat məmə, ‘Itəmat nakotakil io u-roiu məto-inu io iatən nıpahrienən məmə netəm kəmotimis okotəmegəh min.’”

²²Suah əh Filiks in titun wir Suatip Rəha İesu. Kən təmahtosig-in nəghatən əh məmə, “Nian Lisias u etəm tərəmərə e mopaël min otiet-pa ikin-u, kən epanos-ipinə nəghatən e nəpələhən u-roiu.”

²³Kən Filiks təmən-ipən kəm etəm tepət e mopaël min məmə okoatehm wir Pol kən təmegəhan-in rəhan min məmə kotitun nosən natimnat itəm in tolkeike motuwa kəm in.

Pol təməghat kəm Filiks ne rəhan pətan

²⁴Kən uarisig e nian neen, Filiks təmit rəhan pətan Trusila muwa u noanol kit rəha Isrel. Kən Filiks tən-ipən kəm ilat məmə okotit Pol motuwa-tu tətul aupən in. Kən nian Pol təmuwa, kən matəghat kəm ilau matən-ipən nolən min rəha nahatətəən e Kristo İesu.

²⁵Kən Pol təmatən-iarəp rəhan nīpəgnəmtin min kəm ilau məmə otiuw rəhalau nətəligən. Kən nian in təməghat e nolən rəha nəmegəhən itəm tətuatip, ne nolən itəm suah kit tatərəmə e rəhan nətəligən ne nolən min, ne nian Uhgīn otakil netəmim lan, kən Filiks təməgin təməgin kən mən məmə, “Tinahmen. Iet əh. Okəmə ekos nian kit min, kən panaun-in min ik.”

²⁶Kən nian tepət tatən-ipən məmə Pol otuwa matuəghat, mətə-inu in tolkeike məmə otətə Pol, mətə nat kit min, nīkin təht məmə okəmə naka Pol otos-ipən mənī neen kəm in pəs in tahl-iarəp.

²⁷Kən nian tinos nup kəiu, Filiks təmeiuaiu e kapman, kən suah kit nərgin u Posias Festas təmos nəmeen. Mətə Filiks təmapəs Pol tətətig əm e kalapus məmə otol niki netəm Isrel tətəgien.

Wək Mīn 25

Pol təmətəpəh məmə otəplan Sisa

¹Nian Festas təmōl kapman mīnos əm nian kīsil, kən miet Sisaria muwīn əpəh Jerusalem.

²Ikin əh, pris asol min ne netəm-iasol min rəha Isrel kəmotən-ipən kəm Festas nakilən rəhalat e natimnat neen itəm nīkilat təht məmə Pol təmōl təsətuatipən.

³Kəmotəpəh məmə Festas otol nəwialat, kən motolkeike məmə otahl-ipən Pol tītəlig-pən əpəh Jerusalem, mətə-inu ilat kəmotol anion noa kit məmə okotohamnu Pol e suatip.

⁴Mətə Festas təmə, “Pol otətətig əm e kalapus əpəh Sisaria. Kən otəsuwəhən, ekitəlig-pən əh-ikin.

⁵Kən rəhatəmat neen netəm-iasol okotəkəike motətəu-pa io ekotuwin Sisaria, kən okəmə Pol təmōl nat kit təsahmenən, kən okotətu-pa kəm io.”

⁶Kən Festas təmatig mos nian eit o ten ilat min ilat, kən mītəlig muwīn əpəh Sisaria. Kən kəmən lawigin, tahl-ipən nəghatən məmə okit Pol ka, tətul e kot, kən muwīn məpələh e jea itəm etəm tətakil nəghatən tatəpələh ikin.

⁷Nian Pol tēmuwa imə, netəm Isrel itəm kəmotisi-pən Jerusalem kəmotətul kitəlau in moatən-iarəp nəghatən əskasik neen e Pol, mətə suatip tikə itəm otəgətun rəhalat nəghatən məmə koatən pahrien.

⁸Kən Pol tēmuhəlpin nəghatən rəhalat məmə, “Esolən nat kit tərət e Lou rəha netəm Isrel, ne Nimə Rəha Uhgīn, ne Sisa u tərəmərə e ikin min.”

⁹Mətə Festas tolkeike məmə otol niki netəm Isrel tagien kən mətəpəh o Pol məmə, “?Nikim tagien məmə onəkuwin Jerusalem? ?Pəs ekimnə ikin makil rəham nəghatən e nənən min u?”

¹⁰Kən Pol tēmə, “Io iatətul e kot rəha Rom, itəm rəhan etəm-iasol in Sisa. Kən tətuatip məmə onakakil nəghatən ikin rəhak. Kən ik nəkitun rəkis məmə esolən nat kit tərət e netəm Isrel.

¹¹Okəmə emətgəhl lou o emol nat kit tərət məmə ekimis ron, kən okol esətapəhən kəm ik məmə, nakiləs-irəkis io o nat əh. Mətə okəmə nənən min əh koatən lak kəsotətuatipən, kən suah kit tikə məmə otos-ipən io e nelmilat. Mətə ekolkeike əm məmə Sisa in otakil nənən min u itəm koatən lak.”

¹²Kən Festas tēməghat e nənən əh məsin ilat rəhan min netəmim itəm kotakil nəghatən. Kən uarisig tən-ipən kəm Pol məmə, “Ik nəmən məmə nakolkeike məmə onəkuwin məplan Sisa o nəghatən u rəham. Kən təwir əm. Ik onəkuwin məplan Sisa.”

Pol tēmətul aupən e Kig Akripa 2

¹³Nian neen min tēmuwa muwin, kən Kig Akripa ne winin nərgin u Pernis, ilau kəmuea Sisaria məmə okuəplan Festas muən təwir kəm in.

¹⁴Kən nian kəmuatig ikin əh nian neen, kən Festas tən-ipən kəm kig natimnat neen itəm katən e Pol. In təmən məmə, “Suah kit u ikin-u e kalapus, itəm Filiks təmīləs-ipən.

¹⁵Nian emuwin Jerusalem, kən pris asol min ne netəm-iasol rəha Isrel kəmotən-iarəp nipəgnəmtin neen lan məmə tatol təsətuatipən motətapəh məmə ekən-iarəp məmə in təmōl tərət kən otos nalpinən ron.

¹⁶Məto emən-ipən kəm ilat məmə, ‘Itimat netəm Rom sənəmə nolən u rəhatimat məmə okotegəhan-in əm etəmim tuwin e nelmi netəmim itəm koatən məmə təmol nat kit təsətuatipən. Məto təkəike mətul aupən-in ilat muhalpin rəhalat nəghatən itəm katətu-pən lan.’

¹⁷Kən nian netəm Isrel mīn əh kəmotuwa, eməsiuw-pən mīnən, məto kəmən lawigin əm, kən ekotuwin kəpələh e nimə kot kən motaun-in mīn Pol məmə otuwa mətul aupən.

¹⁸Nian rəhan tīkimir mīn kəmotətul motəghat, məto kəsotənən məmə təmol nat naka tərət itəm nīkik təmatəht məmə okotən mihin.

¹⁹Ilat kəmoatən-iarəp əm nərgəhəuən kit rəhalat e nəfakən rəhalat, kən moatən nənən e etəm təmimis kit, nərgin u Iesu, itəm Pol tatən məmə suah əh tatəmegəh.

²⁰E natimnat mīn əh, io esitun wīrən nənən lan məsin, kən mol ekətapəh o Pol məmə, ‘?Tahro, nīkim tagien məmə nakuwin Jerusalem? ?Pəs ekimnə ikin makil nənən mīn itəm katən lam?’

²¹Məto Pol təməsegəhanən, kən mətapəh məmə ekahl-ipən in Rom kəm Sisa, pəs in otakil nənən mīn əh itəm katən lan. Kən emən-ipən məmə rəhak netəmim okoatehm wīr mətoarus ekehm suatip kit, kən panahl-ipən tuwin məplan Sisa.”

²²Kən Kig Akripa təmən kəm Festas məmə, “Io mīn iakolkeike məmə ekəto nəghatən rəha suah əh.” Kən Festas təmə, “Təwīr əm. Olawig nakəto rəhan nəghatən.”

²³Kəmən lawigin, kən Kig Akripa ne Pernis kəmuea e nimə kot, kən netəm-iasol itəm koatərəməərə e mopael mīn, ne netəm-iasol pīk mīn e taon əh Sisaria kəmotuwa, kən kəmotol nolən asol mīn rəha nisaiiən. Kən Festas tahl-ipən rəhan mopael mīn məmə okotuwin motiləs Pol motuwa.

²⁴Kən Festas təmə, “Kig Akripa ne itəmat rafin itəm nakoatəpələh u ikin-u roi. Suah u itəm tatətul aupən-in itəmat, netəm Isrel u ikin-u ne Jerusalem

koatəghat kəm io ron nian rafin. Nian rafin kotagət əskasik lak məmə təsəwirən məmə ekegəhan-in suah əh tətətiḡ, məto təkəike mimis.

²⁵Məto io esəplanən nat tərət kit lan ne, itəm ekol nalpinən kəm in e nimisən. Məto nian in təmətapəh məmə otuwīn məplan Sisa əpəh Rom, kən nikik təht məmə ekegəhan-in.

²⁶Məto esosən nəghatən ətuatip kit ne e nat u məmə ekəte naoa lan mahl-ipən kəm Sisa. Kən tol nəhlan, ekiləs muwa məmə otətul aupən e niḡanəmtim, Kig Akripa, ne itəmat rafin. Iakolkeike məmə ik onakehm min-tu kən mitun natimnat min əh, kən nian kilau okuəplan natimnat rafin min əh, pəs ekitun nəteən naoa lan kit mahl-ipən kəm Sisa.

²⁷Ekitun məmə təsətuatipən məmə ekahl-ipən etəm tatol kalapus kit kəm Sisa, kən məsən-ipən ətuatipən kəm in məmə nat naka təmöl tərət.”

Wək Min 26

Pol təməghat e niḡanəmti Kig Akripa

¹Kən Kig Akripa tən-ipən kəm Pol məmə, “Ik nəkitun nənən nəwtain nəghatən əh itəm katən lam.” Kən Pol təmīləs-ipər nelmin mefətutu ilat lan, kən muhalpin rəhalat nəghatən mən məmə,

²“Kig Akripa. Nikik tagien pik aḡin roiu məmə ekətul e niḡanəmtim, kən mən-iarəp rafin nənən min itəm netəm Isrel koatətu-pa lak.

³Nikik tagien məto-inu ik nəkitun wir nolən min e kastom rəha netəm Isrel e natimnat min itəm ilat koatəghat pik ron. Kən awi, okol nakətəliḡ-in mətiḡ-tu rəhak nəghatən.

⁴“Netəm Isrel rafin kotitun natimnat rafin e rəhak nəmegəhən məmə tahro nulan e rəhak natigən, nian ematəkəku e nətuounən imak ikin e rəhak nəptən, mətoarus-pa uarisig emuwīn Jerusalem.

⁵Netəm əh kotitun io nuwəh rəkis, kən okəmə nikilat tagien, kotitun nənən məmə io Farisi kit nian ematəkəku rəkis mətoarus-pa u-roiu. Kən netəm əh Farisi min, ilat koatətəu-pən wir aḡin Lou rəha nəfakən rəha netəm Isrel, maprəkis-in netənim rafin.

⁶Kən roiu u, iatətul ikin-u məmә ik onakakil rəhak nəghatən min mətō-inu io iatələhəu-pən rəhak nətəligən e nənīəkisən itəm Uhgīn təmol aupən ilat tīpītimat min.

⁷Nənīəkisən u kitīəh əm itəm netəm tuelef noanol min rəhatimat itəm kəmoatəfak kəm Uhgīn lapīn ne e nərauiəgən məmә okotos. ?Kig Akripa, iatələhəu-pən nətəligən rəhak nəhlan, mətō tahro netəm Isrel min u koatən-īpən nəghatən min əh lak?

⁸?Tahro tiəkis pīk otəmat o nənən nīpahrienən məmә Uhgīn titun nolən etəm tēmimis təmegəh min?

⁹“Aupən, io min eməplan məmә tətuatīp məmә ekol natimnat tepət pəs mərəkin suah Iesu, etəm Nasaret.

¹⁰Nat əh inəh ematol əpəh Jerusalem. Pris asol min kəmotegəhan-in io kən ekəmki-pən netəmim tepət rəha Iesu e kalapus. Kən nian kəmakil ilat e kot, kən kohamnu ilat, kən io emegəhan məmә in nat təwir agīn kit.

¹¹Nian tepət iatuwin e nimə rəha nuəfiminən rəha netəm Isrel matol nalpīnən kəm ilat matol məmә ilat okotən rat Iesu. Nīkik təmətahmə pīk ematetəhau ilat, kən matitəp ilat nian rafin. Kən kotagim kan e taon isəu min ikin pīsīn pīsīn min, mətō ematitəp əh ilat.”

Pol təmən-iarəp rəhan nuwamən o Iesu

(Wək 9:1-19; 22:6-16)

¹²Kən Pol təməkəike matən məmә, “Nian kit ematuwin əpəh Tamaskes məmә ekol nat əh. Pris asol min koategəhan-in io, kən motən əskasik kəm io məmә ekəike mol.

¹³Kig Akripa, e nilugi nian, ematuwin e suatīp, kən məplan nəhag-əhagən kit tēmisi-pən e neai muwa masiəgəpīn io ne netəm koatuarisig-in io. Nagəhagən əh, tatuəp taprəkis-in mītgar.

¹⁴Kən emotiet e nəptən motəto nəwian kit tēmisi-pər e neai matəghat kəm io e nəghatən Isrel məmә, ‘!Sol! !Sol! ?Tahro nakatol tərət pīk kəm io nulan? Nolən əh in tatərəkīn atīp əm ik. Ik nakatoh rəhak nalpəkauən, kən

nakahmen e kau itəm kəmaru e nig kəməgət tasilə lan, məto in tatol wael, kən nig təməha mətaru, kən matol nahməən asol atip əm kəm in.’

¹⁵Kən ekətapəh ron məmə, ‘?Məto Iərəmərə, ik pah un?’ Kən Iərəmərə tən-ipa kəm io məmə, ‘Io Iesu itəm nakatol tərat lan.

¹⁶Məto ətul. Emītəpun rəkis ik məmə ik rəhak etəmim. Kən onakən-iarəp kəm netəmim rafin natimnat itəm nəməplan u-roiu, ne natimnat itəm epanol, ik nəkəplan.

¹⁷Oekiləs-irəkis ik e nelmi netəm Isrel ne nelmi Iaihlua min itəm io ekahl-ipən ik məmə onəkuwin mən-iarəp io kəm ilat.

¹⁸Onəkəike merəh e niganəmtilat məmə okotəuhlin ilat motiet e napinəpən motuwa e nəhag-əhagən. Kən motiet e nəsanənən rəha iərmis motuwa o Uhgīn. Kən Uhgīn otafəl rəhalat nolən rat min, məto-inu kəmotən nipahrienən e nəghatən itəm iatən. Kən ilat okotuwa iməlat ikin ilat netəm u Uhgīn tinəmitəpun rəkis ilat.”

Pol təmən rəhan wək

¹⁹Kən Pol təkəkəike matən məmə, “Kig, io iatol natimnat itəm Uhgīn təmən kəm io e nat kit tahmen e napilairən.

²⁰Io iatən-iarəp rəhan nəghatən emətuoun əpəh Tamaskes, kən uarisig u ekuwin matən-iarəp əpəh Jerusalem, ne ikin min e nitən Jutia, ne ima netəm ikin min rafin u Iaihlua min. Kən matən-iarəp kəm ilat məmə okotəkəike kəuhlin ilat e rəhalat nolən rat min motahatətə e Uhgīn, kən motol natimnat itəm tatəgətun məmə kəmotəuhlin pahrien ilat.

²¹Məto-inu o nat əh, kən netəm Isrel kotiləs io əpəh e Nimə Rəha Uhgīn motolkeike məmə okotohamnu io.

²²Məto Uhgīn tətəsitə lak nian rafin mol iatətul ikin-u-roiu matən kəm netəm u ləhau, ne netəm koatos nərəmərəən, nat naka itəm eməplan, kən matən əm natimnat itəm Moses ne ien min rəha Uhgīn kəmoatən məmə otəpanol mihin.

²³Kəmotən məmə Kristo əh itəm Uhgın təmən məmə otahl-ipa, in otəto nahməən e nıpətin kən panimis. Kən meto inu in otətuoun məmegəh min e nimisən, kən otəgətun nəhag-əhagən kəm netəm Isrel ne Iaihlua min, məmə nəhag-əhagən u in suatip itəm Uhgın otosmegəh ilat.”

Pol təmalkut məmə Kig Akripa otitun Iesu

²⁴Nian Pol təmatəghat əh, Festas təmagət əfəməh lan məmə, “!Pol ik ninətalməl! !Rəham nitunən tinəfəməh pik agin, kən roiu əh rəhm-kapə natitəlau!”

²⁵Məto Pol tən-ipən kəm in məmə, “Etəm-iasol rəhak Festas, io esalmələn. Nəghatən min u iatən, kotətuatip əm, kən ilat nıpahrienən.

²⁶Io ekitun nəghat ətuatipən kəm kig, kən okol esaulisən məto-inu ekitun məmə in titun rəkis natimnat min u. Ekitun məmə in təmos rafin nəghatən min əh, kən sənəmə in nat kit itəm kəmol anion-pən huə kit təkəku ikin.

²⁷?Kig Akripa, tahro? ?Nakotən nıpahrienən e nəghatən itəm ien min rəha Uhgın kəmotəte? Ekitun məmə ik nakatən nıpahrienən elat.”

²⁸Məto kig tən-ipən kəm Pol məmə, “?Nikim təht məmə e nian əkuəkır əm huə roiu, nəkitun niuw-pamən io məmə io ekuwa Kristin kit?”

²⁹Məto Pol təmə, “Nat ərnapın əm məmə in nian əkuəkır o in nian əfəməh, iatəfak-pən kəm Uhgın məmə sənəmə ik pisin əm, məto netəmim rafin itəm kəmotəto rəhak nəghatən roiu, Uhgın otosmegəh ilat, kən məmə otahmen lak, məto sen əm u itəm kəməlis io lan, esolkeikeən məmə okəlis itəmat lan.”

³⁰Kən Kig təmətul ilat kapman u Festas, ne Pernis, ne netəmim rafin itəm koatəpələh,

³¹kən motiet, moatən-ipən kəm ilat min məmə, “Suah əh təsolən nat kit tərət məmə in otimis ron o muwin e kalapus ron.”

³²Kən Kig Akripa tən-ipən kəm Festas məmə, “Nəkitun nahl-iarəpən suah əh, məto in əmun in tolkeike məmə Sisa otakil rəhan nəghatən.”

Wək Min 27

Mopael min kəmotit Pol motuwın Rom

¹Nian kəmotegəhan məmə oekotuwın Itali, kəmotələhəu-pən Pol ne netəm koatol kalapus neen min e nelmi etəm-iasol kit rəha mopael min, nərgin u Julias. In tatərəmərə e mopael wan-hanrit. In e mopael u katən məmə, “Mopael Rəha Sisa.”

²Kən nego kit təmiet əpəh Atramitiam matuwa, kən minatig məmə otitəlig-pən min əpəh Esia, kən ekotuwın lan. Kən etəm Masetonia kit təmətəu-pa itimat, nərgin u Aristakas, in etəm Tesalonaeka.

³Kən lawigin ekotiet-pa Saeton. Kən Julias təmatol təwir kəm Pol, kən megəhan in məmə otuwar muwın məplan rəhan neen netənim itəm titun ilat. Kən ilat kəmoatehm wir Pol.

⁴Kən ekotiet min ikin əh, kən nimətag tatiləs itimat, kən motitəlau e nikali nitən əh Saepas itəm nitəhəi təməlinu ikin.

⁵Kən emotaiu ihluə e Silisia ne Pamfilia, kən motiet-pa Lisia e taon Maera.

⁶Ikin əh, etəm tərəmərə mopael min təmuwın məplan nego kit itəm təmiet Aleksantria matuwın Itali. Kən təmki-pən itimat lan.

⁷Kən emotiet min, məto e nian tepət nego əh tətaiu mətig əm. Emotalkut məsin məmə ekotətoarus taon Nitas, kən emotuwa iuəhkir, məto tiəkis, məto-inu ioatiləs pikən nimətag, kən okol esotaiuən motuwın təhmın. Kən ekotaiu e nikalin pis ikin məmə ekotuwın Krit. Emotitəlau e poen asol əh nərgin u Salmone. Kən motitəlau e nəwtain nəptən əh,

⁸emotaiu ipar ipar əm, məto tiəkis əh. Kən ekotuwa motiet-pa e ikin kit katən məmə, Pasis Wir, iuəhkir o taon əh Lasea.

⁹Məto-inu emotərəkin əm nian wir tepət təmuwa muwın, kən nian wir o nuwinən e nego tinol namnun, kən otəsuwəhən əh-roiu, nian rəha niamitə, kən itəhəi tərət. Nian asol rəha netəm Isrel u katən məmə, Nian Rəha Nafələn Təfagə, tinuwa rəkis minuwın e məwig Oktopa. Kən Pol təməghat məmə okoatəto wir ilat, matən məmə,

¹⁰“Piak min. Iatəplan məmə okotatig e nəratən tepət e naliwəkən u rəhatat. Timətig əm məmə itəhəi otərəkin kako min u, ne nego u, kən okəmə naka kitat min okotimis.”

¹¹Məto etəm-iasol rəha mopael min tatətəlig-in pik etəm tatiləs nego ne etəm-iasol rəha nego. Kən məsətəlig-in pikən nəghatən rəha Pol.

¹²Kən pasis əh təsəwir pikən məmə nego otətul ikin e nian rəha nətəpən məto-inu nian əh, in nian nitəhəi tatəsəsau pik lan. Kən ilat tepət kotən məmə təwir məmə okotiet. Nikilat təməht məmə okotuwın əpəh e pasis əh Finiks motəhluaig ikin. Pasis əh in pasis kit əpəh Krit itəm təmol nohlin kəiu, kit tatuag-pən e nəwtain pəhap ikin, kən kit tatuag-pən nəwtain pis ikin. Kən nego titun nəməhlən ikin e nian rəha nəsəsauən.

Nimətag asol təmoh ilat

¹³Kən nimətag wir kit tinatısi-pis matelel nat, kən netəm e nego, nikilat təht məmə nimətag əh inəh kotalkeike məmə okotaiu lan. Kən motəmə pəs okotiet. Kən motiuw-pər iagke, motiuw niuwən, kən motiet. Emotaiu ipar ipar əm e nitən əh Krit.

¹⁴Məto təsuwəhən, nimətag asol kit tinatuwa min, nərgin u, Luətuəmlae, tatisi-pən e nəptən apon,

¹⁵minatiləs itimat, minatoh nego. Kən nego tinəruru naiuən miləs pikən nimətag, kən ekotapəs naiuən moatətəlig-in əm nimətag tatiləs itimat.

¹⁶Emotuwın-pa Koata ikin e nikalin pis ikin. Ikin əh emotəhluaig ikin məsin, kən motalkut məmə ekotiuw-pər pot rəha nego un. Kən netəm koatol wək e nego, nahgilat təmikə o niləs-ipərən pot.

¹⁷Kən motəmki-pən təulə neen e nəwtain nego ləhau ikin, kən kietain tiəkis məmə otaskəlim nego. Ilat kəmotəgin məto-inu ihluə e Lipia, sənəmə lokannim pik, kən nikilat təht məmə nego otiləs pikən niməkləkil ikin əh. Kən kəmotiuw-iəhau niuwən rəhalat, kən motapəs əm nimətag tiləs nego matuwın.

¹⁸Kəmən lawigin kən nimətag tatol əm nulan, kən kəmotəmki-arəp kako neen e nego.

¹⁹Kəmən lawigin min, kəmotəmki-arəp natimnat min katol wək lan e nego tahmen e təulə ne neen min.

²⁰Kən nian tepət eməsotəplanən mitgar ne məhau min lapin. Kən nimətag təmatol əm nulan nikitimat təht məmə okol esotəmegəh minən.

²¹Nian eməsotəgwənən o nian tepət məsin, kən Pol tətul aypən-in itimat mən məmə, “Nəman. Okol nəmotətəlig-in io, ko kəməsotietən Krit, kən okol kəsotətigən e nəratən u kən məsotərəkinən natimnat tepət.

²²Məto roiu ekən-ipinə kəm itəmat məmə əsotəginən. Okol kitat kit ikin-u təsimisən, məto nego əm otərat.

²³Nagelo kit rəha Uhgın rəhak itəm iatəfak kəm in təmən-ipa nəghatən u kəm io ehnaipən məmə,

²⁴‘Pol. Əsəginən. Onəkəike muwin mətul e niganəmti Sisa əpəh Rom. Məto-inu Uhgın təwir, kən nikin tagien məmə otosmegəh netəm u ilat min ik itəm noatasuəh e nego.’

²⁵Kən Piak min, əsotəginən. Io etahatətə e Uhgın məmə natimnat min rafin otol əm məmə inu ne nagelo təmən-ipa mihin kəm io.

²⁶Məto nimətag otıləs-ipar kitat əpəh e nəptən əkəku kit.”

Nitəhəi təmiləs-ipar nego

²⁷Tinos nian ilat rafin fotin, kən lapin lan nimətag tiləs nego muwin əpəh e nitəhəi asol Metiterenian. Kən e nalugi nian lapin, netəm koatol wək e nego, nikilat təht məmə enoatuwa iuəhkir o nəptən kit.

²⁸Kən kəmotətu-pən nat figəm kit əpəh e nıpəgnəmti təulə kəhlman-əhlman teiuaiu məmə okotehm-tu məmə lokamnim o lokipar. Kən kəmotəplan məmə tahmen e negopagən tate-sepin ilat rafin. Kən motaiu məsin min u kotəhlman-əhlman min, məto tinahmen e negopagən ilat rafin tuente-eit əm.

²⁹Kən netəm koatol wək e nego kəmotəgin məmə nego otiləs pikən kəpiel, kən motəmki-arəp iagke kuwit əpəh uarisig moatəfak məmə otian uəhai əm.

³⁰Kən netəm koatol wək e nego kəmotalkut məmə okotuwar kagim, kən motiləs-iəhau pot rəha nego moteiuə məmə okotuwın əpəh e nohlin nego kəmki-arəp min iagke neen.

³¹Məto Pol təmən-ipən kəm etəm tərəmərə e mopael min ne mopael min məmə, “Okəmə netəm əh kəsotəpələhən u ikin-u e nego, okol Uhgın təsosmegəhən itəmat.”

³²Kən mopael min kəmotətətip təulə, kən pot tiet-pən itəhəi.

³³Tinuwa iuəhkir əm o nianən, kən Pol təmuəh nīkilat məmə okotəkəike kagwən. Təmən məmə, “E nian ilat rafin fotin nəmoatəpələh əm moategəs məsotunən nat kit.

³⁴Kən roiu iatən-ipinə məmə onəkotəkəike kun nat kit məmə onəkotəsanən. Kitat rafin okotəmegəh. Suah kit otəsətigən e nəratən.”

³⁵Kən Pol təməmik pīret, kən mətul aupən-in elat məfak-pən ron kəm Uhgın, kən məmkas mun.

³⁶Kən nīkilat təməwīr mīnoatos nagwənən mīnoatun.

³⁷Itimat rafin tu-hanrit-sepīnte-sikis e nego.

³⁸Nian ilat rafin kəmotəgwən rəkis, kən motəmīk pak flaoa min kəmki-arəp e nego məmə nego otoigoig.

Nego təmīləs nīməkləkil

³⁹Kən nian təmian, netəm koatol wək e nego kəmotəplan məmə enotuwa iuəhkir o nəptən əkəku kit, məto kotəruru məmə nəptən naka. Kən motəplan pasis kit u nīməkləkil kit əh-ikin. Kən nīkilat təht məmə okotiləs-ipar nego əh-ikin.

⁴⁰Kən kəmotətətip təulə e iagke min kapəs ilat kotəmnim itəhəi. Kən motikis rəkis təulə min itəm kəməlis ətain nuweə asol min lan ikin katiləs nego ikin. Kən motiuw-pər niuwən əpəh aupən məmə nīmətag otiləs nego muwar.

⁴¹Mæto ikin əh lokipar mæsin, kən nohli nego tamaru niməkləkil, nego tæməruru nəloalən. Kən nitəhəi tinatəhap-əhap naunisin nego.

⁴²Kən mopael min kinoatən məmə okotohamnu netəm koatol kalapus u nego tatəmik ilat mæta neen kotagin.

⁴³Mæto Julias u tærəmərə elat tolkeike məmə otosmegəh Pol kən mən-iəhau məmə okəsotolən nat əh koatən. Kən mən-ipən kəm netəm u kotitun neaiən məmə okotətipən paupən əpəh itəhəi, moteai par.

⁴⁴Kən mən-ipən kəm ilat rafin əh-ikin məmə okotəmik nimismisi timpa ne nəwtain nego min itəm nitəhəi tətəhap-əhap moteai lan. Emotol nəhlan kən motuwar rafin, suah kit təsəmisən.

Wək Min 28

Pol əpəh e nəptən əh Malta

¹Nian emotuwar, kən itimat rafin ekotəsanən əm, kən panotəto uarisig məmə nəptən əh, nərgin u Malta.

²Netəm ikin əh kəmotəwir pik otimat. Kən e nian əh nuhuən təmatəfik, nətəpən tepət. Kən kotahl nigəm asol kit məmə otəhg itimat.

³Kən Pol təmea-pən o nig neen itəm kəmarginətain məmə otəmki-pən e nigəm. Əmun sineik kit itəm tus itəm katimis, təgin nahgi nigəm miet məkul-pən e nelmi Pol matus.

⁴Netəm ikin əh kəmotəplan sineik tatəkul-pən e nelmi Pol, kən moatən kəm ilat min məmə, “Okəm-naka suah u in iol təfagə kit iohamnu itəm. Təməsəmisən əpəh itəhəi, mæto uhgin u nərgin u Nalpinən otəsegəhan-inən məmə otəmegəh.”

⁵Mæto Pol təmorautin-pən sineik əpəh e nigəm məsolən ne məmə sineik təmus otəto nahməən.

⁶Netənim nikilat təht məmə nipəti Pol otasis o otəsuwəhən əh-roiu, tisi-pər morin mimis. Kəmoatəpələh kətəlkəlik ron roe, mæto təsələn nat kit ne. Kən nikilat təməuhlin kən məht məmə okəm-naka suah u in uhgin kit.

⁷Ikin əh sənəmə isəu o nəptən rəha suah kit, nərgin u Puplias, itəm tatərəmərə e netəm ikin əh. Təməmik itimat ekotuwın iman ikin, kən matol təwir kəm itimat. Kən ekotatig iman ikin kos nian kisił.

⁸Kən əmun tata rəha suah apon Puplias, tinatimis matətəp-ətəp, kən mətaiu e niıa. Kən Pol tuwın ron əpəh iman ikin imə, mələhəu-pən nelmin lan, məfak lan, əmun nimisən rəhan təwir min.

⁹Nian netəmim kəmotəto nat əh, kən ilat rafin e nitən un itəm koatimis kəmotuwa min o Pol. Kən Pol təfak elat kotəwir.

¹⁰Netəm ikin əh, kəmos-ıpa natimnat tepət kəm itimat. Nian enoatol əpen-əpenə məmə ekotiet, kəmotəmki-pən rafin rəhatimat natimnat ne nagwənən əpəh e nego itəm otətasıtu etimat e suatıp.

Pol təmuwın Rom

¹¹Emotatig ikin əh motos məwig kisił, kən emotuwın e nego kit təmiıi-pən Aleksantria matəhluaig e nəptən əh e nian rəha nətəpən. E nohli nego əh, kəməf aupən narmi uhgin mil əh mil-mil mil, nərgilau u Kasto ne Polakis.

¹²Emotuwa əh Saerakus, kən motətul ikin kos nian kisił.

¹³Kən motiet ikin əh motuwa e taon kit min, nərgin u Retiam. Kən lawigin, nimətag iası-pis tinatelel nat, kən ekotiet motaiu o nian kəıu, motiləs nat əpəh Puteoli.

¹⁴Ikin əh emotəplan piatat min neen əh-ıkin itəm koatəfak. Kən kotətapəh məmə ekotatig itimat min ilat o wik kitıəh. Kən uarisig emotaliwək əm motuwın əpəh Rom. Kən inu suatıp rəhatimat itəm emotaliwək lan motiet-pa Rom.

¹⁵Kən nian piatat min itəm koatəfak əpəh Rom kəmotəto məmə emotuwın, kən kəmotuwa məmə okotəplan itimat əpəh e suatıp. Kəmotuwa katəpələh əpəh Apıas təmol nimə makit ikin rəhan. Ikin əh, hotel kisił əh-ıkin. Kən nian Pol təməplan ilat, təmənwiwi Uhgin, kən nıkin təmagien mər ilis.

¹⁶Nian emotiet-pa, kən kapman təmegəhan-in məmə Pol otətətig pisin əm e nimə kit, pəs mopael kit tatehm.

Pol təmən-iarəp nəghatən rəha Uhgın əpəh Rom

¹⁷Tinos nian kisil, kən Pol tahl-ipən nəghatən kəm netəm-iasol min rəha Isrel məmə okotuwa o nəghatən kit. Nian kəmotuwa, kən təmən-iarəp kəm ilat məmə, “Piak min. Io eməsolən nat tərət kit e netəm imətət ikin, ne kastom rəhatat itəm tipitat min kəmotəgətun kitat lan aypən. Məto netəm Jerusalem kəmotaskəlim io kiləs-ipən io kəm netəm Rom.

¹⁸Kən netəm Rom kəmotətapəh-in nəghatən tepət ron io. Məto kəsotəplanən nəghatən kit ne məmə oekimis ron. Kən kətolkeike məmə okotahl-iarəp io.

¹⁹Məto netəm Isrel ikin əh kəsətolkeikeən. Kən io atip əm ekətapəh məmə ekuwa ikin-u Rom mətul e kot e niganəmti suah u Sisa, məto esənən nəghatən kit tərət e natimak min.

²⁰“Məto-inu tol nəhlan, kən ekolkeike məmə ekahl-ipən nəghatən otəmat məmə ekəplan itəmat məghat lan məsin kəm itəmat. Kəməlis io e sen u məto-inu o Iosmegəh əm u, itəm kitat netəm Isrel koatən məmə otəpanuwa.”

²¹Kən kəmotən-ipən kəm Pol məmə, “Esotosən naoa lan kit ne itəm təmisipən Jutia. Kən kitat min neen kəsotisi-pənən ikin əh motos nəghatən ka məmə katən nəghatən tərət neen lam.

²²Məto ekətolkeike məmə ekotəto-tu məmə rəham nətəligən təhrol nulan. Məto-inu ekotitun məmə kinatən rat nolən rəha nəfakən u rəhatəmat əpəh ikin min rafin.”

²³Kən ilat kəmos nian kit o nəghatən. Kən e nian əh, ilat tepət min netəm Isrel kəmotuwa əh Pol tətətig ikin. Kən in təməghat kəm ilat e nian apiəpiə əh, matən wir kəm ilat nərəmərəən Rəha Uhgın. Kən matən min Lou rəha Moses ne ien min rəha Uhgın, məmə otiuw ilat kotuwa o Iesu.

²⁴Neen kəmotəto rəhan nəghatən, motən niphahrienən lan. Məto neen kəsotənən niphahrienən lan.

²⁵Kən minoatərgəhəu minoatol məmə okotagim min. Məto uarisig kotiet, Pol tən-ipən nəghatən kit min kəm ilat məmə, “Nəghatən itəm Narmin Rəha Uhgın təmos-ipən kəm ien rəha Uhgın u Aesea məmə otən-iarəp kəm tipitat min aupən, in tətuatip əm. Uhgın təmən kəm ien məmə,

²⁶“Uwın mən-iarəp kəm netəm əh məmə io Uhgın iatən məmə, “Onəkotəto motəto motəto, məto okol nəsotitunən nian kit ne. Kən onəkotəplan motəplan motəplan, məto okol nəsotitunən nian kit ne.”

²⁷In tol min-nulan məto-inu nıkilat tınıəkis rəkis. Kəmotahtosig-in matəlgilat ne nıganəmtilat. Məto okəmə kəsotolən nəhlan, okəm-naka kotitun nəplanən e nıganəmtilat ne motəto e matəlgilat, o kotitun nıtunən e nıkilat, kən motəuhlin ilat motahatətə lak, kən məmə ekol ilat kotəwir min.”

²⁸Kən Pol təmə, “Onəkotəkəike kitun wir məmə Uhgın təmol suatip u rəhan o nosmegəhən netənim. Tınuwın rəkis o Iaihlua min. Kən netəm min əh okotətəlig-in nəghatən əh kən motən nıpahrienən lan.”

²⁹

³⁰Kən e nup kəiu apıəpiə, Pol təmatətou əm nımə əh mətatig lan. Kən nıkin tətəgien o netənim rafın itəm koatuwa moatehm.

³¹In təməkəike matən-iarəp nərəmərən Rəha Uhgın, kən matəgətun əskasik ilat e namnusən təwir rəha İərəmərə İesu Kristo. Kən suah kit tikə məmə otən-ıəhau o nən-iarəpən nəghatən əh.

Rom

Rom 1

Pol tēmən təwir kəm ilat

¹Io Pol, u io slef kit rəha Kristo Iesu. Uhgın tēmaun-in io mēmə io aposol, kən tēmītəpun mīləs-ipər io mēmə ekən-iarəp namnusən təwir rəhan.

²Namnusən təwir u, in tīnəmən-iəkis nuwəh rəkis e rəhan ien mīn itəm kəmotəte-pən e Naoa Rəha Uhgın.

³⁻⁴Namnusən təwir əh tatəghat-in Nətīn, Iesu Kristo rəhatat Iərəmərə. In tēmuwa etəmim kit e noanol rəha Kig Tefit. Kən Uhgın tēməgətun mēmə in Nətīn ətuatīp nian təmosmegəh in e nīmīsən e nəsanənən e wək rəha Narmin asim.

⁵E Kristo, Uhgın tēmōl təwir kəm io, mos-ipa kəm io wək wir mēmə io aposol kit. Təmos-ipa wək əh mēmə ekaun-in netəmim e niki Iaihlūəmīn e noanol mīn rafin mēmə okotən nīpahrienən lan, kən tol nəhlan, moatol nəwian. Kən nian koatol nəhlan, otiləs-ipər nərgi Iesu.

⁶Kən itəmat mīn, Uhgın tēmaun-in itəmat mēmə itəmat rəha Iesu Kristo.

⁷Kən roiu ekəte naoa kəm itəmat rafin əpəh Rom itəm Uhgın tolkeike itəmat, kən tēmaun-in itəmat mēmə rəhan. Pəs Uhgın Tata rəhatat, ne Iərəmərə Iesu Kristo okuawte-in rəhalau nəwīrən ne nəməlinuən kəm itəmat.

Pol tēmōlkeike mēmə otuwīn məplan netəm Rom

⁸Uarisig epanəghat, iakən tagkiu kəm rəhak Uhgın e Iesu Kristo otəmat rafin aɡīn-əh, mətō-inu netəmim rafin e nətueintən kəmotəto namnusən e nahatətən rəhatəmat.

⁹Kən Uhgın titun mēmə e nian rafin iatəfak, kən məsaluinən itəmat. Iatol pik wək rəhan e nīkik rafin o nən-iarəpən namnusən təwir e Nətīn.

¹⁰Kən iatəfak mēmə okəmə in nətəligən pahrien rəha Uhgın, in oterəh e suatīp kit mēmə ekimnə məplan itəmat.

¹¹Iakolkeike pik mēmә ekimnә mәplan itәmat mēmә ekawte-in kәm itәmat nәwirән kit rәha Narmin Rәha Uhgин mēmә otol itәmat nakotәtul әskasik tәhmin min.

¹²Nipәti nәghatән u mēmә, nahatәtән rәhatәmat titun nasituән lak, kән rәhak min titun nasituән etәmat.

¹³Piak min ne winik min, tәwir mēmә nәkotitun mēmә nian tepәt, rәhak nәtәligән tәht mēmә ekimnә muag itәmat. Mәto nian rafin natimnat neen koatahtosig-in io o nimnәән. Iakolkeike mēmә rәhak wәk otәe-in noan e nәmegәhән rәhatәmat, tahmen e nәmegәhән rәha Iaihlua min ikin pisin pisin min.

¹⁴Ekәkәike mән-iarәp namnusән tәwir kәm netәmim rafin itәm sәnәmә noanol rәha Isrel, netәm itәm kotitun nәghatән Kris ne nolән rәhalat, ne netәm itәm kotәruru, kән ilat itәm kәmotol-wir skul, ne ilat itәm kәsotol-wirән skul. Әwәh, ekәkәike mән-iarәp kәm ilat rafin.

¹⁵Kән o nat әh, iakolkeike pik mēmә ekән-iarәp namnusән tәwir kәm itәmat min әpәh Rom.

¹⁶Iatәghat min-nәhlan mәto-inu, io esaulis-inән namnusән tәwir. Esaulisән mәto-inu namnusән tәwir in nәsanәнән rәha Uhgин o nosmegәhән netәmim rafin itәm koatahatәtә lan, tәmaupән muwa o noanol min rәha Isrel, uarisig u, o Iaihlua min.

¹⁷Tol nәhlan, e namnusән tәwir, Uhgин tәmol әp suatip rәhan mēmә Uhgин tatos-ipән rәhan әm nәtuatipән kәm netәmim. E nahatәtән әm, Uhgин tatol mēmә netәmim kotuwa motәtuatip e niganәmtin. Kән inu tahmen e Naoa Rәha Uhgин itәm tatән mēmә, “Netәmim itәm kotәtuatip e niganәmti Uhgин e nahatәtән rәhalat, ilat okotos nәmegәhән lilin.”

Nemәha tatol Uhgин o tәfagә rat rafin

¹⁸Mәto Uhgин e nego e neai tatәgәtun rәhan nemәha ne nalpinән o netәmim rafin itәm koatәht nәwian moatol tәfagә rat. Ilat koatәtlosig-in nipahrienән rәha Uhgин e nolән rat min rәhalat,

¹⁹məto-inu ilat kotitun nəplan ətuatipən natimnat rafin itəm netəmim kotitun nitunən Uhgın lan. Tol nəhlan məto-inu Uhgın atip təməgətun ətuatip ilat lan.

²⁰Okol netəmim kəsotəplan ətuatipən Uhgın e niğanəmtilat. Məto təmətuoun e nian in təmol neai, ne nəptən, ne natimnat rafin, kən netəmim rafin kotitun nəplanən e niğanəmtilat, natimnat rafin itəm in təmol, kən tol nəhlan, kotitun nəplanən rəhan nəsanənən itəm tatuwın əm nulan namnun tikə, ne nıpahrienən məmə in Uhgın, kən motitun nitunən məmə Uhgın in təhrol nulan. O nat əh, etəmim kit tikə itəm titun nənən məmə in təruru məmə Uhgın təhrol nulan.

²¹Tol nəhlan məto-inu, nat əpnəpın ilat kəmotitun Uhgın məsın, məto kəmotapəs nisıaiiən məmə in Uhgın, kən məsotənən kəm in məmə nıkilat tagien o natimnat in təmol kəm ilat. Məto nıkilat təmatəht nalpəkəuən alməl mın məmə Uhgın təhro nulan, kən nətəligən rəhalat təmuwa mapınəp, mınotəruru suatip itəm Uhgın tolkeike məmə okotitun.

²²Nat əpnəpın ilat koatən məmə ilat kotenatig, məto ilat kəmotuwa ialmə mın,

²³kən kəmotapəs nəfakən kəm Uhgın itəm rəhan nəpətən təhag-əhag, kən otəsımısən tətətig lılın, kən mınotətuoun moatəfak kəm narmi nat mın itəm təhmen e netəmim u okotımıs nian kit, o təhmen e mənig mın, o nat megəh mın koataliwək o koatəkioah.

²⁴O nat u, Uhgın təmapəs ilat megəhan-in ilat məmə okotətəu-pən əm nolən rat mın itəm nıkilat tolkeike məmə okotol e nıpətılət. Tol nəhlan, ilat kəmotol nolən mın e nıpətılət itəm tol əm naulısən.

²⁵İlat kəmotapəs nıpahrienən rəha Uhgın motaskəlım neıueıuəən, kən moatəfak moatol wək kəm neai, ne nəptən, ne natimnat rafin itəm Uhgın təmol, məto kəmotapəs nəfakən kəm Uhgın. Məto pəs kitat kotənwiwi in nian rafin namnun tikə. Əwəh.

²⁶O nolən mın əh itəm netəmim kəmotol kəm Uhgın, təmapəs ilat, megəhan-in ilat məmə okotətəu-pən əm nolən rat mın itəm nıkilat tolkeike məmə

okotol e nipətilat itəm tol naulisən əm. Nat ərnaþin nipitan min, məto ilat kotapəs nətəu-pənən rəhalat nəman, moatit atip ilat min, kən nat u in nat pisin e itəm u Uhgın təmələhəu.

²⁷Kən e nolən ahmen-ahmen əm, nəman min, ilat kəmotapəs nitən rəhalat nipitan min, moatolkeike pik nəman pisin min. Ilat koatit atip ilat min itəm tol naulisən. Kən Uhgın təmos-ipən nalpinən kəm ilat o rəhalat nolən rat agin min.

²⁸Kən nat kit min. Məto-inu ilat kəsotolkeikeən məmə okotitun Uhgın, in təmapəs ilat megəhan-in ilat məmə rəhalat nətəligən təsitunən məmə nat kit in təwir o nat kit in tərət, kən megəhan-in məmə okotol nat itəm təsətuatipən məmə okotol.

²⁹Nikilat təmərioah e nolən rat pisin pisin min rafin, kən ilat naumis, kən ilat koategəs-in suatip o nərəkinən netəmin. Kən nikilat təmərioah e nolən rat min əh: ilat koatetet netəmin, ilat iohamnu itəm, ilat koatol natimnat itəm koatiuw-pa neməha, ilat neiueiuə, ilat koatol tərət kəm netəmin. Ilat koatən nikali netəmin,

³⁰moatən rat netəmin, ilat koatətəhau Uhgın, ilat nagət-irəkis, ilat nausit moatəghat ausit. Ilat koategəs-in suatip o nolən təfagə rat min itəm netəmin kotəruru əh. Ilat moatəht nəwia tata ne mama.

³¹Ilat nenikə, ilat nəghat tipik, nolkeikeən rəhalat tikə o netəmin, kən nat ərnaþin ilat atip min neen, okol təsətəlig-inən nasəkən o nasituən e netəmin.

³²Ilat kotitun pap nəghatən ətuatip rəha Uhgın itəm tatən məmə netəm min u koatol nolən min əh, kotəkəike motimis. Məto ilat koatəkəike e nolən min əh, kən ilat koatol nolən rat taprəkis-in nat əh, nikilat tagien o netəmin neen min itəm koatol nolən rat min əh, kən moatiləs-ipər rəhalat nətəligən məmə okotol.

Rom 2

Uhgın otakil muəh mələhəu nəghatən o təfagə rat

¹Tol nəhlan, nat ərnaɸin itəmat netəmin naka, okəmə nakotakil motuəh motələhəu nəghatən rəha suah kit o nolən rat kit rəhan, məto nakotakil motuəh motələhəu rəhatəmat atip nəghatən. Kən rəhatəmat nəghatən tikə o nuhalɸinən, məto-inu itəmat itəm nəkoatol nəhlan, nəkoatol nolən rat min ahmen-ahmen min əm elat.

²Kən kitat kotitun məmə nian Uhgın tətakil matuəh matələhəu nəghatən kəm netəmin itəm koatol nolən min əh itəm enəmən rəkis, rəhan nəghatən in tətuatip əm.

³Tol nəhlan, nian itəmat nakotakil motuəh motələhəu nəghatən rəha netəmin o nəratən rəhalat, məto itəmat nəkoatol nolən ahmen-ahmen əm, kən okol nəsoɸagimən nian Uhgın otakil muəh mələhəu nəghatən kəm itəmat.

⁴!Nikitəmat təsəht ɸikən nolən rəha Uhgın! In tatol təwır ɸik kəm itəmat, kən məsetəhau uəhaiən itəmat, kən rəhan nətəligən otəmat in təfəməh. Məto itəmat nəkoatol nat ərnaɸin əm e nolən wır min əh rəhan. Nəkotitun o kəp, məmə tatol nolən təwır min kəm itəmat məmə onəkotəuhlin itəmat e rəhatəmat nolən rat min.

⁵Məto rəhatəmat-kapə tiəkis, kən məsoɸəuhlinən itəmat e rəhatəmat nolən rat min. Kən o nat u, nakotargətain neməha ne nalɸinən rəha Uhgın otəmat. Kən onəkotos neməha ne nalɸinən rəhan e nian Uhgın otol əp rəhan nələhəuən nəghatən itəm tətuatip.

⁶Kən Uhgın otos-ipən kəm netəmin kitiəh kitiəh tətəu-pən əm natimnat itəm kəmotol.

⁷Uhgın otos-ipən nəmegəhən lilin kəm netəmin itəm koatətul əskasik nian rafin o nolən nat itəm tətuatip. Netəm min əh koatalkut ɸik o nolən nat wır məmə Uhgın otos-ipən kəm ilat nənwıwıən, ne nisıaiiən, ne nəmegəhən itəm namnun tikə.

⁸Məto in otos-ipən rəhan neməha ne nalɸinən kəm netəmin neen itəm koatalkut atip əm o nərpilat, kən moatəuhlin məntaalat o nipahrienən, kən moatətəu-pən nolən rat min.

- ⁹Netəmim rafin itəm koatol nolən rat, ilat okotos nəratən ne nian iəkis min. Otaupən pitən o noanol min rəha Isrel, uarisig u o Iaihlua min.
- ¹⁰Məto o netəmim rafin itəm koatol nolən wir, Uhgın otos-ipən nənwiwiən, ne nisaiiən, ne nəməlinuən. Otaupən pitən o noanol min rəha Isrel, uarisig u, o Iaihlua min.
- ¹¹Tol nəhlan məto-inu Uhgın tatol tahmen-ahmen əm kəm netəmim rafin. Nat əpnapın ilat noanol rəha Isrel o Iaihlua min, ilat rafin okotos nat itəm tətuatip olat, inu nalpınən o nəwirən.
- ¹²Uhgın otol nalpınən kəm Iaihlua min o nolən rat min rəhalat, nat əpnapın kəməsotosən Lou itəm Uhgın təmos-ipən kəm Moses. Kən noanol rəha Isrel, netəmim itəm kəmos Lou, Uhgın otakil rəhalat nolən min e nəghatən rəha Lou, kən in otuəh mələhəu nəghatən rəhalat lan.
- ¹³Tol nəhlan məto-inu sənəmə netəmim itəm koatəto Lou itəm kotətuatip e niganəmti Uhgın, məto netəmim itəm koatol nat itəm Lou tatən, ilat əh, Uhgın otən məmə ilat kotətuatip e niganəmtin.
- ¹⁴Nipahrienən, Iaihlua min kəməsotosən Lou rəha Moses. Məto nian min neen, koatətəu-pən əm rəhalat nətəligən motol nat itəm tətuatip, tahmen-ahmen əm e itəm əh Lou tatən. Inu tatəgətun məmə lou kit əh-ikin e nikilat, kən ilat kotitun nat itəm in tətuatip, ne nat itəm təsətuatipən, nat əpnapın kəsotosən Lou rəha Moses.
- ¹⁵Ilat kotitun məmə nipəti Lou əh-ikin rəha Uhgın e nikilat məto-inu nian ilat koatol təwir, nikilat tatəht məmə, “nolən u təwir,” kən nian koatol nolən rat, nikilat tatəht məmə, “nolən u tərət.”
- ¹⁶Əwəh, nian kit otəpanuwa pahrien itəm Uhgın otən məmə Iesu Kristo otakil muəh mələhəu nəghatən rəha netəmim rafin o nolən min itəm netəmim kotitun nəplanən, ne nolən min ne nətəligən anion min. Inu rəhak nəghatən rəha namnusən təwir.

Netəm Isrel ne Lou rəha Moses

¹⁷Məto pəs ekəghat kəm itəmat netəm Isrel. Nakoatən məmə itəmat noanol rəha Isrel, kən moatəgile e Lou məmə in suatip rəha Uhgin o nosmegəhən itəmat lan, kən moatəghat ausit məmə itəmat əm nəkotitun Uhgin, kən in titun min əm itəmat.

¹⁸Kən nakoatən məmə nəkotitun rəkis nat naka itəm Uhgin tolkeike, kən itəmat nəkotitun suatip itəm tətuatip wir məto-inu Lou təməgətun itəmat lan.

¹⁹Itəmat nakotən pik məmə nakoatit iganəmtin əpis min, kən itəmat nakotasiəgəpən suatip rəha netəm koataliwək tapinəp ikin,

²⁰kən moatəgətun ialməl min ne nisualkələh. Nakoatən nəhlan məto-inu itəmat nakoatos Lou itəm nitunən ne nipahrienən rafin koatatig lan.

²¹Təwir əm nakoatəgətun netəm pisin pisin min. ?Məto tahro nəsoatəgətun atipən itəmat? Itəmat nakoatəgətun məmə netənim okəsotakləhən. ?Məto tahro nakotakləh?

²²Itəmat nakoatəgətun məmə okəsakləh-inən pətan. ?Məto tahro itəmat nakotakləh-in pətan? Nakoatətəhau narmi nat min kəməte e nig. ?Məto tahro nakoatakləh-in natimnat e niməfak rəha narmi nat min?

²³Nakotəghat ausit o Lou. ?Məto tahro nakotətəghl Lou motərəkin nərgi Uhgin?

²⁴Inu tahmen e Naoa Rəha Uhgin itəm tatən məmə, “!Netəm Isrel! Iaihlua min koatən rat nərgi Uhgin o nolən tərət rəhatəmat.”

²⁵Nolən rəha nəhg-ipənən in nat təwir okəmə nəkoatətəu-pən Lou. Məto okəmə nakotətəghl Lou, kən tahmen əm məmə kəsəhg-ipənən itəmat.

²⁶Okəmə Iaihlua kit u kəsəhg-ipənən, məto tatətəu-pən Lou, Uhgin otəplan suah əh məmə kinəhg-ipən rəkis.

²⁷Kən netənim itəm kəsəhg-ipənən ilat e nipətilat, məto koatətəu-pən Lou, ilat okotakil motuəh motələhəu nəghatən rəhatəmat məto-inu, nat əpnapin nəmotos pap Lou itəm kəməte, kən kəməhg-ipən itəmat, məto nakoatətəghl Lou.

²⁸Okəmə suah kit təmöl nolən rəha netəm Isrel e nipətin, təsölən məmə in təmuwa etəm Isrel pahrien. Kən nolən pahrien rəha nəhg-ipənən sənəmə nat kit rəha nipətin.

²⁹Məto suah kit itəm in etəm Isrel pahrien, in etəm Isrel e nikin. Kən nolən pahrien rəha nəhg-ipənən, in nat kit rəha niki etəmim itəm Narmin əm Rəha Uhgın tatol, məto Lou təsölən. Kən sənəmə netəmim itəm koatıləs-ipər nərği suah əh, məto Uhgın əm tatıləs-ipər nərğin.

Rom 3

Nian rafin Uhgın tatol rəhan nəghatən

¹Kəm-naka suah kit otən məmə, “?Okəmə nipəti nəhg-ipənən suah kit, in sənəmə nat kit rəha nipətin, kən tahro nakoatən məmə nəhg-ipənən in nat wir kit? ?Kən o nat naka in nat wir kit məmə suah kit in etəm Isrel?”

²Kən io ekən məmə okəmə suah kit in etəm Isrel, in nat wir agın e nolən min rafin! Nat tətaupən, Uhgın təmələhəu-pən e nelmilat, nəghatən ətuatıp rəhan.

³In nipahrienən məmə ilat neen kəsotolən nəghatən itəm ilat kəmotən məmə okotol. Məto nolən rəhalat təsölən məmə Uhgın otəsölən rəhan nəghatən.

⁴Kəp! Nat əpnapın netəmim rafin e nətueintən koateiuə, məto Uhgın təseiuəən. Tahmen əm e Naoa Rəha Uhgın tatəghat-in Uhgın matən min-nulan məmə, “Nian nakəghat, nəghatən rəham otəgətun məmə ik nakətuatıp. Nian netəmim okotakil rəham nolən min, motən məmə nəmol nolən tərat min, məto onatol win elat.”

⁵Məto kəm-naka suah kit otən e nətəligən rəha etəmim əm məmə, “Kitat koatol nolən itəm təsətuatıpən. Məto nolən rat rəhatat tatəgətun məmə Uhgın tatol tətuatıp nian rafin. ?Kən okəmə nolən rat rəhatat tatıləs-ipər nərği Uhgın, məto in otol nalpınən kəm kitat o naka? Rəhan nolən təsətuatıpən.”

⁶Ei, kəp, nətəligən əh in neiueiuəən! ?Okəmə nətəligən əh in nipahrienən, kən Uhgın otahro min-nulan makil muəh mələhəu nəghatən rəha netəmim e nətueintən?

⁷Kən kəm-naka suah kit otən məmə, “?Okəmə ekeiuə, kən rəhak neiuəən otəgətun məmə Uhgīn tatən əm nīpahrienən, kən netəmim koatənwiwi in ron, kən tahro nulan Uhgīn otakil muəh mələhəu nəghatən rəhak məmə emol təfagə rat?”

⁸Məto io ekatən məmə, okəmə kotətəu-pən nətəligən alməl min nəhlan, netəmim kotitun nənən məmə, “Pəs kotol nolən rat min məmə rəhatat nolən rat min okotəe-in nəwīrən.” Məto nəghatən u tərət. Nīpahrienən, netəmim neen koatən rat nərgək moateiuə məmə io iatəghat matətəu-pən nətəligən alməl min nəhlan. Uhgīn otakil muəh mələhəu nəghatən rəhalat, kən nəghatən əh in tətuatip əm.

Suah kit tikə itəm tətuatip wir agin

⁹?Kən tahro? ?Kitat okotən naka əh-roiu? ?Nikitəmat təht məmə Uhgīn otol təwir kəm netəm Isrel maprəkis-in Iaihlua min? !Kəp! Emən rəkis məmə nəsanənən rəha təfagə rat tatərəmərə e netəmim rafin, netəm Isrel ne Iaihlua min.

¹⁰Inu tahmen e Naoa Rəha Uhgīn itəm tatən məmə, “Suah kit tikə itəm tətuatip, kitiəh agin huə ne tikə;

¹¹Suah kit tikə itəm titun, suah kit tikə itəm tategəs-in Uhgīn.

¹²Netəmim rafin agin kəmotəuhlin məntaalat o Uhgīn, ilat kəmotuwa nəlpah min o nolən nəwia Uhgīn, suah kit tikə itəm in tatol nəwīrən, kitiəh agin huə ne tikə.”

¹³“Nəghatən rəhalat tahmen e nəpienən rəha suwit itəm təmoag, Namilat tərīoah e neiuəiuəən.” “Poesen rəha sinek tətisi-pən e nohlilat.”

¹⁴“Nohlilat tərīoah e nau-iərmis-inən ne nəghatən tarip.”

¹⁵“Kotaiu uəhai əm o nohamnuən itəm;

¹⁶ikin min rafin itəm koatuwin ikin, koatərəkin natimnat, kən moatol netəmim koatəto tərət,

¹⁷kən ilat kotəruru agin suatip rəha nəməlinuən.”

¹⁸“Ilat kəsotəginən Uhgīn, kən nisaiiən rəhan tikə agin e nətəligən rəhalat.”

¹⁹Kitat kotitun məmə natimnat rafin itəm Lou tatən, in rəha netəm itəm Uhgīn təmos-ipən Lou kəm ilat. Tol nəhlan məmə suah kit tikə titun nuhalpinən nəghatən itəm Uhgīn otən. Kən netəmim rafin e nətueintən otəkəike motətul aupən e niganəmti Uhgīn məmə in otakil muəh mələhəu nəghatən rəhalat.

²⁰Tol nəhlan, etəmim tikə agin itəm Uhgīn otən-iarəp məmə in tətuatip e niganəmtin məto-inu in təmətəu-pən Lou. Kəp, məto e Lou, kitat rafin kotitun məmə kitat nol təfagə rat.

Nətuatipən e niganəmti Uhgīn tatuwa e nahatətəən əm

²¹Məto roiu, Uhgīn tinol-arəp rəkis rəhan suatip məmə netəmim okotuwa kətuatip e niganəmtin. Suatip əh sənəmə inu okotətəu-pən Lou. Məto nəghatən min e Lou, ne nəghatən rəha ien min aupən, koatəghat-in suatip pişin əh.

²²Uhgīn tatol suah kit tatətuatip e niganəmtin nian tətahatətə e Iesu Kristo. Kən Uhgīn otol kəm netəmim rafin itəm koatahatətə lan. Netəmim rafin kotahmen-ahmen əm,

²³məto-inu netəmim rafin kəmotol təfagə rat kən motəmkakiəh e suatip rəha nətuatipən rəha Uhgīn itəm təwir məhag-əhag,

²⁴kən e nəwirən rəhan, Uhgīn tatən əm məmə ilat rafin itəm koatahatətə lan, ilat kotətuatip əm e niganəmtin, motuwa netəmim rəhan, tahmen e nalpəkəuən rəhan. Ilat kəsotətəuən nat kit məmə okotuwa nəhlan, məto Kristo Iesu təmətəu suatip rəhalat, mikis ilat o təfagə rat min rəhalat e nimisən rəhan.

²⁵Uhgīn təmahl-ipa Kristo məmə in sakrifais itəm təmos nalpinən ne neməha rəhan o təfagə rat min, nian nitan təmaiu. Kən Uhgīn tətəfəl təfagə rat min rəha netəmim nian netəmim kotahatətə məmə Kristo təmimis olat. Uhgīn təmol suatip əh məmə otəgətun məmə rəhan nolən in tətuatip agin-əh, məto-

inu e nətəligən rəhan itəm kaifəməh, in təsolən nalpinən o təfagə rat min itəm netəmim kəmotol aupən.

²⁶Təmol nəhlan məmə otəgətun roiu məmə nolən rəhan in tətuatip. In təməsaluin əmən təfagə rat min, məto təmahl-ipa Iesu məmə in otos nalpinən o təfagə rat min. Kən Uhgın atip əm tatən məmə netəmim itəm kotahatətə e Iesu, ilat okotətuatip e niganəmtin.

²⁷?Tol nəhlan, etəmim kit titun nəghat ausitən o nat kit itəm təmol, məmə in tətuatip e niganəmti Uhgın, o kəp? Kəp, nat tikə. ?Kən etəmim təruru nəghat ausitən o naka? Məto-inu etəmim kit tikə itəm titun nətəu-pənən Lou məmə tatuwa mətuatip e niganəmti Uhgın. Uhgın tatol etəmim tətuatip e niganəmtin e nahatətəən əm rəhan.

²⁸Tol nəhlan məto-inu kitat kotaskəlim əskasik nətəligən məmə etəmim tatətuatip e niganəmti Uhgın e rəhan nahatətəən, məto sənəmə e nətəu-pənən Lou.

²⁹Uhgın, in sənəmə Uhgın rəha netəm Isrel əm. In Uhgın min rəha Iaihlua min,

³⁰məto-inu Uhgın kitiəh əm, itəm in otol netəmim kotətuatip e niganəmtin e suatip kitiəh əm, nahatətəən rəhalat. Tahmen-ahmen əm o netəm Isrel ne Iaihlua min.

³¹?Tahro əh-roiu e Lou əh? ?Nahatətəən əh tatol Lou əh in nat əpnapin? !Kəp! Məto nian koatahatətə əm e Uhgın, kən e nolən əh, koatətəu-pən ətuatip suatip pahrien rəha Lou.

Rom 4

Uhgın təmol Epraham tətuatip e niganəmtin e nahatətəən

¹Epraham in nəukəti noanol min rəha Isrel aupən. Otətəlig-in-tu nat naka itəm Epraham təmehm məmə in suatip rəha nətuatipən e niganəmti Uhgın.

²Uhgın təmol Epraham tətuatip e niganəmtin, məto sənəmə e nolən wir min rəha Epraham. Okəmə nolən wir min rəhan in suatip rəha nətuatipən, kən

Epraham titun nəghat ausitən ron. Məto e niganəmti Uhgin, okol Epraham təsausitən o nat kit,

³məto-inu Naoa Rəha Uhgin tatən məmə, “Epraham təmatahatətə e Uhgin, kən Uhgin təməən məmə Epraham in tətuatip e niganəmtin o nahatətəən rəhan.”

⁴Nian suah kit tatol wək o nətouən, rəhan iərəməərə təsənən məmə rəhan nətouən in presen kit kəm in, məto iərəməərə təkəike mos-ipən nətouən o rəhan wək.

⁵Məto kitat kəsotolən wək məmə okotuwa katətuatip e niganəmti Uhgin. Kitat kotahatətə əm e Uhgin, kən in tatol məmə kitat kotuwa katətuatip e rəhatat nahatətəən. Uhgin pisin əm itəm tatol netəm u kotərat koatuwa katətuatip e niganəmtin.

⁶Tefit in təmatəghat-in nat u nian in təməən-iarəp məmə nəwİRƏn pahrien otuwİN o etəm itəm Uhgin tatən məmə in tətuatip e niganəmtin, məto sənəmə e nolən wir itəm suah u təmol. In təməən məmə,

⁷“NəwİRƏn pahrien tatuwin o netəm u Uhgin təmafəl rəhalat nolən rat, kən in təmaluin rəhalat təfagə rat.

⁸NəwİRƏn pahrien tatuwin o etəm u itəm İərəməərə təsaskəlİməən e nİkin rəhan təfagə rat.”

⁹?Nİkitəmat təht məmə nəwİRƏn pahrien əh in rəha netəm əm u kəməhg-ipən ilat, netəm Isrel, o nəwİRƏn pahrien əh, in mİN rəha netəm kəsəhg-ipənən ilat, İaihlua mİN? Əwəh, rəha İaihlua mİN. Ematən məmə, Uhgin təməən məmə Epraham in tətuatip e niganəmtin məto-inu o rəhan nahatətəən.

¹⁰?Kən nəgəhan Uhgin təməən kəm Epraham məmə in tətuatip, nian kİNəhg-ipən rəkis, o nian kəsəhg-ipənən əh? Uhgin təmaupən mən nəhlan, uarisig kəpanəhg-ipən.

¹¹Kən kəməhg-ipən in tahmen e nəmtətİN itəm təməgətun pahrien məmə in tətuatip e niganəmti Uhgin e rəhan nahatətəən, nian kəsəhg-ipənən əh. Kən tol nəhlan, in tata rəha netəmim rafİN itəm kəsəhg-ipənən ilat, məto

kotahatətə e Uhgín. Kən in tatən məmə ilat koatətúatíp e nìganəmtín o nahatətəən rəhalat.

¹²Kən in tata rəha netəmim neen mín, ilat itəm kəməhg-ípən ilat. Məto in sənəmə rəhalat tata məto-inu kəməhg-ípən ilat, məto in rəhalat tata məto-inu ilat mín koatətəu-pən suatíp rəha nahatətəən itəm rəhatat tata Epraham təmətəu-pən aupən u kəpanəhg-ípən.

¹³Uhgín təmol nəniəkisən kəm Epraham ne rəhan noanol mín məmə nətueintən otuwa rəhan o nian kit. Məto Lou sənəmə suatíp itəm nəniəkisən u otuwa mol nìpahrienən lan. In otuwa mol nìpahrienən e nətúatípən itəm təmisi-pən e suatíp rəha nahatətəən.

¹⁴Tol nəhlan məto-inu okəmə nəniəkisən tatuwa mol nìpahrienən o netəmim itəm koatagile əm e Lou, kən nìkilat təht məmə ilat kotətúatíp lan, kən suatíp rəha nahatətəən in nat əpnəpín əm, kən nəniəkisən nìpətín tikə.

¹⁵Məto nəghatən u, in nìpahrienən: Lou tatən məmə nalpínən ne neməha rəha Uhgín tatuwin o netəmim itəm koatətgəhl Lou, kən ikín mín rafin Lou əh-ikín, netəmim koatətgəhl. Tol nəhlan, nolən rəha nətəu-pənən Lou tatiuw-pa nalpínən ne neməha rəha Uhgín, kən təsələn məmə nəniəkisən otuwa mol nìpahrienən.

¹⁶Tol nəhlan, nəniəkisən tatuwa mol nìpahrienən e nəmegəhən rəhatat e suatíp rəha nahatətəən məmə nəniəkisən otuwa e nəwírən itəm Uhgín tətawte-in kəm kitat, kən kitat kotítun nítunən pahrien məmə rəhan nəniəkisən in rəha noanol mín rafin rəha Epraham, sənəmə rəha netəm mín əm u itəm Uhgín təmos-ípən Lou kəm ilat, məto rəha netəm mín u, ilat mín itəm koatətəu-pən suatíp rəha nahatətəən rəha Epraham. In rəhatat rafin tata.

¹⁷Tahmen e Naoa Rəha Uhgín itəm tatən məmə, “Emol ik nakuwa tipí noanol tepət.” E nìganəmtí Uhgín, Epraham in rəhatat tata. In təmahatətə e Uhgín u tatos-ípən nəmegəhən kəm netəm kəmotímis, kən in titun nolən natimnat e nat agín tikə.

¹⁸Nian Uhgin tēmən-iəkis kəm Epraham mēmə in otuwa tata rəha noanol tepət, Epraham tēmahatətə e Uhgin mitun e nikin mēmə nəghatən rəha Uhgin in nīpahrienən, nat əpnapin in tiəkis agin mēmə nəniəkisən otuwa mol nīpahrienən. Uhgin tēmən mēmə, namipin min okotepət motaprəkis.

¹⁹Nahatətəən rəhan təseiuiuən, nat əpnapin in titun mēmə nīpətīn tinaguīhl minahmen əm o nīmīsən mətō-inu rəhan nup iuəhkir o wan-hanrit, kən titun mēmə Sera tinaprəkis-in ikin katemək ikin kən okol təseməkən.

²⁰Epraham tēməsəf-əfən rəhan nahatətəən e nəniəkisən rəha Uhgin. Nīpahrienən, rəhan nahatətəən tēməwiə muwa məskasik təhmin min, kən matos-īpən nənwiwiən kəm Uhgin.

²¹In tēmītun wir e nikin mēmə Uhgin tatos nəsanənən o nolən rəhan nəniəkisən tuwa mol nīpahrienən.

²²O nat əh inəh, “Uhgin tēmən mēmə Epraham in tətuatip e niganəmtin o nahatətəən rəhan.”

²³Nəghatən u itəm tatən mēmə, “Uhgin tēmən mēmə Epraham in tətuatip e niganəmtin,” kəməsəteən mēmə rəha Epraham pisin əm,

²⁴mətō kəməte min mēmə rəhatat, itəm Uhgin otən mēmə kitat okotətuatip e niganəmtin, kitat itəm kotahatətə lan, itəm təmosmegəh Iesu Iərəməərə rəhatat e nīmīsən.

²⁵Kəmegəhan-in-pa Iesu tuwa mīmīs o təfagə rat min rəhatat, kən Uhgin tēmōl in təmegəh min e nīmīsən mēmə in otol suatip mēmə kitat okotətuatip e niganəmtin.

Rom 5

Nəməlinuən ne nagienən

¹Tol nəhlan, koatatig e nəməlinuən kitat Uhgin mətō-inu, e nahatətəən rəhatat ron, in tēmən mēmə kitat kotətuatip e niganəmtin. Kən natimnat min əh kəmotuwa e Iərəməərə rəhatat Iesu Kristo.

²E nahatətəən rəhatat, natimnat itəm Kristo təmol, təməmik kitat kotuwa e niganəmti Uhgın məmə okotos nəwırən itəm Uhgın tətawte-in kəm kitat. Kən nəwırən əh, kotatig lan əh-roiu. Kən kitat kotagien məto-inu kitat kotitun wır agın məmə okotos nepətən əhag-əhag rəha Uhgın.

³Kən nat kit min, kitat kotagien nian kotatig e nian əskasik min məto-inu, kitat kotitun məmə nian əskasik min kotasitu etat məmə okotətul əskasik e nəratən.

⁴Kən nian koatətul əskasik, Uhgın, nikin tagien otat. Kən nian kotitun məmə Uhgın nikin tagien otat, kən kitat kotələhəu-pən rəhatat nətəligən təskasik e Uhgın.

⁵Kən natimnat itəm koatələhəu-pən rəhatat nətəligən təskasik e Uhgın ron, kotitun məmə okotuwa kol nıpahrienən məto-inu, in təmos-ıpa Narmin Rəhan kəm kitat, kən Narmin tatos-ıpa nolkeikeən rəha Uhgın tərıoah e nıkitat.

⁶Kən nian rəhatat nəsanənən təmatikə əh o nosmegəh atıpən kitat, e nian ətuatıp itəm Uhgın təmən, Kristo təmimıs o nosmegəhən kitat netəm rat u kəsotisiai-inən in Uhgın.

⁷E rəhak nətəligən, in nat tiəkis agın məmə suah kit otegəhan-in məmə in otımıs o suah kit min itəm rəhan nolən tətuatıp. Məto kəm-naka suah kit otımıs o suah kit min itəm rəhan nolən təwır agın o netəmim.

⁸Məto Uhgın təmэгətun rəhan nolkeikeən kəm kitat e nolən u məmə, nian kitat netəm kəmoatol əh təfagə rat, kən Kristo təmimıs otat.

⁹Tol nəhlan, Uhgın təmol kitat kotətuatıp e nıganəmtın e nıta Kristo itəm təmaıu nian təmimıs otat. Kən məto-inu nat u in nıpahrienən, kitat kotitun wır məmə Kristo otosmegəh kitat o neməha ne nalpınən rəha Uhgın e namnun nian.

¹⁰Nian kəmotol tikimır kitat Uhgın, məto in təmol kitat kotuwa iolın min e nımısən rəha Nətın. Kən məto-inu təmol kitat kotuwa iolın min, nat kit itəm taprəkis-in inu məmə kitat kotitun wır məmə Uhgın otosmegəh kitat e nalpınən ne neməha rəhan, məto-inu Kristo tatəmegəh.

¹¹Kən nat kit min, nikitat tagien mēmə kəmotuwa kitiəh kitat Uhgīn e Iērəmərə rəhatat Iesu Kristo, itəm Uhgīn tēmiuw-pa kitat lan kotuwa iolin min.

Atam tēmiuw-pa nimisən, kən Kristo tēmīlēs nēmegəhən

¹²Aupən agin, suah u Atam, tēmol tēfagə rat, kən tol nəhlan, tēfagə rat misi-pən lan muwa e nətueintən e etəm kitiəh əm əh. Kən tēfagə rat tēmīlēs nimisən muwa ikin. Kən tol nəhlan, netəmim rafin okotəkəike motimis mətō-inu ilat rafin koatol tēfagə rat.

¹³Nipahrien, netəmim kəmotol tēfagə rat uarisig Uhgīn tēpanos-ipa Lou. Məto nian Lou tikə, okol kəsotətgəhlən Lou, mol mēmə Uhgīn tēsəte rəkisən tēfagə rat min rəhalat.

¹⁴Məto nat əpnapin Uhgīn tēməsəte rəkisən tēfagə rat min rəhalat, netəmim itəm koatatig e nian rəha Atam mətōarus-pa Moses, ilat rafin kəmotimis. Əwəh, nat əpanapin netəm min əh kəməsotolən tēfagə rat tahmen e tēfagə rat rəha Atam, məto ilat rafin kəmotimis. E nolən min neen, Atam in tahmen e Kristo itəm tēmuarisig in, mətō-inu nat naka itəm Atam tēmol, tatuwin o netəmim rafin, tahmen-pən əm mēmə nat naka Kristo tēmol tatuwin o netəmim rafin.

¹⁵Məto nat naka itəm Uhgīn tēmos-ipa tol pisin agin e tēfagə rat rəha Atam. Tēfagə rat rəha suah kitiəh əm u, Atam, tēmiuw-pa nimisən o netəmim tepət, kən inu in nat asol. Məto nat asol taprəkis, in nəwīrən asol rəha Uhgīn itəm in tēmawte-in o netəmim tepət o nafələn tēfagə rat rəhalat, kən nat əh tēmuwa e nəwīrən rəha suah kitiəh əm u, Iesu Kristo.

¹⁶Ekən min mēmə, nəwīrən asol rəha Uhgīn itəm in tēmawte-in kəm netəmim, in tol pisin agin e noa tēfagə rat rəha suah kitiəh əm əh. Suah u tēmol tēfagə rat kitiəh əm, kən Uhgīn tēmakil muəh mələhəu nəghatən lan mēmə otos nalpinən. Kən uarisig, nian netəmim tepət kəmotol tēfagə rat tepət, məto Uhgīn tēmos-ipa nat təwir kəm kitat, kən tēmol mēmə kitat kotətuatip e niganəmtin.

¹⁷Nipahrienən məmə təfagə rat rəha suah kitiəh əm, Atam, təmol nimisən tatərəmərə e netəmim rafin, kən inu nat asol. Məto nat asol kit min itəm taprəkis məmə, nat itəm suah kitiəh əm, Iesu Kristo, təmol. Netəmim rafin itəm koatos nəwirən rəha Uhgın itəm in təmawte-in ərnapın əm kəm ilat, kən motahatətə məmə Uhgın tatol ilat kotətuatip e niganəmtin, ilat okotos nəmegəhən lili. Kən ilat Kristo, okotərəmərə.

¹⁸Əwəh, Atam təmol təfagə rat kit mol məmə, Uhgın təmakil muəh mələhəu nəghatən rəha netəmim rafin məmə okotəkəike motos nalpınən. Kən e nolən ahmen-ahmen əm, Kristo təmol nat ətuatip kit, mol suatip məmə netəmim kotitun motuwa motətuatip e niganəmti Uhgın. Kən nətuatipən əh, tatol məmə netəmim rafin kotitun nosən nəmegəhən lili.

¹⁹Netəmim tepət kəmotuwa nol təfagə məto-inu suah əh Atam təməht nəwia Uhgın. Məto netəmim tepət okotuwa motətuatip e niganəmti Uhgın məto-inu suah kit min, Kristo, təmol nəwia Uhgın.

²⁰Uhgın təmos-ipa Lou məmə təfagə rat otuwa mol iahgin, kən məmə netəmim okotitun nolən rat min rəhalat. Məto nian təfagə rat təmuwa mol iahgin, nəwirən itəm Uhgın təmawte-in ərnapın əm təmuwa iahgin təhmin min maprəkis,

²¹məmə nəwirən otol win e təfagə rat min. Təfagə rat təmatərəmərə e netəmim rafin matiuw-pa nimisən elat. Məto roiu nəwirən itəm Uhgın tətawte-in kəm kitat otərəmərə, kən nəwirən əh otol məmə netəmim okotətuatip e niganəmti Uhgın, kən motos nəmegəhən lili e Iesu Kristo rəhatat İərəmərə.

Rom 6

Nəsanənən rəha təfagə rat okol təsəlis ətainən kitat

¹?Kən tol nəhlan o nat əh, kitat okotəhrən? Okəmə naka suah kit otən məmə, təwir məmə koatəkəike əm o nolən təfagə rat, məmə nəwirən rəha Uhgın otəwiə mol iahgin təhmin.

²!Kəp, təsətuatipən! Nian təfagə rat tətalkut məmə otiuw-pən kitat tərat ikin, kən nikitat təike məht məmə, tahmen əm məmə kəmotimis rəkis lan, kən okol kəsotolən nəwian roiu.

³Nəkotitun o kəp məmə, kəmol baptais etat, kən baptais əh tatəgətun məmə kitat kəmotuwa kitiah kitat Kristo. Kən nian Kristo təmimis, tahmen əm məmə kitat kotimis kitat min, u nipətin təmə nəmegəhən rəhatat o nolən təfagə rat, in təmimis.

⁴Tol nəhlan, nian kəmol baptais etat, in tahmen məmə kəmotimis, kən kitənim itat kitat Kristo. Kən in tol nəhlan məmə kitat okotətəu-pən suatip rəha nəmegəhən wi, tahmen əm məmə Uhgin Tata təmosmegəh Kristo e nimisən, e nəsanənən asol rəhan.

⁵Tol nəhlan məto-inu, kəmotuwa kitiah kitat min e nimisən rəhan, kən okotuwa min kitiah kitat min e nolən itəm Uhgin təmosmegəh in lan e nimisən.

⁶Kitat kotitun məmə nian kəməht-ipən Kristo e nig kəməluau, kəməht-ipən ilat nolən oas min rəhatat məmə, otərəkin nolən oas rəhatat itəm tolkeike pik təfagə rat. Kən təmol məmə təfagə rat otəsərəmərə minən etat,

⁷məto-inu etənim itəm təmimis, təsətig ahginən nəsanənən rəha təfagə rat.

⁸Məto-inu kəmotimis kitat Kristo, kən tol nəhlan, kotahatətə məmə okotəmegəh kitat min roiu, ne nian itəm təpanuwa.

⁹Kotahatətə nəhlan məto-inu kotitun məmə Uhgin təmosmegəh Kristo e nimisən, kən tol nəhlan okol təsəmis minən. Nimisən təsərəmərə minən lan.

¹⁰In təmimis mau kitiah əm, kən e nimisən rəhan, təmos-irəkis nəsanənən rafin rəha təfagə rat. Məto tatəmegəh roiu, kən e nəmegəhən rəhan, in tatəmegəh məmə otələs-ipər nərgi Uhgin.

¹¹Kən e nolən ahmen-ahmen əm, nikitəmat təkəike məht itəmat məmə nəmotimis e təfagə rat, təfagə rat rəhan nəsanənən tikə o niuw-pənən itəmat. Məto e nəmegəhən rəhatəmat əh-roiu, nikitəmat təkəike məht itəmat məmə nakotəmegəh e Uhgin məmə onəkotələs-ipər nərgin e Kristo Iesu.

¹²Tol nəhlan, soteğəhan-inən məmə təfagə rat tərəmərə e nıpətıtəmat itəm otəpanimis nian kit. Soteğəhan-inən məmə nəkoatol nəwia nətəligən rat rəha nıpətıtəmat.

¹³Kən soteğəhan-in minən nolən nıpətıtəmat min məmə nəkoatol təfagə rat lan. Məto oteğəhan-in-pən nəmegəhən rəhatəmat rafin kəm Uhgın, məto-inu itəmat netəmim itəm Uhgın təməmki-rəkis itəmat e nimisən məmki-pən itəmat e nəmegəhən. Kən oteğəhan-in nolən nıpətıtəmat min məmə okotol nolən min itəm kotətuatip e niganəmti Uhgın.

¹⁴Tol nəhlan məto-inu, təfagə rat otəsərəmərəən etəmat məto-inu roiu, nəsotatig ahginən Lou itəm təsasituən etəmat məmə nəsotolən təfagə rat. Məto nakoatatig ahgin nəwıran itəm Uhgın tətawte-in kəm itəmat, kən e nəwıran əh, in otasitu etəmat məmə nəsotolən təfagə rat.

Slef min rəha nolən ətuatip

¹⁵?Kən kitat okotəhrən? Okəmə naka suah kit otən məmə, pəs okotol təfagə rat məto-inu, Lou təsərəmərəən etat, məto nəwıran rəha Uhgın itəm tətawte-in kəm kitat tatərəmərə etat. !Kəp, təsətuatipən!

¹⁶Nəkotıtun o kəp məmə, nian nakoteğəhan-in-pən itəmat kəm suah kit məmə nəkoatol nəwian, kən itəmat rəhan slef, kən itəmat slef rəha suah un noatol nəwian. Suatip kəiu o nətəu-pənən. E suatip kit, nakotuwa slef rəha təfagə rat, kən suatip u tatuwin o nimisən. Kən e suatip kit min, nakotuwa slef rəha nolən nəwia Uhgın, kən suatip u tatuwin o nətəuətıpən e niganəmti Uhgın.

¹⁷Kitat koatənwiwi Uhgın məmə nat əpnapın aupən nəmoatol slef rəha təfagə rat, məto uarisig, e nikitəmat rafin nəmotol nəgətunən itəm ematəgətun itəmat lan.

¹⁸Uhgın təmikis itəmat e təfagə rat, kən təfagə rat, rəhan nəsanənən tikə o nərəmərəən etəmat. Kən nəmotuwa slef rəha nolən min itəm kotətuatip e niganəmti Uhgın.

¹⁹Iatəghat e nətəligən min itəm netəmim kotıtun, inu slef ne etəm-iasol, məto-inu nətəligən rəhatəmat təsahmenən o nitunən natımnat rəha Uhgın. Aupən

ikin, nēmotegehān-in noli-noli nipētītēmat mēmē ilat slef rēha nolēn min itēm tol naulisēn əm, ne slef rēha nēratēn itēm tatēr tepēt. Məto roiu otegehān-in-pən ilat mēmē ilat slef rēha nolēn min itēm kotētūatīp, kən nakotuwa netēmim itēm Uhgīn tēmələhəu kalin mēmē rəhan min.

²⁰Nian itēmat nēmoatol slef rēha tēfagə rat, nolēn itēm tētūatīp e nīgānəmtī Uhgīn tēsərəmərəən etēmat.

²¹?Noan nəwīrən naka nēmotos e nəmegəhən rəhatēmat o nolēn tērat min itēm noataulis rōn əh-roiu? !Noan nolēn rat min əh, in nīmīsən əm!

²²Məto roiu, Uhgīn tēmīkis itēmat e tēfagə rat, kən nēmotuwa slef min rəhan, kən noan nəwīrən itēm noatəhl, tatit itēmat mēmē nakotuwa netēmim rəha Uhgīn e nīkitēmat rafin. Kən nakoatos nəmegəhən lilin.

²³Tol nəhlan məto-inu nətouən rəha tēfagə rat in nīmīsən, məto nat itēm Uhgīn tatos-ipa in nəmegəhən lilin e Kristo Iesu rəhatat Iərəmərə.

Rom 7

Lou tēsərəmərəən e kitat

¹Piak min ne wīnik min. Itēmat nəkōtitun nolēn rəha lou. Lou min koatərəmərə e netēmim nian ilat koatəmegəh əm.

²Tahmen e nat u. Okəmə pətan kit itēm tēmōl marit, lou tatēn mēmē in rəhan əm əh iərman nian in tatəmegəh. Məto okəmə iərman əh tīmīs, kən lou rəha marit tēsaskəlīm minən pətan əh, kən in titun nətəu-pənən suah pīsīn kit.

³Məto okəmə in tatətəu-pən iərman pīsīn kit nian rəhan iərman tatəmegəh əh, katēn mēmē in tategoafəl rəhan iərman. Məto okəmə rəhan iərman tēmīmīs, lou əh rəha marit tēsaskəlīm minən pətan əh, kən nat əpnarīn tatətəu-pən iərman pīsīn, in təsegoafələn rəhan iərman.

⁴Piak min ne wīnik min. E nolēn ahmen-ahmen əm, məto-inu nīnotol kitīəh itēmat Kristo, tahmen əm mēmē itēmat nēmōtīmīs itēmat min e nig kəluau. Kən nian nēmōtīmīs, Lou rəha Moses tēsaskəlīm minən itēmat u-roiu. Uhgīn tēmīkis itēmat o nətəu-pənən ətūatīp natīmnat rafin agīn e Lou mēmē Uhgīn otosmegəh itēmat. Kən itēmat nakotahmen-pən əm e pətan kit itēm rəhan

iərman in tēmimis, kən roiu in tēsōlən marit, kən in titun nətəu-pənən suah pisin. Rəhatəmat iərman aupən, in Lou. Məto roiu, itəmat nakotətəu-pən suah pisin u Kristo, itəm Uhgīn təmosmegəh e nimisən. Kən nakotətəu-pən in məmə nakoatōe noan wir, itəm in nolən təwir min itəm koatisiai-in Uhgīn.

⁵Nian nətəligən rat rəha etəmim tatərəmərə e kitat, nətəligən rat min rəhatat koatiuw-pən kitat məmə okotol nolən rat min e nipətitat. Kən nian Lou tatən məmə okəsotolən nolən rat min əh, tol məmə nikitat tatəht pik nolən rat min, kən koatolkeike moatol təhmin nolən rat min. Tol nəhlan, kəmotol təfagə rat tepət. Kən noa təfagə rat min əh, in nimisən əm.

⁶Məto roiu, okol kitat kəsətəu-pən minən Lou rəha Moses məmə okotos nəmegəhən lilin, məto-inu tahmen əm məmə kitat kəmotimis e Lou əh. Kən tol nəhlan, Lou təsərəmərəən e kitat u-roiu. Kən roiu, kitat slef min rəha Uhgīn, məto kəsotətəu-pənən suatip oas o nətəu-pənən Lou itəm kəməte, məto koatətəu-pən suatip wi rəha Narmīn Rəha Uhgīn.

Lou tatol məmə netəmim kotal təfagə rat

⁷?Kən kitat okotəhrən? Okəmə naka suah kit otən məmə, “Lou in nat tərət məto-inu tatol məmə kitat koatol təfagə rat.” !Məto kəp, təsətəuətəpən! Io ekitun əm məmə təfagə rat tahro nulan məto-inu Lou tatəgətun io lan. Okəmə Lou in təməsənən məmə esolən nolən rəha nolkeikeən nat kit rəha etəm pisin, kən okol esitunən nolən əh məmə təhrol nulan.

⁸Məto təfagə rat təmaskəlīm nəghatən rəha Lou, mol rəhan in iolwək, kən təmol məmə nolən rəha nolkeikeən nat kit rəha etəm pisin təmuwa tepət e nikik. Məto okəmə Lou təpikə, kən təfagə rat rəhan nəsanənən təpikə nəhlan, tahmen məmə tēmimis.

⁹Aupən ikin, nian eməruru əh Lou, nikik təsəhtən təfagə rat rəhak, emətətig wir əm. Məto uarisig emitun məmə Lou əh-ikin, kən nəsanənən rəha təfagə rat təmuwa məmegəh min məskasik, kən enitun məmə ekəike mimis o təfagə rat rəhak.

- ¹⁰Kən eməplan məmə nəghatən əh rəha Lou itəm təmuwa məmə otol etəmim təmegəh, məto nīpahrienən tēmiuw-pa əm nīmīsən.
- ¹¹Tol nəhlan məto-inu, təfagə rat təmaskəlīm nəghatən rəha Lou, mol rəhan in iolwək, kən təmeiuə-in io. Nīkik təməht məmə okəmə emalkut o nətəu-pənən Lou rəha Moses, kən ekos nəmegəhən līlīn. Məto enəruru nolən, kən e nəghatən rəha Lou, ekəike mīmīs o təfagə rat mīn rəhak.
- ¹²Məto Lou tasim təmīsī-pən e Ughin, kən nəghatən mīn rəha Lou kəmotīsī-pən e Ughin motasim, motətuatīp, motəwīr motasitu e netəmim.
- ¹³Kən okəmə naka suah kit otən məmə, “Lou in nat təwīr, məto təmol məmə ekīmīs.” !Məto kəp, təsətuatīpən! Nīan emītun nəghatən rəha Lou itəm in təwīr, nīkik təmuwīn o nolən təfagə rat, kən io emol təfagə rat itəm noan in nīmīsən. Tol nəhlan, təfagə rat təmol məmə ekīmīs. Təmol nəhlan məmə ekītun məmə nolən rat mīn rəhak, ilat təfagə rat pahrien. Kən nīan eməplan nəghatən rəha Lou, enītun məmə təfagə rat in nat tərat agīn-əh.
- ¹⁴Kitat kotītun məmə Lou təmīsī-pən e Ughin. Məto io, io etəmim əm. Kən kol-salīm-in io məmə io slef kit, kən təfagə rat in rəhak etəm-iasol.
- ¹⁵Esītunən natīmnat itəm iakatol, məto-inu nat wīr mīn itəm iakolkeike məmə ekol, esolən, məto iatol əm naka itəm iatətəhau.
- ¹⁶Ekitun wīr məmə təfagə rat rəhak in nat tərat nat əpnāpīn esolkeikeən məmə ekol. Kən nīan ekəto tərat e nīkik o təfagə rat u, in nəmtətīn kit məmə Lou tatol rəhan wək, kən Lou in nat wīr kit.
- ¹⁷Tol nəhlan, sənəmə io itəm iatol təfagə rat mīn, məto nolən rəha təfagə rat itəm tətātīg e rəhak nətəlīgən nīan rafīn, tatol məmə ekol nolən rat mīn.
- ¹⁸Ekitun məmə nətəlīgən rat rəhak otəsegəhan-inən məmə ekol nat wīr kit. Ekitun in nīpahrienən məto-inu iakolkeike məmə ekol nat itəm təwīr, məto okol esolən.
- ¹⁹Nat naka iatol sənəmə in nat wīr itəm iakolkeike məmə ekol, məto iatol əm təfagə rat itəm esolkeikeən məmə ekol.

²⁰Kən okəmә ekol nat naka itəm esolkeikeən mēmә ekol, sənәmә io pahrien u iatol, mәto in tәfagә rat itәм tәtatig lak tatol.

²¹Tol nәhlan, iatәplan mēmә nolән kit tatol wәk e nәmegәhән rәhak nian rafin. Nolән әh tol nәhlan mēmә, nian iakolkeike mēmә ekol nat wir, mәto tәfagә rat huә iuәhkir ron io tatiuw-pән io e tәfagә rat.

²²E nīkik rafin, iakolkeike Lou rәha Uhgīn,

²³mәto iatәplan min lou kit min itәм tatol wәk e nәmegәhән rәhak itәм tәtәluagīn ilau rәhak nītunән, mәlis io, matol mēmә io slef rәha tәfagә rat itәм tatol wәk e rәhak nәmegәhән.

²⁴!Kәsi, iatәto tәrat pīk agīn! ?Karmә pah otīlēs-irәkis io e nīpәtik u itәм tatuwīn o nīmīsән?

²⁵!Pәs kotәнwiwi Uhgīn. Iesu Kristo rәhatat Iәрәmәrә in otol! Kән tol nәhlan nәmegәhән rәhak tol min-nulan mēmә, io slef rәha Lou rәha Uhgīn e rәhak nәtәligән wi, mәto e nәtәligән rat rәhak, io slef rәha lou rәha tәfagә rat.

Rom 8

Nolән rәha nәtәu-pәнән Narmin Rәha Uhgīn

¹Kән nәukәti nәghatән rafin min әh tol min-nulan, mēmә Uhgīn tatән mēmә kitat kotәtuatip e niganәmtin mәto-inu kotahatәtә e nat itәм Kristo tәmol otat. Kән tol nәhlan, Uhgīn kol tәsuәhән, kән mәsәlәhәuән nәghatән mәsolән nalpinән kit rәha netәм min u kәmotuwa kitīәh ilat Kristo Iesu,

²mәto-inu nәsanәнән rәha Narmin, itәм tatos-ipa nәmegәhән wi kәм kitat e Kristo Iesu, in tәmīkis kitat e nәsanәнән rәha tәfagә rat ne nīmīsән.

³Lou tәruru nīkisән nәhlan kitat, mol kitat kotәtuatip e niganәmti Uhgīn mәto-inu, nәtәligән rat rәha etәmim tatol win e nolән itәм Lou tolkeike. !Mәto nat itәм Lou tәruru nolән, Uhgīn tәmol! Inu, tәmahl-ipa Nәtin әtuatip kән tәmuwa etәmim mahmen e kitat. Kән Uhgīn tәmakil muәh mәlәhәu nәghatән mol nalpinән o tәfagә rat itәм kitat netәmim rafin koatol. In tәmol nәhlan nian tәmol Netin tәmuwa sakrifais o tәfagә rat min rafin rәhatat.

⁴Uhgin tæmol næhlan mæmæ, næghatæn ætuatip min ræha Lou okotuwa motol nipahrienæn e næmegæhæn ræhatat itæm kæsotætæu-pænæn suatip ræha nætæligæn rat ræha etæmim, mæto koatætæu-pæn suatip itæm Narmin Ræha Uhgin tatægætun kæm kitat.

⁵Netæmim itæm koatætæu-pæn nætæligæn rat ræha etæmim, nætæligæn ræhalat tatuwin æm o nat itæm nætæligæn rat ræhalat tolkeike. Mæto netæmim itæm koatætæu-pæn nolæn itæm Narmin Ræha Uhgin tolkeike, nætæligæn ræhalat tatuwin æm o nat itæm Narmin Ræha Uhgin tolkeike.

⁶Okæmæ nætæligæn rat ræha etæmim in tatæramæra lan, kæn suah æh tatætæu-pæn æm suatip ræha nimisæn. Mæto okæmæ Narmin Ræha Uhgin tatæramæra e ræhan nætæligæn, kæn suah æh tatætæu-pæn suatip ræha næmegæhæn ne næmælinuæn.

⁷Tol næhlan mæto-inu, nætæligæn rat ræha etæmim, tatol tikimir ilau Uhgin, mæto-inu tæsætæu-pænæn lou min ræha Uhgin, kæn in tæruru agin nætæu-pænæn.

⁸Netæmim itæm koatætæu-pæn nætæligæn rat ræha etæmim, okol kæsotolæn niki Uhgin tagien.

⁹Mæto itæmat næsotætæu-pænæn nætæligæn rat ræha etæmim. Okæmæ in nipahrienæn mæmæ Narmin Ræha Uhgin tætatiɡ etæmat, kæn noatætæu-pæn nolæn itæm Narmin Ræha Uhgin tolkeike. Etæmim itæm Narmin Ræha Kristo tæsatiɡæn lan, in sænæmæ etæmim ræha Kristo.

¹⁰Mæto Kristo tætatiɡ etæmat. Kæn nat ænnapin nipætætæmat otækæike mimis o tæfagæ rat, mæto narmitæmat tatæmegæh mæto-inu itæmat nækotætæuatip e nigænæmti Uhgin.

¹¹Narmin Ræha Uhgin tætatiɡ etæmat, inu Narmin Ræha Uhgin u itæm tæmol Kristo Iesu tæmegæh min e nimisæn. Nipahrienæn, nipætætæmat otimis nian kit. Mæto e Narmin Ræhan, Uhgin otos-ipæn min næmegæhæn e nipætætæmat.

¹²Piak min ne winik min. O natimnat min æh, kitat kotækæike katig kætæu-pæn nat itæm Uhgin tolkeike, mæto kæsotatiɡæn kætæu-pæn nat itæm nætæligæn rat ræha etæmim tolkeike mæmæ otol,

¹³məto-inu okəmə nəkotatig motətəu-pən nat itəm nətəligən rat rəha etəmin tolkeike, nəkotəkəike motimis. Məto okəmə e Narmin Rəha Uhgın nakotohamnu nolən rəha etəmin, kən onəkotəmegəh,

¹⁴məto-inu netəmin rafin itəm Narmin Rəha Uhgın tatit ilat, ilat nenəti Uhgın min.

¹⁵Itəmat nəkotitun məmə inu in nıpahrienən məto-inu, Uhgın təmos-ıpinə Narmin Rəhan kəm itəmat, kən Narmin təsolən itəmat nakoatəgin min Uhgın, tahmen e slef kit tatəgin rəhan etəm-iasol. Kəp, məto Narmin Rəhan təmol məmə Uhgın təməhl itəmat. Kən Narmin tatol məmə kitat kotitun nənən kəm Uhgın məmə, “!Ik rəhatimat tata!”

¹⁶Kən Narmin atıp Rəha Uhgın tatən kəm narmitat məmə kitat nenəti Uhgın min.

¹⁷Kən məto-inu kitat nenətin min, kitat okotos natimnat wir min itəm Uhgın təmələhəu kalın məmə rəhatat. Kən kitat Kristo okotos natimnat min əh. Kitat kotitun məmə inu nıpahrienən məto-inu kitat koatəto nahməən kitat min, kən kotitun məmə Uhgın otos-ıpən nisaiiən kəm kitat tahmen e itəm otol e Kristo.

Nepətən əhag-əhag rəha Uhgın itəm tatuwa

¹⁸Ekitun məmə nahməən itəm kotatig lan u-roiu, okotəplan məmə ilat nat əpnapın əm nian Uhgın otol-arəp nepətən əhag-əhag rəhan e nəmegəhən rəhatat.

¹⁹Nıpahrienən, natimnat rafin itəm Uhgın təmol, inu nəptən ne natimnat itəm koatəwiə lan, ne neai, ne nat megəh min, ilat koatəsahgin motolkeike pik məmə okotəplan nian itəm Uhgın otol-arəp məmə nenətin min u pah min.

²⁰Koatasıpən nəhlan məto-inu Uhgın təmol məmə natimnat rafin itəm in təmol, ilat koatatig e nelmi nəratən, motəruru nolən wək wir min itəm rəhalat aupən ikin. İlat kəsotolkeikeən nəhlan, məto in Uhgın itəm təmol nəhlan elat. Kən in təmolkeike məmə ilat okotələhəu-pən rəhalat nətəligən əskasik lan,

²¹məmə in otikis ilat e nəmnəmitən ne nimisən itəm ilat kotatig pahrien lan. Kən in otikis ilat nəhlan məmə in titun nos-ipənən nepətən əhag-əhag kitiəh əm kəm ilat itəm otos-ipən kəm nenətin min.

²²Kitat kotitun məmə aupən agin mətoarus-pa əh-roiu, natimnat rafin itəm Uhgın təmol, koatekimis tahmen e pətan kit itəm tatəto nahməən məmə otıləs nətin.

²³Kən sənəmə natimnat min əm itəm Uhgın təmol, ilat koatekimis nəhlan. Məto kitat min koatekimis nəhlan, nat əpnəpin məmə Uhgın təmos-ipa rəkis nat wir kəm kitat, u Narmin Rəhan. Kən Narmin in məsin rəha natimnat wir agin min itəm Uhgın otəpanos-ipa nian kit. Kən roiu koatəsahgin e nian ətuatip məmə Uhgın otegəhan-in rafin kəm kitat natimnat itəm təməhl kitat ron. Kən in otikis nipətitat itəm toas, mos-ipa in wi.

²⁴Təmətuoun e nian Uhgın təmosmegəh kitat, kitat koatələhəu-pən əskasik rəhatat nətəligən o natimnat min əh. ?Okəmə suah kit təmos nat kit itəm in təmatəsahgin, in otəsahgin min o naka?

²⁵Məto koatələhəu-pən rəhatat nətəligən e nat kit itəm kəsotəplanən əh, kən motol rəhatat nətəligən təfəməh moatəsahgin moatətul əskasik.

²⁶Kən tahmen məmə nolən əh tətəsitu etat, Narmin Rəha Uhgın tətəsitu etat e rəhatat nəpouən. Kitat kotəruru məmə naka koatəkəike kəfak ron, məto Narmin əm Rəha Uhgın tatən rəhatat lan nian kitat koatekimis e nolən kit itəm nəghatən tikə lan.

²⁷Kən Uhgın itəm in titun niki netənim, in titun naka Narmin Rəhan tatən, məto-inu Narmin Rəhan tatəfak o iəfak min tətəu-pən nətəligən rəha Uhgın.

Nalpəkəuən rəha Uhgın

²⁸Kitat kotitun məmə, Uhgın tatol məmə natimnat rafin itəm koatuwa, inəh nat wir min ne nat rat min, ilat rafin koatuwa o nasituən etat itəm kotolkeike Uhgın, inu kitat netəm itəm in təmaun-in kitat e nalpəkəuən rəhan.

²⁹Tol nəhlan məto-inu, aupən aupən agin, Uhgın tinitun rəkis məmə kitat okotahatətə lan. Kən e nian əh, in təməən məmə nolən rəhatat otuwa mahmen

e Nətin məmə netəmim tepət okotuwa pian min ne winin min, kən in təmaupən maiir, kən in ilis e kitat rafin.

³⁰Kən kitat itəm in təmaupən mən məmə okotuwa rəhan, in təmaun-in kitat. Kən kitat u itəm təmaun-in, in təmol kitat kotətuatip e niğanəmtin. Kən kitat u itəm təmol kitat kotətuatip, in otıləs-ipər mos-ipən nisialien ne nepətən əhag-əhag rəhan kəm kitat.

Nolkeikeən asol rəha Uhgın

³¹?Okotən min naka e natimnat min əh? Uhgın in kitat min, matol natimnat rafin məmə ilat natimnat wir min e nəmegəhən rəhatat, kən nat əpnapin əm okəmə pah tatol tikimir kəm kitat.

³²In təməsəginən o Nətin ətuatip məmə otimis o kitat rafin, məto in təmegəhan-in əm. Kən okəmə in təmos-ipa Nətin kəm kitat, kən in otawte-in natimnat rafin kəm kitat.

³³?Pah titun nətu-pa min nəghatən kit məmə kitat kəmotol tərət? Suah kit tikə, məto-inu, in Uhgın itəm təmol kitat kotətuatip e niğanəmtin, kitat itəm in təmitəpun.

³⁴?Kən pah titun nələhəuən nəghatən məmə kitat kotəkəike motos nalpinən? Suah kit tikə, məto-inu Kristo Iesu təmimis o kitat, kən nat kit min, Uhgın təmosmegəh in e nimisən. Kən roiu, in tatəpələh e nikali Uhgın matip, ikin rəha nisialien ne nəsanənən, matəfak kəm Uhgın o kitat.

³⁵?Naka titun niləs-irəkisən kitat o nolkeikeən rəha Kristo o kitat? ?Nəratən, o nian iəkis min, o nəratən itəm netəmim koatol kəm kitat, o nəumis, o rəhatat nautə tikə, o ikin tasilə ikin, o naəp rəha nəluaginən o nohamnuən itəm? Kəp. !Nat kit tikə!

³⁶Nəmegəhən rəhatat tahmen əm e itəm Naoa Rəha Uhgın tatən məmə, “Uhgın. Nian rafin, netəmim koatolkeike məmə okotohamnu itimat o nərgəm. Itimat ekotahmen e sipsip min itəm okohamnu ilat.”

³⁷Nipahrienən, e natimnat min əh rafin, Kristo itəm tolkeike kitat, tatol məmə kitat koatol win agin.

³⁸Kən ekitun mēmə nat kit tikə agin titun niləs-irəkisən kitat o nolkeikeən rəha Uhgīn, inu nimisən, o nəmegəhən, o nagelo min, o iərmis min, o natimnat itəm tatuwa əh-roiu, o natimnat itəm otəpanuwa, o nəsənənən min rafin,

³⁹o natimnat əpəh ilis, o natimnat ləhau agin, o nat kit e natimnat rafin itəm Uhgīn təmol, okol ilat rafin kəsotiləs-irəkisən kitat o nolkeikeən rəha Uhgīn itəm koatos o Iərəmərə rəhatat Kristo Iesu.

Rom 9

Pol təmolkeike pik mēmə netəm Isrel okotahatətə e Kristo

¹Kən roiu iakolkeike mēmə ekəghat-in rəhak min netəmim u noanol min rəha Isrel, mēmə kəmotapəs Kristo. Iatən nīpahrienən mətə-inu itimlau Kristo kitiəh əm, eseiūəən. Rəhak nətəligən ne Narmin Rəha Uhgīn katuən mēmə nat u iatən in nīpahrienən.

²Nikik təmitəgit kən mətahmə pik olat nian rafin.

³Okəmə io ekitun nosən nalpinən ne neməha rəha Uhgīn, kən inu otasitu o natimak min mēmə okotahatətə e Kristo, kən nikik təpagien əm. Nīpahrienən, nikik təpagien okəmə Uhgīn otiləs-irəkis io e Kristo itəm iakolkeike pik, okəmə in otasitu natimak min mēmə okotahatətə lan. Ekən nəghatən u, “natimak min,” mətə-inu e nīpətīn, ilat noanol rəha Isrel.

⁴Ilat noanol rəha Isrel, kən natimnat wir min u rəhalat: Uhgīn təməhl ilat mēmə nenətīn min, kən təmol əp rəhan nepətən əhag-əhag kəm ilat, kən mos-ipən min nəniəkisən min rəha nasituən, kən mos-ipən min Lou kəm ilat, ne nəfakən əpəh e Nimə Rəha Uhgīn, ne nəniəkisən min.

⁵Kən tīpilat min, ilat netəm-iasol min rəha Uhgīn auppən, kən e nīpətīn ikin, Kristo təmisi-pən e noanol rəhalat, kən in Uhgīn itəm in ilis e natimnat rafin, itəm okatənwiwi əm nulan kətan namnun tikə. Əwəh.

Suatip itəm Uhgīn təmitəpun netəmim lan

⁶Noanol rəha Isrel kəməsotahatətəən e Kristo, məto nolən əh təməsolən məmə Uhgın tateiuə e rəhan nəniəkisən, məto-inu sənəmə ilat rafin itəm kəmotisi-pən e noanol rəha Isrel, ilat netəm Isrel pahrien.

⁷Kən e nolən əh inəh, ilat itəm kəmotisi-pən e Epraham, ilat sənəmə netəm pahrien rəha Epraham. Məto Uhgın təmən kəm Epraham məmə, “Noanol ətuatip rəham otisi-pən e nita rəha Aisak.”

⁸Nipətın nat u məmə, ilat u kəmotaiir e noanol rəha Epraham sənəmə ilat rafin nenəti Uhgın min. Məto nenəti Uhgın pahrien, ilat netəmim itəm kəmotaiir e nəniəkisən rəha Uhgın. Kən ilat u noanol pahrien rəha Epraham.

⁹Tol nəhlan məto-inu Uhgın təmən-iəkis kəm Epraham min-nulan, “E nian ətuatip, oekitəlig-pa, kən Sera tiniləs rəkis nətın kit iərman.”

¹⁰Məto nəghatən təsolən namnun ikin-u. Nəti Sera u Aisak təmit Repeka, kən in təmiləs mil mil kəiu. Rəhalau tata kitih əm, pipi rat rəha noanol min rəha Isrel u Aisak.

¹¹Məto nian mil mil u kəməsuaiirən əh, kən məsioalən əh nat kit itəm təwir o tərət, Uhgın təmən-ipən nəghatən kit kəm Repeka. Kən nəghatən u tatəgətun wir məmə Uhgın titəpun netəmim tətəu-pən əm rəhan nətəligən,

¹²məto sənəmə məmə kitat kəmotol nat wir kit or nat tərət kit. Uhgın təmən kəm Repeka məmə, “Nita rəha nətım asol lan, ilat okotol wək əm kəm rəha in əkəku lan.”

¹³Kən inu tatətəu-pən əm nəghatən e Naoa Rəha Uhgın itəm tatən məmə, “Emolkeike Jekop, məto emetəhau Esao.”

¹⁴?Okotəhrən əh-roiu? ?Okotən məmə nolən rəha Uhgın təsətuatipən? !Kəp! Kotitun məmə in tatol tətəuət

¹⁵məto-inu Uhgın təmən kəm Moses məmə, “Oekasəkitun netəmim itəm ekitəpun ilat, kən ekol nolən təwir kəm netəmim itəm ekitəpun ilat.”

¹⁶Kæn tol nǎhlan, kitat kǎsotosǎn nǎniǎkisǎn rǎha Uhgín o nat kit itǎm koatol, tahmen mǎmǎ koatolkeike pik in, o mǎto-inu kitat koatol wǎk ron, kǎp. Koatos ǎm e nasǎkitunǎn rǎha Uhgín.

¹⁷E Naoa Rǎha Uhgín, in tatǎn kǎm Fero, kig rǎha Ijip mǎmǎ, “Emilǎs-ipǎr ik o nat kitǎh ǎm u mǎmǎ netǎmim okotǎplan rǎhak nǎsanǎnǎn e nǎmegǎhǎn rǎham, mǎmǎ netǎmim okotǎn-iarǎp nǎrgǎk e nǎtueintǎn rafin.”

¹⁸Kæn nǎpǎti nat u mǎmǎ, Uhgín tǎtasǎkitun netǎmim neen mǎto-inu in atǎp tolkeike mǎmǎ otol mihin. Kæn in tatol netǎmim neen mǎmǎ ilat kotapǎs nǎtoǎn rǎhan nǎghatǎn mǎto-inu in atǎp tolkeike mǎmǎ otol mihin.

¹⁹Kǎm-naka itǎmat kit otǎtapǎh ron io mǎmǎ, “Okǎmǎ Uhgín tatol netǎmim neen mǎmǎ ilat kotapǎs nǎtoǎn rǎhan nǎghatǎn, kæn ilat okotǎkǎike motol nǎhlan. ?Kæn tahro Uhgín tatǎn mǎmǎ ilat kǎmotol tǎfagǎ rat?”

²⁰Mǎto ekuhalpín nǎghatǎn u mǎmǎ, ik etǎmim ǎm. Tahro natuhalpín ǎsanǎn nǎghatǎn rǎha Uhgín. Nǎkitǎmat tǎht-tu. Nuwigí nat kǎmol e noantǎnimtǎ, kol tǎsǎnǎn kǎm etǎm tǎmol mǎmǎ, “?Nǎmahro mol io mǎmǎ ekol nulan?”

²¹Etǎmim itǎm tatol natǎmnat e noantǎnimtǎ, in titun nosǎn noantǎnimtǎ kit mol nuwigí nat lan kǎiu, kit itǎm tǎwir rǎha nolǎn lafet, kæn kit mǎn rǎha wǎk ǎpnǎpín ǎm.

²²Kæn Uhgín titun nǎtǎu-pǎnǎn nolǎn ahmen-ahmen ǎm e netǎmim. Okǎmǎ in tolkeike, in titun nolǎn ilat mǎmǎ otǎrǎkin ilat. In tolkeike mǎmǎ otol-arǎp mǎmǎ nemǎha tatol o tǎfagǎ rat, kæn in otol nalpínǎn asol kǎm netǎmim itǎm koatol tǎfagǎ rat. Mǎto nat ǎpnǎpín in tatol nǎhlan, rǎhan nǎtǎligǎn kaifǎmǎh mǎsol uǎhaiǎn nalpínǎn kǎm ilat itǎm koatol mǎmǎ nǎkin otahmǎ.

²³Rǎhan nǎtǎligǎn kaifǎmǎh nǎhlan mǎmǎ in otol-arǎp nǎwirǎn asol rǎhan kǎm netǎm mǎn u itǎm in tolkeike mǎmǎ otasǎkitun ilat. In tǎmol ǎpen-ǎpenǎ ilat aupǎn aupǎn agín mǎmǎ ilat okotatig e nǎwirǎn rǎha Uhgín ǎpǎh e nego e neai.

²⁴Inu kitat rafin itǎm in tǎmitǎpun, kæn sǎnǎmǎ noanol ǎm rǎha Isrel, mǎto Iaihlua mǎn.

²⁵Tahmen əm e naka u Uhgın təmən e Naoa u rəha Hosea məmə, “Netəm min əh itəm sənəmə rəhak netəmim, ekaun-in ilat məmə, ‘rəhak min netəmim.’ Kən netəmim itəm eməsolkəikəən ilat aypən, ekaun-in ilat məmə, ‘netəmim itəm iakolkeike.’

²⁶Kən ikin-u ətuatıp, itəm emən kəm ilat məmə, ‘Itəmat sənəmə rəhak min netəmim,’ netəmim okotaun-in ilat məmə, ‘Ilat nenəti Uhgın itəm tatəmegəh.’”

²⁷Kən ien Aesea təmatəghat-in noanol min rəha Isrel e nian tatən-iarəp məmə, “Nat əpnarın netəm Isrel kotepət tahmen e nıməkləkil əpəh itəhəi, məto Uhgın otosmegəh əm ilat noan məsin,

²⁸məto-inu İərəmərə in otol rafın uəhai əm rəhan nəghatən o nos-ıpənən nalpınən kəm netəmim e nətueintən.”

²⁹Kən tahmen e nəghatən itəm ien Aesea təmən aypən məmə, “Okəmə İərəmərə Əsanən Pık Agın in təsegəhan-inən itat məmə rəhatat nıta məsin okotəmegəh, okol kitat kəpotuwa motahmen e netəmim rəha Sotom ne Komora itəm in təmərəkin agın ilat.”

Netəm rəha Isrel kəməsotahatətən

³⁰?Naka nıpəti nəghatən min u? Nıpətın tol min-nulan məmə, İaihlua min itəm kəsotalkut əskasıkən məmə okotətuatıp e nıganəmti Uhgın, Uhgın təmol ilat kotətuatıp e nıganəmtin e nahatətən rəhalat.

³¹Məto netəm Isrel kəmotalkut pık e suatıp rəha nətəu-pənən Lou məmə ilat kotətuatıp e nıganəmti Uhgın. Məto ilat kəsotətuatıpən.

³²?O naka? Məto-inu ilat kəmotalkut pık məmə okotətuatıp e nıganəmti Uhgın o nolən wir min rəhalat, məto kəsotətəu-pən suatıp rəha nahatətən. İlat koatoh pıkən “Kəpiel Rəha Noh Pıkənən.”

³³Inu tahmen e Naoa Rəha Uhgın itəm tatən məmə, “!Otəplan-tu! Emələhəu kəpiel kit əpəh Saeon məmə netəmim okotoh pıkən, in kəpiel itəm otol ilat kotəme. Məto etəmim itəm tətahatətə e Suah əh, okol in otəsaulisən nian tatətul e nıganəmti Uhgın.”

Rom 10

¹Piak min ne winik min. Iakolkeike pik mämә Uhgın otosmegäh netәм Isrel, kән nian rafin iatәfak ron.

²Io iatән-iarәp kәм itәmat mämә ilat kotalkut pik o nolән natimnat itәм otol niki Uhgın tagien. Mәto nolән rәhalat tәsisi-pәнән e nitunән itәм tәtuatip.

³Okol ilat kәsotәtәu-pәнән suatip rәha Uhgın mämә ilat okotuwa kәtuatip e niganәmtin, mәto-inu ilat kotәruru suatip rәhan, kән motalkut mämә okotәtәu-pән rәhalat atip suatip, suatip rәha nәtәu-pәнән Lou.

⁴Kristo tәmol namnun e suatip rәha nәtәu-pәнән Lou mämә etәmim in tәtuatip e niganәmti Uhgın. In tәmol namnun e suatip әh mämә netәmim rafin itәм koatahatәtә lan, ilat rafin okotәtuatip e niganәmti Uhgın.

Nәmegәhән itәм Uhgın tatos-ipa, in rәha netәmim rafin

⁵Moses tәmәte nәghatән kit e suatip rәha nәtәu-pәнән Lou mämә suah kit tuwa mәtuatip e niganәmti Uhgın. In tәmән mämә, “Etәmim itәм tatol natimnat rafin agin-әh itәм Lou tatән, in otos nәmegәhән lilin.”

⁶Mәto suatip rәha nahatәtән mämә suah kit tuwa mәtuatip e niganәmti Uhgın in tәpiә әm, tahmen e Naoa Rәha Uhgın itәм tatән mämә, “Әsәнән mämә nakәkәike muwin әpәh e nego e neai,” mämә onakegәs-in Kristo milәs meiuaiu muwa mämә otasitu lam.

⁷Kән tatән min mämә, “Әsәнән mämә nakәkәike muwin әpәh lәhau e ikin rәha netәм kәmotimis ikin,” mämә nakilәs-iarәp Kristo mol tәmegәh min e nimisән.

⁸?Mәto, tatән min naka? Tatән mämә, “Nәghatән Rәha Uhgın in iuәhkir әm ron ik. In әpәh e nohlim ne nikim.” Nәghatән u in nәghatән rәha nahatәtән itәм ioatән-iarәp.

⁹Tol nәhlan mәto-inu, okәмә nakән-iarәp e nohlim mämә Iesu in Iәрәmәрә, kән okәмә nakahatәtә e nikim mämә Uhgın tәmosmegәh in e nimisән, kән Uhgın otosmegәh ik.

¹⁰Kən inu nipahrienən nəhlan məto-inu Uhgın tatol etəmim kit tatətuatip e niganəmtin nian suah əh tətahatətə lan pahrien e nikin. Kən Uhgın tatosmegəh etəmim kit nian in tatən-iarəp e nohlin məmə İesu in İərəməərə rəhan.

¹¹Tahmen e Naoa Rəha Uhgın itəm tatən məmə, “Netəmim rafin itəm koatahatətə e suah əh, okol ilat okəsotaulisən nian okoatətul e niganəmti Uhgın.”

¹²Nəghatən əh in rəha netəmim rafin, nat əpnarın okəmə ik noanol rəha İsel, o İaihlua kit, məto-inu İərəməərə kitiəh əm u tatərəməərə mətawte-in rəhan nəwirən kəm netəmim rafin itəm koatəpəh ron.

¹³Tahmen e Naoa Rəha Uhgın itəm tatən məmə, “Netəmim rafin itəm koataun-in nərgi İərəməərə məmə otosmegəh ilat, in otosmegəh ilat.”

¹⁴?Məto netəmim okotahro motaun-in İərəməərə o nosmegəhən ilat, okəmə kəsotahatətən lan? ?Kən okotahro motahatətə lan okəmə kəsotətəən namnusən lan kit? ?Kən okotahro motəto namnusən okəmə suah kit təsən-iarəpən kəm ilat?

¹⁵?Kən netəmim okotahro kən-iarəp namnusən təwir okəmə Uhgın təsahl-İpənən ilat? Tahmen e Naoa Rəha Uhgın itəm tatən məmə, “!In nat wir agin nian suah kit tatuwa o nən-iarəpən namnusən təwir!”

¹⁶Məto sənəmə netəm İsel rafin itəm kəmos e nikilat namnusən təwir. Tahmen e nəghatən itəm Aesea təməte məmə, “İərəməərə, netəmim təkəku əm kəmotən nipahrienən e nəghatən rəhatimat.”

¹⁷Kən tol nəhlan, nahatətəən tətisi-pən e nat itəm nakatəto, kən nat itəm nakatəto tətisi-pən e namnusən itəm katən e Kristo.

¹⁸?Məto ekəpəh məmə, ilat kəmotəto o kəp? Əwəh, kəmotəto. Naoa Rəha Uhgın tatən məmə, “Nəghatən təmuwin e İkin min rafin e nətueintən, təmuwin İkin min rafin agin.”

¹⁹?Kən ekəpəh əm o nat kit min məmə, netəm İsel kəmotitun, o kəp? Əwəh, kəmotitun. Moses təmaupən mən məmə, “Ekol itəmat nakotetət

netəmim e kantri ərnəpən əm itəm ekol təwir kəm ilat, kən ekol neməha tol itəmat məto-inu ekol təwir kəm kantri mīn itəm kotalməl.”

²⁰Kən uarisig Aesea təsəginən o nənən məmə, “Netəmim itəm kəsotegəs-inən io, kəmotəplan io; Netəmim itəm kəsotətapəh-inən io, emol-arəp atip io kəm ilat.”

²¹Məto Aesea təmən nəghatən rəha Uhgīn e netəm Isrel məmə, “E nian rafin, nian rafin, eməg-əfəməh-in nelmək məmə ekasitu etəmat, itəmat itəm nakoatəht nəwiak moatəuhlin məntaatəmat ron io.”

Rom 11

Uhgīn tətəsəkītun əh netəm Isrel

¹Pəs ekətapəh o nəghatən kit e netəm Isrel. ?In pahrien məmə Uhgīn təməuhlin mentan o rəhan netəmim o kəp? !Kəp! Otəplan-tu io. In təməsəuhlinən məntaan kəm io u etəm Isrel, noanol rəha Epraham, nita rəha Benjamin.

²Aupən aupən agin, Uhgīn təmitəpun noanol rəha Isrel məmə in otolkeike ilat, kən ilat okotuwa rəhan mīn netəmim. Kən in təməsəuhlinən məntaan olat. Nəkotitun o kəp məmə naka Naoa Rəha Uhgīn tatən e Elaija. In təmatətapəh əskasik o Uhgīn matən-iarəp nəratən itəm Isrel təmol.

³In təmə, “Iərəməərə, kəmotohamnu rəham ien mīn motohalkin-ohalkin rəham olta mīn. Kən io pisin əm ekətətig, kən moatalkut mīn məmə okotohamnu io.”

⁴?Məto Uhgīn təmən-ipən naka kəm in? In təmən məmə, “Iataskəlīm netəmim sepen-taosan məmə rəhak mīn, itəm kəsotəfakən əh kəm uhgīn eiueiuə u Paal”

⁵Kən tahmen əm əh-roiu, netəm Isrel noan məsīn əh-ikīn itəm Uhgīn təmitəpun ilat e rəhan nəwīrən.

⁶Kən okəmə Uhgīn tatosmegəh ilat e nəwīrən rəhan, kən təməsolən e natimnat təwir mīn itəm ilat koatol. Məto okəmə təposmegəh ilat məto-inu ilat koatol natimnat wir mīn, kən nəwīrən itəm Uhgīn tətawte-in kəm ilat, in

tol pisin, kən sənəmə nat kit itəm in tətawte-in kəm ilat, in nətouən əm o rəhalat wək.

⁷?Kən tahro? Netənim tepət rəha Isrel kəmotegəs-in pik suatip rəha nuwamən mətuatip e niganəmti Uhgīn, mətō kəməsotosən. Mətō ilat itəm Uhgīn təmitəpun, kəmos. Mətō ilat rafin əh itəm kəməsotosən, Uhgīn təmol ilat məmə kotapəs nətōən rəhan nəghatən.

⁸Tahmen əm e itəm Naoa Rəha Uhgīn tatən məmə, “Kən mətōarus-pa u-roiu, Uhgīn təmol məmə nətəligən rəhalat tətəpīl əlu-alu, kən mol məmə niganəmtilat təpis, kən mol məmə matəlgilat talu.”

⁹Kən Kig Tefit təmən məmə, “Pəs rəhalat nagwənən tepət otuwa mahmen e noanikulu kit, itəm otohasin ilat, mol ilat kotən məmə natimnat rafin təwīr əm. Pəs rəhalat natimnat wīr okotuwa kəpiel kit rəha noh pikənən ne nalpīnən kəm ilat.

¹⁰Pəs niganəmtilat tapinəp məmə kosotəplanən nat, Pəs noankawilat təfaiu kitīəh o nəratən rəhalat namnun tikə.”

Suatip rəha Uhgīn o nosmegəhən Iaihlua min

¹¹?Kən ekətapəh min məmə, netəm Isrel kəmotoh pikən motiet motorin məmə okol kəsotətul minən? !Kəp! O rəhalat nəmkakīəhən, Uhgīn təmol suatip o nosmegəhən Iaihlua min məmə otol netəm Isrel kotetet netəm min əh, kən motolkeike rəhan nəwīrən.

¹²!Tol nəhlan, okəmə Iaihlua min kəmos nəwīrən rəha Uhgīn mətō-inu netəm Isrel kəmotapəs nosmegəhən rəha Uhgīn, kən netəm Isrel rafin itəm Uhgīn təmitəpun rəkis, nian ilat okotahatətə e Kristo, nəwīrən rəha Uhgīn otuwa mepət!

¹³Roiu iatəghat kəm itəmat Iaihlua min. Mətō-inu io aposol rəhatəmat Iaihlua min, io iatənwiwi rəhak wək

¹⁴məmə, io ekol mətə natimak min netəm Isrel kotetəhak ron, kən e nolən əh Uhgīn otosmegəh neen.

¹⁵Nian Uhgín tēməuhlin məntaan o netəm Isrel, kən in tēməmík Iaihlua min kəmotuwa iohlin min. Məto nian in otəmík netəm Isrel kotuwa min ron, inu in nat asol kit, tahmen e netəm kəmotimis kəmotəmegəh min.

¹⁶Okəmə netəmim kotələhəu kalin nəwitai pīret rəha nagwənən wi məmə rəha Uhgín, kən pīret apiəpiə, in min rəha Uhgín. Kən e nəghatən rəha nig, okəmə nəukətin rəha Uhgín, kən nelmin min, ilat min rəha Uhgín. Nəghatən u, nīpətin tēmə okəmə Epraham ne mipin min aupən, ilat rəha Uhgín, kən noanol min rəhalat, ilat min rəha Uhgín.

¹⁷Məto nelmi nig min neen rəha nasum-inən, Uhgín təmatgəhl rəkis, inu tahmen e netəmim neen rəha Isrel. Kən itəmat Iaihlua min, nəkotahmen e nelmi nig u olif əpnapin min e nīkinat. Uhgín təmilpin itəmat e nəukəti nig məmə nakoatos nəmelat, kən roiu nakoatos nəwirən itəm Uhgín təmən-iəkis kəm Epraham ne nətin min u in nəukəti nig.

¹⁸Məto itəmat Iaihlua min, nəsotəghat ausitən məmə Uhgín təmilpin itəmat e nig itəm təmatgəhl rəkis ikin, u tahmen e netəm Isrel neen. Sotaluinən məmə nəukəti nig tətəgwən itəmat, məto sənəmə itəmat nelmi nig nakotəgwən nəukəti nig.

¹⁹Kəm-naka suah kit otən məmə, “Uhgín təmatgəhl rəkis nelmi nig min neen məmə otīlpin io ekos nəmelat.”

²⁰In nīpahrienən, məto tətəgəhl rəkis ilat məto-inu kəsotahatətəən e Uhgín. Kən itəmat nakoatəper-ipən e nəukəti nig e nahatətəən əm rəhatəmat. Tol nəhlan, əsotəusitən ron, məto itəmat nəkotəkəike motəgin,

²¹məto-inu Uhgín təmatgəhl rəkis nelmi nig ətuatip neen nəhlan, kən okəmə nəkəsotəkəikeən o nosən nahatətəən əskasik lan, kən in otəgəhl rəkis itəmat.

²²Otətəlig-in nolən kərən mil rəha Uhgín kəm netəmim: in tatol təwir kəm neen, kən matələhəu nəghatən əskasik kəm neen min. In təmələhəu nəghatən əskasik o netəmim itəm kəmotəht nəwian, məto in tatol təwir kəm itəmat, okəmə nəkotəkəike motəhatətə lan o rəhan nəwirən. Məto okəmə nakotəpəs nahatətəən lan, kən in otəgəhl rəkis min itəmat.

²³Kən okəmә netәм Isrel kotitәlig-pa min kahatәtә e Uhgın, kən in otılpin min ilat e nәukәtin, mәto-inu tatos nәsanәнән o nolән nәhlan.

²⁴Kən nıpәti nәghatән u mәмә, itәmat Iaihlua min, itәmat nәkotahmen e nelmi nig u olif әnnapın әpәh e nıkinat itәм Uhgın tәмәte rәkis, kən mılpin-pән e nig u olif e nasumән rәhan. Nolән әh sәнәmә nolән әtuatıp kit rәha nig, o nilәsән nelmi nig pısın kit mılpin-pән e nig pısın kit. Mәto noanol min rәha Isrel, kotahmen e nelmi nig u olif әpәh e nasumән. Kən roiu tımәtig mәмә Uhgın otılpin min ilat e nәukәtilat әtuatıp.

Uhgın tәtasәkitun netәmim rafın

²⁵Piak min ne winık min. Iakolkeike mәмә nәkotıtun nat anıon u mәмә, itәmat nәsotılәs-ipәр pikән itәmat. Uhgın tәmol mәмә netәmim neen rәha Isrel kәmotapәs nәtoән rәhan nәghatән. Mәto nolән әh otәtatıg әh mәtoarus-pa Iaihlua min rafın itәм Uhgın tәmitәpun, ilat okotahatәtә lan.

²⁶Kən e nolән әh, Uhgın otosmegәh rafın netәм rәha Isrel. Tahmen әm e itәм Naoa Rәha Uhgın tatән mәмә, “Etәм otosmegәh netәmim otisi-pән e noanol rәha Isrel; in otos-irәkis nolән rat rәha noanol rәha Isrel.

²⁷Kən inu nәniәkisән rәha nasıtuән rәhak kәм ilat mәмә ekafәl rәkis tәfagә rat rәhalat.”

²⁸Noanol min rәha Isrel kәmotapәs namnusән tәwır rәha Iesu Kristo, kən tol nәhlan, ilat kәmotuwa tikimır min rәha Uhgın. Mәto nat u in o nәwırән rәhatәmat mәto-inu roiu, Uhgın tәmos-ipınә rәhan nәwırән kәм itәmat Iaihlua min. Mәto Uhgın tatolkeike әh netәм Isrel mәto-inu in tәmitәpun ilat, kән ilat nita rәha Epraham, Aısak, ne Jekop.

²⁹Tol nәhlan mәto-inu, nıan Uhgın tәmitәpun rәkis netәmim kән mol tәwır kәм ilat, okol in tәsәuhlin mınән rәhan nәtәligән.

³⁰Itәmat u Iaihlua min itәм aupән nәmoatәht nәwıa Uhgın. Mәto roiu, Uhgın tәmasәkitun itәmat mәto-inu netәм Isrel kәmotәht nәwıan.

³¹Kən e nolән ahmen-ahmen әm, netәм Isrel koatәht nәwıa Uhgın roiu, mәмә Uhgın titun nasәkitun mınән ilat. Tol nәhlan mәto-inu roiu ilat koatәplan

məmə Uhgín təmasəkitun itəmat, kən mətə ilat okotolkeike məmə Uhgín otol mihin min elat.

³²Netənim rafin koatəht nəwia Uhgín, kən in tatol məmə rəhalat nolən rat tətəskəlim ilat rafin agin, ko ilat atip kəsotikisən ilat. In təmol nəhlan məmə in titun nasəkitunən ilat rafin.

Nolən rəha Uhgín in təwir agin

³³!Otəplan-tu! !Nəwirən rəha Uhgín kəm netənim, ne nenatigən rəhan, ne nitunən rəhan, ilat rafin kotepət agin-əh! Kitat kotəruru nitunən nolən rəha netəligən rəhan, ne rəhan suatip min. Inu tahmen-pən əm e Naoa Rəha Uhgín itəm tatən məmə,

³⁴“Suah kit tikə itəm titun natimnat itəm tətətig e nətəligən rəha Uhgín. Kən suah kit tikə itəm in titun nos-ipənən nəghatən kit məmə otasitu e Uhgín.”

³⁵“Suah kit tikə itəm titun nos-ipən atipən rəhan kit nat kit kəm Uhgín mətə-inu, natimnat rafin agin rəha Uhgín rəkis.”

³⁶Tol nəhlan mətə-inu Uhgín təmol natimnat rafin, kən natimnat rafin koatətig mətə-inu nəsanənən rəhan tətəskəlim ilat, kən natimnat rafin in təmol məmə rəhan. !Pəs kitat kotos-ipən nənwiwiən kəm in tatuwin matuwin namnun tikə! Əwəh.

Rom 12

Sakrifais itəm nəmegəhən tətətig lan

¹Piak min ne winik min. Mətə-inu Uhgín təmasəkitun kitat, ekətapəh əskasik otəmat məmə nakotos-ipən nipətəmat rafin kəm Uhgín tahmen e sakrifais kit itəm tatəmegəh, kən nəmotələhəu kalin məmə rəhan, kən nikin tətəgien lan. Inu suatip ətuatip itəm onəkotəfak kəm Uhgín lan.

²Sotosən nolən rəha netənim e nətueintən, mətə otegəhan-in pəs Uhgín otəuhlin rəhatəmat nətəligən tuwa muwiwi məmə nolən rəhatəmat okotuwa motəwir. Kən tol nəhlan, itəmat onəkotitun nakilən, kən nitunən, kən nitəpunən nolən wir min itəm Uhgín tolkeike, inu nolən min itəm kotəwir, ne nolən min itəm kotol nikin tagien, ne nolən min itəm kotətuatip.

³Kən e nəwirən itəm Uhgīn tēmawte-in kəm io, iatən-ipinə kəm itəmat rafin mēmə sotiləs-ipər atipən nətəligən rəhatəmat. Məto e nətəligən ətuatip, otəplan nesanənən min itəm Uhgīn təmos-ipinə kəm itəmat e nahatətəən rəhatəmat e Kristo. Kən nian nəkotəplan nesanənən min əh, otəplan rəhatəmat nolən min, kən motakil motəplan mēmə rəhatəmat nolən min kotəwir motahmen katətəu-pən rəhatəmat nahatətəən, o kəp.

⁴Suah kit nīpətīn kitiəh əm, məto tatos nolīn-olīn tepət, kən nolīn-olīn nīpətīn min əh, rəhalat əh-ikin wək pīsīn pīsīn min itəm koatol.

⁵Kən tahmen-pən əm e netəm koatahatətə e Kristo. Kitat tepət, məto kotuwa nīpətīn kitiəh əm lan, kən motagīle atip əm e kitat min.

⁶Kən Uhgīn təmos-ipa nesanənən o nolən wək pīsīn pīsīn min tətəu-pən nəwirən rəhan itəm tēmawte-in kəm kitat. Uhgīn tatos-ipən kəm suah kit nesanənən o nən-iarəpən nəghatən rəhan itəm in tatos-ipən ətuatip kəm in. Kən pəs suah u otən-iarəp nəghatən min əh tətəu-pən nahatətəən rəhan.

⁷Okəmə suah kit tatos nesanənən o nasituən, pəs in tasitu; okəmə in tatos nesanənən o nəgətunən, pəs in təgətun;

⁸okəmə in tatos nesanənən o nīləs-ipərən nətəligən, pəs in tīləs-ipər; okəmə in tatos nesanənən o nos-ipənən mēni, pəs in tos-ipən tepət; okəmə in tatos nesanənən o nitən niməfak, pəs in tol e nīkin rafin; okəmə in tatos nesanənən o nasəkitunən, pəs in tol e nīkin agien.

Suatip reha nolkeikeən netənim

⁹Nolən rəha nolkeikeən rəhatəmat o netənim, təkəike muwa nolkeikeən pahrien. Otətəhau nolən rat min, kən motaskəlīm əskasik nolən wir min.

¹⁰Otolkeike itəmat min tahmen mēmə itəmat piatəmat ne winitəmat min. Itəmat kitiəh kitiəh nakotalkut pik mēmə onəkotisiai-in itəmat min.

¹¹Otəkəike nian rafin o nolən wək rəha Uhgīn e nīkitəmat rafin məsotəpouən, tahmen e nīgəm tatuəp.

¹²Otagien mæto-inu næmotələhəu-pən əskasik rəhatəmat nətəligən e Uhgîn. Kən nian nəratən tatuwa, otol rəhatəmat nətəligən təfəməh. Kən motəghat kəm Uhgîn e nəfakən nian rafin.

¹³Otawte-in kəm netəmim rəha Uhgîn nat naka itəm rəhalat tikə. Otəkəike motol təwir kəm iapispis min itəm koatuwa imatəmat ikin.

¹⁴Otətapəh o Uhgîn məmə otol nəwirən kəm netəm koatol nəratən kəm itəmat. Sotaun-inən nəratən tuwa olat, mæto otətapəh o Uhgîn məmə otol nəwirən kəm ilat.

¹⁵Otagien itəmat netəm koatagien. Kən otasək itəmat netəm koatasək.

¹⁶Otol rəhatəmat nətəligən tahmen-ahmen əm etəmat rafin, nikitəmat təsəhtən məmə itəmat neen ilis, mæto nikitəmat otagien əm nakotan kələh əm itəmat netəm u ləhau. Nikitəmat təsəhtən məmə nakotenatig wir.

¹⁷Okəmə suah kit tatol tərat kəm itəmat, əsotalpinən rəhan nolən. Onəkotəkəike motalkut məmə nəkotol nolən itəm netəmim rafin okotəplan məmə tətuatip.

¹⁸Otol natimnat rafin itəm nəkotitun nolən məmə itəmat nəkotatig e nəməlinuən itəmat netəmim rafin.

¹⁹Piak min ne winik min. Sotalpinən nitai təfagə rəha suah kit, mæto otapəs əm məmə Uhgîn otəpanələhəu nalpinən ne neməha kəm in, mæto-inu e Naoa Rəha Uhgîn, İərəmərə tatən məmə, “In rəhak pisin əm wək o nalpinən nitai təfagə. Io ekol nəhlan.”

²⁰Mæto itəmat nəkotol əm məmə Naoa Rəha Uhgîn tatən mihin məmə, “Okəmə rəham tikimir nəumis tatus, os-ipən nagwənən kəm in; okəmə in tatoaoa, os-ipən nat kit kəm in tənim. Nian natol natimnat min u, in otaulis pik lan.”

²¹Sotegəhan-inən məmə nolən tərat otətoarus itəmat miləs-iəhau itəmat, mæto otol məmə rəhatəmat nolən təwir otiləs-iəhau nolən tərat.

Rom 13

Nərəmərəən rəha kapman

¹Pəs kitat rafin okotəkəike katig ahgin kapman, məto-inu nepətən o nərəmərəən rafin tatisi-pən e Uhgin, kən kapman rafin itəm kotatig, Uhgin pisin əm tatiləs-ipər.

²Kən tol nəhlan, okəmə suah kit tatəht nəwia kapman, in tatəht nəwia nat itəm Uhgin təmələhəu, kən netəmim itəm koatol nəhlan, koatiuw-pa nalpinən olat.

³Tol nəhlan məto-inu kapman itəm Uhgin təmələhəu təsolən netəmim itəm koatol nolən wir kotəgin, məto tatol əm o netəm koatol nolən rat. Okəmə nəsolkeikeən məmə nəkotəgin netəm-iasol min rəha kapman, nəkotəkəike motol nolən wir min, kən ilat okotiləs-ipər itəmat ron.

⁴Sotaluinən məmə ilat iolwək min rəha Uhgin itəm wək rəhalat məmə ilat okotol təwir kəm itəmat. Məto okəmə nəkotol tərət, nəkotəkəike motəgin, məto-inu ilat koatos nəsanənən o nolən nalpinən. Ilat iolwək min rəha Uhgin itəm otol neməha ne nalpinən rəha Uhgin kəm netəm koatol tərət.

⁵Tol nəhlan, kitat rafin okotəkəike motatig ahgin kapman o nat kəiu. Kit u məmə kitat okəsotosən nalpinən, kən kit min u, məto-inu kotitun məmə in nolən ətuatip.

⁶Kən o nat kitəh əm, otətou-pən takis kəm kapman, məto-inu netəm-iasol rəha kapman, ilat nolwək rəha Uhgin, kən inu wək rəhalat.

⁷Otos-ipən kəm netəmim rafin, natimnat itəm tətuatip məmə onəkotos-ipən. Okəmə in takis pisin pisin min, nəkotəkəike kətou ilat. Okəmə in nisiaiən, otisiai-in ilat. Okəmə etəm tatos nərəmərəən, kən otatig ahgin.

Nolkeikeən

⁸Nəkotəkəike motətou rəhatəmat kaon min. Məto kaon kitəh əm tatəkəike mətatig otəmat, inun kaon rəha nolkeikeən itəmat min, kən nəkotəkəike motətou nian rafin, namnun tikə, məto-inu etəm tolkeike in kit, in tatol natimnat rafin itəm Lou tatən.

⁹Lou tatən məmə, “Sotakläh-inən pətan,” “Sohamnuən etəmim,” “Saklähən,” “Nikim təsuwinən e natimnat rəha suah kit,” kən lou neen min əh-ikin. Məto nəghatən kitiəh əm in nəukətilat rafin, in tatən məmə, “Olkeike ik kit tahmen əm məmə natolkeike atip ik.”

¹⁰Okəmə suah kit tolkeike in kit, okol təsolən nəratən kəm in. Kən tol nəhlan, etəmim itəm tatolkeike netəmim, in tatol nipəti Lou rafin koatuwa motol nipahrienən.

Nolən ətuatip o nian rəha namnun nian

¹¹Nəkotəkəike motol nəhlan məto-inu itəmat nəkotitun wir nian koatatig lan u-roiu. Nian tinatuwa məmə nəkotəkəike motaiir məsotapilən, məto-inu nosmegəhən rəhatat tinatuwa iuəhkir, maprəkis-in nian kitat kinotahatətə.

¹²Napinəpən otəsuwəhən tikə, kən nəhag-əhagən otəsuwəhən tuwa. Kən tol nəhlan, pəs kotapəs nolən rəha napinəpən, kən motaskəlim nolən wir min rəha nəhag-əhagən tahmen-pən e mopael kit itəm tətəskəlim wir rəhan naip rəha nəluaginən.

¹³Pəs kitat kotol nolən wir min, tahmen e netəmim itəm kotaliwək e nəhag-əhagən kən netəmim koatəplan. Okəsotolən lafet rat min, məsotapisən, məsotit əpnəpin itəmat min, kən məsotolən nolən alməl min, məsotərgəhəuən, məsotetətən kitat min.

¹⁴Məto otegəhan-in məmə İərəmərə İesu Kristo otərəməərə e nəmegəhən rəhatəmat, kən otapəs nətəlig-inən suatip min o nolən təfagə rat min itəm nətəligən rat rəhatəmat tolkeike.

Rom 14

Nəghatən rəha netəm min u itəm rəhalat nahatətəən təsəskasikən

¹Nikitəmat tətəgien əm məmə nakotos iəfak min neen kotuwa motəplan itəmat, nat əpnəpin rəhalat nahahtətəən təsəskasikən, kən motəruru okəmə niki Uhgin təsəgienən o kəp, o nolən min neen itəm netəmim neen koatən-iəhau. Nakotos ilat kotuwa, məto esolkeikeən məmə nakotərgəhəu o nətəligən min rəhalat.

- ²Etənim kit, e rəhan nahatətəən, təwir əm məmə in otun nagwənen rafin. Məto etənim kit min, rəhan nahatətəən təsəskasikən, kən nikin təht məmə in titun nunən nagwənen e nasumən əm, mapəs nunən mit.
- ³Etənim u itəm titun nunən natimnat rafin, təsəwirən məmə in otəplan rat etənim itəm təsunən natimnat rafin. Kən etənim itəm təsunən natimnat rafin, təsəwirən məmə in otən kəm etənim itəm tatun natimnat rafin məmə, in tatol nolən rat, məto-inu Uhgın nikin tagien əm ron.
- ⁴Təsəwirən məmə ik natən məmə iolwək rəha suah kit min təmol nolən tərət. Rəhan atip əm iərəməərə otən məmə təmol təwir o tərət. Kən in otol təwir məto-inu İərəməərə titun nos-ipənən nəsanənən kəm in o nolən nat wir min.
- ⁵Suah kit in tən məmə nian kitiəh əm in rəha Uhgın taprəkis-in nian rafin, məto suah kit min tən məmə nian rafin kotahmen-ahmen əm. Məto etənim otəkəike mətul əskasik o rəhan nətəligən e nat u.
- ⁶Etənim kit itəm tatən məmə nian kitiəh əm in rəha Uhgın, in tatol o niləs-ipərən İərəməərə. Kən etəm tatun mit, tatun o niləs-ipərən İərəməərə, məto-inu tatən kəm Uhgın məmə nikin tagien o nigın nagwənen. Kən etəm tapəs əm nunən mit, in min tapəs nunən o niləs-ipərən İərəməərə, kən in min tatən kəm Uhgın məmə nikin tagien o nigın nagwənen.
- ⁷Suah kit təsərəməərə-atipən e nəmegəhən rəhan, nat ənnapın in tatəmegəh, o in təmimis.
- ⁸Okəmə kitat koatəmegəh, koatəmegəh o niləs-ipərən İərəməərə, kən okəmə kotimis, kəmotimis o niləs-ipərən İərəməərə. Kən tol nəhlan, okəmə koatəmegəh o kəmotimis, kitat rəha İərəməərə.
- ⁹Kristo təmimis matig məmegəh min, məmə in İərəməərə rəha netəm koatəmegəh ne netəm kəmotimis rəkis.
- ¹⁰Kən təsəwirən məmə nakən nikali iəfak kit min məmə təmol nolən tərət e natimnat min əh. Kən təsəwirən məmə nakehm-əhau piam, məto-inu kitat rafin okotətul aupən e nigənəmti Uhgın məmə in otakil kitat.

¹¹Tahmen e Iərəmərə tatən e Naoa Rəha Uhgīn məmə, “Inu nīpahrienən, tahmen məmə in nīpahrienən məmə iatəmegəh, netəmim rafin okotisin nulilat kəm io, kən netəmim rafin okotən-iarəp e nohlilat məmə io, io Uhgīn.”

¹²Kən tol nəhlan, kitat rafin kitiəh kitiəh okotətul e niganəmti Uhgīn o nən-iarəpən natimnat itəm kəmotol.

¹³Tol nəhlan, pəs kotapəs nolən rəha nənən nīkali suah kit məmə rəhan nolən in təfagə rat kit. Məto pəs kotən məmə okəsotolən nat kit itəm otol piətət kit təme e rəhan nəmegəhən.

¹⁴Io emuwa kitiəh itimlau Iərəmərə Iesu, kən o nat u, io ekītun wir məmə nagwənən rafin kotəwir o nunən, kəsotolən suah kit tamkimik e niganəmti Uhgīn. Məto okəmə suah kit nīkin təht məmə nat kit tamkimik e niganəmti Uhgīn, nat əh tamkimik atip əm ron.

¹⁵Okəmə piam kit tatəto tərət pik o nat kit itəm nəmūn, kən nəsalīwəkən e suatip rəha nolkeikeən. Əsolən məmə nat nakatun tatərəkīn piam kit itəm Kristo təmimīs ron.

¹⁶Əsegəhan-inən məmə nat kit itəm ik nakən məmə in təwir, okəghat-in məmə in nat tərət.

¹⁷Tol nəhlan məto-inu nərəmərəən rəha Uhgīn sənəmə nat rəha nagwənən ne nənīmən, məto in nat kit rəha nətuatipən e niganəmti Uhgīn, ne nəməlinuən, ne nagienən e Narmin Rəhan,

¹⁸məto-inu suah kit itəm tatol wək kəm Kristo e nolən əh, in tatol niki Uhgīn tətāgien, kən netəmim koatehm in məmə in etəm təwir, kən nīkilat tagien əm ron.

¹⁹Kən tol nəhlan, pəs kitat kotalkut pik o nolən nat itəm tatuwin o nəməlinuən, kən tatiləs-ipər nətəlīgən rəhatat rafin.

²⁰Əsərəkīnən wək rəha Uhgīn o nagwənən əm. Nagwənən rafin kotəwir, məsotamkimikən e niganəmti Uhgīn. Məto suah kit tatol təfagə rat nian in tatun nat kit itəm tol pian tatəme lan e rəhan nəmegəhən.

²¹Kən tol nəhlan, təwir məmə nəsotunən mit, o nənimən wain, o nolən nat kit min itəm otol piatəmat otəme e nəmegəhən rəhan.

²²Kən okəmə itəmat nakotos nətəligən kit o natimnat min u, otaskəlim anion əm itəmat Uhgın. Suah kit tətətig e nəwirən pahrien nian in tatol əm natimnat itəm in titun məmə tətətip məmə in otol.

²³Məto etənim itəm rəhan nətəligən tatol kəiu o nat itəm tatun, məmə in tətətip o nunən o kəp, təwir məmə in təsunən. Məto okəmə in tatun, Uhgın otən nolən rəhan in təfagə rat, məto-inu in tatun, məto nikin təsəhtən məmə in nat ətuatip, rəhan nolən təsətulən e nahatətən. Kən okəmə suah kit tatol nat kit itəm nikin təht məmə in tərat, in tatol təfagə rat.

Rom 15

Niləs-ipərən nətəligən rəha iəfak pişin pişin min

¹Kitat neen, nahatətən rəhatat təkəsik, kən kitat kotitun məmə nat əlkələh min əh, ilat nat əpnapin əm. Məto okol kitat kəsotəkəikeən o nolən natimnat min əh məmə nikitat tətəgien lan. Nikitat təkəike məht piətət min ne winitat min itəm rəhalat nətəligən kəiu e natimnat min əh.

²Kitat okotəkəike motol nolən itəm otol niki netəm pişin tagien lan, məmə otasitu elat, mol nahatətən rəhalat tuwa məskəsik.

³Pəs kotol nəhlan məto-inu Kristo min, in təməsolən nolən kit məmə in atip nikin otagien lan. Məto in təmol natimnat rafin agin itəm Uhgın nikin tolkeike, kən o natimnat min u, netənim kəmotən rat in ron. Inu tahmen e Naoa Rəha Uhgın tatən məmə, “Nən ratən min itəm netəm pişin pişin min koatol lam, koatuwa ron io.”

⁴Natimnat min əh itəm kəməte aupən e Naoa Rəha Uhgın, kəməte min məmə otəgətun kitat, məmə okotələhəu-pən əskəsik nətəligən rəhatat e Uhgın. Kən kitat kotitun nolən əh məto-inu koatətul əskəsik e nian iəkis min, kən Naoa Rəha Uhgın tatiləs-ipər nətəligən rəhatat.

⁵Uhgın pişin əm tətəsitə etat məmə koatətul əskəsik e nian iəkis min, kən in pişin əm tatiləs-ipər nətəligən rəhatat. Kən roiu, iatətapəh ron məmə in

otasitu etəmat e nətəligən rəhatəmat məmə otuwa mol kitiaħ əm, tahmen əm e nolən rəha Kristo Iesu.

⁶Kən iakətapəh nəhlan otəmat rafin itəm noatos nətəligən kitiaħ əm, məmə nəwiatat titun nuwamən mahmen e nəwia suah kitiaħ əm o niləs-ipərən nərgi Uhgın, itəm in Uhgın ne Tata rəha İərəmərə rəhatat Iesu Kristo.

⁷Otos iəfak min neen e nikin agien məmə okotuwa motəplan itəmat, tahmen əm məmə Kristo təmos itəmat e nikin agien. Otol nəhlan məmə netəmim okotənwiwi Uhgın lan.

⁸Sotaluinən nat u məmə, Kristo təmuwa iolwək rəha netəm Isrel məmə otəgətun məmə Uhgın tatol rəhan nəghatən, nəghatən inu məmə nəniəkisən min rəhan kəm tıpi netəm Isrel aupən, ilat kəmotuwa nıpahrienən.

⁹Kən təmuwa məmə İaihluə min okotənwiwi Uhgın o rəhan nasəkitunən, tahmen e Naoa Rəha Uhgın tatən məmə, “Tol nəhlan, oekiləs-ipər nərgəm e niki İaihluə min, oekan napuən min mənwiwi nərgəm.”

¹⁰Kən tatən min məmə, “Otagien, İaihluə min, itəmat rəhan min netəmim.”

¹¹Kən tatən min məmə, “İtəmat İaihluə min otənwiwi İərəmərə, kən itəmat rafin noanol min rəha nətueintən otənwiwi in.”

¹²Kən Aesea tatən min məmə, “Noanol rəha Jese aupən otər min kən Uhgın otıləs-ipər in məmə otərəmərə e noanol min rəha nitən min rafin. Kən İaihluə min okotələhəu-pən əskasik nətəligən rəhalat lan.”

¹³Uhgın təmasitu o kitat məmə okotələhəu-pən əskasik rəhatat nətəligən lan. Pəs in otol məmə nikitəmat otər marioah e nagienən ne nəməlinuən nian nakoatahatətə lan məmə, e nəsanənən rəha Narmin Rəha Uhgın, onakoatələhəu-pən əskasik pik təhmin rəhatəmat nətəligən e Uhgın.

Pol in aposol rəha İaihluə min

¹⁴Piak min ne winik min. Ekitun wir məmə nəmegəhən rəhatəmat təmər marioah e nəwirən, kən nəmos nitunən rafin, kən nəkotahmen o nəgətunən itəmat min.

¹⁵Mæto e naoa u rəhak, eməsəhluaig-inən nat kit, emən-iarəp e nīkik rafin natimnat min u kəm itəmat, kən molkeike məmə nīkitəmat otəkəike matəht nəghatən min əh. Tətuatip əm məmə iatəghat nəhlan, mæto-inu Uhgīn tēmasitu lak e rəhan əm nəwīrən

¹⁶məmə io ekuwa iolwək rəha Kristo Iesu o nən-iarəpən namnusən təwīr kəm Iaihlua min. Io ekahmen e pris kit itəm iatən-iarəp namnusən təwīr rəha Uhgīn məmə, Iaihlua min itəm koatahatətə e Kristo, okotuwa presen wīr min itəm Narmin Rəha Uhgīn təmələhəu kalin məmə rəha Uhgīn, kən Uhgīn nīkin tagien o nosən.

¹⁷Kən e wək rafin itəm iatol o Uhgīn, iatəghat ausit mæto-inu in Kristo Iesu əm itəm tatol wək.

¹⁸Ko esəghat ausitən o nat kit min, ekəghat ausit əm o natimnat wīr itəm Kristo təmōl nian emol rəhan wək o nīləsən Iaihlua min kotuwa motol nəwīa Uhgīn. Kristo təmōl wək e rəhak nəghatən, ne rəhak nolən min,

¹⁹kən təmōl wək e nəsanənən rəha nəmtətīn min ne nat pīspīs min, kən təmōl ilat rafin e nəsanənən rəha Narmin Rəha Uhgīn. Kən tol nəhlan, emən-iarəp rafin namnusən təwīr rəha Kristo, təmətuoun Jerusalem muwīn mætoarus-pən kantri u Ilirikam.

²⁰Nian rafin e nətuounən rəhak wək mætoarus-pa u-roiu, ematolkeike məmə ekuwīn mən-iarəp namnusən təwīr e ikin min neen itəm kəsəto-agīn-əhən nərgi Kristo ikin. Esolkeikeən məmə ekol wək e ikin kit itəm suah kit tinuwīn rəkīs ikin mən-iarəp namnusən təwīr.

²¹Mæto tahmen əm e Naoa Rəha Uhgīn itəm tatəghat-in Kristo məmə, “Netəmim itəm kəsən-iarəpən namnusən təwīr kəm ilat, ilat okotəplan in, kən netəmim itəm kəsotətoən əh namnusən təwīr, ilat okotitun.”

²²Nian tepət, wək u rəhak o nuwīnən ik pīsīn pīsīn min tətəhtosīg-in io o nīmənən məplan itəmat.

Nətəligən rəha Pol o nuwīnən Rom

²³Mæto roiu, rəhak wək ikin-u tinol namnun, kən e nup tepət rəkis, iakolkeike pik məmə ekimnə məplan itəmat,

²⁴kən tol nəhlan, nīkik tatəht məmə ekimnə məplan itəmat nian ekuwīn əpəh kantri u Spen. Kən nian ekimnə kotaulim o nian əkuəkīr əm, kən iakolkeike məmə nakotasitu lak e rəhak naliwəkən.

²⁵Mæto roiu, iatuwīn Jerusalem o nasituən e iəfak mīn əh-ikin,

²⁶mæto-inu iəfak mīn əpəh kantri mil u Masetonia ne Akaea, nīkilat təmagien o nos-ipamən rəhalat mənī məmə ekasitu e ian-rat mīn e nīməfak əpəh Jerusalem.

²⁷Nīkilat təmagien əm o nolən, kən in tahmen e iehl kit itəm noanol rəha Isrel kəmotol kəm ilat. Tol nəhlan mæto-inu okəmə Iaihlua mīn kəmos nəwīrən rəha Uhgīn e suatip rəha netəm Isrel, kən Iaihlua mīn okotəkəike motasitu e netəm Isrel e rəhalat mənī.

²⁸Oekos mənī itəm ilat kəmos-ipa, muwīn mos-ipən kəm iəfak mīn əpəh Jerusalem. Kən nian emol namnun wək u, kən ekiet Jerusalem muwīn əpəh kantri u Spen, kən e rəhak naliwəkən oekimnə məplan itəmat.

²⁹Nian ekuwa mītəlau imatəmat ikin, ekītun məmə iatos natīmnat wīr tepət e Kristo məmə ekos-ipinə kəm itəmat, kən itəmat onəkotəto təwīr lan.

³⁰Piak mīn ne wīnīk mīn, mæto-inu kitat koatahatətə e Iərəmərə rəhatat Iesu Kristo, kən Narmin Rəha Uhgīn tatol məmə kitat koatolkeike kitat mīn, ekətapəh əskasik otəmat məmə nəkoatəfak ron io kəm Uhgīn, kən e nolən əh, nakotasitu lak e nəluaginən rəhak.

³¹Otəfak məmə Uhgīn otasitu lak mahtosig-in netəm Jutia itəm kəsotənən nīpahrienən e namnusən təwīr məmə, okəsotərəkinən io. Kən otəfak mīn məmə nian ekuwīn mīet-pən Jerusalem, netəm mīn u koatahatətə e Kristo, nīkilat otagien o rəhak wək.

³²Kən e nolən əh, okəmə Uhgīn tolkeike mihin, ekimnə məplan itəmat e nagianən, kən kitat rafin agin-əh, nīkitat otagien.

³³Pæs Uhgín itəm in nœukæti nœmœlinuæn tœtatig itœmat min. Œwœh.

Rom 16

Pol tœtauiatipin in min neen

¹Io iatœn-ipinœ kœm itœmat mœmœ winitat u Fipi, itœm tatos wœk rœha dikœn e nimœfak œpœh Kegkria, in pœtan wir kit.

²Iakœtapœh otœmat mœmœ nian in otimnœ, onœkotagien œm ron e nœrgi Iœrœmœrœ rœhatat, e nolœn itœm in tœtuatip mœmœ netœmim rœha Uhgín okotol mihin. Okœmœ rœhan nat kit tikœ, tœwir mœmœ nakotasitu lan, mœto-inu in tœmasitu lak ne netœmim tepœt.

³Otœn tœwir kœm Prisila ne Akwila, itœm itimœhal emœtœhalol wœk kitœh rœha Kristo Iesu.

⁴Iuœhkœr kiamis o nasituœn lak. Sœnœmœ io pisin œm, mœto io ne Iaihluœ min rafin u koatœfak, itimat ekotœnwiwi Uhgín olau.

⁵Kœn otœn tœwir kœm nimœfak itœm kœmotuœfimœn e rœhalau nimœ. Otœn tœwir kœm io kit u Epaenetas, u itœm tœmaupœn mahatœtœ e Kristo e profens œpœh Esia.

⁶Otœn tœwir kœm Meri itœm tœmatol pik wœk otœmat.

⁷Otœn tœwir kœm Antronikas ne Junias, natimak mil itœm itimœhal min ilau emœhaluwœn e kalapus. Aposol min koatisiai-in pik ilau, kœn ilau kœmuaupœn-in io muahatœtœ e Kristo.

⁸Otœn tœwir kœm Ampliatas, itœm iakolkeike e nolkeikeœn rœha Iœrœmœrœ.

⁹Otœn tœwir kœm Urpanas, itœm kitat koatol wœk kitœh e Kristo, kœn otœn tœwir kœm io kit u Stakis.

¹⁰Otœn tœwir kœm Apeles itœm tœmœtul œskasik e Kristo e nian iœkis min. Otœn tœwir kœm Aristopolas ne noanol min rœhan, ne rœhan iolwœk min.

¹¹Otœn tœwir kœm Herotian, rœhak œtuatip. Otœn tœwir kœm Nasisas ne rœhan min, ne rœhan iolwœk min itœm koatœfak kœm Iœrœmœrœ.

¹²Otən təwir kəm Trifaena ne Trifosa, pətan mil itəm kətioal pik wək rəha İərəmərə. Otən təwir kəm io kit u Persis, pətan kit min itəm tatol pik wək rəha İərəmərə.

¹³Otən təwir kəm Rufas, iəfak wir kit rəha İərəmərə, ne rəhan mama itəm təmatol təwir kəm io tahmen e rəhak ətuatip mama.

¹⁴Otən təwir kəm Asigkritas, ne Filegon, ne Heremes, ne Patropas, ne Heremas, ne piatat min itəm ilat min koatətiğ.

¹⁵Otən təwir kəm Filolokas, ne Julia, ne Nereas ne winin, ne Olimpas, ne iəfak min rafin itəm ilat min kotatig.

¹⁶Otən təwir kəm itəmat min tahmen məmə itəmat kitiəh əm e Kristo. Niməfak rafin rəha Kristo koatən təwir kəm itəmat.

¹⁷Piak min ne winik min. İakətapəh əskasik otəmat məmə nakoatəto wir itəmat o netəm koatol məmə nakotəhap itəmat min, kən koatəgətun natimnat itəm koatol netəmim koatakia e nahatətəən rəhalat, kən nəgətunən əh tol pişin ağin e nəgətunən itəm nəmotos rəkis. Otətul isəu olat,

¹⁸məto-inu netəm kotol nəhlan, ilat kəsotolən wək rəha İərəmərə Kristo, məto koatol wək əm o nat nişətilat tolkeike. İlat koatən wir nəghatən, kən nəghatən rəhalat tətəhen, kən ilat koateiuə, kən matərəkin nətəliğən rəha netəmim tepət itəm kotəruru nat.

¹⁹Netəmim kinotəto rəkis namnusən məmə itəmat nəkoatol nəwia Kristo. Tol nəhlan, nikik tagien pik otəmat. Məto iakolkeike pik məmə nakotenatig e nolən ətuatip min, kən məmə nəsotuwinən e nolən rat min.

²⁰Uhğin itəm nəukəti nəməlinuən, otəsuwəhən in teguətain Setan, kən in otatig əm ləhau e nelkitəmat. Pəs nəwirən rəha İərəmərə İesu tətətiğ itəmat min.

²¹Timoti itəm itimlau min etioal wək kitiəh, tatən təwir kəm itəmat. Kən Lusias, ne Jeson, ne Sosipata u natimak min, kəhalən min təwir kəm itəmat.

²²Io Tesias, itəm eməte nəghatən rəha Pol e naoa u, io iatən təwir kəm itəmat u kitat kitiəh e Iərəmərə.

²³⁻²⁴Kaeas tatən təwir kəm itəmat. Io Pol, ekətatig e rəhan nimə, kən netəm rəha niməfak kotuəfimin iman ikin. Erastas u etəm tatərəmərə e mənī rəha taon əh, ne piatat Kuartas, ilau min katuən təwir kəm itəmat.

²⁵Pəs kotənwiwi Uhgīn. In titun nolən məmə itəmat nəkoatətul əskasik e nahatətəən rəhatəmat. In otol nəhlan e namnusən təwir rəha Iesu Kristo itəm iatən-iarəp. Nəghatən u təməhluaig nuwəh rəkis,

²⁶məto roiu, təmol əp in. Kən in Uhgīn u itəm tatəmegəh nian rafin, kən in təmən məmə ekotən-iarəp namnusən rəha Kristo itəm ien min aupən kəmotəte e naoa min rəhalat, kən netəmim okotitun. Ekotən-iarəp məmə noanol min rafin e nətueintən, pəs ilat okotahatətə e Uhgīn, kən tol nəhlan moatol əm nəwian.

²⁷Uhgīn pisin əm in Uhgīn, kən in pisin əm in tenatig. !Pəs kotənwiwi Uhgīn nian rafin namnun tikə, o nat itəm Iesu Kristo təmol! Əwəh.

1 Korin

1 Korin 1

Pol tēmən təwir kəm ilat

¹Io Pol, itəm Uhgin tēmaun-in kən mītəpun e nəwian məmə io aposol rəha Kristo Iesu, iatəte naoa u itimlau piətət Sostenes.

²Naoa u tatimnə kəm itəmat niməfak rəha Uhgin əpəh Korin, itəmat itəm Uhgin təmələhəu kalin məmə rəhan min e Kristo Iesu, kən tēmaun-in itəmat məmə rəhan min, itəmat min netəm e ikin min rafin itəm koatəfak kəm Iərəməərə rəhatat Iesu Kristo itəm in Iərəməərə rəhatat rafin.

³Pəs Uhgin Tata rəhatat ne Iərəməərə Iesu Kristo, okuawte-in nəwiran ne nəməlinuən kəm itəmat.

Pol tēmənwiwi Uhgin e nəfakən

⁴Nian rafin iatən kəm Uhgin məmə nikik tagien otəmat mətə-inu təmawte-in rəhan nəwiran kəm itəmat e Kristo Iesu.

⁵Təmawte-in rəhan nəwiran u tepət kəm itəmat e nolən min rafin, e nasituən o nən-iarəpən ne nitunən nəghatən rəhan.

⁶Təmol nəhlan mətə-inu, nəmotəplan məmə namnusən e Kristo in nipahrienən.

⁷Tol nəhlan, nian nəkoatətul matip moatəsahgin nuwamən rəha Iərəməərə rəhatat Iesu Kristo, Uhgin tatos-ipinə kəm itəmat rəhan nəsanənən e Narmin o nolən wək rəhan, nəsanənən rafin min əh itəm kotətuatip o nəmegəhən rəhatəmat.

⁸Kən in otol itəmat nəkoatətul əskasik mətəarus-pən namnun nian məmə okəsehm-pənən nolən rat kit etəmat e Nian rəha Iərəməərə rəhatat Iesu Kristo, itəm tatuwa min lan.

⁹Kən Uhgin otol nat u kəm itəmat mətə-inu nian rafin in tatol rəhan nəghatən. In Uhgin itəm tēmaun-in itəmat nakotuwa kitəh itəmat Nətin Iesu Kristo u Iərəməərə rəhatat.

Netəmim rəha niməfak kəmotəhap ilat min

¹⁰Iatətapəh əskasik otəmat, piak min ne winik min, e nərgi İərəmərə İesu Kristo, məmə itəmat rafin nakotətəlig-in itəmat min, məsotolən məmə nətəligən kit otuwa məhap itəmat, kən məto nakotuwa pahrien kol kitəh e nətəligən ne nikin kitəh.

¹¹Piak min ne winik min, iatən nəhlan məto-inu netəmim neen rəha Kloə kəmotən-iarəp kəm io məmə itəmat nakoatərgəhəu.

¹²Nipəti nəghatən itəm iatən tol nulan, itəmat neen kotəmə, “İtimat ekoatuarisig-in Pol,” neen kotəmə, “İtimat ekoatuarisig-in Apolos,” neen kotəmə, “İtimat ekoatuarisig-in Pita,” neen min kotən məmə, “İtimat ekoatuarisig-in Kristo.”

¹³?Nikitəmat təht məmə nəkotitun nəhap-əhapən nulan Kristo? ?Nikitəmat təht məmə io Pol eməkul e nig kəməluau otəmat? ?O kəmol baptais etəmat neen e nərgi Pol?

¹⁴Io iakən tagkiu kəm Uhgın məmə io eməsolən baptais etəmat kit, məto emol baptais əm e Krispas ne Kaeas.

¹⁵Nikik tagien nəhlan məto-inu suah kit okol təsənən məmə kəmol baptais lan e nərgək.

¹⁶Ei, emaluin, emol baptais min e Stefanas ne rəhan min. Uarisig e itəm əh, emaluin okəmə emol baptais min e suah kit o kəp.

¹⁷Nipəti nəghatən min u məmə, Kristo təsahl-ipamən io məmə ekol baptais e netəmim, məto təmahl-ipa io məmə ekən-iarəp əm namnusən təwir. Kən esən-iarəp əmən e nitunən rəha etəmim məto-inu, esolkeikeən məmə nəghatən e nimisən rəha Kristo e nig kəməluau in otoigoig.

¹⁸Tol nəhlan məto-inu, nəghatən e nimisən rəha Kristo in toigoig malməl o netəm u koatitəp suatip rəha nuwinən e nigəm asol, məto o kitat itəm Uhgın tatosmegəh kitat, in nəsanənən əm rəha Uhgın.

¹⁹Kən Naoa Rəha Uhgín tatən məmə, “Io ekərəkin agin nenatigən rəha netəm kotenatig, kən mahtosig-in nitunən rəha netəm kotitun pik nat.”

²⁰?Netəm kotenatig hiə? ?Iəgətun min rəha Lou hiə? ?Netənim itəm kotitun wir suatip rəha nəghatən hiə? Uhgín təmol nenatigən rəha nətueintən tinuwa rəkis nalməl əmən.

²¹Tol nəhlan məto-inu, e nenatigən rəha Uhgín, təmol məmə netənim rəha nətueintən okəsotitunən in e nenatigən əm rəhalat. Məto in təmol məmə nəghatən alməl min rəhatimat otosmegəh netənim itəm koatən nīpahrienən lan.

²²Noanol min rəha Isrel koatətapəh-in nat pispis min, kən Iaihlua min koategəs-in nenatigən məmə okotəplan Uhgín,

²³məto kitat koatən-iarəp əm nimisən rəha Kristo e nig kəməluau, kən nəghatən u in tahmen e kəpiel e suatip itəm tatol noanol min rəha Isrel koatəme, kən in tahmen e nalmələn kəm Iaihlua min.

²⁴Məto o netəm min un itəm Uhgín təmaun-in ilat, noanol min rəha Isrel neen ne Iaihlua min neen ilau kərən, Kristo in nəsanənən rəha Uhgín ne nenatigən rəhan.

²⁵Tol nəhlan məto-inu, nalmələn rəha Uhgín in tenatig taprəkis-in nenatigən rafin rəha netənim, kən nəpouən rəhan in təsanən taprəkis-in nəsanənən rafin rəha netənim.

²⁶Piak min ne winik min, nikitəmat otəkəike məht məmə itəmat netəm ahro nian Uhgín təmaun-in itəmat. Itəmat tepət nəsotenatigən e niganəmti netənim, kən məsotosən nəsanənən, kən sənəmə itəmat nenəti netəm-iasol neen.

²⁷Məto Uhgín tatitəpun nat alməl min e nətueintən məmə okotol aulis netəm kotenatig, kən mitəpun nat əpou min e nətueintən məmə okotol aulis netəm kotəsanən.

²⁸In təmitəpun natimnat itəm, e nətəligən rəha netənim, ilat nat əpnaripin əm, ne itəm netənim kəsotolkeike pikən, ne natimnat itəm kotikə. Kən təmitəpun

natimnat min əh məmə in otol nat keike e nətəligən rəha netəmim, kəmotuwa nat ərnaḗin əm elat.

²⁹Təmol nəhlan məmə suah kit otəsəghat ausitən e niḡanəmti Uhgīn.

³⁰Məto-inu e nəwia Uhgīn, itəmat nəmotuwa kitəh itəmat Kristo Iesu. Kən Kristo təmuwa o kitat məmə nenatigən rəha Uhgīn, inəh e Kristo, Uhgīn təmol kitat kotətuatip e niḡanəmtin, kən mələhəu kalin kitat məmə rəhan min, kən mosmegəh kitat.

³¹Tol nəhlan, tahmen e Naoa Rəha Uhgīn tatən, “Etəm itəm tatəghat ausit, otəghat ausit əm o nat itəm Iərəməərə təmol lan.”

1 Korin 2

¹Piak min ne winik min. Nian emimnə otəmat, eməsən-iarəpən nəghatən rəha Uhgīn e nəghatən itəm kotenatig ne nolən rəha etəmim itəm titun wir nəghatən.

²Kən nian emətətig kitat min itəmat, nikik təkaskik məmə esən-iarəp minən nat kit, məto Iesu Kristo əm, ne nimisən rəhan e nig kəluau.

³Emuwa otəmat e nəpouən ne nəginən, kən matəgin mətasiəp-asiəp.

⁴Kən nian emən-iarəp rəhak nəghatən e namnusən təwir, eməsənən e nenatigən rəha netəmim, ne nəghatən asol min itəm otiuw itəmat, məto nian eməghat, nəmotəplan nəsanənən rəha Uhgīn ne wək rəha Narmin Rəha Uhgīn.

⁵Emol nəhlan məmə nahatətən rəhatəmat otəsətul əmən e nenatigən rəha netəmim, məto in otətul e nəsanənən rəha Uhgīn.

Nenatigən rəha Narmin Rəha Uhgīn

⁶Məto in nīpahrienən məmə itimat ekotən-iarəp nəghatən tenatig kəm netəm itəm kinotəkaskik rəkis e nəmegəhən rəhalat, məto sənəmə nenatigən rəha netəm u-roiu, o netəm koatərəməərə u-roiu, itəm ilat okotuwa nat ərnaḗin min əm.

⁷Kəp. Itimat ekoatəghat-in nenatigən rəha Uhgīn aupən itəm təmatəməhl anion, kən in nenatigən itəm təmatəhluaig, kən Uhgīn təmol nalpəkauən aupən aupən agin məmə, nenatigən əh, in otol nəwīrən kəm kitat.

⁸Nətem koatərəmərə e nəptən əh-roiu, ilat kinotəruru nalpəkauən əh rəha Uhgīn, mətə okəmə ilat kinəmotitun, ko kəsotətu-pərən lərəmərə rəha nəwīrən rafin e nig kəməluau.

⁹Mətə Naoa Rəha Uhgīn tatən məmə, “Suah kit təsəplanən, suah kit təsətoən, suah kit təsītunən nat naka itəm Uhgīn təmol əpen-əpenə lan rəha netəm u kotalkeike in,”

¹⁰mətə Uhgīn təmol əp nalpəkauən anion əh rəhan kəm kitat e Narmin. Kən Narmin titun natimnat rafin, kən mitun min natimnat rəha Uhgīn itəm etəmim kit okol təsītunən.

¹¹?Tol nəhlan, etəmim pah titun nətəligən rəha etəmim kit, mətə narmin əm? ?E nolən kitəh əm, etəmim pah titun nətəligən rəha Uhgīn, mətə Narmin əm?

¹²Uhgīn təməsos-ipamən kəm kitat nətəligən rəha netəmim e nətueintən, mətə təmos-ipa Narmin itəm tətisi-pən ron. In təmos-ipa kəm kitat məmə kitat okotitun nat naka itəm Uhgīn təmos-ipa əpnarīn əm kəm kitat.

¹³Inu nəghatən itəm itimat ioatən, kən nenatigən rəha netəmim təsəgətunən itimat e nəghatən min əh, mətə Narmin Rəha Uhgīn təməgətun itimat, kən ekotən-iarəp natimnat pahrien rəha Narmin Rəha Uhgīn e nəghatən min itəm təmisi-pən lan.

¹⁴Etəmim itəm Narmin Rəha Uhgīn tikə lan, okol təsosən natimnat itəm tətisi-pən e Narmin Rəha Uhgīn mətə-inu ilat nat alməl min əm kəm in, kən okol in təsītunən ilat mətə-inu Narmin Rəha Uhgīn əm titun nasituən e netəmim o nitunən natimnat rəha Uhgīn.

¹⁵Kitat itəm koatos Narmin Rəha Uhgīn kotəplan motitun natimnat min əh, mətə netəm əpnarīn, ko koatəplan məsotitun agin-əhən kitat.

¹⁶Tol nəhlan məto-inu Naoa Rəha Uhgın tatən məmə, “?Pah u titun nətəligən rəha İərəməərə məmə in otəgətun in?” Məto kitat kotitun nətəligən rəha Kristo.

1 Korin 3

Nəhap-əhapən e niməfak

¹Piak min ne winik min. Nian emətətig kitat min itəmat, okol esəghatən kəm itəmat tahmen e netəmim itəm kinotəskasik rəkis e nəmegəhən rəhalat e Narmin Rəha Uhgın, kəp. Eməghat kəm itəmat tahmen məmə itəmat netəmim rəha nətueintən əm, kən eməghat kəm itəmat tahmen məmə itəmat nisualkələh əm e nəmegəhən wi rəhatəmat e Kristo.

²Nian emətəgətun itəmat, tahmen məmə emətagwən itəmat e melek əm, eməsos-ipinə nagwənən əskasik kəm itəmat məto-inu itəmat nəsotahmenən o nunən. Kən nıpahrienən, itəmat nəsotahmenən əh o nunən,

³məto-inu nolən rəhatəmat tahmen əm e rəha netəmim rəha nətueintən. Tol nəhlan məto-inu itəmat nakoatetet itəmat min, kən moatərgəhəu, kən tahmen əm məmə itəmat netəmim rəha nətueintən əm u. Nəkotahmen e netəm əpnarın min.

⁴Nian suah kit otən məmə, “İo rəha Pol,” kən kit min tən məmə, “İo rəha Apolos,” nolən əh tatəgətun məmə itəmat netəm rəha nətueintən əm.

⁵Otəplan-tu. ?Apolos in pah, kən Pol in pah? İtımlau e kuahmen əm e iolwək itəm emuasitu etəmat o nuwamən o İesu. İtımlau etioal əm wək itəm İərəməərə təmos-ipa pisin pisin kəm itımlau məmə ekioal.

⁶Tahmen məmə io eməfe nıkutın nat, kən Apolos in tətəu e nəhau, məto Uhgın tatol tatəwiə.

⁷Tol nəhlan, etəmim itəm tatəfe nat, o etəm tətəu e nəhau, in nat əpnarın əm, məto Uhgın pisin əm in nat keike itəm tatol natımnat koatəmegəh moatəwiə.

⁸Etəm tatəfe, ne etəm tətəu, katian əm o nat kitıəh əm. Kən Uhgın otətou ilau kitıəh kitıəh e rəhalau wək pisin pisin min.

⁹Itimlau iolwək mil rəha Uhgın, kən itəmat nəkotahmen e nasumən rəha Uhgın, o nimə rəha Uhgın.

¹⁰E nəwırən itəm Uhgın təmawte-in kəm io, emiləkin wır nelki nimə tahmen e etəm titun wır niləkinən nimə. Kən suah kit min tatiləkin nimə məsin. Məto ilat rafin okotəkəike moatehm wır wək rəhalat rəha niləkinən nimə,

¹¹məto-inu okol suah kit təsiləkinən nelki nimə kit min itəm tol pisin e inu itəm kiniləkin rəkis. Kən nelki nimə u in Iesu Kristo.

¹²Okəmə suah kit tiləkin-pər rəhan nimə itəm nelki nimə in Iesu Kristo, kən in titun niləkinən e iaen u kol tatipit-ipit, o e silfa, o e kəpiel nəmtin tiəkis, o e nig, o e nuwig, o e maniah.

¹³Kən nian kit netəmim okotəplan wək rəhan, məto-inu e nian Iesu tatuwa min, rəhan wək otuwa e nəhag-əhagən. Rəhan wək okələhəu-pən e nigəm, kən nigəm otəgətun məmə rəhan wək təwir or tərət.

¹⁴Okəmə nigəm təməsusən rəhan nimə, in otos rəhan nətouən.

¹⁵Məto okəmə nigəm təmus rəhan nimə, kən rəhan natimnat rafin təmikə. In əm, Uhgın otosmegəh, məto tahmen-ahmen əm e suah kit itəm taiu mətagim e nimə itəm nigəm tatus.

¹⁶?Nəkotitun o kəp məmə, itəmat un nimə rəha Uhgın, kən Narmin Rəha Uhgın tətətig etəmat?

¹⁷Okəmə suah kit tərəkın nimə rəha Uhgın, kən Uhgın otərəkın in, məto-inu nimə rəha Uhgın, in rəhan pisin əm. Kən nimə u rəha Uhgın, itəmat.

¹⁸Təsəwırən məmə suah kit tateiuə-in atip in. Okəmə suah kit nikin təht məmə in tenatig u-roiu e niganəmti netəmim, in otəkəike muwa ialməl kit e niganəmtilat məmə in otuwa ienatig pahrien.

¹⁹Tol nəhlan məto-inu nenatigən rəha netəmim rəha nətueintən, in talməl pik e niganəmti Uhgın. Tahmen e Naoa Rəha Uhgın tatən məmə, “Uhgın tatol noanikulu kit e nəghatən rəha suah kit itəm tatən məmə in tenatig wır, kən Uhgın taskəlīm in.”

²⁰Kən Naoa Rəha Uhgin tatən min məmə, “Iərəməərə titun məmə, nətəligən rəha netəm kotenatig, ilat nat əpnapin əm.”

²¹Kən əsotənən məmə itəmat rəha suah u o rəha suah əh məmə onəkotiləs-ipər atip itəmat ron. Uhgin tatos-ipən natimnat rafin rəhatəmat məmə otasitu etəmat.

²²Pol, o Apolos, o Pita, o nətueintən, o nəmegəhən, o nimisən, o nian roiu, o nian itəm tatuwa, ilat rafin rəhatəmat məmə Uhgin otol təwir kəm itəmat lan,

²³kən itəmat rəha Kristo, kən Kristo in rəha Uhgin.

1 Korin 4

Aposol min rəha Kristo

¹Tol nəhlan, netəmim okotəkəike motos itəmat tahmen e iolwək min rəha Kristo itəm Uhgin təmələhəu-pən e nelmitimat məmə itəmat ekotol əp nalpəkəuən anion rəha Uhgin.

²Kən netəmim itəm koatehm natimnat rəha etəm-iasol kit, ilat kotəkəike motol rəhalat wək təwir məmə nian etəm-iasol tatəplan rəhalat wək, kən titun nahatətəən elat.

³E io, in nat əpnapin əm okəmə itəmat, o netəm pisin neen kotən-iarəp nətəligən rəhalat e rəhak wək. Kən io atip esahmenən o nakilən rəhak wək.

⁴E rəhak nətəligən, məmə emol əm nat itəm in təwir, məto nat u təsənən məmə io ekətuatip. Iərəməərə əm tətəuətəp o nakilən rəhak wək.

⁵Tol nəhlan, sotautəutən o nakilən natimnat. Nakoatəsahgin e nian Iərəməərə otuwa lan. In otəmki-pən e nəhag-əhagən natimnat itəm koatəhluaig e napinəpən, kən in otol-arəp nat naka tətətig e niki netəmim o nolən min rəhalat. E nian əh Uhgin otənwiwi ilat kitiəh kitiəh.

⁶Piak min ne winik min. Emən-ipinə nəghatən min əh kəm itəmat etimlau Apolos məmə itəmat onəkotos nitunən ikin, kən okəmə nakotos nipəti nəghatən min u, “Nəkotəkəike motol əm nəghatən min itəm kinəte rəkis,” kən nəsotos-ipərən netəm-iasol neen motos-iəhau neen.

⁷?Tahro? ?Itəmat ilis taprəkis-in netənim min rafin? ?Itəmat nakoatos natimnat neen itəm Uhgın təsos-ipinə kəm itəmat? !Kəp! ?Kən tahro nakoatəghat ausit o natimnat itəm Uhgın təmos-ipinə kəm itəmat tahmen əm məmə itəmat əm nəmotol natimnat min əh?

⁸Nikitəmat təhat məmə ninotos rafin rəkis natimnat rəha Uhgın. Nikitəmat təhat məmə ninotos rafin rəkis nautə rəha Uhgın. Nolən rəhatəmat tahmen məmə nəmotuwa kig min rəha Uhgın, məto itimat ekotatig ləhau əm. !Məto kəp, sənəmə nıpahrienən! !Nəman! Okəmə nıpahrienən məmə itəmat nəmotuwa kig min rəha Uhgın, nikitimat otagien pik, kən okəmə tol nəhlan, itimat min ekotol kig kitat min itəmat. Məto təsolən mihin.

⁹Itimat aposol min, məto nıkkik təht məmə Uhgın təmələhəu itimat əpəh ləhau agın-əh, ioatatig tahmen e netəm itəm kəmakil rəkis məmə okotəkəike motimis. Nıkkik təht nəhlan məto-inu tahmen məmə ekoatətul e nıganəmti nagelo min ne netənim rafin məmə ilat okotəplan nolən rəha nımisən rəhatimat.

¹⁰!Netənim tepət koatən məmə itimat ialməl min o nərgi Kristo, məto nikitəmat təht məmə itəmat nakotenatig wir e Kristo! Məto sənəmə nıpahrienən. !Netənim tepət koatən məmə rəhatimat nepətən tikə, məto nakoatəghat ausit məmə rəhatəmat nepətən iahgin! Məto sənəmə nıpahrienən. Netənim tepət koatısiai-in itəmat, məto katən rat itimat.

¹¹Məto, inu nıpahrienən. Mətoarus-pa roiu, nəumis tatus itimat, kən moatoaoa, kən ekoatuwin e natimnat kəmotəhap-əhap, kən netənim koatoh itimat, kən rəhatimat nımə tikə.

¹²Itimat atıp əm ioatol pik wək e nelmitimat. Nian okotən rat itimat, məto itimat ekotəfak o nəwirən olat. Nian netənim koatol nəratən kəm itimat, məto itimat ekotəpnarın əm.

¹³Nian netənim koatən rat itimat, məto itimat ekoatəghat wir əm kəm ilat. Mətoarus-pa roiu itimat ekotahmen e nuwitik rəha netənim rafin, o namkimik rəha nətueintən rafin.

Ilat okotəkəike kətəu-pən nolən rəha Pol

¹⁴Esəteən nəghatən min u məmə ekol itəmat nakotaulis, mətə məmə otəhgaiir etəmat, mətə-inu itəmat nenətik min itəm ekolkeike itəmat.

¹⁵Rəhatəmat iəgətun tepət itəm okotəgətun itəmat e Kristo, kən okəm-naka ilat kotahmen əm e rəhatəmat tata kalin ten-taosan, mətə rəhatəmat tata ətuatip kitiəh əm, inu io, mətə-inu e Kristo Iesu emuwa rəhatəmat tata ətuatip nian emən-iarəp namnusən təwir kəm itəmat aupən.

¹⁶Tol nəhlan, ekətapəh əskasik otəmat məmə onəkotətəu-pa rəhak nolən min.

¹⁷Mətə-inu o nat u, etahl-ipinə nətik e Kristo u Timoti itəm iakolkeike. In tətaiu əskasik e Iərəməərə. In otən min kəm itəmat suatip rəha nəmegəhən rəhak e Kristo Iesu itəm tatətəu-pən natimnat itəm iatəgətun e niməfak min rafin ikin min rafin.

¹⁸Itəmat neen koatən məmə esimnə minən, kən motausit pik o rəhatəmat nepətən.

¹⁹Mətə otəsuwəhən, ekəike mimnə məplan itəmat okəmə Iərəməərə tegəhan-in io. Kən ekəsəplan əmən nəghatən min itəm netəm iausit min koatən, mətə ekəplan nəsanənən rəhalat.

²⁰Mətə-inu nərəməərəən rəha Uhgın sənəmə in nat kit rəha nəghatən, mətə in nat kit rəha nəsanənən.

²¹?Kən nakotolkeike naka? ?Ekimnə malis itəmat, o ekimnə e nolkeikeən ne narmin rəha nəmeiən?

1 Korin 5

Pian kit, rəhan nolən tərət agin

¹Kəmən-iarəp kəm io məmə suah kit u e nikitəmat tətəkləh-in pətan kit, kən təmol e nolən tərət kit itəm taprəkis-in nolən rəha netəm kəsotəfakən, nat əpnapin kəsotəfakən. In tətəkləh-in pətan wi rəha rəhan tata.

²!Kən itəmat nakotausit ron məmə təwir əm! Nəsotətoən tərət, məto onəkotəkəike motəto tərət o nolən əh, kən nəsotahl-iarəpən suah əh, məto onəkotəkəike motahl-iarəp itəm təmol nolən rat əh e nikitəmat.

³Nat əpnapin esatigən kitat min itəmat, məto e narmin etatig kitat min itəmat, kən tahmen əm okəmə kitat koatatig, enən rəkis e nərgi İərəmərə İesu məmə naka in tətuatip məmə kitat okotol e suah əh.

⁴Nian nakotuwa kitiəh, kən e narmin, etatig kitat min itəmat, kən nian nəsanənən rəha İərəmərə rəhatat İesu in əh-ikin kitat min,

⁵kən otıləs-ipən suah u əh-roiu e nelmi Setan məmə otərəkin nıpətin, məto İərəmərə otosmegəh narmin nian in tatuwa min e namnun nian.

⁶Rəhatəmat nausitən tərət. ?Nəkotitun o kəp məmə, is noan məsin əm tətəlapik apiəpiə flao itəm kəmətig?

⁷Otərəkin rəkis is oas min rəhatəmat məmə itəmat flaoa wi itəm kəmətig u is tikə lan, kən nıpahrienən itəmat nəkotahmen ətuatip e pıret əh. Tol nəhlan məto-inu Kristo itəm in nəti sipsip rəha lafet rəha Nuhagego-inən, təmimis rəkis tahmen e sakrifais o nolən rat min rəhatat.

⁸Tol nəhlan, pəs kotol lafet əh, məto kəsotolən e is oas, itəm tahmen e nolən tərət min itəm netəmim kotolkeike pik nolən kəm netəmim, ne nolən rat min rafin. Məto pəs kotol lafet e Pıret U Is Tikə Lan, tahmen e nolən rafin itəm kotol nıpahrienən motətuatip.

⁹Eməte rəkis naoa kəm itəmat məmə nəsotan kələhən itəmat netəm koatakləh-in pətan.

¹⁰Esən-iəhauən məmə nəsotanən itəmat netəm kəsotəfakən, nat əpnapin nolən rəhalat tol min-nulan: ilat koatakləh-in pətan, ilat naumis, ilat iakləh min e neiuəən, kən ilat koatəfak kəm narmi nat min. Okəmə nəsotanən itəmat min ilat, kən nəkotəkəike motiet ikin-u e nətueintən.

¹¹Məto nıpəti naoa itəm eməte kəm itəmat məmə onəsotan kələhən itəmat suah kit itəm tatən məmə in piatəmat kit, məto in tətəkləh-in pətan, o in tətəumis, o in tatəfak kəm narmi nat min, o in tatən rat netəmim, o in tətəpıs

nian tepət, o in tətakläh-in e neiueiuəən. Əsotolən nat kit itəmat min ilat, nat əpnapin in nat əkəku əm tahmen e nəkotagwən kitih.

¹²Sənəmə in rəhak kit wək məmə ekakil netəm kəsotəfakən. Məto in wək rəhatəmat məmə onəkotakil nolən rəha netənim əpəh e niməfak itəm koatol təfagə e nolən min u.

¹³Uhgin otakil netəm laihluə min, məto Naoa Rəha Uhgin tatən məmə, “Otahl-iarəp e nikitəmat etəm tatol nolən rat.”

1 Korin 6

Nolən rəha niuw-iarəpən itəm

¹Nian okəmə itəmat kəiu kuəhai ilau min, in tol naulisən məmə otələs muwin kəm netəm kəsotəfakən məmə okotiuw-iarəp ilau motakil rəhalau nərgəhəuən. Məto nəkotəkəike motiləs motuwın kəm iəfak min.

²?Nəkotitun o kəp məmə iəfak min, ilat okotakil netənim e nətueintən? ?Kən okəmə itəmat onəkotakil netənim e nətueintən, kən tahro nikitəmat təht məmə nəsotahmenən o nakilən rəhatəmat nolən əlkələh min?

³?Nəkotitun o kəp məmə, kitat okotakil nagelo min? !Kən natimnat min rəha nətueintən, ilat kotimətig əm o nakilən!

⁴?Kən tol nəhlan, okəmə nakoatərgəhəu o nətəligən min neen, tahro nakoatuwin o netəm ihluə məmə ilat okotakil nərgəhəuən rəhatəmat? Ilat kəsotosən nisaiien rəha niməfak məto-inu ilat kəsotahmenən məmə okotakil nat asol min neen tahmen e kitat.

⁵Iatən nəhlan məmə nakotaulis lan. ?Tahro? ?Itəmat kit tikə itəm tenatig məmə in titun nələhəuən nənən min əh?

⁶!Məto kəp! Itəmat piak min nakoatuwin o netəm ihluə məmə ilat okotakil rəhatəmat nərgəhəuən min. Kəsi.

⁷Itəmat nakoatuwin o suah kit məmə otakil rəhatəmat nərgəhəuən. Inu tatəgətun məmə nəmotəmkakiəh e suatip rəha Uhgin e nəmegəhən

rəhatəmat. ?Tahro? Okəmə suah kit tatol tərət kəm ik, təwir məmə nakaluin əm. Okəmə tateiuə-in ik mətakläh-in ik, aluin min əm.

⁸Məto kəp. Itəmat piatəmat min əm, məto itəmat atip nəkoatol tərət kəm itəmat min, kən moateiuə-in itəmat min motakläh kəm itəmat min.

⁹?Nəkotitun o kəp məmə, netəm koatol nərətən, okol kəsotuwınən e nərəmərən rəha Uhgın? Əsotətəlig-inən neiuəiuən. Inu nıpahrienən məmə netəm koatakläh-in pətan, ne netəm koatəfak kəm narmi nat min, ne nəman itəm kınotol marit rəkis koatakläh-in pətan, ne nəman itəm koatit atip ilat min,

¹⁰ne iakläh min, ne naumis min, ne netəm koatapis e wain, ne netəm koatəghat rat e nərği netəmim, ne netəm koateiuə motakläh kəm netəmim, ilat okol kəsotuwınən e nərəmərən rəha Uhgın.

¹¹Kən itəmat neen, nəmoatol nəhlan. Məto, Narmin Rəha Uhgın rəhatat təmafəl itəmat, mələhəu kalin itəmat məmə rəhan, mol itəmat nəkotətuatip e nıganəmtin e nərği İərəmərə İesu Kristo.

Nolən rəha nakläh-inən pətan in təfagə rat

¹²Netəmim neen koatən məmə, “Natimnat rafin təwir əm məmə ekol.” Məto, sənəmə ilat rafin kotasitu etəmat. Suah kit tatən min məmə, “Natimnat rafin təwir əm məmə ekol.” Məto, okol esegəhan-inən məmə nat neen okotərəmərə e rəhak nəmegəhən.

¹³Netəmim neen koatən məmə, “Nagwənən in nat təwir rəha nərpitəm, kən nərpitəm in tolkeike nagwənən. Kən tahmen əm, okəmə nıpətıtət tolkeike pətan, kən nolən əh rəha nitən pətan in təwir əm.” Nat mil əh, nagwənən ne nərpitəm, kuəwir, nat əpnarın məmə Uhgın otol namnun ilau kərən. Məto Uhgın təsos-ipamən nıpətıtət məmə kotıtəp nıpitan. Uhgın təmos-ipa nıpətıtət məmə kotisiai-in İərəmərə lan, kən İərəmərə in tərəmərə e nıpətıtət.

¹⁴E rəhan nəsanənən, Uhgın təmosmegəh İərəmərə e nımisən, kən in otosmegəh min kitat.

¹⁵?Nəkotitun o kəp məmə, nīpətītəmat, ilat rəha Kristo pīsin əm? ?Kən nikitəmat təht məmə ekiləs nīpətīk itəm in kitīəh ilau Kristo, kən mol kioal kitīəh ilau pətan rəha suatīp? !Kəp! Okol təsələn mihin.

¹⁶?Kən nəkotitun o kəp məmə, etəm tətan ilau pətan rəha suatīp, ilau katuea kitīəh əm e nīpətīn? Məto-inu nəghatən rəha Naoa Rəha Uhgīn tatən məmə, “Ilau okuea nīpətīn kitīəh əm.”

¹⁷Məto etəm itəm tatol kitīəh ilau İərəmərə, tatuwa kitīəh ilau min e narmin.

¹⁸Otagīm rəkis otuwīn isəu o nolən rəha nītəpən nīpītān. Nolən rat rafin itəm suah kit tatol itəm tol pīsin e itəm u, in təsərəkīnən nīpətīn. Məto itəm u tatərəkīn nīpətīn.

¹⁹?Nəkotitun o kəp məmə, nīpətītəmat in nimə kit rəha Uhgīn itəm Narmin Rəha Uhgīn tətātīg ikīn, kən Uhgīn təmos-ipīnə Narmin kəm itəmat, mətātīg etəmat? Kən itəmat sənəmə rəhatəmat atīp u itəmat.

²⁰Uhgīn təmətou rəkis itəmat e nətouən itəm nəmtīn tiəkis. Tol nəhlan, otīsiāi-in Uhgīn e nolən min rəha nīpətītəmat.

1 Korin 7

Nəghatən e marit

¹Roiu ekən-ipīnə nənən e naoa rəhatəmat itəm nəmotəte kəm io. Əwəh, in təwīr məmə etəmim kit təsələn marit.

²Məto netəmim tepət itəm koatītəp pətan, tol nəhlan, təwīr məmə etəmim otəkəike mos atīp rəhan pətan, kən pətan tatos rəhan iərman.

³Iərman otəkəike man ilau rəhan pətan okəmə pətan tolkeike, kən pətan otəkəike man ilau rəhan iərman okəmə iərman tolkeike.

⁴Pətan təsərəmərə atipən e nīpətīn, məto rəhan iərman tatərəmərə lan. Kən tahmen-ahmen əm e iərman, in təsərəmərə atipən e nīpətīn, məto rəhan pətan tatərəmərə lan.

⁵Təsəwīrən məmə pətan o iərman təgīn o nīpətīn okəmə kit tolkeike. Məto okəmə ilau kərən kuegəhan məmə təwīr əm okuəpəs o nəfakən o nian neen,

kən təwir əm. Məto okueike muea min kitiəh. Okəmə kəsioalən, kən Setan otehm suatip o nos-ipən-os-ipənen kəm ilau. Iatən nəhlan məto-inu itəmat rafin nəsotəskasikən.

⁶Nəghatən əh məmə, “okuəpəs o nəfakən o nian neen,” in nətəligən əm rəhak, sənəmə lou kit.

⁷E rəhak nətəligən, təwir məmə netənim rafin okəsotolən marit tahmen lak. Məto Ughin tatol suatip pisin pisin min kəm kitat kitiəh kitiəh, kən tatol məmə neen koatol marit, kən neen koatan əm.

⁸Kən iatən kəm netəm kəsotolən marit ne nəutahlimis min məmə, təwir məmə koatan əm məmə io ne.

⁹Məto okəmə tiəkis olat məmə okotaliwək e suatip ətuatip, kən təwir məmə okotəkəike motol marit pəs nikilat təsəht pəkən.

¹⁰Itəmat itəm nəmotol marit, ekən-ipinə nəghatən u kəm itəmat, sənəmə rəhak məto rəha İərəməmə məmə, pətan otəsapəsən rəhan iərman.

¹¹Məto okəmə in otol, kən təwir məmə otəsətəu-pən minən suah kit min, o okəmə tahro, titəlig-pən min əm o rəhan iərman. Kən iərman otəsapəsən rəhan pətan.

¹²Itəmat itəm rəhatəmat nəman o nipiətan kəsotəfakən, inu rəhak əm nəghatən, sənəmə rəha İərəməmə, məmə okəmə itəmat kit, rəhan pətan təsəfakən, məto tolkeike məmə ilau kətuatig, iərman otəsapəsən.

¹³Kən okəmə itəmat kit, rəhan iərman təsəfakən, məto tolkeike məmə ilau kətuatig, pətan otəsapəsən.

¹⁴Otol nəhlan məto-inu nian pətan kit tatəfak, kən Ughin tatələhəu kalin min rəhan iərman məmə rəha Ughin. Kən nian iərman kit tatəfak, kən Ughin tatələhəu kalin min rəhan pətan məmə rəha Ughin. Okəmə təsölən nulan, kən rəhatəmat nisualkələh, ilat rəha nətueintən əm, məto tol nəhlan, Ughin tatələhəu kalin ilat məmə rəhan min, məto-inu təmələhəu kalin rəkis tata ne mama.

¹⁵Məto okəmə etəm təsəfakən tolkeike məmə otapəs rəhan pətan o iərman itəm tatəfak, egəhan in əm. Etəm tatəfak, iərman o pətan, Uhgın təsaskəlīmən ilat e marit əh. Məto, Uhgın təmaun-in itat məmə okotatig mətig e nəməlinuən.

¹⁶Pətan, kəm-naka Uhgın otosmegəh rəham iərman e nolən təwir rəham. Kən iərman, kəm-naka Uhgın otosmegəh rəham pətan e nolən təwir rəham.

¹⁷Məto in əm u, nian Uhgın təmaun-in itəmat, nəmotatig e natigən pisin pisin min itəm İərəmərə təmələhəu, kən təwir məmə nəkotatig əm lan. Inu rəhak nəghatən iatələhəu kəm niməfak min rafin.

¹⁸Nian Uhgın təmaun-in suah kit, okəmə kəməhg-ipən in, kən otəsəhluaig-inən nəhg-ipənən itəm kəmol lan. Kən nian Uhgın təmaun-in suah kit min, okəmə kəsəhg-ipənən, kən təwir məmə təsegəs-inən məmə okəhg-ipən.

¹⁹In nat əpnapin əm okəmə kəməhg-ipən suah kit o kəsəhg-ipənən. Nat keike məmə kitat kotətəu-pən əm nəghatən min rəha Uhgın.

²⁰Nian Uhgın təmaun-in itəmat, nəmotatig e natigən pisin pisin min, kən təwir məmə nəkotatig əm elat.

²¹?Nian Uhgın təmaun-in ik, ik slef əm kit? Nıkim təsəht pikən, məto okəmə nəkitun nətəu-pənən suatip itəm kəmikis slef min lan, ətəu-pən əm.

²²Tol nəhlan məto-inu etəm slef əm nian İərəmərə təmaun-in, in etəm rəha İərəmərə itəm kəmikis rəkis, kən tahmen-ahmen əm, etəm itəm sənəmə slef kit nian İərəmərə təmaun-in, in slef əm rəha Kristo.

²³Uhgın təmətou rəkis itəmat e nətouən itəm nəmtin tiəkis. Sotolən məmə itəmat nakotuwa slef min rəha netəmim.

²⁴Piak min ne winik min, nian Uhgın təmaun-in itəmat, nəmotatig e natigən pisin pisin min, kən təwir məmə nəkotatig əm elat itəmat Uhgın.

²⁵Inu nəghatən kit rəhatəmat netəm wi itəm nəsotolən marit. Esos ətuatipən nəghatən kit o İərəmərə, məto iakən əm rəhak nətəligən. Məto itəmat

nəkotitun mēmə rəhak nəghatən in nīpahrienən, mətō-inu Iērəmərə tēmasəkitun io.

²⁶Mətō-inu o nərātən asol itəm nəkotatig lan, rəhak nətəligən tol min-nulan mēmə, nəkotatig əm nulan nəkotatig mihin u-roiu.

²⁷?Tahro? ?Nəmol marit? Segəs-inən suatip o napəsən rəham pətan. ?Tahro? ?Nəsələn marit? Segəs-inən suatip o nosən rəham kit pətan.

²⁸Mətō okəmə natol marit, nəsələn təfagə rat. Kən okəmə pətan wi tatol marit, in təsələn təfagə rat. Mətō netəm kəmotol marit, okotatig e nərātən tēpət e rəhalat natigən, kən iakolkeike mēmə nəsotuwīnən e nərātən min əh.

²⁹Piak min ne wīnik min, inu nīpəti nəghatən rəhak. Natigən rəha netəmim e nətueintən in tīnəkuəkīr əm. Kən roiu ne matuwīn, netəm kəmotol marit, okəsotətəlig-in pīkən nolən rəha marit rəhalat.

³⁰Kən okəmə suah kit tətəsək, təwīr mēmə otaliwək e nəmegəhən rəhan tahmen mēmə təsasəkən. Kən okəmə suah kit nīkin tagien, in otaliwək tahmen mēmə nīkin təsagienən. Kən okəmə suah kit tatos-nəmtīn nat kit, təwīr mēmə nīkin təht mēmə sənəmə rəhan.

³¹Kən təwīr mēmə netəmim itəm koatol bisnes e nətueintən, ilat okotətəlig-in mēmə rəhalat bisnes in nat əpnāpīn əm, mətō-inu nətueintən ne nəwīrən rəhan otəpanikə.

³²Iakolkeike mēmə nīkitəmat təsəht pīkən nat kit rəha nətueintən u. Tol nəhlan, okəmə suah kit təsələn marit, nīkin tatəht pīk wək rəha Iērəmərə mēmə tahro nulan mol Iērəmərə nīkin tagien o wək itəm in tatol.

³³Mətō etəm təmol marit, nīkin tatəht pīk əm natīmnat rəha nətueintən mēmə otahro nulan mol nīki rəhan pətan tagien,

³⁴kən rəhan nətəligən tatuwīn o nat kəiu, rəhan pətan ne wək rəha Iērəmərə. Kən pətan itəm təsələn marit, o pətan wi, nīkin tatəht pīk wək rəha Iērəmərə mēmə tahro nulan in otətuakəm o Iērəmərə e nīpətīn ne narmin. Mətō pətan itəm təmol marit, in tatətəlig-in pīk əm natīmnat rəha nətueintən mēmə otahro nulan mol rəhan iərman nīkin tagien.

³⁵Iatən-ipinə nəghatən min u o nəwirən atip rəhatəmat, sənəmə iatən-iəhau itəmat, məto məmə nakotətəu-pən suatip rəha nəmegəhən itəm tətuatip, kən nikitəmat tatəht p̄ik wək rəha Iərəmərə.

³⁶Məto okəmə iərman kit ne pətan wi kit, kinən-iəkis məmə ilau okioal marit, kən iərman təmə okuəpəs pitən, məto roiu nikin təht məmə təsolən nolən ətuatip e pətan əh, kən okəmə pətan əh tətətig wir əm o nup min neen, kən iərman nikin təht məmə təike mol-tə marit e pətan əh, kən təwir əm, in titun nolən. In təsolən təfagə rat. Məto təwir məmə in otol marit.

³⁷Kən okəmə kəiu min nəhlan kioalkeike məmə okioal marit, məto iərman nikin tinəht rəkis məmə okuəpəs marit, kən suah kit tikə itəm tatəkəike kəm in məmə in tapəs marit, məto iərman əm in tatərəmərə e nikin, kən nikin tinəht rəkis məmə otəsolən marit e pətan əh, suah əh, in min tatol nolən ətuatip.

³⁸Tol nəhlan, iərman itəm tatol marit e pətan wi, in tatol ətuatip, məto iərman itəm təsolən marit, in tatol təwir maprəkis.

³⁹Pətan otəkəike mətatig ilau rəhan iərman e nian rafin, məto okəmə rəhan iərman timis, in titun nolən marit e suah kit min itəm in tolkeike, məto nat kitih əm, in təike mol marit e iərman kit itəm tatəfak kəm Iərəmərə.

⁴⁰Məto e rəhak nətəligən, okəmə in tətətig əm nəhlan məsolən marit, kən nikin otagien taprəkis-in okəmə in tatol marit. Kən n̄ikik təht məmə Narmin Rəha Uhḡin tətətig min lak mos-ipa nəghatən əh kəm io.

1 Korin 8

Nəgwənən itəm katol sakrifais lan kəm narmi nat min

¹Kən roiu, iakəghat e nəgwənən min itəm katol-pən sakrifais lan kəm narmi nat min. Kitat kotitun məmə, “kitat rafin koatos nitunən.” “Nitunən” in nat kit itəm suah kit tətəusit ron, məto nolkeikeən tatiləkin matiləs-ipər etəmim.

²Okəmə suah kit nikin təht məmə in titun p̄ik nat, məto in təsitunən əh natimnat itəm in otəkəike mitun.

³Məto etəmim itəm tolkeike Uhḡin, Uhḡin titun in.

⁴?Kən tahro e nagwənən min itəm katol-pən sakrifais lan kəm narmi nat min? Kitat kotitun məmə narmi nat in nat əpnapin əm kit e nətueintən, kən uhgin əlkələh min kotikə, mətə Uhgin kitiəh əm.

⁵Katən məmə, “uhgin əlkələh” min ne “iəramərə əlkələh” min tepət əh-ikin. Inu neiuəən əm. Mətə nīpahrienən netəmim neen koatəfak kəm ilat. Mətə nat əpnapin okəmə uhgin əlkələh min əh-ikin, əpəh e neai o əpəh ləhau e nətueintən,

⁶mətə o kitat, Uhgin kitiəh əm, Tata Uhgin. Natimnat rafin təmisi-pən lan, kən təmos-ipa nəmegəhən kəm kitat məmə kitat okotol nəwian. Kən Iəramərə kitiəh əm, Iesu Kristo, kən Uhgin təmol natimnat rafin agin e Kristo, kən e Kristo kitat koatəmegəh.

⁷Mətə sənəmə netəmim rafin kotitun nəghatən u. Aupən, netəmim neen kəmotəfak kəm narmi nat min nian rafin. Mətə roiu, nian koatun mit itəm kəmol sakrifais lan kəm narmi nat, nīkilat təht məmə koatəfak kəm uhgin əlkələh min pahrien. Kən ilat koatəto məmə koatol təfagə rat mətə-inu nīkilat təsəskasikən.

⁸Mətə nagwənən təsələn kitat kotuwa iuəhkīr o Uhgin. Okəmə kəsotunən mit əh, o kotun mit əh, nətəligən rəha Uhgin kəm kitat in tahmen əm.

⁹Təwir əm, nəkotitun nətəu-pənən suatip itəm nakotolkeike, mətə oatəto itəmat. Sotolən nat kit itəm nakotolkeike mətə in otol məmə piatəmat kit o winitəmat kit itəm nīkin təsəskasikən təme e rəhan nəmegəhən.

¹⁰Ekən nəhlan mətə-inu okəmə suah kit itəm nīkin təsəskasikən, tatehm itəmat itəm nakoatos nītunən əh, kən nakotuwin e nimə rəha narmi nat min məmə nakotagwən, kən tahro? Kəm-naka rəhatəmat nolən otuww-pən rəhan nətəligən, kən in min otuwin mun mit itəm kəmotol sakrifais lan kəm narmi nat min, kən in tatol təfagə rat kit.

¹¹Kən nītunən itəm nikitəmat təht məmə nakoatos, in tatərəkin etəm nīkin təsəskasikən. Mətə in piatat kit itəm Kristo təmimis ron.

¹²Nian nəkōatol nolən rat e itəmat kit e nolən əh, matərəkin nikin təsəskasikən, kən nəkōatol təfagə rat e Kristo.

¹³Tol nəhlan, okəmə nat kit itəm iatun tol piak tatəme e rəhan nəmegəhən, kən təwir məmə esun minən mit nian kit ne məmə otəsəmeən e rəhan nəmegəhən.

1 Korin 9

Pol təmuhalpin nəghatən itəm katətu-pən lan

¹?Nikitəmat təht məmə ekitun nolən nat naka itəm iakolkeike, o kəp? !Əwəh! ?Io aposol kit, o kəp? !Əwəh! ?Eməplan Iesu Iərəmərə rəhatat e niganəmtək, o kəp? !Əwəh! ?Itəmat u noa rəhak wək e Iərəmərə, o kəp? !Əwəh!

²Okəmə netəmim neen koatən məmə sənəmə io aposol, mətə niphrienən, itəmat nəsoṭitun nənən nəhlan, mətə-inu nəmegəhən rəhatəmat e Iərəmərə tatəgətun məmə io aposol kit.

³Ekualpin nəghatən rəha netəmim neen itəm koatən məmə io sənəmə aposol kit.

⁴?Nian kitat aposol min koatətapəh otəmat o nagwənən ne nat okənīm ne, in ətuatip o kəp? Əwəh, itəmat nəkoṭitun.

⁵Aposol min neen, ne pia Iərəmərə min, ne Pita, rəhalat niphitan itəm koatəfak koatuarisig-in ilat nian ilat kotaliwək moatol wək rəha Iərəmərə. ?In tətəuatiṭip məmə kitat kotol tahmen-ahmen əm, o kəp? Əwəh, itəmat nəkoṭitun.

⁶?O nikitəmat təht məmə io əm ne Panapas, itimlau piṣin əm ekuəkəike mioal atip wək o natigən rəhatimlau?

⁷Otətəlig-in-tu, tol nəhlan. ?Pah tatol mopael mətə təsəlkeikeən məmə katətou in lan? ?O, pah tətəsum məsunən nagwənən lan? ?O, pah tətəgwən nat megəh min məsunən əh kit ne?

⁸?Nikitəmat təht məmə natimnat min itəm iatəghat-in, koatisi-pən əm o nətəligən rəha netəmim? !Kəp! Lou tatən nat kitəh əm.

⁹Kəmæte e Lou rəha Moses məmæ, “Nian nakotasig kau motuwa məmæ otol wək mewig-ewig e wit, sotəlisən nohlin pəs ton nimismisi wit neen.” ?Tahro? ?Niki Uhgín tatəht əm kau min,

¹⁰o nikin tatəht min kitat? Əwəh, kəmos-ipa lou u o rəhatat nəwirən, mətə-inu netəm itəm kotaupən motəfe nat e nasumən, ne netəm koatuarisig motəulək ikin, ilat rafin nətəligən rəhalat kitiəh əm məmæ okotos nagwənən e nasumən u.

¹¹E wək min rəhatimat, tahmen əm məmæ emotasum kit məmæ itəmat nəkotagwən ikin, inu nagwənən rəha narmitəmat. ?Kən tahro, tiəkis otəmat məmæ nakotos-ipa nagwənən neen rəha nīpətīn kəm itimat?

¹²Netəm pisin neen kotitun nətapəh-inən nagwənən otəmat, kən in tətuatip əm, mətə ilat koatol wək rəha Uhgín. ?Kən tahro e itimat? !Nətapəhən rəhatimat in tətuatip agin! Mətə itimat esətəolən kəm itəmat məmæ itimat ekotitun mihin nolən. Mətə itimat ekotol natimnat rafin itəm ekotitun nolən, nat əpnapin in tiəkis, məmæ esotahtosig-inən namnusən təwir rəha Kristo.

¹³?Nəkotitun o kəp məmæ, netəmim itəm koatol wək e Nimə Rəha Uhgín, koatos nigilat ikin nagwənən? Kən netəmim itəm koatol wək e olta, ikin katol sakrifais ikin, koatos nigilat ikin nagwənən.

¹⁴E suatip kitiəh əm, Iərəmərə təmən məmæ, netəmim itəm koatən-iarəp namnusən təwir, rəhalat natimnat o natigən otəkəike misi-pən ikin.

¹⁵Mətə esətapəh-inən kəm itəmat o nat naka itəm tətuatip əm kən ekitun nətapəh-inən. Eməsəteən naoa u məmæ itəmat nəkotol natimnat min neen əh kəm io. Iatausit məsin məmæ iatən-iarəp namnusən təwir kəsətouən io lan. Kən esolkeike agin-əhən məmæ ekətəu-pən suatip pisin. Nimisən in təwir taprəkis-in suatip pisin.

¹⁶Mətə esausitən məmæ iatən-iarəp namnusən təwir mətə-inu, ekəike mən-iarəp. !Kəsi, nahməən asol otuwa ron io okəmæ esən-iarəpən namnusən təwir!

¹⁷Okəmə iatən-iarəp nəghatən rəha Uhgin məto-inu iakolkeike mol nulan, kən tətuatip məmə ekos nətouən lan. Məto in Uhgin əm itəm təmitəpun io məmə ekol wək u, kən tol nəhlan, ekəike mol.

¹⁸?Kən rəhak nətouən in naka? In əm u, məmə nian ekən-iarəp namnusən təwir, ekən-iarəp ərnapin əm, məsosən nətouən lan, kən tol nəhlan esətapəhən o nat kit, nat ərnapin in tətuatip məmə ekol.

¹⁹Suah kit təsərəmərən lak, məto io emos-iəhau atip io məmə io slef əm rəha netəmim rafin məmə ekiuw-pa tepət kotuwa o Kristo.

²⁰Nian emətan itimat netəm Isrel, emuwa mahmen e netəm Isrel məmə ekiuw-pa ilat kotuwa o Kristo. Kən nat ərnapin Lou təsərəmərən lak, nian emətan itimat netəm koatətəu-pən Lou, emuwa mahmen elat, məmə ekiuw-pa ilat kotuwa o Kristo.

²¹Nian emətan itimat netəm kəsotətəu-pənən Lou, emuwa mahmen elat. Məto esərakinən lou rəha Uhgin, kəp. Lou rəha Kristo tatərəmərə lak. Emol nəhlan məmə ekiuw-pa ilat kotuwa o Kristo.

²²Nian emətan itimat netəm rəhalat nahatətən təsəskasikən, emuwa mahmen elat məmə ekiuw-pa ilat kotuwa o Kristo. Emuwa mahmen e netəmim rafin məmə e nolən min rafin ekiuw-pa neen kotuwa o Kristo.

²³Iatol nəhlan o namnusən təwir məmə io min ekos natimnat wir min rəhan.

²⁴?Nəkotitun o kəp məmə, e naiuən, netəmim rafin koataiu, məto kitiəh əm tatol win? Kən təwir məmə nakotaiu e nolən rəha naiuən itəm nakotalkut pik məmə onəkotol win.

²⁵Netəmim itəm kotolkeike məmə kotuwın e naiuən, kotətuakəm əskasik o rəhalat naiuən. Koatol məmə okotol win e nat kit itəm otəpanikə, məto kitat koatol məmə kitat okotol win e nat kit itəm tətətig lili.

²⁶Tol nəhlan, tahmen e naiuən, esaiu ərnapinən, kən tahmen e boksig, esəht-arəpənən tahmen e etəmim tatəht magoagəp.

²⁷!Kəp! Iatətuakəm kəm nīpətīk məmə otuwa rəhak slef. Iatol nəhlan məmə, nian emən-iarəp namnusən təwir kəm netəmim tepət rəkis məmə ilat okotuwa e naiuən əh, kən io ekəsuwamən mahmen e etəmim itəm təmətgəhl lou rəha naiuən kən kərakin e naiuən.

1 Korin 10

Pol tēmən-iarəp nolən rəha netəm Isrel aupən

¹Piak min ne winik min, iakolkeike məmə nəkotitun məmə nian tīpītīmat min kəmotiet Ijip, ilat rafin, mal napuə təmətəgəhl olat, kən ilat rafin kəmotuwīn-pən itəhəi u katən məmə Nītəhəi Asiə.

²Kən e mal napuə ne nītəhəi, Uhgīn təmol baptais elat rafin məmə okotuwa netəmim rəha Moses.

³Kən ilat rafin kəmotun nagwənən kitiəh əm itəm təmisi-pən e Narmin Rəha Uhgīn,

⁴kən motənim nəhau kitiəh əm itəm təmisi-pən e Narmin Rəha Uhgīn, mətō-inu kəmotənim nəhau e kəpiel rəha Narmin Rəha Uhgīn itəm təmətan ilat min ilat, kən kəpiel əh in Kristo.

⁵Nat əpnapīn ilat kəmotol nəhlan, mətō Uhgīn nīkin təməsagienən olat tepət, kən ilat tepət kəmotīmīs əpəh ikin pīsīn pīsīn min taruən-aruən ikin.

⁶Kən Uhgīn təmegəhan-in natīmnat min əh məmə ilat nəmtətīn min məmə otəhgaiir etat motəgətun itat, kən okəsotolən tīkirilat motələhəu-pən rəhatat nətəligən e nolən rat min tahmen e itəm kəmotol aupən.

⁷Əsotətəu-pənən nolən rəha nəfakən kəm narmi nat min tahmen elat neen kəmoatol aupən. Naoa Rəha Uhgīn tatən məmə, “Netəmim kəmotəpələh məmə okotagwən motənim, kən motətul məmə okotol danis u tiuw-pən ilat tərət ikin.”

⁸Tərət məmə kitat okotit anion nīpītan tahmen elat neen kəmoatol aupən, kən ilat rafin tuente-tri-taosan kəmotīmīs e nian kitiəh əm.

⁹Tərat məmə kitat okotol natimnat itəm otiuw neməha rəha İərəmərə tahmen elat neen kəmoatol aupən, kən sinek tus ilat kotimis.

¹⁰Tərat məmə nakotən nikali Uhgın tahmen elat neen kəmoatol aupən, kən nagelo rəha nimisən tohamnu ilat.

¹¹Kən Uhgın təmegəhan-in natimnat min əh məmə otuwa e nəmegəhən rəhalat, məmə ilat nəmtətin min, kən kəməte ilat məmə okotəhgaiir etat motəgətun itat, itəm koatətig roiu məmə namnun nian tatuwa iuəhkir.

¹²Kən okəmə nikitəmat təht məmə nakotətul əskasik, oatəto wir itəmat, məto-inu itəmat min nəkotitun nəmeən e nolən rat min əh.

¹³Nos-ipən-os-ipənən itəm tatuwa e nəmegəhən rəhatəmat tahmen əm e itəm katol mihin e netəmim rafin. Məto nian rafin, Uhgın tatol rəhan nəghatən, kən otəsegəhan-inən nos-ipən-os-ipənən otuwa e nəmegəhən rəhatəmat məmə in təkəsik maprəkis-in nəsanənən rəhatəmat. Məto nian nos-ipən-os-ipənən tatuwa e nəmegəhən rəhatəmat, Uhgın otol suatip kit məmə onəkotitun nosən nətulən rəhatəmat, məmə nat əh otəsiuw-pənən itəmat e nəratən.

Narmi nat min ne iəfak min

¹⁴Tol nəhlan rəhak min, otagim rəkis e nolən rəha nəfakən kəm narmi nat min.

¹⁵İtəmat netəm kotenatig, kən otakil atip nəghatən rəhak məmə in təwir o tərat.

¹⁶Nian kitat kotagwen e Nagwənən Rəha Nəmtətin Rəha İesu, kən motən kəm Uhgın məmə nikitat tagien o nənimən, kən moatənim nənimən əh, tahmen məmə kitat koatuwa moatol kitiəh kitat Kristo e nitan. ?İatən pahrien, o kəp? Kən nian kitat koatun pıret itəm kotəmkas katoor, kitat koatuwa kitiəh kitat Kristo. ?İatən pahrien, o kəp?

¹⁷Kitat u netəmim tepət, məto kotahmen e nıpətın kitiəh əm, məto-inu pıret kitiəh əm, kən kitat rafin koatun əm pıret əh.

¹⁸Nikitəmat tatəht nolən rəha netəm Isrel. Nian etəm tatol sakrifais kəm Uhgin, kən netənim neen koatun mit itəm kəmol sakrifais lan, tahmen əm məmə ilat rafin kəmotuwa kitiaħ ilat Uhgin e sakrifais əh. ?Inu nipahrienən, o kəp? Əwəh, in nipahrienən.

¹⁹?Naka nipəti rəhak nəghatən min? ?Tahro? ?Iakatən məmə mit itəm katol sakrifais lan kəm narmi nat min nəsanənən əh-ikin rəhalat, o kəp? Kəp. ?O tahro? ?Iakatən məmə narmi nat min, ilat uhgin əlkələh min neen, o kəp? Kəp.

²⁰Məto iakatən məmə nian netənim koatol sakrifais kəm narmi nat min, koatol kəm iərmis min, kəsotolən kəm Uhgin. Kən esolkeikeən məmə nakotuwa kitiaħ itəmat iərmis min.

²¹Okol nəsuwinən mun pīret ne wain e Nagwənən Rəha Nəmtətin Rəha Iesu, kən matig muwin min e niməfak rəha narmi nat min mun sakrifais ne wain rəha iərmis min ilat netəm koatəfak lan.

²²?Tahro? ?Nəkoatol məmə Iəramərə otetet itəmat tahmen e netəm Isrel? ?Nikitəmat təht məmə nəsanənən rəhatat tepət maprəkis-in rəha Uhgin?

²³Itəmat nakoatən məmə, “Təwir əm məmə ekol natimnat rafin itəm iakolkeike.” Məto io ekən məmə, sənəmə ilat rafin koatasitu etəmat. Itəmat nakoatən məmə, “Təwir əm məmə ekol natimnat rafin itəm iakolkeike.” Məto io ekən məmə sənəmə ilat rafin itəm koatasitu e nəmegəhən rəhatəmat.

²⁴Təsəwirən məmə itəmat kit tategəs-in atip rəhan nəwirən, məto tatəkəike megəs-in min rəha netənim min neen.

²⁵Otun əm mit rafin itəm katol-salim-in e maket, kən məsotətapəh-inən nəghatən lan məmə kəmol sakrifais lan kəm narmi nat min, o kəp. Kən nikitəmat təsəht pikən.

²⁶Nolən əh təwir əm məto-inu Naoa Rəha Uhgin tatən məmə, “Nətueintən ne natimnat rafin əh-ikin, ilat rəha Iəramərə.”

²⁷Kən okəmə etəm təsəfakən kit tətapəh-in ik məmə nakuwin e rəhan nimə muagwən, kən nikim tagien məmə onəkuwin, un əm nagwənən naka itəm

tatos-ipinə, məsətapəhən məmə kəmol sakrifais lan kəm narmi nat min o kəp. Nikim təsəht pikən.

²⁸Məto okəmə kit tən-ipinə kəm ik məmə, “Kəmol sakrifais e mit u kəm narmi nat min,” kən təwir məmə nəsunən. Nikim otatəht suah əh, ne nətəligən rəhan.

²⁹Sənəmə nat tərət ron ik, məto in nat tərət e nətəligən rəhan əm. ?Məto tahro nətəligən rəha suah kit min otakil rəhak nolən itəm iakolkeike məmə ekol, kən mahtosig-in io məmə esolən nat kit?

³⁰?Okəmə iatən kəm Uhgın məmə nikik tagien o nagwənən, tahro okən rat io o nat kit itəm emən rəkis kəm Uhgın məmə nikik tagien lan?

³¹Nəukəti nəghatən rafin əh tol nəhlan, nat naka itəm onəkol, o nakagwən, o nakənim, nəkəike mol ilat rafin e nolən itəm otələs-ipər nərgi Uhgın lan.

³²Solən məmə suah kit təme e rəhan nəmegəhən, okəmə in noanol rəha Isrel, o Iaihlua, o suah kit e niməfak rəha Uhgın.

³³Otol nolən əh tahmen e nolən rəhak itəm iatalkut məmə ekol niki netəmim rafin kotagien e nolən min rafin. Iatol nəhlan məto-inu esegəs-in atipən rəhak nəwirən, məto rəha netəmim tepət, məmə Uhgın otosmegəh ilat.

1 Korin 11

¹Otasgəwin io tahmen məmə io iatasgəwin Kristo.

Nolən rəha nəfakən

²Iatənwiwi itəmat məto-inu nəotaluinən io e natimnat rafin itəm emol kən mægətun, kən naskəlimən nəgətunən min tahmen əm məmə eməgətun itəmat lan.

³Məto iakolkeike məmə itəmat rafin nəkotitun məmə rəhn-kapə netəmim rafin in Kristo itəm tərəmərə elat, kən rəhn-kapə pətan in rəhan iərman itəm tərəmərə lan, kən rəhn-kapə Kristo in Uhgın itəm tərəmərə lan.

⁴Suah kit tatol aulis Kristo okəmə təfətain rəhn-kapə nian in tatəghat kəm Uhgın e nəfakən o tatən-iarəp nəghatən itəm Uhgın təmos-ipən kəm in.

⁵Məto pətan tatol aulis rəhan iərman okəmə təsəfətainən rəhn-kapə nian in tatəghat kəm Uhgın e nəfakən o tatən-iarəp nəghatən itəm Uhgın təmos-ipən kəm in. Nolən əh tahmen əm məmə təmak rəhn-kapə.

⁶!Okəmə pətan kit təsotolkeikeən məmə otəfətain rəhn-kapə nəhlan, təwir məmə otəte əm noanun! Məto okəmə in tətəulis o nəteən noanun, o nakən rəhn-kapə, kən təwir məmə otəfətain rəhn-kapə.

⁷Təwir məmə suah kit təsəfətainən rəhn-kapə məto-inu nian Uhgın təmol etəmim, etəmim təmos narmi Uhgın, kən matol-arəp nəwirən rəha Uhgın; məto pətan tatol-arəp nəwirən rəha iərman rəhan.

⁸Tol nəhlan məto-inu iərman təsisi-pənən e pətan, məto pətan təmisi-pən e iərman,

⁹kən Uhgın təməsolən iərman məmə in iasitu rəha pətan, məto təmol pətan məmə in iasitu rəha iərman.

¹⁰Tol nəhlan, pətan otəkəike məfətain rəhn-kapə itəm tatəgətun məmə tətisiai-in rəhan iərman məto-inu nagelo min koatəplan.

¹¹Məto o kitat u kəmotuwa kitiəh kitat İərəmərə, pətan təsatig atipən e iərman, kən iərman min təsatig atipən e pətan,

¹²məto-inu pətan təmisi-pən e iərman, kən tahmen min əm, iərman, pətan təmiləs. Məto natimnat rafin təmisi-pən o Uhgın.

¹³Otakil atip nat u məmə otətuatip məmə pətan itəm tatəfak kəm Uhgın təsəfətainən rəhn-kapə, o kəp.

¹⁴Netəmim rafin kotitun məmə iərman itəm noanun kaifəməh, tatol aulis in.

¹⁵Məto okəmə pətan kit noanun kaifəməh, nikin tagien lan kən kətisiai-in in lan, məto-inu noanun əh Uhgın təmos-ipən məmə otəfətain rəhn-kapə.

¹⁶Məto okəmə suah kit tolkeike məmə otəghat o nat əh, kən iaten nəhlan məmə nolən kit min tikə e itəm u, kən niməfak pisin pisin min rafin koatol tahmen-ahmen əm.

Nagwənən Rəha Nəmtətin Rəha İesu

¹⁷E nəghatən min itəm ekən kəm itəmat əh-roiu, oesənwiwiən itəmat məto-inu nəpələh-kələhən rəhatəmat təsəsiuən, məto tatərəkən əm itəmat.

¹⁸Emaupən məto məmə nian nakoatuəfimin itəmat min məmə nakotəfak, kən moatəhap-əhap itəmat min. Kən nikik təht məmə o nəghatən min əh, neen nipahrienən,

¹⁹məto-inu nəhap-əhapən min otəkəike motuwa məmə okəplan ətuatip məmə pah tatəfak pahrien.

²⁰!Nian nakoatuəfimin itəmat min, nakoatən məmə nakoatun Nagwənən Rəha Nəmtətin Rəha Iesu, məto otəplan-tu nolən u rəhatəmat! Sənəmə Nagwənən Rəha Nəmtətin Rəha Iesu,

²¹məto-inu nian nakotəgwən, itəmat kitieh kitieh koatəkəike əm kəsəsağinən ilat min neen. Kit nəumis tatus əh, kit tinapis rəkis.

²²?Rəhatəmat latuənu tikə məmə nakotaupən motəgwən ikin? ?O itəmat nəsotisiai-inən niməfak rəha Uğin, kən moatol aulis ian-rat min? ?Kən ekən məmə naka kəm itəmat? ?Ekənwiwi itəmat o nolən əh? !Kəp, tiəkis əgin-əh!

²³Məto-inu, eməgətun rəkis itəmat nəgətunən itəm təmisi-pən o İərəməərə. E lapin əh uarisig kegəhan-in-pən e nelmi tikimir min, in təmos pıret,

²⁴kən mən kəm Uğin tagkiu ron, kən məmkas, kən məmə, “Inu nipətik itəm otitəgıt otəmat. Otol mihin kən nikitəmat tatəht io.”

²⁵E nolən kitieh əm, nian kinotəgwən rəkis, in tos kap wain mən məmə, “Kap wain u in nəniəkisən wi rəha nasituən itəm tatuwa e nitak. Otol mihin nian rafin nakoatənim, nikitəmat tatəht io.”

²⁶O nat əh, nian rafin nakotun pıret u, o nakotənim kap wain u, onəkotəkəike motən-iarəp nimisən rəha İərəməərə mətoarus titəlig-pa min.

²⁷Tol nəhlan, etənim pah itəm tatun pıret o tatənim kap wain u rəha İərəməərə e nolən kit itəm təsətuatipən, in tatol təfagə o nərəkənən nipətin ne nita İərəməərə.

²⁸Etənim otəkəike makil rəhan nəmegəhən pitən, uarisig təpanun pīret ne mənīm kap wain,

²⁹məto-inu etənim itəm tatun matənim, məto nīkin təsəht wīrən nīpəti Iərəməre, nunən ne nənīmən itəm in tatol tatiuw-pa atip əm nalpīnən kəm in.

³⁰Məto o nat əh, itəmat tepət nakotərou matīmīs, kən itəmat neen kinotīmīs rəkīs.

³¹Məto okəmə kitat kotakil atip nolən min rəhatat, Iərəməre təsakilən kitat mol nalpīnən kəm kitat.

³²Nian Iərəməre takil kitat mol nalpīnən kəm kitat, in tatol məmə kitat okotətuatip, məmə nian in otakil netənim e nətueintən mən nalpīnən rəhalat məmə okotīmīs, kən kitat okəsotosən nalpīnən əh kitat min ilat.

³³Tol nəhlan piak min ne wīnik min, nian nakotuwa kitīəh məmə nakotagwən, otəsahgin itəmat min.

³⁴Okəmə suah kit nəumīs nus, təwīr məmə otagwən iman ikin latuənu, məmə nian nakoatuəfīmīn, Uhgīn otəsos-ipənən nalpīnən kəm itəmat o nolən min əh rəhatəmat. Nian ekīmṅə, oekos-ipīnə suatip e natīmnat pīsīn neen min itəm nakoatətapəh ron.

1 Korin 12

Nəsanənən pīsīn pīsīn min rəha Narmin Rəha Uhgīn

¹Piak min ne wīnik min, pəs ekəghat e nəsanənən pīsīn pīsīn min rəha Narmin Rəha Uhgīn itəm tatos-ipa kəm kitat, məto-inu iakolkeike məmə itəmat nəkotəkəike motītun.

²Itəmat nəkotītun məmə aupən, nian nəməsotəfakən kəm Uhgīn, katiuw-pən rəhatəmat nətəligən katit itəmat e suatip o nəfakən kəm narmi nat min itəm kəsotəghatən.

³Tol nəhlan, ekən kəm itəmat məmə suah kit tikə itəm tatəghat e nəsanənən rəha Narmin Rəha Uhgīn matən rat Iesu, kən suah kit min okol təsənən məmə, “Iesu in Iərəməre,” məto Narmin Rəha Uhgīn, in əm tol etənim tatən.

- ⁴Nəsanənən pisin pisin min rəha Narmin Rəha Uhgın itəm tatos-ipa kəm kitat, məto koatısi-pən e Narmin Rəha Uhgın kitıəh əm.
- ⁵Kitat koatol wək pisin pisin tepət, məto İərəməərə kitıəh əm itəm koatol wək rəhan.
- ⁶Kitat koatol wək e nolən pisin pisin tepət, məto in Uhgın kitıəh əm itəm tatol wək e nəmegəhən rəha netəmim rafın məmə ilat okoatol wək min əh rafın.
- ⁷Kən Narmin Rəha Uhgın tatos-ipa rəhan nəsanənən pisin pisin min kəm kitat kitıəh kitıəh məmə kitat okotasıtu etat rafın.
- ⁸O suah kit, Narmin tatos-ipən nəghatən rəha nenatıgən. Kən kit min, Narmin kitıəh əm tatos-ipən nəghatən rəha nıtunən nat.
- ⁹Kən kit min, Narmin kitıəh əm tatos-ipən nahatətəən. Kən kit min, Narmin kitıəh əh tatos-ipən nəsanənən o nol-wırən nımısən.
- ¹⁰Kən kit min, tatos-ipən nəsanənən o nolən nat pıspıs min. Kən kit min, tatos-ipən nəghatən min itəm Uhgın tatos-ipa. Kən kit min, tatos-ipən nəsanənən o nakılən narmin pisin pisin min. Kən kit min, tatos-ipən nəsanənən rəha nənən nəghatən ik pisin min. Kən kit min əh, tatos-ipən nəsanənən o nənən nıptətı nəghatən ik pisin min əh.
- ¹¹Nəsanənən min əh ilat rafın, koatısi-pən əm e Narmin kitıəh əm, kən tatos-ıpa kəm kitat kitıəh kitıəh e suatıp min itəm in əm tolkeıke.
- ¹²Nıpətı etəmim in kitıəh əm, məto nolın-olın tepət; kən nat əpnapın nolın-olın pisin pisin min, ilat koatılpin e nıpətın kitıəh əm. Kən tol nəhlan, tahmen-amen əm e Kristo.
- ¹³Kitat neen, kitat noanol min rəha Isrel, kitat neen İaihluə min, neen slef min əm, neen sənəmə slef min, məto Narmin Rəha Uhgın kitıəh əm təmol baptais e kitat rafın agın-əh məmə, kəmotuwa nıpətı Kristo kitıəh əm, kən kitat kəmos Narmin Rəha Uhgın u kitıəh əm.
- ¹⁴Otətəlig-in, nıpətı etəmim kəməsölən nolın kitıəh əm, məto nolın tepət.

¹⁵Okəmə nelkin tatən məmə, “Sənəmə io nelmin, kən tol nəhlan, sənəmə io noli nīpətīn kit,” kən nəghatən rəhan təsolən məmə nelkin in sənəmə nolīn nīpətīn məsīn.

¹⁶Kən okəmə matəlgin tən məmə, “Sənəmə io nīganəmtīn, kən tol nəhlan, sənəmə io noli nīpətīn kit,” kən nəghatən rəhan təsolən məmə matəlgin in sənəmə noli nīpətīn məsīn.

¹⁷?Okəmə nīpətīn in nīganəmtīn rafīn əm, kən otahro mətō nat? ?Kən okəmə nīpətīn in matəlgin rafīn əm, kən otahro mətō nəmīəwīn nat?

¹⁸Mətō kəp, Uhgin təmoor nolīn-olīn nīpətīn ilat rafīn itəm in tolkeike məmə ilat okotol mihīn.

¹⁹?Okəmə ilat rafīn nolīn kitīəh əm, kən nīpətīn pəhrūən ikīn?

²⁰Mətō nīpahriənən, nolīn-olīn tēpət, mətō nīpətīn kitīəh əm.

²¹Nīganəmtīn okol təsənən kəm nelmin məmə, “Io ekapəs ik, io enahmen rəkis.” Kən rəhn-kapə okol təsənən kəm nelkin mil məmə, “Io ekapəs itəmlau, io enahmen rəkis.”

²²Təsolən nəhlan. Nolīn-olīn nīpətītāt itəm nīkitāt təht məmə ilat kotərou agīn, ilat nat keike o nīpətītāt.

²³Kən nolīn-olīn nīpətītāt itəm nīkitāt təht məmə ilat nat əpnapīn əm, koatol nolən rəha nīsiāiīən elat. Kən nolīn-olīn rəha naulisən, kitāt koatehm wir ilat.

²⁴Mətō nolīn-olīn nīpətītāt itəm təsolən naulisən, kitāt kəsotolən nat agīn elat. Mətō Uhgin təmuəfīmīn nolīn-olīn nīpətītāt mīn, kən matisiāi-in nolīn-olīn mīn itəm kitāt koatehm-pən əm ilat.

²⁵Kən e nolən əh, nolīn-olīn nīpətītāt okəsotəhap-əhapən ilat mīn, mətō ilat okoatehm wir ilat mīn rafīn.

²⁶Okəmə nolīn məsīn tatətō nahməən, kən nolīn mīn ilat rafīn okotətō nahməən ilat mīn. Kən okəmə nolīn məsīn katos-ipən nīsiāiīən kəm in, kən nolīn mīn rafīn okotagīen ilat mīn.

²⁷Nipəti nəghatən u məmə itəmat nipəti Kristo, kən itəmat rafin kitih kitih, itəmat nolin min rəha nipəti Kristo.

²⁸Kən e niməfak, Uhgın təmaupən mələhəu-pən aposol min, kən uarisig un, ien min, kən uarisig un, iəgətun min. Kən təmələhəu-pən netəm koatol nat pispis, ne ilat itəm koatol-wir nimisən min, kən netəm kotasitu e netənim, kən netəm kotenatig itəm kotasitu o nənən rəha niməfak, kən netəm koatəghat e nəghatən ikin pisin min.

²⁹?Netənim rafin aposol min? ?O netənim rafin ien min? ?O netənim rafin iəgətun min? ?O netənim rafin nol nat pispis?

³⁰?O netənim rafin koatol-wir nimisən min? ?O netənim rafin koatəghat e nəghatən ik pisin min? ?O netənim rafin koatən-iarəp nipəti nəghatən ik pisin min? Kəp, təsolən nəhlan.

³¹Məto təwir məmə nakotələhəu-pən əskasik nətəligən rəhatəmat o nosən nəsanənən pisin pisin min itəm Narmin Rəha Uhgın tatos-ipa, ilat min əh itəm kotəwir agin. Məto roiu ekən-ipinə suatip wir agin-əh.

1 Korin 13

Nolkeikeən

¹Okəmə iatəghat e nəghatən rəha netəm ik pisin min, o nəghatən rəha nagelo min, məto esosən nolkeikeən e nikik, iatəghat pik əm tahmen e suah kit itəm tatoh nuwigi dram, o tatoh əpnəpin əm bel.

²Okəmə iatos nəsanənən itəm Narmin Rəha Uhgın tatos-ipa o nən-iarəpən nəghatən min itəm Uhgın tatos-ipa, məto esosən nolkeikeən e nikik, io nat əpnəpin əm. Kən okəmə ekitun nat anion rafin ne nitunən rafin, məto esosən nolkeikeən e nikik, io nat əpnəpin əm. Kən okəmə rəhak nahatətəən təskasik məmə otol nitot kit tiet, məto esosən nolkeikeən e nikik, io nat əpnəpin əm.

³Okəmə ekəmki-pən rafin rəhak natimnat kəm ian-rat min, o ekegəhan-in nipətik məmə nigəm otus, məto esosən nolkeikeən e nikik, esolən win e nat kit.

⁴Nolən rəha nolkeikeən tol nulan: suah kit rəhan nətəligən təfəməh, kən matol təwir kəm netəmim, kən məsetəhakən e netəmim, kən məsos-ipər atipən, kən məsausit pikən,

⁵kən məsol-pənən netəmim, məsalkutən o nərpin, kən nikin təsahmə uəhaiən, kən təsaskəlim-iəkisən e nikin nərətən itəm suah kit tatol lan.

⁶Kən nikin təsagienən o nolən rat min, məto nikin tagien əm o nolən wir min rəha nıpahrienən.

⁷Nolən rəha nokeikeən tol nulan: nat ərnapın suatip rəha suah kit tiəkis, məto nian rafın suah əh tatətəu-pən əm, məsəhlmanən rəhan nahatətəən nian kit, kən nian rafın tatələhəu-pən əskasik rəhan nətəligən e Uhgın, rəhan nahatətəən tatətul əm nulan e nian rəha nərətən.

⁸Nolən rəha nolkeikeən namnun tikə. Məto rəha nən-iarəpən nəghatən itəm Uhgın tatos-ipa, otəpanikə. Rəha nəghatən ik pisin min, okotəpanikə. Rəha nitunən nat, otəpanikə.

⁹Tol nəhlan məto-inu nitunən rəhatat noan məsin əm, kən koatən-iarəp nəghatən itəm Uhgın tatos-ipa noan məsin əm.

¹⁰Məto nian Iesu Kristo otuwa min mol ətuatip natimnat rafın, kən nəsanənən min itəm Narmin Rəha Uhgın tatos-ipa roiu okotikə.

¹¹Nian ematəkəku, ematəghat tahmen e suakəku, kən nitunən rəhak tahmen e rəha suakəku, kən nolən rəha nətəligən rəhak tahmen e rəha suakəku. Məto nian emuwa mol etəm-iasol in io, emələhəu nolən min rəha suakəku e məntaak.

¹²Roiu, kitat koatəplan noan məsin əm tahmen e suah kit itəm tateranəm e klas itəm toapoap. Məto e nian əh, kitat okotəplan əsas nıganəmti Uhgın. Roiu, ekitun noan məsin əm, məto e nian əh, epanitun əsas natimnat rafın, tahmen məmə Uhgın titun mihin io əh-roiu.

¹³Kən roiu, nolən miləhal u kisil kətəhalətul: nolən rəha nahatətəən, nolən rəha nələhəu-pənən əskasik nətəligən e Uhgın, ne nolən rəha nolkeikeən. Məto itəm təwir pik agın eləhal, in nolən rəha nolkeikeən.

1 Korin 14

Nən-iarəpən nəghatən itəm Uhgın tatos-ipa, ne nənən nəghatən ik pisin min

¹Otalkut əskasik məmə nolkeikeən otərəməyə e nəmegəhən rəhatəmat, kən motalkut əskasik məmə onəkotos nəsanənən min itəm Narmin Rəha Uhgın tatos-ipa, kən otalkut pik təhmīn min o nəsanənən rəha nən-iarəpən nəghatən itəm Uhgın tatos-ipa.

²Ekən nəhlan məto-inu itəmat kit itəm tatəghat e nəghatən ik pisin min, təsəghatən kəm netəmim, məto tatəghat əm kəm Uhgın. Pahrien, suah kit tikə itəm titun nəghatən itəm in tatən, məto in tatən-iarəp nəghatən anion min e Narmin Rəha Uhgın.

³Məto netəmim rafin itəm kotən-iarəp nəghatən itəm Uhgın tatos-ipa, koatən kəm netəmim o niləkinən ilat, o niləs-ipərən nətəligən rəhalat, kən o nasituən mīləs-ipər nīkilat.

⁴Etəmim itəm tatəghat e nəghatən ik pisin min, tatiləkin atip əm in, məto etəmim itəm tatən-iarəp nəghatən itəm Uhgın tatos-ipa, tatiləkin niməfak.

⁵Iakolkeike məmə itəmat rafin agin-əh nakotəghat e nəghatən ik pisin min, məto təwīr pik məmə nakotən-iarəp nəghatən itəm Uhgın tatos-ipa. Etəmim itəm tatən-iarəp nəghatən itəm Uhgın tatos-ipa, in tətəsitu pik e niməfak taprəkis-in etəmim itəm tatəghat e nəghatən ik pisin min mətoarus in tən nīpətīn məmə otīləkin niməfak.

⁶Piak min ne wīnik min. ?Okəmə iatuwa otəmat kən matəghat e nəghatən ik pisin min, tahro nulan io iakəwīr otəmat okəmə esol-arəpən nəghatən neen itəm kəmoatəhluaig aupən, o esosən nitunən neen, o nəghatən itəm Uhgın tatos-ipa, o nəghatən rəha nəgətunən?

⁷Otətəlig-in o natimnat tahmen e nau itəm kətahl, o kita itəm katoh. Natimnat min əh kəsotəmegəhən, etəmim əm tatol ilat kotagət. Məto okəmə kəsotagət ətuatipən, kən itəmat onəkotəruru məmə napuən naka ilat koatan.

⁸Kən okəmə təwī təsagət ətuatipən, kən netəmim okotəruru məmə kotəkəike motol əpen-əpenə o nəluaginən.

⁹Məto tahmen əm etəmat. ?Okəmə noatəghat e nəghatən itəm netəmim kotəruru, tahro nulan okotitun nıpəti nəghatən nakoatən? Itəmat onəkotəghat əm kəm magoagəp, məto netəmim kəsotosən nıpətin.

¹⁰Pahrien məmə nəghatən min tepət e nətueintən, məto ilat rafin nıpətilat əh-ikin.

¹¹Kən okəmə esitunən nıpəti nəghatən itəm suah kit tatən-ipa kəm io, io iapispis kəm in, kən in iapispis kəm io.

¹²Tahmen əm etəmat. Itəmat nakotolkeike nəsanənən min rəha Narmin Rəha Uhgın, kən tol nəhlan, otalkut məmə nakotiləkin niməfak e nəsanənən min itəm okotasitu pık lan.

¹³Məto-inu o nat əh, okəmə itəmat kit tatəghat e nəghatən ik pisin min, otəkəike məfak min məmə Uhgın otos-ipən nıpəti nəghatən u məmə otən-iarəp kəm niməfak.

¹⁴Okəmə iatəfak e nəghatən ik pisin min, nıkik tatəfak məto nətəligən rəhak tatətul əpnapin əm.

¹⁵?Kən ekahro? Ekəfak e nıkik, məto ekəfak min e nətəligən rəhak. Kən ekan napuən e nıkik, məto ekan min napuən e nətəligən rəhak.

¹⁶?Okəmə nakatənwiwi Uhgın e nıkim e nəghatən pisin, tahro suah kit itəm təruru nəghatən u in otən “Əwəh” e rəham nəfakən, məto-inu in təruru nat itəm nakatən?

¹⁷Kəm-naka natənwiwi wir Uhgın, məto nəsiləkinən etəmim pisin kit min.

¹⁸Iatən tagkiu kəm Uhgın məmə iatəghat e nəghatən ik pisin min taprəkis-in itəmat rafin.

¹⁹Məto e niməfak, okəmə iatəgətun netəmim e nəghatən faif əm itəm kotitun, inu təwir agin maprəkis-in məmə ekən nəghatən ten-taosan e nəghatən pisin itəm kinotəruru.

²⁰Piak min ne winik min. Sotolən nətəligən rəhatəmat tahmen e nisualkələh. Təwir məmə nəkotahmen e nisualkələh itəm kotəruru əh nolən rat. Məto e nətəligən rəhatəmat, təwir məmə nakotimətə.

²¹Kəməte nəhlan e Lou rəha Moses məmə, “Ekol məmə netəm koatəghat e nəghatən ik pisin min okotən rəhak nəghatən kəm rəhak netəmim. Kən ilat okotəto nəghatən min rəha iapispis min, Məto nat əpnəpin ilat okotəto nat əh itəm tol pisin, okol kəsotətəlig-inən io. İrəmərə tatən mihin.”

²²Tol nəhlan, nəghatən ik pisin min, in nəmtətin kit rəha netəmim itəm kəsotəfakən, sənəmə nəmtətin kit rəha iəfak min. Məto nian suah kit tatən-iarəp nəghatən itəm Uhgın tatos-ipa, in rəha iəfak min, sənəmə rəha netəm kəsotəfakən.

²³?Tol nəhlan, okəmə niməfak apiəpiə tatuəfimin, kən netəmim rafin koatəghat e nəghatən ik pisin min, kən ilat neen itəm kəsotitunən, o netəm kəsotəfakən kotuwa imə, ilat okotən məmə itəmat nakotalmə, o kəp?

²⁴Məto okəmə etəm təsəfakən kit, o etəm təruru tuwa imə nian netəmim rafin koatən-iarəp nəghatən itəm Uhgın tatos-ipa, kən nəghatən rəhatəmat otek nikin, kən in otitun məmə in iol təfagə, kən nəghatən min əh otakil rəhan nolən,

²⁵kən rəhan təfagə min itəm koatəhluaig otuwa e nəhag-əhagən. O nat əh, in otiet morin e nisiiən matəfak kəm Uhgın, matən-iarəp məmə, “!Itəmat pahrien Uhgın nakoatan!”

Nələhəu ətuatipən nolən rəha nəfakən

²⁶Piak min ne winik min. Pəs iakən nipəti rəhak nəghatən min roiu. Nian itəmat rafin nakotuwa kitiəh e nuəfiminən o nəfakən, itəmat rafin kitiəh kitiəh rəhatəmat əh-ikin wək o nolən, neen koatan napuən, neen katəgətun ilat, neen koatol-arəp nəghatən neen itəm kəmoatəhluaig aupən, neen koatəghat e nəghatən ik pisin min, neen koatən nipəti nəghatən min əh. Onəkotəkəike moatol natimnat min əh o niləkinən niməfak təskasik.

²⁷Okəmə netəmim neen koatəghat e nəghatən pisin, kəiu o kəm-naka kisil əm okotəghat. Kit otən rəhan u, uarisig kit, kənu kit min tən rəhan, kən suah kit otəkəike mən nipəti nəghatən min əh.

²⁸Okəmə etəmim tikə o nən-iarəpən nipəti nəghatən min əh, etəm itəm otəghat e nəghatən pisin, otəkəike məsəghatən e niməfak, kən məghat anion kəm Uhgīn.

²⁹Təwir məmə ien kəiu o kisil okotəghat, kən netəmim neen okotakil wir nəghatən koatən.

³⁰Kən okəmə Uhgīn tatol əp nəghatən kit itəm təmatəhluaig aupən tatuwa o suah kit itəm tatəpələh, təwir məmə etəm təmaupən matəghat otapəs nəghatən.

³¹Tol nəhlan, itəmat itəm nakotən-iarəp nəghatən itəm Uhgīn tatos-ipa, kit otaupən məghat, kənu kit min, u kit min məmə nakotəgətun netəmim rafin, kiləs-ipər nətəligən rəhalat.

³²Sotaluinən məmə ien min koatərəməərə e nikilat məmə kotitun nən-iarəpən nəghatən rəhalat e nian itəm in tətuatip o nənən,

³³məto-inu Uhgīn sənəmə in Uhgīn rəha nolən nəruruən e nat, məto in Uhgīn rəha nəməlinuən, tahmen e niməfak min rafin.

³⁴Nian katəfak lan, nipitan okəsotagətən, məto-inu təsətuatipən məmə okotəghat. Məto okotəkəike moatətəlig-in netəm-iasol rəha niməfak, tahmen əm e itəm Lou tatən mihin.

³⁵Okəmə kotalkeike məmə kotitun nat kit, okotəkəike kətapəh o rəhalat nəman min əpəh latuənu, məto-inu tol naulisən məmə pətan otəghat əpəh e niməfak.

³⁶?Tahro? ?Nikitəmat təht məmə nəghatən rəha Uhgīn təmaupən miet-arəpa otəmat? ?O nikitəmat təht məmə nəghatən rəha Uhgīn təmuwa əm otəmat?

³⁷Okəmə itəmat kit nikin təht məmə in ien kit, o Narmin Rəha Uhgın təmos-
ipən nəsanənən kit kəm in, in otəkəike mən nıpahrienən e nəghatən itəm
iatəte kəm itəmat məmə in nəwia İərəmərə.

³⁸Okəmə tapəs nənən nıpahrienən e nəghatən u, in okəsən minən nıpahrienən
e rəhan nəghatən.

³⁹Tol nəhlan, piak min ne winik min, təwir məmə nakotolkeike məmə
nakotən-iarəp nəghatən itəm Uhgın tatos-ıpa, kən məsotətlosig-inən nənən
nəghatən ik pisin min.

⁴⁰Məto e natimnat rafın agın itəm nəkoatol e nəfakən, otol e nolən itəm in
tətuatıp o niməfak, motətəu-pən wir nolən rəha nəfakən.

1 Korin 15

Kristo təməmegəh min e nimisən

¹Piak min ne winik min. İakolkeike məmə ekən-iarəp min kəm itəmat
namnusən təwir itəm ematən-iarəp kəm itəmat aupən, nəmotos e nikitəmat,
kən motos rəhatəmat ikin nətulən lan.

²Okəmə nakotaskəlim əskasik namnusən təwir ətuatıp itəm io emən-iarəp
kəm itəmat, Uhgın otosmegəh itəmat lan. Məto okəmə nakotapəs nat ətuatıp,
motahatətə e nəghatən pisin, kən nahatətən rəhatəmat in nat əpnapın əm.

³Natimnat itəm io eməto, ilat nat keike, kən enən-ıpinə rəkis kəm itəmat
məmə, Kristo təmimis o rəhatat nolən rat min tahmen e Naoa Rəha Uhgın
təmən rəkis mihin,

⁴kəmitənim, kən təmegəh min e nimisən e nian itəm tatol kisil lan tahmen əm
e Naoa Rəha Uhgın təmən rəkis mihin,

⁵kən təmaupən miet-arəp o Pita, uarisig u, o rəhan netəm tuelef.

⁶Uarisig lan, in təmiet-arəp min o piətət min taprəkis-in faif-hanrit e nian
kitiəh əm, u ilat tepət koatəmegəh əh, məto neen kinotimis rəkis.

⁷Kən uarisig, tiet-arəpa o Jemes, kən o aposol min rafın.

⁸Kən uarisig elat rafin, in təmiet-arəpa min ron io, nat ərnaşin io ekahmen e suakəku itəm təsaiirən e nian ətuatip rəhan.

⁹Tol nəhlan, io ləhau agin e aposol min rafin, kən esahmenən məmə netəmim okotaun-in io məmə io aposol kit, məto-inu ematol nəratən kəm niməfak rəha Uhgın aupa.

¹⁰Məto e nəwıreən itəm Uhgın təmawte-in kəm io, emuwa mahmen nulan roiu, kən nəwıreən əh təsuwa ərnaşinən məto noan əh-ikin. Nıpahrienən, emol wək taprəkis-in rafin aposol min, məto sənəmə e rəhak əm nəsanənən, məto e nəwıreən əm itəm Uhgın təmawte-in kəm io.

¹¹Nat ərnaşin io emən-iarəp, o ilat kəmotən-iarəp namnusən təwir kəm itəmat, məto nəghatən u inu itəm iatən-iarəp, namnusən təwir itəm nəmotən nıpahrienən lan.

Nəmegəhən e nimisən rəha netəm kəmotimis

¹²?Məto okəmə kəmatən-iarəp məmə Kristo təməmegəh min e nimisən, kən tahro itəmat neen nakoatən məmə netəm kəmotimis okol kəsotəmegəh minən?

¹³Məto okəmə nəghatən rəhatəmat in nıpahrienən, məmə netəm kəmotimis kəsotəmegəh minən, kən okol Kristo min təməmegəhən e nimisən.

¹⁴Kən okəmə Kristo təməmegəhən e nimisən, kən wək rəhatimat o nən-iarəpən namnusən təwir, in nat ərnaşin əm, tahmen min əm e nahatətəən rəhatəmat.

¹⁵Nat kit min nəhlan, okəmə Kristo təməmegəhən e nimisən, itimat emoateiuə e Uhgın məto-inu emotən-iarəp məmə Uhgın təmosmegəh Kristo e nimisən. Məto okəmə netəm kəmotimis ko kəsotəmegəh minən e nimisən, kən okol Uhgın təsosmegəhən Kristo e nimisən.

¹⁶Məto-inu okəmə netəm kəmotimis ko kəsotəmegəh minən e nimisən, kən okol Kristo təməmegəh minən e nimisən.

¹⁷Kən okəmə Kristo təməmegəh minən e nimisən, kən nahatətəən rəhatəmat nıpətin tikə, kən itəmat noatatig əh e təfagə rat min.

¹⁸Kən netəmim itəm kəmotən nīpahrienən e Kristo itəm kinotimis rəkis, ilat min kəmotakiəh.

¹⁹!Okəmə koatələhəu-pən əskasik rəhatat nətəligən e Kristo o nəmegəhən əm rəhatat e nətueintən, kəsi, təwir məmə netəmim okotəto tərət otəmat maprəkis-in netəmim rafin məto-inu, kəm-naka kitat kəmotəmkakiə!

²⁰!Məto kəp! Nīpahrienən məmə Kristo təməmegəh min pahrien e nīmīsən. In təmaupən e netəm rafin itəm kəmotimis kən məmegəh min e nīmīsən, kən okol təsīmīs minən.

²¹Otətəlig-in. Nīmīsən tinuwa e nətueintən e etəmim kit, kən e suatip kitīəh əm, nəmegəh minən e nīmīsən təmuwa e etəmim kit.

²²Tol nəhlan, netəmim rafin okotimis məto-inu kəmotisi-pən e Atam, kən tahmen-ahmen əm, netəmim rafin itəm kəmotuwa kitīəh ilat Kristo okotəmegəh min.

²³Məto ilat min u, okotəmegəh min e nian ətuatip rəhalat. Kristo in təmaupən məmegəh min, kən nian in otuwa min, rəhan min okotəmegəh min.

²⁴Kən namnun nian otuwa. In otərəkin nərəməərən rafin, ne nepətən rafin, ne nəsanənən rafin. Uarisig lan, in otəhlman-pən nərəməərən rəhan e nelmi Uhgīn Tata.

²⁵Tol nəhlan məto-inu, in təike matərəməərə mətoarus məmki-pa rəhan tikimīr min meguətāin ilat e nelkin.

²⁶Namnu rəhan tikimīr itəm otərəkin, in nīmīsən. Kən nīmīsən otikə min,

²⁷məto-inu “tīnəmki-pa natimnat rafin meguətāin e nelkin.” Otətəlig-in-tu, nian tatən məmə natimnat rafin agin-əh tinateguətāin e nelkin, nəkotəplan məmə sənəmə Tata Uhgīn min əh-ikin e nelkin. In Uhgīn itəm təmələhəu-pən natimnat rafin agin-əh ləhau e nelki Kristo.

²⁸Nian Uhgīn tinol natimnat min əh, kən Nətīn atip otuwa ləhau e nərəməərən rəha Uhgīn itəm təmələhəu-pən natimnat rafin e nelkin, məmə Uhgīn əm otərəməərə e natimnat rafin.

²⁹Otətəlig-in-tu. ?Tahro e netəmim itəm katol baptais elat o netəm kinotimis rəkis? ?Okəmə netəm kəmotimis kəsotəmegəh mīnən nian kit, kən tahro katol baptais e netəmim olat?

³⁰?Kən tahmen əm etimat, tahro ioatiləs pikən nian əskasik min e nəmegəhən rəhatimat nian rafin?

³¹!Iatos noanawil, piak min ne winik min, məmə netəmim kotalkut məmə okotohamnu io e nian tepət! Nəkotitun məmə inu nīpahrienən tahmen-ahmen məmə iatausit o nahatətəən rəhatəmat e Kristo Iesu Iərəməərə rəhatat.

³²?Okəmə eməluagin e nat megəh min itəm koaton itəm əpəh Efesas o nətəligən rəha netəmim əm, emol win e naka? Okəmə netəm kəmotimis kəsotəmegəh mīnən, pəs kotol əm tahmen e nəghatən u itəm tatən məmə, “Pəs kotagwən motənim, mətə-inu olawig kotimis.”

³³Sotolən netəmim koteiuə-in itəmat. Inu nīpahrienən itəm suah kit təmən, “Nian netəm rəhalat nolən təwir koatan ilat netəm kotərat, netəm kotərat koatərəkin nolən wir rəhalat.”

³⁴Otitəlig-pa min motos ətuatip nenatigən rəhatəmat itəm tətəuati məmə nəkotol mihin, kən motəhlman təfagə rat min, mətə-inu itəmat neen kotəruu əh Uhgīn, kən inu nat kit rəha naulisən.

Nipəti etəm təmimis tatəmegəh min

³⁵Mətə okəmə netəmim neen kotətapəh məmə, “?Etəm təmimis okotəmegəh ahro nulan? ?Okotos nīpəti naka motuwa?”

³⁶!Nəghatən əh talməl! Nīkuti nat itəm nəməfe, otəkəike mīmis pitən, uarisig u təpanəmegəh.

³⁷Nian nakəfe nīkuti nat, nə səfəən nəukətīn itəm otuwa, mətə nīkuti nat əm, kəm-naka in nīkuti wit o nat pisin kit.

³⁸Mətə Uhgīn tol tatəwiə e nəukətīn itəm in tolkeike mihin, kən e nīkutin nat rafin, in əm tatos-ipa nīpətilat.

³⁹Nipətīlat rafin kəsotahmen-ahmenən. Nipəti etəmim tol pisin e rəha nat megəh min, ne mənig min, ne nəm itəhəi.

⁴⁰Əpəh e neai, natimnat əh-ikin, kən e nətueintən natimnat min əh-ikin tol pisin. Nian kotəplan nat əpəh ilis e neai məmə in təwir, rəhan nəwīrən in tol pisin e nəwīrən rəha nat əpəh ləhau e nətueintən.

⁴¹Kən nəhag-əhagən rəha mitgar tol pisin e nəmihlən rəha məwig ne nasiəən rəha məhau min. Kən nasiəən rəha məhau min neen, kotol pisin e rəha neen min.

⁴²Kən tahmen-ahmen əm e nipəti netəm kəmotimis itəm koatəmegəh min. Nipətin itəm kəmitənim otəmnəmit, məto nian otəmegəh min, otəsəmnəmit minən.

⁴³Nian katitənim, in nat kit itəm netəmim kəsotolkeikeən, məto nian otəmegəh min, in nat kit itəm netəmim okotəplan rəhan nəwīrən. Nian katitənim, nəsanənən rəhan tikə, məto nian otəmegəh min, təsanən.

⁴⁴Nian katitənim nipətitat, in nat rəha nətueintən, məto nian otəmegəh min, in nat rəha nego e neai. Okəmə nipətin əh-ikin rəha nətueintən, rəha nego e neai min əh-ikin.

⁴⁵Naoa Rəha Uhgīn tatən məmə, “Etəm tətəupən agin-əh, Atam, təmuwa mos namegən.”Kən namnu Atam, inu Kristo, təmuwa narmin u tatos-ipa nəmegəhən.

⁴⁶Nat rəha narmin təməsaupənən muwa, məto nat rəha nətueintən, uarisig lan nat rəha narmin təpanuwa.

⁴⁷Etəm təmaupən agin, kəmol e nimoulul rəha niməptən, məto etəm tatuarisig u Kristo, təmisi-pən e nego e neai.

⁴⁸Netəmim rafin rəha nətueintən, nipətilat kotahmen e nipəti Atam, məto netəmim itəm okotuwin e nego e neai, nipətilat okotahmen e nipəti Kristo, etəm u təmisi-pən ikin.

⁴⁹Roiu kitat kotahmen e Atam u rəha nətueintən, kən tol nəhlan, o nian kit okotahmen e Kristo u rəha nego e neai.

⁵⁰Iatən-iarəp kəm itəmat, piak min ne winik min məmə, nipətın ne nita etənim otəsuwinən e nərəməərən rəha Uhgın, kən tahmen-ahmen əm, nat itəm otəmnəmit otəsosən nat itəm tətətig lili.

⁵¹Otətəlig-in-tu, kən oekən nat anion məmə, sənəmə kitat rafin okotimis, məto Uhgın otol nipətıtət rafin tuwiwi,

⁵²in otol uəhai əm tahmen e nipitən, nian namnu təwi rəha Uhgın otasək, məto-inu təwi otasək, kən netəm kəmotimis okotəmegəh min məsotimis minən, kən Uhgın otol nipətıtət tuwiwi.

⁵³Tol nəhlan məto-inu, nat itəm otəmnəmit otəkəike muwin e nat itəm otəsəmnəmitən, kən nat itəm otimis otəkəike muwin e nat itəm otəsəmisən mətatig lili.

⁵⁴Nian nat itəm tətəmnəmit təmuwin e nat itəm təsəmnəmitən, ne nat itəm otimis təmuwin e nat itəm otəsəmisən mətatig lili, kən nəghatən itəm kəməte otuwa nipahrienən, tatən məmə, “Nəluaginən tinol namnun. Uhgın təmol win agin. Nəmisən tinikə.”

⁵⁵“!Ei, Nəmisən! ?Onakahrol nulan mol win etimat? !Ei, Nəmisən! ?Onakahrol nulan mus itimat?”

⁵⁶Təfagə rat in tahmen e nat kit tatus itəm kən matuwa in nəmisən, kən Lou tatol təfagə rat nəsanənən rəhan tepət.

⁵⁷!Məto pəs kotənwıwi Uhgın! Tatol məmə kitat koatol win e rəhatat İərəməərə İesu Kristo.

⁵⁸Tol nəhlan, piak min ne winik min, otətul əskasik. Sotegəhan-inən nat kit təloal etəmat. Nian rafin, otol wək rəha İərəməərə e nikitəmat rafin, məto-inu nəkotıtun məmə wək rəha İərəməərə itəm nəkoatol, sənəmə nat əpnəpin əm.

1 Korin 16

Məni o nasituən e iəfak min əpəh Jerusalem

¹Roiu iakən mənī o nasituən e iəfak min əpəh Jerusalem. Otol tahmen əm məmə emən mihin kəm niməfak min əpəh profens əh Kalesia.

²E Sante min rafin, itəmat rafin kitiah kitiah otəkəike mələhəu kalin mənī neen. Etənim itəm in tatos mənī asol, otələhəu kalin tepət, kən etənim itəm tatos mənī əkəku, otələhəu kalin noan məsin. Tol nəhlan, nian ekimnə, okol nəkəsotalkut minən o nolən mənī ilat rafin nian kitiah əm.

³Kən otətgi-arəp itəmat neen məmə okotəmik mənī motuwīn, kən nian ekimnə, ekəte naoa mən-iarəp ilat kəm netəm Jerusalem, kən mahl-ipən ilat kotəmik mənī motuwīn əpəh ikin.

⁴Okəmə ekəplan məmə təwīr məmə io min ekuwīn, kən ilat okotətəu-pa io.

Naliwəkən min rəha netəm-iasol min neen

⁵Uarisig epanimnə muag itəmat, ekuwīn-pən Masetonia, mətə-inu ekaupən muwīn muag niməfak min əpəh ikin.

⁶Kəm-naka ekatig məsin kitat min itəmat, mə kəmə tahro, koatatig əm mətəarus nətəpən tol namnun. Tol nəhlan, nəkotitun nasituən lak e rəhak naliwəkən itəm iatuwīn-pən min ikin.

⁷Esolkeikeən məmə ekimnə məplan itəmat u miet min, mətə iakolkeike məmə ekimnə kotatig məsin okəmə Iərəməərə tegəhan-in io.

⁸Mətə etatig əm Efesas mətəarus nian rəha Pentekos, lafet rəha Nagwənən Wi,

⁹mətə-inu Uhgīn təmerəh e suatip asol ron io məmə ekol wək təwīr itəm otəe-in noan tepət, nat əpnəpīn netənim tepət kotalkut məmə okotahtosig-in io o nolən wək.

¹⁰Okəmə Timoti timnə məplan itəmat, otol təwīr kəm in motos-ipən nisaiiən kəm in, mətə-inu in tatol wək rəha Iərəməərə tahmen əm lak.

¹¹Sotolən məmə itəmat kit tatehm əhau in. Otahl-ipa tuwa kən motasitu lan e rəhan naliwəkən məmə otitəlig-pa ron io. Iatəsahgin piatat min ilat Timoti məmə okotuwa motehm io.

¹²Kæn e piatat Apolos, emətapəh əskasik məmə in otəkəike mətəu-pən piatat min mimnə məplan itəmat. In təsolkeikeən pik məmə otimnə əh-roiu, mətə in otimnə e nian itəm tətuatip ron.

¹³Otegəs. Otətul əskasik e nahatətəən rəhatəmat. Məsotəginən. Motol nətəligən rəhatəmat təskasik.

¹⁴Natimnat rafin agin itəm itəmat nəkoatol, otol e nolkeikeən.

¹⁵Itəmat nəkotitun məmə Stefanas ne rəhan min, ilat kəmotəupən motən nipahrienən e Iesu əpəh Akaea, kæn ilat kotalkut əskasik o nasituən e iəfak min. Iatən əskasik kəm itəmat piak min məmə,

¹⁶otisiai-in ilat motol nəwialat, ne netəmim rafin itəm koatol pik wək o niməfak.

¹⁷Nikik təmagien nian Stefanas, ne Fotunatas, ne Akaekas kəməhaliet-arəpa, mətə-inu nat ərnapin itəmat nakotikə, mətə nian eməplan iləhal, tahmen əm məmə eməplan itəmat.

¹⁸Iləhal kəməhaləs-ipər pik rəhak nətəligən tahmen əm məmə kəməhalol etəmat. Netəm kotol nəhlan, okəike kisiai-in ilat.

Namnun nəghatən rəha Pol

¹⁹Niməfak min e profens əpəh Esia koatən təwir kəm itəmat. Akwila ne Prisila kioalkeike pik məmə okuən təwir kəm itəmat e nərgi Iərəmərə ilat iəfak min itəm kəmotuəfimīn e nimə rəhalau.

²⁰Piatat min rafin ikin-u koatən təwir kəm itəmat. Otən təwir kəm itəmat min tahmen məmə itəmat kitiəh əm e Kristo.

²¹Io Pol, iatos pen matəte əm e nelmək nəghatən u rəha nənən təwir kəm itəmat.

²²Okəmə suah kit təsolkeikeən Iərəmərə, pəs nalpinən rəha Uhgīn tatuwin ron. !Iərəmərə rəhatimat, wa-ta!

²³Pəs Iərəmərə Iesu tawte-in rəhan nəwirən kəm itəmat.

²⁴Ekahl-ipinə rəhak nolkeikeən kəm itəmat rafin e Kristo Iesu. Əwəh.

2 Korin

2 Korin 1

Pol tēmən təwir kəm ilat

¹Io Pol, itəm Uhgın təmitəpun e nəwian məmə io aposol rəha Kristo Iesu, iatəte naoa u itimlau piətət Timoti. Naoa u tatimnə kəm itəmat, niməfak rəha Uhgın əpəh Korin, ne iəfak mın ilat rafin əpəh ikın Akaea.

²Pəs Uhgın Tata rəhatat ne İərəmərə Iesu Kristo, okuawte-in nəwırən ne nəməlinuən kəm itəmat.

Uhgın itəm tatol kepin netəmim

³Pəs kotənwiwi Uhgın, u in Uhgın ne Tata rəha İərəmərə rəhatat Iesu Kristo. In Tata itəm in nəukətın nasəkitunən, kən in Uhgın itəm nol kepinən rafin tətisi-pən ron.

⁴In tatol kepin kitat e nəratən rafin rəhatat məmə kitat kotitun nol kepinən netəmim e nəratən pisin pisin mın. Kən kitat kotal kepin ilat e nolən rəha nol kepinən itəm Uhgın təmol kəm kitat.

⁵Tahmen əm e nahməən itəm Kristo təmos, təmuwa mın e nəmegəhən rəhatat. Kən e nolən kitiah əm, Kristo in suatip məmə nol kepinən təmuwa pik e nəmegəhən rəhatat, kən roiu nol kepinən rəhatat tatuwin mın o netəmim pisin pisin mın.

⁶Okəmə itimat ekoatəto nahməən, nahməən əh tatuwa otimat nian ekoatən-iarəp namnusən təwir, kən namnusən təwir əh otol kepin itəmat mosmegəh itəmat. Okəmə Uhgın təmol kepin itimat, tatol məmə itimat ekotitun nol kepinən itəmat. Kən noan nol kepinən əh, tatoe-in e nəmegəhən rəhatəmat, kən nian nəkotatig e nahməən kitiah əm itəm kitat kotatig lan, tətasiu etəmat məmə onəkotətul əskasik matuwın matuwın.

⁷Itimat emotələhəu-pən əskasik rəhatimat nətəligən o Uhgın otəmat məmə onəkotətul əskasik. Tol nəhlan məto-inu kitat rafin koatatig e natigən kitiah

əm məmə, itəmat nakoatəto nahməən itəm ekoatətig lan, kən tahmen-ahmen əm məmə nakotos nol kepinən kitieħ əm rəha Uhgīn itəm emotos.

⁸Piak min ne winik min, ekotolkeike məmə nəkotitun wir nian əskasik min itəm emotatig lan e profens ikin Esia. Nəratən asol min kəmotu itimat, taprəkis-in nəsanənən rəhatimat, təmol nikitimat təht məmə okəm-naka ekotimis.

⁹Nipahrienən, itimat emotəto məmə kinegəhan-in rəkis itimat məmə ekotimis. Məto nian əskasik min əh kəmotuwa məmə esotagileən etimat, məto ekotagile e Uhgīn itəm tatol etəm təmimis təmegəh min.

¹⁰In təmosmegəh itimat e nəratən asol əh itəm təmatuwīn o nīmīsən, kən in otosmegəh itimat e nəratən itəm otəpanuwa. Emotələhəu-pən əskasik rəhatimat nətəligən lan məmə in otosmegəh min itimat.

¹¹Kən in otol nəhlan nian nakotəfak otimat məmə, netəmim tepət okotənwiwi Uhgīn o natimnat wir itəm in otol kəm itimat məto-inu netəmim tepət kəmotəfak otimat.

Pol təməuhlin rəhan nətəligən o rəhan naliwəkən

¹²Roiu ekən nəghatən u məsaulisən məmə, e nətəligən rəhatimat, nikitimat təht məmə esotolən nat kit tərət e nolən rəhatimat. E nolən min rafin itəm emotol, itimat emotətəu-pən suatip itəm Uhgīn təmitəpun məmə emotəghat ətuatip əm moatən əhag-əhag nəghatən. Emotol nolən əh kəm netəm əpnarīn əm rəha nətueintən, kən motol taprəkis kəm itəmat. Esotəghatən e nitunən əm rəhatimat rəha nətueintən, məto emotagile əm e nəwirən rəha Uhgīn.

¹³⁻¹⁴Iatən nəhlan məto-inu, esotəteən nəghatən kit itəm tiəkis otəmat o nafinən, o nitunən nīpətīn. Roiu, nəkotitun məsīn nətəligən rəhatimat, məto iakolkeike pik məmə nian kit onəkotitun rafin. Kən e nolən əh, nian Iərəməre Iesu otuwa min, itəmat onəkotagien otimat tahmen min məmə itimat ekotagien otəmat.

¹⁵⁻¹⁶Məto-inu enitun məmə nakotagien otimat, nīkik təht məmə nian ekatuwīn Masetonia, ekaupən mīmənə məplan itəmat, kən nian ekitəlig

Masetonia, ekimnə min məplan itəmat. Tol nəhlan, nakatos nəwirən mau kæiu. Kən uarisig e itəm min əh, onəkotasitu lak motahl-ipən io ekuwin nitən Jutia.

¹⁷?Nikitəmat təht məmə, nian emol nətəligən min əh, məto emol ərnapin əm? ?O, kəm-naka nətəligən rəhak təmişipən e nolən rəha nətueintən, tahmen e netənim itəm koatən “əwəh” ne “kəp” e nəghatən kitiəh əm?

¹⁸Itəmat nəkotitun məmə Uhgın nian rafin tatol rəhan nəghatən, kən io min, rəhak nəghatən kəm itəmat sənəmə, “əwəh” ne “kəp,”

¹⁹məto-inu rəhak nəghatən o Nəti Uhgın Iesu Kristo, itəm eməhalən-iarəp kəm itəmat itiməhal Saelas ne Timoti, sənəmə, “əwəh” ne “kəp,” məto e Kristo, nian rafin rəhak nəghatən in “əwəh,” in nıpahrienən.

²⁰Tol nəhlan məto-inu, nat ərnapin nəniəkisən kuwəh Uhgın təmol, ilat kotuwa nıpahrienən e Kristo, inu nəghatən “əwəh” rəha Uhgın. Tol nəhlan, e Kristo, kitat koatən “Amen, Əwəh” kəm Uhgın, kən moatıləs-ipər nərgin lan.

²¹Uhgın əm tatol itimat ekoatətul əskasik e Kristo kitat min itəmat. In təmitəpun kitat,

²²kən təmol mak e nəmegəhən rəhatat məmə kitat rəhan min, kən təmələhəupən rəhan Narmin e nikitat məmə kitat okotitun roiu məmə rəhan nəniəkisən min, ilat rafin okotuwa nıpahrienən e nəmegəhən rəhatat o nian kit.

²³Kən roiu, okəmə esənən nıpahrienən, pəs Uhgın otol nalpınən kəm io. Eməsuwamən Korin məto-inu esolkeikeən məmə ekən nəghatən əskasik kit kəm itəmat.

²⁴Esotolkeikeən məmə ekotərəməərə e nahatətəən rəhatəmat, kəp. Məto ekotol wək kitat min itəmat o nagienən rəhatəmat, məto-inu itəmat nınoatətul əskasik rəkis e nahatətəən rəhatəmat.

2 Korin 2

¹Tol nəhlan, enən rəkis e nikik məmə okol esimnə minən məplan itəmat mol nikitəmat tahmə.

²?Emən nəhlan məto-inu, okəmə ekol nikitəmat tahmə, pah u ikin-un otol io nikik tagien? Itəmat əm, itəm emol nikitəmat tahmə.

³Kən eməte naoa əh, məmə nian ekimnə, esətoən tərət e nikik. Esolkeikeən məmə netəmim itəm okotəkəike motol nikik tagien, ilat okotol məmə ekəto tərət. Eməte naoa əh e nolən əh, məto-inu enitun məmə kitat kitəh əm, kən nian nikik tagien, kən nikitəmat min tagien.

⁴Tol nəhlan, nian eməte naoa əh kəm itəmat, nikik təpou pik otəmat, kən nikik titəgit, nahui nəmtək taiəh otəmat. Esəteən naoa əh məmə otol nikitəmat təpou, məto eməte məmə onəkotitun rəhak nolkeikeən asol otəmat.

Aluin nolən rat min rəha nol təfagə

⁵Etəmim itəm təmöl nəratən, təmöl io ekəto tərət, məto təmöl itəmat rafin nakotəto tərət pik, məto esolkeikeən məmə nəghatən rəhak e nat u in təkasiək pik.

⁶Nalpinən itəm itəmat tərət nəmotos-ipən kəm in tinahmen.

⁷Məto roiu əh, nəkotəkəike motaluin rəhan nolən rat kən motol-wir nikin, məmə nikin otəsəpou pikən mol təme e rəhan nəmegəhən.

⁸Iatətapəh əskasiək otəmat məmə nakotuwın motol təwir kəm in məmə in otitun rəhatəmat nolkeikeən ron.

⁹Eməte naoa əh kəm itəmat məmə ekəplan məmə onəkotol nəwiak e natimnat rafin, o kəp.

¹⁰Okəmə itəmat nəkotaluin nolən rat rəha suah kit, io min ekaluin rəhan nolən. Okəmə suah əh təmöl nat tərət neen məmə io ekəkəike maluin rəhan nolən, məto enaluin rəkis rəhan nolən e niganəmti Kristo. Emol nəhlan məmə otasitu etəmat

¹¹məmə Setan otəsərəkinən kitat e rəhan neiueiuəən min, məto-inu kitat kotitun rəkis rəhan nətəligən o nolən nəratən.

Netəmim itəm koatən-iarəp namnusən təwir

¹²Nian emuwīn əpəh Troas o nən-iarəpən namnusən təwīr rəha Kristo, eməplan məmə İərəməərə təmol suatip kəm io.

¹³Məto esatig əməlinuən e rəhak nətəligən məto-inu, eməsəplanən piak Taetas ikin əh. Kən emauiatipin ilat, miet muwīn Masetonia.

¹⁴Pəs kotənwiwi Uhgīn, məto-inu in təmol win e rəhan tikimīr mīn e nəluaginən. Kən tahmen e kig kit itəm təmol win e nəluaginən minatitəlig matit rəhan mopael mīn ne rəhan tikimīr mīn, Uhgīn tatit itimat e Kristo. Kən itimat rəhan mīn netəmim itəm ioatən-iarəp nenatigən rəha Kristo, kən nenatigən əh in tahmen e nəmiəwīn kit itəm tatuwīn ikin pisin-pisin mīn.

¹⁵E niganəmti Uhgīn, itimat ekotahmen e nəmiəwīn rəha Kristo kəm netəmim rafin, netəmim itəm Uhgīn tatosmegəh ilat, ne netəmim itəm okotuwīn e nalpinən rəha Uhgīn.

¹⁶Itimat nəmiəwīn rəha nimisən kəm neen itəm tatəgətun ilat məmə okotimis. Kən itimat nəmiəwīn rəha nəmegəhən kəm neen, itəm tatəgətun ilat məmə Uhgīn otosmegəh ilat. ?Kən pah u titun nolən wək asol əh?

¹⁷Məto itimat esotahmenən e netəm əpnəpīn mīn, itəm koatən-iarəp nəghatən rəha Uhgīn o nos əmən məni. Kəp, məto Uhgīn təmahl-ipən itimat, kən e Kristo, itimat ekotən-iarəp namnusən təwīr e niganəmti Uhgīn, kən nəghatən rəhatimat təmisi-pən e nikitimat itəm tətuatip əm.

2 Korin 3

¹Okəmə naka nikitəmat təht məmə enoatiləs-ipər itimat məmə itəmat onəkotegəhan lan. Netəmim neen okotəkəike motos naoa kit itəm kəməte elat nian koatuwīn o netəm kotəruru ilat. ?Tahro nikitəmat təht məmə suah kit otəkəike məte naoa nəhlan etimat kəm itəmat? ?O, tahro itəmat əm nakotolkeike məmə onəkotəte? !Kəp!

²Itəmat atip əm nəkotahmen e naoa itəm tatol əp wək rəhatimat. Naoa əh kəməte-pən e nikitimat, itəm netəmim rafin koatafin kən moatitun.

³Itəmat noa rəha wək rəhatimat. Kən nəmegəhən rəhatəmat tatəgətun məmə itəmat naoa kətafin itəm Kristo təməte. Kristo təməte naoa əh e Narmin Rəha Uhgın itəm tatəmegəh, məto təsəteən e nelmi etəmim. Kən in təməsəte-pənən e kəpiel epin-epin, məto təməte-pən e niki netəmim.

⁴Itimat esotəginən o nənən nəhlan otəmat məto-inu itimat ioatatig e Kristo, kən moatahatətə əskasik e Uhgın.

⁵Nikitimat təsəhtən məmə itimat əm ekotahmen o nolən wək u, ne noan rəha wək. Məto Uhgın əm tatol məmə itimat ekotitun nolən wək.

⁶In təmol məmə itimat ekotahmen məmə ekotuwa rəhan iolwək min rəha nəniəkisən wi rəha nasituən itəm Uhgın təmən. Nəniəkisən wi əh təsisipənən e Lou itəm kəməte, məto təmisi-pən e Narmin Rəha Uhgın, məto-inu Lou itəm kəməte tatol məmə netəmim koatuwin o nımisən, məto Narmin Rəha Uhgın tatos-ipa nəmegəhən.

Nəhag-əhagən rəha Nəniəkisən Wi Rəha Nasituən

⁷Otətəlig-in-tu. Nian Uhgın təməte Lou e kəpiel, mos-ipən kəm Moses, nəhag-əhagən əh-ikin rəha Uhgın, kən nəhag-əhagən əh təmalpin niganəmti Moses, kən netəm Isrel okol kəsotəplanən niganəmtin, nat əpnəpin nəhag-əhagən tinateiuaiu. Kən okəmə wək rəha Lou in suatip itəm tatuwin o nımisən, məto in təhag-əhag,

⁸kən wək rəha Narmin Rəha Uhgın otəhag-əhag pik.

⁹!Okəmə wək itəm kəmakil netəmim məmə otəkəike motimis, in tatəhag-əhag, kən wək itəm tatol netəmim kotətuatip e niganəmti Uhgın, in tatəhag-əhag pik agin!

¹⁰Nipahrienən, nəniəkisin oas rəha nasituən itəm təməhag-əhag aupən, roiu in təsəhag-əhagən, məto-inu nəniəkisin wi itəm təhag-əhag pik agin, tinəprəkis-in itəm aupən.

¹¹!Kən okəmə wək rəha Lou itəm otəpanikə, tinuwa e nəhag-əhagən, kən wək rəha Narmin Rəha Uhgın itəm otatig lilin, tatəhag-əhag pik agin-əh!

¹²Tol nǎhlan, mǎto-inu emotǎlǎhǎu-pǎn ǎskasik rǎhatimat nǎtǎligǎn e wǎk ǎh rǎha Narmin Rǎha Uhgǎn, nǎtǎligǎn rǎhatimat tǎskasik e Uhgǎn, kǎn mǎsotǎginǎn o nǎn-iarǎpǎn rǎhan nǎghatǎn.

¹³Itimat esotahmenǎn e Moses, itǎm tǎmǎtalpin nǎganǎmtin e nimǎhan agege mǎmǎ netǎm Isrel okǎsotǎplanǎn mǎmǎ nǎhag-ǎhagǎn teiuaiu muwin mikǎ.

¹⁴Mǎto Uhgǎn tǎmol nǎtǎligǎn rǎhalat tiǎkis. Kǎn mǎtoarus-pa ǎh-roiu, nimǎhan ǎh tǎtahtosig-in nǎtǎligǎn rǎhalat nǎn kotafin Naoa Rǎha Nǎniǎkisǎn Oas. Uhgǎn tǎsos-irǎkisǎn ǎh nimǎhan ǎh, mǎto-inu tatos-irǎkis ǎm e Kristo.

¹⁵ǎwǎh, mǎtoarus-pa ǎh-roiu ne, nǎn kotafin Lou rǎha Moses, nimǎhan kit tatǎfǎtain nikilat.

¹⁶Mǎto okǎmǎ etǎmim pah tǎuhlin mǎtag-pǎn o Iǎrǎmǎrǎ, nimǎhan ǎh otiet rǎkis.

¹⁷Otǎtǎlig-in-tu, Iǎrǎmǎrǎ ǎh, in Narmin. Kǎn ikǎn Narmin rǎha Iǎrǎmǎrǎ tǎtatig ikǎn, in tatikis kitat.

¹⁸Kǎn kitat, itǎm kǎsǎfǎtainǎn nǎganǎmtitǎt e nimǎhan, koatǎplan nǎhag-ǎhagǎn asol rǎha Iǎrǎmǎrǎ, kǎn netǎmim koatǎplan nǎhag-ǎhagǎn ǎh e nǎmegǎhǎn rǎhatat. Kǎn in tatǎuhlin nǎmegǎhǎn rǎhatat mǎmǎ okotuwa kahmen lan e nǎhag-ǎhagǎn itǎm rǎhan nǎsanǎnǎn tatǎr tatǎr. Kǎn nǎhag-ǎhagǎn ǎh tǎmisi-pǎn o Iǎrǎmǎrǎ itǎm in Narmin Rǎha Uhgǎn.

2 Korin 4

Nat keike e kǎpǎhau oas

¹Tol nǎhlan, nikitimat tǎsǎpouǎn o wǎk u mǎto-inu itimat emotos e nasǎkitunǎn rǎha Uhgǎn.

²Mǎto e nolǎn rǎhatimat esotegǎhan-inǎn nolǎn itǎm tatǎhluaig ne nolǎn aulis min. Ko esoteiuǎn mǎsotǎuhlinǎn nǎghatǎn rǎha Uhgǎn. !Kǎp! Mǎto itimat ioatǎn ǎtuatǎp ǎm nǎpahrienǎn, kǎn e nolǎn ǎh, e nǎganǎmti Uhgǎn, emotol-arǎp e nǎganǎmti netǎmim rafin mǎmǎ rǎhatimat nolǎn in tǎtuatǎp.

³Kən okəm-naka namnusən təwir itəm ekoatən-iarəp in tatəhluaig o netəmim neen, mətə kəp, tatəhluaig əm o netəmim itəm koatətəu-pən suatip o nuwinən e nigəm asol.

⁴Koatətəu-pən suatip əh mətə-inu Setan, u in Iərmis itəm tatəramərə e nətueintən u, təməfətain nətəligən rəhalat, məmə kəsotəplanən nəhag-əhagən wir rəha namnusən təwir itəm tatuəp mətasiəgəpən ilat. Nəhag-əhagən əh təmisi-pən e Kristo. Kən nian kitat koatəplan Kristo, kən kitat koatəplan məmə Uhgīn in tahro nulan.

⁵Itimat esotən-iarəp atipən itimat, mətə ioatən-iarəp Iesu Kristo məmə in Iəramərə, kən itimat iolwək min rəhatəmat o nərgi Iesu.

⁶Tol nəhlan mətə-inu Uhgīn u təmən məmə, “Pəs nəhag-əhagən tuəp masiəgəpən ikin tapinəp ikin,” in təmasiəgəpən e nikitat məmə kitat kotitun nehmən nəsanənən, ne nepətən əhag-əhag rəha Uhgīn, kən kitat koatehm natimnat min əh e niganəmti Kristo.

⁷Mətə kitat koatos nat keike əh e kipəhau oas, inu nipətitat. Tol nəhlan məmə otəgətun məmə nəsanənən wir əh taprəkis, təmisi-pən e Uhgīn, təsisipamən otat.

⁸Nəratən tepət koatiləs pikən itimat e suatip min rafin, mətə təsərəkinən itimat. Nian neen ekotəruru suatip, mətə esotapəsən nalkutən.

⁹Netəmim koatol nəratən kəm itimat, mətə Uhgīn təsapəsən itimat. Koatoh itimat, mətə kəsotərəkinən itimat.

¹⁰Ikin pəhruən ioatuwin ikin, katohamnu nipətitimət tahmen e kəmoamnu Iesu. Tol nəhlan məmə, netəmim okotəplan nəmegəhən rəha Iesu e nipətitat.

¹¹Kən itimat itəm ekoatəmegəh, nian rafin kategəhan-in itimat məmə ekotimis o nərgi Iesu. Tol nəhlan məmə netəmim okotəplan rəhan nəmegəhən e nipətitat itəm otəpanimis nian kit.

¹²Kənu, nian rafin itimat ioatiləs pikən nimisən məmə itəmat onəkotitun nəmegəhən itulin.

¹³Naoa Rəha Uhgín tatən məmə, “Emahatətə, kən tol nəhlan ekatən.” Kən e nolən kitiəh əm rəha nahatətəən, itimat min ekotahatətə, kən tol nəhlan ekoatən,

¹⁴məto-inu itimat ekotitun məmə, etəm təmol İərəmərə İesu təmegəh min e nimisən, in otol itimat ne itəmat, kitat rafin kotəmegəh min e nimisən kitat İesu, kən məf-iarəp kitat e niganəmtin.

¹⁵Natimnat rafin u o nəwirən rəhatəmat, kən nian nəwirən rəha Uhgín tatiuw-pa netənim tepət təhmin min okotuwa o Kristo, kən okotos-ipən nənwiwiən tepət kəm Uhgín, kən okotiləs-ipər nərgin ilis ilis agin.

¹⁶Tol nəhlan, nikitimat təsəpouən. Nat ənnapin məmə nipətitat tateiuaiu roiu, məto Uhgín tatol nikitimat tatuwiwi nian rafin.

¹⁷Tol nəhlan məto-inu, nəratən itəm koatətig lan, ilat nat ənnapin əm, kəsotətigən tuwəh. Məto noalat in nəhag-əhagən wir itəm otətətig lili, kən in təwir məfigəm taprəkis-in ilat.

¹⁸Kən tol nəhlan, niganəmtitat kəsotətulən e nat itəm katəplan, məto koatətul e nat itəm kəsəplanən, məto-inu nat itəm katəplan in nat rəha roiu əm, otəpanikə, məto nat itəm kəsəplanən in namnun tikə.

2 Korin 5

Nipətin wi əpəh e nego e neai

¹Tol nəhlan, kotitun məmə nipətitat in tahmen e nimə tapolən itəm kitat kotətig lan ikin-u e nətueintən, kən nian kit otəmnəmit mərat. Kən nian nimə tapolən əh tikə e nətueintən, məto əpəh e nego e neai, rəhatat nimə wi əh-ikin itəm sənəmə etənim təmol, məto Uhgín əm təmol, nipətitat wi itəm otətig lili.

²Məto roiu e nipətitat rəha nətueintən, koatəhg nikitat, kən kotolkeike pik məmə nian otatuwa itəm kitat okotuwın e nipətitat wi rəha nego e neai, tahmen e kitat koatuwin e natimnat wi.

³Tol nəhlan məto-inu sənəmə kitat okotuwa narmin əm nipətin tikə, məto okotos nipətin wi rəha nego e neai.

⁴Nipətitat itəm otimis tol kitat koatekimis moatehag rəha nəpouən, məto sənəmə koatolkeike məmə okotimis kən nipətitat otikə, kəp. Məto kitat kotalkeike məmə okotuwın e nipətitat wi məmə nəmegəhən lilin otəwiək nipətitat rəha nətueintən itəm otimis.

⁵Kən Uhgın pisin əm təmol kitat o natimnat min əh, kən təmos-ipa Narmin Rəhan məmə otəgətun wir kəm kitat məmə rəhan nəniəkisən min otuwa pahrien.

⁶Kən tol nəhlan, nətəligən rəhatat təkaskik, kən kitat kotitun wir məmə nian koatos əm nipətin rəha nətueintən u, kitat koatətul əh ihluə imə İərəmərə ikin rəhatat.

⁷Kitat kotatig e nətueintən e nahatətəən e Uhgın, sənəmə e natimnat itəm koatəplan.

⁸Iatən məmə nətəligən rəhatat təkaskik, kən kotalkeike məmə kotapəs nipətitat motuwın e nimə wi rəhatat kitat İərəmərə.

⁹Tol nəhlan, okəmə kotatig e nipətitat, o okəmə kotapəs nipətitat rəha nətueintən, kitat kotalkut pik məmə kotal natimnat itəm koatol niki İərəmərə tagien.

¹⁰Kotal nəhlan məto-inu kitat rafin okotəkəike motətul aupən e Kristo məmə in otakil rəhatat nolən min, kən kitat kitiəh kitiəh okotos nətouən tətəu-pən natimnat itəm kəmotol e nətueintən, okəmə nat təwir o nat tərat.

Ien əhrui min rəha Uhgın

¹¹Kən roiu əh, məto-inu ekotisiai-in İərəmərə, kən motalkut məmə ekotiuw-pa netəmim. Uhgın titun itimat ne wək rəhatimat, kən ekotalkeike məmə itəmat min onəkotitun wir itimat.

¹²Esotalkeikeən məmə ekotiləs-ipər itimat e niganəmtitəmat, məto ekotos-ipinə rəhatimat nətəligən məmə okəm-naka nikitəmat otagien otimat. Kən roiu, nəkotitun nuhalpinən nəghatən rəha netəmim itəm kotasit o nolən itəm netəmim koatəplan, məto nikilat təsəhtən nat itəm tətətig e niki etəmim.

¹³Okəmə itimat ialməl min, mətə o nərgi Uhgīn. Kən okəmə rəhatimat nətəligən tətuatip əm, in nat kit itəm otasitu etəmat.

¹⁴Tol nəhlan mətə-inu, nolkeikeən rəha Kristo tatərəmərə etimat, mətə-inu itimat ekotitun wir məmə suah kitiəh əm təmimis o netəmim rafin, kən tol nəhlan, netəmim rafin kinotimis.

¹⁵Kən təmimis o netəmim rafin məmə ilat itəm koatəmegəh, okotapəs nolən natimnat itəm ilat əm kotolkeike, mətə ilat kotəkəike motol nolən min itəm Iesu tolkeike, u etəm təmimis olat kən məmegəh min e nīmīsən.

¹⁶Tol nəhlan, roiu ne, itimat esotakilən netəmim e nolən itəm netəmim rəha nətueintən kotakil netəmim lan. Nat ənnapin nian kit emotakil Kristo e nolən əh, mətə roiu esotolən.

¹⁷Tol nəhlan, okəmə suah kit təmuwa kitiəh ilau Kristo, in təmuwa etəmim wi. !Nat oas təmikə, kən nat wi tinuwa!

¹⁸Natimnat rafin min əh tatisi-pən e Uhgīn. Aupən kitat tikimir min kitat Uhgīn, mətə e Kristo, in təməmik kitat kotuwa iuəhkir ron, mol kitat iolin min. Kən təmos-ipa kəm itimat wək u rəha niuw-pamən tikimir min rəha Uhgīn okotuwa iolin min.

¹⁹Inu tatən məmə Uhgīn təmiuw-pa rəhan tikimir min e nətueintən məmə okotuwa iolin min e Kristo, kən məsafin minən rəhalat nolən rat min. Kən təmos-ipa kəm itimat nəghatən u rəha niuw-pamən tikimir min rəhan okotuwa iolin min.

²⁰Tol nəhlan, itimat ien əhrui min rəha Kristo, kən tahmen məmə Uhgīn tətəun-in netəmim e nəwiatimat. Kən ioatətapəh əskasik otəmat e nərgi Kristo məmə: nakotapəs nolə tikimir, kən motuwa ioli Uhgīn min.

²¹Uhgīn təmol suah u itəm rəhan nolən rat tikə, məmə in sakrifais rəha nolən rat min rəhatat, məmə e in, kitat okotəuatip e niğanəmti Uhgīn.

2 Korin 6

¹Məto-inu itimat ioatol wək kitiəh itimat Uhgın, ekotətapəh əskasik otəmat məmə nian Uhgın tətawte-in rəhan nəwirən kəm itəmat, nəsosən tahmen in nat əpnəpın əm,

²məto-inu Uhgın tatən məmə, “E nian ətuatıp, eməto ik, kən e nian rəha nosmegəhən, emasitu lam.” İakən kəm itəmat, məmə roiu, in nian ətuatıp rəha Uhgın, roiu in nian rəha nosmegəhən.

Nian əskasik min e nəmegəhən rəha Pol

³Esotolən nat kit itəm suah kit otəme lan e rəhan nahatətəən, məto-inu esotolkeikeən məmə okəsən ratən wək rəhatimat.

⁴Məto nolən min rafin e nəmegəhən rəhatimat koatəgətun məmə itimat iolwək min pahrien rəha Uhgın: itimat ekotətul əskasik e nian rəha nəratən, ne nian iəkis min, ne nian itimat ekotəto tərat.

⁵Netəmim kəmotəh itimat, kən kəmki-pən itimat e kalapus, kən katitəp itimat məmə okoh itimat. Emotol pik wək, məsotapılən lapın, kən nəumis tus itimat.

⁶Esotolən nolən kit itəm tatol nikitimat tamkimik, itimat ekotenatig, nətəligən rəhatimat kaifəməh, ekotol təwir kəm netəmim, Narmin Rəha Uhgın tatər e nikitimat, kən ekotolkeike netəmim e nolkeikeən pahrien.

⁷Ekoatən əm nıpahrienən, kən nəsanənən rəha Uhgın tətətig etimat. Rəhatimat nolən ətuatıp in tahmen e natımnat rəha nəluaginən o nohən ne nətlosigən.

⁸Netəmim neen koatisiai-in itimat, neen koatehm-əhau itimat, neen koatən rat itimat, neen koatən wir itimat, neen koatən məmə itimat ekoateiuə məmə itimat iolwək min rəha Uhgın, məto itimat iolwək min pahrien rəhan.

⁹Netəmim neen kəsotegəhan-inən məmə itimat aposol min pahrien, məto netəmim tepət koatən məmə itimat aposol min pahrien. Nian rafin nimisən tatitəp itimat, məto ekoatəmegəh əh. Katəh itimat, məto kəsəhamnuən əh itimat.

¹⁰Nikitimat tērou, mēto nian rafin ekotagien əh. Rəhatimat nautə tikə, mēto itimat ekotol netəmim tepət rəhalat nautə tepət. Rəhatimat nat kit tikə, mēto ekoatos natimnat rafin.

¹¹Piak min əpəh Korin, emotən rafin nəghatən kəm itəmat kəsapəsən kit, kən ekotolkeike itəmat e nikitimat rafin.

¹²Itimat esotahtosiġ-inən nolkeikeən rəhatimat otəmat, mēto itəmat notahtosiġ-in rəhatəmat otimat.

¹³Roiu əh, iatəghat kəm itəmat mēmə itəmat nenətik ətuatip. Tətuatip əm mēmə itəmat min, nakotolkeike itimat e nikitəmat rafin.

¹⁴Sotənən kəm netəm kəsotəfakən mēmə nəkoatol wək kit itəmat min ilat. ?Nolən ətuatip ne nolən tərət kiatur nol kələhən nat kit? ?O, nəhag-əhagən ne napinəpən kiatur nuwamən məpələh kələh muəghat? !Kəp!

¹⁵Kən e nolən kitiəh əm, Kristo ne Setan, okol kəsuanən nəghatən kitiəh nian kit. ?Iəfak ne etəm təsəfakən kiatur nolən nat e nətəligən kitiəh? !Kəp!

¹⁶E Nimə Rəha Uhgīn, ikin kit tikə əh-ikin o narmi nat min, mēto-inu kitat u Nimə Rəha Uhgīn itəm tatəmegəh. Kən Uhgīn təmən mēmə, “Ekatig itimat min ilat, kən maliwək itimat min ilat, kən ekuwa io Uhgīn rəhalat, kən ilat okotuwa rəhak netəmim.”

¹⁷Kən Iərəmərə təmən mēmə, “Tol nəhlan, otiet rəkis elat, motan isəu olat. Kən məsotekən nat itəm tamkimik e niganəmti Uhgīn, kən nikik tagien mēmə ekos itəmat.”

¹⁸“Kən ekuwa rəhatəmat tata, kən itəmat onəkotuwa nenətik min,” inu nəghatən rəha Iərəmərə itəm in ilis agin.

2 Korin 7

¹Iolik min. Nəniəkisən min u rəhatat. Kən tol nəhlan, pəs kotafəl nikitat, motos-irəkis natimnat rafin itəm koatol nipətitat ne narmitat kotamkimik. Kən pəs kotələhəu kalin kitat mēmə rəha Uhgīn əm motətəu-pən rafin suatip itəm nikin otagien lan.

Niki Pol tēmagien olat

- ²Oterəh e nikitəmat kəm itimat. Esotolən tərət kəm suah kit, esotiuw-pənən suah kit tərət ikin, esotalkutən mēmə ekotos nat kit rəhatəmat e nolən eko-eko.
- ³Esənən nəghatən u mətō-inu nēmōtol nolən rat. Emən rəkis kəm itəmat mēmə ekotolkeike pīk itəmat nian rafin, kən nat əpnapin nimisən o nəwīrən otuwa e nəmegəhən rəhatimat, mətō itəmat əpəh imə e nikitimat.
- ⁴Io etahatətə əskasik etəmat. Iatausit otəmat. Itəmat nēmōtiləs-ipər pīk rəhak nətəligən. Emos nərātən tēpət tēmuwa e rəhak nəmegəhən, mətō nīkik tagien maprəkis otəmat.
- ⁵Tol nəhlan mətō-inu, nian emotuwa Masetonia, esotamegən, mətō nian rafin, nərātən tatiləs itimat tēmisi-pən ikin pisin pisin min. E nəmegəhən rəhatimat, netəmim kəmotəmou motol nərātən kəm itimat, kən itimat ekoatəgin.
- ⁶Mətō Uhgīn tatol kepīn netəmim itəm nətəligən rəhalat tērou, kən tēmōl kepīn itimat e nuwamən rəha Taetas.
- ⁷Kən sənəmə e nuwamən əm rəhan itəm tēmōl nikitimat tagien, mətō e nəghatən wīr rəha nol kepīnən itəm nēmōtən-ipən kəm in. In tēmən-ipa kəm itimat mēmə itəmat nakotolkeike pīk mēmə nəkotəplan io, kən tēmən mēmə nikitəmat tatətō tərət o nəghatən rəhak, kən tēmən mēmə nakolkeike pīk io moatətul əskasik o nərgək. Nian emətō, nagienən e nīkik tēmər mərīoah.
- ⁸Nat əpnapin okəmə rəhak naoa aupən tēmōl itəmat nakotətō tərət, mətō esətōən tərət ron. Mətō aupən, emətō tərət ron, mətō-inu eməplan mēmə naoa u tēmōl itəmat nakotətō tərət, mətō rəha nian əkuəkīr əm.
- ⁹Mətō roiu, nīkik tagien, kən sənəmə mēmə nēmōtətō tərət, kəp. Nīkik tagien mēmə nian nēmōtətō tərət, nēmōtəuhlin itəmat e rəhatəmat nolən rat min. Nīpahrienən, Uhgīn tolkeike mēmə kitat okotətō tərət o nolən tol min-nulan. Kən mətō-inu nēmōtəuhlin itəmat, kən natimnat itəm emotən aupən kəm itimat tēməsōlən mēmə nēmōtakīəh e rəhatimat nahatətəən.

¹⁰Kən nian koatəto tərət e nolən itəm Uhgín tolkeike, kən kotəuhlin kitat e rəhatat nolən rat, kən Uhgín tatosmegəh kitat. Kən nikitat otəsəpouən o nolən əh. Məto nian koatəto tərət e nolən rəha nətueintən, tatiuw-pən kitat e nimisən.

¹¹Otəplan-tu nəmegəhən rəhatəmat nian nəmotəto tərət e nolən itəm Uhgín tolkeike. Nolən əh, noan tepət: nakotolkeike motalkut əskasik məmə nəkotol nolən ətuatip, kən motoalkut əskasik məmə nokotəg-ətuatip-in rəhatəmat nolən rat mīn, kən motetəhau nolən rat mīn, kən narmitəmat təmiwig nəmotaut motəgin nolən rat mīn. Nəmotolkeike məmə nəkotəplan mīn io, kən nakotolkeike pik məmə nakotətul əskasik o nərgək. Kən nəmoatətul matip məmə nəkotol nalpīnən kəm netəm kotol nolən rat. E nolən mīn rafin rəhatəmat, nəmotəgətun məmə nəsotolən nat kit tərət e natimnat u.

¹²Kən eməte naoa u kəm itəmat, məto esətəən o suah u itəm təmol nolən rat, kən esətəən o suah u itəm in təmərəkin. Kəp. Eməte ilə məmə itəmat onəkotəplan əsas e niganəm̄ti Uhgín məmə nəkoatətul əskasik o nərgitimat.

¹³Natimnat rafin mīn əh koatīləs-ipər nətəligən rəhatimat. Sənəmə itimat əm itəm nəmoatīləs-ipər nətəligən, məto nikitimat tagien pik o Taetas, məto-inu nikin tagien məmə nəmoatīləs-ipər mīn nətəligən rəhan.

¹⁴Emən-ipən kəm in məmə etausit pik otəmat, kən itəmat nəməsotolən io ekaulis. Natimnat rafin itəm emotən kəm itəmat, ilat nīpahrienən. Kən e nolən kitīəh əm, natimnat rafin itəm emotən kəm Taetas etəmat, kən motausit ron, ilat mīn nīpahrienən.

¹⁵Taetas, nikin tatəht əh məmə itəmat rafin agin-əh nəmotol nəwian, kən moatəgin moatasiəp nian nəmotegəhan-in məmə otuwa məplan itəmat. Kən nian nikin tatəht natimnat mīn əh, nolkeikeən rəhan otəmat tatər təhmin mīn.

¹⁶Nikik tagien pik məto-inu etahatətə əskasik etəmat məmə nəkoatol naka itəm tətuatip.

2 Korin 8

Pol tēmōtapēh mēmō okotawte

¹Piak min ne winik min, ekotolkeike mēmō nēkotitun nēwirēn rēha Uhgin itēm tēmawte-in kēm nimēfak min ēpēh Masetonia mēmō ilat kotitun nasituēn e netēmim neen min.

²Ilat kēmōtatig e nēratēn asol kit ne nian ēskasik min, kēn nat ēpnāpīn ilat nan rat rēhalat nautē tikē agin, mēto nēmegēhēn rēhalat tērioah wir e nagienēn. Kēn nan ratēn ne nagienēn kēmūoe-in nolēn tēwir. E nolēn ēh, kēmōtērakin mēni tēpēt motos-ipēn kēm iēfak min ēpēh ikin min.

³Iatēn-iarēp kēm itēmat mēmō ilat kēmōtos-ipēn tēpēt, taprēkis-in itēm netēmim nīkilat tēht mēmō okol kēsotolēn. Kēn ilat atip kēmōtol.

⁴Kēmōtētapēh amul otimat mēmō itimat ekotegēhan pēs ilat kotasitu e wāk rēha nos-ipēn mēni kēm iēfak min ēpēh Jerusalem.

⁵Kēmōtaupēn kos-ipēn nēmegēhēn rēhalat kēm Iērēmērā, kēn uarisig, kēm itimat, e nolēn itēm Uhgin tolkeike. Nīkitimat tēsēhtēn mēmō okotol tēpēt nēhlan, mēto kēmōtol.

⁶Kēn tol nēhlan, emotuēh nīki Taetas mēmō otitēlig-pīnē otēmat. In tēmaupēn mēghat kēm itēmat o nolēn nat u, kēn tol nēhlan, emotētapēh mēmō in otēghat kēm itēmat mēmō nēkotol namnun wāk wir rēha nawtēn ēh itēm nēmōtētūoun.

⁷E natimnat min u rafin, itēmat nēmōtol tēwir pīk maprēkis, inu nahatētēn rēhatēmat, ne nēghatēn rēhatēmat, ne nītunēn rēhatēmat, ne nolēn rēha nētul ēskasikēn, ne nolkeikeēn rēhatēmat otimat. Kēn roiu, iakolkeike mēmō nēkotol wāk kit min e nolēn tēwir pīk maprēkis, inu wāk wir rēha nawtēn.

⁸Esēnēn mēmō nēkotēkēike motol. Mēto emotēgētun kēm itēmat mēmō netēm pīsīn pīsīn min nīkilat tagien o nasituēn e wāk ēh. Kēn roiu ēh, iakolkeike mēmō ekisilu wir mēmō nolkeikeēn rēhatēmat in nīpahrienēn tahmen elat, o kēp.

⁹Itēmat nēkotitun wir nēwirēn rēha Iērēmērā Iesu Kristo itēm tēmawte-in kēm itēmat, mēmō nat ēpnāpīn rēhan nautē tēpēt, mēto tēmōl otēmat mēmō in

rəhan nautə tikə. Kən məto-inu təmol məmə rəhan nautə tikə, kən mol itəmat rəhatəmat nautə tepət.

¹⁰Kən inu rəhak nətəligən e natimnat min u, itəm otasitu etəmat. Otol namnun e wək itəm nəmotətuoun e nup uarisig. Nikitəmat təmaupən məht məmə nəkotol wək əh, kən itəmat nəmotəupən motətuoun motol.

¹¹Tol nəhlan, roiu otol namnun wək u rəha nos-ipənən. Kən rəhatəmat nətəligən o nolən wək u itəm nakotolkeike pīk məmə nəkotol, in otuwa nipahrienən, kən itəmat onəkotol e rəhatəmat atip natimnat.

¹²Okəmə nikitəmat tagien o nos-ipənən, kən Uhgīn nīkin tagien o nosən natimnat əm itəm nakoatos moatos-ipən. Kən in təsətapəh-inən natimnat itəm tikə otəmat.

¹³Esotolkeikeən məmə nəmegəhən rəha netəmim neen otimətig məto-inu kəmos rəhatəmat məni, məto nəmegəhən rəhatəmat in otiəkis məto-inu nəmotasitu elat. Kəp. Iakolkeike məmə tahmen-ahmen əm otəmat rafin.

¹⁴Roiu, itəmat nakoatos tepət kən motitun nasituən elat. Kən o nian min neen, ilat kotitun noorən kəm itəmat okəmə rəhatəmat tikə. Kən itəmat nakotahmen-ahmen əm,

¹⁵tahmen e itəm Naoa Rəha Uhgīn tatən məmə, “Netəmim itəm kəmotəulək tepət, tahmen əm, təsəprəkisən. Kən netəmim itəm kəmotəulək noan-məsīn, rəhan nagwənən tahmen əm, təsikəən.”

Taetas təmuwin Korin

¹⁶Iatənwiwi Uhgīn məmə təmələhəu-pən e niki Taetas nətəligən o nasituən etəmat, tahmen-ahmen e rəhak.

¹⁷Tol nəhlan məto-inu Taetas, nīkin tagien o nīmənən məplan itəmat tahmen e itəm emən kəm in. Kən taprəkis-in itəm əh, nīkin tagien pīk o nasituən etəmat, kən in rəhan əm nətəligən məmə in otimnə məplan itəmat.

¹⁸Kən itəmat ekotahl-ipinə min piətət kit min timnə ilau min. Suah u, netəm e nīməfak min koatisiai-in o rəhan wək o nən-iarəpən namnusən təwir.

¹⁹Kən taprækis-in inu, niməfak min kəmotitəpun məmə otuwa itimat min o niləsən məni u muwin əpəh. Kən itimat ekotərəmərə lan o noorən məmə otıləs-ipər nərği İərəmərə, kən matəgətun məmə nikitimat otagien pİK o nasituən.

²⁰Itimat esotolkeikeən məmə suah kit otən rat itimat o nolən rəha noorən məni asol əh.

²¹Tol nəhlan, itimat ekotalkut pİK məmə ekotol nat itəm tətuatip, mətə sənəmə e niganəmti İərəmərə əm, mətə e niganəmti netəmim min.

²²Kən ekotahl-ipinə piətət kit min iləhal suah mil u. Suah əh, e wək tepət ne nolən tepət, emotisilu wir məmə in tolkeike pİK məmə otasitu. Kən roiu, in tolkeike pİK məmə otasitu mətə-inu in tətahatətə pİK etəmat.

²³Kən o Taetas, itimlau min ekioal wək kitəh əm, kən in min tatol wək e nikitəmat o nasituən etəmat. Kən o piətət min, ilat ien əhrui rəha niməfak min, kən nolən wir min e nəmegəhən rəhalat koatisiai-in Kristo.

²⁴Tol nəhlan, otol rəhatəmat nolən kəm suah miləhal əh məmə nakotolkeike pahrien iləhal, kən iləhal okəhalitun o nat naka itimat ekotausit otəmat. Kən otol-wir kəm ilat məmə niməfak min okotəplan.

2 Korin 9

¹Okəmə esətəən naoa u kəm itəmat, in təwir əm mətə-inu nəkotitun rəkis wək u rəha nasituən e iəfak min əpəh Jerusalem.

²Iatən nəhlan mətə-inu io ekitun məmə nakotolkeike məmə onəkotasitu. Kən ematıləs-ipər nolən wir rəhatəmat o netəm Masetonia, matən kəm ilat məmə e nup itəm tinuwın rəkis, itəmat əpəh Akaea, nəmoatətul matip o nos-ipənən. Kən nian kəmotəplan məmə nikitəmat tagien pİK o nasituən, təmol min ilat tepət kotolkeike məmə okotasitu min.

³Mətə roiu, etahl-ipinə piətət miləhal u məmə iləhal okəhaləplan itəmat məmə itəmat onəkotol nat itəm nəmotən, tahmen əm məmə emən mihin, kən

tol nəhlan rəhatimat nəghatən o niləs-ipərən nolən wir rəhatəmat, sənəmə nat əpnapin əm.

⁴Məto okəmə nəsolən, kən nian ekimnə itimat netəm Masetonia neen, kən okotəplan məmə itəmat nəsolən əh, kən nolən əh otol itimat ekotaulis, məto-inu itimat enoatıləs-ipər rəkis itəmat. Kən otol itəmat nakotaulis taprəkis.

⁵Tol nəhlan, nıkkik təht məmə ekəkəike mətapəh o piətət miləhal məmə okotimnə rəkis pitən kəplan itəmat, kən motol namnun wək o nəmki-pamən məni asol itəm nəmotən-iəkis məmə nakotos-ipən. Məto iakolkeike məmə in nos-ipənən kit itəm tətisi-pən atip e nikitəmat, sənəmə suah kit tatəkəike kəm itəmat məmə nakotos-ipən.

Nolən nawteən

⁶Sotaluinən nat u. Etəm tatəfe noan məsin, matəulək-in noan məsin. Kən etəm tatəfe tepət, matəulək-in tepət.

⁷Itəmat kitieh kitieh nakəkəike mos-ipən nat naka nəmən e nıkkim məmə nakos-ipən. Okəmə nıkkim təsagienən ron, təsəwirən məmə nakos-ipən. Kən okəmə nakos-ipən məto-inu suah kit tatəkəike kəm ik məmə nakos-ipən, in min təsəwirən. Ekən nəhlan məto-inu Uhgın tolkeike etəm u tatos-ipən e nıkin pahrien.

⁸Kən Uhgın titun nawte-inən nəwirən rafin agin kəm itəmat məmə e nian rafin e natimnat rafin, nakotos natimnat rafin itəm tətuatip məmə nəkotəkəike motos, kən moatos tepət min əh-ikin məmə nakotoor kəm netəmim.

⁹Naoha Rəha Uhgın tatən məmə, “In tatoor rəhan natimnat tepət kəm ian-rat min, kən rəhan nolən ətuatip tətətig lilin.”

¹⁰Kən Uhgın itəm tatos-ipən nıkkuti nat o etəm tatəfe, kən matos-ipinə pıret o nunən, e suatip kitieh əm in otos-ipinə nat tepət kəm itəmat mol in tepət min məmə, itəmat nəkotitun nasituən e netəmim neen min, kən in otol noan tepət itəm təmisi-pən e nolən ətuatip rəhatəmat.

¹¹E natimnat rafin e nāmegāhēn rēhatēmat, Uhgīn otos-ipēn rēhan nēwirēn kēm itēmat mēmē itēmat nēkotitun nawtēn e nian rafin. Kēn nian ekotoor rēhatēmat nasituēn, netēmim okotēnwiwi Uhgīn ron.

¹²Wēk u itēm itēmat nēkotoł, tatos-ipēn mēni o nagwēnēn kēm netēmim rēha Uhgīn u nēumis tatus ilat, mēto tatol nat wīr kit mīn taprēkis, inu nēnwiwiēn itēm tēmēr mērioah e nīki netēmim matuwīn o Uhgīn.

¹³Nian nēkotoł wēk u, natol-arēp nolēn rēhatēmat kēm netēmim tēpēt. Kēn ilat okotilēs-ipēr nērgi Uhgīn ron, mēto-inu itēmat nēkoatol pahrien nolēn rēha netēmim itēm koatēn nīpahrienēn e namnusēn tēwīr rēha Kristo. Kēn okotilēs-ipēr nērgi Uhgīn o nawtēn rēhatēmat e mēni asol kēm ilat ne netēmim rafin.

¹⁴Kēn nian koatēfak otēmat, nīkilat tuwīn otēmat mēto-inu Uhgīn tēmawtē-in rēhan nēwirēn kēm itēmat taprēkis agin-ēh mēmē nēmotasitu pīk elat.

¹⁵!Pēs kotēn kēm Uhgīn mēmē nīkitat tagien o Nētīn itēm tēmos-ipa kēm kitat, u in nat tēwīr agin maprēkis!

2 Korin 10

Pol tēmuhalpīn nēghatēn e rēhan wēk

¹Io Pol, io atīp, iatēkēike e nat kit kēm itēmat. Netēmim neen koatēn mēmē nian kitat mīn itēmat, rēhak nētēligēn in lēhau ēm, mēto nian ekiet rēkis etēmat, rēhak nolēn tēskasik pīk. Kristo, in rēhan nētēligēn lēhau, kēn in etēm mētīg. Kēn e nolēn kitiēh ēm,

²iatētapēh otēmat mēmē, onēkotoł nolēn rēhatēmat tētūatīp mēmē nian ekimnē, mēsēhai pīkēn itēmat. Mēto ekitun mēmē ekēhai netēmim neen u koatēn mēmē ekoatētēu-pēn nolēn rēha nētueintēn u,

³mēto-inu nat ērnapīn ekotatīg e nētueintēn u, itimat esotēluaginēn e nolēn rēha nētueintēn u.

⁴Natimnat rēha nēluaginēn itēm itimat ekoatēluagin lan, sēnēmē nat itēm nētueintēn koatēluagin lan. Kēp, natimnat rēhatēmat, ilat koatos nēsanēnēn rēha Uhgīn o nērēkinēn ikin tiēkis o nuwīnēn ikin ima tīkimīr mīn.

⁵Itimat ekoatərəkin nəghatən eiueiuə min ne nətəligən ausit min, ilat rafin itəm koatən-iəhau netəmim o nitunən Uhgın. Nətəligən min rafin itəm tikiwir min rəha Uhgın, itimat ekoatəluagin elat, motol win elat, motol məmə ilat rafin okotol nəwia Kristo.

⁶Kən nian itəmat nakotətəu-pən wir nəwia Kristo, itimat ekoatətul matip o nolən nalpinən kəm netəmim rafin itəm koatəht nəwian.

⁷Itəmat nakoatəplan nat itəm ihluə, məto nəkotəruru nipətın. Okəmə suah kit titun pahrien məmə in etəmim rəha Kristo, kən in otətəlig-in wir min məmə itimat min rəha Kristo tahmen lan.

⁸Nat əpnapın iatəghat ausit məsin o nepətən itəm İərəməərə təmos-ipa, okol esaulisən ron. Təmos-ipa o niləkinən itəmat, sənəmə o niləs-iəhauən itəmat.

⁹Esolkeikeən məmə nikitəmat təht məmə ekəte naoa min kəm itəmat e nolən itəm netəmim neen koatən, məmə otol itəmat nakotəgin.

¹⁰Ilat kotən rat io məmə, “Rəhan naoa təfigəm kən masilə, məto nian tətən kitat min, in sənəmə etəm əskasik kit, kən rəhan nəghatən in nat əpnapın əm.”

¹¹Netəm tol nəhlan kotəkəike motitun məmə, nolən rəhatimat itəm koatəplan e naoa min emotahl-ipən nian itimat isəu, məto nian ekotimnə, ekotol rafin nolən min əh.

¹²Esotolkeikeən məmə ekotəplan ahmen itimat ne netəm pisin neen itəm koatıləs-ipər atip ilat. !Kəsi, itimat esotahmenən! !Kəp, iatəsan əm! Nian ilat atip əm koatəplan ahmen ilat min, kən koatakil atip əm ilat min, tol rəhalat nitunən talməl.

¹³Məto itimat, esotəghat ausitən taprəkis e nepətən rəhatimat, məto ekotəghat ausit e wək itəm Uhgın təmələhəu-pən məmə rəhatimat, kən wək u, itəmat min əpəh ikin.

¹⁴Kən nəghat ausitən e nepətən rəhatimat otəmat in ətuatip əm, in təsepət pikən. Okəmə esotuwamən otəmat, okol esotəghatən nəhlan. Məto

nipahrienən, emotaupən motuwa mətōarus-pa itəmat nian emotan moatən-iarəp namnusən təwir rəha Kristo.

¹⁵Netənim neen koatəghat ausit o wək itəm suah pisin təmol. Məto itimat ekoatəghat ausit əm e wək itəm Uhgın təmələhəu-pən kəm itimat. Itimat emotələhəu-pən əskasik nətəligən rəhatimat məmə nahatətəən rəhatəmat otəwiə təhmin min, kən tol nəhlan, rəhatimat wək e nikitəmat otol iahgin mepət,

¹⁶kən tol nəhlan, ekotitun nuwinən motən-iarəp namnusən təwir e ikin min e nikali imatəmat ikin muwin təhmin min. Kən e nolən əh, itimat esotolən wək e ikin kit itəm suah kit tinol wək rəkis ikin, kən məsotəghat ausitən o wək rəha etəm pisin.

¹⁷Məto Naoa Rəha Uhgın tatən məmə, “Pəs etəm tatəghat ausit, in otəghat ausit əm e natimnat itəm Iərəməərə təmol.”

¹⁸Iatən nəhlan məto-inu, kəsisiai-inən etənim itəm tatiləs-ipər atip in, məto katisiai-in əm etənim itəm Iərəməərə tatiləs-ipər.

2 Korin 11

Pol ne aposol eiueiuə min

¹Iakolkeike məmə nakotegəhan-in io pəs ekən rəhak məsin nalmələn kəm itəmat. Məto pahrien, noatol rəkis.

²Iatehm wir itəmat, məsolkeikeən məmə suah kit min otəmki-rəkis itəmat e nelmək, kən nolən əh rəhak təmisi-pən əm o Uhgın. Io tata rəhatəmat, kən itəmat nəkotahmen e pətan əkəku wi kit itəm kinən rəkis məmə okos rəham kətim kan məmə otətəu-pən suah kitiəh əm, nərgin u Kristo. Kən iatehm wir rəhak pətan əkəku əh məmə ekegəhan-in-pən in kəm rəhan iərman, kən in təruru əh iərman.

³Məto iatəgin məmə onəkotahmen e If itəm Setan təmeiuə in e nəghatən ətehen. Iatəgin məmə suah kit otiuw-pən rəhatəmat nətəligən tuwin ik pisin, kən nakotapəs rəhatəmat nolkeikeən o Kristo, itəm in tətuatip məpiə wir.

⁴Iatən nəhlan məto-inu okəmə suah kit tatuwa otəmat matən-iarəp Iesu itəm tol pisin e Iesu itəm ekoatən-iarəp, o okəmə itəmat nakoatos narmin itəm tol pisin e Narmin nəmotos rəkis, o nakotəto namnusən təwir itəm tol pisin e itəm nəmotos rəkis, məto itəmat ialməl min, nakotegəhan-in əm.

⁵Aposol min əh itəm itəmat nakoatən məmə ilat “aposol min ilis pik,” məto e rəhak nətəligən esəplanən məmə ilat ilis maprəkis-in io.

⁶Okəmə naka kəsəgətun wirən io e nəghatən, məto ekitun wir nəukətin namnusən təwir. Itəmat emotəgətun nat əh kəm itəmat e nolən min rafin nian tərət.

⁷Nian ematən-iarəp namnusən təwir rəha Uhgın kəm itəmat, esolən məmə nakotətou nat kit. Io atip əm emos-iəhau io o nıləs-ipərən itəmat. ?Kən tahro? ?Nolən əh in təfagə rat kit? !Kəp!

⁸Nian ematol wək kitat min itəmat, niməfak min ik pisin kəmoatətou io. Iuəhkır tahmen məmə emakləh-in ilat məmə ekasitu etəmat.

⁹Kən nian kəmoatan, kən rəhak nat kit tikə, esətapəhən o suah kit o nasituən məto-inu piatat min itəm kəmotisi-pən Masetonia kəmotos-ipa natimnat itəm rəhak tikə. Tol nəhlan, esətapəh-inən nat kit otəmat, kən məsos-ipənən wək əskasik otəmat o nehmən io, kən ekol nəhlan nian rafin.

¹⁰Tahmen e nıpahrienən rəha Kristo tətətig lak, iatən pahrien məmə suah kit tikə ikin min rafin əpəh Akaea o nən-iəhauən io o nəghat ausitən o nəsətapəh-inən nasituən.

¹¹?Kən tahro ekəsətapəh-inən nat kit otəmat, məto-inu esolkeikeən itəmat? !Kəp! Uhgın titun məmə ekolkeike pik itəmat.

¹²Netəmim neen kotolkeike məmə nikitəmat təht ilat məmə kotahmen etimat e wək itəm koatəghat ausit ron. Məto iakatəkəike o nolən rəha nəsətapəh-inən natimnat məmə rəhalat nəghatən otiet morin.

¹³Netəm nəhlan, ilat aposol eiueiuə min, kən koateiuə-in netəmim e wək rəhalat. !Kən ilat koatan tahmen məmə ilat aposol min pahrien rəha Kristo, məto kəp!

¹⁴Məto kəsotautən e nolən əh, məto-inu Setan atip, tətən tahmen məmə in nagelo kit rəha nəhag-əhagən.

¹⁵Kən sənəmə in nat kit itəm okotaut lan, okəmə iolwək min rəha Setan kotan tahmen məmə ilat iolwək min rəha nolən tətuatip. E namnun nian, ilat okotos rəhalat nətouən tətəu-pən nolən min rəhalat.

¹⁶Ekisimatip min. Pəs suah kit tikə nikin təht məmə io ialməl. Məto okəmə nikitəmat təht nəhlan, kən otegəhan-in io pəs ekol nolən rəha ialməl məsin, kən ekəghat ausit məsin.

¹⁷Nəghatən u rəhak sənəmə nat itəm İərəməərə təmən-ipa kəm io məmə ekən. Məto iatəghat əm tahmen e ialməl kit.

¹⁸Netəmim tepət koatəghat ausit o nolən min rəha nətueintən, kən tol nəhlan, io min, ekəghat ausit.

¹⁹!Ei! !Nakotenatig wir, kən tol nəhlan, motegəhan-in məmə iaməl min kotəgətun itəmat!

²⁰Nakotegəhan-in əm okəmə suah əpnapin kit tatol itəmat slef, o okəmə tatos nat kit rəhatəmat e nolən eko-eko, o tatiləs-ipər atip in, o tatem-pən niganəmtitəmat.

²¹!İataulis məmə nətəligən rəhatimat təpou pik məmə esotolən nolən rat min əh! Rəhak nəghatən in talməl, məto nolən naka itəm netəm əh kotəmə okotəghat ausit ron, io min, ekəghat ausit ron.

²²?Tahro? ?İlat koatən məmə ilat netəm Hipru? Io min. ?Koatən məmə ilat netəm Isrel? Io min. ?Koatən məmə ilat noanol rəha Epraham? Io min.

²³?Koatən məmə ilat iolwək min rəha Kristo? Io min, məto ekaprəkis-in ilat. Kəsi, iatəghat tahmen e ialməl kit. Emol wək pik taprəkis-in ilat, kən kiləs-ipən io e kalapus nian tepət taprəkis-in ilat, kən kəmalis io taprəkis-in ilat, kən iuəhkir ekimis nian tepət.

²⁴Nian faif, noanol rəha Isrel kəmotalis io mau tate-nain.

²⁵Nian kisil, kəmalis io e nikilkil. Nian kit kəmaht io e kəpiel apin. Nian kisil emuwın e nego kən nego tamnim, kən nian kit emeai əpəh itəhəi lokamnim o nian apiəpiə kit, lapin ne nərauiəgən.

²⁶Nian rafin etaliwək o nolən wək rəhak. Kən iuəhkir naruə asol tiləs io ekimis, kən emətətig ikin tasilə ikin imaa iakləh min, kən ikin tasilə ikin imaa natimak min noanol rəha Isrel, kən ikin tasilə ikin imaa Iaihlua min, kən ikin tasilə ikin e taon asol, kən ikin tasilə ikin e ikin taruən-aruaən ikin, kən ikin tasilə ikin əpəh itəhəi, kən ikin tasilə ikin imaa piak eiueiuə min.

²⁷Emol pik wək, kən nian tepət esapilən lapin. Nian min neen, nəumis tus io, kən mətoaoa, kən nian tepət nigak nagwənən tikə. Kən nian tepət iatətəp, kən rəhak natimnat təsahmenən o nətəpən.

²⁸Kən taprəkis-in natimnat min əh, nian rafin nikik təht pik niməfak min rafin.

²⁹Okəmə suah kit rəhan nəmegəhən teiuaiu, kən io min, rəhak nəmegəhən teiuaiu. Okəmə suah kit tatit suah kit min e təfagə rat, kən nikik titahmə pik ron.

³⁰Okəmə ekəike məghat ausit, kən ekəghat ausit o nat itəm tatəgətun məmə rəhak nəsanənən tikə.

³¹Kən Uhgın, u in Uhgın ne Tata rəha İərəmərə İesu, itəm katiləs-ipər nərgin nian min rafin namnun tikə, titun məmə io, eseiuaən.

³²Əpəh Tamaskes, etəm-iasol rəha Kig Aretas təməlin rəhan mopael min o nehm wirən nafiluə rəha taon məmə okotegəs-in motaskəlim motiləs-ipən io e kalapus.

³³Məto kəmiləs-ipən io e kətim asol kit, kətu-pən nol lan, kiləs-ipən e winta e fenis asol kəmol e kəpiel, kən kəhlman-əhlman tuwin əpəh ləhau, kən inəh suatip emagim lan.

2 Korin 12

Nihlin kit ne nat kit tahmen e napilaiiren

¹Ekəike matəghat ausit, nat əpnapin təsolən win e nat kit ikin, məto ekəkəike matən natimnat min tahmen e napilairən ne nəghatən wi min itəm Iərəməərə təmol əp kəm io.

²Ekitun iəfak kit itəm tətahatətə e Kristo. E nup fotin tinuwın rəkis, Uhgin təmiləs muwın əpəh ilis e nego e neai. İəkəruru okəmə nıpətın tinatuwın, o narmin əm, Uhgin əm titun.

³Kən ekən min məmə iəkəruru okəmə nıpətın tinatuwın, o narmin əm, Uhgin əm titun. Məto ekitun məmə suah əh,

⁴Uhgin təmiləs muwın əpəh iman ikin. Kən in təməto nat anion min itəm təsətuatipən məmə etənim rəha nətueintən otən.

⁵Ekəghat ausit o etəm tol nəhlan, məto esəghat ausit atipən ron io, məto ekəghat ausit əm o rəhak nolən min itəm nəsanənən tikə elat.

⁶Məto okəmə ekən məmə ekəghat ausit, okol esalmələn, məto-inu ekəghat-in nıpahrienən. Məto esəghat ausitən nəhlan, kən tol nəhlan, suah kit tikə itəm otıləs-ipər io ilis taprəkis nat itəm tətuatip. İakolkeike məmə otəplan ahmen io e nat naka itəm ekən, o ekol.

⁷Uhgin təsolkəikeən məmə etausit o nəghatən wi min itəm in təmol əp kəm io, kən nəghatən min əh kotəwir maprəkis. Kən tol nəhlan təmahl-ipa nəratən kəm io tahmen e nihlin kit tətəru nıpətik. Nəratən əh in iahləpis rəha Setan məmə tol nahməən e nıpətik, kən tol nəhlan esausitən.

⁸Emuəh niki Iərəməərə mau ksil məmə otıləs-irəkis ron io.

⁹Məto tən kəm io məmə, “Rəhak nəwıwın asol titun naskəlımən ik, məto-inu nian rəham nəsanənən tikə, nəsanənən rəhak titun nuwamən mol iahgin e rəham nəmegəhən.” Tol nəhlan, etagien pık məmə ekəghat ausit e rəhak nəmegəhən itəm nəsanənən tikə, məmə nəsanənən rəha Kristo otatig e nəmegəhən rəhak.

¹⁰O nat əh, etagien nian nəsanənən tikə e nıpətik, kən etagien nian katən rat io, kən etagien e nian iəkis min, kən etagien nian katol nəratən kəm io, kən

etagian e nian itəm tiəkis ron io. Etagien elat rafin o nərgi Kristo, mətə-inu nian rəhak nəsanənən tikə, kən iatəsanən.

¹¹Emol nolən rəha ialmə, mətə itəmat əm nəmoatəkəike kəm io məmə ekol. Nəməsotiləs-ipərən nərgək, mətə təpəwir pik okəmə nəmotol mihin, mətə-inu io sənəmə ləhau e “aposol min ilis pik” e nat kit əkəku əm, nat əpnapin io etəm əpnapin əm.

¹²Nian emətan kitat min itəmat, ematol natimnat itəm tatəgətun io məmə io aposol pahrien kit. Ematol nəmtətin min, ne nat asol min itəm tol narmi netəmim tatiwig, ne nat pispis min e nikitəmat, kən emol e nətəligən rəhak kaifəməh.

¹³Nat kitəh əm eməsolən e nikitəmat, eməsətapəh-inən mənə kit otəmat. !Otaluin o təfagə rat u rəhak!

¹⁴Roiu iatətul matip məmə ekimnə muag itəmat itəm otol kisil lan. Kən ekəsətapəh-inən mənə kit otəmat, mətə-inu esotolkeikeən rəhatəmat nautə, mətə iakolkeike əm itəmat. Otətəlig-in-tu. Sənəmə wək rəha suakəku məmə otehm wir rəhan tata ne mama. Mətə in wək rəha tata ne mama məmə okuehm wir rəhalau suakəku.

¹⁵Tol nəhlan, nikik tagien məmə ekos-ipinə rafin rəhak natimnat otəmat, kən mos-ipən min rəhak nəmegəhən otəmat. Rəhak nolkeikeən otəmat in tepət, mətə rəhatəmat ron io in təkəku əm. !Inu təsətuatipən!

¹⁶Pəs kotən məmə esətapəh-inən mənə kit otəmat. Mətə itəmat neen koatən məmə emos natimnat otəmat e nolən eko-eko.

¹⁷?Tahro? ?Io emos natimnat e nolən eko-eko nian emahl-ipən netəmim kəm itəmat, o kəp? !Kəp!

¹⁸Emuəh niki Taetas məmə otuwın otəmat, kən mahl-ipən piətət kit ilau min. ?Taetas təsosən natimnat otəmat e nolən eko-eko, o kəp? ?Nəkotitun o kəp məmə, rəhatimlau nətəligən kitəh əm, kən matioal nolən kitəh əm?

¹⁹Kəm-naka nikitəmat təht məmə e nəghatən min rafin əh, emotuhalpin nəghatən kəm itəmat itəm suah kit təmən otimat. Kəp. E niganəmti Uhgın,

emoatəghat tahmen e netəm rəha Kristo. Kən iolik min, natimnat rafin itəm koatol, koatol məmə itəmat nakotəsanən.

²⁰Iatən nəhlan məto-inu iatəgin məmə nian ekimnə, kəm-naka ekəplan məmə nəsolən məmə inu iakolkeike mihin. Kən itəmat min nəkotəplan məmə io esolən məmə inu nakotolkeike mihin. Iatəgin məmə ekəplan itəmat neen kotərgəhəu, neen koatetet, neen koatəmərīt e neməha, neen kotəhap-əhap ilat min, neen koatən rat netəmim, neen koatən nikalin netəmim, neen koatausit, neen koatol əpnapin nat.

²¹Iatəgin məmə nian ekimnə min, rəhak Uhgīn otīlēs-iəhau io e niganəmtitəmat, kən nikik otitəgit kən ekasək otəmat neen itəm nəmotol nolən rat aupən, kən məsotəuhlinən ilat o nolən rat min rəhalat itəm koatol nian rafin, inu koatol nolən rat itəm tol naulisən o nənən, kən nəman ne nīpitan koatan anion, kən koatol nəhlan əpnapin əm.

2 Korin 13

Namnun nəghatən rəha Pol o nəhgaiirən elat

¹Inu rəhak naliwəkən itəm tatol kisil lan otəmat. Naoa Rəha Uhgīn tatən məmə, “Nian suah kit tatətu-pən nəghatən e suah kit min, etəmim kəiu o kisil okotəkəike motən nəghatən kitīəh, kən tol nəhlan netəmim kotitun məmə nəghatən koatətu-pən lan, in nīpahrienən.”

²Nian emimnə otəmat itəm tatol kəiu lan, emən-iarəp rəkis nəghatən o nəhgaiirən e netəm koatol təfagə rat ne itəmat rafin, məmə okotapəs təfagə rat min. Kən roiu ekən min nian io əpəh isəu. Nian ekimnə min, ekol nalpinən kəm ilat itəm kəsotapəsən təfagə rat.

³Ekotol nəhlan məto-inu nikitəmat təht məmə rəhak nəsanənən tikə, kən itəmat kotolkeike motitun əsas məmə nian iatəghat, in nəghatən rəha Kristo əm. In təsəpouən o nolən wək itəmat min, məto rəhan nəsanənən tepət e nikitəmat.

⁴Nīpahrienən, nian kəmətu-pər e nig kəluau, rəhan nəsanənən tikə e nīpətin. Məto tatəmegəh roiu e nəsanənən rəha Uhgīn. Kən e nolən kitīəh, rəhatimat

nəsanənən tikə e nīpətīmat, məto itimat ekotəmegəh itimat Kristo e nəsanənən rəha Uhgīn, kən nian ekotəghat kəm itəmat, onəkotəplan nəsanənən əh.

⁵Itəmat atip, otakil wir nəmegəhən rəhatəmat məmə rəhatəmat nahatətəən in pahrien, o kəp. Itəmat atip, nakotehm wir rəhatəmat nolən. ?Nəkotitun o kəp, məmə Kristo Iesu tətatiɡ e nəmegəhən rəhatəmat? !Məto okəmə rəhatəmat nəmegəhən təsətəu-pənən nolən rəha nahatətəən, kən Kristo təsatiɡən e nəmegəhən rəhatəmat!

⁶Kən emələhəu-pən əskasik rəhak nətəliɡən məmə onəkotəplan məmə itimat aposol min pahrien.

⁷Kən roiu, ekoatəfak kəm Uhgīn məmə itəmat kit təsolən nat kit tərət. Esotolkeikeən nəhlan məmə otəɡətun məmə rəhatimat wək e nikitəmat in təwir mətuatip. Məto ekotolkeike məmə itəmat nəkoatol nolən itəm tətuatip, nat əpnapin netəmin neen koatən məmə wək rəhatimat tərət.

⁸Tol nəhlan məto-inu okol itimat esotolən nat kit itəm tahtosiɡ-in nīpahrienən, məto ekotitun nolən əm nat itəm tatiləs-ipər nīpahrienən.

⁹Nikitimat tagien nian itimat ekotitun nolən u, itəm nəsanənən tikə lan, məto nəmegəhən rəhatəmat tatətul əskasik. Kən nəfakən rəhatimat otəmat məmə nəmegəhən rəhatəmat tahmen o nətəu-pənən suatip ətuatip.

¹⁰Nian io əpəh isəu otəmat, ekəte nəhlan o nat kit. Iərəmərə tinos-ipa rəkis nepətən kəm io, məto esolkeikeən məmə nian ekimnə otəmat, ekəike mol əskasik etəmat e nepətən əh. In təmos-ipa nepətən əh məmə ekiləs-ipər itəmat, sənəmə məmə ekərəkin itəmat.

Namnun nəghatən

¹¹Piak min ne winik min. Inu rəhak namnun nəghatən. Otagien. Otəuhlin rəhatəmat nolən min. Otəto rəhak nəghatən. Otuwa e nətəliɡən kitiəh. Otatiɡ e nəməlinuən. Kən Uhgīn rəha nolkeikeən ne nəməlinuən otatiɡ itəmat min.

¹²Otən təwir kəm itəmat min tahmen məmə itəmat kitiəh əm e Kristo.

¹³Iəfak min rafin koatən-ipinə təwir kəm itəmat.

¹⁴Pəs Iərəmərə Iesu Kristo otawte-in rəhan nəwīrən kəm itəmat rafin. Kən pəs Uhgīn otos-ipən rəhan nolkeikeən kəm itəmat rafin. Kən pəs Narmin Rəha Uhgīn otol nikitəmat rafin tol kitīəh.

Kalesia

Kalesia 1

Pol tēmētoun matēghat kēm ilat

¹⁻²Piak min ne winik min itēm nēkoatēfak latuēnu pisin pisin min ikin Kalesia, io Pol, io aposol kit rēha Uhgīn, ekatēte naoa u, mītahl-ipinē kēm itēmat. Io ne piatat min neen itēm koatēfak u ikin-u, ekotolkeike mēmē ekotēn “tēwir” kēm itēmat. Io u inu, itēm Iesu Kristo ne Tata Uhgīn kēmialēs-ipēr io mēmē io rēhalau aposol. Uhgīn u, in tēmīlēs-ipēr Iesu taiir-pa min e rēhan nīmīsēn. Sēnēmē etēmim ēnnapīn ēm kit tēmaun-in io kēn mīlēs-ipēr io, mēto Uhgīn. !Tol nēhlan, onēkotēkēike motēto!

³Pēs Uhgīn, u Tata rēhatat, ne Iesu Kristo, u Iērēmērē rēhatat, ilau okuawte-in nēwirēn rēhalau kēm itēmat kēn muēlēhēu nēmēlinuēn tētatiḡ otēmat.

⁴Iesu Kristo tēmēgēhan-in atip mēmē in otīmīs o nolēn rat rēhatat, kēn miuw rēkis itat e nolēn rat min ne nētēliḡēn rat min rēha nētueintēn. In tēmīmīs mēto-inu Tata Uhgīn tolkeike mēmē in otol mihin.

⁵Tol nēhlan, tēwir mē kitat okotēnwiwi pīk Uhgīn u rēhatat, tatuwin, matuwin, namnun tikē. Əwəh. Pēs otol mihin.

Namnusēn Tēwir kitīēh ēm

⁶Narmāk tēmīwiḡ pīk otēmat mēto-inu roiu agīn-əh huə Uhgīn tēmaun-in pap itēmat e nēwirēn rēha Iesu, tēmawte-in-pinē ēnnapīn ēm kēm itēmat. Mēto roiu itēmat nakotapēs Uhgīn, moatagiḡ, moatētēu-pēn nēghatēn eiueiuə min.

⁷Nēghatēn min əh sēnēmē Namnusēn Tēwir rēha Uhgīn. Netēmim neen kēmotēuhlin Namnusēn Tēwir rēha Uhgīn moatēn in pisin, kēn katēn mēmē in namnusēn tēwir, kēn katiuw kalin itēmat lan, kēn katērēkin rēhatēmat nētēliḡēn lan. !Mēto Namnusēn Tēwir kitīēh ēm, kēn kit min tikē!

⁸Nat ēnnapīn okēmē io, o nagelo kit rēha nego e neai tētamnus-iarēp nēghatēn pisin kit min, itēm tēsahmenēn e inun emotēn-iarēp rēkis kēm itēmat aupēn, pēs Uhgīn otīlēs-ipēn e Nīgēm Asol.

⁹Kən ekisimatip min, matən məmə, okəmə suah kit otamnus-iarəp nəghatən pisin u, təsahmenən e Namnusən Təwir itəm itəmat ninəmotitun rəkis, pəs Uhgın otıləs-ipən e Nigəm Asol.

¹⁰Rəhak nəghatən əh in təkaskik, kən nat ərnapin əm okəmə netəmim neen kəsotagienən ron io. Iakolkeike əm məmə niki Uhgın otagien o nəghatən rəhak. Okəmə iatəghat əh məmə netəmim neen nikilat otagien ron io, kən ko sənəmə io iolwək pahrien kit rəha Kristo.

Uhgın Təmaun-in Pol

¹¹Piak min ne winik min, ekolkeike mə ekən-ipinə ətuatip kəm itəmat məmə Namnusən Təwir itəm iatən-iarəp nian rafin sənəmə nat kit itəm təmişipən e nətəligən rəha etəmim əm.

¹²Namnusən Təwir u, sənəmə suah kit təmos-ipa kəm io, kən məgətun io lan, mətə Iesu Kristo əm in təmerəh e rəhk-kapə.

¹³Itəmat ninəmotitun rəkis rəhak nolən min itəm ematol aupən e nian ematəfak itimat netəm Isrel. Kən emən mə oekoh rafin netəmim min rəha Iesu, mərəkin-ərəkin agin niməfak, kən matol nalpinən əskasik kəm ilat.

¹⁴E nian əh, io ematətul-iəkis o nəukət kastom rəha netəm Isrel, itəm rəhak pipi min kəmotəgətun io lan aupən. Emitun taprəkis-in io min neen, itəm emotaiir ahmen.

¹⁵Nat ərnapin ematərəkin pap rəhan min netəmim, mətə Uhgın təmasəkitun io. Aupən ikin təmitəpun kən mawle rəkis io e nian emətətig əh e nərpi rəhak mama. Kən təmuwa e nian ətuatip rəhan, in təmaun-in io mə ekuwa io, rəhan etəmim.

¹⁶Kən Uhgın təmerəh e rəhk-kapə, məgətun io e nətın Iesu, məmə oekitun wir in, kən muwin mamnus-iarəp Namnusən Təwir rəhan kəm netəm min u sənəmə ilat netəm Isrel, katən ilat məmə Iaihlua min. E nian əh, io eməsuwınən mehm suah kit mə otəgətun io e Namnusən Təwir əh.

¹⁷Kən io eməsuwınən əpəh ilis Jerusalem məmə oekehm netəm min u kəmoatol aposol aupən. Eməsuwınən mə okotəgətun io e Namnusən Təwir

rəha Iesu. E nian əh, io eməsou-pis-pən əpəh ikin kit Arepia, kən matig mitəlig-pa min muwin əm latuənu kit, nərgin u Tamaskes.

¹⁸Matuwın, matuwın nup kisil kinəhaluwa minəhaluwın rəkis un, kən io ematig mitəlig-pən min Jerusalem məmə ekehm Pita. Kən eməsətigən tuwəh, emuatig mios nian fiftin əm.

¹⁹Kən e nian əh, emehm əm Jemes u, pia Iesu, İərəmərə rəhatat, məto eməsəplanən aposol min u neen.

²⁰Iatən pahrien e niganəmti Uhgın məmə nəghatən u, nıpahrienən, sənəmə neiuəən.

²¹⁻²²Eməsətigən tuwəh əpəh ilis Jerusalem. Kən uarisig un, emuwın əpəh nitən Siria ne Silisia. Kən e nian əh, netənim itəm koatəfak kəm Kristo latuənu pisin pisin min nitən Jutia, (nitən asol rəha Jerusalem), ilat kəməsotəplanən əh io motəruru niganəmtək.

²³Məto kəmoatəto əm namnusən u, netənim neen kəmoatən məmə, “Suah əpəh in əpəh, rəhatat tikimir, təmatoh itat o nəfakən, matərəkin nəmegəhən rəhatat, kən mətalkut məmə otərəkin min rəhatat nahatətəən. Məto roiu əh, in min tinatən-iarəp Namnusən Təwir rəha Iesu.”

²⁴Kən ilat kəmotənwiwi pik Uhgın o natimnat min itəm in təmol e rəhak nəmegəhən, in təməuhlin-pa io ekol nulan.

Kalesia 2

Aposol min neen kəmotegəhan-in wək rəha Pol

¹⁻²Tatuwin, matuwın minos nup fotin tinuwa minuwın rəkis un, kən Uhgın təmən-ipa kəm io məmə ekəike mitəlig-pən min əpəh ilis Jerusalem. Kən itımlau Panapas emian kən miat Taetas itiməhal min məhaluwın. Kən eməhaluwın kiet-arəpən Jerusalem, emotuəfimin itimat netəm-iasol min əm rəha niməfak. Nian emotəpələh e nuəfiminən əh, io ematən-ipən wir nəghatən min itəm ekuwin matən-iarəp kəm İaihlua min, ilat sənəmə netəm İsrəl. Emən-ipən wir natimnat min rafin agin kəm ilat məto-inu esolkeikeən

məmə nīkilat otəht məmə rəhak nəghatən təsətuatipən, kən moatən rat rəhak wək, tol nat əpnapin əm lan, noan tīkə.

³Kən e nian əh, nīkik təmatəht pīk məmə kətah okotəhai io mə ekəike mən-ipən kəm Iaihlua min, məmə okəike kəhg-ipən ilat. Məto kəməsotənən. Kən io kit u, Taetas, in etəm Kris, sənəmə etəm Isrel, kəsəhg-ipənən əh. Məto ilat kəməsotənən mə okəike kəhg-ipən.

⁴Nənən rəha nəhg-ipənən təmisi-pən e netəmim neen kəmoateiuə əm məmə ilat piatat min. Kən ilat kəmotalkəlīk wir məmə okotehm-tu məmə itimat ekoatətəu-pən əh Lou, o kəp. Məto itimat enotiet rəkis minotuwīn o Iesu Kristo, kən minotol kitīəh itimat min, kən itimat sənəmə slef rəha Lou. Məto netəm min əh, nīkilat təməsagienən o rəhatimat nəghatən min, kən motolkeike məmə okotəgo-pən itat rafin e Lou ne kastom rəha nəfakən rəha netəm Isrel. Kən kəmotən məmə okəike kəhg-ipən Iaihlua min tahmen e Taetas.

⁵Məto emotən-iəhau ilat məsotolən məmə rəhalat nəghatən otər maprəkis-in rəhatimat. Kən itimat emotaskəlīm əskasik nəghatən pahrien tətatiḡ e Namnusən Təwir, məmə itəmat onəkotitun wir.

⁶Kən netəmim neen əh-ikin katən ilat məmə ilat netəm-iasol min rəha niməfak, (məto e nehmən rəhak, etəm tatos nərig asol, ne etəm təsosən nərig asol, ilau kuahmen ahmen əm. Kən e niganəmti Uhgīn, in təsafinən nərig min əh). Kən netəm min əh kəməsotəgətunən io e nəghatən wi kit, məmə ekuwīn mamnus-iarəp.

⁷⁻⁸!Kəpə! Kəməsotolən, məto-inun ilat kəmotitun əm məmə, e nəsanənən rəha Uhgīn, in təmīləs-ipər io məmə io aposol, kən mitahləpis-pən io mə ekuwīn mən-iarəp Namnusən Təwir kəm Iaihlua min. Kən e nəsanənən əh, tinīləs-ipər rəkis mihin Pita, məmə in min in aposol. In otatən-iarəp Namnusən Təwir kəm netəm Isrel.

⁹Kən Jemes ne Pita ne Jon, katən iləhal məmə nəukəti niməfak miləhal. Nian kəməhaləplan, kən məhalitun məmə e nəwīrən rəha Uhgīn, in təmos-ipa wək u e nelmək. Kən kəhaluwa məhalol sekhan etīmlau Panapas məmə itimat

ekotol əm kitiəh. Kən emotən mə oekotoor wək min. Itimlau oekian muamnus-iarəp Namnusən Təwir kəm Iaihlua min, kən iləhal okəhaluwın məhalən-iarəp kəm netəm Isrel.

¹⁰Kən ilat kəmotən-ipa əm nəghatən kitiəh əm məmə nikitimlau otəkəike matəht ian-rat min əpəh Jerusalem məmə ekuasitu elat. Məto, nīkik tinagien rəkis o wək əh.

Pol tēməhai Pita

¹¹⁻¹⁴Kən uarisig un, emitəlig-pən əpəh ləhau taon kit Antiok. Nian emətatiğ ikin əh, kən Pita tēmuarisig min muwa. Kən Pita tēmətagwən ilat in min neen koatəfak, məto ilat Iaihlua min. Kən nian netəmim min rəha Jemes, itəm kəmotisi-pən Jerusalem motiet-arəpa, ilat kəmotəhai Pita, motəmə, “Iaihlua min u, okəike kəhg-ipən ilat. Məto okəmə kəsolan, Uhgın okol təsasituən elat.” Kən nəghatən u kəmoatən təmərəkin Pita, mol taulis kən məgin nuwın minən magwən təlmin netəm kəsəhg-ipənən ilat. Kən nolən rat əh Pita təmol, miuw e kitat min neen əpəh Antiok, ilat iəfak min u noanol min rəha Isrel, ilat min kəmos o Pita moatol nolən rəha etəmim itəm tatəghat e nolən kəiu, kən moatəgin netəm kəsəhg-ipənən ilat. Motatiğ kiuw min e Panapas, təgin min ilat. Kən e nian eməplan məmə ilat kınəsotətəu-pən ətuatipən suatip itəm Namnusən Təwir tatən, kən eməhai-pən əm Pita e niganəmtilat, matən-ipən əskasik məmə, “Nat əpnapın ik etəm Isrel, məto nəsosən əh rəhatat nolən. ?Kən tahro natəkəike kəm netəm min u kəsəhg-ipənən ilat məmə okəhg-ipən ilat?”

Etəmim itəm otatəhətə e Iesu, Uhgın in otasitu lan

¹⁵Kən e nian əh, io emən-ipən wir kəm Pita məmə nīpahrienən məmə itimlau emiasipən ətuatip e noanol rəha netəm Isrel. Itimlau sənəmə Iaihlua mil itəm netəm Isrel nīkilat tatəht məmə ilat rafin nol təfagə məto-inu kəsotətəu-pənən e lou.

¹⁶Məto roiu ekiatun məmə Uhgın təsafinən etəmim kit məmə in tətətip e niganəmtin məto-inu in tatətəu-pən ətuatip Lou rəha netəm Isrel. Etəmim itəm tətəhatətə pahrien e Iesu Kristo, in əmun tətətip e niganəmti Uhgın.

Nətəligən əh in əh, tol itimat min netəm Isrel, oekotəkəike motahatətə əm e Iesu Kristo məmə ekotətuatip e niganəmti Uhgın. Uhgın təsəfinən itimat məto-inu ekotətəu-pən Lou, məto in tətəfin əm itimat məto-inu ekotahatətə e Iesu Kristo. Etənim kit okol təsətuatipən e niganəmti Uhgın məto-inu in tatətəu-pən pik Lou.

¹⁷Itimat u netəm Isrel, kən ekotahatətə e Iesu Kristo məmə ekotuwa motətuatip e niganəmti Uhgın. Məto netəm Isrel neen, nikilat tatəht məmə itimat nol təfagə məto-inu esotətəu-pənən lou. ?Tol nəhlan, in Kristo itəm tatol məmə itimat nol təfagə, o kəp? !Kəp! Sənəmə tol min nəhlan.

¹⁸Məto təfagə pahrien in tol min nulan, okəmə ekitəlig-pən min matətəu-pən lou. Okəmə ekatol min nəhlan, kən io esətuatipən e niganəmti Uhgın. Nolən əh tatəgətun əsas əm məmə io iol təfagə rat.

¹⁹⁻²⁰Tol nəhlan məto-inu, nian emalkut pik o nətəu-pənən Lou, kən eməplan məmə nolən u təsahmenən məmə tatol io ekətuatip e niganəmti Uhgın. Tol nəhlan, emapəs nətəu-pənən Lou o nuwamən etəm ətuatip. Tahmen məmə emimis, kən roiu e nəmegəhən wi rəhak, Lou təsərəməyəən lak. Emol nəhlan məmə ekol əm nətəligən rəha Uhgın. In tahmen məmə itimlau Kristo, kəmətu-pər itimlau min e nig kəməluau. Nəmegəhən oas rəhak təmimis. Məto emair-pa min itimlau Kristo. Kən roiu u, sənəmə io iatəmegəh, məto Kristo in tatəmegəh e nikik. Kən e nəmegəhən rafin rəhak, ekotahatətə əm e Nəti Uhgın, itəm təmolkeike pik io, kən muwa mimis mos megəh io.

²¹Nolkeikeən u, Uhgın təməwte-in-pa kəm itat, in iahgin pik. Kən okol esərəkinən nolkeikeən əh itəm Uhgın təməwte-in-pa ərnapin əm. Məto iatəplan məmə itəmat min neen, nəkoatətəu-pən Lou mə otol itəmat nəkotətuatip e niganəmti Uhgın. Məto okəmə nəkoatol nəhlan, kən itəmat nəkotol nat ərnapin əm e nimisən rəha Iesu Kristo.

Kalesia 3

Netəm Kalesia kəmotapəs suatip

¹!Netəm Kalesia, itəmat ninotalməł pik! ?Pah təmasig itəmat matuwın e suatip eko-eko nəhlan? Emotən-iarəp wir pap kəm itəmat məmə Iesu təmos nahməən e rəhan nimisən otəmat, məto tahro? ?Okəm-naka suah kit təmos-ipən-os-ipən kəm itəmat kən miuw rəkis itəmat mol itəmat ninotalməł pik?

²?Otən-tu kəm io məmə, Uhgın təmos-ipinə Narmin Rəhan kəm itəmat məto-inu itəmat nakotətəu-pən Lou, o kəp? Kəpə, in təmos-ipinə kəm itəmat məto-inu itəmat nakotahatətə e Namnusən Təwir rəha Iesu Kristo.

³?Tahro? ?Nakotalməł pik nəpo lan? Itəmat nəmotətuoun wir nəmegəhən wi rəhatəmat e Iesu Kristo e nasituən rəha Narmin Rəha Uhgın, kən məto roiu, itəmat ninotalkut məmə onəkotapəs, kən motuwa netəm ətuatip e rəhatəmat əm nəsanənən.

⁴Nəmoatətə nahməən tepət məto-inu nəmotahatətə e Namnusən Təwir. ?Nəmotətə nahməən əh əpnəpın əm? Kəp, nahməən əh sənəmə rəha nat əpnəpın əm.

⁵Narmin Rəha Uhgın təməsolən nat pispis min kəm itəmat məto-inu nəkoatətəu-pən Lou. In təmol məto-inu itəmat nəmotətə Namnusən Təwir rəha Iesu Kristo kən itəmat nakotahatətə lan.

Nətəu-pənən Lou, ne nahatətəən e Iesu

⁶Otətəligin-tu nat kit oekən. Suah kit, Epraham, itəm Naoa Rəha Uhgın təməghat-in-iarəp rəkis minu lan məmə: “Epraham in təmahatətə əskasik e Uhgın, kən tol nəhlan, Uhgın təmən məmə in tətətuatip e niganəmtin.”

⁷E suatip kitiəh əm, netənim itəm koatahatətə e Uhgın, in tətəfin ilat məmə kotahmen e noanol ətuatip rəha Epraham.

⁸Naoa Rəha Uhgın təmən rəkis aupən məmə Uhgın otos Iaihlua min, kotuwa ron mol ilat kotətuatip e niganəmtin e nahatətəən rəhalat. Aupən, Naoa Rəha Uhgın təmən-iarəp nəghatən wir kit kəm Epraham məmə: “Otisi-pən e rəham noanol, kən ekawte-in rəhak nəwirən e netənim rəha noanol min rafin e nətueintən.”

⁹Kən Uhgín tēmawte-in rəhan nəwirən kəm Epraham mətō-inu in tēmahatətə əskasik lan. E suatip kitiəh min əm, Uhgín titun nawte-inən nəwirən kəm netəmim itəm koatahatətə pahrien lan.

¹⁰Mətō netəmim min un, itəm nikilat tatəht məmə ilat okotos nəmegəhən mətō-inun ilat koatətəu-pən rafin nat naka itəm Lou tatən, netəm min əh, ilat kinotatig rəkis e nəlmi nəratən. Tahmen-pən əm e Naoa Rəha Uhgín tatən məmə: “Netəmim itəm kəsotol ətuatipən natimnat min rafin itəm kotatig e naoa rəha Lou, ilat kinotatig rəkis e nəlmi nəratən, kən okotəkəike motos nalpinən kit.”

¹¹Kən tol nəhlan, tətuatip əm o kitat məmə suah kit tikə itəm tatuwa tətuatip e niganəmti Uhgín mətō-inu in təmətəu-pən Lou, mətō Naoa Rəha Uhgín tatən min-nulan məmə: “Etəmim itəm tətahatətə e Uhgín, in tatuwa tətuatip e niganəmtin, kən in otos nəmegəhən pahrien.”

¹²Nəghatən əh, tatəghat-in nahatətəən rəhatat e Uhgín. Nolən rəha nətəu-pənən Lou, in təsahmen-ahmenən e nolən rəha nahatətəən e Uhgín. In əh, mətō-inu nolən rəha nətəu-pənən Lou, tahmen-pən əm nulan, Naoa Rəha Uhgín tatən məmə: “Etəmim itəm tolkeike məmə otos nəmegəhən pahrien mətō-inu tatətəu-pən ətuatip Lou, in otəkəike mol natimnat min rafin agin itəm Lou tatən.”

¹³Netəmim rafin agin kəsotol ətuatipən nat naka itəm Lou tatən. Tol nəhlan, Lou in təmələhəu nalpinən tətatig o kitat rafin, kən kitat rafin kotatig e nəlmi nəratən. Mətō Iesu Kristo təmimis e nig kəməluau, kən miuw rəkis kitat e nəlmi nəratən əh. Iesu in təmos nalpinən otat tahmen-pən əm e Naoa Rəha Uhgín tatən məmə: “Etəmim kit, itəm kəmohamnu kətu-pər e nig, nolən əh tatəgətun-pən məmə Uhgín in təmol nalpinən kəm in.”

¹⁴Mətō roiu, Iesu təmimis nəhlan məmə netəmim əpnəpin min rafin, ilat okotatig e nəwirən itəm Uhgín təmən kəm Epraham məmə, in otos-ipən kəm noanol min rəhan. Kən nat əh tol nəhlan məmə inu roiu kitat netəm kotahatətə e Iesu, kitat kotitun nosən Narmin Rəha Uhgín itəm Uhgín təmən məmə otos-ipən kəm netəmim.

Uhgin tēmaupən mol nēniəkisən rēhan, mēto Lou tēmuarisig tēsafələn

15-16 Piak min ne winik min, e nāmegəhən rəhatat, kitat kotitun nolən u rəha nēniəkisən. Nian suah kit tatol, okol kəsafələn, kəsətu-pənən kit min. E suatip kitih əm, Uhgin tēmol nēniəkisən kit kəm Epraham o rəhan kit noanol. Kən e nəghatən əh, tēməsənən mēmə Uhgin tēmən-iəkis noanol min rafin rəha Epraham, mēto tēmən əm mēmə etəmim kitih əm otisi-pən e rəhan noanol, etəmim u, in Iesu Kristo.

17 Kən rəhak nəghatən, nīpətīn tol nulan mēmə, aupən, Uhgin tēmən-iəkis mēmə otətəskəlīm nəghatən rəhalau Epraham, mēto uarisig nup fo-hanrit-tate tēmuwin rəkis, kən Lou tēmuwa. Mēto Lou əh, okol tēsərəkīnən nəghatən itəm in tēmən kəm Epraham, okol tēsafələn nēniəkisən rəha Uhgin.

18 Kən okēmə kitat kotatig e nēwirən rəha Uhgin mēto-inun kitat koatətəu-pən Lou u, tatəgətun-pən mēmə nēniəkisən itəm Uhgin tēmol aupən in nat əpnarīn əm. Mēto tēsələn nəhlan. Mēto-inu kitat kotəplan Epraham in tēmətatig e nēwirən min rəha Uhgin mēto-inu in tēmaskəlīm-iəkis nēniəkisən rəha Uhgin.

Lou rəhan əh-ikin wək

19 Suah kit otəpanətəpəh mēmə, “?Okēmə tol nəhlan, kənu Uhgin tēmos-ipən Lou kəm Moses o naka?” Kən ekītun nənən kəm itəmat u-roiu mēmə nēniəkisən itəm Uhgin tēmol kəm Epraham in tēmaupən matig, mēto Lou in tēmuarisig in. Tēmuwa mēmə otəgətun əm kitat netəmim mēmə okotitun mēmə kitat nol təfagə rat. Mēto Uhgin tēmələhəu Lou əh mēmə otatig matuwīn matuwīn mētoarus etəmim u noanol rəha Epraham otaiir-pa otat. Kitat kotitun mēmə Lou əh, rəhan wək təwir, mēto nīkitat otəkəike matəht mēmə Lou əh, Uhgin tēmaupən mos-ipən kəm nagelo min, uarisig təpanos-ipən kəm etəmim kit u Moses. Moses, in suatip o nos-ipa min Lou kəm itat. Mēto nian Uhgin tēmol nēniəkisən ilau Epraham, tēməsələn nəhlan.

20 Uhgin in tēməsələn suatip kit mēmə suah un otəghat kəm Epraham. Mēto in ətuatip əm tēməghat mən-ipən nēniəkisən rəhan e niganəmti Epraham.

²¹Kən sənəmә Lou әh tәmuwa mә otәрәkin nәniәkisән rәha Uhgın. Kәpә, tәsolән nәhlan. Okәмә Lou titun nos-ipamән nәmegәhән wi kәм kitat, kән kitat kapotitun nuwamән kәtuatip e niğanәmti Uhgın. Mәto tәsol mihinән.

²²Mәto Lou kit tol nәhlan tikә. Mәto-inu Naoa Rәha Uhgın tatән mәмә nolән rat tәmәlis rafin kitat. Kән kitat rafin koatәtgәhl Lou min. Tol nәhlan mәмә, suatip kitih әm mәмә kitat okotos nәwirән min rәha Uhgın itәм tәmән-iәkis rәkis. Kән suatip u mәмә koatahatәtә e Iesu Kristo.

Nian u-roiu rәha nahatәtәән e Iesu Kristo

²³Aupән, Lou itәм Uhgın tәmos-ipән kәм Moses, in tәmataskәlim kitat tiәkis, tahmen әm mә kitat kәmotatig e kalapus, mәtoarus-pa u-roiu, Uhgın tәmerәh e niğanәmtitәt kotәplan suatip rәha nahatәtәән.

²⁴Kән Lou әh, in tahmen әm e etәм-iasol kit itәм tәmatәрәmәрә etat, muwa mәtoarus-pән nian Kristo tәmuwa, mәмә e nian әh, kitat kinotuwa motәtuatip e niğanәmti Uhgın, mәto-inun, kitat kәmotahatәtә lan.

²⁵Mәto roiu әh, Lou okol tәsәрәmәрә minән etat, mәto-inun nian rәha nahatәtәән e Iesu Kristo tinәmuwa rәkis.

Itәmat rafin kitih әm e Iesu

²⁶Kән mәto-inun itәmat nәmotahatәtә e Iesu Kristo, itәmat rafin, nenәti Uhgın min.

²⁷Kән kinol baptais rәkis etәmat, mәмә itәmat nakotuwa motol kitih itәmat min. Tol nәhlan mәмә, itәmat ninotos nolән wir min rәha Iesu tahmen әm mәмә nәmotalpın nipәtitәmat e natimnat wi.

²⁸Kән itәmat rafin ağin nәmotuwa motol kitih itәmat Iesu Kristo, kән itәmat rafin ninotahmen әm. Tәwir mәмә kitat kәsotoor minән netәmim, nat әpnapın okәмә in etәм Isrel o in Iaihlua kit, in slef kit o in sәнәmә slef kit, in iәрman kit o in pәtan kit.

²⁹Itəmat rafin netənim rəha Iesu. Tol nəhlan, itəmat noanol min pahrien rəha Epraham. Kən e suatip kitih əm, nəwirən min itəm Uhgın təmən-iəkis kəm Epraham, itəmat onəkotos motatig lan.

Kalesia 4

Kitat nenəti Uhgın

¹Roiu əh, oekəghat məsin min e nolən rəhatat, oekən muəh nimaa nəghatən lan. Okəmə suah kit, in otimis kənu nətın in otos rəhan nəwirən min rafin, məto okəmə nətın tatəkəku əh, kənu kol təsosən nəwirən rəhan. Nətın tahmen əm e slef kit, nat ənapın rəhan nəwirən min rafin.

²In otəkəike mətatig əm e nelmi rəhan min, tatuwin matuwın mətoarus-pən nian rəhan tata təmən in minitun nosən natimnat min itəm rəhan tata təmələhəu kəm in.

³Kənu kitat min kotahmen-pən əm nəhlan. Aupən kitat kotahmen əm e suakəku əh. Kitat slef min rəha iərmis min itəm kəmoatərəmərə etat.

⁴Məto tinuwa e nian ətuatip itəm Uhgın təmən, kən Uhgın təmahl-ipa nətın tuwa, pətan kit təmİLəs taiir-pa e nətueintən, kən in matətəu-pən wir natimnat rafin itəm Lou in tatən.

⁵Təmol nəhlan məmə otikis rəkis kitat u, Lou təməlis ətain itat, kənu Uhgın otəhl kitat, mİLəs-irəkis kitat tahmen əm e nenətın ətuatip min.

⁶Kənu roiu əh, Uhgın tolkeike məmə in otol pəs kitat kotitun məmə kitat nenətın min, təmahl-ipa Narmin rəha Nətın təmuwa e nikitat min rafin, kən matol itat kotaun-in Uhgın məmə, “Tata.”

⁷O nat əh, kitat sənəmə slef min əm, məto kitat nenəti Uhgın pahrien min. In tatos-ipa natimnat wir min kəm kitat, itəm in tinəmən rəkis məmə otos-ipən kəm nenətın min.

Pol nikin titahmə o netəm Kalesia

⁸Aupən itəmat nəmotəruru Uhgın. Itəmat nəmoatəfak əm iərmis min məmə rəhatəmat uhgın min, ilat kəmotəlis ətain itəmat, məto ilat sənəmə ilat uhgın pahrien min.

⁹Məto roiu əh, ninotitun Uhgín. O təwir ilə məmə ekən nəhlan məmə Uhgín tinitun rəkis itəmat. ?Məto ekolkeike məmə ekətapəh-tu otəmat məmə nəkotitəlig-pən min o iərmis min o naka? Rəhalat nəsanənən tikə, kənu kol kəsotolən-ta nat wir kit kəm itəmat nian kit ne. Təhrol nakotəmə ilat okoatəlis min itəmat?

¹⁰?Təhrol itəmat nakotətəu-pən nətuakəmən rəhalat e nian min rəhalat, ne məwig min rəhalat, ne nian asim min, ne nup min rəhalat o naka? ?Nikitəmat təht məmə okol Uhgín nikin tagien otəmat ron?

¹¹!Kəsi nəman! !Io ekatəgin agin otəmat! !Ekatəplan mə emol wək pik etəmat o nat əpnapin əm!

¹²⁻¹³Piak min ne winik min, io ekatən əskasik kəm itəmat məmə, aupən itəmat nəməsotatigən e Lou kit, kən io emuwa mehm itəmat koatətig, emos nolən rəhatəmat. Eməsətəu-pənən Lou. Kən roiu, ekolkeike məmə itəmat min onəkotos nolən rəhak, ekəsolən məmə Lou otaskəlim pik io tiəkis. Itəmat nikitəmat təht u, aupən nian io ematən-iarəp Namnusən Təwir kəm itəmat, məto-inu nimisən rəhak təmol, kən ekətətig kitat min itəmat. Məto nat əpnapin məmə io ematimis e nian əh, məto itəmat nəməsotolən io ekəto tərət.

¹⁴Nimisən rəhak təmaləkiamtə itəmat, məto itəmat nikitəmat təməsəht ratən io, kən məsotən ratən io. Itəmat nəmoatos wir io moatuwin e nipəg noanimə min rəhatəmat, təhmen əm məmə io nagelo kit rəha Uhgín, o io, io Iesu Kristo.

¹⁵Aupən, itəmat nəmoatolkeike pik io, eməplan məmə okol napotitun nolən nat u, napotos-iarəp əm niganəmtək u tərət, kawluin ilau itəm təwir kit rəhatəmat, pəs tasitu lak. ?Məto tinahrol əh-roiu?

¹⁶Nikik təht məmə, okəmə naka nəghatən min pahrien rəhak təmol itəmat nakotətəhau io.

¹⁷Iəgətun eiuə min un, koatalkut pik məmə onəkotəuhlin rəhatəmat nətəligən moatətəu-pən ilat. Məto ilat kəsotolən məmə otasitu etəmat. Kotalkeike əm

məmə okotiuw rəkis itəmat ron io məmə itəmat onəkotalkut pik o nətəu-pənən ilat.

¹⁸In nat təwir məmə nakotalkut pik o nolən natimnat, məto nəkotəkəike motalkut o nat itəm in təwir, nat əpnapin ekətətig kitat min itəmat, o esatigən kitat min itəmat.

¹⁹Io min neen, io iatəto tərət agin-əh otəmat tahmen-pən əm e pətan itəm məntaan tinatahmə məmə otemək, matuwın matuwın mətoarus itəmat nakotos nolən ətuatip rəha Iesu Kristo e rəhatəmat nəmegəhən.

²⁰Ekolkeike pik məmə ekətətig kitat min itəmat u-roiu məto-inu okəmə ekətətig, okol esagət pikən etəmat. Məto roiu etətig isəu otəmat nəhlan, kən məruru mə ekahrol nulan masitu etəmat.

Namsu rəha Heka ne Sera

²¹Itəmat netəm nakotolkeike pik nətəu-pənən Lou, onəkotuhalpın-tu rəhak nəghatən. ?Nəmotəto rəkis nat naka itəm Lou tatən, o nəsoətətoən əh?

²²In tatən Epraham itəm təmiləs nətin iərman kəiu. Kit itəm slef rəha pətan rəhan təmiləs, kən kit rəhan pətan ətuatip təmiləs, sənəmə in slef məto pətan əh rəhan.

²³Suakəku itəm pətan slef təmiləs in təmaiir e nətəligən əm rəha netənim. Məto suakəku itəm pətan ətuatip əh rəhan təmiləs, in təmaiir məto-inu Uhgın in tinəmən-iəkis rəkis məmə pətan əh otiləs.

²⁴⁻²⁵Kən kitat kotitun nənən namsu rəha pətan mil əh kən motəuhlin-pa nipətın etat. Pətan mil əh ilau katuəgətun nənən mil itəm Uhgın təmol kəm netənim. Pətan u Heka, in ne nətin min ilat slef min əm, okətələkiəmtə ilat. Kən pətan əh Heka, in tahmen e nənən itəm Uhgın təmol e nitot Sinae əpəh e nitən asol Arepia, ikin əh inəh Uhgın təmos-ipən Lou ikin kəm Moses. Kən in tahmen min e taon asol kit u Jerusalem itəm netəm ikin kotaskəlim əskasik Lou, kən ilat kotahmen e slef min itəm Lou tatəlis ətain ilat.

²⁶Məto Jerusalem kit min əpəh ilis e neai, in tahmen e pətan itəm sənəmə slef, itəm Lou təsəlis ətainən, kən in mama rəhatat.

²⁷Inu nəghatən kit e Naoa Rəha Uhgın tatən nəhlan məmə, “!Ik u inu, niməgi-nig, agien! Ik u inu, nəməsətoən nahməən kit o neməkən, agət əfəmə, mətō-inun nīkim tətāgien! Ik nəməsiləsən suakəku nian kit ne, mətō roiu əh, nenətim min tinol tepət tepət agin, taprəkis-in nenəti pətan itəm rəhan iərman təsapəsən.”

²⁸Piak min ne winik min, itəmat nenəti Uhgın min mətō-inun təmən-iəkis məmə otol mihin. Itəmat onəkotahmen e Aisak u aupən, nəti Sera.

²⁹Kən aupən suakəku u Ismael, nəti Heka, itəm təmaiir e nətəligən əm rəha netəmim, in təmatərəkīn pik suakəku u Aisak itəm təmaiir e wək rəha Narmin Rəha Uhgın. Kənu roiu ne, nolən əh tatuwin əm nulan, ilat itəm slef rəha Lou koatərəkīn kitat itəm kəmotaiir wi e Narmin Rəha Uhgın e nahatətəən.

³⁰?Mətō Naoa Rəha Uhgın təmən məmə naka? In təmən məmə, “Ik onakəkəike mahl-iarəp pətan un slef ne nətin. Ilau kuagim rəkis u ikin-u, mətō-inun, nəti pətan əh, in okol təsosən nəwīrən kit rəha tata. Nəwīrən min rafin rəha tata otuwīn kəm nəti pətan itəm sənəmə slef.”

³¹Mətō kitat u, kitat sənəmə nenəti pətan slef, kitat nenəti pətan itəm sənəmə slef.

Kalesia 5

Iesu tēmikis rəkis rəhan min netəmim

¹Nian Iesu Kristo tēmikis rəkis itat, təmol kitat məmə Lou təsəlis ətainən kitat. O nat əh inəh, itəmat onəkotəike motətul əskasik. Sotətəu-pənən Lou, məmə otərəmərə etəmat. Lou əh, titaləkiamtə itəmat, məmə itəmat onəkotuwīn motol wək min rəhan.

²Otətəlig-in-tu io. Io Pol iatən nəghatən u kəm itəmat. Okəmə itəmat onəkotegəhan məmə ilat okotəhg-ipən itəmat, kənu nat u itəm Iesu təmol təsasitu aginən etəmat.

³Kən io iatagət əskasik otəmat məmə etəmim itəm otegəhan məmə okəhg-ipən in, in otos-ipən atip əm in e nelmi Lou. Kən etəmim itəm tətətig e nelmi

Lou, otəkaike matətəu-pən rafin agin natimnat min itəm Lou tatən məmə otol.

⁴Itəmat u, itəm nakotalkut-alkut o nətəu-pənən Lou məmə otol itəmat nəkotətuatip e niganəmti Uhgín, itəmat ninotəte rəkis atip itəmat o Iesu Kristo. Itəmat ninotəhən-ipən rəkis məntaatəmat o nəwírən rəha Uhgín.

⁵Kən mətə kitat u, okotələhəu-pən əm rəhatat nətəligən e Uhgín, pəs in otol kitat kotətuatip e niganəmtin, mətə-inun kitat kotahatətə əm e Iesu Kristo. Kən Narmín Rəha Uhgín, in otol itat koatətul əskasik kən motəsahgin mətəarus nat un otiet-arəpa.

⁶Nian kitat kotuwa motakul-pən e Iesu Kristo, nat əpnarín okəmə etəmim kəməhg-ipən o kəsəhg-ipənən, mətə nat asol un, in rəhatat əm nahatətəən e Iesu Kristo. Nahatətəən əh, in tol kitat kotalkeike Uhgín, motatig katol min nolkeikeən kəm netəmim min.

⁷⁻⁸Aupən, eməplan itəmat kən mítun məmə itəmat nakotaiu əsanən e suatip ətuatip e nəmegəhən rəhatəmat, məmə nakotətoarus mak, mətə roiu, nəmotitəlig. Uhgín təmaun-in rəkis itəmat. ?Tol nəhlan, ekolkeike məmə ekətapəh-tu məmə, pah min kotaiuosig e rəhatəmat suatip, moatiuw kalín itəmat məmə onakoatətəu-pən min Lou? !Ekitun məmə okol Uhgín təsən-iəhauən itəmat nəhlan!

⁹In tahmen e nəghatən kit itəm katən nulan məmə, “Ilat kəmotis noanig rat kit, tınatəwiə, matərəkín nətəligən rəhatəmat.”

¹⁰Mətə ekitun məmə nípahrienən Iərəmərə in otol nətəligən rəhatəmat tuwa min mol kitíəh kitat min io. Kən io ekitun wír məmə etəmim u itəm tatərəkín rəhatəmat nətəligən nulan, nat əpnarín in etəm-iasol o in etəm ahrol kit, mətə Uhgín otol nalpínən kit kəm in.

¹¹Piak min ne winik min, nəghatən neen itəm katən məmə io, ekatən-iarəp əh məmə netəm kəmotahatətə e Uhgín okəike kəhg-ipən ilat məmə Uhgín otasitu elat. Mətə nəghatən əh, sənəmə nípahrienən. Okəmə io ekatən-iarəp nəhlan, kən netəm min u itəm koatan itəmat min ilat, níkilat otagien əm ron io.

!Məto otəplan-tu! Netəm Isrel neen, koatərəkin əh io, koatitəp io, moatoh io, məto-inun io iatən-iarəp məmə nimisən rəha Iesu e nig kəməluau, in əm un, in otosmegəh kitat.

¹²!E rəhak nətəligən, netəm min un itəm koatərəkin nətəligən rəhatəmat moatən məmə okəike kəhg-ipən itəmat, təwir məmə ilat okotuwın motətə-atip ilat min!

¹³Məto piak min ne winik min, Uhgın təmaun-in itəmat, kən mikis rəkis itəmat, məmə Lou itəm Uhgın təmos-ipən kəm Moses in otəsəlisən itəmat. !Otəto wir itəmat! Nikitəmat otəsəhtən məmə, “Təwir, io enagim rəkis e Lou əh. Roiu əh, io ekitun nolən natimnat rafin itəm nikik tolkeike.” Itəmat, onakəsotənən nəhlan. Məto nolkeikeən rəhatəmat otəkəike mol itəmat nikitəmat tagien məmə onəkotasitu etəmat min.

¹⁴Nolən əh, in tatətəu-pən wir nəghatən kit rəha Lou, u itəm titargəfimin rafin nəghatən pisin pisin min rəha Lou, in tatən məmə, “Ik, onakolkeike netəmim rafin, kən matol təwir kəm ilat, tahmen əm mə ik nakatol atip kəm ik.”

¹⁵Itəmat onəkotəkəike katəto wir itəmat. Okəmə itəmat nəkoatol timəht kəm itəmat min, nəkotahmen əm e kəi min, koatus atip əm ilat min, kən nəghatən rəhatəmat otərəkin itəmat.

Nolən rəha Narmin Rəha Uhgın ne nolən rəha netəmim

¹⁶Io, ekolkeike mə ekən nəghatən kit kəm itəmat. Itəmat, Narmin Rəha Uhgın otəkəike matit itəmat kən itəmat nakotətəu-pən, kən itəmat məsotosən nolən rat aupən rəhatəmat, itəm nəmos kaiir-pa.

¹⁷Nolən rat aupən əh, inun, nəkoatol natimnat tərət itəm nikitəmat tolkeike. Məto nolən əh, in tetəhau nolən rəha Narmin Rəha Uhgın. Kən Narmin Rəha Uhgın in təsolkeike minən nolən rat aupən kəmos kaiir-pa moatol. Nolən mil əh kətioal təməht kəm ilau min, kən tatol məmə nəkəsotolən nolən wir min itəm nakotolkeike məmə onəkotol.

¹⁸Sotaluinən nat kit, okəmə Narmin Rəha Uhgın tatit itəmat, kənu Lou in təsəlis ətain minən itəmat.

¹⁹Kitat kotitun əm nolən rat aupən rəha netəmim itəm kəmos kair-pa moatol. Nipitan ne nəman ne, koatit anion ilat min; kən ilat koatol nolən rat rafin itəm tol naulisən o nənən; rəhalat nətəligən tatuwin pik o nolən rat min əh.

²⁰Ilat koatəfak kəm narmi nat min, moatəmik nərək, moatos təmafah rat min, moatol kilepa, ne. Kənu moatol min timəht, moatəmu, moatetet, moatol neməha, moatos-ipər atip əm ilat, moator ilat min, kən okəmə rəhalat nətəligən tol pisin pisin, kən ilat koatəhai ilat min.

²¹Nikilat tətəkləh-in natimnat rəha netəm pisin, moatənim nənimən min kətapis lan, kən moatol lafet katagien lan o nolən nat tərət min əm, moatol min natimnat tepət min tol nəhlan. !Iatən min tahmən-pən əm məmə emən aupən məmə, oatəto wir itəmat! Məto netəm koatol nolən min əh, okol ilat kəsotuwamən motatig ahgin nərəməərən Rəha Uhgın itəm tatol əpen-əpenə lan.

²²Məto noa Narmin Rəha Uhgın itəm tatəwiə e nəmegəhən rəha netəmim rəha Uhgın, in tol nulan. Ilat koatolkeike netəmim, kən nikilat tətəgien, kənu nəməlinuən tətətig e nikilat, kən rəhalat nətəligən kaifəməh, kən moatasəkitun etəmim, kən rəhalat nolən in təwir təwir. Kən netəmim kotitun mə ilat netəm ətuatip, koatol noa.

²³Kən ilat netəm mətig. Kən nian nətəligən rat tatig elat, ilat kotətul əskasik, məsotolən natimnat rafin itəm ilat atip kotolkeike nolən. Nolən min u, ilat kotəwir pik, kən nəghatən kit tikə o Lou kit, məmə otən-iəhau itəmat məmə onəkəsotolən natimnat min əh.

²⁴Kitat u netəm rəha Iesu Kristo, kitat kinəmotapəs rəkis nolən rat min rəhatat, u kəmoatol natimnat min itəm nətəligən əm rəhatat tolkeike. Tahmen əm nulan mə, kəməht-ipən nətəligən rat min rəhatat e nig kəməluau.

²⁵!Kotəplan-tu! Narmin Rəha Uhgın in təmos-ipa rəkis nəmegəhən kit kəm kitat, kən təwir məmə kitat okotaliwək e nolən wir min rəhan.

²⁶Tərat məmə kitat okotausit motos-ipər pik kitat, motiuw-pər nəratən, moatetet kitat min.

Kalesia 6

Təwir məmə kotasitu e katipa əfigəm rəhatat min

¹Piak min ne winik min, okəmә itəmat kit təme e rəhan nəmegəhən, təwir mə itəmat un, Narmin Rəha Uhgın tatit itəmat, onəkotəkəike motasitu lan motəg-ətuatip-in. Məto onakəsotagət pikən lan, onəkotəghat mətig əm kəm in, motol məmə nikitəmat min titahmə ron. Məto otəto min itəmat, məmə nat kitiah əm itəm itəmat nakotən-iəhau etənim ron, otəseko-pa minən otəmat.

²Itəmat onəkotasitu nəhlan etəmat min. Onəkotalis kələh nat əfigəm rəhatəmat min. Okəmә nəkotol nəhlan, kən itəmat nakotətəu-pən wir nat naka itəm Lou rəha Kristo tatən.

³Təsəwirən məmə kitat okotos-ipər atip kitat. Okəmә suah kit nikin tatəht mə “Io, io etəm agin-əh kit,” etənim un, nikin tateiuə-in, məto in təruru məsəplanən məmə in nat əpnəpən əm.

⁴⁻⁵Məto itəmat onəkotəike motəplan wir-tu natimnat itəm noatol min. Tol nulan məmə, okol etənim kit in təsakil atipən rəhan wək ne wək rəha suah kit min. Məto in otəkəike mehm wir rəhan pisin əm wək aypən. Məto-inun, netənim rəhalat wək min tol pisin pisin. Kən ilat koatos katipa əfigəm pisin pisin min e nəmegəhən rəhalat kitiah kitiah. Məto təwir məmə etənim kitiah nikin otagien o rəhan wək, okəmә rəhan wək təwir əm.

⁶Itəmat u, təwir məmə itəmat onəkotawte-in natimnat min neen kəm rəhatəmat nəgətun min, itəm koatəgətun itəmat e nəghatən rəha Uhgın.

⁷Oatəto itəmat, soteiuə-in atipən itəmat min məmə itəmat nəkotitun nolən nat əpnəpən kit itəm nikitəmat rat aypən nakotolkeike. Kən okol nəkəsotolən ialmə e Uhgın. Ik nəmis noanig naka e rəham nasumən, kən ik onakəhl atip min noan, mun.

⁸Etənim itəm tatasum-in nolən rat aypən, itəm kəmos kaiir-pa moatol, tahmen e noanig rat e rəhan nəmegəhən, in otəkəike məhl noan tərət mun,

kənu noanig un, otoe-in, nipətin u, Nīmisən. Məto etəmim itəm tatis noanig wir, itəm Narmin Rəha Uhgīn təmos-ipən, Narmin Rəha Uhgīn otol toe-in, noan wir kit, kən in otəhl. Nərgīn noanig un, in Nəmegəhən Lilin itəm namnun tikə.

⁹Sotəpou-inən nolən itəm təwir, məto-inu kitat okotəhl noanig wir əh, e nian ətuatip rəhan, okəmə kəsotapəsən wək.

¹⁰Kən nian min rafin itəm kotitun nolən, pəs koatol təwir kəm netəmim rafin, kən motatig katol tepət min kəm netəm min u kotahmen e piatat min ne winitat min e Iesu Kristo.

Namnun nəghatən rəha Pol təmən kəm ilat

¹¹Oekəte rəkis namnun nəghatən rəhak e naoa e nelmək əm. Itəmat onəkotəplan məmə leta min rəhak, ilat iahgin min.

¹²Netəm Isrel u koatən məmə okəike kəhg-ipən itəmat, ilat kotausit əm e niganəmtilat min neen o nat u. Məto ilat koatən nəhlan o nat kitəh əm, məmə netəm Isrel neen min okəsotolən nəratən kəm ilat.

¹³Kən ne nat kit min, netəm min əh, kotolkeike məmə okəhg-ipən itəmat məto-inu kotausit əm məmə okotol win etəmat lan. Kən motiww kalin itəmat, nakotitəlig motuwīn min e nelmi Lou rəha netəm Isrel. Məto otəplan-tu, ilat min kəsotətəu-pən wirən natimnat min itəm Lou tatən.

¹⁴Məto io rəhak, io ekəsən wi atipən io o nat kit itəm emol. Məto ekolkeike məmə ekənwiwi əm nat naka Iərəməərə Iesu Kristo təmol e nian in təmimis e nig kəməluau. O nat əh inəh, nolən min rəha nətueintən okol kəsotiuw rəkisən rəhak nətəligən, kənu netəm e nətueintən itəm kəsotahatətəən e Uhgīn, ilat kəsotolkeikeən nolən itəm iatətəu-pən.

¹⁵Okəmə Uhgīn in otol suah kit tuwa in etəm wi, kən in otol suah əh, tətəuatiip e niganəmtin, nat əpnəpin okəmə kəməhg-ipən o kəsəhg-ipənən.

¹⁶Kən roiu, ekatəfak o netəm min u koatətəu-pən wir nəghatən u, ilat noanol ətuatip min rəha Uhgīn. Iatəfak məmə, pəs nəməlinuən rəha Uhgīn ne rəhan nasəkitunən otatig olat.

¹⁷Rəhak u namnun nəghatən. Io esolkeikeən məmə suah kit otən min nat tərət lak. Məto-inun iatəmik əh nəme niməgəm itəm kəmaht io e kəpiel apin kən kəmalis io. Nəme niməgəm min u, tatəgətun məmə io, slef rəha Iesu.

¹⁸Piak min ne winik min, iatəfak məmə Iərəmərə Iesu Kristo otawte-in rəhan nəwirən otəmat. Əwəh.

Efesas

Efesas 1

¹Io Pol, u io aposol kit rəha Kristo Iesu, itəm Uhgın təmitəpun rəkis məmə rəhan. Iatən təwir kəm itəmat rafin iəfak min əpəh Efesas itəm nakoataskəlim əskasik nahatətəən rəhatəmat e Kristo Iesu.

²Pəs Uhgın u Tata rəhatat, ne Iərəməərə Iesu Kristo, okuawte-in nəwİRən ne nəməlinuən kəm itəmat.

NəwİRən itəm Uhgın təmos-ipən e Kristo

³Nənwiwiən tuwin o Uhgın u Tata rəha Iərəməərə Iesu Kristo rəhatat. E Kristo, in təmawte-in o narmitat nəwİRən rafin rəha nego e neai.

⁴Tol nəhlan, məto-inu nian Uhgın təməsolən əh neai ne nİməptən, məto in təmitəpun kitat məmə kotuwa kitİəh kitat Kristo, kən məmə e nİganəmtİN, kitat kotətuatİp kən kəsehM-pənən nolən rat kit e kitat.

⁵Məto-inu Uhgın tolkeike pİK kitat, uarisİg in təmol natİmnat, məto in təmitəpun rəkis kitat məmə okotuwa nenətİN min e Iesu Kristo. Nat əh tatətəu-pən əm nəwİan ne nat naka itəm in tolkeike.

⁶Təmol nəhlan məmə kitat okotənwiwi Uhgın o rəhan nəwİRən itəm in təwir taprəkis, nəwİRən əh itəm təmawte-in əpnarİN əm kəm kitat e NətİN itəm in tolkeike pİK.

⁷Məto-inu nİta Kristo təmaİu, kitat kəmotuwa kitİəh lan, kən Uhgın təmİkis kitat e rəhatat nolən rat min, inəh təmafəl rəkis nolən rat min rəhatat. !Nİpahriənən, nəwİRən rəha Uhgın in İahgİN taprəkis!

⁸Kən təmos-ipa nəwİRən əh itəm təfigəm maprəkis. E nenatİgən ne nitunən min rafin rəhan,

⁹nİkin tagİen məmə təmol əp kəm kitat nat anİon e nalpəkauən e rəhan nəghatən, itəm in otol e Kristo.

¹⁰Kən İnu nalpəkauən. E nian ətuatİp rəhan, in otəhlman natİmnat rafin e neai ne nİməptən okotuwa ləhau e nərəməərəən rəha Kristo.

¹¹Uhgin tatol natimnat rafin tatuwa tahmen əm məmə inu təmən mihin. Aupən aupən agin in təmitəpun kitat məmə okotuwa rəhan min nian təmiuw-pa kitat kotuwa kol kitiəh kitat Kristo.

¹²Təmol nəhlan məmə itimat noanol min rəha Isrel u emotaupən katahatətə e Kristo, itimat ekotol məmə katiləs-ipər nərgi Uhgin.

¹³Kən itəmat Iaihlua min, nəmotuwa kitiəh itəmat Kristo nian itəmat nəmotətə nəghatən pahrien, namnusən rəha nosmegəhən. Nəmotahatətə lan, kən Uhgin təmos-ipən Narmin Rəhan kəm itəmat tahmen e nəmtətin kit məmə itəmat rəhan min.

¹⁴Məto-inu kitat kəmos Narmin Rəha Uhgin, kən kitat kotitun wir məmə Uhgin otos-ipa natimnat wir min kəm kitat itəm in təmən-iəkiş məmə in otol mihin. Kitat okotos natimnat min əh nian Uhgin otikiş kitat u rəhan min. Inu otol məmə netənim okotənwiwi Uhgin məto-inu in ilis taprəkiş.

Nənwiwien ne nəfakən rəha Pol

¹⁵⁻¹⁶Məto-inu o natimnat min u, iatəfak otəmat nian rafin mətoarus-pa u-roiu, kən iatən tagkiu kəm Uhgin otəmat. Nolən əh emətuoun nian eməto namnusən o rəhatəmat nahatətəən e Iərəmərə Iesu, ne rəhatəmat nolkeikeən o iəfak min rafin.

¹⁷Iatəfak otəmat kəm Uhgin itəm in Uhgin rəha Iərəmərə Iesu Kristo rəhatat, kən in Tata itəm katənwiwi katisiai-in pik agin. Iatəfak məmə in otos-ipinə narmin rəha nenatigən ne nitunən məmə nəkotitun wir in təhmin min.

¹⁸Kən iatəfak min məmə in oterəh e rəhatəmat nətəligən məmə onəkotitun nat naka nəmotələhəu-pən əskasik rəhatəmat nətəligən lan, itəmat itəm Uhgin təmaun-in. Kən iatəfak min məmə onəkotitun məmə Uhgin otos-ipinə nat təwir taprəkiş kəm itəmat u noatahatətə e Kristo.

¹⁹Kən iatəfak min məmə onəkotitun nəsanənən rəhan məmə in iahgin pik agin, kən nəsanənən əh tatol wək e nəmegəhən rəhatat itəm koatən nipahrienən e Iesu. Kən nəsanənən əh in tahmen əm e rəhan nəsanənən asol

²⁰itəm təmōl Iesu təmegəh min e nimisən, kən təmōl mēmə in təmuwa matəpələh e nikali Uhgīn matip e nego e neai, ikin rəha nəsānənən ne nisīaiiən.

²¹Kən Iesu in ilis e netəm-iasol min ne nepətən min rafin, ne nərəmərən ne nəsānənən rafin, ne nəriḡ min rafin, e nian u-roiu, ne e nian itəm otəpanuwa.

²²Kən Uhgīn təmələhəu-pən natimnat rafin aḡin ləhau e nelkin, kən mol in tuwa rəhn-kapə natimnat rafin, kən inu otasitu e niməfak.

²³Kən niməfak in nipəti Iesu, kən nalpəkauən rəha Uhgīn o Kristo tatuwa nipahrienən e niməfak, kən e nolən kitih əm, nalpəkauən rəha Uhgīn o natimnat rafin tatuwa pahrien e Kristo.

Efesus 2

Nəmegəhən wi e Kristo

¹Itəmat u, aupən tahmen əm mēmə nəmotimis mətō-inu nəmotəht nəwia Uhgīn, kən motol nolən rat min.

²Nəmotan motol nolən tərət rəha nətueintən, kən moatol nəwia etəm tərəmərə e nəsānənən rəha nərātən rəha magoagəp. In əm əh narmin rat itəm tatol wək roiu e nəmegəhən rəha netəm u koatəht nəwia Uhgīn.

³Itimat min emotatig nəhlan itimat min ilat nian kit aupən. Nikitimat tolkeike nolən rat min, kən itimat emotol nərātən əh itəm kəmotol nikitimat tagien. Nat naka itəm təmisī-pən e nikitimat ne nətəligən rat min rəhatimat, mətō itimat emoatətəu-pən əm ilat. Kən nian emotaiir, mətō nolən rat tinatig rəkis e nikitimat, tahmen e netəm əpnarīn min. Kən niki Uhgīn titahmə o nolən rat min rəhatimat, kən in otəkəike mol nalpīnən kəm itimat.

⁴Mətō Uhgīn, in tərīoah e nolkeikeən o kitat, kən rəhan nasəkitunən o kitat in iahgin pik.

⁵Kən nat əpnarīn e nian əh kəmotimis e narmitat o rəhatat nolən rat min, mətō in təmōl kitat kotəmegəh kitat Kristo mətō-inu in tolkeike pik kitat. (Otətəlig-in-tu. E nəwīrən rəhan, in təmosmegəh itəmat.)

⁶Kən Uhgín tēmīlēs-ipər kitat, kitat Kristo, kən tēmōl mēmə kitat kotəpələh kitat Kristo e nego e neai.

⁷Uhgín tēmōl nəhlan mēmə e nian itəm otəpanuwa, in otəgətun rəhan nəwīrən itəm in iahgin taprəkis agin-əh, kən kitat koatəplan rəhan nəwīrən e nolən wīr rəhan kəm kitat e Kristo Iesu.

⁸E nəwīrən asol rəha Uhgín itəm tēmawte-in kəm itəmat, in tēmosmegəh itəmat e nahatətəən, kən natimnat min əh, sənəmə itəmat atip nəmotol, mətō in nat kit itəm Uhgín tatos-ipa əpnarīn əm kəm itəmat,

⁹sənəmə e wək kit itəm itəmat nəmotol, kən tol nəhlan ko suah kit təsos-ipər atipən in ron.

¹⁰Tol nəhlan mətō-inu in Uhgín itəm tatol wək e nəmegəhən rəhatat, kən in tēmōl kitat e Kristo Iesu mēmə kitat okotol wək min itəm kotəwīr. Wək min u, Uhgín tinol əpen-əpenə rəkis lan mēmə kitat okotol ilat.

Ilat kəmotuwa kitīəh e Kristo

¹¹Tol nəhlan, itəmat onəsotaluinən mēmə nian nəmotaiir, kən itəmat sənəmə noanol rəha Isrel. Kən netəm Isrel itəm kinəhg-ipən rəkis ilat, ilat kəmotən mēmə itəmat Iaihlua min mətō-inu kəsəhg-ipənən itəmat. Mətō nat u, in nat kit itəm katol əm e nīpəti etəmim.

¹²Kən onəsotaluinən mēmə e nian əh, itəmat nəmotətul isəu o Kristo, itəmat sənəmə netəm Isrel ətuatip, mətō itəmat Iaihlua min əm, kən nəniəkisən min rəha nasituən rəha Uhgín kəm netəm Isrel aupən itəm kəməlis ilat lan e Uhgín, okol təsuwamən mēmə rəhatəmat. Nəmegəhən rəhatəmat e nətueintən u in tēmōl nəhlan mēmə, nat kit tikə mēmə onəkotələhəu-pən əskasik rəhatəmat nətəligən lan, kən itəmat nəmotəruru agin Uhgín.

¹³Mətō itəmat itəm aupən nəmotan isəu o Uhgín, nəmotuwa kitīəh itəmat Kristo Iesu, kən roiu nəmotuwa pahrien o Uhgín e nita Kristo.

¹⁴Tol nəhlan mətō-inu Kristo pisin əm təmələhəu nəməlinuən, təməlis noanol rəha Isrel ne Iaihlua min kotuwa kitīəh mēmə ilat netəm kitīəh min əm. Aupən, Lou rəha noanol min rəha Isrel in tahmen-pən əm e noanapinat iəkis

kit itəm tēmatoor ilat kən matol mēmə ilat koatol tikimir. Məto Kristo tēmətəwin noanapinat əh.

¹⁵Təmöl nəhlan nian in təmimis e nig kəməluau, kən təmöl mēmə kitat okotapəs nətəu-pənən Lou min rafin rəha noanol min rəha Isrel mēmə okotətuatip e niganəmti Uhgın. Kristo təmöl nəhlan mēmə in otol noanol min rəha Isrel ne Iaihlua min kotuwa kitiah lan. Kən e nolən əh, in təmələhəu nəməlinuən.

¹⁶Kən e nimisən rəhan e nig kəməluau, Kristo təmils ilat kotuwa kitiah, kən mit ilat motitəlig-pən o Uhgın, kən mol rəhalat timəht tauke.

¹⁷In təmuwa matən-iarəp nəməlinuən kəm itəmat u aupən nəmotatig isəu o Uhgın, kən matən-iarəp nəməlinuən kəm itəmat u emotatig iuəhkır o Uhgın.

¹⁸Kən roiu o nat naka itəm Kristo təmöl, kitat rafin noanol min rəha Isrel ne Iaihlua min, kotitun nuwamən o Tata Uhgın e Narmin Rəhan kitiah əm.

¹⁹Kən tol nəhlan, sənəmə itəmat iapispis min o netəm ihluə, məto roiu itəmat natig e nego e neai itəmat netəm koatahatətə e Iesu, kən itəmat nenəti Uhgın min.

²⁰Kitat kotahmen e nimə kit rəha Uhgın itəm nelki nimə in Kristo Iesu, kən aposol min ne ien min, ilat nelmi nimə asol min,

²¹⁻²²kən Kristo tatilpın itəmat Iaihlua min e nimə əh tahmen e nelmi nimə min, kən tatiləkin nelmi nimə min rafin mēmə ilat okotuwa nimə ətuatip rəha nəfakən o İərəməərə, itəm Uhgın tətətig ikin e Narmin Rəhan.

Efesus 3

Pol təmən-iarəp nalpəkəuən anion rəha Uhgın

¹O nəghatən min əh, emən-iarəp namnusən rəha Kristo Iesu kəm itəmat u sənəmə noanol min rəha Isrel, kən roiu etatig e kalapus ron.

²Itəmat nəkotitun rəkis mēmə Uhgın təmos-ipa wək asol u kəm io mēmə ekən-iarəp nəwırən rəhan kəm itəmat.

- ³Tahmen e nəghatən itəm eməte rəkis kəm itəmat, iatən məmə Uhgīn pīsin əm təmol əp nat anion rəhan kəm io.
- ⁴Nian onəkotafin nəghatən əh, kən onəkotitun rəhak nitunən e nīpəti nəghatən rəha nalpəkauən anion rəha Uhgīn.
- ⁵Uhgīn təməsəl əpən nat u kəm netəm aupən, məto roiu tīnol əp e Rəhan Narmin kəm rəhan min aposol min ne ien min itəm təmitəpun rəkis.
- ⁶Nat anion əh məmə e namnusən təwīr əm, netəm u sənəmə noanol min rəha Isrel, ilat min kəmotuwa kahmen e netəm Isrel o nosən nəwīrən rəha Uhgīn, kən ilat kəmotuwa kitīəh, kən koatos kələh nəwīrən rəha Uhgīn e nənīəkīsən rəhan e Kristo Iesu.
- ⁷Io emuwa iolwək rəha namnusən təwīr əh e nəwīrən asol itəm Uhgīn təmos-īpa əpnapīn əm kəm io e nəsanənən asol rəhan.
- ⁸Nat əpnapīn io ləhau agin e netəmim rafin rəha Uhgīn, məto e nəwīrən rəhan, Uhgīn təmos-īpa wək u, məmə ekən-iarəp kəm itəmat u sənəmə noanol min rəha Isrel, nəwīrən min rəha Kristo itəm ko kitat kəsotitunən ilat rafin məto-inu ilat tepət namnun tīkə,
- ⁹kən ekol əp kəm netəmim rafin nolən itəm Uhgīn təmol rəhan nalpəkauən anion otuwa met-arəp. Uhgīn u təmol natimnat rafin, in təmatəhluaig-in nalpəkauən əh nuwəh rəkis.
- ¹⁰In təmol nəhlan məmə roiu in otol-arəp kəm iərəməərə min ne nepətən min əpəh e magoagəp rəhan nenatīgən itəm suatip rəhan tepət tepət. Kən ilat okotəplan rəhan nenatīgən nian okotehm nīməfak.
- ¹¹Inu nalpəkauən rəhan itəm tətatīg līlīn, kən təmuwa nīpahriənən e Kristo Iesu, Iərəməərə rəhatat.
- ¹²Kən məto-inu o Kristo ne rəhatat nahatətən lan, kitat kotitun nuwamən nian rafin motətul e nīganəmti Uhgīn məsotəgīnən.

¹³Tol nəhlan, ekətapəh otəmat məmə sotolən məmə nətəligən rəhatəmat teiuaiu o nəratən itəm ekətətig lan ikin-u. Iatəto nahməən otəmat, kən in otasitu e rəhatəmat nəmegəhən.

Nəfakən rəha Pol

¹⁴O natimnat min əh itəm io emən rəkis, kən iatisin nulək matəfak kəm Uhgīn Tata,

¹⁵itəm in təmol noanol min rafin e nətueintən ne əpəh e nego e neai.

¹⁶Nəsanənən ne nolkeikeən ne nenatigən rəha Uhgīn in tēpət təwir taprəkis, kən ekətapəh o Uhgīn məmə Narmin Rəhan otol nikitəmat təsanən e nat wir min əh rəhan

¹⁷məmə e nahatətəən rəhatəmat e Kristo, in otətətig kitih e nikitəmat. Kən iatəfak min məmə nəmegəhən rəhatəmat oteiuaiu mamnim wir e nolkeikeən rəha Uhgīn

¹⁸məmə itəmat netəm rafin itəm nakoatahatətə e Kristo, onəkotehm wir nolkeikeən asol rəha Kristo, e nəfəməhən rəhan, ne nepətən rəhan, ne rəhan nərən ilis, ne rəhan neuaiuən ləhau.

¹⁹Nolkeikeən əh rəha Kristo, okol kəsotitun rafinən məto-inu in iahgin pik, məto iatəfak məmə onəkotitun wir nolkeikeən əh məmə Uhgīn otərioah e nəmegəhən rəhatəmat e nolən wir min rafin rəhan.

²⁰!Kən pəs kotiləs-ipər nərgi Uhgīn! E nəsanənən rəhan itəm tatol wək e nəmegəhən rəhatat, in titun nolən natimnat taprəkis-in agin natimnat rafin itəm nikitat tatəht o koatətapəh ron.

²¹Pəs kitat niməfak kotol kitih kitat Kristo Iesu moatənwiwi Uhgīn nian rafin matuwīn matuwīn namnun tikə. !Əwəh!

Efesas 4

Kitat kitih e Kristo

¹Tol nəhlan, io Pol u ekətatiḡ e kalapus o Iəramərə, iatətapəh əskasik otəmat məmə nəkotatiḡ e nəmegəhən kit itəm tətuaṭip e naunən itəm Uhgın təmaun-in itəmat lan.

²Otos-iəhau atip itəmat e natimnat rafin, kən motuwa itəmat netəm mətig, kən nətəligən rəhatəmat otəfəməh, kən nian suah kit otol nat kit təsahmenən e niganəmtitəmat, kən nikitəmat otəsahmə uəhaiən ron e nolkeikeən rəha Uhgın.

³Narmin Rəha Uhgın təmeafimin itəmat, tol nəhlan onəkotalkut əskasik məmə nəkotatiḡ kitiəh e nəməlinuən.

⁴Kitat nipəṭin kitiəh əm, kən Narmin Rəha Uhgın kitiəh əm, kən itəmat noatələhəu-pən əskasik rəhatəmat nətəligən e nat kitiəh əm, nəwīrən itəm Uhgın təmaun-in itəmat ron.

⁵Kən Iəramərə kitiəh əm, nəgətunən kitiəh əm, baptais kitiəh əm;

⁶kən kitat koatəfak kəm Uhgın kitiəh əm u in rəhatat rafin Tata. In tatəramərə rafin e kitat, kən tatol rəhan wək e nəmegəhən rafin rəhatat, kən mətatiḡ e nikitat rafin.

⁷Məto e kitat rafin aḡin kitiəh kitiəh, Kristo təmoor rəhan nəsanənən o nolən wək piṣin piṣin min.

⁸Tol nəhlan, Naoa Rəha Uhgın tatən məmə, “Nian in təmər ilis aḡin, kən mit-iarəp rəhan tikimir min itəm təmol win elat. Kən təmos-ipən nat wir kəm netəminim.”

⁹Əplan-tu nəghatən əh məmə, “In təmər.” Nipəṭin təmə, Kristo təmaupən meiuaiu ləhau aḡin, ikin-u e nətueintən.

¹⁰Suah u itəm təmeiuaiu-pa, in etəm kitiəh əm itəm in təmər min ilis aḡin-əh maprəkis-in neai məmə in otatiḡ ikin min rafin.

¹¹In etəm kitiəh əm itəm in təmos-ipən nəsanənən rəhan kəm netəminim piṣin piṣin min məmə neen okotuwa aposol min, neen okotuwa ien min, neen

okotuwa netəmim rəha nən-iarəpən namnusən təwir, neen okotuwa pasta min ne iəgətun min.

¹²Kristo təmol nəhlan məmə ilat okotasitu motol əpen-əpenə e netəmim rəha niməfak, kən netəm rəha niməfak okotol wək rəha Uhgın məmə nıpəti Kristo otəskasik,

¹³mətoarus kitat rafin kotuwa motol kitiəh e nahatətəən rəhatat, ne nitunən e Nəti Uhgın, kən moatepət motuwa motahmen e Kristo itəm in tətuatip agın.

¹⁴Kən məmə kitat okotapəs nolən min rəha nisualkələh itəm nian rafin koatəuhlin rəhalat nətəligən e nat kinotahatətə rəkis lan, tahmen e kinu kit itəm peau-peau min kotahl ənnapin əm kətan. Nətəligən rəhatəmat tatol nəhlan məto-inu suah kit tatəgətun nat pisin, o suah kit min tatiuw rəhatəmat nətəligən e nəghatən rəhan itəm nikitəmat təht məmə in təwir, məto e nıpahrienən, suah əh tateiuə.

¹⁵Məto kəp, kitat okəsotolən nəhlan. Okotən əm nıpahrienən e nolkeikeən, kən e nolən əh, e natimnat rafin itəm koatol, okotepət motuwa motahmen e Kristo, itəm in rəhn-kapə niməfak.

¹⁶Kən Kristo tatol məmə rəhan min netəmim kotuwa kitiəh, tahmen-pən əm e noanol min itəm koatılpin nıpəti etəmim. Nian nolın-olın nıpətin koatol-wır wək ətuatip rəhalat e nolkeikeən, mol nıpətin tatepət matəskasik.

Nolən wi rəha iəfak min

¹⁷E nərgi İərəmərə iatən əskasik kəm itəmat məmə onəsotətəu-pən minən nolən rəha netəm min u kəsotənən nıpahrienən e Uhgın. Nətəligən rəhalat tol nat ənnapin lan.

¹⁸Nitunən rəhalat tətən əm əpəh tapinəp ikin, kən moatan isəu o nəmegəhən itəm Uhgın tatos-ipa məto-inu rəhalat-kapə tiəkis kən kəsotolkeikeən məmə okotitun Uhgın, kən kinotəruru nat.

¹⁹Kən məsotaulisən o rəhalat nolən rat min, kən minotegəhan-in nolən rat min koatərəmərə e nəmegəhən rəhalat, tahmen e nitəpən nıpitan, ne nolən min nəhlan. Kən nian rafin koatolkeike min məmə okotol təhmin min.

²⁰!Məto nian kəmatəgətun itəmat e Kristo, nəgətunən in tol pisin agin-əh e inəh!

²¹Kəmatəgətun itəmat e nolən rəha Kristo, kən itəmat rəhan min, kən kəgətun itəmat e nipahrienən itəm tətatiɡ lan.

²²Kən kəməgətun itəmat nəhlan e nolən min rəhatəmat aupən məmə, otəhlman rəhatəmat nolən oas min itəm kotərat tahmen e nat pien kit, kən nolkeikeən tərat min atip koateiuə-in itəmat.

²³Nəmegəhən ne nətəliɡən rəhatəmat otəkəike muwa muwiwi min.

²⁴Kən itəmat onəkotəkəike motuwa netəm wi min e nolən min rəhatəmat, itəm Uhgın təmol məmə okotahmen lan, inu nolən min itəm nikin tətəɡien lan, ne nolən min ətuatip pahrien.

²⁵Tol nəhlan, itəmat rafin nəkotəkəike motapəs nolən rəha neiueiuəən, məto nakotən nipahrienən kəm itəmat min, məto-inu kitat nolin-olin nipətəi Kristo.

²⁶Nian nikiɡim titaħmə, əsolən nolən rat, kən aluin uəhai əm məsolən neməha tətatiɡ lam mətoarus mitgar tuwin miwig,

²⁷kən əsos-ipənən kuhal kit kəm Setan.

²⁸Itəm tətəkləh otəkəike məhlman nolən əh, məto in otəkəike mol atip nat e nelmin, məmə in otol win e nat wir kit itəm titun nos-ipənən kəm ian-rat min.

²⁹Əsənən nəghatən rat e nohlim, məto ən əm nat wir itəm otasitu e netəmiɡ nian kotaliwək e suatip pisin pisin min, məmə nəghatən əh otawte-in nəwiran rəha Uhgın kəm ilat.

³⁰Əsotolən Narmin Rəha Uhgın tətə nahməən o nolən rəhatəmat, məto-inu in nəmtətin rəhatəmat məmə itəmat rəha Uhgın, kən in otiləs-irəkis itəmat e nolən rat min e nian rəha nosmegəhən.

³¹Kən əraɡin rafin natimnat min u: nahməən e nikitəmat itəm tətatiɡ tatuwəh; ne nolən neməhaa; ne nolən rəha nən ratən netəmiɡ; ne nolən rəha nikitəmat

ne nohlitēmat titatiperəh pik tahmen e kaluēluə; ne nolən rəha nərgəhəuən; ne nolən min rafin itəm okotol nəratən kəm netəmim.

³²Məto otəwir otəmat min, kən motol nikitəmat timətmətig otəmat min. Kən motaluin nolən rat min itəm nəkoatol etəmat min, tahmen-pən əm məmə Uhgīn təmaluin rəhatəmat nolən rat min e Kristo.

Efesas 5

Nəmegəhən e nəhag-əhagən

¹Tol nəhlan, otalkut əskasik məmə onəkotasgəwin Uhgīn məto-inu itəmat nenəti Uhgīn min itəm in tolkeike pik itəmat.

²Kən otaskəlim əskasik nolən rəha nolkeikeən, tahmen əm məmə Kristo təmolkeike mihin kitat kən muwa mīmīs otat, kən nīmīsən rəhan tahmen e sakrifais kit nəmiəwin təwir itəm katos-ipən kəm Uhgīn mol nikin tagien lan.

³Məto-inu itəmat netəmim rəha Uhgīn itəm nəkotətuatip, kən itəmat nəsotolən agin nolən rat kit məmə okən rat itəmat ron, iatən nolən rat min tahmen e nīpitan ne nəman ne, koatit anion ilat min; ne nolən rat rafin itəm tol naulisən o nənən; ne netəmim naumis.

⁴Kən təsəwirən məmə nakotən nəghatən itəm taulis o nənən, o nəghatən alməl min, o nəsanən, o nəpoaən. Təsətuatipən məmə nakotən nəghatən rat min əh, məto otən nəghatən wir min kəm Uhgīn, məmə nikitəmat tagien o natimnat itəm in təmol otəmat.

⁵Kən nəkotəkəike motitun nat u məmə, netəmim itəm koatitəp nīpitan, o netəmim itəm koatol nolən rat itəm tol naulisən o nənən, o netəm naumis, ilat min əh ko kəsotuwinən e nərəmərəən rəha Kristo ne Uhgīn, (netəm naumis kotahmen e netəm koatəfak kəm narmi nat min, rəhalat nautə in uhgīn rəhalat).

⁶Sotegəhan-inən məmə suah kit otiuw-pən itəmat e nəghatən eiueiuə min rəhan itəm nīpahrienən lan tikə. Məto-inu o nolən rat min əh, Uhgīn nikin otərat kən otol nalpīnən kəm netəmim itəm koatəht nəwian.

⁷Tol nəhlan, əsotuwinən motan kələh itəmat min ilat motol nolən rat min itəm koatol.

⁸Nian kit aupən, napinəpən tatərəmərə etəmat, məto roiu itəmat ninotuwa o Kristo kən nəhag-əhagən tinatərəmərə etəmat. Kən tol nəhlan, otan tahmen e netəm rəha nəhag-əhagən,

⁹məto-inu nəhag-əhagən e nəmegəhən rəhatəmat tatoe-in nəwİRən, ne nətuatİpən, ne nİpahrienən.

¹⁰Kən otalkut məmə onəkotegəs-in motİtun nolən min itəm okotol UhgİN nİkin tagİen lan.

¹¹Əsotətəu-pənən netəmİm rəha napinəpən motol nolən rat min itəmat min ilat. Noa təwİR min e nolən min əh tİKə. Məto otəmki-pa nolən min əh e nəhag-əhagən, kən netəmİm okotİtun məmə nolən min əh kotərat.

¹²In naulİsən asol o nən-İarəpən nolən anİon min rəha netəm u itəm koatəht nəwİa UhgİN.

¹³Məto natİmnat rafİn itəm okotuwa e nəhag-əhagən, netəmİm kotəplan wİR məmə ilat kotahro nulan.

¹⁴Tol nəhlan məto-inu nİan nəhag-əhagən tatol əp nat kit, kən İn min tatuwa nəhag-əhagən. O nat u İnu katən məmə, “İtəmat u noatapİl, otaiİR-ta, otəmegəh e nİmİsən, pəs Kristo otasiəgəpİN İtəmat.”

¹⁵Kən oatəto wİR İtəmat, məsotatİgən məmə netəm kotalməl ne, məto nəkotatİg e nenatİgən,

¹⁶kən nİan rafİn okəmə nəkotəplan suatİp o nolən nəwİRən kit, otol, məto-inu roiu kotatİg e nİan rəha nəratən tepət.

¹⁷Kən tol min-nəhlan, sotalmələn-ta, məto otəkəİke motalkut məmə onəkotİtun nat naka İtəm İərəmərə tolkeİke.

¹⁸Sotapİsən e alİkol məto-inu otİuw-pən İtəmat e nalmələn, məto təwİR məmə nəmegəhən rəhatəmat otərioah əm e NarmİN Rəha UhgİN.

¹⁹Otəghat kəm itəmat min e napuən min e Naoa rəha Napuən, ne napuən min rəha niməfak, ne napuən min itəm tatisi-pən e Narmin Rəha Uhgın. Otan, kən otan napuən min e nikitəmat kəm Iərəmərə,

²⁰kən nəkotəkəike moatən kəm Tata Uhgın məmə nikitəmat tagien o natimnat rafın, kən otən e nərgi Iərəmərə Iesu Kristo.

Nolən rəha netəm kəmotol marit

²¹Otətəlig-in kən motol nəghatən rəhatəmat min məto-inu nakotisiai-in Kristo.

²²Itəmat nipitan itəm ninotol marit rəkis, otətəlig-in kən motol nəghatən rəha nəman min rəhatəmat məmə noatol kəm Iərəmərə.

²³Otol nəhlan məto-inu iərman in tərəmərə e rəhan pətan tahmen e Kristo in tərəmərə e niməfak u nipətin, kən in rəhan Iosmegəh.

²⁴Niməfak tatətəlig-in kən matol nəghatən rəha Kristo, kən tahmen-ahmen əm, nipitan itəm kinotol marit rəkis okotəkəike kətəlig-in kən motol nəghatən rəha rəhalat min nəman e natimnat rafın.

²⁵Kən itəmat nəman itəm ninotol marit rəkis, otolkeike rəhatəmat nipitan tahmen əm məmə Kristo təmolkeike niməfak, kən mos-ipən rəhan nəmegəhən ron.

²⁶Təmol nəhlan məmə in otol niməfak otətuatip, kən təmaikuas lan e nəghatən rəha Uhgın, tahmen e nəhau tətəikuas e netəmin.

²⁷Təmol min nəhlan məmə Kristo titun nosən rəhan niməfak muwa ron, kən niməfak u tətətuatip wir, kən kəsehm-pənən nolən rat kit lan, kən in təwir məhag-əhag. Niməfak əh in tahmen e pətan kit itəm kəmol-pən malə-malə kəm in məmə otol marit, kən nat kit tikə e nipətin itəm təsətuatipən.

²⁸Kən e suatip kitəh əm, nəman okotəkəike motolkeike rəhalat nipitan min tahmen məmə koatolkeike atip əm nipətilat. Etəm itəm tolkeike pik rəhan pətan, tolkeike atip in.

²⁹Otətəlig-in-tu, suah kit tikə itəm tatətəhau atip nipətin, məto in tətəgwən wir kən matehm wir, tahmen əm məmə Kristo tatol kəm niməfak,

³⁰məto-inu kitat nəwtain nīpətin.

³¹Naoa Rəha Uhgīn tatən məmə, “O nat əh, suah kit otiet rəkis e rəhan tata ne mama, kən mol kitīəh ilau rəhan pətan, kən ilau okuea tahmen e nīpətin kitīəh əm.”

³²Nəghatən əh in nəghatən wīr kit itəm təfigəm, kən nīpətin tatəhluaig. Məto iatən məmə in nimaa nəghatən kit məmə Kristo ne niməfak, ilau kitīəh.

³³Məto nəghatən əh tatuwa min otəmat. Kən itəmat nəman kitīəh kitīəh onəkotolkeike rəhatəmat nīpitan min tahmen e nakotolkeike atīp min itəmat. Kən nīpitan, nəkotəkəike motisiai-in rəhatəmat nəman.

Efesas 6

Nolən rəha nisualkələh ne tata ne mama

¹Itəmat nisualkələh. Otol nəwia tata ne mama rəhatəmat məto-inu rəha Iərəməərə u itəmat, kən nolən əh in tətuatīp məmə itəmat nəkotol.

²Nəghatən kit e Naoa Rəha Uhgīn tatən məmə, “Otos-ipən nisiiəh kəm rəhatəmat tata ne mama.” Inu tatətul aupən e lou min itəm nəniəkisən kit tətatiɡ lan, kən nəniəkisən əh tatən nəhlan məmə,

³okəmə nəkotol nəhlan, “natimnat min e nəmegəhən rəhatəmat okotaiu wīr, kən natigən rəhatəmat e nətueintən u otəfəməh.”

⁴Tata min. Əsotolən nolən əskasik e nenətītəmat min məmə otol nīkilat tərou mahmə, məto ehm wīr ilat, mæg-ətuatīp-in nolən min rəhalat, kən mægətun ilat e suatīp rəha Iərəməərə.

Nolən rəha slef min ne rəhalat etəm-iasol min

⁵Slef min. Otol nəwia netəm-iasol min rəhatəmat e nətueintən u, otol e nisiiəh, ne nəginən, kən otol e nīkitəmat pahrien tahmen əm məmə rəhatəmat etəm-iasol in Kristo.

⁶Kən otol nəwialat, məto sənəmə nian əm itəm ilat koatehm itəmat lan məmə nīkilat otətagien otəmat. Məto otol nəwialat tahmen məmə itəmat slef min rəha Kristo, kən moatol nolən min itəm Uhgīn tolkeike e nīkitəmat pahrien.

⁷Otol rəhatəmat wək e nikitəmat rafin tahmen-pən əm mə noatol wək rəha İərəməərə, sənəmə noatol wək rəha etəmim əm,

⁸məto-inu nəkotitun məmə İərəməərə otos-ipinə nətouən kəm netəmim rafin e nat wir min itəm kəmotol, nat ərnapin okəmə in slef kit o in etəm ərnapin əm kit.

⁹Kən itəmat netəm-iasol min. Otehm mihin min əm rəhatəmat slef min e suatip kitieh əm. Əsotəghat əskasikən kəm ilat məmə ilat okotol nəwiam, məto-inu nəkotitun məmə Etəm-iasol rəhalat ne rəhatəmat in kitieh əm əpəh e nego e neai, kən in tatol tahmen-ahmen əm kəm netəmim rafin.

Nuwınən e natimnat rəha Uhgın o nəluaginən

¹⁰Namnun nəghatən rəhak tol min-nulan. Otətul əskasik e İərəməərə ne rəhan nəsanənən asol.

¹¹Otuwin e natimnat rafin rəha Uhgın o nəluaginən məmə nəkotitun nosən nətulən rəhatəmat nian Setan tatol nalpəkəuən e neiueiuəən o nohən itəmat.

¹²Iatən nəhlan məto-inu kitat kəsotəluaginən kitat netəmim rəha nətueintən, məto koatəluagin kitat nat pisin itəm kəsotəplanən, inəh İərəməərə min, ne nepətən min, ne nat itəm kotəsanən e nəratən rəha napinəpən roiu e nətueintən, ne İərmis min e magoagəp.

¹³Tol nəhlan, otuwin e natimnat rafin rəha Uhgın o nəluaginən məmə nian nəratən itəm Setan tatol otuwa, nəkotitun nosən nətulən rəhatəmat, kən nian nəmol əpen-əpenə rafin o nəluaginən, nəkotitun nosən nətulən rəhatəmat.

¹⁴!Kən, otol əpen-əpenə! Nian nakotətul əskasik o nəluaginən, rəhatəmat natimnat rəha nəluaginən tol min-nulan: Otaskəlim əskasik nəghatən pahrien, inu tahmen e kətəut itəm nəmotəlis nəlugitəmat lan. Otol nolən rəhatəmat otətuatip e niganəmti Uhgın e nahatətəən, inu tahmen e iaen itəm tatətlosig-in manikiləhatəm.

¹⁵Otol rəhatəmat nətəligən təkəsik e namnusən təwir rəha nəməlinuən, inu tahmen e put əskasik itəm tətəsitə etəmat o nətulən.

¹⁶Kən nat kit min e in min əh, otahatətə əskasik e Uhgın, inu tahmen e sil u in timba asol kit itəm titun nahtosig-inən məwiəmis nigəm e nəgənin nifagə rəha Setan itəm tatuəp.

¹⁷Otən nıpahrienən e nosmegəhən rəha Uhgın, inu tahmen məmə natuwin e hat əskasik kəmol e iaen itəm tatəfətain rəhn-kapətəm. Otıtun wir Naoa Rəha Uhgın, inu tahmen məmə nakos e naip rəha nəluaginən itəm Narmin Rəha Uhgın tatos-ıpinə kəm itəmat.

¹⁸Kən otegəhan-in məmə Narmin Rəha Uhgın otit itəmat e rəhatəmat nəghatən kəm Uhgın e nian rafın, kən otəghat kəm Uhgın e nəfakən e nolən pisin pisin min ne nətapəhən min. Tol nəhlan, otegəs wir, kən motəfak nian rafın o iəfak min rafın.

¹⁹Kən otəfak min ron io məmə nian rafın itəm iatəghat, kən Uhgın otos-ipa nəghatən kəm io, məmə esəginən o nən-iarəpən nat anion rəha namnusən təwir itəm Uhgın təmol əp kəm kitat.

²⁰Kən roiu, io ien əhruin rəha Iesu Kristo, məto ekətətig əm e kalapus kəməlis io e sen u iaen, məto-inu iatən-iarəp namnusən təwir əh. Ekəike mən-iarəp namnusən təwir əh məsəginən, kən otəfak ron io məmə ekol min-nulan.

Namnun nəghatən rəha Pol

²¹⁻²²Io iakolkeike məmə itəmat nakotəto namnusən rəhak, kən tol nəhlan, ekahl-ıpinə Tikikas timnə. In piətət keike kit itəm tətaiu əskasik e wək rəha İərəməərə ikin-u. In otən-iarəp namnusən rəhatimat kəm itəmat məmə io etəhratig nulan, kən namnusən əh otıləs-ıpər nətəligən rəhatəmat.

²³Pəs Uhgın Tata ne İərəməərə Iesu Kristo okios-ıpinə nəməlinuən, ne nolkeikeən, ne nahatətəən.

²⁴Pəs Uhgın otawte-in nəwıran rəhan kəm netənim rafın itəm kotalkeike rəhatat İərəməərə Iesu Kristo e nolkeikeən itəm namnun tikə.

Filipae

Filipae 1

Pol tēmən təwir kəm ilat

¹Io Pol, ne Timoti, slef mil rəha Kristo Iesu, iatuən təwir kəm itəmat rafin netəm koatəfak kəm Kristo Iesu əpəh Filipae, ne netəm-iasol rəha niməfak, ne dikon min.

²Pəs Uhgın u Tata rəhatat, ne İərəmərə Iesu Kristo, okuawte-in nəwİRən ne nəməlinuən kəm itəmat.

Pol təməfak o netəm Filipae

³Iakolkeike mə iakən kəm itəmat məmə nian mİN rafin itəm nİkik təht itəmat, iatən kəm rəhak Uhgın məmə nİkik tagien otəmat.

⁴Kən nian rafin e rəhak rafin nəfakən otəmat rafin, iatəfak əm e nagienən,

⁵məto-inu rəhatəmat nawteən təmasitu lak e wək rəha namnusən təwir, e nətuounən, nian nəmotahatətə e namnusən təwir, mətoarus-pa u-roiu.

⁶Tol nəhlan ekİtun wir məmə Uhgın itəm təmətuoun wək təwir e nəmegəhən rəhatəmat, in otəpanol namnun lan e nian Kristo Iesu otitəlig-pa mİN.

⁷Nian rafin, iakolkeike pİK itəmat, kən ekəike məto nagienən nəhlan məto-inu itəmat nəmotuwa kotol kitiəh e nəwİRən rəha Uhgın o wək itəm təmos-İpa kəm io. E nian emətətig e kalapus, ne nian emətan əm matətul-arəp o namnusən təwir məmə in nİpahrienən, məto itəmat nəmotasitu lak.

⁸Uhgın titun məmə iatən pahrien məmə iakolkeike məmə ekəplan itəmat, məto-inu iakolkeike pİK itəmat, tahmen əm məmə Iesu Kristo tolkeike mihİN itəmat.

⁹Kən İnu rəhak nəfakən məmə rəhatəmat nolkeikeən otəwiə təhmin mİN e nİtunən nat ne nenatİgən rafin

¹⁰məmə itəmat onəkotİtun nehmən nat naka in təwir pİK aɡİN-əh, kən məmə onəkotətuatİp wir, kəsehm-pənən nat tərət kit etəmat e nian itəm Kristo otuwa mİN lan.

¹¹Pæs rəhatəmat nəmegəhən otoe-in noan nəwīrən ne nətuatipən itəm Iesu Kristo tatol e nəmegəhən rəhatəmat, o nənwīwīən ne nīləs-ipərən nərgi Uhgīn.

Nian Pol əpəh e kalapus, netəmim kəmotəto namnusən təwīr

¹²Io mīn neen, iakolkeike məmə onəkotitun məmə nat əpnapīn nahməən naka itəm kəmol lak, mətə təmasitu pīk o nən-iarəpən namnusən təwīr kəm netəmim tepət,

¹³mətə-inu tol nəhlan, mopael mīn itəm koatehm nīmə rəha Sisa, ne netəm pīsīn pīsīn mīn tepət, kinotitun rəkis məmə io etatīg e kalapus mətə-inu io iolwək rəha Kristo.

¹⁴Kən rəhak natīgən e kalapus təmol məmə iəfak mīn iuəhkir ilat rafīn kəmotahatətə əskasīk təhmin mīn e Iərəmərə, kən matol nətəlīgən rəhalat təskasīk o nən-iarəpən nəghatən rəha Uhgīn məsotəgīnən.

¹⁵Nīpahrienən, neen kəmotən-iarəp namnusən təwīr rəha Kristo mətə-inu koatetet io kən motolkeike məmə okotaprəkis-in io. Mətə neen koatən-iarəp əm namnusən təwīr rəha Kristo e nətəlīgən ətuatip.

¹⁶Itəm mīn u nətəlīgən rəhalat tətuatip əm, ilat koatən-iarəp namnusən təwīr mətə-inu kotolkeike io, kən motitun məmə Uhgīn təmələhəu-pən io ikīn-u e kalapus məmə iatətul-arəp o namnusən təwīr məmə in nīpahrienən.

¹⁷Mətə neen itəm koatetet io, kəsotən-iarəpən Kristo e nīkilat pahrien, mətə koatol əm mətə-inu kotolkeike məmə okotīləs-ipər atip ilat, kən nīkilat təht məmə okotol nəratən kəm io roiu, nian etatīg e kalapus.

¹⁸Mətə nat əh, nat əpnapīn əm. Okəmə koatol e nīkilat pahrien o kəp, mətə nat asol məmə koatən-iarəp namnusən təwīr rəha Kristo, kən inu tatol nīkik tətāgīn.

¹⁹Pahrien, kən nīkik otagīn mīn mətə-inu ekītun məmə e noa nəfakən rəhatəmat, ne nasitūən rəha Narmin rəha Iesu Kristo, in otosmegəh io e nəratən u,

²⁰tahmen əm məmə iakolkeike pik kən matələhəu-pən rəhak nətəligən məmə oesolən nat kit itəm otol aulis io e niganəmti Uhgin. Məto roiu ne nian rafin, nikip təskasik məmə okəmə iatəmegəh o ekimis, məto iatisiai-in Kristo e nəmegəhən rəhak.

²¹Tol nəhlan məto-inu nəmegəhən rəhak in Kristo əm, kən okəmə ekimis, in nat təwir taprəkis.

²²Okəmə iatəmegəh əh, in təwir o nolən wək məsin min rəha Uhgin e nətueintən. ?Kən ekitəpun itəm pəhruən? !İəkəruru!

²³Roiu əh suatip kəiu katuəməhl aupən in io, məto iakolkeike ilau kərən. Iakolkeike pik məmə iakapəs natigən ikin-u muwin məplan Kristo itəm in təwir agin maprəkis-in natigən u ikin-u.

²⁴Məto iakəplan məmə ekəike mətətig ikin-u o nasituən etəmat.

²⁵Kən məto-inu ekitun məmə inu in niphrienən, kən ekitun məmə oekətətig kitat min itəmat, o nasituən etəmat məmə nahatətən rəhatəmat otəwiə e nagiənən.

²⁶Kən e nolən əh, nian ekuwa min məplan itəmat, nikitəmat otəgien nakotənwiwi Kristo Iesu, məto-inu io emitəlig-pa min otəmat.

Nətulən əskasik

²⁷Kən nat asol, itəmat onəkotəkəike motol məmə nolən min rafin e nəmegəhən rəhatəmat koatos-ipən nisiaiien kəm namnusən təwir rəha Kristo. Kən, nat əpnəpin okəmə ekimnə o esimnəən, pəs oekəto məmə nakotətul əskasik e nətəligən kitiəh əm, kən məmə itəmat rafin, itəmat nakotəkut e nətəligən kitiəh əm o nən-iarəpən namnusən təwir,

²⁸kən məmə nəotəginən rəhatəmat tikimir min. Inu nəmtətin kit olat məmə Uhgin otərəkin ilat, məto in otosmegəh itəmat. Uhgin otol natimnat min əh rafin.

²⁹Otol nəhlan məto-inu in təmegəhan-in məmə onəkotəhatətə e Kristo, kən nat kit min, məmə onəkotos min nahməən ron.

³⁰Kitat rafin koatatig e nēmourēn kitih ēm, itēm nēmotēplan e rēhak nēmegēhēn aupēn, kēn roiu nakoatēto mēmē ekētātig lan.

Filipae 2

Kotēkēike kētēu-pēn suatip rēha Iesu Kristo

¹?Nikitēmat tēskasik e Kristo mēto-inu noatol kitih itēmat min, o kēp? !Ōwēh! ?Nakoatēto tēwir e nolkeikeēn rēhan, o kēp? !Ōwēh! ?Moatauilim itēmat Narmin Rēha Uhgīn, o kēp? !Ōwēh! ?Moatol tēwir kēm itēmat min kēn moatasēkitun itēmat min, o kēp? !Ōwēh!

²Tēwir, pēs nētēligēn rēhatēmat tuwa kitih; kēn motolkeike itēmat min; kēn motuwa kitih e narmin ne nētēligēn o natimnat itēm nakoatuwin ron. Kēnu, okēmē nēkoatol natimnat min ēh, in otol nīkik tagien pīk agin.

³E nolēn kitih ēm, sotolēn nat kit mēmē itēmat nakotēwir motaprēkis-in itēmat min neen, kēn sotolēn nat kit mēmē nakotilēs-ipēr atip itēmat lan. Mēto otos-iēhau atip itēmat, kēn otētēlig-in pīk itēmat min neen taprēkis-in itēmat ēm.

⁴Kēn otasitu etēmat min e nēmegēhēn rēhatēmat. Tēsēwirēn mēmē suah kit tatehm atip ēm rēhan nēmegēhēn.

⁵Rēhatēmat nētēligēn otēkēike mahmen e nētēligēn rēha Iesu itēm tol min-nulan:

⁶Kristo in tahmen ēm e Uhgīn mēto in tēmēsalkutēn mēmē in otaskēlim nepētēn rēha Uhgīn,

⁷mēto tēmapēs rēhan nepētēn, kēn tēmuwa mahmen e iolwāk ēm kit, kēn tēmaiir e nētueintēn muwa etēmim ēm kit.

⁸Kēn nian in etēmim kit, nīpētīn tahmen ēm etat, in tēmos-iēhau atip in mol nēwia Tata Uhgīn e natimnat rafin muwa mētoarus mīmīs, itēm kēmōl aulis in e nīmīsēn e nīg kēluau.

⁹Mēto-inu tēmōl nēhlan, Uhgīn tēmīlēs-ipēr agin in, kēn mos-ipēn nērig kēm in itēm taprēkis-in nērig min rafin,

¹⁰məmə e nərgi Iesu, natimnat rafin itəm koatəmegəh ikin min rafin e neai, ne nətueintən, ne niki nitən ləhau ikin, okotisin nulilat motos-ipən nisaiiən kəm in,

¹¹kən ilat rafin okotən-iarəp məmə Iesu Kristo in Iərəmərə, o nos-ipənən nisaiiən kəm Tata Uhgīn.

Itəmat nəkotahmen e nəhag-əhagən e nitən min

¹²Rəhak netəmim min itəm iakolkeike pik, nian emətan kitat min itəmat, itəmat nəmoatol nəwiak nian rafin. Kən roiu, mətə-inu etatig isəu otəmat, itəmat atip nəkotəkəike motalkut əskasik məmə nəkoatol nəwiak e natimnat min u: mətə-inu ninotitun rəkis nolən əh rəha Kristo, otalkut əskasik o nətəupənən suatip rəha nosmegəhən. Otətəupən suatip əh e niganəmti Uhgīn motasiəp motəgin.

¹³Kən otətəupən suatip əh mətə-inu Uhgīn tatol wək e nəmegəhən rəhatəmat məmə onəkotolkeike məmə nəkoatol nəwian, kən tatos-ipinə nəsanənən kəm itəmat məmə onəkotol pahrien nəwian.

¹⁴E natimnat rafin itəm nəkoatol, sotəghat-əghatən ron, kən məsotərgəhəuən ron

¹⁵məmə nəmegəhən rəhatəmat otətəuatip wir, kən kəsehm-pənən nərətən kit lan, kən itəmat nenəti Uhgīn itəm nolən eko-eko tikə etəmat, itəm nəkotatig e nəlugi netəm koteko-eko, iapinəp min. Kən itəmat nakotəhag-əhag tahmen e məhau min e nətueintən

¹⁶itəm nakotaskəlīm wir nəghatən e nəmegəhən. Ken otol natimnat min əh rafin məmə nian Kristo tatuwa min, kən ekausit otəmat, kən oekitun məmə esaiu əpnəpinən, nahgik təsikəən o nat əpnəpin əm.

¹⁷Nolən rəhatəmat rəha nahatətəən e Uhgīn tahmen e sakrifais kit kəm Uhgīn. Okəm-naka ekimis, kən muwa mahmen e sakrifais e wain itəm katəhtəg-pən ilau sakrifais rəhatəmat. Mətə nat əpnəpin əm, nikik tagien əm kitat min itəmat.

¹⁸Kən e nolən kitih əm, nikitəmat təkəike magien itəmat min io.

Timoti ne Epafrotaetas

- ¹⁹Okəmə Iərəmərə Iesu tegəhan-in, iakolkeike məmə ekahl-ipinə Timoti timnə məplan itəmat məmə nian iakəto namnusən etəmat, kən io min, nīkik otagien.
- ²⁰Suah kit tikə min u ikin-u itəm rəhan nətəligən tahmen e rəha Timoti, itəm nīkin tatəht pik itəmat.
- ²¹Netəm pisin pisin koatətəlig-in atip əm wək min rəhalat, məsotətəlig-inən wək rəha Iesu Kristo.
- ²²Məto itəmat nəkotitun məmə nian rafin tahro nulan Timoti tatol wək rəha Uhgīn, kən rəhan wək in təwir, kən tahmen e suakəku tatol wək ilau rəhan tata, in təmasitu lak e wək rəha namnusən təwir.
- ²³Məto-inu o nat əh, nīkik tatəht məmə nian oekitun məmə rəhak natigən otahro nulan, oekahl-ipinə uəhai əm timnə mehm itəmat,
- ²⁴kən ekahatətə e Iərəmərə məmə otəsuwəhən io min ekimnə mehm itəmat.
- ²⁵Məto nīkik təht məmə ekəike mahl-ipinə Epafrotaetas titəlig-pinə məplan itəmat. In piak itəm iatuea kitieh matioal wək kitieh, kən matuəluagin e nəluaginən kitieh rəha Uhgīn. Aupən nəmotahl-ipa e nərgitəmat məmə otuwa mən-iarəp kəm io namnusən rəhatəmat, kən məmə otasitu lak.
- ²⁶Məto roiu, in tolkeike pik məmə otəplan rafin itəmat, kən matəto tərət pik məto-inu itəmat ninəto rəkis məmə in tatimis.
- ²⁷Pahrien, in təmatimis pik, iuəhkir əm timis. Məto Uhgīn təmasəkitun, məto sənəmə in əm, məto io min, kən təmahtosig-in nat əh itəm otol nīkik titəgit pik.
- ²⁸Məto-inu o nat əh, nīkik tagien pik o nahl-ipinə məmə nīkitəmat otagien nian onəkotəplan, kən məmə io ekaluin nīkik təsəht minən.
- ²⁹Nīkitəmat otəkəike magien məmə onəkotəplan min, tahmen məmə in piatəmat kit e Iərəmərə. Kən otos-ipən nisaiien kəm netəm kotahmen əm lan,

³⁰mæto-inu iuæhkir in timis o wæk ræha Kristo, mæsæginæn o ræhan næmegæhæn e nian æskasik min mæmæ in otasitu lak, nian ræhatæmat suatip tikæ o nasituæn.

Filipæ 3

Suatip pahrien o nosæn nolæn ætuatip

¹Ræhak min netæmim itæm iakolkeike pik, inu namnun næghatæn ræhak. Otagien o Iæræmæra. Kæn ekæte min æm næghatæn kitiæh itæm emæte kæn itæmat aupæn, mæto sænæmæ in nat tiækis ron io, kæn in otasitu etæmat mahtosig-in itæmat o næghatæn eiueiuæ min.

²Roiu, iatæn kæn itæmat mæmæ, !Oatæto kuri min æh! !Oatæto netæm koatol nolæn rat min! !Oatæto netæm koatæte itæm! Ilat koatæn mæmæ okæike kæhg-ipæn suah kit mæmæ in otætuatip e niganæmti Uhgin. Netæm min æh kotahmen e kuri iarupin min itæm koatol næratæn.

³Mæto kitat u nenæti Uhgin pahrien min itæm in tæmæte rækis nolæn rat min e nikitat, kæn Narmin Ræha Uhgin tatol mæmæ kitat kotitun næfakæn kæn Uhgin e ræhatat næmegæhæn. Kæn kitat kotalausit pik e Kristo Iesu kæn motagile æm lan, mæto sænæmæ in nat kit itæm kitat atip kæmotol e nipætitat o nosmegæhæn itat.

⁴Mæto aupæn, ræhak natimnat næhlan tepæt itæm emætagile lan o nosmegæhæn io. Kæn okæmæ suah kit nikin tæht mæmæ titun nagile æmæn e natimnat tol næhlan, mæto ræhak natimnat kotol næhlan taprækis agin-æh.

⁵Nian emos nian eit ætuatip, kæn kæmæhg-ipæn io. Kæn io etæm Isrel, emisi-pæn e noanol ræha Benjamin, tipik min ilat min netæm Isrel ætuatip, kæn io min iatætæu-pæn suatip kitiæh. Aupæn, io Farisi kit, kæn iatætæu-pæn wir Lou.

⁶Emolkeike pahrien e nikik rafin mæmæ ekol Uhgin nikin tagien mæmæ emol næratæn kæn netæm koatahatætæ e Iesu. Kæmæsehm-pa-mæn nat tærat kit ne e næmegæhæn ræhak mæto-inu emætæu-pæn rafin lou min ræha nat Isrel.

⁷Məto natimnat min rafin əh itəm emətagile elat aypən, kən nikip təht ilat kotəwir p̄ik agin, məto roiu əh iatəplan məmə ilat nat əpnap̄in əm məto-inu enitun nat itəm Kristo təmol.

⁸Məto təsolən namnun ikin əh. Kən roiu etakil məmə natimnat rafin agin, ilat nat əpnap̄in əm məto-inu iatəplan nat kit itəm in təwir p̄ik agin, məmə ekitun Kristo Iesu, İərəmərə rəhak. Emapəs rafin ilat o Kristo. İatakil ilat tahmen e nəme nərik məmə ekitun wir Kristo,

⁹kən məmə ekioal kitəh itimlau min. Uhḡin təsəplanən io məmə ekətuatip məto-inu io atip emətəu-pən ətuatip Lou, məto in tatəplan io məmə ekətuatip məto-inu iatahatətə əm e Kristo. Uhḡin tatol məmə io etəm ətuatip e nahatətəən rəhak.

¹⁰Iakolkeike məmə ekitun təhmin min Kristo, ne nəsanənən itəm Uhḡin təmol in təmegəh min e nimisən, kən iakolkeike məmə ekuwa iuəhk̄ir ron nian ekəto nahməən tahmen e nahməən itəm in təməto. Kən iakolkeike məmə ekuwa mahmen lan e nimisən rəhan,

¹¹kən e suatip əh, ekitun nələhəu-pən əskasikən rəhak nətəligən lan məmə, io min, Uhḡin otol ekəmegəh min.

Pol təmalkut əskasik məmə in otitun təhmin Kristo

¹²Esənən məmə enos rəkis natimnat min əh, kən məmə e nəmegəhən rəhak əh-roiu, io ekətuatip wir. Kəp. Məto emitəp mətalkut p̄ik məmə ekos maskəl̄im natimnat min əh məmə rəhak, məto-inu Kristo Iesu təmitəp io kən maskəl̄im tiəkis, təmol io rəhan, məmə ekos natimnat min əh.

¹³Piak min, esənən məmə enos rəkis natimnat min əh. Kəp. Məto nat kitəh əm itəm etalkut ron, məmə ekaluin natimnat e məntaak, mətalkut p̄ik matos noəh o nat itəm tatəməhl aypən-in io,

¹⁴kən tahmen e suah kit itəm tətaiu məmə in otol win o nosən nat kit, kən io etaiu o nosən noan nalkutən rəhak, kən noan nalkutən əh in nəmegəhən wi e Kristo Iesu itəm Uhḡin təmaun-in io məmə ekos.

¹⁵Kən kitat rafin itəm kinotəskasik rəkis e nəmegəhən rəhatat, okotəkəike motaskəlim nətəligən min əh. Məto okəmə itəmat neen nətəligən rəhatəmat tol pisin e nat u, pəs Uhgın otol tagəhag kəm itəmat nətəligən itəm tətuatip.

¹⁶Məto nat keike məmə kotətəu-pən suatip itəm kinotitun rəkis.

¹⁷Piak min, otuwa kitəh motətəu-pən nəme nelkək, itəm itəmat emotol rəkis nəkotəplan, kən otisilu wir netəm koatitəp nəme nelkitimat.

¹⁸Otətəu-pən nəme nelkək məto-inu enən-ipinə rəkis kəm itəmat nian tepət, kən roiu nahui nəmtək tətaiu ron məmə, netəmim tepət rəhalat naliwəkən tatəgətun məmə ilat tikimir min rəha nammusən təwir rəha Kristo məmə in təmimis e nig kəməluau.

¹⁹Uhgın otərəkin ilat. Koatətəlig-in pik əm nərpiilat, məmə in uhgın rəhalat, kən motausit o nolən natimnat itəm tol naulisən, kən nətəligən rəhalat tatuwin pik əm o natimnat rəha nətueintən.

²⁰Məto kitat netəm rəha nego e neai, koatəsahgin Iosmegəh itəm otisi-pən e nego e neai, u Iərəməərə Iesu Kristo.

²¹Kən in otəuhlin nipətətat rəha nətueintən u, inu nagwənən nigə mətikolo, kən mol tahmen e rəha Kristo nian təməmegəh e nimisən. In otol nəhlan e nəsanənən rəhan itəm titun nələhəu-pənən natimnat rafin e rəhan nərəməərəən.

Filipae 4

¹Tol nəhlan, rəhak min, otətul eskasik mihin nulan e Iərəməərə. Iakolkeike itəmat kən molkeike pik məmə ekəplan min itəmat. Rəhak min netəmim, nəmegəhən rəhatəmat itəm tətuatip tatol nikik tətəgien, kən itəmat noa wək rəhak itəm təwir agin.

Pol təmiləs-ipər nətəligən rəhalat

²Iuotia ne Sintike, awi, okol nəkuəpəs rəhatəmlau nərgəhəuən muegəhan e nətəligən rəhatəmlau məto-inu rəha Iərəməərə kərən u itəmlau.

³Əwəh, kən ik min, itəm kilau min ik kəmial wək nuwəh rəkis, iakolkeike məmə nakasitu e pətan mil u, mətə-inu emol pik wək itiməhal min ilau. Katuasitu lak matuən-iarəp namnusən təwir rəha Iesu Kristo, itimat Klemen ne piak min neen min itəm kəmotasitu e wək. Uhgin təməte nərgilat e naoa rəha nəmegəhən.

⁴Otagien o İərəməyə nian rafin. !Kən ekən min, otagien!

⁵Otol kəm netəmim məmə okotəplan məmə itəmat netəm mətig. Kən məsotaluinən məmə otəsuwəhən İərəməyə titəlig-pa min.

⁶Nikitəmat təsəht pikən natimnat min, mətə e natimnat min rafin, otəfak-pən əm kəm Uhgin o nat naka itəm nakotolkeike. Kən nian nakotəfak moatətapəh ron, otən kəm in məmə nikitəmat tagien o rəhan nəwİRən.

⁷Kən Uhgin otos-ipən kəm itəmat nəməlinuən itəm iahgin pik taprəkis-in nitunən rafin rəha netəmim. Kən nəməlinuən əh otərəməyə wir e nikitəmat ne nətəligən rəhatəmat mətə-inu nakoatahatətə e Kristo Iesu.

⁸Kən roiu piak min, otətəlig-in natimnat min itəm tol nİpahrienən, itəm tətəskəlim nisaiiən, itəm tətəuatİp, itəm nolən rat tİkə lan, itəm kitat kotolkeike, itəm nərgilat kotəwir, itəm kotəwir pik, itəm netəmim koatənwiwi. Otətəlig-in natimnat min əh.

⁹Otol nat naka itəm eməgətun itəmat lan, itəm nəmotos e nəmegəhən rəhatəmat, kən otol min nat naka itəm io emən, kən otol nat naka nəmotəhm-pa lak. Nian nəkoatol nəhlan, kən Uhgin itəm tatos-ipinə nəməlinuən kəm itəmat, otİtan itəmat min e nian min rafin.

Pol nİkin tagien o nasituən rəhalat

¹⁰Nİkik tagien iatənwiwi İərəməyə mətə-inu nuwəh məsİn nəməsotasituən lak, mətə əh-roiu nİkitəmat tətəht min io. Nİpahrienən nəmoatətəlig-in pik io, mətə suatİp tİkə məmə nakotasitu lak.

¹¹Esənən nat u mətə-inu natimnat itəm iakolkeike tİkə ron io, kəp. Mətə-inu roiu ekİtun məmə nİkik tagien əm o natimnat itəm iatos.

¹²Ekitun suatip rəha nagienən okəmə rəhak natimnat tikə, o okəmə rəhak natimnat tepət. Enitun rəkis suatip anion əh e nian rafin, okəmə nigak nagwənən tepət o noan məsin əm, okəmə rəhak nautə tepət o noan məsin əm.

¹³Məto-inu Kristo tatos-ipa rəhan nəsanənən kəm io, kən ekitun naliwəkən e nəwirən o nəratən.

¹⁴Məto itəmat nəmotol nolən təwir nian nəmotasitu lak e nəratən itəm emətətig lan.

¹⁵Nipahrienən, itəmat netəm Filipae ninotitun rəkis məmə nian nəmətuoun motəto namnusən təwir e Iesu Kristo, nian emiet əpəh Masetonia, itəmat əm un nəmotasitu lak e məni. Niməfak min tikə itəm təmos-ipa natimnat neen kəm io.

¹⁶Kən nian emuwın iuəhkır əm, e taon Tesalonaeka, mətətig əpəh ikin, nəmotahl-ipa min məni kəm io, kən sənəmə mau kitiəh əm.

¹⁷Sənəmə iategəs-in məni məmə nakotos-ipa kəm io, məto iakolkeike məmə Uhgın otəplan nəwirən əh kən mətou itəmat lan.

¹⁸Emos rafin məni itəm nəmotahl-ipa kəm io, kən in tahmen maprəkis məto-inu nian Epafrotaetas təməmik natimnat min u muwa kəm io, roiu rəhak natimnat rafin tepət. Itəmat nəmos-ipən nat kit kəm Uhgın tahmen e sakrifais itəm nəmiəwın təwir. In tatos əm, nikin tətagien ron.

¹⁹Kən Uhgın rəhak in otos-ipinə kəm itəmat natimnat rafin itəm tətəuatip o nəmegəhən rəhatəmat. Kən rəhan rafin nos-ipənən koatisi-pən e rəhan nautə tepət təwir, kən moatuwa e Kristo Iesu.

²⁰Pəs netəmim rafin okotisiai-in Uhgın Tata rəhatat tatuwın matuwın namnun tikə. Əwəh.

Namnun nəghatən rəha Pol

²¹Iatən təwir kəm itəmat rafin itəm nakoatahatətə e Kristo Iesu. Piatat min ilat min io u ikin-u koatən min təwir kəm itəmat.

²²Netəm rafin itəm koatahatətə e Kristo Iesu, koatən-ipinə təwir kəm itəmat, kən ilat min əpəh e nimə rəha Sisa koatən təwir p̄ik kəm itəmat.

²³Pəs Iərəməərə Iesu Kristo otawte-in rəhan nəwirən kəm itəmat rafin.

Kolosi

Kolosi 1

Pol tēmētoun rəhan nəghatən

¹Io Pol, u io aposol kit rəha Kristo Iesu, itəm Uhgīn tēmītəpun rəkis io mēmə rəhan. Itimlau piətət Timoti etuatig,

²kən nikitimlau tətəgien mēmə iatuəghat kəm itəmat e naoa u, itəm iatuəte matuahl-ipinə kəm itəmat netəmim rəha Uhgīn əpəh Kolosi, inu piak min ne winik min e Kristo itəm nakotahatətə əskasik lan. Itimlau iatuəfak mēmə nəwirən ne nəməlinuən rəha Uhgīn Tata rəhatat in otəkəike mətətig otəmat.

Pol tēmənwiwi Uhgīn o netəm Kolosi

³Nian ekoatəfak otəmat kəm Uhgīn u tata rəha Iərəmərə Iesu Kristo, kən nian rafin ekoatən tagkiu kəm in o rəhan wək e nəmegəhən rəhatəmat, mətə-inu emotəto

⁴mēmə rəhatəmat nahatətəən təskasik rən ne nolkeikeən rəhatəmat tatuwin o netəmim itəm koatəfak.

⁵Nahatətəən ne nolkeikeən rəhatəmat tol min-nulan mətə-inu nəkotitun wir e nikitəmat mēmə Uhgīn otos-ipinə kəm itəmat nat naka itəm in təmol əpen-əpenə lan əpəh ilis e nego e neai. Nəmotəto rəkis natimnat min əh e nəghatən pahrien, inu namnusən təwir rəha Iesu Kristo.

⁶Ikin min e nətueintən u, namnusən təwir tatoe-in noan matəwiə matol wi nəmegəhən rəha netəmim. Tol əm mə inu nian itəmat nəmotəto motitun nipahrienən əh e nəwirən rəha Uhgīn, kən tatəwiə min matoe e rəhatəmat nəmegəhən.

⁷Inu suah u Epafras, tinən rəkis nəghatən u kəm itəmat. In etəmim wir kit itəm tatos rəhatimlau nəghatən. In etəmim kit tatətul əskasik o nolən wək rəha Kristo kən mətəsitu etəmat.

⁸In təmən kəm itimlau nolkeikeən rəhatəmat itəm tatuwin o netəmim itəm Narmin Rəha Uhgīn təmos-ipinə kəm itəmat.

⁹Tol min-nulan, e nian itimat emoatəto namnusən əh, kən ekoatəfak e nian rafin otəmat. Ekoatətapəh-in o Uhgın məmə in otətəlmin itəmat e rəhan nətəligən ne nenatigən pəs nəkotitun wir nəwian.

¹⁰Ekoatəfak nulan məmə naliwəkən rəhatəmat otos-ipən nisaiiən kəm Uhgın pəs tol nikin tətəgien ron. Məto-inu nəmegəhən rəhatəmat tatəe-in noan itəm təwir o wək rafin rəha Uhgın itəm noatol. Pəs Uhgın otasitu etəmat məmə nəkotitun wir in.

¹¹Ekoatəfak məmə nəsanənən asol rəha Uhgın otol itəmat nakotəsanən e nian nərətən tatuwa. Pəs nəkoatətul əskasik kən nətəligən rəhatəmat təfəməh, kən năgienən tətətig etəmat,

¹²kən nakoatən kəm Tata Uhgın məmə nikitəmat tətəgien o natimat itəm təmol. In təmol itəmat nəkotətuatip, məmə nəkotitun nosən nautə rəha Uhgın itəm otəpanuwa. Onəkotos rəhatəmat nautə tahmen e netəmim rafin itəm koatəfak motaliwək e nəhag-əhagən rəha Uhgın.

¹³Kən Uhgın təmol nəhlan nian in təmiləs-irəkis kitat e nərəməərən rəha napinəpən, minol kitat kinotuwa e nərəməərən rəha Nətin itəm in tolkeike pik.

¹⁴Kən nətin təmikis kitat e nalpinən rəha təfagə, inəh təmafəl kitat e təfagə rat min rəhatat.

Kristo in ilis taprəkis-in natimnat rafin

¹⁵Nəti Uhgın tahmen-pən əm e rəhan tata itəm kol netəmim kəsotehmən. Aupən aupən agin, nian niməptən ne neai ne natimnat rafin kəmoatikə əh, məto Nətin, in tinimaupən matig rəkis, kən tol-pən in, in ilis tatərəməərə o natimnat rafin min u.

¹⁶In ilis məto-inu in təmol natimnat rafin e nətueintən u, ne neai, natimnat itəm katehm ilat o kəsehmən ilat, inəh nagelo min, ne iərmis min, ne narmin rat min, ne iərəməərə min rafin. Kən in təmol natimnat min rafin u məmə rəhan.

¹⁷Kən in tinimaupən matig rəkis e natimnat rafin. Kən natimnat min rafin koatatig mətō-inu nəsānənən rəhan tətāskəlīm ilat.

¹⁸Kən in əm tatətul aupən o niməfak, kən niməfak in tatol wək tahmen-pən e nipətin, kən in rəhn-kapə. Kən in nəukəti niməfak, inəh in etənim itəm in tēmaupən məmegəh lilin e nimisən. Tol nəhlan, in ilis e natimnat rafin.

¹⁹Mətō-inu e nəwia Uhgīn, nəmegəhən ne nəsānənən rafin rəhan tətātig əm e Kristo, kən Kristo in ilis e natimnat rafin.

²⁰Kən e Kristo, Uhgīn tēmələhəu nəməlinuən nian nita Kristo tēmaiu e nig kəməluau, kən netənim, ne nat megəh min, ne nagelo min, ne iərmis min, ne natimnat rafin kəmotuwa kuəfimin ilat min e nərəmərən rəha Uhgīn. E Kristo əm Uhgīn tēmōl natimnat min əh.

²¹Aupən ikin, itəmat nəmoatətul isəu o Uhgīn, kən itəmat tikimir min rəhan e nətəlīgən rəhatəmat, kən nəmoatol təfagə rat.

²²Mətō roiu əh, Uhgīn tēmōl məmə itəmat nəmotuwa kol kitiaəh itəmat min e nimisən rəha Kristo itəm nipətin tēməkul e nig kəməluau. Uhgīn tēmōl mihin əh lan məmə otos itəmat nakotuwa iuəhkir ron, kən motətuatip e niganəmtin, kən rəhatəmat nolən rat tikə, kən okol suah kit təsən ratən itəmat.

²³Natimnat min u tol nəhlan okəmə itəmat nəkoatətul əskasik e rəhatəmat nahatətən e Iesu. Nəmoatəto namnusən təwir itəm tatəgətun natimnat itəm Uhgīn otol kəm itəmat əpəh e nego e neai, kən rəhatəmat nətəlīgən otəkəike matətul əskasik e natimnat min əh. Namnusən təwir u, itəm nəmotəto rəkis, kəmamnus-iarəp ikin min e nətueintən, kən io Pol, Uhgīn tēmaun-in io məmə iatən-iarəp namnusən təwir əh.

²⁴Nikik tagien məmə ekatəto nahməən e nipətik o rəhatəmat nahatətən. Kristo tēməto nahməən e nipətin məmə niməfak otaiir. Kən e suatip kitiaəh əm, io min iatəto nahməən e nipətik o nipəti Kristo, inu in niməfak, məmə otəwiə məskasik. Kən tol min-nəhlan, wək itəm Iesu tēmətuoun, iakolkeike məmə iakasitu e wək rəha Iesu o niməfak, kən matəto nahməən ron.

²⁵Uhgin əm təmiləs-ipər io məmə ekol wək e niməfak rəhan. Roiu əh, ekitun nasituən etəmat o wək itəm Uhgin təmələhəu-pən e nelmək. Rəhak wək məmə iatən-iarəp nəghatən min rafin rəha Uhgin pəs nəkotitun wir,

²⁶nəghatən əh in nalpəkau anionən rəha Uhgin itəm təmatəhluaig o netənim rafin aupən ikin, məto roiu əh Uhgin tinuhapik nipətin kəm rəhan netənim.

²⁷Kən Uhgin nikin tagien əm məmə otən-iarəp natimnat wir min rəha Iesu kəm itəmat, netəm naihluə min u kəsənən mə itəmat netəm Isrel, məmə onəkotitun min. Nalpəkau anionən itəm təwir rəha Uhgin, in tol min-nulan, Kristo təmos nikitəmat, kən nəkotitun motahatətə lan məmə onəkotos rəhan nəwirən itəm təwir agin-əh əpəh e nego e neai.

²⁸Kən itəmat ekoatən-iarəp Kristo kəm netənim rafin. Kən ekoatən əskasik moatəhgaiir e nikilat, kən moatəgətun ilat e nenatigən wir, məmə ilat kotuwa iəfak min itəm koatətul əskasik e rəhalat nahatətəən e Kristo.

²⁹Iatol wək əskasik o nat əh, kən e nian rafin iatol wək əskasik pik e nəsanənən asol rəha Kristo itəm tatol wək e nəmegəhən rəhak.

Kolosi 2

Nəkotəkəike motahatətə əskasik e Iesu

¹Iakolkeike məmə nəkotitun mə iatol wək əskasik pik otəmat netəm Kolosi, ne netəm Laotisia, ne neen min itəm koatəfak məto esəhmən ilat.

²Iatol wək nəhlan o niləs-ipərən nətəligən rəhatəmat rafin, nian itəmat nakotilpin wir nikitəmat məmə nikitəmat otol kitəh əm, kən natimnat min u in tatuwa nian nakoatolkeike itəmat min. Kən iatol wək məmə itəmat rafin onəkotos nitunən təwir itəm otol nikitəmat təsanən, kən in otol min məmə nəkotitun wir nəghatən pahrien rəha Uhgin itəm aupən təmatəhluaig məto roiu tinet-arəp. Kən nalpəkauən anion əh, in Kristo,

³itəm Uhgin təmərgətəin nenatigən ne nitunən wir min rafin rəhan tətətig lan.

⁴Io iatəghat nulan kəm itəmat o nahtosig-inən nəghatən eiueiuə min rəha netənim itəm tətəhen o niuw-rəkisən rəhatəmat nətəligən.

⁵Tol mə etatig pap isəu otəmat, məto nikik tatəht pik itəmat. Kən nikik tagien pik məto-inu eməto məmə rəhatəmat nətəligən kitiah əm, kən itəmat nakotahatətə əskasik əm e Kristo.

Rəhatəmat nəmegəhən otəkəike mətatig əm e Kristo.

⁶Məto-inu itəmat nəmos Kristo Iesu məmə in İərəməmə rəhatəmat, kən nəkotəkəike moatətəu-pən əskasik in.

⁷Otaskəlim Kristo tiəkis tahmen e noki niğ tateiuaiu mīləs nəptən, kən pəs rəhatəmat nəmegəhən təwiə məskasik lan. Pəs rəhatəmat nahatətəən otəkəike məwiə matəskasik e nian rafin, nahatətəən inu kəməgətun itəmat lan aupən. Kən nian rafin okotəike moatən kəm Uhgın məmə nikitəmat təmər mərioah e nagiənən o natimnat itəm təmol otəmat.

⁸Oatəto wir itəmat məmə netənim kəsotatuən itəmat e iəgətun eiueiuən rəhalat. Nəgətun eiueiuən əh tatətəu-pən nətəligən rəha netənim əm ne nəukəti lou min itəm tatəghat-in natimnat rəha nətueintən əm. Nəghatən min əh tatisi-pən o nətəligən oas min rəha netənim, məto kəsotisi-pənən o Kristo.

⁹Kən Kristo in Uhgın. Kən in təmuwa mos nipəti etənim tahmen e kitat, kən natimnat rafin rəha Uhgın tətatig lan.

¹⁰Kən nian nəmotahatətə e Kristo, kən Uhgın in təmos-ipən natimnat rafin rəha nəwirən kəm itəmat. Kən Kristo tatərəməmə e netənim ne natimnat rafin itəm koatərəməmə e nətueintən ne neai.

¹¹Kən nat kit min e Kristo, nian itəmat nəmotahatətə lan, kən in təməhg-ipən itəmat. Məto sənəmə nəhg-ipənən rəha nipətin itəm netənim koatol, məto nəhg-ipənən rəha nikitəmat itəm Iesu tatol. In təməte rəkis nətəligən ne nolən rat min e rəhatəmat nəmegəhən.

¹²Kən e nian itəm kəmau-təlimin itəmat e nəhau, in nəmtətin kit məmə nəmegəhən aupən rəha təfagə rat rəhatəmat koatimis kən katitənim ilat Iesu, kən Uhgın təməmegəh min e nəmegəhən wi min itəmat Iesu e nəmegəhən rəhatəmat, in əh e nahatətəən rəhatəmat e nəsanənən asol rəha Uhgın itəm təmol Iesu təmegəh min e nimisən.

¹³Aupən ikin, nian Uhgın tәмәsәte rәkisән әh nolән rat min e nikitәmat, kән e niganәmtin, itәmat nәmotimis rәkis o nolән rat min әh. Mәto nian nәmotuwa kol kitiәh itәmat Iesu, kән Uhgın tosmegәh min itәmat min. Uhgın tәmafәl rәkis nolән rat min rәhatat.

¹⁴Nian kitat kәmoatol nolән rat, kән kәmotәht Lou rәha Moses itәм tatән mәмә okotimis o nolән rat min әh, kән tatәtu-pa nipәgnәmti nәghatән min kәм kitat. Mәto Uhgın tәmәht-ipән nәghatән min әh e nig kәmәluau, kән nәsanәнән rәhalat tikә.

¹⁵E nig kәmәluau-in, Kristo in tәmol win e nәsanәнән rәha iәrәmәrә min rafin, kән tәmәrәkin nәrәmәrәән rәha iәrmis min tahmen-pән mә in tәmol win elat e nәluaginән asol kit. Kән roiu әh, in tәmol rәhan tikimir min kәmotuwa nat әpnarın әm e niganәmti netәmim.

Iesu tatәrәmәrә etәmat

¹⁶Tol min-nulan, әsotәtelig-inән nәghatән rәha netәmim itәм kotәlәhәu-osig mәмә nәkәsotolән natimnat neen, mәsotunән nagwәнән u o mәsotәnimән nat u. Әsotәtelig-inән nәghatән rәhalat itәм koatән mәмә nakol natimnat min u e nian asim min, o e nian rәha mәwig wi min, o e nian rәha Sapat.

¹⁷Lou min u rәhalat itәм koatәghat-in, kotahmen e narmi nat kit itәм otәpanuwa, mәto nipәti natimnat rafin tәtatig e Kristo.

¹⁸Netәmim neen kotasit pik mәto-inu ilat koatән mә koatehm nәmәhlaiirән min neen itәм nipәtilat tatig. Ilat koatән kәм itәmat mәмә nәkotәkәike motol natimnat neen itәм tatәgәtun mәмә rәhatәmat nәtәligән teiuaiu, kән itәmat onәkotәkәike moatәfak kәм nagelo min. Әsotәtәu-pәнән nәtәligән min rәhalat. Nәtәligән min әh etәmim әm tatol. Okәmә nәkoatәtәu-pән nәghatән rәhalat, kән onәkotakiәh e rәhatәmat nәmegәhән. Mәto-inu netәm min әh koatos-ipәр ilat o nat nipәtin tikә.

¹⁹Netәm min әh kәsotaskәlimән Iesu tiәkis. Mәto Iesu tahmen-pән mә in rәhn-kapә nimәfak kәnu nimәfak in nipәti Iesu. E nolән kitiәh tahmen-pән e nipәti etәmim, itәм tatilpin ikin e noanol min tatuwin e nikilkilin, kән Iesu

tatol mihin əm nat kitəh e niməfak rəhan mə niməfak otəskasik, kən matəwiə e nəməgəhən wir itəm Uhgın tatol tatəwiə.

Nəmosos nəmegəhən wi mətə-inu itəmat nəmotol kitəh e Iesu

²⁰Nian nəmotahətətə e Iesu, in tahmen mə nəmotimis itəmat min. Kən mətə-inu lou təsuwinən o etəmim itəm təmimis, kən nəukəti lou min itəm tatəghat-in natimnat rəha nətueintən əm, nəsanənən rəhalat tikə məmə okotərəməərə etəmat. Tol min-nəhlan, iatətapəh otəmat məmə, tahro itəmat nəkoatətəu-pən lou min rəha nətueintən ne, inəh nəghatən oas min itəm koatən məmə,

²¹“Əsaskəlimən nat u,” o “Əsun asgəwinən nat u,” o “Əsekən nat u.”

²²Mətə nəghatən min u təmisi-pən əm e nətəligən rəha etəmim. Ilat koatəghat-in əm natimnat rəha nətueintən u, tahmen-pən e nagwənən neen, ne nənimən neen. Mətə natimnat min un, okol təsasiuən, kən təsərəkinən nikitəmat, mətə-inu e nian onəkotos o nakotun, kən tikə min.

²³Ekitun mə nian nakoatehm nəghatən min əh, nakotəmə kətəh nəghatən agin-əh min neen. Ilat koatən məmə netəmim okotəfak min-nulan o nəhlan, kən ilat koatən məmə okotol rəhalat nətəligən teiuaiu min-nulan o nəhlan, kən ilat koatən min məmə netəmim okotəike moatehm wir nipətəlat min-nulan o nəhlan e nolən itəm in tiəkis o nipətəlat. Mətə iatən-ipinə kəm itəmat məmə nəghatən min əh, rəhalat nəsanənən tikə məmə otahtosig-in nətəligən rat min ne nolən rat min itəm netəmim koatol e nipətəlat.

Kolosi 3

¹Mətə-inu Uhgın təmosmegəh min itəmat min Kristo, kən tol mihin nəhlan, roiu əh itəmat onəkotəkəike motol nikitəmat tətətig əskasik e natimnat itəm tətətig əpəh e nego rəha Uhgın, ikin əh Iesu tatəpələh ikin e nıkali Uhgın matip, ikin əh, ikin rəha nəsanənən ne nisaiiən.

²Itəmat onəkotəkəike motol rəhatəmat nətəligən tətətig əm e nego rəha Uhgın, pəs nətəligən rəhatəmat otəsətigən e natimnat rəha nətueintən u,

³mæto-inu itəmat nəmotimis itəmat Kristo, kən nəmegəhən pahrien rəhatəmat koatəhluaig ilat Kristo itəm tətatiḡ e nego e neai ilau Uhgīn. Nəmegəhən wi u, netənim kəsotəplanən.

⁴Nəmegəhən pahrien rəhatəmat in e Kristo əm. Kən nian Kristo otitəliḡ-pa min, kən Uhgīn otəḡətun Kristo kitat min kəm netənim rafin, kən ilat okotəplan nəwirən ne nəsanənən rəhan.

Suatip ətuatip

⁵Məto itəmat onəkotəkəike motapəs aḡin nolən tərət min rəha nətueintən, nolən tərət tol min-nulan: nīpitan ne nəman ne, koatit anion ilat min; ilat koatol nolən tərət tol naulisən o nənən; ilat koatolkeike pīk ilat min o nolən tərət; təfagə rat tepət e rəhalat nətəliḡən; ilat naumis, kən nolən əh tahmen-pən məmə koatəfak kəm narmi nat min.

⁶Nolən rat min əh tatol nīki Uhgīn titahmə, kən in otol nalpīnən asol kəm netənim itəm koatol nolən rat min əh.

⁷Aupən ikin, nolən rat min əh koatərəməərə e rəhatəmat nəmegəhən.

⁸Məto roiu əh, nəkotəkəike motos-irəkis ilat e rəhatəmat nəmegəhən, kən tol min-nəhlan: nikitəmat təsaratən; nikitəmat ne nohlitəmat təsati-perəh pīkən tahmen e kaluəluə; əsolən tərət kəm netənim; əsən ratən netənim; əsənən nəḡhatən itəm tol naulisən o nənən.

⁹Soteiuə-inən itəmat min məto-inu itəmat nəmotapeḡ rəkis nətəliḡən oas rəhatəmat kən motapəs rəhan nolən min,

¹⁰kən nəmotuwīn-in nətəliḡən wi. Uhgīn tatos-ipinə nəmegəhən wi u kəm itəmat, matol məmə itəmat onəkotuwə motol əm mə in ne. Kən pəs nəkotitun wir in.

¹¹Məto e natimnat min əh, in nat əpnapīn əm okəmə ik etəm Isrel, o sənəmə ik etəm Isrel; okəm kəməhg-ipən ik o kəsəhg-ipənən ik; okəmə nəmol-wir skul o nəsol-wirən skul; okəmə ik slef əm kit o ik nakatərəməərə e netənim. Məto nat asol in Kristo, kən tətatiḡ min e nəmegəhən rəhatat rafin.

¹²Uhgin tæmolkeike itæmat, kæn mitæpun itæmat mæmæ ræhan min. Kæn tol min-nulan: onækotækæike motasækitun netæmim; motol tæwir kæm netæmim; ræhatæmat nætæligæn otækæike mætætig læhau; itæmat netæm mætig; kæn nætæligæn ræhatæmat otæfæmæh. Otol næghatæn min æh, tahmen-pæn mæ nakoatuwin-in napæn wir ræha Uhgin.

¹³Nian suah kit otol nat kit otæsahtæn e niganæmtitæmat, kæn nikitæmat otæsahtæn uæhaiæn ron. Okæmæ suah kit tatol tærat kæm itæmat kit, pæs in otos æm timis e nikin, mæto in otækæike maluin kæn in mol tæwir æm kæm suah un. Saskælim-iækisæn e nikim nolæn tærat ræha etæmim itæm tæmol kæm ik, mæto ol tæwir æm kæm in, tahmen-pæn æm mæ Iæræmæ ræ tæmisaskælim-iækisæn nolæn tærat ræhatat e nikin, mæto in tæmol tæwir æm kæm kitat.

¹⁴Nat kæike itæm otækæike matig e nikitæmat, in nolkeikeæn. Otos motuwîn-in tahmen-pæn mæ napæn wir ræha Uhgin. Nian onækotolkeike itæmat min, kæn tol itæmat nakoatuwa kitæh.

¹⁵Otos næmælinuæn ræha Kristo pæs in tatæramæ ræ e nikitæmat, mæto-inu Uhgin tæmaun-in itæmat mæmæ nakotuwa kol kitæh, kæn nakoatatig æm e næmælinuen. Kæn nian rafin otæn kæm Uhgin mæmæ nikitæmat tætagien o natimnat itæm in tæmol kæm itæmat.

¹⁶Otægætun itæmat min e næghatæn ræha Kristo, kæn moatæn e nætæligæn tæwir kæm itæmat min mæmæ nækotækæike moatol, mæso tapæsæn. Otan napuæn min e Naoa ræha Napuæn, ne napuæn min ræha nimæfak, ne napuæn min itæm tætsi-pæn e Narmin Ræha Uhgin. Otan ilat rafin tahmen-pæn e nænwîwîæn kit itæm tætsi-pæn e nikitæmat matuwîn kæm Uhgin. Inæh e nolæn min æh, pæs næghatæn wir ræha Kristo tætatig matæmegæh matæwiæ wir e nikitæmat e nian min rafin.

¹⁷Natimnat rafin itæm noatol, ne næghatæn min rafin itæm noatæn, mæto nækotol æm e nærgi Iæræmæ ræ Iesu. Kæn nian rafin itæmat onækotækæike motæn kæm Uhgin, tata ræhatat, mæmæ nikitæmat tætagien o natimnat itæm Iesu tæmol kæm itæmat.

Nolæn wi ræha tata, ne mama, ne nisualkælæh

¹⁸Nipitan, otisiai-in nərəmərəən rəha iaguuhl min rəhatəmat, tahmen-pən əm mə pətan u in iəfak in otəkəike mol mihin.

¹⁹Kən nəman, otolkeike rəhatəmat nipitagwəhl, kən motol təwir kəm ilat, məto əsotolən rəhatəmat nərəmərəən məmə otərəkin rəhatəmat nipitaguihl min.

²⁰Nisualkələh, otisiai-in rəhatəmat tata ne mama, məto-inu İərəməərə rəhatat nikin otagiən o nolən əh.

²¹Itəmat tata min, esotolən nalpınən taprəkis-in nərətən itəm nisualkələh koatol, məmə nikipat otahmə ron. Məto okəmə nəkoatol nəhlan elat, kən rəhalat nətəligən in otatite.

Nolən rəha slef ne rəhan İərəməərə

²²Slef min, nian rafin onəkotəkəike motol nəwia netəm-iasol min rəhatəmat, məto sənəmə nian əm itəm ilat koatehm itəmat lan məmə nikipat otətagiən otəmat. Məto itəmat onəkotəkəike motol wək e nikitəmat pahriən rəha nos-İpənən nisaiiən kəm Uhgın.

²³Wək naka itəm nəkoatol, otol e nikitəmat rafin tahmen-pən əm mə noatol wək rəha İərəməərə rəhatat, sənəmə noatol wək rəha etəmim əm.

²⁴Məto-inu onəkotəkəike motitun wir məmə İərəməərə rəhatat in otos-ipa nətouən ətuatip rəha natimnat min itəm nəkoatol ilat. Nətouən əh Uhgın tinəmən rəkis məmə otos-İpən kəm nenətin min. ?Kən nəkotitun nat u? Nəkotol wək rəha suah inəh İərəməərə pahriən rəhatat, in İərəməərə Kristo.

²⁵Məto etəmim itəm tatol nolən tərət, in otos ətuatip min noan nətouən rəhan o nolən tərət, məto-inu Uhgın, in tatol tahmen-ahmen əm kəm netəmim rafin.

Kolosi 4

¹Netəm-iasol min itəm koatərəməərə, onəkotəkəike motol tətətip kən mahmen kəm rəhatəmat slef min, məto-inu itəmat min nəkotəkəike motitun məmə rəhatəmat min Etəm-iasol in tətətig min əpəh e nego e neai.

Pol təməgətun ilat

²Itəmat onəkotəkəike moatəghat-pən kəm Ughin e nəfakən e nian rafin. Kən nian onakoatəfak, rəhatəmat nətəligən otəkəike mətətig lan, kən nian rafin agin nəkotəkəike moatən kəm Ughin məmə nikitəmat tətəgien o natimnat itəm in təmöl kəm itəmat.

³Kən io iakolkeike məmə itəmat nəkotəkəike motəfak min otimat min, məmə Ughin oterəh e suatip mə ekotən-iarəp nalpəkau anionən rəha Ughin e Kristo. Məto-inu ematən-iarəp nəghatən u inu kən kahtosig-in-pən io ron e kalapus.

⁴Otəfak məmə iatən-iarəp nəghatən əh tətəuatip kən məpiə wir tahmen əm mə ekəike mol mihin.

⁵Itəmat netəm noatəfak, pəs netəm kəsotəfakən kotəhm-pən Iesu e nolən min rəhatəmat, kən e nian rafin onəkotəkəike moatehm wir mə nolən, ne nəghatən min rəhatəmat in otiuw laihluə min kotuwa o Iesu.

⁶Itəmat nəkotəkəike moatəghat wir kəm ilat e nəghatən min əm u itəm təwir kən mətəhen, kən pəs ilat okotəto nəghatən min əh mə kotəwir. Kən itəmat onəkotəkəike motitun wir suatip min o nuhalpinən nəghatən min rəhalat itəm koatəpəh o rəhatəmat nahatətən o Iesu.

Pol təmahl-ipən təs mil katian olat

⁷⁻⁸Etahl-ipinə piətət etəm təwir, Tikikas, in tatimnə otəmat o nat kəiu əm məmə in otamnus nəghatən rafin rəhatimat kəm itəmat, kən in otol nikitəmat təmegəh. In piətət kit itəm io ekolkeike pik. Nian rafin in tətətul matip o nasituən lak e wək rəha Iərəməərə.

⁹In tatimnə ilau piətət Onesimas. Nian rafin in tətəhatətə əskasik e Iesu, kən itimat ekotolkeike pik in. In etəmim kit rəhatəmat. Ilau okuən kəm itəmat namnusən rəha natimnat rafin ikin-u.

Namnun nəghatən rəha Pol təmuwin kəm ilat

¹⁰Aristakas in tətətig e kalapus itimlau min. In tətahl-ipinə nəghatən wir kəm itəmat. Kən Mak, in pia Panapas, in min tətahl-ipinə nəghatən wir rəhan kəm itəmat. Itəmat nənamotos rəkis rəhak nəghatən ron. Okəmə in otimnə rəhatəmat ikin, kən nakotit motuwin moatehm wir.

¹¹Kən Josua Jastas, in min tətahl-ipinə nəghatən wir rəhan kəm itəmat. E noanol min rəha Isrel itəm koatahatətə e Iesu, suah miləhal əm əh, iləhal kətəhalasitu lak o wək rəha nego rəha Uhgın. Kən suah miləhal əh, iləhal kətəhalasitu pık lak e nian əskasik min itəm tatuwa e rəhak nəmegəhən.

¹²Epafras in rəhatəmat kit etəmim, in min tətahl-ipinə nəghatən wir kəm itəmat. In etəmim kit nian rafin tatol wək rəha Iesu Kristo, kən e nian rafin in tatəfak əskasik otəmat. In tatətapəh o Uhgın məmə itəmat onakoatətul əskasik kən motimətə motitun wir natimnat rafin itəm Uhgın tolkeike.

¹³Ekitun nənən kəm itəmat məmə suah u in tatol wək əskasik o nasituən etəmat, ne netəm Laotisia, ne netəm Hierapolis.

¹⁴Tokita Luk etəm kitat kotalkeike pık, ne suah u Temas, ilau min katuahl-ipinə nəghatən wir kəm itəmat.

¹⁵Otahl-ipən min rəhak nəghatən wir kəm piətət ne winitat min əpəh Laotisia, ne pətan əh Nimfa, ne netəm koatəfak e nian min rafin əh rəhan ikin.

¹⁶Məto e nian onəkotafin rəkis rəhak naoa un, kən motəike motahl-ipən kəm netəm Laotisia mə ilat okotafin min kəm netəmim rəha niməfak əh-ikin. Kən e nolən kitieh min, itəmat onəkotəkəike motafin min naoa rəha netəm Laotisia.

¹⁷Kən itəmat nəkotəkəike motən-ipən kəm Akipas məmə in otəkəike mol rafin wək itəm İerəmərə rəhatat in təmos-ipən kəm in məmə otol.

¹⁸Io Pol, iatos pen matəte əm e nelmək nəghatən u rəha nənən təwir kəm itəmat. Sotaluinən sen itəm kəməlis io lan e kalapus. Pəs Uhgın otasitu etəmat kən mawte-in rəhan nəwirən tətətig otəmat.

1 Tesalonaeka

1 Tesalonaeka 1

Pol tēmən təwir kəm ilat

¹Io Pol, ne Saelas, ne Timoti, etəhalən təwir kəm itəmat u niməfak əpəh ikin Tesalonaeka. Itəmat nəmotuwa kitiaħ o Tata Uhgın ne İərəmərə İesu Kristo. Pəs Uhgın otawte-in rəhan nəwırən ne nəməlinuən kəm itəmat.

²Nian rafin etəhalən-ipən kəm Uhgın məmə nikitiməhal tagien otəmat, kən mətəhaləfak otəmat e nəfakən rəhatiməhal.

³Nian etəhaləfak kəm Tata Uhgın, nikitiməhal tagien məto-inu nian rafin nikitiməhal tatəht nat kisil, kit u rəhatəmat wək itəm tətisi-pən e nahatətəən rəhatəmat, ne rəhatəmat wək əskasik o nasituən e netəmim itəm tətisi-pən e nolkeikeən rəhatəmat, ne nolən rəha nətul əskasikən rəhatəmat e nian iəkis min itəm koatuwa e rəhatəmat nəmegəhən, kən nəkotol nəhlan məto-inu nəmotələhəu-pən əskasik rəhatəmat nətəligən e İərəmərə İesu Kristo.

⁴Piak min ne wınik min itəm Uhgın tolkeike itəmat. Nikitiməhal tagien min otəmat məto-inu ekəhalitun məmə Uhgın təmitəpun itəmat.

⁵Kən ekəhalitun nat u, məto-inu namnusən təwir itəm eməhalən kəm itəmat, sənəmə təmuwa e nəghatən əm, məto təmuwa min e nəsanənən, ne Narmin Rəha Uhgın, kən kitat kotitun wır məmə in nıpahrienən. Kən nian emotatig kitat min itəmat, nəkotitun məmə nolən rəhatimat in təwir məmə otasitu etəmat.

⁶Kən itəmat nəkotasgəwin itiməhal ne İərəmərə e nolən u: nəmos pap nahməən asol, məto nəmos nəghatən e nikin agien itəm Narmin Rəha Uhgın təmos-ipinə.

⁷Tol nəhlan, e nolən rəhatəmat nəmotəgətun suatıp wır kit kəm iəfak min əpəh Masetonia ne Akaea məmə kotasgəwin itəmat.

⁸Nəmotən-iarəp nəghatən rəha Uhgın tahmen e təwi təmasək kəto ikin min rafin, kən sənəmə əpəh Masetonia ne Akaea əm, məto netəmim ikin min rafin

kotitun rəhatəmat nahatətəən. ?Kən ekəhaləkəike məhalən-iarəp namnusən rəha nahatətəən rəhatəmat, o kəp?

⁹Kəp, məto-inu ilat atip koatən-iarəp məmə nian emotuwa moatəplan itəmat, nikitəmat tagien o nətoən nəghatən rəhatiməhal. Koatən-iarəp məmə itəmat nəmotəuhlin məntaatəmat o narmi nat min, kən motuarisig-in Uhgın itəm tatəmegəh, kən in Uhgın pahrien,

¹⁰kən nakoatəsahgin Nətin u Iesu, itəm təmiş-pən e nego e neai, kən Uhgın təmosmegəh in e nimisən, kən in otosmegəh kitat o nalpinən ne neməha rəha Uhgın itəm tatuwa.

1 Tesalonaeka 2

Wək rəha Pol əpəh Tesalonaeka

¹Piak min ne winik min. Nəkotitun məmə nian itiməhal eməhaluwa məhalehm itəmat, nuwamən rəhatiməhal, in sənəmə tol nat əpnəpın əm, məto təmol noan.

²Kən itəmat nəkotitun məmə əpəh Filipae, netənim kəmotol tərət kəm itiməhal, kən motəhai motən rat itiməhal, məto Uhgın rəhatat təmasitu etiməhal, kən itiməhal esəhaləginən nən-iarəpən rəhan namnusən təwir kəm itəmat, nat əpnəpın netənim kəmotalkut məmə okotən-iəhau itiməhal.

³Tol nəhlan məto-inu rəhatiməhal nəghatən o niuwən rəhatəmat nətəligən təsietən e nətəligən rat min o nikin itəm təsətuatipən, kən esəhlalkutən o neiuə-inən itəmat.

⁴Kəp, esəhalolən nəhlan. Məto nian etəhaləghat, ekəhalitun məmə Uhgın təmuag-pən rəkis e nikitiməhal, kən təmən məmə itiməhal etəhalahmen məmə etəhalən-iarəp namnusən təwir, kən in təmələhəu-pən e nelmitiməhal. Kən ekəsahləghatən məmə netənim nikilat otagien otiməhal, məto etəhaləghat məmə Uhgın nikin otagien otiməhal, kən in Uhgın itəm tatuag-pən e nikitiməhal.

⁵Nəkotitun məmə itiməhal esəhaluwamən otəmat məmə ekəhaliuw nətəligən rəhatəmat e nəghatən ətehen min. Kən esəhalən-iarəpən namnusən təwir kəm

itəmat məmə ekəhalos rəhatəmat məni. Kən Uhgın, in titun nikitiməhal məmə nəghatən u in nıpahrienən.

⁶İtiməhal esəhaluwamən məmə itəmat kit o etəmim ərnapın əm kit otıləs-ipər itiməhal.

⁷Kən nat kit mın, məto-inu itiməhal aposol mın rəha Kristo, ekəhalıtun nənən məmə nəkotəkəike motisiai-in itiməhal tahmen e etəm-iasol miləhal, məto eməsəhalolən. Nian etəhlatig kitat min itəmat, nolən rəhatiməhal timətig tahmen e mama kit itəm tatehm wır nətın mın.

⁸Nikitiməhal tagien məmə ekəhalən-iarəp namnusən təwır, məto sənəmə məmə ekəhalən-iarəp əm, məto eməhalol natımmat rafın itəm ekəhalıtun nolən məmə otasitu etəmat. In tahmen məmə eməhalos-ipinə nəmegəhən rəhatiməhal, məto-inu itiməhal eməhalolkeike itəmat, kən nəmotuwa rəhatiməhal netəmim.

⁹Piak mın ne winik mın. ?Nikitəmat tatəht, o kəp, wək əskasik itəm eməhalol? Nian itiməhal emətəhlamnus-iarəp namnusən təwır rəha Uhgın kəm itəmat, itiməhal eməhalol wək e nelmitiməhal laulaugin mətoarus-pən lapın məmə esəhalətapəh-inən nat kit otəmat.

¹⁰İtəmat ne Uhgın, nəmotəplan kən motıtun nən-iarəpən məmə nian emətəhlatig kitat min itəmat iəfak mın, nolən rəhatiməhal in tətuatıp, kən Uhgın tətagien lan, kən etəmim kit təsosən nıpəgnəmtin kit itəm tərat otiməhal.

¹¹İtəmat nəkotıtun məmə itiməhal eməhalol təwır kəm itəmat rafın tahmen e tata kit tatehm wır nenətın mın.

¹²Kən e nolən kitiəh əm, etəhalem əskasik itəmat, kən mətəhalıləs-ipər rəhatəmat nətəligən, mətəhalətapəh əskasik məmə nəmegəhən rəhatəmat otətuatıp e nıganəmti Uhgın, kən nıkin tagien lan. Uhgın u, tətəun-in itəmat məmə nakotuwa e nərəmərən ne nəwırən rəhan.

¹³Kən nian rafın, itiməhal ekəhalən tagkiu kəm Uhgın məto-inu nian nəmotos nəghatən rəha Uhgın itəm nəmotəto otiməhal, kən motos tatig e nikitəmat,

kən nikitəmat təsəhtən mēmə in nəghatən rəha netəmim əm, məto nikitəmat təht mēmə in nəghatən rəha Uhgīn, kən pahrien in nəghatən rəhan. Kən nəghatən u tatol wək e nəmegəhən rəhatəmat, netəm nakoatən nīpahrienən lan.

¹⁴Kən piak min ne winik min, nəmotos nəratən tahmen e niməfak min rəha Uhgīn e Kristo Iesu əpəh Jutia aupən. Nat əpnəpīn mēmə ilat netəmim imatəmat atip ikin, məto ilat kəmotol terat kəm itəmat tahmen əm e noanol min rəha Isrel kəmotol tərət kəm iəfak min əpəh Jutia.

¹⁵Kəmotohamnu Iərəməərə Iesu, ne ien min, kən motəhg-iarəp itimat ekotiet. Nolən rəhalat tatol niki Uhgīn təsagienən, kən ilat tikimīr min o netəmim rafin,

¹⁶məto-inu kotalkut mēmə okotən-iəhau itimat o nəghatən kəm Iaihlua min mēmə Uhgīn otosmegəh ilat. E nolən əh, ilat koatuargətāin rəhalat nolən rat mətoarus tahmen. Məto roiu əh, neməha ne nalpīnən rəha Uhgīn tīnuwa olat.

Pol təmolkeike mēmə otəplan ilat

¹⁷Piak min ne winik min. Nian eməhaluwīn isəu otəmat nian noan məsīn əm, məto eməhalolkeike pik mēmə ekəhaləplan min itəmat. Nīpahrienən, nīpətītat isəu otat min, məto nətəligən rəhatat kitīəh. Kən eməhlalkut pik mēmə ekəhalitəlig məhaləplan itəmat,

¹⁸məto-inu eməhalolkeike mēmə ekəhalimnə otəmat. Io, Pol, emalkut nian tēpət, məto Setan təmahtosig-in suatip otiməhal.

¹⁹?Tahro ekəhalolkeike pik mēmə ekəhaləplan min itəmat? ?Tol nəhlan məto-inu, nian Iərəməərə Iesu otuwa min, pah min un eməhalələhəu-pən nətəligən əskasik rəhatiməhal elat mēmə ilat noa wək wīr rəhatiməhal? ?Kən nikitiməhal otāgien min o pah min? ?Kən pah min un in rəhatiməhal nətouən itəm nikitiməhal otāgien elat? ?Itəmat, o kəp? Əwəh, itəmat u.

²⁰Nīpahrienən, itiməhal ekəhlausit otəmat, kən nikitiməhal tagien otəmat.

1 Tesalonaeka 3

¹Tol nəhlan, nian nikitiməhal təmərou kən iuəhkir nikitiməhal titəgit, məto-inu itiməhal ekəhaləruu məmə nəkotatig təwir əm o kəp, kən itiməhal eməhaləlis nəghatən məmə io ne Saelas ekətuatig Atens,

²emuahl-ipinə Timoti məmə in otimnə məplan itəmat. In piatat kit itəm tatol wək rəha Uhgīn itiməhal min o nən-iarəpən nəghatən rəha Uhgīn. In təminəh otəmat məmə otasitu etəmat mīləs-ipər rəhatəmat nətəligən, kən mol itəmat nəkoatətul əskasik e rəhatəmat nahatətəən,

³məmə nərətən itəm tatuwa roiu, okol təsolən nikitəmat təht pīk. Nəkotitun rəkis məmə in nətəligən rəha Uhgīn məmə netəmim okotol tərət etat nəhlan.

⁴Nipahrienən, nian emətəhlatig kitat min itəmat, eməhaləkəike mətəhalən kəm itəmat məmə okol tərət kəm kitat. Kən itəmat nəkotitun wir məmə tinuwa mol nipahrien lan tahmen əm məmə itiməhal eməhalən mihin.

⁵O nat əh, nian nikitiməhal təmərou kən iuəhkir nikitiməhal titəgit, kən emahl-ipinə Timoti məmə otimnə məplan-tu rəhatəmat nahatətəən, məmə tatəskasik əh, o kəp. Ekətəgin məmə e suatip kit, Setan u etəmim rəha nos-ipən-os-ipənən, in tos-ipən-os-ipən kəm itəmat, kən wək rəhatiməhal in tol nat əpnapin əm.

Timoti təmən-iarəp namnusən təwir

⁶Kən roiu əh, Timoti təmitəlig-pa min otimlau, kən matos namnusən təwir e rəhatəmat nahatətəən ne nolkeikeən. Təmən-ipa kəm itimlau məmə nikitəmat tatəht əh itiməhal e nagienən, kən motolkeike məmə nəkotəplan itiməhal, tahmen əm məmə itiməhal ekəhalolkeike məmə ekəhaləplan itəmat.

⁷Tol nəhlan, piak min ne winik min, nat əpnapin eməhlatig e nərətən, kən mətəhaləto nahməən, məto namnusən rəha nahatətəən rəhatəmat təmīləs-ipər rəhatiməhal nətəligən otəmat.

⁸Nian eməhalos namnusən məmə nəkoatətul əskasik əh o Iərəmərə, kən ekəhaləto məmə enəhalos min nəmegəhən.

⁹Nian ekəhalətul e niganəmti Uhgīn, nagienən rəhatiməhal otəmat in iahgin, kən ekəhalən kəm Uhgīn məmə nikitiməhal tagien pīk otəmat.

¹⁰E nian rafin, nērauiēgēn ne lapin, etēhalēfak ēskasik mēmē ekēhalēplan min itēmat, kēn mēhalēgētun itēmat e nat naka nēkotēruru ēh mēmē rēhatēmat nahatētēn otēwiē mēskasik.

¹¹Kēn pēs rēhatat Uhgīn atip, u Tata rēhatat, ne Iērēmērē Iesu rēhatat, kioal suatip rēhatimēhal mēmē ekēhalimnē mēhalehm itēmat.

¹²Pēs Iērēmērē tol nolkeikeēn rēhatēmat otepēt mēr mērioah otēmat ne netēmim rafin, tahmen e nolkeikeēn rēhatimēhal otēmat tepēt.

¹³Pēs in tol nīkitēmat tēsanēn mēmē, nian Iērēmērē Iesu tatuwa min ilat rēhan min netēmim, kēn nakotētul e nīganēmti rēhatat Uhgīn u Tata rēhatat, kēn nēkotētuatip kēn nolēn kit tikē mēmē otīlēs pīkēn itēmat.

1 Tesalonaeka 4

Nēmegēhēn rēhatēmat tēkēike mol Uhgīn nīkin tagien

¹Piak min ne winik min, roiu ekēike mēghat e natimnat min neen. Emēhalēgētun rēkis etēmat nolēn naka itēm nēkotol mēmē Uhgīn nīkin otagien otēmat. Kēn pahrien, nēkoatol mihin. Kēn roiu etēhalētapēh otēmat kēn mētēhalētapēh ēskasik e Iērēmērē Iesu mēmē nēkoatol ēm nulan tatuwin matuwīn mēsīn min.

²Otol nēhlan mēto-inu itēmat nēkotitun suatip itēm emēhalēgētun itēmat lan e nērēmērēn rēha Iērēmērē Iesu.

³Nētēligēn rēha Uhgīn mēmē in tēmēlēhēu kalīn itēmat mēmē rēhan min mēmē nēkoatol nat itēm tētuatip wir: sotētēu-pēnēn suatip rēha nīpitan ne nēman itēm koatit anion ilat min.

⁴Itēmat kitīēh kitīēh nēkotēkēike motērēmērē e nīpētītēmat e nolēn itēm tēwir mētuatip kēn katisiai-in.

⁵Sotolēn nolēn rēha nētēu-pēnēn nētēligēn ēskasik o nit anionēn pētān o iērman. Nolēn ēh rēha netēm kēsotēfakēn kotēruru Uhgīn.

⁶Kēn e natimnat min ēh, sotolēn tērat e piatēmat min o naklēh-inēn pētān rēha suah pīsīn. Iērēmērē otol nalpīnēn kēm netēm min u itēm kotol nolēn

min itəm tol nəhlan, kən enəhalən rəkis nat u kəm itəmat o nəhgaiirən etəmat.

⁷Tol nəhlan məto-inu Uhgin təməsaun-inən kitat məmə okotamkimik e niganəmtin, məto okotatig e nəmegəhən itəm kəmotələhəu kalin məmə rəhan.

⁸Tol nəhlan, etəm tatəuhlin məntaan e nəgətunən əh, sənəmə tatəuhlin məntaan kəm etəmin, məto tatəuhlin məntaan kəm Uhgin itəm təmos-ipa Narmın Rəhan kəm itəmat.

⁹Nəkotitun rəkis nolən rəha nolkeikeən itəmat iəfak min, kən inu sənəmə nat kit itəm ekəkəike mətə e naoa, məto-inu Uhgin təməgətun rəkis itəmat o nolkeikeən itəmat min.

¹⁰Kən pahrien, nakotolkeike piatat min rafin ikin Masetonia. Məto, piak min ne winik min, ekəhalətapəh əskasik məmə nəkotol mihin tatuwin nulan məsin min.

¹¹Itəmat nəkotəkəike motalkut o nətəu-pənən suatip rəha nəmegəhən itəm in təməlinu, kən motol atip rəhatəmat wək, kən nəkotol wək e nelmitəmat tahmen əm məmə eməhalən mihin kəm itəmat.

¹²Otol nəhlan məmə rəhatəmat nəmegəhən otiuw-pa nisaiiən rəha netəm ihluə min, kən itəmat nəsoṭagileən e suah kit.

Nuwamən rəha ləramərə

¹³Piak min ne winik min. Ekəhalolkeike məmə itəmat nəkotəkəike motitun netəm min u itəm kəmotimis. Kən esəhalolkeikeən məmə itəmat nakotasək tahmen e netəmin itəm kəsotələhəu-pənən rəhalat nətəligən e Uhgin.

¹⁴Kitat kotahatətə məmə Iesu təminis kən məmegəh min, kən nikitat titun məmə nian Iesu otuwa min, kən Uhgin otol məmə, netəm min u itəm kinotahatətə rəkis e Iesu nian kəmotimis, okotuwa min ilat Iesu.

¹⁵Kən ekəhalən kəm itəmat nəghatən ətuatip rəha İərəməyə məmə, kitat u itəm koatəmegəh əh motatig mətoarus nuwamən rəha İərəməyə, pahrien kitat okol kəsotaupən-inən netəm min u itəm kəmotaupən kəmotimis.

¹⁶Məto İərəməyə ətuatip əm oteiuaiu-pa e nego e neai, kən mən-iarəp əfəməh, kən etəm-iasol rəha nagelo min otagət əfəməh, kən netəmim okotəto təwi rəha Ughin, kən netəm min u itəm kinotahatətə rəkis e İesu nian kəmotimis, okotəmegəh motaupən motər.

¹⁷Kən uarisig lan, kitat netəm koatəmegəh əh motatig, okotər kitat min ilat e nimal napuə məmə okotəplan İərəməyə e magoagəp. Kən tol nəhlan, okotatig kitat İərəməyə namnun tikə.

¹⁸Tol nəhlan, otıləs-ipər nətəligən rəhatəmat min e nəghatən min u.

1 Tesalonaeka 5

¹Piak min ne winik min. Təwir əm məmə esəteən kəm itəmat e nian ətuatip rəha natimnat min əh,

²məto-inu itəmat nəkotitun rəkis məmə Nian Rəha İərəməyə otuwa tahmen e iakläh itəm tatuwa lapin, nian netəmim kotəruru.

³Nian netəmim koatən məmə, “Natimnat rafin təməlinu, kən nəratən tikə,” kən nəratən otuwa olat uəhai əm, tahmen e pətan itəm məntaan titahmə o neməkən, kən okol netəmim kəsotagimən.

⁴Məto piak min ne winik min, nəsotətulən e napinəpən e natimnat min əh, kən nuwamən rəha nian əh otəsölən itəmat nəkotaut tahmen e nuwamən rəha iakläh kit.

⁵İtəmat rafin nenəti nəhag-əhagən ne nenəti nianən. Kitat sənəmə netəmim rəha lapin ne napinəpən.

⁶Kən tol nəhlan, pəs kəsotolən tahmen e netəm min u kotapıl, məto pəs kotaiir kən moatehm wir rəhatat nətəligən ne rəhatat nolən min,

⁷məto-inu netəm min u koatapıl, ilat koatapıl lapin, kən netəm min u itəm koatapıs, ilat koatapıs lapin.

⁸Məto pəs kitat kotəramərə e rəhatat nolən min, məto-inu kitat netəm rəha nianən. Pəs kotaskəlīm nolən rəha nahatətəən ne nolkeikeən, inu tahmen e mopael kit itəm tatuwin-in iaen kit itəm tatətlosig-in manikiləhatəm, kən pəs kotələhəu-pən əskasik rəhatat nətəligən e Uhgin, inu tahmen e mopael kit itəm tatuwin-in hat əskasik kəmol e iaen itəm tatəfətain rəhn-kapətəm.

⁹Pəs kotol nəhlan məto-inu Uhgin təsitəpunən kitat məmə neməha ne nalpinən rəhan otuwa otat, məto təmitəpun kitat məmə in otosmegəh kitat e rəhatat İərəmərə İesu Kristo.

¹⁰Təmiş otat məmə kitat kotitun natigən kitəh kitat min okəmə koatəmegəh o kəmotimis.

¹¹Tol nəhlan, otələs-ipər rəhatəmat min nətəligən, kən otasitu etəmat min məmə natol nahatətəən rəhatəmat təskasik. Pahrien, inu nolən itəmat nəkotol u-roiu.

Namnun nəghatən rəha Pol

¹²Piak min ne winik min. Roiu ekəhalətapəh otəmat məmə nakotisiai-in netəm min u koatol wək əskasik itəmat min ilat, moatəramərə etəmat e İərəmərə, kən moatən kəm itəmat nian nəkoatol tərət.

¹³Otisiai-in wir ilat motolkeike ilat o wək itəm koatol, kən motatig e nəməlinuən itəmat min itəmat min.

¹⁴Kən piak min ne winik min, etəhalətapəh əskasik məmə nakotəghat əskasik kəm netəm min u kəsotolən nat kit. Otələs-ipər nətəligən rəha netəm nikilat tərou. Otasitu e netəm itəm rəhalat nəsanənən tikə. Otol rəhatəmat nətəligən təfəməh kəm netəmim rafin.

¹⁵Okəmə suah kit otol nat kit təsahmenən etəmat, kən itəmat nəsotalpinən nitai nərətən, məto nian rafin, itəmat nəkotəkəike motalkut məmə nəkoatol təwir kəm itəmat min ne netəmim pisin min.

¹⁶Nikitəmat otəkəike mətagien nian rafin;

¹⁷kən moatəghat kəm Uhgin e nəfakən nian rafin;

¹⁸kən nian rafin otən kəm Uhgin məmə nikitəmat tagien, nat əpnapin nəkotatig e nəwİRən, o nƏratən. Otol nat miləhal əh məto-inu iləhal nəwia Uhgin otəmat e Kristo Iesu.

¹⁹Sotahləmisən nigəm rəha Narmin Rəha Uhgin;

²⁰əsotənən məmə nəghatən itəm Uhgin təmos-ipinə kəm suah kit, in tol nat əpnapin əm lan.

²¹Otəplan wir kən motakil wir natimnat rafin, kən otaskəlim tiəkis nat itəm təwir,

²²kən motapəs natimnat rafin itəm tərat.

²³Pəs Uhgin pisin əm itəm in Uhgin rəha nəməlinuən, otol itəmat məmə rəhan pisin əm un itəmat. Pəs Uhgin otol məmə narmin rafin rəhatəmat, ne nəmegəhən rafin rəhatəmat, ne nipətitəmat rafin okotətuatip məmə nipəgnəmtin tikə otəkul-pən etəmat nian rəhatat İərəməərə Iesu Kristo tatuwa min.

²⁴Etəm tətəun-in itəmat, nian rafin tatol rəhan nəghatən, kən in otol natimnat min əh.

²⁵Piak min ne winik min. Otəfak otimat.

²⁶Otən təwir kəm itəmat min tahmen məmə itəmat kitieh əm e Kristo.

²⁷E nərgi İərəməərə, iatən əskasik kəm itəmat məmə nakotafin naoa u kəm piak min ne winik min rafin.

²⁸Pəs rəhatat İərəməərə Iesu Kristo otawte-in rəhan nəwİRən kəm itəmat.

2 Tesalonaeka

2 Tesalonaeka 1

Pol tēmən təwir kəm ilat

¹Io Pol, ne Saelas, ne Timoti, etəhalən təwir kəm itəmat u niməfak əpəh ikin Tesalonaeka. Itəmat nəmotuwa kitiəh o Uhgın rəhatat Tata, ne İərəmərə İesu Kristo.

²Pəs Uhgın Tata, ne İərəmərə İesu Kristo okuawte-in rəhalau nəwırən ne nəməlinuən kəm itəmat.

Nənwiwıən ne nəfakən rəha Pol

³Piak mın ne wınık mın. Nian rafin itiməhal ekəhaləto məmə ekəhaləkəike məhalən kəm Uhgın məmə nikitiməhal tagien otəmat. Kən tətuatıp əm məmə ekəhalol mihin nəhlan, məto-inu nian rafin nahatətəən rəhatəmat tatuwa matəskasık, kən nian rafin itəmat rafin noatolkeike pık itəmat mın, kən nolkeikeən ne nahatətəən əh katutəwiə matuər mətian mətian.

⁴Tol nəhlan, itiməhal etəhalən-iarəp kəm netəmim rəha niməfak rəha Uhgın e ikin mın rafin məmə nikitiməhal tagien pık otəmat. Itiməhal etəhalən nəhlan məto-inu nian rafin, itəmat nəkoatətul əskasık e nəmegəhən rəhatəmat e Kristo, kən itəmat motaskəlīm əskasık əh nahatətəən rəhatəmat, nat əpnarın netəm ihluə koatol tərət kəm itəmat, kən mol itəmat nakoatəto nahməən tərət.

⁵Natımnat mın əh tatəgətun məmə nolən rəha Uhgın o nakilən netəmim, in tətuatıp əm. Nakoatos nahməən o nərəmərəən rəha Uhgın, kən noan nətul əskasıkən e nəratən rəhatəmat, Uhgın otafin itəmat məmə nakotahmen-in nuwınən e nərəmərəən rəhan.

⁶Tol nəhlan məto-inu nolən rəha Uhgın in tətuatıp, kən in otol nalpınən kəm ilat u koatol nəratən kəm itəmat,

⁷kən o nian kit in otos-ıpınə namegən kəm itəmat itəm nakoatos nahməən, kitat mın itəmat. Natımnat mın əh okotuwa motol nıpahrienən nian Uhgın

otol-arəp Iərəməərə Iesu itəm otisi-pən e nego e neai. In otuwa e nigəm itəm tatuəp pik ilat rəhan nagelo min itəm kotəsanən.

⁸In otol nalpənən kəm itəm min u kotəruru Uhgın kən məsotətəu-pənən namnusən təwir rəha Iərəməərə Iesu rəhatat.

⁹Uhgın otol nalpənən kəm ilat e nəratən itəm namnun tikə. Kən otahtosig-in lilin ilat e niganəm̄ti Iərəməərə ne nəhag-əhagən asol rəha nəsanənən asol rəhan.

¹⁰Nat u otuwa e nian Iesu tatuwa min. In otos nənwıwıən o natımnat itəm təm̄ol kəm iəfak min rəhan, kən narmilat otıwıg ron, itəmat min itəmat min ilat məto-inu nəmotahatətə e rəhatıməhal nəghatən itəm eməhalən kəm itəmat.

¹¹O natımnat min u, nian rafın etəhaləfak otəmat məmə Uhgın otafin itəmat məmə nakotahmen-in rəhan naunən. Kən etəhaləfak məmə Uhgın otol wək e nəsanənən rəhan məmə, nətəligən wir itəm nakotolkeike məmə nakotətəu-pən, ne wək wir min itəm tətisi-pən e nahatətəən rəhatəmat, okotol noan.

¹²Itıməhal etəhaləfak nəhlan məmə katıləs-ipər nər̄gi Iərəməərə Iesu o natımnat itəm təm̄ol e nəmegəhən rəhatəmat, kən in otıləs-ipər itəmat. Natımnat min əh otuwa e nəwırən rəha Uhgın rəhatat ne Iərəməərə Iesu Kristo.

2 Tesalonaeka 2

Etəm Tatol Təfagə Rat Agın Nian Rafın

¹Piak min ne wınık min. Pəs ekəghat e nian rəhatat Iərəməərə Iesu Kristo otuwa min lan, kən Uhgın otuəfımın kitat min Kristo lan.

²Etəhalətapəh məmə nıkitəmat təsəht pikən, kən məsotautən e nəghatən eıuə kit itəm katən məmə itıməhal eməhalən. Katən məmə in nəghatən itəm tətisi-pən o Uhgın, o namnusən kit, o naoa kit itəm tatən məmə Nian Rəha Iərəməərə tınuwa rəkis.

³Sotolən etəmim kit teıuə-in itəmat e nəghatən kit, məto-inu nian əh otəsuwamən mətoarus nian itəm netəmim okotuwa tıkimır min rəha Uhgın

motol naluaginən ilat min, kən Uhgın otol-arəp Etəm Tatol Təfagə Rat Agın Nian Rafin, itəm Uhgın otərəkin pahrien tətəu-pən əm rəhan nalpəkauən aupən rəkis.

⁴In otuwa tikimir e natimnat rafin itəm netəmim koatəfak ron, ne natimnat rafin itəm koatən məmə rəhalat uhgın min. In əm un otıləs-ipər atip in ilis e natimnat min rafin. Kən in otuwın məpələh e Nimə Rəha Uhgın, kən mən məmə in Uhgın.

⁵?Tahro? ?Nəmotaluin məmə nian emətətig kitat min itəmat, emətən-ipinə natimnat min u?

⁶Kən ninotitun nat naka itəm tətəhtosig-in etəm əh-roiu məmə Uhgın otol-arəp in e nian ətuatip rəhan.

⁷Nəsanənən anion rəha Təfagə Rat Agın tinatol wək rəkis. Məto etəm itəm tətəhtosig-in nəsanənən əh, in otol nəhlan mətoarus-pən Uhgın otos-irəkis.

⁸Kən Uhgın otol-arəp Etəm Tatol Təfagə Rat Agın Nian Rafin, itəm İərəmərə İesu otərəkin in e nimətag e nohlin, kən mərəkin agın e nəhag-əhagən rəha nuwamən rəhan.

⁹Etəm Tatol Təfagə Rat Agın Nian Rafin otuwa mol wək e nəsanənən rəha Setan, kən in otol nat pispis eiueiuə min, ne nəmtətin eiueiuə min, ne nat eiueiuə min itəm otol narmi netəmim tatiwig,

¹⁰ne nəratən pisin pisin min rafin itəm koteiuə-in netəm min u itəm kotaliwək e suatip tatuwın e nalpınən. Uhgın otərəkin ilat məto-inu kəmotən əskasik məmə kəsotolkeikeən nıpahrienən itəm titun nosmegəhən ilat.

¹¹O nətəligən əh, Uhgın tahl-ipən kəm ilat nat kit təsanən itəm tatol nətəligən rəhalat tatəluə. Tahl-ipən nat əh məmə okotən nıpahrienən e neiueiuəən.

¹²Kən tahl-ipən məmə Uhgın otən-iarəp nalpınən rəha netəmim rafin itəm kəsotənən nıpahrienən e nıpahrienən, məto koatəto təwir agın nian koatol nolən min itəm tərat.

İəfak min okotəkəike motətul əskasik

¹³Piak min ne winik min itəm Iərəmərə tolkeike. Nian rafin ekəhaləkəike məhalən tagkiu kəm Uhgın otəmat, məto-inu e nətuounən Uhgın təmitəpun itəmat məmə otosmegəh itəmat. In otol nəhlan e wək rəha Narmin Rəhan itəm tatələhəu kalin itəmat məmə rəhan, kən otosmegəh itəmat e nahatətəən rəhatəmat e nīpahrienən.

¹⁴Uhgın təmaun-in itəmat o natimnat min əh e namnusən təwir itəm etəhalən-iarəp, məmə kitat kotuwa kitəh kitat rəhatat Iərəmərə Iesu Kristo e rəhan nisaiiən, ne nəsanənən, ne nəhag-əhagən.

¹⁵Tol nəhlan, piak min ne winik min, otətul əskasik kən motaskəlim nəgətunən itəm eməhalos-ipinə kəm itəmat e nəghatən itəm təmiet e nohlitiməhal, o nəghatən itəm nəmotafin e naoa eməhalahl-ipinə.

¹⁶Uhgın rəhatat Tata təmolkeike kitat, kən e nəwīrən rəhan təmiləs-ipər nikitat namnun tikə, kən təmol məmə kitat okotələhəu-pən əskasik rəhatat nətəligən lan. Kən pəs rəhatat Iərəmərə Iesu Kristo atip ilau Uhgın Tata,

¹⁷okialəs-ipər nikitəmat kən mioal itəmat nakotəsanən e nolən wir min rafin ne nəghatən wir min rafin.

2 Tesalonaeka 3

Pol təmətapəh o nəfakən

¹Piak min ne winik min. Inu namnun nəghatən. Otəfak otiməhal məmə nəghatən rəha Iərəmərə otuwīn uəhai əm ikin min rafin, kən netəmim okotisiai-in motətəu-pən, tahmen əm etəmat itəm nəmotisiai-in motətəu-pən.

²Kən otəfak otiməhal məmə Uhgın otiləs-irəkis itiməhal o netəm rat, məto-inu sənəmə netəmim rafin kotahatətə e Iərəmərə.

³Məto Iərəmərə, nian rafin tatol rəhan nəghatən, kən in otol itəmat nakotəsanən, kən matehm wir itəmat o Setan məmə otəsərəkinən itəmat.

⁴Kən kitat kotitun wir e Iərəmərə məmə roiu itəmat nəkoatol nat naka itəm eməhalən, kən nəkoatol əm nulan moatuwin moatuwin.

⁵Pæs Uhgín otit nikitəmat e suatip rəha nolkeikeən rəha Uhgín ne nolən rəha Kristo o nətul əskasikən nian nəratən otuwa.

Əsolən nolən rəha nəlpahən

⁶Piak min ne winik min. E nərgi İərəmərə İesu Kristo, etəhalən əskasik kəm itəmat məmə nakotətul isəu o piatat min itəm koatol nolən rəha nəlpahən, kən məsotatigən motətəu-pən nəgətunən itəm nəmotos otiməhal.

⁷Itəmat atip nəkotitun məmə nəkotəkəike motətəu-pən nolən itəm eməhalol. Nian emətəhlatig kitat min itəmat, eməsəhaləlpahən,

⁸kən eməhalos-nəmtin nagwənən o netənim, eməsəhalos əpnəpinən. Məto eməhalol wək pik, lapin ne lenian, eməhalol wək e nelmitiməhal məmə esəhalos-ipinən wək əskasik otəmat o nehmən itiməhal.

⁹Tətuatip otiməhal məmə ekəhalətapəh otəmat məmə nakoatehm itiməhal, məto itiməhal eməsəhalolən nəhlan məto-inu itiməhal ekəhalolkeike məmə ekəhaləgətun itəmat e nolən itəm tətuatip məmə nakotətəu-pən.

¹⁰Kən nian emətəhlatig əh kitat min itəmat, eməhalos-ipinə lou u məmə, “Okəmə etənim tapəs wək, okol kəsos-ipənən nagwənən kəm in.”

¹¹Ekəhalən nəhlan məto-inu eməhaləto məmə netənim neen un itəmat min ilat koatəlpah, ilat kəsotolən wək kit, ilat iəghat tipik min, məto kəsotolən wək.

¹²E nərgi İərəmərə İesu Kristo, ekəhalən kən məhaluəh niki netənim itəm kotal nəhlan məmə okotəkəike motapəs negəsən motatig mətig əm, kən motol wək o nətouən nagwənən nigilat.

¹³Kən itəmat piak min ne winik min, əsotərouən o nolən nat itəm tətuatip.

¹⁴Okəmə suah kit təsətəu-pənən rəhatiməhal nəghatən e naoa u, kən nəkotəkəike motol məmə netənim okotitun məmə in pah. Kən məsotuwinən iuəhkir ron məmə nəkotol in taulis o nolən rəhan.

¹⁵Məto nəsotəplanən in məmə rəhatəmat kit tikimir, məto in piatəmat kit, kən təwir məmə nakotəhgaiir lan.

Namnun nəghatən

¹⁶Kən pəs İərəmərə rəha nəməlinuən, in pisin əm otos-ipinə nəməlinuən nian rafin e nolən min rafin. Pəs İərəmərə tətətig itəmat min itəmat rafin.

¹⁷Io Pol, iatos pen matəte əm e nelmək nəghatən u rəha nənən təwir kəm itəmat. Kən e naoa min rafin ekəte nəhlan məmə nəkotitun in naoa rəhak. Inu nolən rəha nəteən rəhak.

¹⁸Pəs rəhatat İərəmərə İesu Kristo otawte-in rəhan nəwirən kəm itəmat rafin.

1 Timoti

1 Timoti 1

Pol tēmən təwir kəm Timoti

¹Timoti. Io Pol, iakatən təwir kəm ik. Kən io aposol kit rəha Kristo Iesu mətō-inu Uhgīn u itəm təmosmegəh kitat, ne Kristo Iesu itəm in nīpəti nahatətəən rəhatat məmə o nian kit Uhgīn otosmegəh kitat, ilau əm kəmuahləpis io məmə ekol wək u.

²Rəhalau nahatətəən e Kristo tahmen ahmen əm, kən tol nəhlan in tahmen-pən əm məmə ik nətik pahrien. Pəs Uhgīn Tata rəhatat ilau Kristo Iesu, ləramərə rəhatat, okuawte-in rəhalau nəwīrən kəm ik, kən muasəkitun ik, kən muələhəu nəməlinuən tətətig ron ik.

Pol təmolkeike məmə Timoti otahtosig-in iəgətun eiueiuə mīn

³Aupən ikin e nian ematuwin Masetonia, kən io emən kəm ik məmə io ekolkeike pīk məmə onakətətig Efesas, kən rəhak nətəligən tatol əm min-nulan. Netəmim neen əh-ikin kotətig itəm ilat koatəgətun netəmim e nəghatən mīn itəm kotərat. Mətō ik onakahtosig-in ilat məmə okəsotolən nolən əh.

⁴Ilat okotəkəike motapəs nolən mīn əh itəm koatən nəghatən eiueiuə mīn itəm koatəghat-in noanol mīn aupən ikin. Nəghatən mīn əh in tatiuw-pa əm timəht, mətō in to təsasituən e netəmim məmə ilat okotitun nalpəkəuən rəha Uhgīn inu okotahatətə əm lan.

⁵Mətō noa nəghatən u məmə nolkeikeən tatər e nikitəmat. Nolkeikeən tatər e niki suah kit nian nīkin təwir təfagə rat tikə lan, kən in titun məmə nolən rat kit təsətigən lan, kən tətahatətə pahrien əm e Iesu.

⁶Netəmim neen kinotapəs nolən ətuatip u, kən ilat kinotəruru rəkis rəhalat suatip, mətō koatətəu-pən nəghatən alməl mīn əh.

⁷Ilat kotalkeike məmə netəmim koatən məmə ilat kotenatig wir e Lou rəha Uhgīn, mətō ilat kəsotitun wirən nīpəti nəghatən itəm koatən, ne nəghatən mīn itəm koatən pīk ilat.

⁸Kitat kotitun wir Lou rəha Uhgın məmə təwir okəmə kitat kotitun wir wək rəha Lou kən moatətəu-pən e nolən itəm Uhgın tolkeike.

⁹Nian rafin kitat okotəkəike motitun məmə Lou təməsuwamən o netəm kotətuatip, məto Lou in rəha netəm rat ne netəm koatəht Lou: netəm kəsotisiai-inən Uhgın ne nol təfagə rat; netəm rəhalat nolən teko-eko kotəuhlin mentalat o nəfakən; netəm kəmotohamnu rəhalat tata ne mama; netəm koatohamnu itəm;

¹⁰nəman ne nıpitan itəm kinotol marit rəkis, məto koatan ərnapın; nəman koatit atip ilat min kən nıpitan koatit atip ilat min; netəmim katosalim-in iolwək min məmə okotos məni elat; ne netəm koateiueiuə, ne netəm koateiueiuə e nian koatəghat e kot; ne netəm koatol nolən pisin neen min. Əwəh, in nıpahrienən məmə Lou in rəha netəmim itəm koatol natimnat rafin əh itəm tatərəkın nəghatən min itəm kotətuatip.

¹¹Nəghatən ətuatip min u, koatisi-pən e namnusən təwir moepən rəha Uhgın, Uhgın etəm təwir tətuatip. Namnusən u in təmos-ipa kəm io məmə ekən-iarəp.

Pol nikin təmagien o Kristo

¹²Io ekatən tagkiu kəm Kristo Iesu, İərəmərə rəhatat, itəm tatos-ipa nəsanənən kəm io o wək u, məto-inu in tatehm io məmə iakaskəlīm wir wək rəhan kən məsapəsən, kən in təməhləu-pa wək u mətəhləpis io məmə ekol.

¹³Aupən ematəghat rat e nərgin, kən ematoh nəfak matol tərət kəm Iesu. Nat ərnapın io ematol pəp min-nulan məto in təmasəkıtun io məto-inu io eməsənən əh nıpahrienən lan, kən eməruru məmə nat naka itəm io ematol in tərət.

¹⁴Məto nolkeikeən rəha İərəmərə rəhatat in iahgin iahgin pık ron io, maprəkis-in nolən rat min rəhak. Kən tatətəlmin nıkik o nahatətən lan ne nolkeikeən itəm tətisi-pən o Kristo Iesu.

¹⁵Inu nəghatən tatən pahrien, kən kitat kotəkəike motən nīpahrienən lan: Kristo Iesu təmuwa e nətueintən məmə otosmegəh netəm kotərat, kən io etəm rat agin taprəkis-in rafin ilat.

¹⁶Məto Uhgīn təmasəkītun io, etəm rat agin, tahmen e nəmtətin kit itəm tatəgətun məmə nətəligən rəhan kaifəməh, namnun tikə, tatuwin o netəm kotərat, pəs netəmim neen kotehm kən motuarisig-in suatip kitiəh əm məmə okotahatətə e Iesu kən in tosmegəh ilat mos-ipən nəmegəhən lilin kəm ilat.

¹⁷!Kotənwiwi Uhgīn! Pəs kotisiai-in Uhgīn rəhatat. In Iərəməərə lilin; in təsimisən; kəsehmən in; kən in pisin əm in Uhgīn. Pəs koatīləs-ipər nərgin tatuwin matuwin matuwin namnun tikə. Əwəh.

¹⁸Kən inəh nətik Timoti. Inu rəhak nəghatən tahmen-pən e nəghatən rəha ien min itəm kəmoatən kəm ik aupən. Ik onakəkəike maskəlīm nəghatən min əh pəs tol rəham nətəligən təskasik, kən ik onakəluagin wir e nəluaginən rəha nahatətəən.

¹⁹Askəlīm rəham nahatətəən təskasik, kən ol nolən itəm ik nəkitun məmə in tətuatip e niganəmti Uhgīn. Məto netəmim neen ilat koatol nolən neen itəm ilat kotitun məmə tərat, kən kəmotərəkin rəkis rəhalat nahatətəən, tahmen e suah kit itəm tatīləs nego matər e nīmas tətəhap-əhap agin matərat.

²⁰Suah mil u Haemeneus ne Aleksanta ilau kəmian motol kitiəh əm ilat netəm min u. Io enegəhan-in rəkis ilau məmə katuəməhl-pən e nelmi Setan məmə okiatun məmə okəsuan ratən Uhgīn.

1 Timoti 2

Nolən rəha nəfakən

¹Nat aupən itəm ekolkeike məmə ekən, in tol nulan. Io iatən əskasik kəm itəmat məmə itəmat nəkotəkəike moatəfak kəm Uhgīn o netəmim rafin, kən motən kəm Uhgīn məmə nikitimat tətəgien o natimnat itəm in təmol ilat.

²Kən e nian rafin itəmat onəkotəkəike moatəfak o netəm koatərəməərə ne netəm-iasol min rəhatat məmə kitat rafin okotatig e nəməlinuən kən motatig mətig, pəs kitat kotisiai-in wir Uhgīn kən rəhatat naliwəkən in tətuatip.

³Nolən rəha nəfakən min u in təwir pik, kən in otol Uhgın İosmegəh rəhatat nikin otagien lan.

⁴Uhgın u, in tolkeike məmə otosmegəh netəmim rafın, kən molkeike məmə ilat okotitun motən nıpahrienən e nəghatən pahrien rəhan.

⁵Otəfak o netəmim rafın məmə ilat okotahatətə e Uhgın məto-inu Uhgın kitiəh əm tətətig, kən suah kitiəh əm tatətul in suatıp o nosən netəmim muwin kotal kitiəh ilat Uhgın, etəmim əh Kristo İesu.

⁶E nian ətuatıp, in əm təmos-ıpa rəhan nəmegəhən o nətouən suatıp rəha netəmim rafın məmə otikis ilat e təfagə rat rəhalat. Kən inu tatəgətun məmə Uhgın tolkeike məmə otosmegəh netəmim rafın.

⁷Kən o nəghatən əh, Uhgın təmiləs-ıpər io məmə io aposol kit rəhan o nən-ıarəpən nammusən təwir u kəm İaihlua min, netəmim itəm kəsənən məmə netəm İsrəl, kən təmiləs-ıpər io məmə iəgətun kit rəha nahatətəən pahrien. İo iatən pahrien, eseiueiuəən.

⁸Kən ikin min rafın, iakolkeike məmə nəman okotəghat kəm Uhgın e nəfakən. Kən nian koatıləs-ıpər nelmilat məmə okotəfak kəm Uhgın, iakolkeike məmə nəmegəhən rəhalat otətuatıp, kən nıkilat təsahmən, kən məsotəhaiən ilat min.

⁹Kən io iakolkeike məmə nıpitan u iəfak min okotuwin e rəhalat napən itəm tətuatıp kən matəfətain wir ilat, məsotıuwən nətəligən rəha nəman, kən məsotolən məmə netəmim okotehm o nausitən. Kən ilat kəsotolən noanulat məmə okotausit ron. Kən ilat kəsotuwın-inən natimnat min o niuwən nətəligən rəha netəmim, iatən natimnat min tahmen-pən e napən min itəm nəmtilat tiəkis, o nat kit kəmol e iaen u kol tatıpıt-ıpıt, o nat kit kəmol e perel inu kəpiel itəm nəmtin tiəkis.

¹⁰Məto iakolkeike məmə nıpitan u iəfak min, rəhalat nətəligən otəsuwınən o malə-malə rəha nıpətılət o nehmən, məto okotol malə-malə e nəmegəhən rəhalat, inəh ilat okotol nolən min itəm otasitu e netəmim, nolən min itəm tətuatıp o nıpitan itəm koatən məmə ilat koatəfak kəm Uhgın.

¹¹Nian nəman okoatəgətun e niməfak, nīpitan okotəkəike moatətəlig-in məsotagətən, kən motəkəike motos-iəhau ilat, kən motisiai-in iəgətun min, kən motətəu-pən iəgətun min əh itəm koatəgətun.

¹²Io esegəhan-inən nīpitan məmə okotəgətun kən motərəmə e nəman. Ilat okotəkəike kəsəghatən,

¹³məto-inu aupən ikin, Uhgīn təmaupən mol Atam, uarisig ikin təpanol If.

¹⁴Kən sənəmə Atam u Setan təmeiuə-in aupən kən tol nəwian, məto If u təmol nəwia Setan kən mətghəl lou rəha Uhgīn.

¹⁵Məto Uhgīn otosmegəh nīpitan nian ilat koatol ətuatip wək rəhalat, inu neməkən ne nehm wirən nisualkələh. In otosmegəh ilat okəmə koataskəlim əskasik nolən rəha nahatətən, ne nolən rəha nolkeikeən netəmim, ne nolən rəha nəmegəhən itəm tətuatip.

1 Timoti 3

Netəm-iasol min rəha niməfak

¹Inu nəghatən tatən pahrien məmə, “Okəmə etəmim kit tolkeike məmə in otuwa etəm-iasol kit rəha niməfak, kən in təmolkeike wək kit itəm təwir.”

²Kən etəm-iasol tol nəhlan: okəkəike kəsehm-pənən nolən rat kit lan; in rəhan pətan kitiəh əm; tatehm wir nəmegəhən rəhan nian rafin; tatol natimnat e nitunən; katisiai-in; tatehm wir netəmim itəm koatuwin iman ikin; in iəgətun wir kit;

³sənəmə etəmim kit rəha napisən o nəmouən; məto in etəm mətig; sənəmə in etəmim rəhan nəghatən titatiperəh pik tahmen e kaluəluə; nīkin təsuwin pikən e mənī;

⁴in otəkəike matərəmə e wir e rəhan min, kən mol məmə rəhan nisualkələh koatol nəwian moatisiai-in wir.

⁵Məto okəmə in təruru nəməmə wirən o rəhan min, kən in otaroh nəhlan məməmə o niməfak rəha Uhgīn?

⁶Etəm tətahatətə wi e Iesu, in tēsahmenən məmə otos wək u mətə in tatos-
ipər pīk in, kən Uhgīn tol nalpīnən kəm in tol məmə təmōl mihīn e Setan u
iausit pīk.

⁷Kən etəm-iasol, rəhan nolən otəkəike məwir mətuatip məmə netəm
kəsotəfakən okotən məmə in etəm təwir. Okəmə təsōl mihīnən, mətə
noanīkulu rəha Setan toh pīkən, kən nərgīn in otərat.

Netəm kotasitu e niməfak

⁸E nolən kitīəh əm, dikōn mīn, rəhalat nəmegəhən otəkəike mətuatip wīr, kən
moatən əm nīpahrienən e nian rafīn. Netəm koatapis o kotolkeike pīk mənī,
kəsotahmenən o naskəlīmən wək u.

⁹Ilat netəmim itəm kotitun məmə nolən rat kit təsātīgən elat, kən
moataskəlīm əskasīk nəghatən pahrien mīn rəha Iesu Kristo itəm Uhgīn təmōl
əp.

¹⁰Netəm kotol nəhlan, niməfak otəkəike makil wīr rəhalat nəmegəhən, okəmə
kəseh-m-pənən nat kit tərat elat, kən ilat okotos wək rəha dikōn.

¹¹Məto nīpitan rəha netəm koatasitu e wək rəha niməfak, ilat mīn okotəkəike
motol rəhalat nəmegəhən tətuatip wīr. Təsəwīrən məmə ilat nīpitan iən
nikalītəm, o nīpitan rəha nāpīsən, məto ilat nīpitan itəm netəmim koatahatətə
elat e nian rafīn.

¹²Suah kit itəm tatos wək rəha dikōn, in otəkəike mos rəhan pətan kitīəh əm,
kən in otəkəike matərəmərə wīr e rəhan mīn nīsualkələh ne rəhan latuənu.

¹³Netəmim itəm koatol-wīr wək u rəha dikōn, nərgīlat in otəwīr lan, kən
rəhalat nətəlīgən in otəskasīk pīk o naskəlīmən nahatətəən rəhalat e Kristo
Iesu.

Nəukətin nahatətəən rəhatat

¹⁴Roiu əh, nian iakatətə naoa u kəm ik, nīkīk tatəht məmə, otəsuwəhən kən
ekīmənə mehm ik.

¹⁵Məto okəmə esimnə uəhaiən, kən naoa u in otən natimnat rafin itəm kitat nenəti Uhgın okotətəu-pən. Inu kitat u nəfak, kən Uhgın rəhatat tatəmegəh mətatig namnun tikə. Kitat netəm nəfak u kotaskəlīm nəghatən pahrien, kən matehm wir.

¹⁶Nipahrienən, nəghatən pahrien rəha Iesu Kristo itəm Uhgın təmol əp, in nat pispis itəm in iahgin, kən tol nəhlan: Kristo in təmuwa etəmim kən netəmim kəmotəplan. Kən Narmin Rəha Uhgın tatəgətun wir məmə Iesu tətuatip wir. Kən nagelo min kəmotehm in. Kən katən-iarəp namnusən təwir rəhan kəm netəmim ikin pisin pisin min. Kən netəmim rəha nətueintən u kotahatətə lan. Kən Uhgın təmos muwin ilis e neai mətuatig ilau min.

1 Timoti 4

Iəgətun eiueiuə min

¹Narmin Rəha Uhgın tatən-iarəp wir məmə e nian min uarisig Iesu otəpanuwa lan, netəmim tepət okotapəs nətəu-pənən nolən pahrien rəha nahatətəən e Uhgın. Ilat okotətəu-pən narmin eiueiuə min kən motətəu-pən nəgətunən rəha iərmis min.

²Nəgətunən min əh koatisi-pən o iəgətun min itəm koatən məmə rəhalat nəghatən in nipahrienən, məto ilat koateiueiuə, kən məsotolən nat itəm koatən. Netəm min əh, nətəligən rəhalat teko-eko agin, kən kinotəruru nakilən məmə nəghatən pahrien hiə kən nəghatən eiueiuə hiə.

³Ilat koatəgətun netəmim moatən məmə okəsotolən marit, kən moatəgətun ilat məmə okəsotunən nagwənən min neen. Məto Uhgın təmol nagwənən min əh məmə okotun ilat. Kən kitat u koatəfak kotitun nipahrienən, kotitun nosən, kəfak kənwiwi Uhgın ron, kən motun,

⁴məto-inu natimnat rafin itəm Uhgın təmol ilat kotəwir əm. Nat kit tikə məmə okəsotunən. Kitat kotitun nunən natimnat rafin okəmə kitat koatəfak moatənwiwi Uhgın ron,

⁵məto-inu Naoa Rəha Uhgın tatən məmə ilat kotəwir, kən kitat koatəfak ron. Kən roiu, nagwənən min əh kotəwir əm.

Iolwæk tæwir ræha Kristo Iesu

⁶Okæmæ natæn-iaræp næghatæn u kæm piatat min ne winitat min, kæn ik iolwæk tæwir kit ræha Kristo Iesu. Kæn tatægætun mæmæ ik etæmim kit itæm natun næghatæn wir min ræha nahatætæn ne nægætunæn ætuatip matæmegæh lan, kæn ræham næmegæhæn tatætæu-pæn næghatæn min æh rafin.

⁷Apæs, æsætælig-inæn næghatæn eiueiuæ min itæm nætæligæn ræha Uhgîn tikæ lan, næghatæn min u tahmen namsu æpnaripin min itæm nipætîn tikæ. Mæto ægætun atip ræham næmegæhæn mæmæ tatætæu-pæn Naoa Ræha Uhgîn.

⁸Nolæn ræha nehm wiræn nipætîm mæmæ in otæsanæn, in tæwir o natimnat min neen, mæto okæmæ natægætun atip ræham næmegæhæn e nolæn ræha Uhgîn, kæn in tæwir mæmæ otasitu e natimnat rafin e næmegæhæn ræha nætueintæn u, ne ræha næmegæhæn lilin.

⁹Inu næghatæn tatæn pahrien, kæn kitat kotækæike motæn nipahrienæn lan.

¹⁰Kænu kitat koatol pik wæk o iægætun atipæn ræhatat næmegæhæn e nolæn æh, mæto-inu kinotahatætæ rækis e Uhgîn u tatæmegæh kæn mætætig itulin, kæn in Iosmegæh ræha netæmim rafin, mæto in tatosmegæh æm netæm min u itæm koatahatætæ lan.

¹¹Ægætun natimnat min æh kæm netæmim, kæn mæn-ipæn kæm ilat mæmæ okotækæike moatætæu-pæn.

¹²Pæs netæmim okæsotehm æhauæn ik mæto-inu ik etæm aluæ æm kit. Mæto ol ræham næmegæhæn tætuatip wir mæmæ netæmim okotæplan mæmæ ik etæm mætæ, kæn ilat kotitun nætæu-pænæn ik e næghatæn min, ne naliwækæn, ne nolkeikeæn, ne nahatætæn, ne nolæn ætuatip.

¹³Ol natimnat min æh, kæn nat kisil min, ol ilæhal u mæmæ ræham wæk okæhalætul aupæn e ræham næmegæhæn mætoarus ekimnæ: afin Naoa Ræha Uhgîn kæm netæmim, kæn mæn-iaræp Naoa Ræha Uhgîn, kæn mægætun Naoa Ræha Uhgîn.

¹⁴Timoti, Uhgîn tæmos-ipinæ kæm ik ræhan nasituæn o nolæn wæk ræhan nian elta min ræha nimæfak kæmotælæhæu-pæn nelmilat lam, kæn ien min neen

rəhalat kəmotən-iarəp nəghatən itəm Uhgın təmən lam. Əsapəsən nasituən əh.

¹⁵Ik onakəkəike matol wək min u, kən rəham nətəligən otəkəike mətatig əskasik e natimnat min u pəs netəmim kotitun nehmən məmə rəham nəmegəhən ne rəham wək tatəwiə wir.

¹⁶Atehm wir nolən min e nəmegəhən rəham, kən ol rəham nəgətunən məmə in tatətuatip e nian rafin. Onakəkəike mətalkut əskasik məmə onəkol natimnat min əh, məto-inu okəmə nakol, kən onakosmegəh itəmat netəm koatətəlig-in ik.

1 Timoti 5

Nolən rəha nisaiiən o nəghatən kəm netəmim

¹Səghat əskasikən e iaguıhl min, məto əghat kəm ilat e nisaiiən məmə nakiuw rəhalat nətəligən, tahmen əm mə ilat rəham tata ətuatip min. E nolən kitiəh min əm, ol tahmen əm kəm netəm aluə tahmen məmə ilat piəm ətuatip min.

²Əghat mətig e nisaiiən kəm nipiətaguıhl min tahmen məmə rəham mama ətuatip min. Rəham nəghatən ne nolən min kəm nipiətan itəm koatətəm aluə otəkəike mətuatip agin, tahmen məmə ilat winim min.

Nolən rəha nehm wirən nəutahlimis min

³Niməfak otəkəike matehm wir nəutahlimis min itəm rəhan min kotikə agin o nehmən ilat.

⁴Məto nəutahlimis kit u nenətin min əh-ikin o mipin min əh-ikin, ilat okotəkəike motitun paupən məmə wək rəha netəm koatəfak, ilat okotaupən motehm wir atip rəhalat min. Nolən u tahmen əm məmə koatətuə rəhalat kaon kəm rəhalat mama ne tata ne pipi min, kən inəh Uhgın nikin tagien ron.

⁵Məto nəutahlimis itəm tətətig in piəsin agin əm, etəmim tikə o nehmən in, in tatələhəu-pən əskasik rəhan nətəligən tətətig e Uhgın. In əh e nian rafin, lapin ne e nərauiəgən, in tatəfak kəm Uhgın məmə otətasitu lan.

⁶Məto nəutahlimis u tatətəlig-in pik natimnat rəha nīpətīn o nətoən təwir lan, in tatəmegəh, məto e narmin tahmen məmə in tinimis rəkis.

⁷Ik onakəkəike mən-ipən nəghatən min əh kəm niməfak məmə ilat okotəkəike motol pəs netəmim kəsotən ratən ilat.

⁸Suah kit otəkəike mehm wir rəhan min, kən maupən mehm wir rəhan ətuatip min. Məto okəmə in təsələn, tatəgətun məmə təməuhlin məntaan e nolən rəha nəfakən, in tərət maprəkis-in etəm təsəfakən.

⁹Okəmə nakəte-pən nərgi nəutahlimis kit e naoa rəha nasituən məmə niməfak otasitu elat, rəhan nup in otəkəike mos sikiste, kən rəhan iərman kitīəh əm aupən.

¹⁰Kən in pətaguīhl kit itəm netəmim koatīsiāi-in o rəhan nolən wir ne nasituən min itəm in tatol, tahmen məmə in tatehm wir rəhan nisualkələh; kən nian iāpīspīs min okotuwa iman ikin, tatol təwir kəm ilat; kən matos-iəhau atip in mətasitu e netəm koatəfak; kən mətasitu e ian-rat min; kən rəhan nətəligən təskasik məmə otol wək min itəm təwir.

¹¹Məto sətə-pənən nərgi nəutahlimis min itəm kəsotipitaguīhlən əh e naoa rəha nasituən, məto-inu uārisig ikin okəmə nətəligən rəha nol minən marit tinuwa məskasik e nīkilat mināprəkis-in nətəligən rəhalat e Kristo, kən ilat kotəmə okotol min marit.

¹²Kən Uhgīn in otakil mol nalpīnən kəm ilat məto-inu kəmotətəgəhl rəhalat noanawīl itəm kəmotol kəm in aupən.

¹³Kən nat tərət kit min, məta ilat koatəpou kən motos nolən rəha nuwīnən e nimə min rafin moatən nəghatən itəm nīpətīn tikə. Uārisig ilat kotuwa motərat pik o nosən musmus e nəghatən rəha suah pīsīn o nosən muwīn məhləmisin nīməme mənig lan, kən ilat kotolkeike məmə okotən pik nəghatən rəha netəm pīsīn, kən ilat koatən nəghatən min neen itəm təsahmenən məmə okotən.

¹⁴Kən io ekatən kəm nəutahlimis min itəm kəsotipitaguīhlən məmə təwir ilat okotol min marit, kən motiləs nisualkələh, kən okotehm wir rəhalat min. Kən

okəmə kotol nəhlan, kən məsotos-ipənən kuhal kit kəm rəhatat tikimir min məmə okotən rat kitat.

¹⁵Məto nəutahlimis neen kinotapəs rəkis suatip ətuatip kən moatətəu-pən Setan.

¹⁶Nipitan u iəfak min okotəkəike moatehm wir nəutahlimis min rəhalat, məsotəhlman-pənən ilat kəm niməfak məmə otatehm ilat. Kən niməfak in otatehm əm nəutahlimis min u rəhalat netəmim kotikə agin məmə okoatehm ilat.

Wək rəha netəm-iasol rəha niməfak

¹⁷Elta min itəm koatərəməərə wir e wək rəha niməfak, niməfak otəkəike misiai-in ilat, kən matətou ilat. Kən iəgətun min ne netəm koatən-iarəp Naoa Rəha Uhgın, ilat koatətul aupən məmə okisiai-in ilat.

¹⁸Məto-inu Naoa Rəha Uhgın tatən məmə, “Nian kau kit tatol wək kit rəham, kən okəmə tolkeike məmə otun kit, sahtosig-inən.” Kən tatən min məmə, “Nian suah kit tatol wək, məto okəike kətou in lan.”

¹⁹Əsətəlig-inən nəghatən rəha etəmim kitiəh əm itəm tatən məmə elta kit rəha niməfak təmol nolən rat, məto okəmə etəmim kəiu o kisil katəhalən, kən nakətəlig-in rəhaləhal nəghatən.

²⁰Kən okəmə etəm-iasol kit rəha niməfak tatol nat kit tərət, kən natəghat əskasik kəm in e niganəmti netəmim rafın rəha niməfak, kən tol nəhlan netəmim okotəgin o nolən nat tərət min.

²¹E niganəmti Uhgın, ne Iesu, ne nagelo min itəm Uhgın təmitəpun rəkis ilat, io ekatən əskasik kəm ik məmə ik onakəkəike mətəu-pən nəghatən rəhak e nolən itəm in tətuatip. Ik onakəsolən nolən pisin kəm suah kit, kən matig mol pisin min kəm suah kit. Məto onəköl tahmen ahmen əm kəm ilat rafın.

²²Əsələs-ipər ueiuəhaiən etəmim məmə in otos wək rəha niməfak, inu nakoatələhəu-pən nelmitəmat moatəfak lan. Məto-inu okəmə in suah kit itəm rəhan əh-ikin nolən rat, kən rəhan nolən rat otatig lam, tahmen məmə ik min

nəmos rəhan nolən rat. Məto ol əm rəham nəmegəhən tatuwiwi matətuatip e nian rafin.

23-25 Netənim neen kitat kotitun məmə ilat nol təfagə rat, kən kotitun məmə Uhgın otol nalpinən kəm ilat. Məto neen rəhalat təfagə rat tatəhluaig əh-roiu, məto uarisig okəpanotəplan. Kən tahmen ahmen əm, nian tərət wək itəm təwir min, kitat kotitun əm. Məto neen əh-ikin itəm koatəhluaig əh-roiu, məto okəpanotəplan ilat. Təsəwirən məmə onakənim əm nəhau məto-inu, nian neen ik nakatimis. Məto təwir məmə onakənim wain noan məsin pəs in tasitu e nərpəm.

1 Timoti 6

Nolən ətuatip o slef min

¹Slef min itəm koatəfak okotəkəike motisiai-in netəm-iasol min rəhalat. Nolən əh in otahtosig-in naihlua, məmə kəsotən ratən nərgi Uhgın, kən məsotən ratən nəgətunən rəhatat.

²Məto slef min itəm rəhalat etəm-iasol in iəfak, ilat okəsotolən nolən əh u kotəmə, “Ei. Etəm-iasol əh in piatat əm kit,” kən ilat məsotisiai-in wirən. Məto ilat okotəkəike motol wək pik təhmīn min e nikilat pahrien, məto-inu rəhalat etəm-iasol in iəfak kit itəm koatolkeike in.

Nəgətunən neiueiuəən min ne natimnat wir min pahrien

Natimnat min u, ik onakəkəike matəgətun netənim lan. Kən e nian rafin ik onakəkəike matəghat əskasik kəm ilat o nətəu-pənən.

³Məto netənim neen koatəgətun nəghatən neen itəm tol pisin e nəghatən əh rəhak, kən ilat koatən məmə nəgətunən rəha İərəmərə rəhatat İesu Kristo, in neiueiuəən, kən koatən məmə nəgətunən rəha nolən rəha nəmegəhən itəm Uhgın tolkeike, in neiueiuəən.

⁴Netəm min əh koatol nəhlan ilat kəsotitun agin-əhən nat kit, kən ilat nausit pik. İlat kotalməl o nuwinən məghat pik o nəghatən min itəm tatiuw-pa neməha, o nəghatən min itəm netənim koatətəhau ilat min ron. Nolən u in

tatol netəmim koatetet ilat min, kən motəhap-əhap ilat min, kən moatəghat rat e nərgilat min, kən moatətəlig rat elat min.

⁵Kən e nian rafin ilat koatol timəht. Inu nolən rəha netəmim itəm rəhalat nətəligən tərat, ilat koatəlu e nəghatən pahrien. Ilat koatən məmə suatip rəha nahatətəən e Uhgın in suatip kit o nosən mənı ne nautə min.

⁶Məto nat itəm təwır pik sənəmə kitat kotos mənı ne nautə. Nat itəm təwır pik in məmə kitat okotaliwək e nolən itəm Uhgın tolkeike, kən motagien əm, nat ənnapın rəhatat nautə noan məsin o tepət,

⁷məto-inu nian kitat kəmotaiir-pa e nətueintən u, kən kəməsotosən nat kit motuwa. Kən e nian okotimis lan, okol kəsotos minən nat kit motitəlig.

⁸Məto okəmə nigıtat nagwənən ne napən tahmen əm, kən kitat kotagien.

⁹Netəmim itəm kotalkeike pik məmə rəhalat nautə otepət, in timətig əm olat məmə okotol nolən rat min tepət. In tahmen-pən e noanikulu tətəhasin ilat e noakəmihl rəha nəratən, kən ilat kotalkeike məmə okotol natimnat tepət rəha nalmələn, kən natimnat tepət itəm tərat olat. Kən nolkeikeən rəha natimnat rat min əh okoatərəkın-rəkın nəmegəhən rəhalat.

¹⁰Məto-inu nolən rəha nolkeike pikən mənı, in nəukətın natimnat rat tepət. Kən netəmim neen ilat koatətul-iəkis o nətəu-pənən suatip u, kən ilat kınotuwin rəkis isəu o nolən rəha nahatətəən, kən ilat koatol natimnat min neen itəm tatərəkın atip nikilat, kən moatəto tərat lan.

Nəghatən wir rəha Pol tatuwin kəm Timoti

¹¹Məto ik Timoti, etəm rəha Uhgın, aiu muwin isəu o nolən rat min əh. Ik onakəkəike malkut pik o nətəu-pənən nolən ətuatip, itəm Uhgın tolkeike. Rəham nahatətəən otəkəike məskasik, kən ik onakəkəike molkeike netəmim. Askəlım rəham nahatətəən tatuwin əm nulan, namnun tikə. Kən onəkəike muwa ik etəm mətig kit.

¹²Onakəluagin wir e nəluaginən rəha nahatətəən. Kən maskəlım nəmegəhən lilin itəm Uhgın təmaun-in ik ron. Aupən ikin in təmaun-in ik ron nian nəmən-iarəp nahatətəən rəham e Iesu e niganəmti netəmim tepət.

¹³E niganəmti Uhgin, itəm tatos-ipa nəmegəhən kəm natimnat rafin, ne niganəmti Kristo Iesu itəm təmən-iarəp wir nəghatən pahrien e niganəmti Pontias Pailat, iatəghat əskasik kəm ik nəhlan:

¹⁴ol natimnat min u, kən məsapəsən kit mətoarus-pən Iərəməərə rəhatat Iesu Kristo otuwa

¹⁵e nian ətuatip itəm Uhgin təmitəpun. Uhgin itəm kitat okotəkəike moatənwiwi e nian rafin, in pisin əm tatərəməərə e natimnat rafin. In Kig rəha kig min rafin, kən Iərəməərə rəha iərəməərə min rafin.

¹⁶In əm təsimisən mətətig lilin, rəhan nətuounən tikə, kən namnun tikə. Ikin tətətig ikin, nəhag-əhagən tasiə mitəlau in, kən okol kəsanən iuəhkir ron. Suah kit təsehmən əh in, kən okol suah kit təsehmən nian kit. Nian rafin kitat okotəkəike motisiai-in in, kən moatən-iarəp rəhan nəsanənən ne nərəməərəən matuwın matuwın namnun tikə. Tol nəhlan. Əwəh.

Nəfak u rəhalat nautə tepət

¹⁷Əghat əskasik kəm netəm koatəfak itəm rəhalat nautə rəha nətueintən u tepət. Ən məmə ilat okəsotiləs-ipər pikən ilat, kən kəsotahatətəən e rəhalat məni u tepət rəha roiu əm, məto olawig ne tikə min. Ilat okotəkəike motahatətə əm e Uhgin itəm tatos-ipa natimnat wir tepət kəm kitat məmə kitat okotəto təwir lan.

¹⁸Əghat əskasik kəm ilat məmə okotimətə e nolən təwir, ne nasituən wir min. Kən nikilat otəkəike magien o nawteən kəm netənim.

¹⁹E nolən əh, in tahmen məmə ilat koatələhəu natimnat wir min tepət, tahmen-pən əm məmə kəmotasa wir o nəmegəhən itəm otəpanuwa. Kən ilat kotitun nosən nəmegəhən, itəm nəmegəhən pahrien.

Namnun nəghatən rəha Pol

²⁰Timoti, ik onakəkəike matehm wir natimnat min itəm Uhgin təmələhəu-pən rəkis e nelməm. Apəs kən mətul isəu o nəghatən min itəm nipətilat tikə kən kəsotos-ipənən nisaiiən kəm Uhgin, kən nəghatən min itəm kəsotətuatipən e

Naoa Rəha Uhgın. Nəghatən min əh katən məmə koatos-ipa nitunən, məto kəp, koateiuə.

²¹Məto netənim neen koatuarisig-in nəghatən eiueiuə min əh, kən minotos-arəpən e suatip rəha nahatətəən pahrien. Pəs Uhgın otawte-in rəhan nəwirən kəm itəmat.

2 Timoti

2 Timoti 1

Pol tēmən təwir kəm Timoti

¹Io Pol, u io aposol kit rəha Kristo Iesu, itəm Uhgın tēmītəpun rəkis io məmə rəhan, kən mahl-ipa io məmə ekən-iarəp rəhan nənīəkisən rəha nəmegəhən lilin e Kristo Iesu.

²Iatən təwir kəm ik Timoti, nətik itəm iakolkeike pik ik. Pəs Uhgın Tata ne Kristo Iesu rəhatat İərəmərə okuawte-in rəhalau nəwīrən, ne nasəkitunən, ne nəməlinuən kəm ik.

Pol tēmīləs-ipər nətəligən rəha Timoti

³Nian rafin, lapin ne lenian, iatəfak ron ik, kən matən tagkiu kəm Uhgın ron ik. Kən iatol wək rəhan tahmen-pən əm e tipik min, kən ekitun məmə nolən rat kit təsətigən lak.

⁴Nikik tatuəh nahui nəmtəm, kən iakolkeike pik məmə ekəplan min ik pəs nikik otagien.

⁵Nikik tatuəh nahatətəən pahrien rəham itəm tahmen-pən əm e nahatətəən itəm təmaupən mətətig e rəham pipi Lois ne rəham mama İunis, kən ekitun məmə roiu in tinətətig lam.

⁶Kən tol nəhlan, iatən min kəm ik məmə onakelel nigəm rəha nəsanənən itəm Uhgın təmos-ipinə o nolən rəhan wək. Uhgın təmos-ipinə nəsanənən əh nian emələhəu-pən nelmək matəfak-pinə lam.

⁷Ol wək e nəsanənən əh, mətə-inu Uhgın təsos-ipamən kəm kitat nikin rəha nəginən, mətə təmos-ipa nikin rəha nəsanənən, ne nikin rəha nolkeikeən, ne nikin itəm tatol nolən min itəm in titun məmə kotətuatip.

⁸Kən inəh, əsaulis-inən o nən-iarəpən İərəmərə, kən əsaulis-inən io itəm etətig e kalapus o nərgin. Mətə e nəsanənən itəm Uhgın tatos-ipinə kəm ik, nəkəike mol məmə io ne, itəm iatəto nahməən o namnusən təwir.

⁹Uhgin tamosmegəh kitat kən maun-in kitat məmə kitat okotuwa rəhan min netənim itəm kotasim, kən təməsolən o nat kit itəm kitat kəmotol, məto in təmol e rəhan atip nətəligən, ne nəwīrən. Nian Uhgin təməsolən əh nətueintən ne, məto in təmələhəu rəkis nalpəkəuən məmə in otawte-in rəhan nəwīrən kəm kitat e Kristo Iesu,

¹⁰məto roiu, in təmol əp nəwīrən əh kəm kitat e nuwamən rəha Iosmegəh rəhatat, Kristo Iesu. Kən Kristo təmərəkīn nimisən ne rəhan nəsanənən, kən təmasiəgəpīn nəmegəhən u namnun tikə, kən kitat koatehm e namnusən təwīr.

¹¹Kən Uhgin təmītəpun io məmə io iəghat, ne aposol, ne iəgətun o namnusən təwīr əh.

¹²Tol nəhlan iatəto pīk nahməən ron u ikin-u e kalapus. Məto esaulis-inən, məto-inu ekitun məmə pah u iatahatətə lan, kən mitun wīr məmə in titun nehm wīrən nat naka itəm in təmələhəu-pa e nelmək o namnun nian.

¹³Ətəu-pən əm suatip rəha nəgətunən u tətəuatip itəm emən kəm ik, kən ol nat u e nahatətəən ne nolkeikeən e Kristo Iesu.

¹⁴E nasituən rəha Narmin Rəha Uhgin itəm tətətig e nikitat, kən atehm wīr nat wīr itəm Uhgin təmələhəu-pən e nelməm.

¹⁵Nəkitun məmə rəhak min netənim əpəh Esia, ilat Fukelas ne Hermokenes, ilat rafin kəmotagim rəkis motapəs io.

¹⁶Pəs Iərəməərə otasəkitun Onesiforas ne rəhan min, məto-inu nian tēpət təmətasitu lak matiləs-ipər rəhak nətəligən. Kən təməsaulisən məmə emətətig e kalapus.

¹⁷Nīpahrienən, nian in təmuwa Rom, təmeam-in io, təmeam-in io mətoarus-pən məplan io.

¹⁸Pəs Iərəməərə otasəkitun in e namnun nian! Ik nəkitun wīr natimnat wīr min itəm təmol kəm io əpəh Efesas.

2 Timoti 2

Mopael tawir rəha Kristo Iesu

- ¹Ik u nətik, pəs Uhgın otol nıkim təsanən e nəwırən itəm tətisi-pən e Kristo Iesu.
- ²Nəməto rəkis natımnat min u itəm eməgətun itəmat lan e nıganəmti netəmim tepət. Kən os rəhak nəghatən mələhəu-pən e nelmi netəmim neen itəm natən nıpahrienən elat, kən ilat okotıtun nəgətunən netəmim neen min lan.
- ³Nian nəratən tatuwa, məto ətul əskasık kitat min ik, tahmen e mopael wır kit rəha Kristo Iesu.
- ⁴E nian rəha nəluaginən, mopael kit təsolən natımnat rəha nəmegəhən rəha netəmim ənapın əm, məto tatol əm wək rəha mopael məto-inu, in tolkeike məmə rəhan etəm-iasol rəha mopael, nıkin otagian lan.
- ⁵E nolən kitiəh, etəm tətaiu məmə in otol win, in otəkəike mətəu-pən lou min rəha naiuən, məto okəmə təsolən, kən in otəsosən nətouən rəha nol winən.
- ⁶Tətuatıp əm min-nulan məmə etəm tatol pik wək e nasumən, in otaupən məulək-in.
- ⁷Ətəlig-in wır nat naka iatən kəm ik, məto-inu İərəmərə otasitu lam o nitunən nıpəti nəghatən min u.
- ⁸Atətəlig-in Iesu Kristo u noanol rəha Tefit, kən Uhgın təmosmegəh in e nımisən. Kən inu namnusən təwır iatən-iarəp.
- ⁹Kən iatəto nahməən o namnusən təwır əh, kən nıpahrienən, kəməlis io e sen tahmen-pən məmə io iakləh kit o iohamnu itəm. Məto kəsəlisən nəghatən rəha Uhgın.
- ¹⁰Tol nəhlan, iatətul əskasık e nahməən min rafın o netəmim itəm Uhgın təmitəpun ilat, məmə in otosmegəh ilat e Kristo Iesu, kən ilat okotatig e nəwırən itəm təhag-əhag rəha Uhgın, itəm namnun tikə.
- ¹¹Inu nəghatən tatən pahrien məmə, Okəmə kotuwa kitiəh e Kristo e nımisən rəhan, kən okotəmegəh min kitat min.

¹²Okəmə koatətul əskasik e nian iəkis min, kən kitat okotərəməmə min kitat min. Okəmə kitat kotən-iamnin in, kən in otən-iamnin kitat.

¹³Okəmə kitat kəsotolən rəhatat noanawil, məto in tatol rəhan noanawil, məto-inu in otəkəike matol rəhan nolən.

Iolwək təwir rəha Uhgın

¹⁴Natimnat min u, onəkəike matən matisimatip lan kəm rəham min netəmim. Ən əskasik kəm ilat nəhlan məmə, “İatən e nərgin Uhgın məmə itəmat nəsotərgəhəuən o nıpəti nəghatən min.” Nərgəhəuən nəhlan təsasituən e suah kit, məto tatərəkin əm netəmim itəm koatəto.

¹⁵Alkut əskasik məmə onəkuwa iolwək təwir itəm nian Uhgın tatəplan rəham wək, in titun nənən məmə, “Əwəh, nəmol təwir,” kən nəsaulisən o rəham wək, məto-inu natəgətun ətuatip nəghatən rəha nıpahrienən.

¹⁶Məto apəs nəghatən ənnapın min əm itəm kotərat məsotisiai-inən Uhgın, məto-inu netəmim itəm koatəghat nəhlan, nəmegəhən rəhalat tatuwin matuwın əm o nolən min itəm kəsotisiai-inən Uhgın.

¹⁷Nəgətunən rəhalat in tahmen-pən əm e nıməgəm pien itəm tatəməhal matepət matol iahgin. Təs mil u kioal min-nulan, ilau u Haemeneus ne Faelitas,

¹⁸itəm kinuəmkarəpən rəkis e suatip rəha nıpahrienən. Katuən məmə Uhgın təmol kitat kotəmegəh min rəkis e nımisən, kən okol Uhgın təsos-ipa minən nıpətıtət wi min nian İesu tatuwa min. Kən təs mil u katuərəkin nahatətəən rəha netəmim neen.

¹⁹Məto tol pap nəhlan, nımə itəm Uhgın tatiləkin tatətul tiəkis, kən təməte-pən lan məmə, “İərəməmə titun netəm min u rəhan min,” ne “Netəm min u koatən məmə ilat netəm rəha İərəməmə, okotəkəike motapəs nolən rat min.”

²⁰Ətəlig-in-tu. E nımə rəha etəm rəhan nautə tepət, plet pisin pisin min tepət. Kəmol neen e iaen u kol tatipit-ipit, neen e silfa, neen e nig, neen e nıməptən. Wək rəha neen, in wək asol itəm katisiai-in. Kən wək rəha neen, in wək ənnapın əm itəm tol naulisən.

²¹Okəmə suah kit tatol rəhan nəmegəhən tatuwiwi mətapəs nolən rəha naulisən, in titun nolən wək asol itəm katisiai-in, kən Uhgin otələhəu kalin məmə rəhan pisin əm, kən mol əpen-əpenə məmə otol wək min itəm kotəwir.

²²Aiu muwin isəu o nolən rat min itəm tatəwiə e niki netəm aluə. Kən ətəu-pən wir suatip rəha natimnat min u: nolən itəm tətəuatip, ne nahatətəən, ne nolkeikeən, ne nəməlinuən. Ətəu-pən suatip əh itəmat netəm min u itəm koatətapəh o nasituən rəha Iərəməərə e nikilat itəm təwir.

²³Apəs magim rəkis e nəghatən alməl min itəm nīpətīlat tīkə. Nəghatən min əh koatiuw-pa əm timəht o nərgəhəuən.

²⁴Iolwək rəha Iərəməərə, okol in təsərgəhəuən, məto in tatəkəike matol təwir kəm netəmim rafin, kən otəkəike muwa etəm rəha nəgətunən, kən rəhan nətəligən kaifəməh.

²⁵Okəmə netəmim neen koatən rat rəhan nəgətunən, kən in otəkəike məgətun wir ilat e nolən mətig əm. Kən okəm-naka Uhgin otegəhan-in məmə ilat okotəuhlin rəhalat nəmegəhən, məmə ilat okotitun nīpahrienən,

²⁶kən ilat okotuwa min e nətəligən təwir, kən motagim rəkis-in noanikulu rəha Setan, itəm təmaskəlīm ilat kən koatol nəwian.

2 Timoti 3

Nolən rat min iuəhkīr o Namnun Nian

¹Məto onəkəike mitun nəghatən u məmə nian əskasik min okotuwa iuəhkīr o Namnun Nian.

²Tol nəhlan məto-inu, netəmim okoatətəlig-in atip əm ilat, kən ilat okotolkeike pik məni. Netəmim okotausit, moatos-ipər atip əm ilat. Ilat okotən rat netəmim ne Uhgin, kən ilat okotəht nəwia tata ne mama, kən okəsotənən məmə nikilat tətəgien o nat itəm katol kəm ilat, kən okəsotisiai-inən Uhgin.

³Rəhalat nolkeikeən kəm netəmim otikə, kən okəsotaluinən nəratən itəm suah kit otol kəm ilat. Ilat okotərəkin nərgi netəmim. Okəsotərəməərəən e nolən

min rəhalat. Nikilat otagien əm o nərəkinən netəmim. Okotətəhau nat itəm in təwir.

⁴İlat kəut kəsüə min, kən okotol natimnat rat neen məto kəsotətəlig-inən məmə nat naka otiet lan. Kən ilat okotiləs-ipər atip ilat, kən ilat okotolkeike pik natimnat o nətoən təwir e nıpətılat, məto ilat okəsotolkeikeən Uhgın.

⁵Okotol nolən min rəha iəfak min məmə netəmim okotəplan, məto ilat okəsotolkeikeən məmə nəsanənən rəha Uhgın otəuhlin rəhalat nəmegəhən mol kotuwiwi. Uwin isəu o netəm min u.

⁶Apəs əm ilat məto-inu neen koatehm suatip o nuwinən latuənu min, kən moatiuw rəkis nətəligən rəha nıpitan itəm rəhalat nətəligən təsəskasikən. Təfagə rat min rəha nıpitan min u, in tiəkis pik olat, kən nolən rat min tepət itəm ilat koatolkeike, koatiuw-pən ilat.

⁷Kən nıpitan min əh koatətəlig-in wir e nəghatən min rafin rəha netəm min əh, məto ko kəsotitunən nəghatən rəha nıpahrienən.

⁸Aupən ikin, Janes ne Jampres kəmatioal timəht kəm Moses, kən e nolən kitiəh min əm, netəm min əh koatəht nəghatən rəha nıpahrienən. Netəm min u, rəhalat nətəligən tərıoah e nolən rat min, kən nolən rəha nahatətəən rəhalat in neıueıuə-əmən.

⁹Məto nəgətun eıueıuəən rəhalat, ko təsətulən tuwəh, məto-inu netəmim rafin okotəplan məmə ilat kəsotitunən nat itəm koatəghat-in, kotahmen-pən əm e suah mil əh.

Nəghatən rəha Pol kəm Timoti

¹⁰Məto ik, Timoti, ik nəmətəu-pən rəhak nəgətunən, ne nolən rəha nəmegəhən rəhak, ne nat naka itəm ekolkeike məmə ekol, ne rəhak nahatətəən, ne nolən rəha nətəligən rəhak itəm təfəməh, ne rəhak nolkeikeən, ne nətul əskasikən rəhak,

¹¹kən nəkitun nian iəkis min itəm koatuwa e rəhak nəmegəhən, ne nolən tərət min itəm katol lak. Kən nəkitun nolən iəkis min itəm kəmol lak əpəh Antiok,

ne Ikoniam, ne Listra. Mæto Iæræmære tæmilæs-irækis io e natimnat min æh rafin.

¹²Nipahrienæn, netæmim rafin itæm kotolkeike mæmæ okotol nolæn itæm Uhgîn tolkeike, kæn motol e Kristo Iesu, netæmim okotol tærat kæm ilat,

¹³mæto nian kitæh min æm, nol tæfagæ rat min ne netæm ræha neiueiuææn, ilat okotol nolæn rat motuwîn kol itæm in tærat agîn. Ilat netæmim kateiuæ-in ilat, kæn ilat okoteiuæ-in pîk agîn-æh netæmim.

¹⁴Mæto ik, Timoti, onakækæike matætæu-pæn æm natimnat wir min itæm kæmægætun ik lan itæm næmæn æskasik rækis nipahrienæn lan, mæto-inu ik nækitun wir netæmim itæm kæmotægætun ik lan.

¹⁵Kæn nian næmatækæku mætoarus-pa u-roiu, næmitun Naoa Ræha Uhgîn itæm titun nos-ipænæn nenatigæn mæmæ nækitun nosæn næmegæhæn lilin lan o nahatætæn e Kristo Iesu.

¹⁶Næghatæn min rafin e Naoa Ræha Uhgîn, kæmotisi-pæn æm e nohli Uhgîn, kæn koatasitu etat. Koatægætun kitat, moatæniæp nolæn rat min ræhatat, moatægætætup-in kitat, kæn moatægætun kitat e nolæn min itæm kotætætup.

¹⁷Koatasitu etat næhlan mæmæ, kitat netæm ræha Uhgîn, okotos nasituæn rafin min æh, kæn motuwa netæmim itæm kotitun nolæn wæk min rafin itæm kotæwir.

2 Timoti 4

¹Timoti, oekæn-ipinæ næghatæn keike kit kæm ik e niganæmti Uhgîn ne Kristo Iesu itæm otakil nolæn ræha netæmim rafin, netæm koatæmegæh ne netæm kæmotimis, kæn oekæn-ipinæ næghatæn u mæto-inu in otuwa min matæræmære. Kæn inæh, iakatækæike matæn kæm ik mæmæ,

²æn-iaræp næghatæn ræha Uhgîn, kæn ætul matip o næn-iaræpæn, nat ærnapin mæmæ otimætig æm, o tiækis. Æg-ætætup-in nolæn ræha netæmim, kæn æn-iæp nolæn rat min, kæn mîlæs-ipær nætæligæn ræha netæmim, kæn nian natol wæk min u, ræham nætæligæn otækæike mæfæmæh, kæn ræham nægætunæn otækæike mætætup mæwir.

³Nəkəike mol nəhlan məto-inu, nian itəm tatuwa, netəmim okəsotolkeikeən məmə okotətəlig-in nəghatən pahrien. Məto ilat okotos iəgətun pisin pisin min itəm okotəgətun nəghatən min itəm ilat əm kotalkeike.

⁴Kən ilat okotəuhlin matəlgilat o nətəlig-inən nəghatən pahrien, kən motuwın moatətəlig-in namsu eiueiuə min.

⁵Məto ik, atehm wir rəham nətəligən ne rəham nolən min e nian min rafin, nat ənnapin nat pisin pisin min koatuwa e rəham nəmegəhən, kən ətul əskasik nian nəratən tatuwa, kən uwın mən-iarəp namnusən təwir, kən ol rafin wək itəm Ughin təmos-ipən kəm ik məmə onəkol.

⁶Timoti, ol natimnat min əh, məto-inu otəsuwəhən, io ekimis. Kən roiu nəmegəhən rəhak tahmen e wain itəm kinatəhtəg-pən e olta məmə okol sakrifais lan.

⁷E rəhak fait wir rəha nahatətəən, ematipin wir nelmək, kən e rəhak naiuən, io emaiu wir rəkis mətoarus-pa namnun naiuən, kən io emataskəlim wir nolən ətuatip rəha nahatətəən kən eməsapəsən wək rəha nən-iarəpən namnusən təwir.

⁸Kən roiu, İərəməərə itəm rəhan nakilən tətuatip wir, in təmol əpen-əpenə e nətouən rəhak, inu hat rəha etəm tatol win e rəhan naiuən, kən in otəfauin-pa kəm io e nian rəha nakilən məto-inu in təmakil io məmə rəhak nəmegəhən tətuatip. Kən sənəmə io pisin əm, məto otos-ipən kəm netəmim rafin itəm kotalkeike moatəsahgin məmə in otuwa min.

Pol təmən-iarəp namnusən rəha in min neen

⁹Eam-in uəhai əm rəham suatip məmə onəkuwa mehm io,

¹⁰məto-inu Temas, u tolkeike pik nətueintən u, in təmapəs io maiu muwin Tesalonaeka. Kresens tinuwın rəkis əpəh Kalesia, kən Taetas tinuwın rəkis Talmesia.

¹¹Məto Luk pisin əm itimlau min. Təwir məmə nian nakatuwa, onakit Mak itəmlau min, məto-inu in titun nasituən e wək rəhak.

- ¹²Emahl-ipən rækis Tikikas tuwin əpəh Efesas.
- ¹³Kən nian nakatuwa, onakos rəhak kot itəm emələhəu kəm Kapas əpəh Troas, kən onakos min rəhak naoa min itəm kəmaiu-aiu, kən iakolkeike pik min məmə onakos naoa min u kəmol e nuwigi sipsip.
- ¹⁴Suah u Aleksanta itəm etəmim rəha nolən wək e iaen, in təmatol tərət kəm io. İərəmərə otos-ipən nitai nətouən rəhan o natimnat min əh.
- ¹⁵Kən ik min, atəto ik o suah əh, məto-inu tətəhtosiğ-in nəghatən min rəhatat.
- ¹⁶Nian emaupən mətul e kot məmə ekən-iarəp nəghatən min rəhak, suah kit təməsətul-arəpən masitu lak, məto netəmim rafin kəmotagiğ motapəs io. Pəs Uğin nikin otəsəhtən natimnat rafin itəm ilat kəmoatol.
- ¹⁷Məto İərəmərə təmətul e nikalik mos-ipa nəsanənən kəm io məmə ekən-iarəp wir nəghatən rəhan, kən pəs İaihlua min okotəto. Kən təmiləs-iarəp io e nohli laion.
- ¹⁸İərəmərə otiləs-irəkis io e nəratən min rafin itəm okol kəm io, kən in otaskəlim wir io, kən miləs io ekuwin e nərəmərəən rəhan əpəh ilis e nego e neai. Pəs kotiləs-ipər nərgin tatuwin matuwin namnun tikə. Əwəh.

Namnun nəghatən

- ¹⁹Iatən təwir kəm Prisila ne Akwila, ne Onesiforas ne rəhan min.
- ²⁰Erastas təməsətəu-pa-mən io, in əpəh Korin. Kən nian emiet Maelitas, emapəs Trofimas tətətig məto-inu in tatimis.
- ²¹Alkut pik məmə nakuwa uəhai əm ikin-u, uarisig in nian rəha nətəpən. İupulas tatən təwir kəm ik, kən Putens, ne Linus, ne Klotia, ne piətət min rafin ikin-u koatən təwir kəm ik.
- ²²Pəs İərəmərə tətətig itəmat min. Pəs Uğin otawte-in rəhan nəwirən kəm ik.

Taetas

Taetas 1

Pol təmən təwir kəm Taetas

¹Taetas. Io Pol, iatəte naoa u kəm ik. Io slef kit rəha Uhgın, kən io aposol kit rəha Iesu Kristo. Təmahl-ipa io məmə ekasitu e netəmim itəm Uhgın təmıtəpun rəkis ilat məmə rəhan mın, miləs-ipər nahatətəən rəhalat, masitu elat məmə okotıtun nəgətunən pahrien. Nian netəmim koatətəu-pən nəgətunən pahrien əh, kən rəhalat nəmegəhən otətuatıp kotahmen-pən e nolən itəm Uhgın tolkeike.

²Kitat kotıtun nıpahrienən əh, kən motahatətə lan. Kən e nolən əh, rəhatat nətəligən tətətig əskasik rəkis məmə okotos nəmegəhən lilin. Aupən aupən agın itəm Uhgın təməsölən əh natımnat rafın, məto Uhgın tınəmən rəkis nəmegəhən lilin əh, məmə in otol mihin. Kən kitat kotıtun məmə in təseiuən nian kit ne.

³Kən e nian ətuatıp itəm Uhgın təmən, in təmol məmə netəmim okotıtun nəghatən rəhan. İlat kotıtun məto-inu Uhgın İosmegəh rəhatat təmən mələhəu nəghatən kit məmə təmos-ipa wək u tətətig e nelmək məmə io ekən-iarəp nəghatən əh rəha nəmegəhən lilin.

⁴Taetas, rəhalau nahatətəən kitiəh, kən e nolən rəha nahatətəən, in tahmen əm mə ik nətik pahrien. Rəhak nəfakən məmə Uhgın Tata rəhatat ilau Kristo Iesu, İosmegəh rəhatat, pəs okuawte-in rəhalau nəwıran kəm ik, kən muələhəu nəməlinuən tətətig ron ik.

Wək rəha Taetas əpəh Krit

⁵E nian emiet Krit, kən emələhəu ik nəkətətig məmə onəköl rafın wək itəm tətətig, kən məmə onakıləs-ipər elta mın rəha niməfak, e taon mın rafın e nitən Krit tahmen əm mə inu emən mihin kəm ik.

⁶Elta mın rəha niməfak okəike kəsehm-pənən nolən rat kit e rəhalat nəmegəhən, kən rəhalat pətan kitiəh əm, kən rəhalat nısualkələh okotəkəike motahatətə e Uhgın, kən məsotan əpnəpınən motol natımnat təsahmenən,

kən məsotəhtən nəwia rəhalat tata ne mama məmə netəmim okotən rat ilat ron.

⁷Nəmegəhən rəha elta min rəha niməfak otəkəike mətuatip wir məto-inu ilat koatos wək asol rəha Uhgīn. Ilat itəm koatehm wir netəmim okotəkəike motol mihin məmə kəsotiləs-ipər atipən ilat motol rəhalat nəghatən məmə netəmim okotəgin, kən nīkilat tēsahmə uəhaiən. Sənəmə ilat netəmim rəha napisən o nəmouən, kən sənəmə ilat netəmim rəha nosən mənī e neiueiuəən.

⁸Məto nəmegəhən rəhalat in otəkəike mol min-nulan. Ilat okotəkəike moatehm wir netəmim itəm koatuwa əh rəhalat ikīn. Ilat netəm kotalkeike mə okotol əm natimnat itəm təwir, kən nolən rəhalat in tatəgətun mə ilat netəm mətə, kən kotenatig. Ilat netəm rəha nətəu-pənən nəghatən rəha Uhgīn. Rəhalat nəmegəhən in otəkəike mətuatip wir e niganəmti Uhgīn. Ilat kotitun nən atipən e nīkilat məmə kotapəs nolən natimnat itəm tərət kən moatol əm nat itəm təwir.

⁹Ilat okotəkəike motahatətə əskasik e nəghatən rəha namnusən təwir məmə in nīpahrienən tahmen-pən mə kəməgətun ilat lan. Kən inəh, ilat kotenatig wir o nəgətunən netəmim e nəgətunən pahrien itəm tətuatip məmə ilat okotətəu-pən. Kən nian netəmim neen okoatən nəghatən min itəm tol pīsīn e nəgətunən pahrien, kən netəm-iasol min rəha niməfak okotəgətun ətuatip ilat motən-ipən kəm ilat məmə rəhalat nəgətunən in neiueiuəən.

¹⁰Iatəghat min-nulan məto-inu netəmim tepət e niməfak əpəh Krit kotetəhau nəgətunən pahrien u. Ilat, nəghatən rəhalat titatīperəh pīk tahmen e kaluəluə, məto nuhuən lan tikə, kən moatiuw rəkis netəmim neen e nəgətunən eiueiuə min rəhalat. Netəmim tepət itəm koatən məmə okəkəike kəhg-ipən netəmim, ilat iəgətun eiueiuə min.

¹¹Ahtosig-in nəghatən rəhalat məmə okəsotəgətunən e niməfak nəgətunən əh kotərət itəm kəsotətuatipən məmə okotəgətun, məto-inu nəgətunən rəhalat tatərəkīn-rəkīn nahatətəən rəha noanol min rafīn rəha netəmim neen. Ilat koatəgətun neiueiuəən əh məto-inu kotalkeike məmə okotos mənī lan, məto kəsotaulisən lan.

¹²Etəm Krit kit aupən, in ien kit rəhalat, in min təmən min-nulan məmə, “Netəm Krit, ilat netəm rəha neiueiuəən nian rafin. Kən ilat kotahmen e kuri iarupin min. Kən ilat nəlpah, nian rafin kotalkeike məmə kotagwən əm lan.”

¹³Məto nəghatən rəha ien u, in tol əm niphrienən. Kən tol nəhlan, əhai ilat mən-ipən kəm ilat məmə rəhalat nəgətunən in neiueiuəən, pəs ilat okotahatətə əm e nəghatən pahrien,

¹⁴kən ilat okəsotətəu-pənən noanage rəha netəm Isrel ne nəghatən rəha netəm koatapəs nəghatən pahrien.

¹⁵Kən nəkotitun məmə netəmim itəm kotətuatip e niganəmti Uhgīn, nat tikə itəm otol ilat kotamkimik. Məto netəmim itəm koatamkimik e niganəmti Uhgīn məto-inu ilat kəsotahatətəən e Iesu, kən nolən kit tikə itəm otol ilat kotətuatip. Kən tol min-nəhlan, nətəligən ne nikilat kərən kəsutuatipən, kən ilat kotəruru nakilən nat itəm təwir, ne nat itəm tərət.

¹⁶Ilat koatən məmə kotitun Uhgīn, məto nolən rəhalat tatəgətun məmə koateiuə, ilat koatəuhlin məntaalat kəm Uhgīn. Netəm min əh kotərat agin, kotalməl koatəht nəwia Uhgīn, kən okol ilat kəsotolən nat wir kit ne.

Taetas 2

Nəgətunən itəm tətuatip

¹Məto ik Taetas, ik onəkəike məgətun wir netəmim e nəgətunən itəm tatətəu-pən nəghatən ətuatip e Iesu.

²Ik onəkəike məgətun iaguihl min məmə e naliwəkən rəhalat, ilat okotan mətig, kən məsotənim pikən wain, kən nolən rəhalat otəkəike mətuatip wir pəs netəmim okotisiai-in ilat, kən ilat okotəkəike moatətul əskasik kən moatol natimnat e nenatigən. Nahatətəən rəhalat otəkəike mamnim wir e nəghatən rəha Uhgīn. Kən ilat okotəkəike motolkeike netəmim. Kən motəkəike kətul tiəkis e nian iəkis min itəm koatuwa e rəhalat nəmegəhən.

³Kən e nolən kitiəh əm, nəkəike məgətun wir nipiaguuhl min məmə ilat okotəkəike motol nolən itəm tətuatip məmə otos-ipən nisaiiən kəm Uhgīn.

Kən ilat okəsotənən nikali netəmim. Kən sənəmə nipitan rəha napisən. Məto ilat otəkəike motəgətun nəmegəhən ətuatip.

⁴Inəh, ilat okotəgətun nipitan mīn e suatip itəm ilat okotolkeike rəhalat mīn nəman ne nenətilat mīn.

⁵Ilat okotəkəike motəgətun nipitan məmə ilat nipitan mətig itəm nəmegəhən rəhalat in tətuatip, kən ilat kəsotan əpnapinən, kən moatisiai-in rəhalat nəman mīn, kən moatehm wir natimnat mīn rəha latuənu, kən ilat moatol təwir kəm netəmim. Nian koatol nolən tol mīn-nulan, kən otahtosig-in netəmim məmə kəsotən ratən nəgətunən rəha Uhgīn.

⁶Kən e suatip kitih mīn, otəghat əskasik kəm netəm aluə məmə ilat kotitun nən atipən e nikilat məmə kotapəs nolən natimnat itəm tərət kən moatol əm nat itəm təwir.

⁷Kən ik, e natimnat rafin, onəkol əm nat ətuatip mīn, pəs ilat okotətəu-pən nat naka itəm ik nakatol. Nian onakəgətun, nəmegəhən rəham otəkəike mətuatip, mol nəghatən rəham təfigəm.

⁸Ik onakəkəike matən əm nəghatən pahrien itəm netəmim okol kəsotəplanən məntaa rəham nəghatən kən motən rat. Pəs in otol rəham tikimīr mīn okotaulis lan məto-inu ilat kəsotehm-pənən nolən rat kit ne lam, kən məsotənən nat tərət kit etat.

⁹Əgətun wir slef mīn məmə ilat okotol nəwia rəhalat etəm-iasol mīn e natimnat rafin, məmə nikilat otagien o wək rəhalat. Slef mīn okəsotənən nitai nəghaten rəha etəm-iasol mīn rəhalat,

¹⁰kən məsotakləhən kəm ilat, məto nian rafin ilat okotəkəike moatol natimnat ətuatip mīn, məmə rəhalat etəm-iasol mīn okotən nipahrienən e rəhalat wək. E nolən itəm okotol e natimnat rafin, otəgətun məmə nəgətunən rəha Uhgīn, losmegəh rəhatat in tətuatip məwir.

¹¹Ik onakəkəike məgətun natimnat mīn əh rafin məto-inu Uhgīn təmerəh rəkis e suatip kəm netəmim rafin məmə otosmegəh ilat lan nian tətawte-in rəhan nəwirən kəm ilat.

¹²Nəwirən əh rəha Uhgın tatəgətun məmə nian kitat koatətig əh e nətueintən, kotəkəike motapəs nətəu-pənən nolən rat min ne natimnat rat min rəha nətueintən itəm koatəwiə e nikitat, məto okotan mətig, kən nəmegəhən rəhatat otətuatip wir motahmen-pən mə kitat netəmim rəha Uhgın.

¹³Nəmegəhən rəhatat in otəkəike matol min-nulan nian kitat okoatəsaħgin nian Iesu Kristo, rəhatat Uhgın ne rəhatat Iosmegəh, in otuwa min lan e nəsanənən ne nəwirən. Nian əh in təwir aħin, kən kitat kotitun mə otəpanuwa, kən matol nikitat tətəgien.

¹⁴Iesu nikin təmagien məmə otimis otat, kən mətou nəmegəhən rəhatat mos-irəkis e nəsanənən rəha nolən rat min rafin, kən mafəl wir kitat məmə kitat okotuwa rəhan min netəmim itəm kotalkeike məmə koatol əm nat itəm təwir.

¹⁵Natimnat min u, onatəgətun ilat e niməfak. Ləs-ipər nətəligən rəhalat məmə okoatətəu-pən İərəmərə, kən məghat əskasik kəm netəm koatətəu-pən nəghatən eiueiuə min. Uhgın təmos-ipinə wək əh kəm ik, kən əghat min-nulan. Əsolən məmə etəmim kit otən rat ik.

Taetas 3

Nolən rəha iəfak min

¹Taetas, ən-ipən wir min kəm rəham netəmim məmə okotisiai-in netəm-iasol ne kapman rəhalat. Okotəkəike moatol nəwialat, kən moatətul matip e nian rafin o nolən wək itəm otasitu e netəmim.

²Kən ilat okəsotəghat eiuən o nərəkinən nərgi netəmim, kən okəsotolən timəht, məto ilat nan mətig əm kən moatol təwir kəm netəmim, kən motos-İəhau rəhalat nətəligən moatisiai-in netəmim rafin.

³Koatol min-nulan məto aupən kitat kotərat kəmotahmen əm elat. Kən Uhgın təmasitu etat nian kitat min kəmoatol nolən rat min əh, kitat ialməl min. Kəməsotolən nəwia Uhgın. Nos-ipən-os-ipənən rəha nəratən təmərəkin kitat. Kən nolən rat min rəhatat itəm kitat kəmoatolkeike, kəmoatərəmərə etat. Kitat kəmoatol əm nəwialat, kən kəmoatol nolən rat rafin. Kən kəmoatolkeike

natimnat min rəha netəm pisin. Nolən rat rəhatat təmol məmə netəmin kotətəhau kitat, kən kitat kəmoatətəhau kitat min.

⁴Məto nian nolkeikeən ne nəwīrən rəha Uhgīn Iosmegəh rəhatat təmiet-arəpa,

⁵kən in təmosmegəh kitat, məto sənəmə təmol məto-inu kitat netəm ətuatip. !Kəp! In təmosmegəh kitat məto-inu təmasəkitun kitat. In təmosmegəh kitat nian Narmin Rəha Uhgīn təmafəl rəkis nolən rat min kən kotaiir wi min, kən Narmin təməwiək-in nikitat.

⁶Narmin u inu, Iesu Kristo Iosmegəh rəhatat in suatip məmə Uhgīn tatətəlmin nikitat tatər lan e nikin agien.

⁷In təmol kitat kotətuatip e niganəmtin e nəwīrən rəhan məmə okotahatətə e rəhan nəghatən itəm təmən kəm kitat mə o nian kit kitat kotatig itulin kitat min.

⁸Inu nəghatən kit in nəghatən pahrien. Kən io ekolkeike məmə onakəgətun wir netəmin lan məmə okotitun wir. Nəgətunən min əh okotasitu e iəfak min məmə rəhalat nətəligən otətatig əskasik əm e nolən natimnat itəm təwir. Nəgətunən min u ilat kotəwir kən okotasitu wir e netəmin.

⁹Məto apəs nəghatən alməl min itəm netəmin koatən tol min-nulan: koatəghat o noanol min rəhalat tuwīn muwīn mīləs tīpilat rat agin min; kən moatetet ilat min kən moatən-iəhau ilat min o nipəti nəghatən rəha Lou rəha Moses. Apəs əm nəghatən min u məto-inu okol təsasituən e suah kit ne, kən rəhan nəwīrən tikə.

¹⁰Okəmə suah kit tatol netəmin koator ilat min o nəghatən tol min-nulan, onəkuwīn məghat əskasik kəm in kən mən-iəhau. Məto okəmə tatol min, kən nakuwīn min mən-iəhau min. Okəmə nəmən-iəhau pap mau kəiu, məto in tatəkəike e rəhan nolən, kən otətul-pən isəu ron motapəs.

¹¹Məto ik nəkitun məmə suah kit tol min-nulan, rəhan nətəligən tərət kən tatol keko-eko, kən matol təfagə rat e niganəmti Uhgīn. Rəhan əm nolən tatəgətun mə in iol tərət.

Namnun nəghatən rəha Pol

¹²Oekahl-ipinə suah mil u kit, Atemas o Tikikas otimnə mehm ik. Nian otimnə, ik onakəkəike meam-in uəhai əm suatip mə onakimnə mehm io əpəh taon Nikopolis, məto-inu io emolkeike məmə ekuwin matig ikin e nian rəha nətəpən.

¹³Kən etənim kəiu, Apolos ne Sinas u in ienatig e lou, ilau katuraliwək e rəhalau naliwəkən, məto ik onakasitu elau məmə natimnat rafin rəhalau otəkəike mətatig.

¹⁴Rəhatat netənim okotəkəike motitun wir suatip o nolən wək kən moatol nat itəm təwir məmə ilat kotitun nasituən e netənim neen itəm rəhalat natimnat təsahmenən. Təsəwirən məmə ilat kotatig əpnəpən əm.

¹⁵Netəm min u itəm itimat ekoatatig koatahl-ipinə nəghatən wir kəm itəmat. Kən ən təwir kəm iəfak min itəm kotolkeike itimat. Pəs Uhgın otawte-in rəhan nəwirən kəm itəmat.

Filimon

Filimon 1

¹Io Pol, itəm etatig e kalapus o Kristo Iesu, itimlau piətat Timoti, iatuən təwir kəm ik Filimon. Ik iolitimlau itəm ekioalkeike pik, kən kitəhal kətəhalol wək kitiəh əm rəha Iesu.

²Kən iatuən təwir kəm winitat Apia, ne Akipas itəm kitat mopael min koatəluagin rəha Uhgın, kən iatuən təwir kəm netəm rəha niməfak itəm koatuwa moatəfak e rəham nimə.

³Pəs Uhgın u Tata rəhatat, ne Iərəməərə Iesu Kristo okuawte-in nəwirən ne nəməlinuən kəm itəmat.

Nəfakən rəha Pol

⁴E nian min rafin itəm iatəfak ron ik, matən tagkiu kəm Uhgın ron ik,

⁵məto-inu eməto nahatətəən rəham e Iərəməərə Iesu, ne nolkeikeən rəham itəm tatuwin o nəfak min rafin.

⁶Kən iatəplan nolən rəham, məmə natawte e nikim agien məto-inu e rəham nahatətəən. Kən iatəfak məmə nolən əh otasitu lam məmə onəkıtun wir kən mos nat wir min rafin rəha Uhgın itəm tətawte-in e Kristo kəm kitat.

⁷Piak, iatəfak nəhlan məto-inu rəham nolkeikeən təmöl niki nəfak min koatəto təwir, kən nian eməto, io min, nikik təmagien kən tatıləs-ipər rəhak nətəligən lan.

Nətəpəhən rəha Pol

⁸Tol nəhlan, e Kristo esəginən o nənən kəm ik məmə onəkol nat kit itəm nəkəike mol,

⁹məto esol mihinən. Iatəpəh-in əm e nolkeikeən. Io iaguıhl kit, etatig e kalapus o Kristo Iesu. Kən io inu Pol,

¹⁰iatəpəh-in suah kit ron ik e rəhak nipahrienən məmə nakos e nikim agien. Suah əh in təmuwa tahmen-pən e nətik nian emətətig e kalapus, inu Onesimas, rəham slef.

- ¹¹Aupən ikin, in tēməsol wək wirən kəm ik, mətə roiu in titun nolən wək təwir kəm kilau kərən.
- ¹²Kən roiu, etahl-ipinə min suah u, etəm itəm iakolkeike pik.
- ¹³Okəmə tətətig itimlau min, nīkik tagien ron, kən in otatos nəmeem mətəsitu lak nian etətig ikin-u e kalapus o namnusən təwir.
- ¹⁴Mətə esolkeikeən məmə ekol nat kit itəm ik nəsegəhan-inən. Kən okəmə natol nat wir, iakolkeike məmə in tətisi-pən əm e nīkim agien, mətə sənəmə nat io iatəkəike kəm ik məmə nakol.
- ¹⁵Esitunən, okəm-naka Onesimas təmagim e nian əkuəkir u məmə onakos min in titəlig-pa min nətuatig agin-əh,
- ¹⁶mətə sənəmə in otol min əm slef rəham, kəp. Mətə roiu əh, in suah wir taprəkis-in slef kit, in pialau etəm təwir. Io iakoleike pik in, mətə ik onakolkeike pik in taprəkis, mətə-inu in rəham slef, kən in piam e Iərəmərə.
- ¹⁷Nakatehm io məmə kəmuea kitəh e wək ne nolkeikeən rəha Kristo, kən tol nəhlan, iatətapəh məmə nian in otimnə, nakos in e nīkim agien tahmen-pən əm məmə io.
- ¹⁸Okəmə təmol nat kit tərət kəm ik, o təmos rəham nat kit kən məsətouən, pəs nəkələhəu-pən tətətig e kaon rəhak.
- ¹⁹Kən əh-roiu, Io Pol, iatəte e nelmək—*pəs io epanətou*. Mətə təwir məmə nəsaluinən rəham kaon asol agin kəm io, itəm tol min-nulan, emasitu lam kən nəmos rəham nəmegəhən lili.
- ²⁰Piak, iakolkeike məmə onakətuoun matətou rəham kaon kəm io, kən ol nat u iatətapəh-in e nərgi Iərəmərə, kən ol nīkik tatəto təwir e Kristo.
- ²¹Iatəte naoa u kəm ik mətə-inu ekitun məmə onəköl nəwiak, kən onəköl taprəkis-in nat naka itəm iatətapəh-in.
- ²²Kən nat kit min, afəl rəhak kit rum mətə-inu emələhəu-pən rəhak nətəligən e Uhgīn məmə in otos io ekitəlig-pinə min otəmat, inu noa nəfakən rəhatəmat.

Namnun nəghatən rəha Pol

²³Epafraſ, itimlau min etuatig e kalapus o nərgi Kristo Ieſu, kən in tatən təwır kəm itəmat.

²⁴Kən Mak, ne Ariſtakas, ne Temas, ne Luk, itəm itimat ekoatol wək kitiəh, ilat min koatən təwır kəm itəmat.

²⁵Pəs İərəməərə Ieſu Kristo otawte-in rəhan nəwırən kəm itəmat rafin.

Hiprus

Hiprus 1

Kristo tæmol æp Uhgîn kêm itat

¹Aupæn ikin, Uhgîn tæmatæn næghatæn ræhan, mæto tæmatælæhæu æm e sæpag kêm tîpîtat min e nian tepæt ne suatîp pîsin pîsin min.

²Mæto roiu æh, kinotegu-pæn e namnun nian, kæn tinatæghat ætuatîp æm kêm kitat e Nætîn, itæm in tæmilæs-ipær mæmæ otæræmæwæ e nautæ rafin ræha tata ræhan. Kæn e Nætîn æh, in tæmol natîmnat rafin e nætueintæn.

³Næti Uhgîn in næhag-æhagæn ræha næwiræn ne næsanænæn ræha Uhgîn. In tæmæru ætuatîp ræhan tata e natîmnat rafin. In tatæmik ætain natîmnat rafin e næsanænæn ræha næghatæn ræhan. Nian in tæmîmis rækis mæmæ otafæl rækis ræhatat nolæn rat min, kæn in tatæpælæh e ræhn matîp kig, ikin ræha nepætæn ne nisîaiiæn, e nego e neai.

Næti Uhgîn u, in ilis taprækis-in nagelo min

⁴Tol næhlan, Uhgîn tæmilæs-ipær rækis Nætîn u, kæn in ilis taprækis-in nagelo min, tahmen-pæn mæmæ nærig u itæm Uhgîn tæmos-ipæn kêm in, in ilis pîk taprækis-in nærgîlat rafin.

⁵Uhgîn tæmæsæn agin-æhæn kêm nagelo kit ræhan mæmæ, “Ik nætik. Roiu enuwa ræham tata ætuatîp.” Mæto in tæmæghat nulan kêm Iesu. Kæn Uhgîn tæmæsæn agin-æhæn kêm nagelo kit mæmæ, “Io tata ræham, kæn ik onækuwa nætik.” Mæto in tæmæghat næhlan kêm Iesu.

⁶Mæto e nian Uhgîn tahl-ipa Nætîn itæm tæmaupæn maiir tuwa e nætueintæn, kæn in tæn mæmæ, “Pæs ræhak rafin nagelo min, nîpînægîlat taru nisîp e nisîaiiæn, motænwiwi in.”

⁷Nian Uhgîn tatæghat-in nagelo min, in tatæn mæmæ, “Io emol ræhak nagelo min ilat kotahmen e nîmætag itæm tætan ikin min rafin, matol ræhak wæk. Ilat iolwæk min ræhak, tahmen e nîgæm.”

⁸Mæto tæmatæghat-in Nætîn kæn matæn mæmæ, “Uhgîn, ræham næræmæwææn otætatiġ lilin, namnun tikæ. Kæn nætuetîpæn in nælnal ræha næræmæwææn ræham.

⁹Ik nəmolkeike əm nətuatipən kən metəhau nolən eko-eko min. Tol nəhlan, io u, rəham ətuatip Uhgın, io emələhəu aıpən ik, kən ik ilis e ik min neen. Kən emol-pən oel e rəhm-kapə, tatəgətun məmə ik kig, matol nıkim tagien taprəkis-in ik min neen.”

¹⁰Kən Uhgın tatən-ipən min kəm in məmə, “Iərəməərə, e nətuounən, ik nəmol nətueintən u, mol in təkaskik. Kən e nelməm atip əm, ik nəmol natimnat rafın itəm kotatig e neai.

¹¹Natimnat min u rafın, ilat okəpanotikə, ilat okotoas tahmen e nıməhan itəm təməmnəmit, məto ik nətatig lilin əm.

¹²Ik onakaiu-aiu ilat, tahmen əm məmə etəmim təmaiuaiu rəhan nıməhan. Ik onakəuhlin natimnat min u, tahmen e etəmim təmikis rəhan nıməhan, məmə in otətəut-in in pisin. Məto ik, nəkətatig lilin əm nulan, kən okol nəsimisən nian kit.”

¹³Uhgın təməsən-ipən agın-əhən kəm nagelo kit rəhan məmə, “Ik əpələh e rəhak matip, ikin rəha nepətən ne nisaiiən, kən matəsahgin. Pəs io ekos-iəhau rəham tikimir min, mol ilat kotahmen e nıməhan kit itəm nateguafəl nelkəm lan.”

¹⁴Məto nagelo min, ilat iolwək min əm. Nagelo min, ilat narmin min itəm Uhgın təmahl-ipa məmə okoatehm netəmim itəm okotos nəmegəhən ron.

Hiprus 2

Nən-iəhauən itəm o nuwinən e naiəh

¹Iesu in ilis pik. Tol nulan, təwir məmə kitat okotətəlig-in wir nat naka itəm kitat kəmotəto, məmə naiəh rəha nitəhəi təsiləsən kitat.

²Nəghatən itəm nagelo min kəmoatən-iarəp in nıpahrienən, kən netəmim ilat okotos nalpinən o nətgəhlən Lou ne nəlpah-inən nolən nat Lou tatən.

³?Tol nəhlan, kən kitat okotəhrol nulan motagim okəmə kitat kotol nat əpnarın əm e nosmegəhən asol əh rəha Iesu? Nosmegəhən u, itəm Iərəməərə təmaıpən mən-iarəp, kən netəm min u itəm kəmotəto, ilat kəmotəgətun kəm kitat məmə in nıpahrienən.

⁴Uhgin tēmatig mol min nēfigēmān o nēghatēn əh e nolēn nēmētēn min, ne natimnat min itēm narmī netēmim tatiwīg ron, ne nat pīspīs min, ne nos-ipamēn nēsanēnēn min rēha Narmin Rēha Uhgin o nolēn wək.

Iesu tēmuwa mahmen e pian min

⁵Nagelo min okol kēsotērēmārēn e nētueintēn itēm otēpanuwa, itēm kotēghat-in.

⁶Məto-inu Naoa Rēha Uhgin tatēn mēmə, “Etēmim in nat ənrapin əm, məto ik, nīkim tatəht in, ik nēsaluinēn, kēn ik natehm wir nēti etēmim.

⁷E nian əkuəkīr əm itēm ik nēmos-iəhau in, teiuaiu ləhau e nagelo min, kənu mos-ipēn nērēmārēn ne nepētēn ne nisīaiiēn kəm in.

⁸Kēn ik mos-ipēn nepētēn mēmə in otērēmārə e natimnat rafin.” Roiu əh, tatēn mēmə, “natimnat rafin,” nīpētēn un mēmə Uhgin tēsapēsēn nat kitīəh ne mēmə etēmim tēsērēmārēn lan. Məto kitat kēsotehmēn əh natimnat min əh kotuwa.

⁹Məto nat kitīəh kitat kēmotehm, inu Iesu, itēm “e nian əkuəkīr əm nēmos-iəhau in teiuaiu ləhau e nagelo min” kēn roiu əh “kīnos-ipēn nepētēn ne nisīaiiēn kəm in” məto-inun in tēmos nahmēn mīmīs o kitat. Əwəh, e nəwirēn rēha Uhgin, Iesu tēmīmīs o netēmim rafin e nētueintēn.

¹⁰Uhgin tēmōl natimnat rafin məto-inun in tēmōlkeike mihin, kēn natimnat rafin kotatig-pēn e nelmin. Kēn təwir agin mēmə Uhgin tēmōl Iesu u, tēmaupēn mohatip nol o nosmegəhēn netēmim, in tēməto nahmēn e nīmīsēn, mēmə in tətuatip agin o nēmīkēn nenəti Uhgin min tepət kotuwīn katig e nəhag-əhagēn rēha nəwirēn ne nēsanēnēn rəhan.

¹¹Iesu in tatol rəhan netēmim kotasim, mēmə rēha Uhgin əm, rəhalat nolēn rat tikə. Kēn Iesu ne rəhan min netēmim, rəhalat tata kitīəh əm. Tol nəhlan kēn Iesu in tēsaulisēn mēmə otaun-in ilat u mēmə pian min ne winin min.

¹²In tēmən-ipēn kəm Uhgin mēmə, “Io oekən-iarəp ik kəm piak min ne winik min ne natimnat min itēm ik nēmōl. Oekan napuēn mənwiwi ik e nuəfīmīnēn asol e nīganəmtīlat.”

¹³In tatən min mēmə, “Io oekələhəu-pən nahatətəən rəhak e Uhgīn.” Kən matən min mēmə, “Io u, itimat nisualkələh itəm Uhgīn təmos-ipa kəm io.”

¹⁴Nisualkələh min əh, Iesu tatəghat-in ilat, ilat nīpətīlat ne nītalat əh-ikīn. Ilat u netəmim agīn-əh əm. O nat u, Iesu təkəkəike muwa e nətueintən mos nīpətīn ne nītan tahmen əm elat mēmə in otuwa pialat pahrien. Təmōl nəhlan mēmə in otīmīs, kən nīmīsən rəhan, in otərəkīn nəsanənən rəha Iərmīs, itəm tətaskəlīm nəsanənən rəha nīmīsən.

¹⁵Məto-inu netəmim koatəgīn nīmīsən. Nəgīnən rəhalat tətaskəlīm ətain ilat nian rafīn, tahmen əm mēmə ilat slef min. Məto Iesu in tēmīmīs mēmə otiuw rəkīs netəm min u, mēmə sənəmə ilat slef min. In tēmīkīs ilat.

¹⁶Kotītun əsas mēmə sənəmə in təmasitu e nagelo min, məto in təmasitu e noanol min rəha Epraham.

¹⁷Iesu təkəike mos nīpətīn ne nītan nəhlan, mēmə in otuwa mol tahmen e pian min e nolən min rafīn, mēmə in tītun nasəkītunən kitat, kən koatagīle lan. In otəkəike muwa mol nəhlan, təgətun mēmə in pris asol agīn pahrien, tatol wək rəha Uhgīn, kən mēmə in otīlpīn neməha rəha Uhgīn.

¹⁸Kən roiu əh, nian Setan tatos-ipən-os-ipən kəm ilat, kən Iesu tītun nasitūən elat, məto-inu in min, in tīnəto tərət rəkīs nian Setan təmos-ipən-os-ipən kəm in.

Hiprus 3

Iesu in taprəkīs-in Moses

¹Piak min ne wīnīk min, Uhgīn tīnaun-in kələh kitat min itəmat o nuwīnən e nego e neai, kən mol mēmə kitat netəm iasim. Məto-inu Iesu tətāsitu nulan e kitat, itəmat onəkotəkəike katətəlig-in pīk Iesu əh, in aposol kən in pris asol agīn rəha nəfakən rəhatat itəm kitat koatən-iarəp.

²Uhgīn tēmīləs-ipər Iesu mēmə in otol wək u, kən in təmōl nəwīa Uhgīn e natīmnat rafīn, tahmen e Moses aupən təmōl nəwīa Uhgīn e rəhan wək rafīn, mēmə in otatehm wīr nīmə, inu netəmim rəha Uhgīn.

³Ilau kərən kətioal nəwia Uhgın, məto etəm təmiləkin nimə, netəmim koatiləs-ipər nərğın ron taprəkis-in nimə itəm in təmol. Kən e nolən kitiaħ əm, tətuatip məmə Uhgın otiləs-ipər Iesu taprəkis-in Moses.

⁴Kən nimə min rafin, netəmim koatiləkin, məto Uhgın in təmiləkin natimnat rafin itəm tətatiğ.

⁵Moses in iolwək kit e nıpəğnoa nimə rəha Uhgın, itəm tatol nəwia Uhgın, matehm nimə rəhan, inu netəmim rəha Uhgın. Kən nəmegəhən rəha Moses tatəpsen-pən natimnat itəm Uhgın otəpanəğətun.

⁶Kristo, in min tatol nəwia Uhgın. Məto sənəmə in iolwək əm kit tahmen e Moses. In Nətin, kən tatos nepətən o nərəmərəən e rəhan nimə. Kən okəmə kitat kəsotəğinən, kən motalkut məmə okotətul əskasik o nat un itəm kitat kəmotələhəu-pən nətəliğən rəhatat lan, kən motausit ron, kən nıpahrienən məmə kitat u, netəmim rəhan, kitat rəhan nimə.

Oatehm məha-məha itəmat min e nahatətəən rəhatəmat

⁷Nəğhatən u inu, Narmin Rəha Uhgın təmən e Naoa Rəha Uhgın məmə, “Roiu əm, onəkotəkəike moatətəliğ-in nəwian,

⁸məsotolən rəhatəmat-kapə təskasik pık, tahmen e tipitəmat min ilat kəmoatol mihin aupən moatəht nəwia Uhgın, nian ilat kəmoatek asğəwin Uhgın e ikin taruən-aruən ikin.

⁹Ikin əh, tipitəmat min kəmotəkəike kəm io məmə okotəplan rəhak nəsanənən, nat əpnarın ilat kəmotəplan pap natimnat min itəm emol o nup foti.

¹⁰Kən io iatol neməha kəm ilat, kən matən məmə, ‘Nikilat tətən isəu ron io nian rafin. Kən ilat motapəs nolən nat itəm iatən kəm ilat.’

¹¹Neməha təmol io, kən ekos noanawıl kit mən məmə, ‘Ilat okol kəsotuwinən e ikin katos nameğən ron io ikin.’”

¹²Piak min ne winik min, oatehm wir itəmat min o nat u. Otol məmə nikitəmat atip otəsəratən kən kit təsapəsən nahatətəən, mol məmə nəkotəuhlin-pən itəmat isəu o Uhgīn itəm tatəmegəh.

¹³Uhgīn təmən “Roiu əm,” kən nian u “roiu” tətətig əh. Tol nəhlan, nəkotəkəike moatəghat roiu kəm itəmat min, moatehm məha-məha itəmat min nian rafin, məmə nolən rat otəseiüə-inən itəmat kit mol rəhn-kapə təskasik o Uhgīn.

¹⁴Məto-inu okəmə kitat kotətul timentim mətoarus-pən namnun, motahatətə e Uhgīn təskasik miəkis, tahmen əm məmə inu kəmotətuoun motahatətə wi əm lan, kən tatəgətun məmə kitat kinoatos kələh natimnat min rəha Kristo.

¹⁵Məto sotaluinən nəghatən itəm kəmən, “Roiu əm, onəkotəkəike motətəlig-in nəwian məsotolən rəhatəmat-kapə təskasik pik, tahmen e tipitəmat min ilat kəmoatol mihin aupən moatəht nəwia Uhgīn.”

¹⁶?Kən pah min un itəm kəmotəto pap nəwia Uhgīn, məsotolən? Ilat un Moses təmit-irəkis ilat Ijip.

¹⁷?Pah min un kəmotol Uhgīn neməha tol o nup foti? Ilat un, netəm kəmotol nolən rat, kən moatəme motimis moatəməhl ərnapin əm əpəh ikin taruən-aruən ikin.

¹⁸?Kən pah min un Uhgīn təmatəghat kəm ilat, matos noanawil məmə ilat okəsotuwinən motiet-arəpən ikin katos namegən ron ikin? In təmatəghat kəm netəm kəmotəht nəwian.

¹⁹Kən kitat koatəplan məmə kəməsegəhan-inən ilat məmə okotiet-arəpən ikin katos namegən ikin ron, məto-inu ilat kəsotahatətəən lan.

Hiprus 4

Ikin katos namegən o Uhgīn ikin

¹Məto kitat u, Uhgīn təmən-iəkis rəkis məmə kitat kotitun nuwinən imə ikin katos namegən ron ikin, kən nənīəkisən u, tatətul əh, materəh otat. Tol nəhlan, pəs kitat koatəto itat, kən moatəgin məmə kitat kit okol mətan təsosən namegən əh.

²Məto-inu kitat kinotəto rəkis namnusən təwir məmə Uhgın təmol əpen-əpenə ikin kit o namegən rəhatat, tahmen əm məmə inu netəm aupən kəmotəto nəghatən mihin. Məto nəghatən əh, təməsasituən elat, məto-inu ilat kəmoatəto əm, məsotahatətən lan.

³Məto-inu kitat netəm kəmotahatətə əm lan, kitat kotitun nuwinən imə, ikin katos namegən ron ikin. Məto rəha netəm min u itəm kəsotahatətən lan, Uhgın təmən məmə, “Neməha təmol io, kən ekos noanawil kit, mən məmə, ‘Ilat okol kəsotuwınən ikin katos namegən ron io ikin.’” Təmən nəhlan, nat əpnarın məmə tinol əpen-əpenə rəkis ikin katos namegən ron ikin nian in təmətuoun matol nətueintən.

⁴Kitat kotitun məmə tinol əpen-əpenə rəkis lan, məto-inu Naoa Rəha Uhgın in tatəghat-in Sapat, matən məmə, “Təmol nətueintən, kən e nian sepın lan, Uhgın təmameg e rəhan wək.”

⁵Məto ikin min neen e Naoa Rəha Uhgın, Uhgın tatən məmə, “Ilat okol kəsotuwınən ikin katos namegən ron io ikin.”

⁶Tol nəhlan, ikin katos namegən o Uhgın ikin əh, in tətətig əh məmə netəmim okotuwın ikin. Məto netəm min u aupən itəm kəmotəto namnusən təwir, ilat kəmotəmik-arəpən-in nuwinən ikin katos namegən ron ikin, məto-inu kəmotəht nəwia Uhgın.

⁷Kənu, uarisig lan, tol-pən Uhgın təmələhəu min nian kit min o nuwinən ikin katos namegən ron ikin. Nian əh, inu roiu. Uhgın təmən-iarəp nat u kəm Tefit məmə, “Roiu əm, onəkotəkəike motətəlig-in nəwian məsotolən rəhatəmat-kapə təskasik pik.”

⁸Nikitəmat tuəh-tu suah u Josua aupən. Okəmə Josua təmos-ipən namegən kəm ilat nian in təmit ilat moatuwin Kenan, kənu Uhgın okol təsən minən məmə otələhəu nian kit min məmə in nian rəha nuwinən imə ikin katos namegən ron ikin.

⁹Kən tol nəhlan, kən in təmən nian pisin kit min, nian əh-ikin tətətig əh o rəhan netəmim məmə okotuwın motos namegən, e nolən kitiəh əm itəm Uhgın təmameg mihin e rəhan wək min aupən, e nian rəha Sapat.

¹⁰Məto-inu etəm tatuwin imə məmə otos namegən u, in otameg e rəhan wək, tahmen əm e Uhgın itəm təmameg e rəhan wək aupən.

¹¹O nat u, kitat okotalkut əskasik məmə okotuwın imə motos namegən u. Təsəwirən məmə kitat kit, otətəu-pən nolən rəha netəm aupən itəm kəmotəht nəwia Uhgın, moatəme.

¹²Məto-inu Naoa Rəha Uhgın, in tatəmegəh məsanən mitahləpik e wək rəhan. Kən in tahmen e naip tasilə e nıkalın kərən mil. In titun nətarerəhən matəplan nətəligən min ne nıkin pisin pisin min e netəmim, tahmen əm e naip itəm tətətarerəh matəplan ikin tatilpin min ikin e nıkililitəm ne nəhau imə agin. In tətakil nətəligən min ne nolən anion min e nıkitəm.

¹³Uhgın tatəplan natimnat rafın e nətueintən tahmen əm məmə kəməte kitalkin-italkin katepik, koatəməhl piəpiə əm. Kitat okotəkəike motən-iarəp rafın agin natimnat itəm kəmotol kəm Uhgın u inu.

Iesu in təmuwa pris asol agin itəm təwir maprəkis, məto-inu in Uhgın pap, məto təmuwa etəmim

¹⁴Tol nəhlan, pəs kitat kotaskəlīm-iəkis nahatətəən rəhatat itəm kinoatən-iarəp rəkis, məto-inu kitat koatos pris asol agin kit rəhatat in iahgin. Inu Iesu, Nəti Uhgın, itəm tinuwın rəkis imə e nego e neai.

¹⁵Məto-inu rəhatat pris asol agin, in Pris kit itəm tatəto wir nıkitat, matəto wir otəhrol kitat kəsotahmenən, məto-inu natimnat rafın itəm tatek asgəwin kitat e nəmegəhən, natimnat kitiəh min əm, kinotek asgəwin rəkis in e rəhan nəmegəhən. Rəhatat pris asol agin, in tinitun rəkis rəhatat nəpouən min. Məto nat kitiəh əm un, in təsolən nat tərət kit.

¹⁶O nat u, pəs kitat kəsotəginən o nuwamən iuəhkir o jea rəha kig u, tətawte-in rəhan nəwirən kəm kitat. Kən ikin əh, in otasəkitun itat, kən mos-ipa nəwirən kəm kitat e nıkin agien, e nian rəha nəratən otuwa otat.

Hiprus 5

¹Kitat kotitun mēmā nian rafin Uhgīn tatitəpun suah kit kən matiləs-ipər in mēmā otuwa pris asol agin, mēmā in suatip rəha netəmim okotuwīn o Uhgīn. In suatip rəhalat o nos-ipənən natimnat kəm Uhgīn, kən in matol sakrifais o rəhalat nolən rat mīn.

²Roiu əh, mətō-inu pris asol agin u in etəmim kit, in titun nolən timətig əm o netəmim, nat əpnapin mēmā ilat kotəruru agin nat itəm tətuatip, ilat kotagim rəkis e suatip, mətō-inu in mīn, in təsahmenən, in tatol təfagə rat nian tərət.

³In tatol təfagə rat nəhlan, kən tol mēmā e nian rəha sakrifais, in otəkəike mol sakrifais o rəhan atip təfagə, kən matig mol mīn rəha netəmim mīn.

⁴Suah kit okol təsənən mēmā in otol wək rəha pris asol agin, matiləs-ipər atip in. Kəpə, Uhgīn otəkəike maun-in rəhan kit etəmim mēmā in otol wək u, tahmen əm mēmā inu təmaun-in mihin Eron aupən.

⁵Tol nəhlan, Kristo in təmisiləs-ipər atipən in mēmā in pris asol agin. Mətō Uhgīn in təmitəpun, kən mən-ipən kəm in mēmā, “Ik nətik. Roiu enuwa rəham tata ətuatip.”

⁶Kən ikin kit mīn e Naoa Rəha Uhgīn, in tatən mēmā “Ik pris kit tahmen e Melkisetek aupən, kən ik onakatol wək rəha pris nian rafin, matuwīn matuwīn namnun tikə.”

⁷E nəmegəhən rəha Kristo e nətueintən u, in tatəfak kəm Uhgīn, matətapəh-in nasituən, mətəsək əfəməh, nahui nəmtin titaiəh. Uhgīn tatos nəsanənən o nosmegəhən in e nimisən. Kən in təmatisiai-in Uhgīn, kən matol nəwian, kən o nat u, Uhgīn təmətō in.

⁸Nat əpnapin mēmā Kristo in Nəti Uhgīn, mətō in təmətō nahmən. Tol nəhlan, nahmən rəha Iesu, təmol in titun wir nipəti nolən nəwia Uhgīn,

⁹kən təmuwa etəm ətuatip rəha nolən wək rəha pris asol agin rəhatat. Kən in təmol suatip o nosmegəhən lilin rəhan netəm mīn u koatol nəwian, matos wir ilat, matuwīn matuwīn namnun tikə.

¹⁰Kən Uhgín tamos-ipən nərig u kəm in, məmə in pris asol agin tahmen əm e suah u Melkisetek aupən.

¹¹Itimat emotos nəghatən tepət mə ekotən-ipinə kəm itəmat, məmə Iesu in pris asol agin tahmen e Melkisetek. Məto tiəkis pik o nən wirən ilat rafin kəm itəmat, məto-inun itəmat nəkoatəlpah-in pik nətoən nat kit kən mitun.

¹²Itəmat nəmotahatətə nuwəh rəkis, kən təwir məmə itəmat ninotuwa rəkis iəgətun min rəha nəghatən rəha Uhgín. Məto kəpə, itəmat nəkoatol əm nulan. Roiu əh, kəike kəgətun min itəmat, tətoun min e nəukətin nəghatən min rəha Uhgín. Nipahrienən u, itəmat ninotahmen-in rəkis nunən nagwənən əskasik min, məto nəkotahmen əm məmə kətapinahin əh itəmat.

¹³Məto e netəm min u itəm koatəmah əh nəhlan, ilat u nisualkələh mətmətig, itəm koatəkəku əh, kəsotenatig wirən əh o nitunən nəgətunən min rəha nolən ətuatip.

¹⁴Məto nagwənən əskasik in nigə netəm rəhalat nitunən tinimətə rəkis, itəm kəmotiww rəhalat nətəligən o nitunən natimnat pisin pisin min itəm tətuatip ne itəm tərət, kən ilat moatol itəm təwir, in əm in əm.

Hiprus 6

¹Tol nulan, təwir məmə kitat okəsotəgətun minən nəukəti nəgətunən rəha nahatətən e Kristo, məto pəs kitat okoatəkəike moatuwin məmə okotimətə e Iesu Kristo. Kitat kinotəuhlin rəkis kitat e nolən min itəm kotitun nit-ipənən item e nimisən. Kitat kinotahatətə rəkis e Uhgín. Tahmen əm məmə kinotafəl rəkis nəme nimə. Nian əh-roiu in rəha nəgpəhap-inən nimə.

²Kitat kinotitun rəkis nəgətunən min rəha nolən pisin pisin min rəha naikuasən, kən minotitun rəkis nəgətunən min rəha nələhəu-pənən nelmitəm e rəhn-kapə etənim, o nəfakən lan. Kən kitat kinotitun rəkis məmə kitat okotətul min e nimisən, kən motitun min məmə Uhgín otakil netənim, kən mos-ipən nalpinən lilin rəhan kəm netəm kotol təfagə rat. Natimnat min u, kitat kinotəghat-in rəkis, təsəwirən məmə kitat koatisimatip e nəghatən kitəh min əm nian rafin.

³Tol nulan mēmā okēmā Uhgīn tēmegəhan-in əm kəm kitat, kən kitat okotuwa netəm kinotimətə rəkis.

⁴?Okotalkut mēmā okotol nulan, mətō təhrol e netəmim itəm kəmotuwa o Uhgīn mətō roiu kinotapəs Uhgīn motəuhlin mīn məntaalat o Kristo? Ilat əh, ilat netəm kəmotehm nəhag-əhagən, kən kinotun asgəwīn rəkis noan e nego e neai itəm Uhgīn tatos-ipa, kən minoatitun mēmā in təwīr, kən minoatos rəkis o Narmin Rəha Uhgīn.

⁵Kən ilat u, netəm kinotun asgəwīn rəkis mēmā nəghatən rəha Uhgīn in təwīr, ilat kinotətō rəkis nəsanənən rəha nərəmərən rəha Uhgīn itəm otəsuwəhən tuwa.

⁶Mətō okēmā ilat kəmotəuhlin məntaalat o Uhgīn, suatip kit tikə mīn mēmā okotəuhlin-pa mīn ilat o Uhgīn. Ilat kəmotərəkīn atip əm ilat, mətō-inu tahmen-pən əm mēmā kinotəht-ipən mīn əm Nəti Uhgīn e nig kəməluau, moatiləs-ipər mīn e niganəmti netəmim, kən ilat kinoatol mīn mīlə lan, moatərəkīn.

⁷Nikim tuəh-tu nat u. Nəptən u tatos wīr nuhuən itəm tatəfik, kən in nagwənən tepət lan nigī netəm mīn un, koatol wək ikīn. Uhgīn nikin tagien pik ron, kən nəwīrən rəhan tətətig lan.

⁸Mətō nīməptən rat itəm təsosən nat wīr tepət lan, kən iapil-iapil ne kiras əm katuəwiə lan. Nəptən əh tinəsəwīr mīnən o nat kit. Tinətaiu əm o nərəkīnən. E namnun, nigəm otus natimnat itəm kotətig lan.

⁹Piak mīn, nat əpnapin io iatəghat nulan kəm itəmat, mətō ekitun wīr mēmā itəmat nəsotahmenən e nəptən rat əh. Ekitun wīr mēmā itəmat noatos natimnat mīn u itəm təwīr maprəkis, itəm Uhgīn təmos-ipinə kəm itəmat mətō-inun in tatosmegəh itəmat.

¹⁰Uhgīn okol təsaluinən rəhatəmat wək mīn nəmoatol mətō-inu Uhgīn rəhan nolən tətəuatip əm nian rafin. Kən okol in təsolən nat əpnapin e nolən wīr rəha nolkeikeən itəm nəmotol kəm in, kən moatol əh, nian nəmotasitu e rəhan netəmim.

¹¹Itimat ekotolkeike mēmā itēmat rafin nakoatəkēike katos nolkeikeēn itēm nēkoatol, moatol mēmā otatuwin e namnun, kēn itēmat nakotos nat un itēm nakotagile lan.

¹²Itimat esotolkeikeēn mēmā nakotēlpah, mēto ekotolkeike mēmā onəkotos nolēn rēha netēm min un itēm kotaiu aupēn. Ilat kotahatētē əskasik e Uhgīn kēn moatol rēhalat nētēligēn kaifēməh. Moatol nēhlan, kēn roiu, ilat kinotos rəkis natimnat itēm Uhgīn tēmən-iəkis mēmā rēhalat.

Rəhatat iagke tətatiġ e nego e neai

¹³Nəniəkisēn kit tol nēhlan, itēm Uhgīn tēmən kēm Epraham aupēn. Nian Uhgīn tēmōl nəniəkisēn rēhan, kēn nərig kit tikə min mēmā in otos mol nəniəkisēn lan rēhan tēfigēm. Mēto-inu nərgin in ilis taprəkis-in nərgin min rafin. Tol nēhlan, Uhgīn tēmos noanawil atip əm e nərgin, matēn mēmā,

¹⁴“Io oekəhlman rəhak nəwirən kēm ik, iahgin. Io oekol rəham noanol otuwa tepət tepet.”

¹⁵Mēto-inu Epraham rēhan nētēligēn tēfēməh, in tēmatəsahgin matuwīn matuwīn, mētoarus nian in tēmos natimnat min un itēm Uhgīn tēmən-iəkis mēmā otos-ipən kēm in.

¹⁶Nian etēmim tatos noanawil e nərgi etēm-iasol kit rēhan, kēn noanawil u rēhan, tatēlis rēhan nəghatən tēfigēm. Kēn netēmim okotəkēike motahatētē e rēhan nəghatən, okol kəsotərgəhəu minən ron.

¹⁷Uhgīn tēmos noanawil e nərgin nēhlan, mēto-inu in tolkeike mēmā otol netēm min un itēm okotos natimnat min itēm in tēmən-iəkis, ilat okotitun wir mēmā rēhan nalpəkauən, okol təsəuhlinən nian kit.

¹⁸Uhgīn tatos noanawil nēhlan mēmā otiləs-ipər nētēligēn rəhatat u, itēm kinotiet rəkis motagim kēn moatahgil-pən lan. Kēn pəs kitat kotaskəlīm-iəkis nolēn əh itēm Uhgīn tinos-ipa rəkis kēm itat, mēmā kitat okotagile əskasik e nəniəkisēn min rēhan. Nat mil u, ilau okol kəsəuhlinən nian kit, mēto-inu Uhgīn, təseiūən nian kit.

¹⁹Kitat kotələhəu-pən rəhatat nətəligən təskasik o nosən natimnat min əh, tol nəhlan, mol məmə in tahmen e iagke kit itəm tətəskəlim wir rəhatat nəmegəhən, məmə nat kit otəsəloalən lan kən məsiuw rəkis minən kitat. Tahmen əm məmə iagke u, in tinatig rəkis əpəh imə e Ikin Tasim Agin Ikin, əpəh ilis e nego e neai, e nəwtain nīməhan imə-pən ikin.

²⁰Ikin əh, Iesu tinuwın rəkis ikin rəhatat lan, məmə oterəh e suatip rəhatat. In təmuwa rəkis pris asol agin tahmen əm e pris u Melkisetek auppən, kən in otatos wək u nian rafin, namnun tikə.

Hiprus 7

Melkisetek, Kig rəha Nətuatipən, Kig rəha Nəməlinuən, ne pris rəha Uhgın Ilis Agin

¹Suah u, Melkisetek, in kig rəha Salem, kən in pris rəha Uhgın u Ilis Pık Agin. Auppən, nian Epraham təmuwın e nəluaginən ilat kig min, kən in təmöl win elat. Kən in minitəlig minatuwa. Melkisetek, in təmatuwın məplan Epraham e suatip, kən in təməfak mətapəhin-pən məmə Uhgın otəhlman nəwırən kəm Epraham.

²Kən Epraham, təmos-irəkis tait e rəhan natimnat min itəm təmöl win lan e nəluaginən, kən mos-ipən kəm Melkisetek. Melkisetek u, nıpəti nərgin un, “Kig rəha Nətuatipən.” Kən nərgin kit min u, kətaun-in məmə Kig rəha Salem, nıpətin u məmə, “Kig rəha Nəməlinuən.”

³Naoa Rəha Uhgın təməsəghat-inən rəhan tata ne mama ne rəhan noanol min. Kən təsənən nian təmaiir lan, ne nian itəm təmimis lan. Tahmen əm məmə in təməsimisən, in tatol əh wək rəha pris. Tol nəhlan, nəkəplan məmə in tahmen e Nəti Uhgın u, in pris lilin kit.

⁴Nikim tuəh-tu Melkisetek. In etəm-iasol kit. Nat ənpapın məmə tipitat u Epraham in etəm-iasol, məto in təmatisiai-in pık Melkisetek, matos-ipən rəhan nat asol min əm, in əm in əm, məmə rəhan tait kəm in.

⁵Kitat kotitun məmə, e nup min rafin, netəm Isrel ilat kotəkəike moatos-ipən rəhalat tait kəm noanol min rəha Lifae, ilat u pris min, tahmen-pən əm məmə inu Lou rəha Uhgın tatən mihin. Nat ənpapın məmə pris min əh, ilat noanol

min rəha Epraham, məto netəm iməlat ikin ilat kotəkəike moatos-ipən tait kəm ilat.

⁶Melkisetek u, in sənəmə noanol kit rəha Lifae. Məto in təmos tait min u rəha natimnat rəha Epraham. Kən in təməfak-pən kəm Uhgın məmə otəhlman nəwirən rəhan kəm Epraham u, Uhgın təmos-ipən rəhan nəniəkisən kəm in.

⁷Kən tətuatip agın məmə etəmim itəm tatos nərig asol otəfak məmə Uhgın otəhlman nəwirən tatuwin e etəmim itəm ləhau əm lan.

⁸Kən pris min u itəm koatos tait u, ilat netəmim əm, itəm okəpanotimis. Məto Melkisetek u, in tatos tait, katən məmə in tatəmegəh.

⁹Epraham təmatətou rəhan tait tatuwin kəm Melkisetek nulan, kən kitun nənən məmə Lifae u, etəm tatos tait rəha netəm Isrel, in min təmos-ipən tait kəm Melkisetek.

¹⁰Məto-inu nian Melkisetek təməplan Epraham, Lifae təməsaiirən əh. Məto nian Epraham təmətou nulan tait tuwin kəm Melkisetek, in tahmen əm məmə rəhan u noanol, Lifae, in min təmətou-pən tait kəm Melkisetek, məto-inun in tinətatig rəkis e nıpəti rəhan pipi.

Kristo in tahmen e Melkisetek

¹¹Wək rəha pris min u, kəmotisi-pən e noanol rəha Lifae, in nəukəti Lou itəm Uhgın təmos-ipən kəm netəm Isrel. Məto wək rəha pris min u, in təsəwirən mahmen. Məto-inu pris min u, ilat kəsotahmenən. Uhgın təməgətun məmə ilat kəsotahmenən nian in təmiləs-ipər pris kit min tuwa. Kən pris un in təruru nısi-pənən e noanol rəha Lifae ne Eron, məto in pris kit tahmen e Melkisetek.

¹²Nian kəməuhlin nolən rəha nitəpunən pris, kən okəike kəuhlin min Lou.

¹³Otəkəike mol nulan məto-inun, kitat koatətəghat-in İərəməərə rəhatat, itəm təmisi-pən e noanol kit itəm sənəmə noanol ətuatip rəha pris min, itəm koatol wək e olta.

¹⁴Kitat kinotitun rækis mēmə Ierəmərə rəhatat in tēmisi-pən e noanol rəha Juta, kən nian Lou rəha Moses tēmatəghat-in wək rəha pris min, in tēməsəghat-in agin-əhən noanol u.

¹⁵Məto təwir əm, məto-inu kitat kinotitun mēmə pris kit min tinəmuwa rækis, itəm tahmen e Melkisetek.

¹⁶In təmuwa pris, məto sənəmə Lou tēmol mak e noanol rəhan mēmə noanol u in rəha pris min. In tēmos wək rəha pris e nat kit itəm tēsanən maprækis-in Lou, inu nēsanənən rəha nēmegəhən u rəhan itəm namnun tīkə.

¹⁷Naoa Rəha Uhgīn tatən mēmə, “Ik pris kit tahmen e Melkisetek aupən, kən ik onakatol wək rəha pris nian rafīn, matuwīn matuwīn namnun tīkə.”

¹⁸Kəmələhəu kalīn Lou aupən, məto-inun rəhan nēsanənən tīkə, in tēsasituən, okol tēsələn nat kit.

¹⁹Məto-inu Lou əh, təruru nələhəu ətuatipən nat kit. Kən roiu əh, nolən pīsīn kit itəm təwir maprækis, in tīnos nēmeen, mēmə kitat okotələhəu-pən rəhatat nətəlīgən lan. Kən in suatip rəhatat u, o nuwīnən iuəhkīr o Uhgīn.

²⁰Uhgīn tēmən-iækis mēmə Kristo in otol wək rəha pris matuwīn matuwīn namnun tīkə, kən tēmos noanawīl ron, mēmə rəhan nəghatən otəfigəm. Məto tēməsosən noanawīl mihīn e pris min aupən.

²¹Məto Uhgīn tēmos əm noanawīl nian Iesu təmuwa pris. Naoa Rəha Uhgīn tatən mēmə, “Ierəmərə tēmos noanawīl kit, kən okol kəsəuhlinən nətəlīgən rəhan. In tatən mēmə, ‘Ik onəkol wək rəha pris nian rafīn, matuwīn matuwīn namnun tīkə.’”

²²Uhgīn tēmos noanawīl nəhlan, matol mə Iesu tuwa mol suatip itəm tatol kitat kotitun əsas mēmə nēniækisən rəha nasituən in təwir, maprækis-in nēniækisən u aupən.

²³Aupən, pris min ilat tepət, məto-inun kitīəh tol wək matuwīn matuwīn mīmīs un, kit tos nēmeen, mol wək matuwīn matuwīn, mīmīs moatol əm nulan. Ilat kəsotolən wək lilīn.

²⁴Məto Iesu, in otos wək rəha pris rəhatat matuwın matuwın namnun tikə, məto-inun, tətatig lilin.

²⁵Tol nəhlan, in titun nosmegəh lilinən kitat u, kotilpın kitat min məmə koatuwin o Uhgın, məto-inu in tatəmegəh lilin, tatəghat rəhatat lan kəm Uhgın.

²⁶O nat u, inun in pris asol agın itəm in tahmen o nasituən etat. In tasim, kən mətuatıp wir, in təsolən nolən rat. In tol pısın agın e netəm koatol təfagə rat, kən in ilis taprəkis-in ilat əpəh e nego e neai.

²⁷In tol pısın e pris asol agın min un aupən. Nian rafın, ilat kotəkəike kaupən moatol sakrifais o nafəl rəkisən təfagə rat rəhalat. Uarisig lan un, ilat kəpanotol min sakrifais kit min, o nafəl rəkisən təfagə rat rəha netəmim min. Məto nian Iesu tategəhan-in məmə in otol sakrifais atıp e rəhan nəmegəhən, kən mau kitiəh əm in tahmen moau.

²⁸Lou in tatiləs-ipər pris min itəm kəsotahmenən. Məto noanawıl rəha Uhgın, itəm tatarisig-in Lou, in tatiləs-ipər Nətin u, itəm təwir mahmen agın o nolən wək u, matuwın namnun tikə.

Hiprus 8

Iesu in pris asol agın təwir maprəkis-in netəm min un kəmotol wək rəha pris asol agın aupən

¹Kitat koatəghat-in nat u, məto nəukətin tol nulan. Kitat koatos pris asol agın kit, tətuatıp əm e itəm un ematən. In tinatəpələh rəkis e rəhn matıp Etəm-iasol əpəh ilis e nego e neai, ikin rəha nepətən ne nisaiiən.

²In tatol wək əpəh Ikin Tasim Ikin e nego e neai, inu Nimə Tapolən pahrien itəm Uhgın əm təmiuw. Sənəmə etəmim itəm təmiuw Nimə Tapolən əh.

³Kəmiləs-ipər rafın pris asol agın min u aupən, məmə okoatos-ipən natimnat min kəm Uhgın, kən moatol sakrifais. E suatıp kitiəh əm, rəhatat u pris asol agın, in min otəkəike mos-ipən sakrifais kit kəm Uhgın.

⁴Okəmə in tətatig əh e nətueintən u, kən okol sənəmə in pris kit, mətō-inu pris min əpəh ikin koatatig itəm koatos-ipən natimnat kəm Uhgīn, tahmen əm mə inu Lou təmən mihin.

⁵Pris min u, ilat koatol rəhalat wək e narmi nimə əm itəm tatasgəwīn natimnat min itəm tətatig e nego e neai. Tol nəhlan, nian Uhgīn təmən-ipən kəm Moses aupən, məmə otiuw Nimə Tapolən Asim, in təmən məmə, “Onakəkəike matehm wir məmə onəkol natimnat min u tətuatip tahmen əm e rəhak mak itəm emol matəgətun rəkis ik lan əpəh ilis e nitot asol.”

⁶Mətō roiu, Iesu, pris asol agin u rəhatat, in tinos rəhan wək itəm təwīr təwīr maprəkis-in wək rəhalat. Kən e nolən kitīəh əm, Iesu in suatip rəha nəniəkisən wi rəha nasituən u, in təwīr maprəkis-in nəniəkisən oas rəha nasituən. Mətō-inu nəniəkisən wi u, in tatətul-pər e nəghatən min itəm kotəwīr motaprəkis.

⁷Mətō-inu okəmə kəsehmən nat tərət kit e nəniəkisən oas, okol nəniəkisən wi təsosən nəmeen.

⁸Mətō Uhgīn təməplan nəratən rəha netəmim, kən təmən məmə, “Nian əh-ikin otəpanuwa, itəm io, oekol nəniəkisən wi rəha nasituən rəha noanol min rəha Isrel ne noanol min rəha Juta.

⁹Nəniəkisən rəha nasituən u, in otol pisin agin e nəniəkisən oas rəha nasituən, itəm io emol kəm tipilat min aupən, e nian u itəm io emos nelmilat matit ilat moatiet rəkis Ijip. Oiakol nəniəkisən wi rəha nasituən, mətō-inu ilat kəməsotaskəlīmən nəniəkisən u itəm io emol kəm ilat aupən, kən tol məmə io emapəs ilat, maluin.

¹⁰Kən io, Iərəməərə, iatən-iarəp məmə, e nian itəm otəpanuwa, io oekol nəniəkisən wi kit rəha nasituən kəm noanol min rəha Isrel. Oekos-ipən rəhak lou min e rəhalat-kapə, kən oekəte rəkis-pən e nikilat, kən io ekuwa mol Uhgīn ətuatip rəhalat, kən ilat okotuwa kol rəhak ətuatip netəmim.

¹¹Ilat kit okol t̄suwin̄n m̄ḡetun net̄m iman ikin m̄m̄, ‘Ik onak̄k̄ike mitun Īr̄m̄r̄ u.’ K̄n et̄mim kit okol t̄suwin̄n m̄n-ip̄n n̄ghat̄n u k̄m pian, m̄to-inun ilat rafin okotitun io, t̄tuoun e net̄m ̄n̄p̄in min muwin m̄toarus-p̄n net̄m koatos n̄rig asol min.

¹²M̄to-inun, io, ekas̄kitun ilat o r̄halat nol̄n min it̄m t̄s̄tuatip agin-̄h̄n. Io oekaf̄l r̄kis nol̄n rat min r̄halat, k̄n io oekaluin nol̄n rat min r̄halat.”

¹³Nian Uhgin tat̄ghat-in n̄nīkis̄n r̄ha nasitūn u, m̄m̄ in n̄nīkis̄n wi, n̄p̄̄t̄in u m̄m̄ n̄nīkis̄n r̄ha nasitūn aup̄n, tinoas min̄rat. K̄n nat it̄m in tinuwa minoas, tin̄sahmen min̄n, k̄n ot̄suw̄h̄n, tik̄.

Hiprus 9

Ikin Tasim Ikin e n̄tueint̄n ne Ikin Tasim Ikin e nego e neai

¹K̄n e n̄nīkis̄n r̄ha nasitūn it̄m t̄maup̄n matig, ilat okot̄ike mot̄t̄up̄n suatip ̄tuatip min o n̄fak̄n. K̄n Nim̄ Tapol̄n Asim, in r̄ha n̄tueint̄n ̄m u.

²Net̄m aup̄n, k̄motīuw Nim̄ Tapol̄n Asim u, moatol noan kit ̄p̄h̄ ilugin ̄tuatip, k̄maḡhl noan k̄iu. Noan it̄m t̄taup̄n lan, koat̄n m̄m̄ Ikin Tasim Ikin. E noan ̄h, k̄mot̄l̄h̄u-p̄n nat kat̄htu-p̄r lait lan ikin, ne tep̄l kit it̄m k̄m̄lin-p̄r p̄ret asim min lan.

³K̄mīwosig nim̄han e noan uarisig, k̄n noan ̄h, kat̄n m̄m̄, “Ikin Tasim Agin Ikin.”

⁴Ikin ̄h, nat kit ̄h-ikin k̄mol e iaen u kol tatip̄t̄-ip̄t̄, it̄m kat̄mki-p̄n nat pien-pien lan, katuwaan. K̄n ikin ̄h, Bokis r̄ha N̄nīkis̄n R̄ha Nasitūn tat̄p̄l̄h̄ ̄h-ikin. Bokis u, k̄mol e nig, k̄n kalpin e iaen u kol tatip̄t̄-ip̄t̄. K̄n e n̄p̄̄ḡnoa Bokis ̄h, p̄t̄l̄ kit ̄h-ikin k̄mol e iaen u kol tatip̄t̄-ip̄t̄, k̄marigin-p̄n p̄ret u mana, noan m̄sin ikin. K̄nu k̄m̄l̄h̄u-p̄n min kasikin r̄ha Eron e Bokis u, kasikin it̄m aup̄n Uhgin t̄mol t̄wī min. K̄n k̄piel mil k̄iu ̄h-ikin, it̄m kuepin-epin, k̄m̄te r̄kis-p̄n Lou ilat ten elau.

⁵Kən ilis e rəhn-minat Bokis u, narmi Jerubim rəha Nəhag-əhagən, ilau kəiu əh-ikin. Kətiauwasig niməlməlilau o Ikin Katilpin Neməha rəha Uhgın Ikin. Məto okol esənən natimnat min u, məte əlkələh, pəs ekələhəu əm e səpag.

⁶Nian kəmotəlin wir rafin natimnat min u, pris min kotitun nuwinən imə miet e noan itəm tətaupən nian ilat koatol wək rəha nəfakən.

⁷Məto pris asol agin, in əm titun nuwinən imə e Ikin Tasim Agin Ikin. Məto okol təsuwinən nian rafin. In titun nuwinən nian kitiah əm e nup min rafin. Kən nian in tatuwin, in təike mos nita, kən mol sakrifais lan o nolən rat rəhan, kən matig mol min o nolən rat rəha netəmim, itəm ilat kotəruru məmə koatol təfagə rat.

⁸Kən e natimnat min u, Narmin Rəha Uhgın tatəgətun məmə, nian Nimə Tapolən Asim aupən təmatətul əh, kən suatip tikə o kitat o nuwinən e Ikin Tasim Agin Ikin.

⁹(In tahmen əm e narmi nat kit itəm tatəgətun e nian u itəm kotatig lan roiu.) Natimnat min itəm pris min koatos-ipən kəm Uhgın, moatol sakrifais lan kəm in, natimnat min u, kəsotahmenən o nələhəu ətuatipən nətəligən rəha netəmim itəm kotuwa o nəfakən.

¹⁰Məto-inu nəfakən oas aupən, in tatəgətun əm suatip min itəm koatən pik nolən rəha nagwənən ne nənimən ne naikuasən. Natimnat min u, in nat rəha nipətitem əm. Məto nolən min əh, ilat katipa əfigəm əm kit rəha netəmim, matuwın mətoarus-pən nian Uhgın otəuhlin natimnat rafin tuwa muwiwi.

Nita Iesu in sakrifais kit itəm in təwir maprəkis agin-əh

¹¹Məto roiu əh, Kristo tinuwa rəkis, kən in pris asol agin itəm təməmik natimnat wir min, minuwa. Kən in təmuwin imə e Nimə Tapolən Asim itəm təwir təhmin min, maprəkis-in itəm təmaupən. Nimə əh, in sənəmə nat kit itəm netəmim kəmotol, kən sənəmə nat kit rəha nətueintən u itəm Uhgın təmol.

¹²Nian Kristo tēmuwin imə e Ikin Tasim Agin Ikin, tēməsuwinən e nup min rafin, tahmen e pris asol agin min aupən kəmotol mihin. In tēmol mau kitiaħ əm, kən tahmen, mətə-inun in təsosən nita nəni ne nita nəti kau muwin imə məmə otos-irəkis təfagə rat. Kəpə, in tēmos atip əm nitan, muwin imə, kən in əm tēmətou nəmtitat mikis itat e təfagə rat min.

¹³E nolən rəha nəniəkisən rəha nasituən aupən, kəmorautin-pən nita nəni ne kau, o nəmtapi kau itəm kəmuwaan ətip e olta, korautin-pən e suah kit itəm tamkimik e niganəmti Uhgın məmə nipətin otaruətuəħ, namkimikən tikə lan.

¹⁴Mətə nita Iesu in tatos nəsənənən asol taprəkis-in natimnat min u. Kristo in tēmol atip sakrifais lan, e nəsənənən rəha Narmin itəm tətətig lilin. In sakrifais kit itəm tətuatip agin, nəratən kit tikə lan. Tol nəhlan, kən nitan in tatos nəsənənən, tahmen o nafələn nikitəmat o nolən min itəm kotitun nitipənən itəm e nimisən, məmə itəmat onəkotəfak əm kəm Uhgın itəm tatəmegəħ.

¹⁵O natimnat min u itəm Iesu tēmol, in suatip o nosən nəniəkisən wi rəha nasituən. Uhgın tēmaun-in netənim rəhan, kən mən-iəkis kəm ilat məmə natimnat wir min u, in rəhalat. Kən natimnat min u, okol kəsotikəən nian kit, mətə okoatətig lilin. Ilat okotos natimnat min un, mətə-inun nimisən rəha Kristo in tinətou rəkis nəmti təfagə rat rəha netəm min un itəm kəmoatətgəhl Lou rəha nəniəkisən rəha nasituən itəm tēmaupən matig.

¹⁶Okəmə Iesus təsəmisən nəhlan, kən rəhan netənim okəsotosən natimnat wir min itəm in təmən-iəkis mə rəhalat. Mətə-inu okəmə suah kit tol nəniəkisən kit məmə nian in otimis, kən rəhan natimnat otuwın o suah pisin kit, kən suah u in otəkəike mimis pitən, kənu nəniəkisən rəhan in otətətig matəmegəħ.

¹⁷Nəniəkisən kit tol nəhlan, təsətigən məsəmegəħən nian etəm təmən tətətig əħ. Rəhan nəniəkisən in otətətig matəmegəħ əm nian in tinimis rəkis.

¹⁸O natimnat min u, e nəniəkisən rəha nasituən aupən, nita nat megəħ kit təike maiəħ, təgətun məmə nat kit təmimis, kən otol məmə nəniəkisən in tatəmegəħ mətətig.

¹⁹Tol nəhlan, nian Moses in təmatən-iarəp rəkis nəghatən min rafin rəha Lou kəm netəmim, kən uarisig lan, in təmos nīməme sipsip kəmol tasiə, ne nelmi nig u hisop, meer-pən e nita nəti kau ne nita nəni ne nəhau, kən təmorautin-pən nita e naoa rəha Lou ne netəmim min.

²⁰Kən in təmən-ipən kəm ilat məmə, “Inu nita nat megəh kit itəm tatimis o nolən nənəkisən rəha nasituən rəha Uhgin tətətig matəmegəh. Kən itəmat nəkotəkəike moatisiai-in, moatol nəwian.”

²¹E nolən kitiəh əm, Moses təmorautin-pən nita e Nimə Tapolən Asim ne natimnat min itəm kəmos o nəfakən.

²²Lou tatən məmə pris otəkəike matol-pən nita e natimnat tepət, iuəhkir natimnat rafin, məmə ilat okotasim. Kən okəmə nita təsaiuən ron, kən Uhgin okol təsafələn təfagə rat.

²³Tol nəhlan, nita rəha nolən sakrifais, in təmaiəh o nolən natimnat min u, kotasim. Məto Nimə Tapolən Asim ne natimnat min rəhan əh-ikin, ilat narmi natimnat min əm itəm tatəpsen-pən natimnat itəm koatətig e nego e neai. Məto nəfakən o natimnat itəm tol nipəti nat agin-əh min, itəm kotətig e nego e neai, nita nat megəh təsahmenən o nolən ilat kotasim. Okəike kol sakrifais kit itəm təwır maprəkis.

²⁴Iesu in təsuwinən imə e Ikin Tasim Ikin rəha nətueintən u, itəm netəmim əm kəmotol. Nimə əh, in narmi nat əm rəha Ikin Tasim Ikin pahrien əpəh ilis e nego e neai. Məto Iesu təmuwin e nego e neai, kən roiu əh in tatən-ipən natimnat rəhatat lan kəm Uhgin e niganəmtin.

²⁵Kən nian Iesu təmol atip sakrifais e rəhan nəmegəhən, in rəhan nolən tol pisin e pris asol agin u aupən. E nənəkisən rəha nasituən u aupən, pris asol agin otəkəike muwin imə e Ikin Tasim Agin Ikin kən mos nita nat megəh, sənəmə nitan atip, mol sakrifais lan. Təike matol nəhlan e nup min rafin. Məto Kristo təmuwin e Ikin Tasim Agin Ikin e nego e neai, təmos atip nitan kən mol sakrifais lan mau kitiəh əm kən tinahmen.

²⁶Okəmə Kristo təmatol sakrifais nəhlan e nup min rafin, tahmen e pris min u aupən, in otəkəike mətə nahməən nian tepət tətoun e nian Uhgın təmol nətueintən. Mətə roiu, kitat kinotatig e namnun nian, in təmiet-arəpa mau kitieh əm, məmə otol atip sakrifais e rəhan nəmegəhən o nos-irəkisən təfagə rat. Kən rəhan sakrifais, in namnun.

²⁷Kitat netəmim, Uhgın tinələhəu nian ətuatip rəhatat kitieh kitieh məmə okotimis lan, mau kitieh əm. Kən uarisig lan un, in otakil rəhatat nolən min.

²⁸E nolən kitieh əm, Kristo təmol atip sakrifais lan, mau kitieh əm, məmə in otatipa-in təfagə rəha netəmim tepət. Mətə uarisig, nian otatitəlig-pa min, in otəsuwa-minən o nos-irəkisən təfagə rat, mətə o nosmegəhən netəmim itəm kotəsaħgin, nəumis tatus ilat ron.

Hiprus 10

Sakrifais rəha lesu, təmol nian kitieh əm, kən in tinahmen

¹Natimnat min rəha Lou, ilat kotahmen e narmi nat itəm otəsuwəhən kotuwa, mətə toapoap. Ilat sənəmə nipəti nat. E nup min rafin pris min koatol sakrifais. Mətə nat ənnapin məmə ilat koatol sakrifais, mətə Lou in təruru nolən iəfak min itəm kotuwa o Uhgın kotətuatip e niganəmtin, mətə-inun ilat narmi sakrifais aħgin, itəm toapoap.

²Okəmə sakrifais min ilat kotahmen, motitun nolən netəmim kotətuatip. Kən iəfak min kotitun nələhəuən motapəs nolən rəha sakrifais, mətə-inun nikilat tinəruən rəkis mau kitieh əm. Kən okəmə tinafəl rəkis nikilat nəhlan, kən ilat kəsotəto minən tərət o rəhalat nolən rat. Mətə, kəpə, ilat koatəto əh tərət.

³Tol nəhlan, e nup min rafin, ilat koatol pap sakrifais, mətə nat u tatol əm məmə ilat okol kəsotaluinən nolən rat min rəhalat,

⁴mətə-inu nita nəni ne kau in təruru aħgin nos-irəkisən təfagə rat.

⁵Tol nəhlan, nian Kristo tinatimnə e nətueintən, in təmən-ipən kəm Uhgın məmə, “Ik nakapəs sakrifais min ne natimnat min koatos-ipən kəm ik. Mətə ik nəmol-pən nipətik kit məmə ekuwin lan.”

⁶Kəmotuwaan ətip natimnat e olta tahmen e nəfakən rəhalat otimnə ron ik, kən moatol sakrifais o nafəl rəkisən təfagə. Məto nat əpnapin koatol nəhlan, məto kəsotolən məmə nıkim tagien elat.

⁷Kən io iatən məmə, “Kəməte nəghatən kit tətətig e Naoa Rəha Uhgın itəm tatəghat-in io məmə, ‘Uhgın, io u, emuwa o nolən rəham nətəligən.’”

⁸Kristo təmən aupən məmə, “Ik nakapəs sakrifais min ne natimnat min itəm koatos-ipinə kəm ik, ne natimnat min itəm katuwaan ətip e olta, ne sakrifais min itəm katol o nafəl rəkisən təfagə. Natimnat min u, ik nakapəs, kən kəsotolən məmə nıkim tagien elat,”

(nat əpnapin məmə ilat koatətəu-pən suatip itəm Lou təmən.)

⁹Məto Kristo tatən min məmə, “Io u, emuwa məmə ekol nətəligən rəham.” E nəghatən u rəhan, in tatoh-irəkis nəniəkisən oas rəha nasituən, məmə in otələhəu nəniəkisən wi rəha nasituən kit.

¹⁰Kən Iesu Kristo təmol nətəligən rəha Uhgın tol nulan. In təmol sakrifais atip e nıpətın, mau kitiəh əm, məmə otol kitat kotasim, kitat u rəhan netəmim min.

¹¹Nian rafın, pris min ilat koatətul moatol wək rəha nəfakən, moatol sakrifais, moatol nat kitiəh əm nian rafın, o nafəl rəkisən nolən rat. Məto sakrifais min u, ilat kəsotahmen agın-əhən o nos-irəkisən təfagə rat nian kit.

¹²Məto pris u rəhatat, tınol rəkis rəhan sakrifais mau kitiəh əm, kən sakrifais əh in tahmen mahgoau o nafəl rəkisən nolən rat rəha netəmim tatuwin matuwın namnun tikə. Kən nian tınələhəu rəkis nəhlan rəhan sakrifais, kən in tınatəpələh e nelmi Uhgın matip, ikin rəha nepətən ne nisıaiiən.

¹³Kən ikin əh, in tatəsahgin əm məmə Uhgın otol rəhan tikimir min kotahmen e nıməhan itəm tateguafəl nelkin lan,

¹⁴məto-inu e nolən sakrifais mau kitiəh əm əh, Kristo təmol rəhan netəmim kinotətumatip e nıganəmtin, matuwın matuwın, namnun tikə. Netəm min u, ilat un, itəm in tatol ilat koatuwa motasim.

¹⁵Kən Narmin Rəha Uhgın, in min tatən wir natimnat min u kəm itat. In təmən məmə,

¹⁶“İərəmərə tatən məmə, ‘Nian itəm otəpanuwa, oekol nəniəkisən wi rəha nasituən kəm rəhak netəmim tol nulan. Io oekos-ipən lou min rəhak e nıkilat, kən oekəte rəkis-pən e rəhalat-kapə.’”

¹⁷Kən in tatən min məmə, “Io oekaluin rəhalat nolən rat min, kən nıkkik otəsəht minən nolən min rəhalat itəm koatətğəhl Lou.”

¹⁸Nian Uhgın təmafəl rəkis nolən rat rəhalat, kən tol məmə ilat okəsotol minən sakrifais tuwin kəm Uhgın ron.

Pəs kotətul əskasik e rəhatat nahatətəən

¹⁹Piak min ne winik min. Tol nulan, kən nıta İesu təmol məmə kitat kotitun nuwinən imə İkin Tasim Agın İkin, kən məsotəginən.

²⁰Roiu əh, İesu in təməte suatıp wi kit, itəm tatəmegəh. In təməhap nıməhan itəm tatəkulosig İkin Tasim Agın İkin, tatəpsen-pən nıpətın. Kən mol suatıp wi u rəhatat məmə kitat kotitun nuwin-pənən ikin, motuwin o Uhgın.

²¹Kən pris asol agın rəhatat, in etəm-iasol itəm tatərəmərə e nımə rəha Uhgın, inun rəhan netəmim.

²²Tol nulan, pəs kotuwin iuəhkır e nıganəmti Uhgın, e nıkitat itəm tərıoah e nahatətəən pahrien. Məto-inu Kristo təmorautin-pən nıtan e nətəligən min rəhatat məmə kitat okotasim. Kən in təmaikuas rəkis e nıpətıtət e nəhau talien, in əm in əm.

²³Kitat kotəmə kəmotələhəu-pən nətəligən rəhatat e Kristo. Tol nəhlan, pəs kotətul tımtım lan, məsotələal-ələalən, məto-inu kitat kotitun nagileən e rəhan nəghatən min itəm tınəmən-iəkis rəkis kəm itat.

²⁴Pəs kotahluiə-ahluiə e nətəligən rəhatat min, məmə kitat okotolkeike kitat min, kən moatol təwır təwır kəm kitat min tatuwin təhmin min nəhlan.

²⁵Təsəwırən məmə okotəhlman nolən rəha nuəfiminən kitat min. Netəmim neen ilat koatol nəhlan, məto pəs kitat koatem məha-məha kitat min nian

rafin. Kən nian kotəplan məmə nian rəha nuwamən rəha Iesu tatuwa iuəhkir, təwir məmə kitat koatəkəike e nem əskasikən itat min, moatol tatər təhmin min.

²⁶Təwir məmə koatem əskasik itat min nəhlan, məto-inu okəmə kitat kinotitun rəkis nipahrienən, məto kəsotolən nat agin lan, kən kitat moatəkəike e nolən rat, kən tatol məmə sakrifais kit min tikə agin o nos-irəkisən təfagə rat rəhatat.

²⁷Kən okəmə sakrifais kit min tikə mə otos-irəkis təfagə rat rəhatat nəhlan, kən nat kitəh əm əh-ikin tətətig. Inun, kitat koatəgin, moatasiəp, məto-inun kitat kotitun wir məmə kitat koatəsahgin əm nalpinən əskasik, ne nigəm asol rəha neməha rəha Uhgın itəm otəkəike mus rəhan tikimir min.

²⁸E Lou oas rəha Moses aupən, okəmə suah kit tatol nat əpnapin e Lou, kən etəmim kəiu o kisil okəhalən-iarəp in, kən suah u təike mimis. Okol kəsotasəkitunən.

²⁹?Məto təhrol e netəm min un itəm koteguafəl-eguafəl Nəti Uhgın? Uhgın təmol nəniəkisən rəha nasituən kəm kitat, kən nita Kristo təmol nəniəkisən u tətətig matəmegəh. Nitan əm un, titun nolən etəmim tasim, kən in etəmim rəha Uhgın. ?Məto təhrol e etəmim itəm tatehm əpnapin əm nita u, məmə in sənəmə nat iasim kit? ?Narmin Rəha Uhgın in tatoor nəwirən rəhan kəm netəmim, məto təhrol e etəmim itəm tatən rat Narmin əh? Suah u, tətuatip agin əm məmə nalpinən rəhan in otəskasik maprəkis-in nalpinən rəha etəm tatətgəhl Lou rəha Moses.

³⁰Məto-inu kitat kinotitun rəkis Uhgın u itəm təmən məmə, “Nalpinən nitai nat, inu wək rəhak əm. Kən io oekalpin nitai nolən rəhalat tahmen ahmen əm.” Kən in təmən min məmə “Iərəməərə in otakil nolən rəha netəmim rəhan.”

³¹Uhgın u itəm tatəmegəh, tətətig tətətig. Kən okəmə kitat kotətig əh e təfagə rat, kən motəməhl e nelmin nəhlan, nat u in nat kit rəha nəginən.

³²Təwir məmə nikitəmat tatuəh nian u aupən, nian nəhag-əhagən təmatasiəgəpin itəmat aupən. E nian u, itəmat nəmotətig e nəluaginən asol e

nəmegəhən, kən in nian iəkis kit, itəm nəmotatig e nahməən asol. Məto itəmat nəmoatətul əskasik.

³³Nian neen netəmim koatən rat itəmat e niğanəmti netəmim, kən moatol min natimnat rat min neen kəm itəmat. Nian neen, itəmat nəmos moatətul-pən o netəm min un itəm katol tərət elat nəhlan.

³⁴Itəmat nəmos moatətul-pən olat nəhlan, kən nian kəmotuwın e kalapus, kən itəmat nəmotatig e nəratən məsin rəhalat. Kən nian netəmim kəmotakləh-in natimnat min rəhatəmat, kən itəmat nikitəmat təmagien əm, məto-inu itəmat nəmotitun rəkis məmə rəhatəmat natimnat neen əh-ikin tətətig, itəm in təwir maprəkis, kən natimnat min u, okol təsikəən nian kit.

³⁵Inəh, in nətouən asol rəhatəmat itəm Uhgın otəpanos-ipinə kəm itəmat. Kən məto-inun o nat wir min əh itəm koatəməhl aupən-in itəmat, təsəwirən məmə onəkotəmkarəpən-in nahatətəən əskasik rəhatəmat.

³⁶Itəmat nəkotəkəike motol rəhatəmat nətəligən təfəməh, məmə nəkoatol natimnat itəm Uhgın tolkeike. Kən itəmat onəpanotos natimnat min itəm in təməni-əkis məmə otos-ipinə kəm itəmat.

³⁷Məto tol nulan, inun Uhgın təməni mihin məmə, “Otəsuwəhən, kən suah u itəm tatuwa, in otiet-arəpa, otəsölən kəmin.

³⁸Məto rəhak etəmim itəm tətuatip e niğanəmtək, in otatəkəike e rəhan nahatətəən. Məto okəmə ekəplan məmə tapəs io, minətan təlig-təlig, kən nikik otəsagienən ron.”

³⁹Məto kitat u, kəsotölən nəhlan. Kitat okol kəsotan təlig-təligən məmə Uhgın otərəkin kitat. Kəpə. Kitat netəm rəha nahatətəən e Uhgın, məmə kitat koatos nəmegəhən.

Hiprus 11

Nahatətəən

¹?Nat naka u, in nahatətəən? Kitat kotələhəu-pən rəhatat nətəligən e natimnat min u, itəm otəpanuwa, kənu nahatətəən rəhatat in tatol məmə kitat okotitun wir məmə natimnat min u, ilat nıpahrienən. Nat əpnəpın məmə

kəsotehmən natimnat min u, mətə kitat kotitun wir məmə kitat okotos mətə-inun nahatətəən tatəgətun nəhlan kəm kitat.

²Kən Uhgın təmənuwi netəm min u aupən o rəhalat nahatətəən.

³Nahatətəən tatol məmə kitat kotitun wir məmə natimnat rəha nətueintən u, Uhgın təməghat əm, kən ilat kəmotatig. Natimnat itəm kotəplan roiu, in təməsosən nat kit itəm tinatig rəkis mol ilat lan.

⁴Epel in təmahatətə əskasik e Uhgın, tol nəhlan in təmos-ipən nat kit kəm Uhgın itəm təwir maprəkis-in rəha Ken. Kən mətə-inu in təmahatətə əskasik e Uhgın nəhlan, kən Uhgın təmən-iarəp məmə in etəm ətuatip kit, kən nikin tagien o nosən rəhan natimnat. Kən nat əpnaripin məmə suah u təmimis rəkis, mətə nolən rəha nahatətəən rəhan in tatəghat əh kəm kitat.

⁵Kən Inok təmahatətə əskasik e Uhgın, tol nəhlan in təsımısən. Uhgın təmos-irəkis in e nətueintən u, məmə otuwın əpəh ilis e nego e neai. Netəmim kəsotəplan minən, mətə-inu Uhgın təmıləs-irəkis. Mətə nian Uhgın təməsıləs-irəkisən-əh, Uhgın təməgətun kəm in məmə nikin tagien ron.

⁶Mətə okəmə etəmim təsahatətəən e Uhgın, in təsolən Uhgın nikin tagien ron, mətə-inu nian suah kit tolkeike məmə otuwa o Uhgın, in otəkəike mahatətə məmə Uhgın tətatig, kən matətou netəm min un itəm kotalkut o nitunən in.

⁷Noah in təmahatətə əskasik e Uhgın. Tol nəhlan, nian Uhgın təmatən-ipən natimnat min kəm in aupən, itəm netəmim kəsotəplanən əh, Noah təmatisiai-in, matol nəwian. Kən in təmıləkın nego asol kit məmə otosmegəh rəhan min. E rəhan nahatətəən, tahmen əm məmə Noah in təmatakil netəmim. Kən e rəhan nahatətəən, Uhgın təmol in tətəuatip e niganəmtin.

⁸Epraham in təmahatətə əskasik e Uhgın. Tol nəhlan, e nian Uhgın təmaun-in rəkis məmə otuwın e nəptən pisin kit, in təmatol nəwia Uhgın. Nəptən əh, Uhgın təmən-iəkis rəkis kəm in məmə otos-ipən kəm in. Kən Epraham təmiet, mətə in təruru məmə tatuwin hiə ne.

⁹Təmahatətə əskasik e Uhgın nəhlan, kən mətətig e nəptən u itəm Uhgın təmən-iəkis aupən məmə otos-ipən kəm in. Mətə təmətətig ikin əh e nimə

tapolən əm, tahmen əm e iapispis kit. Kən Aisak ne Jekop itəm Uhgın təmos-
ipən nəniəkisən u kəm iləhal kərən, ilau min kəmətuatig əm e nimə tapolən.

¹⁰Epraham təmol nulan, məto-inu in tatəzahgin məmə otuwın e taon kit itəm
nəukətin tiəkis, otətatig tuwəh. Taon u, Uhgın əm təmol mak lan, kən minol
rəkis tətatig.

¹¹Sera tətahatətə əskasik e Uhgın, nat ərnapın məmə in tinipitaguihl agın,
məto Uhgın təmos-ipən nəsanənən kəm in məmə in otemək. In təmiləs nətin
u, məto-inun in təmahatətə lan məmə otol nəniəkisən rəhan tuwa miet-arəp.

¹²Epraham tinaguihl rəkis, otəsuwəhən timis, məto noanol min tepət
kəmotisi-pən lan. Nat ərnapın məmə in etəmim kitiəh əm, məto noanol min
əh rəhan, ilat tepət tepət, tahmen əm e məhau əpəh e napuə ne niməkləkil
əpəh itəhəi itəm kəruru nafinən.

¹³Netəm min u, ilat kəmotahatətə əskasik e Uhgın, məto nian kəmotimis, ilat
kəməsotosən əh natimnat min u itəm Uhgın təmən-iəkis məmə otos-ipən kəm
ilat. Ilat koatəplan natimnat min u məmə natimnat min u koatan isəu əh olat,
məto nikilat tagien pik məmə okotəplan. Kən ilat moatən-iarəp məmə
koatatig e nətueintən u məto ilat kotahmen əm e iapispis min əm. Nətueintən
u, sənəmə in iməlat pahrien ikin.

¹⁴Nian netəmim koatəghat nəhlan, in tatəgətun əsas əm, məmə ilat koategəs-
in iməlat ətuatip ikin.

¹⁵Rəhalat nətəligən təsitəlig-pənən e nəptən rəhalat aupən, itəm kinotapəs
rəkis. Okəmə nikilat tatəht nəhlan, kotitun nitəligən matuwın, məto təsolən
mihin.

¹⁶Ilat kotalkeike iməlat ik pisin kit itəm təwir maprəkis, inun e nego e
neai. Kən o nat u, in təsaulis-inən məmə okən məmə in rəhalat Uhgın. Kən
Uhgın təmol əpen-əpenə rəkis e taon kit ikin əh.

¹⁷⁻¹⁸Epraham təmahatətə e nəniəkisən min itəm Uhgın təmən-ipən kəm in.
Kən nəghatən kit itəm Uhgın təmən-iəkis kəm in tol nulan, “Kən okən Aisak u
məmə in noanol ətuatip rəham, kən e Aisak u, oekol rəham noanol otepət

otepət.” Məto e nahatətəən rəha Epraham, nian Uhgın təmek asgəwin in, kən in təmətul matip o nohamnuən nətin noan kitieh əm u Aisak məmə otol sakrifais lan kəm Uhgın.

¹⁹Məto-inu Epraham nikin tatəht məmə Uhgın titun nolən etənim təmegəh min e nimisən. Kən in təmos min netin, iuəhkir əm tahmen məmə in təmegəh min e nimisən.

²⁰Aisak təmahatətə əskasik e Uhgın, kən tol nəhlan, təməfak məmə Uhgın otəhlman nəwırən rəhan tuwin kəm Jekop ne Esao, matən-iarəp natimnat min itəm otəpanuwa nian kit.

²¹Jekop təmahatətə əskasik e Uhgın. Tol nəhlan, nian iuəhkir əm in timis, in təməfak məmə Uhgın otəhlman nəwırən kəm nəti Josep mil. In təməf kasikin, mətul əməhl-əməhl, kən in matənwiwi Uhgın.

²²Josep təmahatətə əskasik e Uhgın. Tol nəhlan, iuəhkir əm in timis, kən in təmatəghat-in nian noanol min rəha Isrel okəpanotiet Ijip. Kən in təmatən rəkis əm kəm ilat məmə okotəhrol e nikilkilin.

²³Tata ne mama rəha Moses kəmuahatətə əskasik e Uhgın. Tol nəhlan, nian Moses təmaiir, ilau kəmuəplan məmə in suakəku wir kit, kən ilau kəmatuəhluaig-in o məwig kisil. Kən ilau kəməsuaginən nətgəhlən nəghatən rəha kig.

²⁴Moses təmahatətə əskasik e Uhgın. Tol nəhlan, nian in təmol iahgin, kən təməsolkeikeən məmə okən məmə in nəti pətan əkəku rəha Fero, kig rəha Ijip.

²⁵In təməsolkeikeən məmə otətətig e nagienən e nolən rəha təfagə rat məto-inu nagienən rəha təfagə, in tətətig o nian əkuəkir əm. In nikin təmagien məmə otuwin moatətig ilat netənim rəha Uhgın, moatəto tərat ilat min ilat.

²⁶Nikin təmatəht məmə okəmə netənim okotalah-əmnu in o Kristo itəm otəpanuwa, kən in okol təsaulisən. In nikin otəghien təhmin min o nat u taprəkis-in məmə otətəto təwir e natimnat wir min e nəmegəhən əpəh Ijip. In

təmatol nulan məto-inun nian rafin in tatuag-pən o nətouən itəm Uhgın otos-
ipən kəm in.

²⁷Moses in təmahatətə əskasik nəhlan e Uhgın, kən təmagim Ijip məsəginən
kig u itəm neməha tatol pik. In təməseirairən mitəlig, in təməkəike matuwın,
tahmen məmə inu tatəplan Uhgın u, itəm etənim təsəplanən e niganəmtin.

²⁸Təmahatətə əskasik e Uhgın nəhlan, kən in təmətuoun nolən lafet rəha
Nuhagego-inən. In təmən-iarəp kəm noanol min rəha Isrel məmə okotəkəike
motorausin-pən nita sipsip e toa e nimə min rəhalat. Okotol nəhlan məmə
nagelo itəm Uhgın otahl-ipa o nohamnuən itəm, in otəsohamnuən nenətlat
min u nəman, itəm kəmotaupən kaiir.

²⁹Noanol min rəha Isrel kəmotahatətə əskasik e Uhgın. Tol nəhlan, ilat
kotitun neguəfiminən e Nitəhəi Asiə itəm təmoor, kən kotaliwək lan tahmen
əm e nitən iasək. Məto nian netəm Ijip kəmotalkut o nətəu-pənən ilat, kən
nitəhəi təməmik ilat, kən kotamnim.

³⁰Noanol min rəha Isrel kəmotahatətə əskasik e Uhgın, kən tol nəhlan, ilat
kotaliwək motitəlau e fenis rəha Jeriko. Fenis u, kəmol e kəpiel. Ilat
koatitəlau, moatitəlau e fenis əh, mətoarus-pən nian sepin, kən əmun, fenis
asol un, təmitəgıt misas.

³¹Rehap u, pətan e suatip, təmahatətə əskasik e Uhgın. Kən tol nəhlan, nikin
təmagien məmə otos suah mil un noanol rəha Isrel mil, itəm kəmueia anion
məmə okuəplan kən miatun wir natimnat ikin. Ila u kəmuea e rəhan
nimə. Kən o nat u, noanol min rəha Isrel ilat kəməsotohamnuən pətan u nian
ilat kəmotohamnu netəm ikin əh itəm kəmotəht nəwia Uhgın.

³²Məto okol esənən tuwın təhmın min. Okol esəghatən təfəməh mən
Kiteon, ne Parak, ne Samson, ne Jefata, ne Tefit, ne Samuel, ne ien min.

³³Ilat u kəmotahatətə əskasik e Uhgın, kən tol nəhlan, ilat kəmotol natimnat
tepət. Ilat kəmotit noanol min rəha Isrel motuwın motəluagin ilat netəm ik
pisin pinsin min, kən moatol win elat. Ilat kəmoatol nolən ətuatip min, kən

moatos natimnat wir min itəm Uhgīn təmən-iəkis mēmə otos-ipən kəm ilat. Kəmotahṭosīg-in nohlīn laion min, mēmə okəsotunən ilat,

³⁴kən ilat kəmotohamis nigəm asol itəm tatuəp, kən ilat motagim tənin netəm kotəmə okotohamnu ilat e nisa rəha nəlūaginən. Ilat rəhalat nəsənənən tikə, mətō Uhgīn təmos-ipən nəsənənən kəm ilat. Kən ilat koatol win e mopael min rəha niməptən pišīn pišīn min.

³⁵Nipitan neen əh-ikin itəm kotahatətə əskasik e Uhgīn, kən tol nəhlan Uhgīn tatol nenətīlat kotaiir-pa min e nimisən. Mətō netəmim neen əh-ikin itəm kotahatətə əskasik e Uhgīn. Mətō ilat kotegəhan-in rəhalat tikimir min koatol nəratən ne nahmən kəm ilat e nipətīlat, kən nikilat təsəhtən nat u. Ilat kəməsotapəsən rəhalat nahatətən, mēmə rəhalat tikimir min okotikis ilat. Ilat koatahatətə mēmə Uhgīn in otol ilat kotəmegəh min e nəmegəhən kit itəm təwir maprəkis.

³⁶Kən ilat neen, netəmim koatalah əsan elat, kən koatalis-alis ilat. Kən ilat neen, netəmim koatəlis ətain ilat e sen, kən moatəmki-pən ilat e kalapus.

³⁷Ilat neen, kəmahtimnu ilat e kəpiel apin, kən ilat neen, netəmim kəmotəmīk soə rəha nətahlən nig, motətətip nipətīlat nəwtain kəiu, motohamnu ilat. Kən ilat neen, kəmətamnu ilat e nisa rəha nəlūaginən. Kən ilat neen koatuwin əm e nuwigi nənī ne sipsip. Ilat ian-rat min agin, nian rafin netəmim koatərəkīn ilat, moatol tərət agin elat.

³⁸Ilat, netəm wir min. Nətueintən u, təsahmenən mēmə ilat okotatīg ikin. Mətō ilat kəmoatatīg əpnapin əm, əpəh ikin taruən-aruən ikin, ne e nitot min, ne e nipəg kəpiel min, ne nipəg min əpəh e nisip.

³⁹Netəm min u, ilat rafin kəmotahatətə əskasik nulan e Uhgīn, kən in təmos-ipən nərig wir kəm ilat. Mətō ilat kəməsotosən əh nat u itəm Uhgīn təmən-iəkis rəkis mēmə otos-ipən kəm ilat,

⁴⁰mətō-inu in tinol rəkis nalpəkauən kit rəhan, mēmə in otol təwir maprəkis kəm kitat. Kən e nətəligən rəhan, in tolkeike mēmə otilpin kitat min ilat u

aupən, məmə kitat min ilat əm, okotətoarus ahmen ahmen əm mak e namnun naiduən.

Hiprus 12

Uhgin tətəg-ətuatip-in nenətin min

¹Kən netəm min u, ilat tepət tepət, koatatig kitəlau e kitat, koatətul-arəp o Uhgin, moatahatətə əskasik lan, kən rəhalat nəmegəhən in tatiləs-ipər nahatətəən rəhatat. O nat u, pəs kotəlin rafin nat figəm itəm otaskəlim ətain itat məmə kəsotaiu pikən, ne təfagə rat itəm tatəper-ipən e kitat. Kən pəs kitat kotaiu məsotəpou-inən naiduən itəm Uhgin təmələhəu aupən-in kitat.

²Kotitun nolən nian niganəmtitə otatətul-pən əm o Iesu, itəm in nəukəti nahatətəən rəhatat, kən inun itəm otol məmə kitat kotətoarus mak e nahatətəən rəhatat. Pəs kitat nikitə otuəh nolən rəha Iesu, inun in rəhan nətəligən kaifəməh, nian in təmimis e nig kəluau, kən məto nahməən. Məto in təmöl nat əpnapin lan, megəhan-in naulisən rəha nimisən e nig kəməluau, məto-inu təmöl rəhan nətəligən təskasik o nagienən itəm in otəpanos. Kən roiu, in tatəpələh e rəhn matip Uhgin u in Kig, ikin nepətən ne nisaiiən tətətig ikin.

³Təwir məmə nikitəmat otatəht Iesu, ne rəhan nətul əskasikən e nian iol təfagə min kəmotəraikin-pən nəghatən rat min kəm in, məmə nikitəmat otəsəpouən kən motapəs nahatətəən rəhatəmat.

⁴Ekitun məmə itəmat, noatəluagin o noh rəkisən təfagə rat e nəmegəhən rəhatəmat, məto itəmat kit tikə itəm nitan təmaiəh o nəluaginən u.

⁵Itəmat ninotaluin rəkis nəghatən itəm tatiləs-ipər nətəligən rəhatəmat. E nəghatən u, Uhgin təməghat nulan kəm itəmat, tahmen e nenətin ətuatip min, matən məmə, “Nətik, nian İərəməərə tətəg-ətuatip-in ik, solən nat əpnapin lan. Əsolən nikim təpou nian in tətəgət pik lam.

⁶Məto-inu okəmə İərəməərə tolkeike pik suah kit, kən in təike məg-ətuatip-in suah un. Kən okəmə in tos suah kit məmə nətin, kən in təike malis-alis.”

⁷Tol nəhlan, otətul məha-məha e nian iəkis min. Uhgın tatos-ipa nian iəkis min u o nəg-ətuatip-inən itəmat. Itəmat nenəti Uhgın min, mol məmə in tatəg-ətuatip-in nulan itəmat.?Məto suakəku naka un itəm tata rəhan in təsəg-ətuatip-inən?

⁸Uhgın tatəg-ətuatip-in rafın nenətin ətuatip min. Okəmə Uhgın təsələn nəhlan etəmat, kən nıpətın u məmə sənəmə itəmat nenətin ətuatip min, itəmat nisualkələh lapın.

⁹Rəhatat tata min e nətueintən u, koatəg-ətuatip-in itat. Kən kitat, koatisiai-in ilat. ?Kən okotəhrol nulan e tata rəha narmitat itəm tətətig e nego e neai? Təwir məmə okotos-iəhau aɡın itat, kən motatig ahɡın. Kən e nolən əh, kitat okotos nəmegəhən.

¹⁰Rəhatat min tata, kotəg-ətuatip-in itat o nian əkuəkır əm, e rəhalat əm nətəligən. Məto Uhgın tətəg-ətuatip-in itat məmə otasitu etat, kənu otol kitat kotasim tahmen lan.

¹¹Okəmə Uhgın tətəg-ətuatip-in kitat, in tahmen e nat kit itəm nian kitat kəmotun, məto tisiu, kən marəp. Məto uarisig, okəmə kotegəhan-in məmə nəg-ətuatip-inən əh otiuw asilə e rəhatat nətəligən, kən in otoe noan təwir, inun nəməlinuən itəm tətisi-pən e nətuatipən.

¹²Tol nəhlan, nat ənnapın məmə itəmat noatətig e nian iəkis, məto otıləs-ipər nelmitəmat itəm təpou, məmə otəsanən. Ne nulitəmat itəm kətuawig-awig, motol məmə kuəskasik o naiuən.

¹³“Otol suatip rəhatəmat tətətuatip wir, məmə pah un itəm noataliwək kələh, nelkin təmimis, nelkin okol təsərat aɡın-əhən, miet rəkis, məto in otəpanəwir min.”

Etəm təsahətətəən e Uhgın, in otəkəike mos nalpinən

¹⁴Otalkut məmə onakatig wir itəmat netəmim rafın e nəməlinuən. Kən motalkut məmə nəkotol itəmat məmə rəhatəmat nəmegəhən tasim. Etəmim itəm təsasimən, okol təsəplanən nıɡanəmti Ierəmərə nian kit.

¹⁵Otəto wir itəmat məmə itəmat kit itəm tətaiu matuwīn otəpou e nəlugi suatip, kən məsosən nəwīrən rəha Uhgīn. Otəto wir mīn itəmat məmə noki nig akona kit in otəsuwīnən e nikitəmat, kən məwiə, mol noan tēpət e nəmegəhən rəhatəmat. Kən nahuin titun nərəkinən nəmegəhən rəha netəm iasim neen mīn.

¹⁶Oatəto wir itəmat məmə suah kit təsīt əpnāpīnən iərman o pətan. Itəmat kit otəsahmenən e Esao u, rəhan nəmegəhən təsətuatipən, in tatol nat əpnāpīn e Uhgīn. In təmaupən maiir, məto in təmol-salīm-in nepətən rəha suakəku itəm təmaupən maiir. Məto nəm̄ti nat u, in təmol-salīm-in, in nagwənən itəm təmun mau kitiəh əm.

¹⁷Itəmat nəkotitun məmə uarisig, nikin otəpanuwīn mīn e nepətən rəha nəm̄ti-nipīn. Kən təmalkut pik məmə rəhan tata otəfak məhlman nəwīrən kit kəm in. Məto nat əpnāpīn məmə təmətasək pik pap ron, məto okol təsəuhlinən nikin əh-roiu, kən rəhan tata okol təsəfakən məhlman nəwīrən kəm in.

Lou təhrol nulan mol pisin e namnusən təwir

¹⁸⁻²¹Aupən ikin, noanol mīn rəha Isrel, kəmotuwīn e nitot asol u Sinae, e nətueintən u. Kən ikin əh, kəmotəplan nigəm itəm tatuəp, kən napīnəpən asol təmeiuaiu mīrəfin nat, kən kəmotəto nīmətag asol ne təwi tətəgət əfəməh, kən kəmotəto nəwian kit tatəghat kəm ilat. Kən nian kəmotətəlig-in rəhan nəghatən mīn, kən ilat kəmoatən əskasik məmə ilat kotapəs agin-əh nəto mīnən nəwian u. Kəmotəgin motasiəp o nəghatən u, təmən məmə, “Okəmə nat megəh əm kit otuwīn e nitot u, məto itəmat onəkotəike moataht e kəpiel apīn motahtimnu timis.” Nian Moses təməplan natimnat mīn u, in mīn təməto tərət kən məmə, “Io enəgin u enəgin, mīnətasiəp.” Məto itəmat nəsotuwamən ikin-u.

²²Itəmat nəmotuwa e nitot u Saeon, ne taon asol u ima Uhgīn ikin itəm tatəmegəh, tətətig tətətig. Inun Jerusalem wi əpəh ilis e nego e neai, u nagelo mīn taosan taosan kəmuəfīmīn ilat ikin o nagienən asol.

²³Kən itəmat nəmotuwa e nuəfiminən asol rəha netənim rəha Uhgīn, itəm kotahmen e netəm kəmotaupən kaiir u rəhan mīn, nərgilat kəməte rəkis e nego e neai. Kən itəmat nəmotuwa o Uhgīn, itəm otəpanakil netənim rafin. Itəmat nəmotuwa motol kitiah itəmat narmi netəm ətuatip itəm kinotimis rəkis, kən Uhgīn tinol ilat kinotətoarus mak.

²⁴Itəmat nəmotuwa o Iesu u, in suatip rəha nəniəkisən wi rəha nasituən u itəm Uhgīn təmol kəm itat. Kən nəmotuwa o nita Iesu, itəm in təmorautin-pən mol itəmat nakotasim. Nita əh in təmən-iarəp natimnat mīn u itəm kotəwir motaprəkis-in natimnat mīn itəm nita Epel təmən-iarəp.

²⁵O natimnat mīn u, oatəto wir itəmat, məmə itəmat onəsotəuhlinən məntaatəmat o Uhgīn u tatəghat kəm itəmat. Məto-inu Moses, in etənim əm. Kən kitat kotitun məmə netəm aupən kəməsotətəlig-inən rəhan nəghatən o nəhgaiirən elat. Ilat kəməsotagim rəkisən e nalpinən rəhalat. ?Kən okəmə tol nəhlan, kən okahrol kitat okəmə kəsotətəlig-inən nəghatən rəha Uhgīn itəm təmisipən e nego e neai muwa məmə otəhgaiir etat? ?Kitat okotagim rəkis-in ahrol nulan?

²⁶Nian aupən, nəwia Uhgīn təməloal e nəptən. Məto roiu əh, təmən-iəkis kəm itat məmə, “Nian kit mīn əh-ikin, io ekəloal mīn e nətueintən. Kən o nian əh, sənəmə nətueintən əm ekatigtig lan tasiəp, məto neai mīn otasiəp-asiəp məloal.”

²⁷Nian Uhgīn tatəghat-in məmə, “Nian kit mīn əh-ikin,” nipətīn un məmə in otatigtig e natimnat rəha nətueintən əm itəm Uhgīn təmol, məmə otoh rəkis ilat. Otoh rəkis nəhlan natimnat, məmə natimnat itəm okəsotəloalən, ilat okotatig, kən inun, natimnat itəm okotatig lilin.

²⁸O nat u, təwir məmə kitat kotən tagkiu o Uhgīn, məto-inu kitat koatos nego rəha Uhgīn u, kəruru nəloal-əloalən lan, kən okol təsietən nian kit. Təwir məmə kitat kotəfak kəm in, e nolən itəm nikin tagien lan, məmə kitat okotisiai-in, kən motəgin mīn,

²⁹məto-inun Uhgīn rəhatat, in tahmen e nigəm asol kit itəm tatuwaan ətip natimnat rafin.

Hiprus 13

Namnun nəghatən

¹Təwir məmə nəkotəkəike əh moatol nolkeikeən kəm itəmat min tahmen e piatəmat min.

²Sotaluinən nehmən iapispis min itəm koatuwa imatəmat ikin. !Okəm-naka ilat nagelo min! Netəmim neen itəm kəmoatol nulan, ilat kəmoatehm wir netəmim, məsotitunən məmə ilat nagelo min.

³Sotaluinən netəm kotatig e kalapus. Nikitəmat otatuəh ilat, mətahmə olat tahmen əm məmə inun ik min nəkətatig e kalapus. Otəto kələh nahməən e nikitəmat, itəmat netəm min un itəm katol tərət elat, tahmen əm məmə inun ik natəto nahməən e nipətim atip.

⁴Pəs netəmim rafin kotisiai-in natigən rəha marit, məmə in tasim nian rafin. Pəs netəmim rafin kotəgin o nıməhan rəhalat min, məsoteguafələn. Uhgın otakil etəm aluə ne pətan əkəku itəm kətuapıl kələh, kən makil min iərman ne pətan itəm kətuapıl kələh, iərman itəm tətəpıl ilau pətan u sənəmə rəhan pətan, ne pətan itəm sənəmə rəhan ətuatip iərman.

⁵Ətul-pən isəu o nolkeikeən rəha məni. Nikim təike magien əm o rəham natimnat u natos tahmen məto-inu Uhgın tatən məmə, “Okol esapəsən ik, məsəhlmanən ik nian kit”

⁶Kən tol nəhlan kitat kotitun əsas, kən moatən məmə, “İərəmərə in iasitu rəhak, tol nəhlan esəginən. Oesəginən nat kit itəm etəmim əm otol kəm io.”

⁷Nikitəmat otəkəike matəht netəm-iasol min u rəhatəmat itəm kəmotəupən motəgətun itəmat e nəghatən rəha Uhgın. Otətəlig-in-tu natimnat wir min itəm təmiet e nəmegəhən rəhalat, kən motahatətə e İərəmərə tahmen əm elat.

⁸Iesu Kristo in tatol əm nulan, nəniəp, ne roiu, kən otəpanətətig nulan, namnun tikə.

⁹Sotolən məmə nəgətunən wi pisin pisin min tiuw rəkis itəmat o suatip ətuatip. Itəmat otuag-pən əm o Uhgın, itəm tətəsitə etəmat e nikin agien məmə otol rəhatəmat nətəligən təskasik. Təsəwirən məmə kitat okotətou-pən

nətuakəmən rəha nunən nagwənən, məmə in otol kitat kotəskasik, məto-inu in nipahrienən, nətuakəmən əh, okol təsasituən e netəm koatol.

¹⁰Rəhatat olta tatig. Məto pris min itəm koatol wək rəhalat əpəh imə e tapolən rəha nətueintən u, ilat u, kəsegəhan-inən ilat məmə okotun nagwənən kit e olta u rəhatat.

¹¹E nolən rəha pris asol agin, nian in tatohamnu rəkis nat megəh, kən matos nitan kən muwin əpəh imə e Ikin Tasim Agin Ikin, kən mos-ipən kəm Uhgın o nafəl rəkisən təfagə rəha netəmim. Məto uarisig, katiləs-iarəp nat megəh u əpəh ihluə ikin e nimə tapolən min rəhalat, motaan ətip.

¹²E nolən kitiəh əm, Iesu təmiet rəkis e taon, kən ikin əh in təməto nahməən e nipətın, kən mımıs ikin əh, məmə nitan titun nafəl rəkisən təfagə rat rəha netəmim, mol ilat kotətuatıp, motasim, məmə ilat rəha Uhgın.

¹³Tol nulan, pəs kitat kotol məmə inu okotiet ihluə imətat ikin, motol kitiəh kitat min əpəh ihluə. Kən okotəkəike motətul matıp məmə netəmim okotol naulisən kəm itat, tahmen əm mə inun, kəmotol mihin lan.

¹⁴E nətueintən u, rəhatat kit taon ətuatıp imətat ikin tikə, itəm otətatiğ lilin. Məto kitat koategəs-in rəhatat taon ətuatıp itəm kotitun məmə otəpanuwa.

¹⁵Tol nulan, e nasituən rəha Iesu, pəs kitat kotos-ipən sakrifais rəhatat kəm Uhgın nian rafin. Sakrifais min u rəhatat, inun, okoatıləs-ipər nərgi Uhgın nian rafin, moatən-iarəp nərgin.

¹⁶Sotaluinən o nolən təwir ne nawte-inən nat rəhatəmat tatig kəm netəm rəhalat nat kit tikə, məto-inun in min tahmen e sakrifais itəm niki Uhgın tagien ron.

¹⁷Otol nəwia netəm-iasol min e niməfak, kən motatiğ ahgin ilat. Ilat u, koatehm wir nəmegəhən rəhatəmat, məsotamegən, məto-inu ilat kotitun məmə okotəike motən nəmtət lan kəm Uhgın məmə ilat kəmotol wək u, təhrol nulan. Itəmat nakotəike motol ilat nikilat tagien o wək u. Okəmə itəmat noatol nikilat təsagienən ron, nolən u okol təsasitu agin-əhən etəmat.

¹⁸Otəfak otimat, məto-inu ekotitun əsas məmə rəhatimat nolən in tətuatip əm, kən ekotolkeike aɡin məmə nian rafin itimat ioatol nolən təwir əm.

¹⁹Io ekolkeike p̄ik məmə itəmat onəkotəkəike motətapəh-in o Uhḡin, məmə io ekitun nitəlig-pa-minən otəmat uəhai əm.

²⁰Iatəfak min otəmat min məmə, Uhḡin otasitu etəmat. Uhḡin u, in nəukəti nəməlinuən. Kən in təmol rəhatat İərəməərə İesu təmegəh min e nimisən, məto-inu nitan təmaiu o nolən nəniəkisən lilin in tətətig matəmegəh. İesu əh, in etəm təwir maprəkis o nehm wirən sipsip min rəhan. Iatəfak məmə Uhḡin u,

²¹in otos-ipinə natimnat wir min rafin kəm itəmat, itəm otol itəmat nəkotahmen o nolən nat itəm in tolkeike. Kən iatəfak məmə, Uhḡin otol wək e nəmegəhən rəhatat kitiəh kitiəh, kən e nasituən rəha İesu Kristo, in otol rəhatat nolən təwir təwir, kən nikin otagien p̄ik ron. Kən pəs kotiləs-ipər nərgi Kristo ilis nian rafin, matuw̄in matuw̄in namnun tikə. Əwəh.

²²Piak min ne winik min. Naoa u rəhak təsəfəməh p̄ikən. Məto iakətapəh əskasik otəmat məmə, otol-tu rəhatəmat nətəligən təfəməh min məmə nakotətəlig-in rəhak nəghatən min itəm otiləs-ipər nətəligən rəhatəmat.

²³Iakolkeike məmə onəkotitun məmə piətət u Timoti, ilat kəmotiləs-iarəp in e kalapus. Okəmə in otuwa uəhai əm, kən itimlau min, ekiamnə.

²⁴Itəmat otən təwir kəm netəm-iasol min rəhatəmat, ne iəfak min u imatəmat ikin. Netəm Itali kəmotən təwir kəm itəmat.

²⁵Pəs Uhḡin otawte-in rəhan nəwirən kəm itəmat rafin. Əwəh.

Jemes

Jemes 1

Jemes tatən təwir kəm ilat

¹Io Jemes, io slef rəha Uhgın ne Iesu Kristo, İərəməərə rəhatat. İatən təwir kəm itəmat noanol mın rəha İsrəl u tuelef itəm kotahatətə e İesu, itəm nəmotiet motatig ikin mın rafin e nətueintən.

Nahatətəən ne nenatigən

²Piak mın ne winik mın. Nian nərətən pisin pisin mın koatuwa e rəhatəmat nəmegəhən, kən otehm natimnat mın əh tahmen e natimnat itəm nikitəmat tətəgien pik əm lan.

³Nəkoatol nəhlan məto-inu, itəmat nəkotitun məmə nian nərətən mın koatiləs pikən rəhatəmat nahatətəən e Uhgın, kən nian nəkotol win lan, ilat okotol məmə nəkotitun nətul əskasikən məsin mın.

⁴Kən nian onakoatətul əskasik e nərətən mın əh, kən onəkotuwa kəmətə e nahatətəən, kən nolən mın ne nətəligən mın rafin rəhatəmat okotətuatip motəsanən, kən nakotaskəlim nolən wir mın rafin.

⁵Okəmə itəmat kit, rəhan nenatigən təsahmenən, kən tolkeike məmə in otitun natimnat mın itəm Uhgın tolkeike məmə otol, pəs in tətəpəh-in-pən o Uhgın, kən Uhgın otos-ipən kəm in e nikin agien. Uhgın tətawte-in nitunən əh kəm netəmim rafin e nikin agien, kən məsəhaiən ilat o nat itəm koatəpəh-in.

⁶Məto nian suah kit in tətəpəh o Uhgın nəhlan, in otəkəike mahatətə lan, kən rəhan nətəligən otəsolən kəiu lan, məto-inu etəm itəm rəhan nətəligən kəiu, rəhan nətəligən tətən əpnəpin əm, in tahmen e peau-peau mın əpəh itəhəi itəm nımətag tətəhig-əhig ilat.

⁷Okəm-naka nikin tətəht məmə İərəməərə otos-ipən nat kit kəm in, məto kəp, otəsosən.

⁸Etəmim itəm tatos nətəligən kəiu nəhlan, okol təsətul əskasikən e nat kit itəm nikin tətəht məmə otol.

⁹Piatat kit itəm in ləhau, kən rəhan nautə tikə, nikin otəkəike magien mətō-inu in etəm-iasol e niganəmti Uhgin.

¹⁰Kən pəs etəm itəm rəhan nautə tepət, nikin tagien min o nat u itəm in titun məmə in nipahrienən, məmə Uhgin otos-iəhau, mətō-inu in tahmen e nəgui-nig itəm otəpanikə.

¹¹Nian mit tatər, tape-ape tape-ape, kən matəhg nagwən nig tauke məme, kən rəhan nəwirən təmikə. Tahmen əm e etəm rəhan nautə tepət. Nian tatol rəhan wək min matos nautə tepət lan, kən in min otəpanikə.

¹²Etəmim itəm tatətul əskasik nian nəratən tatuwa e rəhan nəmegəhən, in tətətig e nəwirən pahrien, mətō-inu, nian tinol win e nəratən min əh, kən Uhgin otos-ipən kəm in rəhan nətouən, inu nəmegəhən lilin. Uhgin təmən-iəkis rəkis məmə nəmegəhən lilin u, in rəha netəmim itəm kotolkeike in.

¹³Nian nat kit tatiuw-pən suah kit məmə in otol təfagə rat, okol in təsənən məmə Uhgin tatos-ipən-os-ipən o nolən təfagə rat min, mətō-inu okol nat kit təsiuw-pənən nətəligən rəha Uhgin məmə in otol təfagə rat, kən Uhgin təsos-ipən-os-ipənən təfagə rat kəm etəmim.

¹⁴Mətō nətəligən rat atip rəha etəmim, in tatos-ipən-os-ipən kəm in, kən matiuw-pən in məmə in otatətəlig-in.

¹⁵Nətəligən rat tatōe-in təfagə rat, kən nian təfagə rat tinuwa minepət, kən tatuwa in nimisən.

¹⁶Piak min ne winik min itəm iakolkeike pik itəmat. Sotegəhan-inən məmə suah kit oteiuə-in itəmat məmə Uhgin in etəm rəha nos-ipən-os-ipənən kəm netəmim o nolən təfagə rat.

¹⁷Natimnat wir min rafin ne natimnat rafin itəm kotətuatip, koatisi-pən əm o Uhgin əpəh ilis itəm təmol nəhag-əhagən min rafin əpəh e neai. Mətō nolən rəha Uhgin tol pisin e natimnat min u itəm kotaliwək e neai, kən kotol məmə nəghanpis koatətəu-pən. Uhgin təsol pisinən. In tətətig tətətig.

¹⁸Kən e rəhan əm nətəligən, Uhgin təmitəpun məmə kitat kəmotuwa nenətin min nian kəmotahatətə e nəghatən pahrien rəhan. In təmol nəhlan məmə e

natimnat rafin itəm in təmöl, kitat pisin əm rəhan nat keike, kotahmen e nagwənən wi e rəhan nasumən.

Ətəlig-in kən mol nəghatən rəha Uhgin

¹⁹Piak min ne winik min itəm iakolkeike pik itəmat. Nikitəmat otəkəike matəht nəghatən u. Pəs itəmat kitəh kitəh onəkotəkəike motətul matip o nətəligən, məto onəsotafig-afig pikən o nəghatən, sotolən məmə neməha tatol uəhai əm itəmat,

²⁰məto-inu nian neməha tatol suah kit, neməha u təsəe-inən noan itəm tətətip Uhgin tolkeike.

²¹Otəra kin rəkis nolən min rafin itəm tamkimik, ne təfagə rat min itəm kotepət e nəmegəhən rəhatəmat. Uhgin təmələhəu-pən rəhan nəghatən e nikitəmat, kən nəghatən əh rəhan titun nosmegəhən itəmat. Kən təwir məmə nakotos-iəhau rəhatəmat nətəligən, kən moatətəlig-in wir nəghatən u.

²²Sotətəlig-in əmən nəghatən rəha Uhgin, məto otətəlig-in kən motol nat naka itəm tatən. Okəmə nakotəto məsotolən nəghatən u, kən nakoateiuə-in atip əm itəmat.

²³Etəm tatəto kən məsolən nəghatən u, in tahmen-pən e etəmim itəm tateranəm wir e klas matəplan narmin,

²⁴kən nian tineranəm rəkis magim, mətaluin uəhai əm məmə niganəmtin tahro min-nulan.

²⁵Məto etəmim itəm tatətag-pən əskasik e lou itəm tətətip agin u tatikis netəmim, kən matol e nian min rafin, məsaluinən nat itəm təməto, məto in tatol, in otətətig e nəwirən pahrien nian in tatol nəhlan.

²⁶Okəmə suah kit nikin təht məmə in tatətəu-pən wir nolən min rəha nəfakən, məto tatəghat-pən əm məsətəlig-in wirən rəhan nəghatən min, in tateiuə-in atip əm in, kən rəhan nolən min rəha nəfakən in nat əpnəpin əm.

²⁷Nolən min rəha nəfakən itəm rəhatat Tata Uhgin tatəplan məmə in tətətip wir kən nəratən tikə lan kotol nulan: iəfak kit tatəkəike matehm wir suakəlh

min ne nautahlimis min e nēratēn min rēhalat. Kēn matēkēike matehm wir nēmegēhēn rēhan mēmē nolēn rat min rēha nētueintēn otēsolēn mēmē in otamkimik lan.

Jemes 2

Sotehmēn netēmim neen mēmē ilat ilis kotaprēkis-in netēmim neen

¹Piak min ne winik min. Itēmat nakotahatētē e Iesu Kristo, Iērēmērē rēhatat itēm ilis agin kēn katisiai-in pik. Mēto tēsawirēn mēmē nēkotol tēwir kēm suah kit kēn moatehm mēmē in ilis, kēn moatehm rat suah kit min moatol tērat kēm in.

²Tol mē inu ne. Suah kēiu katuea e nimēfak rēhatēmat. Suah kit tatuwin-in napēn wir min u nēmtilat tiēkis, ne noanat min kēmol e iaen u kol tatipit-ipit. Kēn suah kit min tatuwin-in e napēn rat min ēm.

³Tēsawirēn mēmē nakotos-ipēn nisiaiien kēm etēmim itēm tatuwin-in natimnat wir min, motēn-ipēn mēmē, “Wa, mēpēlēh u ikin tēwir ikin.” Mēto etēm tatuwin-in napēn rat min, nakotēn-ipēn kēm in mēmē, “Ētul-pēn ēpēh,” o “Ēpēlēh ēm e nisip.”

⁴Nian nēkoatol nolēn tol min-nulan, nakoatehm netēmim neen mēmē ilat ilis taprēkis-in netēmim neen min, kēn e rēhatēmat nētēligēn rat, nakotakil netēmim.

⁵Piak min ne winik min itēm iakolkeike pik. Otētēlig-in-tu. Uhgīn tēmītēpun rēkis ian-rat min rēha nētueintēn mēmē rēhalat nahatētēn e Kristo otepēt. Kēn tēmītēpun min ilat mēmē okotos nērēmērēn rēha Uhgīn itēm tēmēn-iēkis mēmē rēha netēmim itēm kotolkeike in.

⁶Mēto itēmat nēmotehm rat ian-rat min. ?Mēto netēmim pah min u koatol nahmēn kēm itēmat, kēn moatiuw-pēn itēmat e kot? ?Netēm rēhalat nautē tepēt, o kēp? Ēwēh, ilat ēh.

⁷Kēn netēm min u koatēghat rat e nērgin u ilis, nērgi Iesu itēm rēhan u itēmat.

⁸Lou rəha Kig itəm tətatiḡ e Naoa Rəha Uhgín tatən məmə, “Olkeike ik kit tahmen əm məmə nakolkeike atip ik.” In təwir pik otəmat okəmə nəkoatətəu-pən pahrien nəghatən u.

⁹Məto okəmə nakoatehm netəmim neen məmə ilat ilis taprəkis-in netəmim neen min, nəkoatol təfagə rat, kən nəghatən rəha Lou tatən məmə itəmat netəm rəha nətgəhlən Lou.

¹⁰Tol nəhlan məto-inu, etəmim kit itəm təmətgəhl nəghatən kitiaḡ əm rəha Lou, təmol təfagə rat tahmen-pən əm məmə in təmətgəhl nəghatən min rafin rəha Lou.

¹¹Tol nəhlan məto-inu, Uhgín u itəm tatən məmə, “Sakləh-inən pətan,” in Uhgín kitiaḡ əm itəm tatən məmə, “Sohamnuən etəmim.” Kən okəmə nəsoakləh-inən nīpitan, məto nəmotohamnu netəmim, itəmat netəmim itəm nəmotətgəhl Lou.

¹²Nian nakoatəghat kən motol nat kit, otol nolən min rəha netəmim itəm kotitun məmə Uhgín otakil ilat e lou itəm tatikis ilat.

¹³Otol nəhlan məto-inu okəmə suah kit təsasəkitunən netəmim, kən Uhgín min otəsasəkitunən suah u nian in otakil netəmim. Məto okəmə itəmat nakotasəkitun netəmim, kən Uhgín otasəkitun itəmat, kən mən-ipinə məmə onəsotosən nalpinən e nian in otələhəu-pən nəghatən rəha nalpinən kəm netəmim.

Nahatətəən ne wək wir min

¹⁴Piak min ne winik min. ?Okəmə suah kit tatən məmə tətahatətə e Iesu Kristo, məto in təsolən wək wir kit, kən rəhan nahatətəən in təwir o nat kit? Kəp. Nahatətəən tol nəhlan, okol təsosmegəhən suah kit.

¹⁵Tol mə inu ne. Piatat kit o winitat kit, rəhan napən tikə, kən nigín nagwənən təsahmenən.

¹⁶Kəm-naka itəmat kit tatən-ipən kəm in məmə, “Atuwín, pəs Uhgín otasitu lam, kən onəsətəpən, onakagwən wir.” ?Məto okəmə in təsolən nat kit məmə otasitu lan, in təmol nat wir naka?

¹⁷E nolən əh inəh, okəmə suah kit tatos nahatətəən pişin əm, məto məsolən wək wir kit tətəu-pən, kən rəhan nahatətəən təmimis, nişətin tikə.

¹⁸Məto okəm-naka suah kit otən məmə, “Netəmim neen koatos nahatətəən, kən netəmim neen koatol wək wir min.” Məto iatən kəm ik nəhlan məmə, “Okəmə esəhmən rəham wək wir min, kən esitunən okəmə rəham nahatətəən in nişahrienən, o kəp. Məto nian onakehm wək wir min rəhak, kən tatəgətun məmə nahatətəən rəhak, in nişahrienən.”

¹⁹Inu nəghatən kit itəm nəməən nişahrienən lan məmə, “Uhgın kitiəh əm.” !Təwir ron ik! Məto iərmis min, ilat min kotitun məmə nəghatən əh in nişahrienən, kən moatasişp katəgin pik.

²⁰!Ik rəhm-kapə tikə! Etəmim itəm tətahatətə, məto təsolən wək wir min, rəhan nahatətəən in nişətin tikə. Pəs ekəgətun ik e nat kit itəm otən kəm ik məmə inu nişahrienən.

²¹Nikim otəht tişitat u Epraham. Uhgın təməplan məmə in tətuatip e nişanəmtin e wək itəm təmol, məto-inu təmos nətin u Aisak, muşin mələhəu-pər e olta.

²²Kən rəhan nahatətəən ne rəhan wək min kətiəal nat kitiəh, kən rəhan nahatətəən təmə-in noan, inu rəhan wək min.

²³Kən nəghatən u rəha Naoa Rəha Uhgın təmuwa mol nişahrienən, tatən məmə, “Epraham təmahatətə e Uhgın, kən Uhgın təməən məmə Epraham in tətuatip e nişanəmtin.” Kən katən məmə in ioli Uhgın.

²⁴Kən roiu nəkitun nehmən məmə, Uhgın tatol suah kit tətuatip e nişanəmtin o natimnat itəm tatol, məto sənəmə e nahatətəən pişin əm rəhan.

²⁵Kən e nolən əh inəh, Uhgın təməplan məmə Rehap u, pətan rəha şuatip, in təmuwa mətuatip e nişanəmti Uhgın o wək itəm təmol, kən wək u məmə in təmatehm wir iaşləpis anion mil rəha Isrel, kən mahl-ipən ilau e şuatip pişin kiətəlig mətian.

²⁶Nipəti etənim, okəmə namegən tikə lan, tənimis. Kən e nolən əh inəh, kitat kit itəm tatos nahatətən, məto təsolən wək wir min, rəhan nahatətən tənimis.

Jemes 3

Namitəm ne rəhan wək

¹Piak min ne winik min. Təsəwirən məmə itəmat tepət nakotuwa iəgətun min rəha niməfak, məto-inu nəkotitun məmə Uhgın in otəplan wir kən makil nəmegəhən rəhatəmat iəgətun min, taprəkis-in netəm əpnəpin.

²Nipahrienən, kitat rafin koatəme e nəmegəhən rəhatat nian tepət. Məto okəmə suah kit təsəmeən e rəhan nəghatən, nat u tatəgətun məmə in etəm mətə, kən nətəligən rəhan titun nehm wirən rəhan min nolən min rafin.

³Tol məmə nat min u ne. Katətu-pən pit e nohli hos məmə otol nəwia etənim, kətealalin rəhn-kapə hos, kən tatəuhlin nipətin rafin.

⁴Kən nego, in iahgin, kən nimətag asol tatəhtig, məto stia in nat əkəku kit itəm nian kapten tətəlalın, kən nipəti nego asol rafin tateko-pən əh kapten tolkeike məmə okian-pən ikin.

⁵E nolən əh inəh, namitəm in nat kit nətın, məto titun niuw-pamən nat asol min. Nikitəmat təht-tu, noanəmtahli nigəm əkəku kit titun nuəpən mus nig mətə tepət.

⁶Kən nipahrienən, namitəm in tahmen-pən e nigəm. Namitəm in noli nipəti etənim itəm nəratən min rafin rəha nətueintən u kotərioah wir lan. Kən nəratən min rəhan koatərekin nəmegəhən rafin rəhatat. Kən Setan əm tətəhl nigəm e namitəm. Kən namitəm tətəhl nigəm rat e suatip min rafin e nəmegəhən rəhatat matərekin natimnat rafin.

⁷Netənim kotitun nahkulən e nat iarupin min məmə okotuwa kəpou, inəh nat megəh min, ne mənig min, ne nat kotəkioah min, ne nat itəm kotatig itəhəi. Netənim kəmotahkul elat kotəpou.

⁸Məto etənim tikə otahkul e namitəm təpou. In nat iarupin tatol wael, mərioah e nəratən ne nakonən rəha nimisən.

⁹E namitat, kotənwiwi Iəramərə Tata Uhgın rəhatat, kən e namitat kotən rat netəmim lan itəm Uhgın təmol ilat kotol məmə in ne.

¹⁰Nohlitəm kitəh əm tatən-iarəp nənwiwiən ne nən ratən. Piak min ne winik min. Pəs okəsölən min-nəhlan.

¹¹Nəhau wir ne nəhau arıp, okol kəsiasipənən e nəmti nəhau kitəh.

¹²Piak min ne winik min. ?Nig u fik otoa-in noa olif? ?Kən nol u krep otoa-in noa fik? !Kəp! Kən nəmti nəhau arıp təsos-ipamən nəhau wir.

Nenatigən təwir itəm tatisi-pən o Uhgın

¹³?Suah kit əh-ikin ilugin etəmat itəm nikin təht məmə in tenatig wir kən mitun nat naka itəm Uhgın tolkeike? Təwir. Kən pəs in otol wək wir min e nolən itəm tatisi-pən e nenatigən, inəh nolən rəha etəmim itəm rəhan nətəligən ləhau. Kən nolən ətuatip rəhan otəgətun nenatigən ne nitunən rəhan.

¹⁴Məto okəmə nikitəmat təht məmə nakotenatig, məto nikitəmat tərıoah e netetən, kən nakoatətəlig-in atip əm itəmat o niləs-ipərən itəmat, tol nəhlan, nakoateiuə-in atip əm itəmat. Sotəghat ausit pikən o nenatigən eiueiuə rəhatəmat, məto-inu kəsənəmə nolən u rəha etəmim u tenatig.

¹⁵Nenatigən tol min-nəhlan təsisi-pənən e nego e neai, məto rəha nətueintən əm u, ne nətəligən rəha etəmim, ne rəha Setan.

¹⁶Tol nəhlan məto-inu nian netəmim koatetet motolkeike məmə koatos-ipər atip ilat, kən netəmim koatətəu-pən əm rəhalat atip nətəligən moatol nərətən, kən nolən tərət rafin kotet-arəp.

¹⁷Məto etəm itəm tatos nenatigən itəm tatisi-pən e nego e neai, rəhan nolən tol min-nulan. Nat aupən, rəhan nəmegəhən in tətəuati wir, kən in tolkeike pik nəməlinuən, kən in etəm mətig, in tatisiai-in nətəligən rəha netəmim pisin pisin min, kən in tərıoah e nasəkitunən, kən matoe-in noan tepət e nəmegəhən rəhan, in tatehm netəmim məmə kotahmen-ahmen əm, kən təsənən nat kit kən matol nat pisin.

¹⁸Netəm rəha nəghat-inən nəməlinuən, kotahmen-pən e netəmim itəm kəmotəfe nīkuti nat e nasumən, kən tatəwiə matoe-in noan. Okəm kotol natimnat min əh motasitu e netəmim o nələhəuən nəməlinuən, kən ilat okotəplan noan məmə in nətuatipən.

Jemes 4

Nolən rəha nuwamən iuəhkir o nətueintən, o Uhgīn

¹?Naka u nəukəti nəmouən ne nərgəhəuən rəhatəmat? Natimnat min əh koatuwa mətə-inu itəmat nakotolkeike nətoən təwir e nīpətītəmat, kən nətəligən min əh rəha nətoən təwir, ilat koatol fait e nīkitəmat kitīəh kitīəh məmə okotuwa netəm-iasol min e nəmegəhən rəhatəmat.

²Nīkitəmat tatuwin o natimnat rəha netəm pisin, mətə nəsosən, kən nakotərgəhəu moatəmou ron. Nakoatolkeike natimnat neen, mətə nəsosən. Kən mətə onəkotohamnu netəmim ron. Nəməsosən natimnat mətə-inu nəsotətapəh-inən o Uhgīn.

³Kən nian nakotətapəh-in, mətə nəsosən, mətə-inu nəmotətapəh-in e nətəligən itəm tərət məmə otol itəmat atip əm nakotəto təwir lan.

⁴Itəmat nəkotahmen e pətan itəm təsisiai-inən rəhan iərman, tapəs kən matətəu-pən əpnapin əm nəman. E nolən əh inəh, itəmat nəmotapəs Uhgīn kən moatətəu-pən natimnat rəha nətueintən. Nəkotitun o kəp məmə, etəmim itəm tolkeike pik natimnat rəha nətueintən, in tatətəhau Uhgīn. Kən etəmim kit itəm tatitəpun məmə otolkeike natimnat rəha nətueintən, in tatuwa məmə in tikimir rəha Uhgīn.

⁵Kən nəghatən u rəha Naoa Rəha Uhgīn sənəmə nəghatən əpnapin əm. Tatən məmə, “Uhgīn tolkeike pik məmə nīkitat itəm in təmos-ipa kəm kitat, otuwin əm ron.”

⁶Mətə Uhgīn tətawte-in rəhan nəwīrən tatuwa matahgoau kəm kitat. O nat əh, Naoa Rəha Uhgīn tatən məmə, “Uhgīn tətəhtosig-in netəm kətausit, mətə tətawte-in rəhan nəwīrən kəm netəmim koatos-iəhau rəhalat nətəligən.”

⁷Kən tol nəhlan, otos-iəhau itəmat kən motatig ahgin nelmi Uhgın. Otətul əskasik nian Setan tatuwa matos-ipən-os-ipən kəm itəmat, kən in otaiu muwın isəu otəmat.

⁸Otuwin iuəhkir o Uhgın, kən in otuwa iuəhkir otəmat. Itəmat u nol təfagə rat, otaikuas e nelmitəmat. Kən itəmat u rəhatəmat nətulən kəiu, otol nikitəmat tətuatip.

⁹Təwir məmə nikitəmat otahmə mərou, kən nakotasək əfəməh o rəhatəmat təfagə rat. Otəuhlin rəhatəmat nalahən otuwa nasəkən, kən rəhatəmat nagienən otuwa nikin ərou.

¹⁰Otos-iəhau rəhatəmat nətəligən tuwin kəm İərəmərə, kən in otıləs-ipər itəmat.

¹¹Piak min ne winik min. Sotəghat ratən e nərgitəmat min. Okəmə suah kit tatəghat rat e nərgi pian kit, o in tatələhəu nəghatən kit məmə in təmöl təfagə rat kit, kən suah əh, in tatəghat rat e lou matələhəu nəghatən məmə lou təsahmenən məmə in otol rəhan wək, o kəm-naka lou in nat əpnapın əm. Kən nian nakoatəplan lou məmə in təsahmenən, itəmat nəkəsotətəu-pənən lou, məto nəmotər kəpələh-pər e lou, kən məsotatig ahginən lou.

¹²Uhgın əm in tatos-ipa Lou, kən in əm tətakil netəmim matələhəu nəghatən lan. Kən in titun nosmegəhən, kən mitun nərəkinən. ?Məto itəmat, nikitəmat təht məmə itəmat Uhgın min, məmə nakotakil təfagə rat min rəha piatəmat min motuəh ilat? !Kəp!

Nəghatən ausit

¹³Otətəlig-in-tu, itəmat netəm nakoatən məmə, “Roiu o olawig, kotuwın e taon u o taon əh, motatig e nup kit, motol bisnes ikin, kən moatargətain məni.”

¹⁴?Nakotahro kitun məmə naka u otuwa olawig? ?Nəmegəhən rəhatəmat in naka? Itəmat nəkotahmen e nəhaniəm itəm tətətig noan məsin əm kən matig mikə min.

¹⁵Məto nəghatən itəm tətuatip məmə onəkotən in tol nulan, nəkotəkəike motən məmə, “Okəmə in nəwia İərəməyə pahrien, kən ekotatig kən motol natimnat min u, o natimnat min əh.”

¹⁶Məto roiu, nakotəghat ausit moatos-ipər pik itəmat. Kən nəghatən min əh itəm nakoatən, ilat rafin kotərat.

¹⁷Tol nəhlan, etəmim itəm titun nat kit itəm tətuatip məmə otol, məto təsölən, in tatol təfagə rat.

Jemes 5

Nəghatən tatuwin o netəm rəhalat nautə tepət

¹Itəmat netəm rəhatəmat nautə tepət. Otətəlig-in-tu nəghatən u. Təwir məmə nakotəto tərət motasək əfəməh o nəratən itəm tatuwa otəmat.

²Rəhatəmat nautə tinəmnəmit rəkis, kən win min kinoaton rəhatəmat napən.

³Rosta tatus rəhatəmat iaen u kol tatipit-ipit, ne silfa. Kən rosta min okotən-iarəp nolən rat min rəhatəmat kən motus nipətətəmat tahmen e nigəm. Nian rəha namnun nian tatuwa iuəhkir, məto itəmat nəmotargətəin rəhatəmat nautə min.

⁴!Otətəlig-in-tu nat u! Rəhatəmat iolwək min kəmotəulək e rəhatəmat nasumən min, məto nəmotəkləh-in məni məsin rəhalat. Kən nətouən itəm nəməsotos-ipənən kəm ilat, koatən-iarəp rəhatəmat nolən rat min. İərəməyə Əsanən Pik Agin, tinatəto nasəkən rəha iolwək min rəhatəmat.

⁵E nətueintən u, itəmat nəmotatig e nəmegəhən itəm timətig əm, nəmotol nikitəmat tagien o rəhatəmat nautə e nian itəm otəsuwəhən Uhgın otakil muəh mələhəu nəghatən o rəhatəmat nolən rat min. Itəmat nəkotahmen e nat megəh min itəm kətagwən ilat, kol kotasis-asis o nian rəha nohən ilat.

⁶Nəmotiuw-iarəp netəmim itəm kotətuatip e kot, kən motakil motuəh motələhəu nəghatən motohamnu ilat, kən ilat kəməsotolən nat kit məmə okotən-iəhau itəmat.

Nətəligən əfəməh e nian rəha nəratən

⁷Piak min ne winik min. Otol mēmā rəhatəmat nətəligən otəfəməh nian nakoatəsaḡin mēmā Iəramərə otitəlig-pa min. Nikitəmat tatəht nolən rəha suah kit rəha nasumən. Tatəsaḡin nian ətuatip rəha nətəən nimai, kən matəsaḡin nian rəha nəfəən, kən mos rəhan nətəligən təfəməh nian matəsaḡin mətəarus-pən tinimətə, kən matəulək-in rəhan nagwənən keike.

⁸E nolən əh tahmen əm, itəmat min, otol mēmā rəhatəmat nətəligən otəfəməh, kən motətul əskasik, mətə-inu otəsuwəhən Iəramərə otitəlig-pa min.

⁹Piak min ne winik min. Sotəḡhat-əḡhatən o nən ratən itəmat min mēmā nikitəmat təsagienən o natimnat min neen. Okəmā nəkoatol nəhlan, Uḡin otakil mələhəu-pən nəḡhatən o rəhatəmat nolən rat min. !Roiu aḡin-əh tatətul matip, kən otəsuwəhən tuwa mol!

¹⁰Piak min ne winik min. Nikitəmat tatəht-tu ien min aupən itəm kəmotən-iarəp nəḡhatən min e nərgi Iəramərə. Rəhalat nəmegəhən tatəḡətun kitat mēmā rəhatat nətəligən otəkəike məfəməh e nian nəratən tatuwa.

¹¹Kən nəkotitun inu, katən mēmā netənim itəm koatətul-iəkis e nian nəratən tatuwa, ilat koatatig e nəwīrən pahrien. Nəmotətəo namnusən rəha Jop mēmā təmətul əskasik e nian iəkis min, kən motitun nalpəkəuən wir rəha Iəramərə o Jop, kən uarisig e nian tepət rəha nəratən, Iəramərə təmol təwir aḡin kəm in. Kən tol nəhlan, sotaluinən mēmā niki Iəramərə təmər marioah e nasəkitunən kitat, kən nikin titəhmə otat.

¹²Piak min ne winik min. Nat u in nat keike, mēmā nəsotosən noanawil. Sotosən noanawil e nego e neai, o nətueintən, o nat kit min. Nian rafin, otən əm nīpahrienən. Nian itəmat kit otən mēmā, “Əwəh,” kən rəhan nəḡhatən otəkəike mol nīpahrienən. Kən nian itəmat kit otən mēmā, “Kəp,” kən rəhan nəḡhatən otəkəike mol nīpahrienən. Okəmā suah kit təsələn nəhlan, kən Uḡin otələhəu-pən nəḡhatən rəha nalpīnən kəm in.

Nəfakən itəm noan əh-ikin

¹³Okəmə itəmat kit tətatiḡ e nərātən, təwir məmə otəghat kəm Uhgīn e nəfakən. Okəmə itəmat kit nīkin tagien, təwir məmə otan napuən min rəha nənwiwiən.

¹⁴Okəmə suah kit tatimis, təwir məmə otaun-in elta min rəha niməfak məmə okotuwa kəfak lan, kən motol-pən oel lan e nərḡi Iərəmərə.

¹⁵Kən nian ilat koatahatətə məmə Uhgīn otol-wir suah əh, kən motəfak lan, rəhalat nəfakən in suatip məmə Iərəmərə otol məmə etəm tatimis otəto təwir min. Kən okəmə in təmol təfagə rat kit itəm tatiuw-pa nimisən, kən Uhgīn otafəl rəhan təfagə rat.

¹⁶Tol nəhlan, təwir məmə nakoatən-iarəp rəhatəmat nolən rat min kəm itəmat min, kən motəfak otəmat min pəs motəmegəh. Suah kit itəm tətuatip, rəhan nəfakən in təsanən, kən tatoe-in noan.

¹⁷Elaija in etənim kit tahmen əm e kitat. Kən in təməfak təməfak məmə otəsəfikən, kən nuhuən təməsəfikən mos nup kisil ne məwig sikis.

¹⁸Kən təməfak min, kən Uhgīn təmahl-ipa nuhuən tuwa min, kən nasumən rafin, nagwənən təmatig min elat.

Iuw-pa min netənim kəmotuwīn isəu e rəhalat nahatətəən

¹⁹Piak min ne winik min. Okəmə itəmat kit tateko mətəpəs suatip rəha nīpahrienən, kən okəmə suah kit min tatiuw-pa min,

²⁰təwir məmə nəkotitun nat u məmə, etəm u itəm otol iol təfagə otitəlig-pa min e suatip rəha nīpahrienən, in otosmegəh suah u o nimisən, kən otol suatip məmə Uhgīn otafəl rəkis təfagə rat min tēpət rəha suah əh.

1 Pita

1 Pita 1

Pita tēmən təwir kəm ilat

¹Io Pita, io aposol kit rəha Iesu Kristo. Iatən təwir kəm itəmat netəm rəha Uhgın itəm nəkotatig ikin min rafin əpəh e profens min u Pontas, ne Kalesia, ne Kapatosia, ne Esia, ne Pitinia. Uhgın təmitəpun rəkis itəmat, kən imatəmat ikin sənəmə nətueintən u, itəmat iapispis min əm u ikin-u.

²Tata Uhgın təmitəpun itəmat məto-inu, aypən aypən agın, təmol rəhan nalpəkauən mələhəu, kən in tinitun rəkis suatip min rafin rəha nəmegəhən rəhatəmat. Kən Narmin Rəhan tatol itəmat nakotətul pisin kasim məmə, nəkotel nəwia Iesu Kristo, kən nitan taikuas etəmat e nolən rat min rəhatəmat. Pəs Uhgın otawte-in rəhan nəwıren ne nəməlinuən tepət kəm itəmat.

Otənwiwi Uhgın o nalpəkauən rəhan

³Pəs kotənwiwi Uhgın itəm in Uhgın ne Tata rəha İerəmərə Iesu Kristo rəhatat! E nasəkitunən asol rəhan, in təmol məmə kitat kotair-pən e nəmegəhən wi, kən moatələhəu-pən əskasik rəhatat nətəligən lan. Tatuwa min-nəhlan məto-inu Iesu Kristo təməmegəh min e rəhan nımisen.

⁴Kən e nəmegəhən wi u, kitat okotos natimnat wir min əpəh e nego e neai itəm Uhgın təmələhəu pisin məmə rəhatat. Kən nat u okol təsəmnəmitən, kən okol təsəmkimikən, kən okol rəhan nəhag-əhagən təsikəən.

⁵E nahatətən rəhatəmat, nəsanənən rəha Uhgın tatətulosig-in itəmat mətoarus-pa in otosmegəh itəmat, kən Uhgın otol əp rəhan nosmegəhən e namnun nian.

⁶Nikitəmat tətəgien o nat u, nat əpnəpin okəmə nian iəkis pisin pisin min koatuwa pap e rəhatəmat nəmegəhən. Məto koatuwa o nian əkuəkır əm.

⁷Nian iəkis min əh moatuwa məmə okotəgətun məmə itəmat nakotahatətə pahrien. İaen u kol tatipit-ıpit, in nat kit itəm nigəm tatus mətafəl rəkis in rat min lan. Kən nian iəkis min əh kotahmen e nigəm itəm tatus rəhatəmat

nahatətəən mətafəl rəkis in rat min lan. Iæn u kol, in nat təwir, məto otəpanikə min nian kit. Məto rəhatəmat nahatətəən, in nat təwir taprəkis-in iæn u kol. Kən o rəhatəmat nahatətəən, Uhgın otənwiwi itəmat, miləs-ipər nərgitəmat, mos-ipən nisaiiən asol kəm itəmat e nian Iesu Kristo otuwa met-arəpa lan.

⁸Nat əpnapin nəməsotəplan papən Iesu Kristo, məto nakoatolkeike. Kən nat əpnapin nəsotəhmən u-roiu, məto nakotahatətə lan. Kən nikitəmat təmər mərioah e nagienən itəm in təwir agin-əh taprəkis, kən okol suah kit təsənən nəwirən rəha nagienən əh.

⁹Nikitəmat tətagien nəhlan məto-inu itəmat noatos nat u itəm nakotahatətə lan, inu məmə Uhgın otosmegəh rəhatəmat nəmegəhən.

¹⁰Suatip rəha Uhgın o nosmegəhən netəmim lan, in nat kit itəm ien min aupən kəmotolkeike p̄ik məmə okotitun tuwin təhmin min, kən tol nəhlan kəmotafin kategəs-in wir nətəligən min lan. Kən ilat kəmoatəghat-in nəwirən u itəm otuwa kəm itəmat.

¹¹Narmin rəha Kristo təmətətig ilat min, kən matəghat kəm ilat, kən aupən ikin matən-iarəp nahməən itəm okotuwa e nəmegəhən rəha Iesu, kən uarisig lan e nəsanənən asol rəhan. Məto ien min kəmotalkut o nitunən suatip itəm natimnat min əh okotuwa lan, ne rəhalat nian ətuatip.

¹²Uhgın təmol əp kəm ien min məmə, nəghatən min itəm ilat kəmoatən, kəməsotəghat-inən nian itəm ilat kəmotətig lan, məto kəmotəghat-in əm nian rəhatat. Kən roiu, netəmim kinotən-iarəp nəghatən rəha namnusən təwir kəm itəmat e nəsanənən rəha Narmin Rəha Uhgın itəm tətisi-pən e nego e neai. Kən natimnat min u kotəwir agin məmə nagelo min, ilat min kətolkeike məmə okotəplan kən motitun natimnat min u itəm kəmotuwa.

Nolən rəha nəmegəhən itəm tətəuatip

¹³Tol nəhlan, nəkotəkəike motol rəhatəmat nətəligən tətul matip o nolən wək, kən motəgətun wir rəhatəmat nətəligən. Otələhəu-pən əskasik rəhatəmat

nətəligən e nəwīrən itəm Uhgīn otawte-in kəm itəmat nian Iesu Kristo otuwa min.

¹⁴Otol nəwia Uhgīn tahmen-pən əm məmə nisualkələh itəm kotəwīr koatol nəwia tata min. Aupən ikin, itəmat nəməsotitunən nīpahrienən rəha Uhgīn, kən nəmoatol nolən rat min itəm nīkitəmat əm tolkeike. Məto roiu, otəsegəhan-inən nətəligən min əh okotiuw rəkis min itəmat.

¹⁵Uhgīn u itəm təmaun-in itəmat, in tasim mətuatīp. Kən e nolən əh inəh, itəmat min onəkotəkəike motasim motətuatīp e natimnat rafin itəm nəkoatol.

¹⁶Nəkotəkəike motol nəhlan məto-inu Naoa Rəha Uhgīn tatən məmə, “Nəkotəkəike motasim motətuatīp məto-inu Io ekasim mətuatīp.”

¹⁷Itəmat nakotətapəh-in nasituən o Uhgīn u tahmen məmə in rəhatəmat Tata, məto onəkəsotaluinən məmə nian Uhgīn tətakil nolən min rəha netəmin, in tatol əm e nolən itəm tahmen-ahmen əm. Tol nəhlan, nian nakotəmegəh əh e nətueintən u, onəkotəgin motisiai-in Uhgīn e nolən min rəhatəmat, kən otol nolən təwīr tahmen məmə itəmat iapīspīs min əm e nətueintən u.

¹⁸Nəkotəkəike motol nəhlan məto-inu itəmat nəmotitun rəkis nat keike itəm Uhgīn təmətou rəkis itəmat lan. Otətəlig-in-tu nolən rəha nəmegəhən rəhatəmat aupən itəm nīpətīn tikə u təmisi-pən o tīpītəmat min. Məto Uhgīn təmīkis rəkis itəmat e nolən rat əh. Kən Uhgīn təməsos-nəmtīnən rəhatəmat nəmegəhən e nat kit rəha nətueintən itəm otəpanikə, tahmen e silfa ne iaen u kol tatīpit-īpit,

¹⁹məto in təmos-nəmtīn itəmat e nita Kristo itəm in nat keike təwīr pīk agīn. Kristo in tahmen e nətī sīpsīp wīr itəm nīmīsən o nəratən tikə agīn lan.

²⁰Aupən aupən agīn, nian Uhgīn təməsolən əh nətueintən u, təmītəpun rəkis Kristo məmə otol wək əh. Məto roiu iuəhkīr o namnun nian, Uhgīn təmol əp in, məmə otuwa masitu etəmat.

²¹O natimnat itəm Iesu təmol, itəmat nakotahatətə e Uhgīn, itəm təmosmegəh Iesu Kristo e nīmīsən, kən mīləs-īpər in mos-īpən nəsanənən itəm təhag-əhag

ne nisaiien kəm in. Kən tol nəhlan, nakotahatətə e Uhgīn, kən moatələhəu-pən əskasik rəhatəmat nətəligən lan.

²²Nəmotaiquas e rəhatəmat nəmegəhən tinuwa minuwiwi min rəkis məto-inu nəmotətəu-pən nəghatən rəha nipahrienən. Kən o natimnat min u, nakotos nolkeikeən pahrien tatuwin otəmat min neen. Kən tol nəhlan, otolkeike pik itəmat min e nikin pahrien.

²³Otol nəhlan məto-inu, nəmotaiir wi rəkis min, kən nəmegəhən wi rəhatəmat təməsisipənən o netəmim itəm ilat rafin okəpanotimis. Məto nəmegəhən wi u rəhatəmat in otətətig namnun tikə məto-inu təmisi-pən e nəghatən kit itəm tatəmegəh mətətig namnun tikə, inu nəghatən rəha Uhgīn.

²⁴Naoa Rəha Uhgīn tatən məmə, “Netəmim rafin kotahmen e ma kiras, kən nəwirən rafin rəhalat tahmen əm e nəgui-nig əpəh e nikinat. Ma kiras əh tətəuke, kən nəguin min koatisas,

²⁵məto nəghatən rəha Iərəməərə tətətig lilin namnun tikə.” Kən inu nəghatən rəha namnusən təwir itəm netəmim kəmotən-iarəp rəkis kəm itəmat.

1 Pita 2

¹Məto-inu o nəghatən min əh, otəraikin nolən min u kotiet rəkis e rəhatəmat nəmegəhən: nolən rafin rəha netəhauən netəmim kən matol nəratən kəm ilat; nolən rafin rəha neiuəən; nolən rəha netəm koatən pik əm nat, məto kəsotolən; nolən rəha netətən; nolən rafin rəha nən ratən netəmim.

²⁻³Itəmat nəmotitun rəkis məmə Iərəməərə təmol təwir kəm itəmat. Tahmen-pən məmə nəmotun asgəwin noa nig itəm tətəhen. Kən roiu nəkotəkəike motuwa kahmen e nisualkələh mətətig itəm kotasək o nəməhən. Itəmat nəkotəkəike kolkeike pik nagwənən ne nənimən itəm tətətip məwir məmə nakotəgwən nikitəmat lan. Kən natimnat min əh okotol nakotepət e rəhatəmat nəmegəhən itəm Uhgīn təmosmegəh itəmat lan.

Kəpiel megəh e nimə rəha Uhgīn

⁴Uhgīn tolkeike məmə otələkin rəhan kit nimə e kitat netəmim, kən təmitəpun Kəpiel kit itəm netəmim kəmotapəs, məto in kəpiel keike tatəmegəh məmə

Uhgín otətuoun nimə lan. Kən nian nakotuwa o kəpiel u Kristo e suatip rəha nahatətəən,

⁵itəmat min, nəkotahmen e kəpiel megəh min itəm Narmin Rəha Uhgín tatos itəmat matiləkin Nimə lan Rəha Uhgín. Kən itəmat pris asim min, itəm nakoatos-ipən sakrifais min kəm Uhgín itəm nikin tətagien ron mətə-inu o natimnat itəm Iesu Kristo təmol.

⁶Tahmen-pən e Naoa Rəha Uhgín tatən mihin məmə, “Otəplan-tu. Iakatələhəu kəpiel əpəh Jerusalem, inu kəpiel keike pik agin itəm io emitəpun, kəpiel u in rəha nətuounən nimə, kən etənim itəm otahatətə lan, in otəsaulisən.”

⁷Kəpiel u in nat keike kəm itəmat itəm nakoatahatətə lan. Mətə kəm netənim itəm kəsotahatətəən lan, kəpiel u in tahmen-pən e nəghatən u e Naoa Rəha Uhgín itəm tatən məmə, “Kəpiel u itəm netəm rəha niləkinən nimə kəmotəraikin, mətə Uhgín təmol tuwa kəpiel itəm in rəha nətuounən nimə,”

⁸kən Naoa Rəha Uhgín tatən məmə, “Kəpiel u tatol netənim koatiləs pikən, kən in kəpiel itəm tatol məmə netənim kotiet katorin.” Ilat koatiləs pikən kəpiel u mətə-inu koatəht nəwia nəghatən, kən inu nalpəkəuən itəm Uhgín təmol olat.

⁹Mətə Uhgín tinəmitəpun rəkis itəmat məmə rəhan min, kən itəmat pris min rəha Kig, kən itəmat netəm asim min itəm Uhgín tatəramərə etəmat, kən itəmat noanol min kit rəha Uhgín. In təmol itəmat nəhlan məmə nəkotitun nən-iarəpən nənwiwiən itəm tatiləs-ipər in o rəhan nəwirən ne natimnat itəm in təmol. In təmaun-in rəkis itəmat məmə onəkotiet e napinəpən məmə nakotuwīn e nəhag-əhagən wir rəhan.

¹⁰Aupən ikin, itəmat netəm ənnapin min əm, mətə roiu, itəmat noanol min rəha Uhgín. Aupən ikin, nəməsotitunən nasəkitunən rəha Uhgín, mətə roiu, nəkotitun nasəkitunən rəha Uhgín.

¹¹Iolik min itəm iakolkeike pik itəmat, nikitəmat otəkəike matəht məmə nətueintən u sənəmə imətət ətuatip ikin. Kitat kotahmen e iapispis min ne iaihlə min ikin-u. Tol nəhlan, iatən əskasik kəm itəmat məmə nakotətul isəu

o nolən rat mın itəm nətəligən rəhatəmat tolkeike. Nətəligən mın əh, ilat tıkimir mın rəhatəmat kən koatəluagin e nıkitəmat.

¹²Nıan rafın kitat kotatıg ilugin e netəmim itəm rəhalat nahatətəən tıkə. Kən nəmegəhən rəhatəmat in otəkəike mətuatıp wır agın məmə nat əpnarın ilat okoatətu-pınə nəghatən rat etəmat, məto okotəplan nolən wır mın rəhatəmat, kən ilat okotos-ipən nısiiaiən kəm Uhgın e nıan in otuwa mın makıl netəmim lan.

Nısiiaiən netəm-iasol

¹³Kitat netəmim rəha İərəməərə, kən kotalkeike məmə okotısiiai-in nərgın. Tol nəhlan, nəkotal nəwia netəm-iasol mın rafın itəm netəmim koatıləs-ipər ilat məmə okotərəməərə, tahmen e kig, itəm in etəm-iasol agın,

¹⁴o tahmen e rəhan netəm-iasol mın itəm tətahl-iarəp ilat o nolən rəhan wək. İlat okotuwin motələhəu nalpınən kəm netəmim itəm koatətghıl lou rəhalat, kən moatənwiwi netəm koatol nolən təwır.

¹⁵Nəkoatol nəhlan məto-inu Uhgın tolkeike məmə rəhatəmat nolən wır mın okotən-ıəhau nəghatən alməl mın rəha netəm mın u rəhalat nıtunən tıkə.

¹⁶İtəmat sənəmə slef mın rəha təfagə rat mın, məto-inu Uhgın təmıkis rəkis itəmat. Tol nəhlan, otətəu-pən nolən rəha suah kit nəhlan. Məto sotənən məmə, “Uhgın təmıkis rəkis io, kən tol nəhlan, ekitun nolən nat naka itəm iakolkeike, nat əpnarın in təfagə rat.” Kəp. İtəmat slef mın rəha Uhgın, kən tol nəhlan, otətəu-pən nolən mın itəm kotətuatıp.

¹⁷Otos-ipən nısiiaiən itəm tətuatıp kəm netəmim rafın. Otolkeike iəfak mın, inu netəmim mın rəha Uhgın, kən onəkotəgin motısiiai-in Uhgın, kən otısiiai-in kig.

¹⁸İtəmat slef mın, onəkotəkəike motol nəwia rəhatəmat etəm-iasol mın, kən motos-ipən nısiiaiən kəm ilat. Nəkotal nəhlan kəm ilat rafın, netəm koatol tımətıg kən motəwır kəm itəmat, ne netəm mın u koatol nolən əskasık mın kəm itəmat.

¹⁹Okəm-naka nəkotol əm nat ətuatip min əm, məto rəhatəmat netəm-iasol min koatol tərət kəm itəmat kən nakoatəto tərət lan. Niki Uhgın otāgien otəmat okəmə nakoatos əm nian iəkis min əh kotuwa katimis əm e nikitəmat məto-inu nakotasipən əm o Uhgın.

²⁰Məto kəsənən məmə itəmat netəm wir okəmə nəkotol nolən rat kit, kən netəm-iasol koatoh itəmat ron, kən nəsotaiuən motāgim. Nalpinən u, in rəhatəmat atip əm. Məto, Uhgın nikin tətāgien otəmat okəmə nakoatos nahməən məto-inu nəkotol nat təwir əm, kən nəsotaiuən motāgim.

²¹Uhgın təmaun-in itəmat məmə nakoatos nahməən məto-inu Kristo təmos nahməən otəmat. In təmaupən mэгətun nolən ətuatip əh məmə itəmat nəkotətəu-pən əm nəme nelkin.

²²Naoa Rəha Uhgın tatən məmə, “In təməsolən təfagə rat kit, kən in təməsənən nəghatən eiueiuə min nian kit ne.”

²³Nian netəmim kəmotəghat rat lan, məto in təməsəhaiən ilat. Nian in təməto nahməən e nipətin, məto in təməsənən məmə in otalpin nitai nərətən. Məto in təmələhəu-pən natimnat rafin e nelmi Uhgın itəm nian rafin rəhan nakilən in tətəuətəp əm.

²⁴Nian Iesu təməkul e nig kəluau, kən təmos nalpinən rəha təfagə rat min rafin rəhatat e nipətin. In təmimis məmə təfagə rat min okotimis e nəmegəhən rəhatat, kən kitat okotəmegəh məmə okotətəu-pən suatip rəha nətuatipən. Təmosmegəh kitat e nahməən rəha niməgəm e nipətin.

²⁵Aupən, itəmat nəkotahmen e sipsip min itəm kəmotəluə. Məto roiu, nəmotəuhlin itəmat motuwa o Etəm Tatehm Wir Sipsip, inu Etəm Tatehm nəmegəhən rəhatəmat.

1 Pita 3

Nolən təwir rəha iərman ne pətan itəm kəmioal marit

¹Kən e nolən kitəh əm rəha nisaiiən İərəmərə, itəmat nipitan nəkotəkəike kol nəwia iaguıhl min rəhatəmat məto-inu o nat u. Okəmə ilat kəsotahatətəən e nəghatən rəha Uhgın, kən rəhatəmat nolən wir min əm okotiuw-pən rəhalat

nətəligən kəm Uhgín. Nolən wir mín rəhatəmat kotahmen, motaprəkis-in məmə onakoatəghat kəm ilat.

²Nian ilat koatəplan məmə nolən rəhatəmat in tətuatip wir, kən koatəplan nisiiəən e nəmegəhən rəhatəmat, inu tahmen əm məmə otiuw-pa ilat kotuwa o Uhgín.

³Pəs malə-malə rəhatəmat in sənəmə rəha nīpətītəmat, tahmen e nolən rəha nəlisən noanutəm, o nuwinən e natimnat kəmol e iaen u kol tatipit-īpit, o nuwinən e napən wir mín.

⁴Məto otol malə-malə e nikitəmat itəm nəwīrən rəhan okol təsikəən, inu nolən ərou, ne nolən mətīg nəməlinuən əh-ikin. Ilat nolən keike e nīganəmti Uhgín.

⁵Inu nolən rəha nīpitan iəfak mín aupən itəm kəmotələhəu-pən əskasik rəhalat nətəligən e Uhgín. Ilat kəmotol nəwia iaguīhl mín rəhalat, kən e nolən əh, kəmoatol malə-malə e nīkilat,

⁶tahmen e Sera itəm təmol nəwia Epraham, kən mətəun-in məmə in rəhan etəm-iasol. Kən itəmat nenəti Sera okəmə itəmat nəkoatol nolən mín itəm kotətuatip, kən məsotəginən.

⁷Kən itəmat nəman itəm nəmotol marit, e nolən əh inəh rəha nisiiəən Iəramərə, nəkotəkəike motos nenatīgən o nehm wirən rəhatəmat nīpitauguīhl mín e nəmegəhən rəhatəmat məto-inu, ilat kəsotosən nəsanənən tahmen etəmat. Kən motisiai-in ilat e rəhatəmat nolən mín məto-inu ilat mín okotos mín nat wir u, nəmegəhən lilin. Otol nəhlan məmə nat kit otəsahtosiɡ-inən rəhatəmat nəfakən.

Iəfak mín rafin

⁸Namnun nəghatən əh. Itəmat rafin nəkotəkəike kol nolən mín u: otos nətəligən kitiəh, otasəkitun itəmat mín, otolkeike itəmat mín, otol nikitəmat timətīg otəmat mín, otos-iəhau rəhatəmat nətəligən.

⁹Okəmə netənim koatol tərət kəm itəmat, məto nəkəsotalpīnən nitai nəratən. Okəmə netənim koatəghat rat kəm itəmat, məto nəkəsotalpīnən. Məto otəfak

motən-ipən kəm Uhgīn mēmə in otol təwir kəm ilat. Otol nəhlan mətō-inu Uhgīn tēmaun-in itēmat mēmə onəkotol nolən əh, pəs onəkotos nəwirən rəhan.

¹⁰Naoa Rəha Uhgīn tatən mēmə, “Etəmim itəm tolkeike nəmegəhən təwir, kən molkeike mēmə otatəto təwir e nian rafin, in otəkəike məsənən nəghatən rat min, kən in otəkəike məsənən neiuəən.

¹¹In otəkəike məuhlin in, miet rəkis e nolən rat min, kən mol əm natimnat min itəm kotəwir. In otəkəike malkut pik mēmə otatig ilat netəmim rafin e nəməlinuən.

¹²In otəkəike mol nəhlan meto-inu Iərəmərə tatehm wir netəmim itəm kotətuatip, kən matətəlig-in wir rəhalat nəfakən, mətō tatol tikimīr ilat netəm koatol təfagə rat.”

¹³?Okəmə nakotalkut pik o nolən natimnat min itəm kotəwir, pah otol nərātən kəm itēmat?

¹⁴Mətō okəmə nīpahrienən nakoatəto nahməən o nolən ətuatip rəhatəmat, kən nakoatatig e nəwirən pahrien. Sotəginən nərātən itəm netəmim kotitun nolən kəm itēmat, kən pəs nikitəmat təsəht pikən.

¹⁵Mətō e nikitəmat, otisiai-in Kristo mēmə in Iərəmərə. Otətul matip e nian rafin o nuhalpinən nəghatən rəha etəmim pah itəm tatətapəh-in otēmat mēmə tahro nakoatələhəu-pən əskasik rəhatəmat nətəligən e Iesu. Mətō otəghat mətig kəm ilat e nisiiəən.

¹⁶Kən nian rafin nəkotəkəike kitun e nətəligən rəhatəmat mēmə rəhatəmat nolən in tətuatip əm. Kən okəmə netəmim kotəghat rat e nolən wir min rəhatəmat mətō-inu itēmat rəha Kristo, ilat okotaulis e nəghatən rat min rəhalat.

¹⁷Okəmə in nalpəkəuən rəha Uhgīn mēmə nakoatos nahməən o nolən wir min rəhatəmat, nat u in nat təwir taprəkis-in mēmə nakoatos nahməən o nolən rat min rəhatəmat.

¹⁸Tol nəhlan məto-inu, Kristo təmimis o təfagə rat min, təmimis nian kitəh əm tinahmen, okol təsimis minən nian kit. In etəm tətuatip agin, məto təmimis o netəm kəsotətuatipən məmə otos itəmat muwin kəm Uhgın. Kəmotohamnu in kən nıpətın timis, məto Uhgın təmol məmə in təmegəh min e nımisən, e nəmegəhən kit itəm rəha nego e neai.

¹⁹Kən e nəmegəhən əh, təmuwin mən-iarəp nəghatən rəha Uhgın kəm narmi netəm kəmotimis itəm kotatig e kalapus,

²⁰ilat u kəmoatəht nəwia Uhgın aıpən aıpən agin nian Uhgın təmatos rəhan nətəligən əfəməh matəsahgin ilat e nian suah u Noah təmatiləkin nego. Netənim eit əm, itəm kəmotatig e nego, Uhgın təmosmegəh ilat e nian kəmotaiu motuwin motiet-pən e nəhau asol.

²¹Kən nəhau əh, in narmi nolən baptais itəm tatosmegəh itəmat min roiu. Nolən baptais u, nıpətın sənəmə tətəfəl rəkis nəmit e nıpəti etənim, məto in tahmen məmə nakotətapəh o Uhgın məmə in otos-ıpa kəm itəmat nitunən məmə rəhatat təfagə rat min kəmotikə. Kən nəsanənən asol itəm Uhgın təmol İesu Kristo təmegəh min e nımisən lan, in nəsanənən itəm tatosmegəh itəmat e nolən baptais.

²²Kən İesu Kristo tinuwin rəkis əpəh e nego e neai, kən mətatig e nikali Uhgın matip, ikin rəha nisaiiən, ne nəsanənən, ne nepətən. Kən Uhgın təmol məmə nagelo min, ne natimnat rafin itəm koatos nepətən ne nəsanənən, ilat rafin kotatig ahgin nərəmərən rəha İesu.

1 Pita 4

Suatip rəha nolən nəwia Uhgın

¹O natimnat min əh, itəmat min onəkotəkəike motos nətəligən rəha Kristo kən moatətul matip o nətoən nahməən e nıpətitəmat, məto-inu in təməto nahməən asol e nıpətın. Nəkoatol nəhlan məto-inu okəmə itəmat ninotəto tərət e nıpətitəmat, nat ənnapin nəkoatol nolən təwir min, kən tatəgətun məmə ninotapəs nolən rəha təfagə rat.

²Tol nēhlan, nian itēmat nēkotatig e nētueintēn u, nēsotētēu-pēnēn suatip rēha nolēn natimnat rat min itēm tētatig e rēhatēmat nētēligēn, mēto onēkotētēu-pēn suatip rēha nolēn nēwia Uhgīn.

³Nēmōtērēkin rēkis nian tēpēt o nētēu-pēnēn nolēn min rēha netēm min u kēsotēnēn nīpahriēnēn e Uhgīn. Aupēn, itēmat nēmōatit ēpnāpīn nīpītan; kēn nētēligēn rēhatēmat tēmātuwīn o natimnat rat min; kēn nēmōatāpīs; kēn nēmōatol lafet rēha nītēpēn nīpītan; kēn nēmōtēnīm alikol kāpīs motalmēl; kēn nēmōatēfak kēm narmī nat min itēm in nolēn tērat agīn.

⁴Netēm ēh itēm kēsotēnēn nīpahriēnēn e Uhgīn, narmīlat tēmīwīg mēto-inu itēmat nēmōtāpēs nētēu-pēnēn ilat motuwīn kammīm e naruēh rēha tēfagē rat rēhalat, kēn ilat koatēn rat pīk itēmat ron.

⁵Mēto ilat okotēkēike motēn-iarēp natimnat min rafin e nēmēgēhēn rēhalat kēm Uhgīn itēm in tatētul matip mēmē otakil muēh mēlēhēu nēghatēn rēha nalpīnēn rēha netēm kēmōtīmīs, ne netēm koatēmēgēh.

⁶Tol nēhlan, netēm min u itēm kēmōtīmīs rēkis, ilat kēmōtētō namnusēn tēwīr mēmē nat ēpnāpīn kēmōtos nalpīnēn e nīpētīlat motīmīs, mēto Uhgīn tītun nolēn ilat okotēmēgēh min e narmīn, tahmen lan.

⁷Kitat koātuwa iuēhkīr e nian rēha namnun natimnat rafin. Tol nēhlan, otol rēhatēmat nētēligēn tētāiir o nītun wīrēn natimnat, kēn motēhm wīr rēhatēmat nētēligēn mēmē nēkotītun nēghatēn kēm Uhgīn e nēfakēn itēm tēsānēn.

⁸Kēn nat keike in ilis taprēkis-in natimnat rafin mēmē, nakotolkeike itēmat min e nīkitēmat rafin mēto-inu, e nian nēkotol nēhlan, kēn nian rafin, nēkoatētul matip o naluīnēn nolēn rat min rēhatēmat.

⁹Kēn nēkotēkēike motit itēmat min motuwīn e latuēnu min rēhatēmat mēmē nakotagwēn itēmat min, kēn motēgētun ikīn netēmīm okotāpīl ikīn. Kēn ēsotēnēn nīkalīn mēmē nīkitēmat tēsāgiēnēn ron.

¹⁰Uhgīn tēmos-ipīnē nēsānēnēn pīsīn pīsīn min kēm itēmat kitīēh kitīēh. Tēwīr mēmē nēkotol wēk e nēsānēnēn min ēh moatasitu etēmat min. Kēn otol

wək əh e nolən rəha iolwək min itəm koatol wək ətuatip rəha Uhgín nian rafin. Onəkotoor nəwírən rəhan e suatip pisin pisin min itəm in tatos-ipínə.

¹¹Okəmə Uhgín təmos-ipən kəm suah kit nəsanənən rəha nən-iarəpən, kən təwir məmə in otən-iarəp tahmen əm məmə rəhan nəghatən in rəha Uhgín. Okəmə Uhgín təmos-ipən kəm suah kit nəsanənən rəha nasituən, kən təwir məmə in otasitu e netəmim e nəsanənən itəm Uhgín təmos-ipən məmə, e natimnat rafin, netəmim okotənwiwi Uhgín o nat itəm Iesu Kristo təmol. Pəs kitat koatən-iarəp rəhan nəwírən ne nəsanənən tatuwin matuwin namnun tikə. Əwəh.

Iəfak min okotos nahməən e nipətilat

¹²Io min neen itəm iakolkeike pik itəmat, ekitun məmə roiu nəratən əskasik tatiləs pikən itəmat tahmen e nigəm, kən nakoatəto nahməən asol lan. Məto təsəwírən məmə narmitəmat otiwig pik o nəratən min əh. Nəratən min əh koatuwa o netəmim tepət, sənəmə itəmat əm.

¹³Məto təwir məmə nikitəmat otətagien əm məto-inu nakoatəto nahməən tahmen-pən əm e Kristo. Kən okəmə nəkoatol nəhlan, kən nikitəmat otətagien pik agin nian in otol əp rəhan nəhag-əhagən asol rəha nəwírən ne nəsanənən rəhan.

¹⁴Okəmə netəmim koatən rat itəmat o nərgi Kristo, kən onəkotatig e nəwírən pahrien, məto-inu Narmin Rəha Uhgín itəm təsanən məhag-əhag mətətig otəmat.

¹⁵Tərat məmə itəmat kit otol nolən rəha nohamnuən itəm, o nakləhən, o nətgəhlən lou, o təfagə rat əkəku kit tahmen e nəghat tipikən. Okəmə in tatos nalpinən matəto nahməən ron, kən tətəuatip əm.

¹⁶Məto okəmə itəmat nakoatos nahməən məto-inu itəmat Kristin min, sotaulisən ron, məto nəkotəkəike motənwiwi Uhgín məmə nakoatos nərgin u Kristin.

¹⁷Tol nəhlan məto-inu nian rəha nakilən netəmim rəha Uhgın tinətuoun. !Kən okəmə nakilən əh tinətuoun e netəmim rəha Uhgın, kən awe o netəm min u itəm koatəht namnusən təwir rəha Uhgın!

¹⁸Naoa Rəha Uhgın tatən məmə, “Okəmə in tiəkis o netəm kotətuatip məmə Uhgın otosmegəh ilat,

?Kən tahro o netəm kotəruru Uhgın moatol təfagə rat?”

¹⁹Kən tol nəhlan, netəmim itəm koatəto nahməən məto-inu in nətəligən rəha Uhgın, təwir məmə ilat okotələhəu-pən nəmegəhən rəhalat e nelmi Uhgın itəm təmol neai ne niməptən ne natimnat rafın, kən nian rafın in tatol rəhan nəghatən. Kən təwir məmə ilat okoatəkəike katətəu-pən min əm suatip rəha nolən təwir.

1 Pita 5

Nəghatən tatuwin kəm elta min ne netəm alua

¹Kən roiu, iakolkeike məmə ekəghat məsin kəm itəmat elta min rəha niməfak. Io elta kit ekahmen etəmat, kən io atip eməplan nahməən rəha Kristo, kən Uhgın otos-ipa kəm kitat rəhan məsin nəhag-əhagən asol rəha nepətən ne nəsanənən rəhan, itəm in otol əp.

²Inu rəhak nəghatən kəm itəmat məmə, otol wək rəha nehm wirən netəmim rəha Uhgın itəm koatətig e nelmitəmat, tahmen e etəm rəha sipsip itəm tatehm wir rəhan sipsip min. Kən otol e nikin agien məto-inu nakotolkeike məmə onəkotol. Inu nətəligən itəm Uhgın tolkeike. Məto təsəwirən məmə nəkotol e nikitəmat təsagienən məmə nəkotol. Kən sotolən məto-inu nikitəmat təht məmə onəkotos pik məni lan. Məto otol əm məto-inu nikitəmat tətəgien məmə onəkotasitu.

³Kən təsəwirən məmə itəmat nakotuwa motahmen e etəm-iasol itəm tatol təskasik kəm rəhan iolwək min, məto itəmat onəkotol nolən itəm in tətətuatip məwir məmə iəfak min kotitun nəplanən kən motətəu-pən nolən rəhatəmat.

⁴Etəm-iasol rəha netəm koatehm sipsip min otiet-arəpa min, kən e nian əh, in otos-ipinə nətouən wir rəha nisiiən kəm itəmat itəm okol rəhan nəwirən təsikəən.

⁵Kən e nolən kitiəh əm, itəmat netəm aluə, otisiai-in motol nəwia elta min rəha niməfak. Kən itəmat rafin aɡin onəkotos-iəhau rəhatəmat nətəligən teiuaiu moatisiai-in itəmat min rafin. Otol nəhlan mətə-inu Naoa Rəha Uhgın tatən məmə, “Uhgın təsagienən mətəhtosig-in netəm kotausit, mətə tətawte-in rəhan nəwirən kəm netəm koatos-iəhau atip ilat.”

⁶Kən tol nəhlan, otos-iəhau atip itəmat motatig ahgin nelmi Uhgın əsanən, məmə in otiləs-ipər itəmat e nian ətuatip rəhan.

⁷Kən otos rafin rəhatəmat katipa əfigəm min ka kələhəu-pən kəm Uhgın mətə-inu, in tolkeike itəmat matehm wir itəmat.

⁸Otaiir moatehm wir mətə-inu, rəhatəmat tikimır Setan in tahmen-pən e laion kit itəm tatilik-ilik mətəiu anion mətəgət mategəs-in suah kit məmə otun.

⁹Otətul əskasik e nahatətəən rəhatəmat nian Setan tatuwa otəmat, mətə-inu itəmat iəfak min neen əpəh ikin min rafin e nətueintən, koatuwin əm e nahməən kitiəh əm.

¹⁰Mətə uarisig lan nəmotətə rəkis nahməən e nian əkuəkır əm, kən Uhgın otol nakotətə təwir min e rəhatəmat nəmegəhən, kən mol nakotəsanən e rəhatəmat nahatətəən, motətul əskasik, kən nat kit otəsiuw rəkisən itəmat. Nəwirən min rafin tətisi-pən əm o Uhgın, kən in təmaun-in itəmat nakotuwa e Kristo məmə nakotuwın e nəhag-əhagən asol rəha nəwirən rəhan, ne rəhan nəsanənən itəm tətətig lili.

¹¹Pəs koatən-iarəp nəsanənən rəha nərəmərəən rəhan, tatuwin matuwın namnun tikə. Əwəh.

Namnun nəghatən

¹²Saelas itimlau min, təmasitu o naoa u, kən ekatehm məmə in piak etəm təwir, kən rəhak nipahrienən tətətig lan. Iatəte naoa əkuəkır u kəm itəmat

məmə ekiləs-ipər rəhatəmat nətəligən, kən iatən-iarəp məmə natimnat itəm eməte rəkis, koatəghat-in nəwirən pahrien rəha Uhgın. Otətul əskasik lan.

¹³Piatəmat min ne winitəmat min e niməfak u ikin-u Rom koatən təwir kəm itəmat. Uhgın təmitəpun itəmat min ilat. Kən nətik u Mak, in min tatən təwir kəm itəmat.

¹⁴Otən təwir kəm itəmat min tahmen məmə itəmat kitəh əm e Kristo. Pəs Uhgın otawte-in rəhan nəməlinuən kəm itəmat rafin u netənim rəha Kristo.

2 Pita

2 Pita 1

Pita tēmən təwir kəm ilat

(Jut 4-13)

¹Io Saimon Pita, io slef ne aposol rəha Iesu Kristo. Iatən təwir kəm itəmat itəm nəmotos nahatətəən itəm in təwir tahmen e rəhatimat. Nəmotos nahatətəən əh e nolən ətuatip rəha rəhatat Uhgın ne Iosmegəh, inu Iesu Kristo.

²Pəs Uhgın otawte-in rəhan nəwİRən ne nəməlinuən taprəkis agin kəm itəmat məto-inu nəkotitun Uhgın, ne Iesu rəhatat İərəmərə.

Uhgın təmaun-in ilat məmə rəhan min netəmim

³E nəsanənən rəha Uhgın, təmos-İpa kəm kitat natımnat rafın itəm okotəkəike kos rəha nəmegəhən ne nolən min itəm kotətuatip kən Uhgın tolkeike. Tatos-İpa e nitunən rəhatat ron. In təmaun-in kitat e rəhan atip əm nəsanənən ne nəwİRən.

⁴Kən e nəsanənən ne nəwİRən rəhan, in təmos-İpa rəhan nəniəkisən min itəm İahgın kən məwİR pik. Təmos-İpa nəhlan məmə e nəniəkisən min əh, nəkotitun nuwamən motol kitİəh e nolən rəha Uhgın, kən motagım rəkis e nərətən rəha nətueintən itəm təmisİ-pən e nolkeikeən rat min e niki netəmim.

⁵Kən tol nəhlan, nəkotəkəike motalkut pik məmə nolən rəhatəmat otuwa təwir agin. Rəhatəmat nahatətəən əh-İkin, kən nəkotəkəike motol min nolən min u: otol təwir kəm netəmim, kən otos nitunən,

⁶otəhm wir rəhatəmat nətəligən ne rəhatəmat nolən min; kən otətul əskasik e Uhgın nian nərətən tatuwa, kən otos-İpən rəhatəmat nəmegəhən rafın kəm Uhgın kən motol nəwİan,

⁷kən otolkeike İəfak min, kən otolkeike netəmim rafın.

⁸Təwir məmə nəkotol nolən min əh, məto-inu nian nəkotol motol motol ilat, kən rəhatəmat nitunən e rəhatat İərəmərə Iesu Kristo otəe-in noan e nəmegəhən rəhatəmat.

⁹Məto okəmə etəmim kit təsölən ilat, kən in tahmen e suah kit itəm təruru nuag-pənən isəu, o kəm-naka niganəmtin təpīs, kən in təmaluin məmə Uhgīn təmafəl rəkis nolən rat min rəhan aupən.

¹⁰Tol nəhlan piak min ne winik min, nəkotəkəike kalkut əskasik məmə nəkotal nolən min əh, kən ilat okotəgətun məmə nīpahrienən, Uhgīn təmitəpun itəmat, kən maun-in itəmat məmə rəhan netəmim. Məto-inu okəmə nəkotal natimnat min əh, kən okol nəsotəmeən nian kit,

¹¹kən Uhgīn nīkin otagien məmə oterəh e toa otəmat məmə nəkotitun nuwinən ikin itəm Iesu Kristo, rəhatat Iərəməərə ne Iosmegəh, in otərəməərə lilin ikin.

¹²Tol nəhlan, nian rafin ekəkəike matən-ipinə natimnat min u kəm itəmat məmə nikitəmat otəht min, nat əpnəpin nəkotitun ilat, kən motətul tiəkis e nīpahrienən itəm nəmotos rəkis.

¹³E nian iakatəmegəh e nətueintən u, nīkik təht məmə tətuatip məmə ekən-iarəp min natimnat min əh məmə nikitəmat otəht min,

¹⁴məto-inu ekitun məmə otəsuwəhən ekimis, tahmen məmə rəhatat Iərəməərə Iesu Kristo təmol əp ətuatip kəm io.

¹⁵Kən ekəkəike malkut pīk roiu məmə onəsotaluinən natimnat min u nian oekimis rəkis.

¹⁶Nian emotən-iarəp kəm itəmat məmə Iesu Kristo otuwa min e nəsanənən, eməsənən namsu min itəm suah kit təmol e rəhan əm nətəligən, məto itiməhal eməhaləplan ətuatip e niganəmtitiməhal məmə rəhan nəsanənən ne nəhag-əhagən in ilis agin.

¹⁷⁻¹⁸Itimat min Iesu əpəh ilis e nitot rəha Uhgīn nian Uhgīn Tata təmos-ipən nisiiən kəm in, kən mol in nəhag-əhagən tasiə miet e nīpətin, kən təməto nəwia Uhgīn u Nəhag-əhagən Asol təmən kəm in məmə, “Inu nətik itəm iakolkeike, nīkik tagien pīk ron.” Itiməhal atip eməhaləto nəwian əh təmisi-pən e nego e neai.

¹⁹Natimnat min əh təmol itimat ekotitun wir məmə nəghatən rəha ien min aupən in nīpahrienən. Kən təwir məmə itəmat min onəkotəto wir nəghatən əh. In tahmen e lait kit tətasiə e napinəpən, mətoarus-pən tian, kən fetukai tinər e nikitəmat.

²⁰Kən nat asol e natimnat min u, nəkotəkəike motitun məmə nəghatən rəha ien min e Naoa Rəha Uhgīn, ien kit təməsən atipən nəghatən min əh,

²¹məto-inu nəghatən rəha ien min təsisi-pənən e nətəligən rəha netəmim əm, məto netəmim kəmotən-iarəp nəghatən itəm təmisi-pən e Uhgīn nian Narmin Rəhan təmek nīkilat.

2 Pita 2

İəgətun eiueiuə min

¹Məto ien eiueiuə min əh-ikin e niki netəm Isrel aupən, kən e nolən kitəh əm, iəgətun eiueiuə min okotuwa min e nikitəmat. E nolən anion, okotən-iarəp nəgətunən eiueiuə min itəm otərəkin rəhatəmat nahatətəən, kən taprəkis-in nat u, ilat okotəuhlin məntaalat o rəhalat Etəm-iasol, nat ənnapin in təmos-nəmtin ilat. Kən otəsuwəhən, Uhgīn otərəkin ilat e nalpinən itəm ilat atip əm koatiuw-pa.

²Kən netəmim tepət okotətəu-pən nolən rat min rəhalat itəm tol naulisən. Kən tol nəhlan, netəmim tepət okotən rat suatip rəha nīpahrienən.

³Kən məto-inu ilat iaumis min o məni, kən okotos rəhatəmat natimnat e nolən eko-eko e noanage min itəm kəmotisi-pən əm e nətəligən atip əm rəhalat. Nuwəh agin, Uhgīn təmən-iarəp nalpinən rəhalat, kən otəsuwəhən in otərəkin ilat.

⁴Itəmat nəkotitun məmə in otol nalpinən əh məto-inu nəmotəplan nolən rəhan aupən. Nian nagelo min kəmotol təfagə, Uhgīn təsaskəlim əmən rəhalat nalpinən, məto təmərakin-pən ilat e nīpəg asol teiuaiu agin, ikin rəha netəm kotərat, kən təməlis ilat e sen, kən kotatig e napinəpən mətoarus-pa in otələhəu nəghatən o nalpinən rəhalat.

⁵Kən Uhgín tēmāsaskəlīm-əmən nalpínən rəha netəmim aupən itəm kəmoatəht nəwian e nian rəha Noah, mətō tēmohamnu ilat e naruəh asol itəm təmaiu. Mətō Noah tēmatən-iarəp nəghatən rəha nolən itəm tətuatip e niganəmti Uhgín, kən Uhgín tēmosmegəh in, ne rəhan netəmim sepín.

⁶Kən Uhgín tēmol nalpínən o nərātən rəha netəm Sotom ne Komora, kən tēmaan taon mil əh e nigəm, kioal nəmtap lan. Inu tatəgətun nat naka itəm otol kəm netəm min u itəm koatəht nəwian.

⁷Mətō in tēmosmegəh Lot. Suah əh in etəm tətuatip e niganəmti Uhgín, kən nikin titahmə o nolən rat min itəm tol naulisən rəha netəm min əh-ikin əh u kəmoatəht nəwia Uhgín.

⁸Kən in tēmətətig ilat min ilat, kən nian rafin in tēməplan nolən rat min rəhalat, kən matətō nəghatən rat min rəhalat, kən nian rafin əm, nikin itəm tətuatip əm, tēmahmə pik o nolən rat min rəhalat.

⁹Natimnat min əh tatəgətun məmə Iərəmərə Uhgín titun nosmegəhən netəmim itəm kotahatətə lan, kən titun nəmki-rəkisən ilat e nərātən itəm kotatig lan. Mətō netəmim itəm kəsotətuatipən, Uhgín titun naskəlīmən mol nalpínən kəm ilat roiu muwin mətōarus nian in otələhəu nəghatən o nalpínən rəha netəmim.

¹⁰Uhgín otol nalpínən kəm netəm rat rafin, mətō in otol nalpínən asol kəm netəmim itəm koatol natimnat rəha naulisən itəm nipətīlat tolkeike məmə okotol, kən natimnat u koatol ilat tamkimik, kən netəm min əh koatapəs nərəmərəən rafin. Netəm min əh kotalisit məsotəginən nat kit, kən məsotəginən nən ratən natimnat e nego e neai itəm koatəmegəh u ilat ilis pik.

¹¹Nat əpnəpín nagelo min, itəm ilat kotəsanən kən nahgilat tepət taprəkis-in netəm min əh, mətō nagelo min kəməsotəhaiən natimnat ilis pik əh, məsotətu-pənən nəghatən kit elat e niganəmti Iərəmərə Uhgín.

¹²Mətō netəm min əh koatən rat natimnat itəm kəsotitun wirən. Ilat kotahmen e nat iarupín min, itəm rəhalat nətəligən tikə, mətō koatol əm nat itəm nipətīlat tolkeike. Nat iarupín min əh kəmotaiir məmə netəmim

okotarupin-in ilat motohamnu ilat. Kən Uhgın otərəkın min netəm rat min əh tahmen e nat iarupin min əh.

¹³Uhgın otətou ilat e nərātən mətō-inu ilat kəmotol nərātən kəm netəmim. Kən iəgətun eiueiuə min əh, nikilat tagien məmə okotagwən ne motənim pik, sənəmə lapin əm mətō e nərāuiəgən. Ilat kotahmen e napinən e niməhan, o kotahmen e niməgəm itəm tatol aulis itəmat, moatərəkın nərgi niməfak. Kotuwa motagwən itəmat min ilat, mətō koateiuə-in itəmat, moatol nolən tərāt.

¹⁴Nian rafin rəhalat nətəligən tatuwin o nakləh-inən nipitan itəm rəhalat nətəligən timətig əm, kən nian rafin koatol təfagə rat məsotapəsən. Koatiuw rəkis netəmim itəm rəhalat nətəligən tətaliwək-aliwək, koatuwin e nolən rat rəhalat. Ilat koatəgətun atip ilat e nolən rəha naumisən. Uhgın təmən rəkis nalpinən rəhalat.

¹⁵Ilat kəmotapəs suatip itəm tətuatip, kən moteko motətəu-pən suatip rəha Palam nətī Peor, itəm təmolkeike pik nosən mənī e nolən tərāt.

¹⁶Mətō togki kit təməhai o rəhan nolən tərāt min. Kitat kotitun məmə togki təsəghatən, mətō Uhgın təmol məmə togki tatəghat e niki etəmim məmə otən-iəhau nolən eko-eko rəha ien u.

¹⁷Iəgətun eiueiuə min əh kotahmen e nəmti nəhau itəm təmami, o kotahmen e nimal napuə itəm nimətag asol təməmki-rəkis, kən nuhuən tikə lan, mətō-inu nəgətunən rəhalat kotərāt. Uhgın təmələhəu kalin napinəpən asol məmə rəhalat.

¹⁸Ilat koatəghat ausit e nəghatən itəm nipətīn tikə. Koatəghat e nəghatən min rəha nolən min itəm nipətī netəmim kotolkeike, kən moatiuw-pa netəmim kotuwa e nərātən itəm kəmotiet wi əm lan.

¹⁹Koatən-iəkis məmə netəmim kotitun nətəu-pənən natimnat itəm ilat kotolkeike, lou kit tikə lan. Mətō ilat atip slef min rəha nolkeikeən rat min rəhalat, mətō-inu suah kit in slef rəha nat naka itəm tatərəmərə lan.

²⁰Məto okəmə kotagim rəkis e nəratən rəha nətueintən nian kotitun Iəramərə ne Iosmegəh rəhatat Iesu Kristo, kən uarisig lan kotitəlig e nolən rəha təfagə rat, motuwa slef rəhan, ilat kotatig e nəratən itəm in tərat taprəkis-in itəm in aupən.

²¹Okəmə ilat kəmotəruru agin suatip rəha nolən ətuatip, in təməwir pik olat, taprəkis məmə ilat kīnotitun suatip əh kən uarisig lan kotəuhlin məntaalat o nəghatən rəha Uhgīn itəm kəmos-ipən kəm ilat.

²²Ilat koatol məmə nimaa nəghatən mil u kueia mioal nīpahrienən elat. Katuən məmə, “Kuri kit təmitəlig muwin matun nat itəm in təmeoa-in rəkis,” ne “Pikəs itəm təmaig məruən, kən mitəlig min muwin mətəig e nəmit.”

2 Pita 3

Nian rəha Iəramərə

¹Iolik min, inu rəhak naoa itəm tatol kəiu lan tatimnə otəmat. Eməte ilau kərən məmə nikitəmat otəht min natimnat min əh, kən məmə katuəhgaiir itəmat mol nətəligən rəhatəmat tətuatip.

²Iakolkeike məmə onəkotətəlig-in min nəghatən min itəm ien min rəha Uhgīn kəmotən aupən, ne nəghatən rəha Iəramərə Iosmegəh rəhatat itəm rəhatəmat aposol min kəmotən-iarəp kəm itəmat.

³Nat kit itəm nakotaupən motitun məmə, e nian Namnun Nian tatuwa iuəhkir, netənim neen okotuwa itəm kotətəu-pən əm nat nīpətīlat tolkeike məmə okotol, kən ilat okotəghat ausit motən rat nəghatən rəha Uhgīn.

⁴Okotən məmə, “?Tahro? ?Təmən-iəkis rəkis məmə otuwa min, məto in hiə? E nian itəm tīpītat min kəmotimis mətoarus-pa u-roiu, natimnat rafin tahmen-ahmen əm. Kən aupən aupən agin, nian Uhgīn təmol nətueintən mətoarus-pa roiu, natimnat rafin kotahmen-ahmen əm.”

⁵Koatəghat nəhlan, məto ilat kəsotolkeikeən məmə okotətəlig-in məmə e nəghatən rəhan, Uhgīn təmol neai ne nətueintən. Kən mol nəptən tiet ilugin e nəhau, kən mos nəhau mol ikin min rafin e nətueintən.

⁶Kən təmatig mos min nəhau əh mau-təlīmin mərəkin nəptən aupən ikin lan.

⁷Kən nəghatən əh rəha Uhgın tətaskəlīm neai ne nīməptən kətuatīg roiū, kən ilau okətuatīg mətoarus-pa nian in otaan ilau e nigəm e nian rəha nakilən ne nalpınən rəha netəm koatəht nəwia Uhgın.

⁸Məto io min neen, sotaluinən nat kitəh u məmə, e nətəligən rəha İərəmərə Uhgın, nian kitəh in tahmen e nup wan-taosan, kən nup wan-taosan in tahmen e nian kitəh.

⁹Netəmim neen, nıkilat təht məmə Uhgın təpou o nol uəhaiən nəniəkisən rəhan, məto sənəmə tol nəhlan. Rəhan nətəligən təfəməh otəmat, kən təsolkeikeən məmə in otərəkin etəmim kit, məto tolkeike məmə netəmim rafin okotəuhlin məntaalat o nolən rat min rəhalat motitəlig-pən ron.

¹⁰Məto Nian Rəha İərəmərə otuwa tahmen e etəmim təmuwa məmə otakləh, otuwa e nian itəm etəmim təruru. E nian əh, kotəto nərkərikən asol, kən neai otikə. Kən nigəm otus mərəkin mitgar, ne məwig, ne məhau min, kən nigəm otus nətueintən ne natımnat rafin kotatīg lan, kotikə agin.

¹¹Kən məto-inu Uhgın otərəkin rafin agin natımnat min əh e nolən əh, itəmat nəkotəkəike motətəlig-in nolən rəha nəmegəhən rəhatəmat. Nəkotəkəike motətəu-pən suatıp itəm nəmegəhən rəhatəmat okotətuatıp e nıganəmti Uhgın, kən nəmotələhəu kalın məmə rəhan.

¹²Nıkitəmat otəkəike magien o nian əh itəm tatuwa, kən motol natımnat itəm okotol nian əh otuwa uəhai əm. E nian əh, nigəm otus mərəkin neai, kən nəgəpanən otol mitgar, ne məwig, ne məhau min okotaiəh motikə.

¹³Məto Uhgın təmən-iəkis məmə otol neai wi ne nətueintən wi, ikin rəha netəmim itəm kotətuatıp e nıganəmtin. Kən koatəsahgin nat əh o nəniəkisən əh.

¹⁴Tol nəhlan, io min neen. Kən məto-inu nakoatəsahgin nian əh itəm tatuwa, otalkut əskasik məmə Uhgın otəsehmən napınən kit e nəmegəhən rəhatəmat, kən təfagə rat kit tikə lan, kən nəkotatīg e nəməlinuən itəmat min.

¹⁵Nəkotəkəike motos e rəhatəmat nətəligən nat u məmə, nolən rəha nətəligən əfəməh rəha İərəmərə otat, tatol məmə in otosmegəh netəmim neen min. Inu

tahmen e nəghatən itəm piətət wir Pol təməte kəm itəmat e nenatigən itəm Uhgın təmos-ipən kəm in.

¹⁶Tatəghat-in natimnat min əh e naoa min rafin rəhan. E naoa min əh, natimnat neen əh-ikin itəm tiəkis məmə okotitun. Kən netəm kəsotolən skul məsotitunən nat, kən rəhalat nətəligən tətaliwək-aliwək, ilat koatəuhlin nəghatən min rəha Pol, e nolən kitiəh əm itəm koatəuhlin nəghatən rəha naoa neen min rəha Uhgın. Kən Uhgın otərəkin ilat ron.

Namnun nəghatən

¹⁷Kən tol nəhlan, io min neen. Məto-inu nəkotitun rəkis nat u, otaiir məmə nəghatən alməl rəha netəmim itəm koatəht nəwia Uhgın, okəsotiuw-rəkisən itəmat e ikin rəhatəmat nahatətəən təskasik ikin, kən nakoatəme e rəhatəmat nahatətəən.

¹⁸Məto otol rəhatəmat nahatətəən təwiə məskasik e nitunən rəha İərəmərə ne İosmegəh rəhatat İesu Kristo, kən təwiə min e nəwirən itəm tətawte-in kəm itəmat. !Pəs kotənwiwi in nian rafin, roiu tatuwin matuwin namnun tikə! Əwəh.

1 Jon

1 Jon 1

Nəghatən Megəh

¹Nəghatən rəha nəmegəhən təmaupən matig e nətuounən nian, inun, itimatəmotəto kən motəplan e niganəmtitimat ətuatip. Emotehm, kən motek e nelmitimat ətuatip. In un, in nəghatən rəha nəmegəhən itəm ekoatəghat-in, moatən-iarəp.

²Nəmegəhən əh təmiet-arəpa; emotehm kən moatətul-arəp o nən-iarəpən, kən moatən-ipinə kəm itəmat məmə in nəmegəhən lilin, in təmətətig ilau Tata Uhgın kən təmiet-arəpa otimat.

³Ekoatən-iarəp kəm itəmat natimnat min itəm emotehm kən motəto rəkis, məmə itəmat min onəkotuwa kol kitəh kitat min itəmat. Okotuwa kitəh kitat Tata Uhgın ne Nətin, Iesu Kristo.

⁴Ekoatəte natimnat min u məmə otol nagienən e nikitat tər mərioah.

Okotaliwək e nəhag-əhagən

⁵Nəghatən u inu, itimat emotəto ron kən ioatən-ipinə kəm itəmat, məmə Uhgın in nəhag-əhagən, kən napinəpən tikə agın lan.

⁶Okəmə kitat kotəmə kınəatol kitəh kitat min, məto kitat kotaliwək e napinəpən, kən koateiuə, kən məsotətigən e nıpahrienən.

⁷Məto in tətətig e nəhag-əhagən, kən okəmə kotaliwək e nəhag-əhagən tahmen lan, kən kitat koatol kitəh kitat min, kən kitat okotarətuəh e nolən rat min rafin e nıta Nətin, Iesu.

⁸Okəmə kitat kotəmə sənəmə kitat nol təfagə rat, kitat koateiuə-in atip əm kitat min, kən nıpahrienən tikə etat.

⁹Uhgın in etəm kitun nagileən lan, kən rəhan nolən in tətətuatip əm. Tol nəhlan, okəmə kitat kotən-ipən nolən rat min rəhatat kəm Uhgın, kən in otafəl kitat kən maluin rəhatat nolən rat min, kən marətuəh rəkis in nolən rat min rafin rəhatat mə okotətuatip e niganəmtin.

¹⁰Okəmə kitat kotəmə kəsotol agin-əhən nolən rat, kən kitat koatən neiuəən e Uhgín, kən rəhan nəghatən təsatiɡ agin-əhən e nəmegəhən rəhatat.

1 Jon 2

Iesu Kristo in etəmim rəha nasituən etat

¹Rəhak nisualkələh mìn, iatəte natimnat mìn u kəm itəmat, matən-iəhau itəmat məmə onəsotolən nat tərat. Məto okəmə suah kit otol nolən rat, rəhatat kit əh-ikin etəm tatəghat rəhatat lan kəm Tata Uhgín, inu Iesu Kristo in Etəm Tətuatip.

²In un, itəm təmol sakrifais atip e rəhan nəmegəhən o rəhatat nolən rat mìn, kən o nat u, neməha otəsol mìnən Uhgín. Kən təməsolən o rəhatat pisin əm nolən rat mìn, məto rəha netəmim rafin agin-əh e nətueintən.

³Kitat okotitun əsas məmə kotitun Uhgín okəmə kitat koatol nəwian.

⁴Etəm u tatən mə “Ekitun Uhgín,” məto təsolən nəwian, in ieiua, kən niphrienən tikə lan.

⁵⁻⁶Məto etəm un tatol rəhan nəghatən, nolkeikeən rəha Uhgín təmatig minip wir pahrien e nikin. Etəm u itəm tatən məmə tatəper-ipən lan, otəkəike mətəp suatip kitieh əm itəm Iesu təmitəp. Nolən u tatəgətun əsas məmə kitat koatatig lan.

Kitat kotəkəike motol nolkeikeən kəm kitat mìn

⁷Nikik keike mìn, io esəteən nəghatən wi kit kəm itəmat məmə onəkotol, kən məto iatəte in oas itəm nəmos rəkis e nətuounən, nian nəmotəto namnusən təwir; nəghatən oas u in nəghatən ninəmotitun.

⁸Məto e nehmən kit mìn, nəghatən u itəm iatəte tatimnə otəmat məmə onəkotol, in tatəuhlin məmə nəghatən wi, məto-inu kinəplan e suatip wi kit e nəmegəhən rəha Iesu ne rəhatəmat. Məto-inu roiu, napinəpən tinatagim, kənu nəhag-əhagən pahrien tinatasiə rəkis.

⁹Kən etəm u tatən mə in tətatiɡ e nəhag-əhagən məto tatətəhau pian, in tətatiɡ əh e napinəpən.

¹⁰Etəmim u itəm tolkeike pian, in tatətul e nəhag-əhagən, kən nat kit tikə e nikin məmə otapitətəl lan, morin.

¹¹Məto etəmim u itəm tetəhau pian, in tətatiḡ e napinəpən, kən mətan e napinəpən, kən məruru ikin tatuwin-pən ikin, məto-inu napinəpən tatohamis niganəmtin.

¹²Rəhak nisualkələh min, iatəte naoa u kəm itəmat, məto-inu Uhgın təmafəl rəkis nolən rat min rəhatəmat o nat u itəm Iesu təmol.

¹³Tata min, iatəte nat u kəm itəmat, məto-inu itəmat nəmotitun in, itəm təmaupən matig e nətuounən. Netəm aluə min, iatəte nat u kəm itəmat, məto-inu itəmat nəmotol win e etəm rat, Setan.

¹⁴Nisualkələh, eməte nat u kəm itəmat, məto-inun nəmotitun Tata Uhgın. Tata min, eməte nat u kəm itəmat, məto-inu itəmat nəmotitun in, itəm təmaupən matig e nətuounən. Netəm aluə min, eməte nat u kəm itəmat, məto-inu itəmat nakotəsanən, kən nəghatən rəha Uhgın tətatiḡ e nikitəmat, kən nəmotol win e etəm rat, Setan.

Sotolkeikeən natimnat rəha nətueintən

¹⁵Sotolkeikeən nətueintən o natimnat min rəha nətueintən. Okəmə suah kit tatolkeike nətueintən, kən nolkeikeən rəha Tata Uhgın təsatigən e nikin.

¹⁶Məto-inu natimnat rafin e nətueintən u, təsisi-pənən o Tata Uhgın, məto rəha nətueintən əm. Natimnat u rafin rəha nətueintən, ilat u, naumisən o natimnat rəha nipətitəm əm, kən naumisən o natimnat itəm tatiuw rəkis niganəmtitəm, ne nausitən o rəhan nautə min ne nepətən.

¹⁷Kən nətueintən u otəpanikə. Kən naumisən o nautə min otəpanikə. Kən naumisən o nolən min rəha nətueintən itəm koatiuw nətəligən rəha netəmim otəpanotikə. Məto etəmim itəm tatol nəwia Tata Uhgın, in otətatiḡ lilin.

Tikimir min rəha Kristo kinotuwa rəkis

¹⁸Nisualkələh, kotegu-pən e namnun nian. Nəmoatəto məmə tikimir kit rəha Kristootuwa. Kən roiu tikimir min rəha Kristo tepət, kinotuwa rəkis. Tol nəhlan, kitat kotitun məmə inu, kinoategu-pən e namnun nian.

¹⁹Netəm min u, kəmotapəs rəhatat niməfak min məto-inun ilat sənəmə rəhatat agin-əh min. Okəmə rəhatat agin-əh min, kəməsotietən etat. Məto ilat kəmotiet etat, məmə otəgətun məmə ilat sənəmə rəhatat min.

²⁰Məto itəmat un, Etəm Tətuatip, in təmətəfiə kəm itəmat e Narmin Rəha Uhgın, kən itəmat rafin nəkotitun nat u.

²¹Iatəte nat u kəm itəmat, sənəmə nəkotəruru niphahrienən, məto itəmat ninotitun rəkis niphahrienən, kən motitun məmə niphahrienən təsoe-inən neiuəən.

²²?Pah u in ieiua? Etənim u itəm tatən məmə Iesu sənəmə in Kristo itəm Uhgın təmən məmə otahl-ipa. Etənim u inu, in tikimir rəha Kristo. In təsənən niphahrienən e Tata Uhgın ne Nətin.

²³Etəm təsənən niphahrienən e Nətin təruru nosən Tata. Etəm tatən niphahrienən e Nətin, in tatos min Tata Uhgın.

²⁴Pəs nat naka nəmotəto e nətuounən, nian nəmotəto namnusən təwir, otatəper-ipən əh etəmat tiəkis. Okəmə nat naka nəmotəto e nətuounən otatəper-ipən etəmat, kən itəmat onakoatəper-ipən e Nətin, ne Tata Uhgın.

²⁵Kən nat u inu, nəmegəhən itulin, in təmən-iəkis məmə otos-ipa kəm kitat.

²⁶Iatəte nəghatən min u kəm itəmat matən-iarəp netəm min u itəm okotiuw rəkis itəmat.

²⁷Məto itəmat u, nətəfiəən rəha Narmin Rəha Uhgın itəm nəmotos e Kristo, in tətətig əh e nikitəmat. ?Tol nəhlan, pah min titun nəgətunən nat wi kit kəm itəmat? Narmin Rəha Uhgın tatəgətun natimnat rafin kəm itəmat, kən nətəfiəən əh rəhan, in niphahrienən, sənəmə neiuəən. Tol nəhlan, otəper-ipən əskasik lan, tahmen-pən əm məmə in təməgətun itəmat məmə nəkotol.

²⁸Kən roiu əh, nisualkələh, otəper-ipən lan, məmə nian in otuwa kən kitat kəsotəginən məsotaulis-inən niganəmtin e rəhan nuwamən.

²⁹Okəmə nəkotitun məmə in tətuatip, onəkotitun əsas məmə netəmim rafin itəm koatol nolən ətuatip, ilat u, nenətin min.

1 Jon 3

Itəmat u nenəti Uhgın min

¹!Oteplan-tu! !Nolkeikeən itəm tepət mahgoau kəm kitat, itəm Tata Uhgın təmos-ipa, inun, məmə tətəun-in kitat məmə nenətin min! Kən nīpahrienən məmə kitat əh. Netəmim rəha nətueintən kəsotitunən kitat, məto-inun ilat kotəruru Uhgın.

²Nikik min, kitat nenəti Uhgın min u-roiu. Kitat kəsotitunən məmə okotəhrol nulan motol pisin nian Kristo otitəlig-pa. Məto kitat kotitun məmə nian otitəlig-pa, kitat okotahmen lan, məto-inu e nian əh, okotəplan əsas məmə in tol nəhlan.

³Kən etəmim itəm tatagile məmə otahmen e Kristo, in tətəruətuəh rəkis in atip nolən min rəhan, məto-inu Kristo in min in tətuatip wir agin.

⁴Etəmim itəm tatol nolən rat, in tatətgəhl min lou rəha Uhgın, məto-inu nəghatən u nolən rat, nīpətin u, nətgəhlən lou rəha Uhgın.

⁵Kən itəmat nəkotitun məmə Kristo təmuwa məmə otos-irəkis rəhatat nolən rat min, məto-inu nolən rat tikə lan.

⁶Tol nəhlan, okəmə kitat koatəper-ipən lan, tol-pən okol kəsotəkəikeən e nolən rat min. Məto netəm min un itəm koatəkəike əh e nolən rat min, tol-pən kotəruru agin-əh in, məsotəplanən in.

⁷Nisualkələh, sotətəlig-inən suah kit teiuə-in itəmat o nat u. Etəm tatol nat ətuatip, nīpətin u məmə in etəm ətuatip, tahmen əm e Kristo in etəm ətuatip.

⁸Məto etəmim itəm tatəkəike əh e nolən rat min, tatəgətun məmə in rəha Setan u, etəm təmatol nolən rat e nətuounən. Məto Nəti Uhgın təmuwa o nərəkinən wək min əh rəha Setan.

⁹Netəm min u itəm kəmotaiir wi min motuwa nenəti Uhgín min, ilat okol kəsotəkəikeən e nolən rat, mətó-inu ilat koatos niamitə rəha Uhgín. Kən o nat u, okol ilat kəsotəkəikeən e nolən rat, mətó-inu ilat nenəti Uhgín min.

¹⁰Tol mə, kotitun nənən məmə pah min u nenəti Uhgín, kənu pah min u nenəti Setan. Etəmim u itəm təsól ətuatipən, kən in məsolkeikeən pian kit, in sənəmə nəti Uhgín kit.

Kitat kotəike motolkeike kitat min

¹¹Nəghatən u inu, nəmotəto e nətuounən e namnusən təwir, məmə kitat okotəike motolkeike itat min.

¹²Sotolən tikiri Ken, itəm in etəmim rəha Setan kən tohamnu pian. ?Kən təmohamnu pian o naka? Təmohamnu mətó-inun rəhan nolən min tərət kənu rəha pian, nolən min in tətuatip.

¹³Piak min, narmitəmat təsiwig pikən okəmə netəmim rəha nətueintən u koatətəhau itəmat.

¹⁴Okəmə kitat kotolkeike piatat min, tatəgətun məmə kitat kınotaprəkis-in rəkis nimisən, minotegu-pən e nəmegəhən. Mətó etəm un nolkeikeən tikə lan, in tətətig əh e nimisən.

¹⁵Etəmim un itəm tatətəhau pian in tahmen e etəm tatohamnu itəm, kən itəmat nəkotitun məmə iohamnu itəm, in təsosən nəmegəhən lilin.

¹⁶O nat u kitat kotitun wir məmə nolkeikeən in tol nulan, mətó-inun Iesu təmos-ipa rəhan nəmegəhən otat. Kən e nolən kitiəh əm, təwir mə kitat min kotos-ipən nəmegəhən rəhatat o piatat min.

¹⁷?Okəmə suah kit rəhan natimnat tepət kən pian kit rəhan nat kit tikə, mətó in təsasəkitunən pian, məsolən nat agin lan, nolkeikeən rəha Uhgín otəhrol nulan matig e suah u?

¹⁸Nenətik min, pəs kitat kəsotənən nolkeikeən e nohlitat əm, mətó okotol əp nolkeikeən pahrien e nolən min rəhatat.

¹⁹⁻²⁰Okəmə kotol nəhlan, kən nat ərnaḡin okəmə kotəto-pən e nikitat məmə okotos nalpənən, məto kitat okotitun məmə kotatig e nīpahrienən, kən mem məha-məha nikitat e niganəmtin. Məto-inu Uhgīn in ilis maprəkis-in nikitat, kən in titun natimnat rafin.

²¹Piak min, okəmə kotəto-pən e nikitat məmə okətosən nalpənən, kitat okəsoḡaginən e niganəmti Uhgīn,

²²kən motos natimnat rafin ron itəm koatəḡapəhin-pən, məto-inu kitat koatol nəwian kən moatol nolən itəm in tolkeike.

²³Kənu nəghatən u rəhan tatən məmə kotəkəike motahatətə e Nətin, Iesu Kristo, kən motolkeike kitat min, tahmen məmə inu in təmən mihin kəm itat.

²⁴Netəm min u itəm koatol nəwian, ilat koatəḡer-ipən lan, kən in tatəḡer-ipən elat. Kən kitat kotitun məmə in tətatig e nikitat, məto-inun Narmin Rəha Uhgīn itəm in təmos-ipa, in tatəḡətun kəm kitat.

1 Jon 4

Onakakil mehm mətig narmin min

¹Nikik min, okəmə etəmim kit tatən məmə Narmin Rəha Uhgīn tətatig lan, matol in tatən-iarəḡ rəhan nəghatən, kən təwir pik məmə onəkotehm wir motakil mətig məmə narmin əh tətatig lan, in rəha Uhgīn pahrien, o sənəmə rəha Uhgīn. Kitat okotəkəike motəḡlan wir məto-inun ien eiueiuə min tepət kinotiet rəkis moatəḡhat e nətueintən.

²O nat u, itəmat onəkotitun əsas məmə in Narmin Rəha Uhgīn itəm tətatig e etəmim kit, inun, Narmin itəm tatən-iarəḡ məmə Iesu in Kristo itəm Uhgīn təmən məmə otahl-ipa, kən in təmuwa e nīḡətīn, narmin əh in Narmin ətuatīḡ rəha Uhgīn.

³Məto etəmim kit itəm təsən-iarəḡən məmə Iesu in Kristo itəm Uhgīn təmən məmə otahl-ipa, narmin rəha etəmim əh, sənəmə rəha Uhgīn. Inəh, in narmin rəha tikimir rəha Kristo, itəm ninəmotətə rəkis məmə in otəḡanuwa, kən roiu tinətatig rəkis e nətueintən.

⁴Nisualkələh, itəmat netənim rəha Uhgın min, kən nəmotəhg-irəkis ien eiueiuə min əh,məto-inu Narmin itəm tətətig e nikitəmat in taprəkis-in narmin itəm tətətig e nətueintən u.

⁵Ilat netəm rəha nətueintən, tol nəhlan, nəghatən min rəhalat koatən, in rəha nətueintən əm, kən netəm koatətəlig-in ilat, ilat min netəm rəha nətueintən u.

⁶Məto itimat nenəti Uhgın min. Tol nəhlan, netənim itəm kotitun Uhgın, ilat kotətəlig-in itimat. Məto netənim itəm ilat sənəmə nenəti Uhgın min, ilat kəsotətəlig-inən itimat. O nat u, kitat okotitun əsas Narmin itəm tatən pahrien, ne narmin itəm tateiuə.

Nolkeikeən rəha Uhgın ne rəhatat

⁷Nikik min, pəs kitat kotalkeike kitat min, məto-inu nolkeikeən in tətisi-pən o Uhgın, kən etəm tatol nolkeikeən, in təmaiir wi min muwa nəti Uhgın kit, kən titun Uhgın.

⁸Məto etəm u, rəhan nolkeikeən tikə, in təruru Uhgın, məto-inu Uhgın, in nəukəti nolkeikeən.

⁹Uhgın təmol əp rəhan nolkeikeən kəm kitat nulan, məmə in təmahl-ipa Nətin noan kitəh əm, tuwa e nətueintən, məmə kitat okotos nəmegəhən ron.

¹⁰Nat u in nolkeikeən pahrien, sənəmə kitat kəmotolkeike Uhgın, məto in təmolkeike kitat. Uhgın təmahl-ipa Nətin tuwa, kən in təmol sakrifais atip e rəhan nəmegəhən o rəhatat nolən rat min, məmə neməha otəsöl minən Uhgın.

¹¹Piak min, Uhgın təmolkeike pik kitat nulan, kən tol nəhlan, kitat min okotəkəike motol mihin nolkeikeən əh kəm itat min.

¹²Suah kit təsehmən Uhgın nian kit ne.Məto okəmə kitat kotalkeike itat min, kən Uhgın tatəper-ipən e nikitat, kən nolkeikeən rəhan tinatə-in nolkeikeən e nikitat.

¹³Kitat kotitun məmə kitat kotəper-ipən lan, kən in tətətig etat, məto-inun tinos-ipa rəkis rəhan Narmin kəm kitat.

¹⁴Kənu itimat emotəplan rəkis kənu moatən-iarəp məmə Tata Uhgın in təmahl-ipa Nətin məmə in Iosmegəh rəha nətueintən.

¹⁵Etənim itəm tatən-iarəp məmə Iesu in Nəti Uhgın, kən Uhgın tətətig lan, kən in min tətətig-pən e Uhgın.

¹⁶Kən tol nəhlan, kitat kotitun nolkeikeən rəha Uhgın kəm kitat, kən motagile lan. Uhgın in nolkeikeən. Etəm tətətig e nolkeikeən, tətətig-pən e Uhgın, kən Uhgın min tətətig lan.

¹⁷Nian kotətig nəhlan e Uhgın, kən nolkeikeən rəhan tinatəe-in nolkeikeən e nikitat, məmə kitat kəsotəginən e nian Uhgın otətakil itəm, məto-inu e nətueintən u rəhatat nolən tahmen e Kristo.

¹⁸Etəm u tərīoah e nolkeikeən, okol təsəginən Uhgın. Məto nolkeikeən pahrien u, itəm tinatəe rəkis e nikitat, tatəhg-irəkis nəginən, məto-inu nətəligən rəha nosən nalpınən tatol kitat koatəgin, kən nat u tatəgətun məmə rəhan nolkeikeən təsoe-inən əh e nikitat.

¹⁹Kitat kotalkeike itat min məto-inun Uhgın təmaupən molkeike itat.

²⁰Məto okəmə suah kit təmə, “Io ekolkeike Uhgın,” məto tatətəhau əh pian, in ieiū. Məto-inu etəm təsolkeikeən pian u in tatehm e niganəmtin, okol təsolkeikeən Uhgın, itəm in təsehmən.

²¹Kən in təmos-ipa rəhan nəghatən kəm itat məmə etənim pah tolkeike Uhgın in otəkəike molkeike min pian.

1 Jon 5

Kitat koatol win məto-inu kitat koatahatətə e Iesu

¹Etənim itəm tətəhatətə e Iesu məmə in Kristo itəm Uhgın təmən məmə otahl-ipa, suah u inu, in nəti Uhgın, kən etənim itəm in tolkeike tata kit, in tolkeike min nenətin min.

²Kən kitat kotitun məmə okəmə kotalkeike Uhgın kənu moatol nəwian, kənu okotalkeike min nenətin min.

³Məto-inu okəmə kotolkeike Uhgín, nípətin un, okotol noan, kən rəhan nəghatən otahmen e katipa itəm taluk-aluk əm.

⁴Netəm kotaiir e Uhgín, ilat koatol win e nolən min rəha nətueintən. Kənu nahatətəən rəhatat in tatos-ipa nəsanənən o nolə win e nolən min rəha nətueintən.

⁵?Pah min un ilat koatətul əskasik motol win e nəluaginən rəha nətueintən u? Ilat əm un, netəm kotatahatətə məmə Iesu in Nəti Uhgín.

Iaruəsan kisil kətəhalol əp Iesu Kristo kəm kitat

⁶Iesu Kristo, in etəm u itəm təmuwa, kən nəhau ne nitan kətioal əp in kəm itat. Sənəmə nəhau əm itəm tatol əp in, məto nəhau ne nitan.

⁷Narmin Rəha Uhgín in tətaruəsan nəghatən mil u rəha nəhau ne nita, matən-iarəp məto-inu Narmin Rəha Uhgín in nípahrienən.

⁸Kən nuəfiminən kisil kətəhalaruəsan iləhal min. Iləhal un, Narmin Rəha Uhgín, ne nəhau, ne nita. Kən iləhal u, kətəhalegəhan-in mətəhalol əp nəghatən rəhaləhal min.

⁹Nian min, kitat koatəto nəghatən min itəm netənim koatən-iarəp, motahatətə elat. Məto nian Uhgín tatən-iarəp nat kit, in iahgin taprəkis, kən kitat okotitun nahatətəən təhmin min e rəhan nəghatən, məto-inu in Uhgín, kən in tatətul-arəp o Nətin.

¹⁰Etənim itəm tətahatətə e Nəti Uhgín, in tatən nípahrienən e nikin o nəghatən rəha Uhgín. Məto etənim itəm təsahatətəən e nəghatən u rəha Uhgín, tahmen əm məmə in tatən məmə Uhgín in ieiueiuə əm, məto-inu Uhgín təmətul-arəp o Nətin, mən-iarəp kəm in, məto in təsənən nípahrienən lan.

¹¹Kənu nəghatən itəm Uhgín təmən-iarəp o Nətin, in tol nulan. Uhgín təmos-ipən nəmegəhən lilin kəm itat, kənu nəmegəhən u, katos o Nətin.

¹²Etəm tatos Nətin, in tatos nəmegəhən. Məto etəm təsosən Nəti Uhgín, in təsosən nəmegəhən.

Namnun nəghatən

- ¹³Iatəte nəghatən mīn u kəm itəmat netəm kotahatətə e Nəti Uhgīn, məmə onəkotitun məmə itəmat nakotos nəmegəhən lilin.
- ¹⁴Pəs kəsotəginən, məto kotəskasik o nətapəh-inən nat kit e niganəmti Uhgīn, məto-inu kotitun məmə nəghatən u inu, tatem əskasik itat. Nian okotətapəh-in nat kit kəm in itəm təwir e rəhan nətəligən, kən in otəto rəhatat nəfakən.
- ¹⁵Kən okəmə kotitun məmə in otəto itat, kən nat naka okoteasiə-in-pən, kən kinotitun rəkis məmə okotos.
- ¹⁶Okəmə kotehm piatat kit tatol nolən rat, məto sənəmə nolən rat itəm titun nit-ipənən e nīmīsən, ik onakəfak ron, kən Uhgīn otos-ipən nəmegəhən kəm suah u. Məto nolən rat kit əh-ikin itəm tatit-ipən itəm e nīmīsən, kən io esənən məmə onəkotəfak o netəm mīn itəm koatol nolən əh.
- ¹⁷Nolən rat mīn rafin un, in təfagə rat, kən məto təfagə rat mīn əh-ikin itəm kəsotit-ipənən itəm e nīmīsən.
- ¹⁸Kitat kotitun məmə etəm tətair e Uhgīn təsəkəikeən e təfagə rat, məto-inu Nəti Uhgīn tatəmik ətain wir in, kən etəm rat u Setan, təruru nekən.
- ¹⁹Kitat kotitun məmə kitat nenəti Uhgīn mīn, məto netəmim rəha nətueintən rafin, ilat u kotatig e nelmi Setan.
- ²⁰Kitat kotitun mīn məmə Nəti Uhgīn təmuwa kən mos-ipa nenatigən kəm itat, məmə kitat okotitun in, u in nīpahrienən. Kənu kitat koatətul-pən e Uhgīn u in nīpahrienən, məto-inu kitat koatətul-pən e Nətin Iesu Kristo. In un, in Uhgīn pahrien, kən in nəukəti nəmegəhən lilin.
- ²¹Nenətik mīn, otagim rəkis o natimnat mīn itəm okotos nəme Uhgīn e nikitəmat.

2 Jon

2 Jon 1

Nətuounən

¹Naoa u rəha elta tatuwin kəm pətan Uhgın təmitəpun ne nenətin min. Nipahrienən məmə iakolkeike pik itəmat. Məto sənəmə io pisin əm iakolkeike itəmat, məto netəm min un rafin itəm kotitun min nipahrienən, kotalkeike itəmat.

²Kən ekotalkeike itəmat, məto-inun o nipahrienən itəm tətətig e nikitat kən otatig lilin e nikitat.

³Pəs Tata Uhgın ne Nətin Iesu Kristo okuawte-in rəhalau nəwirən, ne nasəkitunən, ne nəməlinuən kəm kitat e nipahrienən ne nolkeikeən.

Kitat okotətəu-pən nəghatən pahrien min

⁴Nikik təmagien asol nian eməplan nenətim min neen kotaliwək e suatip rəha nipahrienən, tahmen əm məmə inun, Tata Uhgın təmən mihin kəm kitat məmə kotəkəike kol.

⁵Kən roiu əh, winik, io esətəən nəghatən wi kit kəm itəmat, məto itəm əm un kinotəto rəkis e nətuounən. Kən iakatətapəh məmə okotol əm nolkeikeən kəm kitat min.

⁶Kən nolkeikeən u, nipətin u nolən nəwia Uhgın. Kən in tatən məmə kitat okotəike motətəp suatip rəha nolkeikeən, tahmen əm məmə inun nəmotəto e nətuounən.

⁷Məto-inu iəgətun eiue min tepət koatan e nətueintən. Ilat kəsotahatətəən məmə Iesu in Kristo itəm Uhgın təmən məmə otahl-ipa, in təmuwa etəmim pahrien, e nipətin pahrien. Etəm tol nəhlan in ieiue kən in tikimir rəha Kristo.

⁸Tol nəhlan, oatəto itəmat məmə okəsətətipən nətouən rəhatəmat, pəs itəmat onəkotos nətouən rafin lan, məto-inun itəmat emotol pik wək etəmat.

⁹Okəmə etəm tatətəu-pən atip əm nəgətunən kit rəhan e nəgətunən rəha Kristo, kən məsatəkəikeən e nəgətunən rəha Kristo, nolən rəhan tatəgətun

məmə Uhgīn təsātīgən e nīkin. Məto etəmim pah itəm tatəper-ipən əskasīk e nəgətunən rəha Kristo, in tatos Tata Uhgīn ne Nətīn ilau kərən e nīkin.

¹⁰Okəmə suah kit tuwa ron ik, kən məsənən nəgətunən ətuatīp rəha Kristo, asitən in muwin imam ikin, məsənən “təwīr” kəm in.

¹¹Məto-inu etəm tatən “təwīr” kəm in, tətasiu lan matol suatīp o rəhan nəgətunən rat.

Namnun nəghatən

¹²Iatos nəghatən tepət məmə ekəte kəm itəmat, məto esolkeikeən məmə ekəte e mapepe ne pen. Məto nīkik tatəht pīk mə ekuwa mətag itəmat kən məghat ətuatīp kəm itəmat e nīganəmtitəmat, pəs nagienən rəhatat otərioah.

¹³Nenətī pīam itəm Uhgīn təmitəpun, ilat koatən təwīr kəm ik.

3 Jon

3 Jon 1

Nətuounən nəghatən

¹Kaeas, ik piak keike kit. Io, elta rəha niməfak, iatəte naoa u kəm ik. Nipahrienən u, məmə io ekolkeike pik ik.

²Piak keike, io enitun rəkis məmə rəham nəmegəhən e niġanəm̄ti Uhḡin in təwir əm, kən iatəfak məmə onəs̄imisən mət̄atig wir əm, kən natigən rafin rəham otəwir.

³Nikik təmagien nian eməto piatat min neen kəmotuwa moatən rəham nətul əskasikən o nipahrienən ne nəkəikeən rəham o naliwəkən e nipahrienən.

⁴Nian iatəto məmə nenət̄ik min kotaliwək e nipahrienən, kən nikik tət̄agien pik mərioah taprəkis-in natimnat min rafin.

Kaias təmol wək təwir

⁵Piak ruən, ik natətul əskasik o nat naka itəm ik natol kəm piatat min itəm koatimnə, nat əpnəpin məmə ilat netəm ik pişin.

⁶ilat kəmotamnus rəham nolkeikeən əpəh e niməfak u ikin-u. Ik nəmol-wir kəm ilat, masitu elat. Kən nian okoatuwin e rəhalat suatip, təwir məmə onakasitu elat e nolən itəm Uhḡin tolkeike mihin,

⁷məto-inu ilat koataliwək o nən-iarəpən nəghatən rəha Iesu Kristo, kən məsotosən nasituən kit o netəm kəsotəfakən.

⁸Tol nəhlan, kən kitat u, okotəkəike motasitu e netəm kotal nəhlan, məmə kitat okotos nelmitat min kitiəh o nən-iarəpən nipahrienən.

Tiotrefes ne Temitrias

⁹Eməte naoa kit kəm niməfak rəham, məto Tiotrefes, in tolkeike pik məmə ot̄iləs-ipər atip in, məmə in etəm-iasol kit, kən in təsətəlig-inən itimat.

¹⁰Okəmə io ekimnə, kən io oekamnus ətuatip natimnat min neen itəm in tatol, ne nən anionən nikalitimat itəm in tatən. In sənəmə təsitən əm piatat

min muwin iman ikin, mæto tatən-iəhau min netəm min un itəm kotolkeike mēmə okotit piatat min motuwīn iməlat ikin, kən mətahl-iarəp ilat e niməfak.

¹¹Piak ruən, sosən o nolən rat rəha netəmim, tərəkīn ik. Os əm o etəmim itəm rəhan nolən təwir. Ətəlig-in-tu mēmə netəm min u itəm koatol təwir, tatəgətun mēmə ilat nenəti Uhgīn min, mæto netəm min un itəm koatol tərət, tatəgətun mēmə ilat kotəruru Uhgīn.

¹²Mæto netəmim rafin koatənuwi Temetrius. Kən rəhan nolən min u nian rafin kotəgətun min mēmə tatətəu-pən nəghatən pahrien. Kən itimat min ekoatən-iarəp kəm netəmim mēmə in etəm wir, kən nəkotitun mēmə itimat ioatən nipahrienən.

Namnun nəghatən

¹³Iatos nəghatən tepət mēmə oekəte mən-ipinə kəm ik, mæto esolkeikeən mēmə oekəte e pen,

¹⁴mæto-inu nīkik tatəht pīk mēmə otəsuwəhən ekəplan ik, kən kilau kuəghat ətuatip kəm kilau min.

¹⁵Iatəfak mēmə pəs Uhgīn otasitu lam e nəməlinuən. Ik min neen koatən-ipinə “təwir” kəm ik. Kən onakən-ipən “təwir” rəhatimat kəm piatat min neen ikin-un.

Jut

Jut 1

Jut tēmən təwir kəm ilat

¹Io Jut, slef rəha Iesu Kristo, kən io pia Jemes, iatən təwir kəm itəmat u Uhgın təmaun-in itəmat. Uhgın Tata tolkeike pik itəmat, kən Iesu Kristo taskəlim wir itəmat.

²Pəs nasəkitunən, ne nəməlinuən, ne nolkeikeən rəha Uhgın otər mərioah e nəmegəhən rəhatəmat.

Nolən mīn rəha netəm kotəuhlin mēntaalat e Uhgın

(2 Pita 2:1-17)

³Io mīn neen, aupən, emolkeike pik məmə ekəte naoa u timnə otəmat o nəghat-inən suatip itəm Uhgın tatos o nosmegəhən kitat. Məto roiu, iakatəto məmə ekəike mətə nəghatən u timnə otəmat muəh nikitəmat məmə onəkotəluagin əskasik o naskəlimən nəghatən pahrien rəha nahatətəən rəhatat. Uhgın təmələhəu-pən nəghatən u e nelmi iəfak mīn nian kitieh əm, kən kol təsos-ipən mīnən.

⁴Iatən nəhlan məto-inu netəmim neen kəmotuwa anion e nikitəmat. Kəmətə aupən agin məmə ilat okotos nalpīnən. Ilat koatəht nəwia Uhgın, kən motəuhlin suatip rəha nəwirən rəha Uhgın moatən məmə tategəhan-in nakləh-inən pətan. Kən kəmotəuhlin mēntaalat e Iesu Kristo itəm in pīsīn əm in Kig ne Iərəməərə rəhatat.

⁵Nəghatən u, nəkotitun rəkis ilat rafin, məto ekolkeike məmə ekən mau kit mīn kəm itəmat məmə Iərəməərə təmosmegəh rəhan netəmim motiet Ijip, məto uarisig təmərəkin ilat u itəm kəsotahatətəən lan.

⁶Kən otətəlig-in-tu nagelo mīn itəm kəmotəmkarəpən-in nepətən rəhalat, məto kəmotapəs ikin ətuatip rəhalat. Uhgın təməlis ilat e sen itəm okol təsitəgitən nian kit, kən mahtosig-in ilat e napinəpən mətoarus-pa Nian Asol itəm otakil ilat lan, kən mol nalpīnən kəm ilat.

⁷Kən tahmen əm e Sotom ne Komora ne taon min titəlau elau. Netənim ikin min əh kəmotapəs nolən ətuatip motuwın e nolən rəha nakləh-inən pətan ne nolən rəha nəman koatit atip ilat min ne nıpitan koatit atip ilat min. Kən Uhgin təmol nalpinən kəm ilat e nigəm itəm okol təsəpısən nian kit ne, məmə netənim okotəplan noan rəha nolən rat min əh.

⁸Nat əpnarın netənim min əh kinotitun natimnat min əh, məto e nolən kitiəh əm, ilat koatən məmə kəmotəplan nat kit tahmen e narılaiirən itəm təmegəhan-in nolən rat min rəhalat, kən tol nəhlan kotən məmə təwir əm məmə koatol nolən tərət e nıpətılət moatuwin əm nulan, kən koatapəs nərəmərəən rafın, kən koatən rat nagelo min itəm ilis pik.

⁹Məto Mikael, nat əpnarın in etəm-iasol rəha nagelo min, təməsolən nəhlan nian in ne Setan kəmatuərgəhəu o nıpəti Moses. Təməsəhaiən Setan məsətu-pənən nəghatən kit lan, məto təmən əm məmə, “!Pəs İərəməərə otən rəham nalpinən!”

¹⁰Məto netəm min əh koatən rat natimnat itəm kotəruru. Kən e nolən rəha nat megəh min, ilat koatol natimnat min itəm nıpətılət tolkeike məmə otol, kən nolən əh tatərəkın ilat.

¹¹!Kəsi, nahməən asol otuwa olat! İlat koatətəu-pən suatip itəm nəti Atam u Ken təmətəu-pən. Kən ilat kinotos-ipən rafın nikilat e nolən rat itəm Palam təmol aupən məto-inu in tolkeike pik məni. Kən ilat kəmotol nolən rəha Kora moatəht nəwia netəm-iasol min, kən e nolən kitiəh əm itəm Uhgin təmərəkın Korah ne rəhan min, Uhgin otərəkın ilat.

¹²Nian nəkoatol lafet wir min məto-inu itəmat nakotolkeike itəmat min, kən ilat kotuwa motagwən pik əpnarın əm itəmat min ilat, nikilat təsəhtən netənim neen, məto ilat kotahmen e nımas kit əpəh ihluə itəm tatəhluaig itəhəi itəm nego titun nıləs pikənən kən məhap. İlat netəm kəsotehmən sipsip min, məto koatun pik əm sipsip. İlat kotahmen e mal napuə itəm nımətag təmıləs muwa, məto okol nuhuən təsəfikən. İlat kotahmen e nig min itəm tınuwa e nian ətuatip rəhalat məmə okotə, məto kəsotəən, kən in tahmen əm məmə kəmotımis, kən netənim kotıuw-pər ilat kən kotımis agın.

¹³Ilat kotahmen e peau-peau min itəhəi itəm kotorasilin motəruən əpnəpən əm, kən koatol-arəp nolən rat rəha naulisən e rəhalat nəmegəhən məmə netəmim rafin koatəplan. Ilat kotahmen e məhau min itəm kəmotakiəh e suatip ətuatip rəhalat. Tol nəhlan, Uhgin tətəskəlim iməlat ikin əpəh e nəpənəpən itəm nəghagən tikə agin ikin.

¹⁴Suah u Inok u aupən, in noanol itəm tatol sepən lan e noanol min rəha Atam, təmən-iarəp nəghatən rəha Uhgin itəm təmos-ipən kəm in məmə, “Otəplan-tu, Iərəməərə tatuwa ilat rəhan nagelo min tərət tərət taprəkis,

¹⁵tatuwa məmə otakil netəmim rafin, kən otən-iarəp nalpənən rəha netəm rafin min u itəm koatəht nəwian. In otol nalpənən mətə-inu kəmotol nolən rat min e nolən tərət pək, kən iol təfagə min əh kəmotərakin nəghatən min itəm tərət kəm Uhgin.”

¹⁶Nian rafin, netəm min əh kəmoatəghat-əghat kəm ilat min məmə nikilat təsagienən o natimnat, kən moatən rat natimnat rafin. Ilat koatətəu-pən atip nətəligən rat e nikilat itəm ilat atip kətolkeike məmə okotol, kən motəghat ausit elat min, kən koatəghat nəghatən tətəhen məmə okotol netəmim okotətəu-pən rəhalat nətəligən.

Nəghatən o nəghaiirən elat

¹⁷Mətə rəhak min netəmim, nikitəmat tatəht nat naka aposol min rəha rəhatat Iərəməərə Iesu Kristo kəmotən aupən, məmə otuwa.

¹⁸Kəmotən kəm itəmat məmə, “E nian itəm namnun nian tatuwa iuəhkir, netəmim itəm koatəghat ausit moatən rat natimnat rafin, ilat okotətəu-pən atip əm rəhalat nətəligən rat e nikilat itəm ilat atip kətolkeike məmə okotol.”

¹⁹Inu netəmim itəm okotəhap itəmat. Ilat kotətəu-pən atip əm rəhalat nətəligən rəha nətueintən, kən Narmin Rəha Uhgin tikə elat.

²⁰Mətə itəmat, rəhak min netəmim, otol itəmat motəsanən e rəhatəmat nahatətən itəm tətətip wir, itəm təmisi-pən o Uhgin. Kən otəghat kəm Uhgin e Narmin Rəhan.

²¹Kən motos nolkeikeən rəha Uhgın tətətig otəmat nian nakoatəsahgın nasəkitunən rəha İərəmərə İesu Kristo məmə in otos itəmat nakotuwin e nəmegəhən lili.

²²Otasəkitun netəm min u itəm rəhalat nətəligən təsətulən ləmətai kitiəh.

²³Motəmki-rəkis netəm kotətig iuəhkir o nigəm motosmegəh ilat. Otasəkitun neen min, məto nəkotəgin pik nolən rat min rəhalat, itəm koatol nəmegəhən rafin rəhalat tamkimik muwin mek min niməhan rəhalat.

Nəfakən o nənwiwian Uhgın

²⁴Pəs kotənwiwi Uhgın itəm in titun naskəlīmən itəmat məmə okol nəsotəmeən, kən titun nolən itəmat məmə nəme təfagə rat tikə agin e nəmegəhən rəhatəmat, nian otos itəmat nakotuwin e nəhag-əhagən rəha niganəmtin, kən nikitəmat tagien pik agin ikin əh.

²⁵Uhgın kitiəh əm, kən in İosmegəh rəhatat e İesu Kristo rəhatat İərəmərə. Pəs kotən məmə nənwiwian, ne nepətən, ne nəsanənən, ne nərəmərəən rafin agin, in rəha Uhgın, aupən agin mətoarus-pa u-roiu, matuwin namnun tikə. !Əwəh!

Nol Əpən

Nol Əpən 1

Nətuounən nəghatən

¹Naoa u, in tatəghat-in natimnat min itəm Iesu Kristo təmol əp. Natimnat min u, Uhgın təmos-ipən kəm Iesu, məmə in otəgətun kəm rəhan iolwək min natimnat itəm otəsuwəhən təike muwa. Kristo təmahl-ipən rəhan kit nagelo tuwa, kən məgətun natimnat min u kəm rəhan iolwək, Jon.

²Jon təmətul-arəp o natimnat rafin itəm in təməplan, kən mətə rəkis ilat e naoa u. Natimnat min un itəm in təməplan, in nəghatən rəha Uhgın ne nən-iarəpən rəha Iesu Kristo.

³Etəm un itəm tətəfin-iarəp nəghatən min u, itəm Uhgın təmos-ipa, in otatig e nəwİRƏn pahrien. Kən netəm min un itəm koatəto kən moatos e nİkilat kən moatol, okotatig min e nəwİRƏn pahrien, mətə-inu nian rəha natimnat min u, naoa u tatəghat-in, tinəkuəkİr agin.

Jon təməte naoa kəm niməfak min ilat sepin

⁴Io Jon, etahl-ipən naoa u tatuwin kəm niməfak min ilat sepin əpəh e nİtən Esia. Pəs Uhgın u itəm tətətig roiu, təmətatig lilin, kən otəpanatig lilin min, in otawte-in rəhan nəwİRƏn ne nəməlinuən kəm itəmat. Kən pəs narmin ilat sepin itəm koatətig aUpən e jea rəha kig, ilat min okotol nulan etəmat.

⁵Kən Iesu Kristo min, in otawte-in min nulan kəm itəmat. Kristo un təmətul-arəp əskasik o nİpahrienən, kənu inəh, in etənim itəm in təmaupən məmegəh lilin e nİmisən, kən in tərəmərə e kig min rəha nətueintən. Pəs nənwiwİən tuwin o Iesu Kristo u, in təmolkeike itat, kən nİtan təmaiəh məmə otikis itat e nolən rəha təfagə rat.

⁶In Kig rəhatat, kən təmol kitat kotatig ahgin rəhan nərəmərəən, kən mol kitat kotuwa pris min rəha Uhgın rəhan, koatol wək rəha Tata rəhan. !Pəs nənwiwİən o rəhan nepətən ne nəsanənən tuwin o Iesu Kristo, namnun tikə! !Pəs in otərəmərə lilin! Pəs otol nəhlan. Əwəh.

⁷!Otəplan-tu! In tatuwa e mal napuə, kən netəmim rafin okotətag-pən motəplan e niganəmtilat ətuatip, kən netəm min u kəmotaru in aupən, okotəplan min, kən netemim e noanol min rafin e nətueintən, nikilat otahmə, motasək əfəmäh məto-inu kəmotəplan. In otəkəike mol nəhlan. !Əwəh!

⁸Iərəmərə Uhgın tatən məmə, “Io Nəukətın ne Namnun. Io u etatig roiu, kən emətatig lilin, kən epanətatig lilin min, kən io un, Nahgik Tepət Pık Agin.”

Jon təməplan Nəti Etəmim

⁹Io Jon, piatəmat u, itəm kitat koatos kələh nelmitat min kitiaħ e Iesu o nahməən, ne natigən e nərəmərəən rəhan, ne nətul əskasikən e nian rəha nahməən. Kəmərakin-pən io e nəptən u Patmos, məto-inun iatən-iarəp nəghatən min un itəm Uhgın tatos-ipa, kən matətul-arəp o Iesu.

¹⁰In Nian rəha Iərəmərə rəhatat, kən emərioah e Narmin Rəha Uhgın, kən rəhan nəsanənən təmol kəm io, kən ekəto nəwian asol kit e məntaak, tahmen əm e təwi,

¹¹kən nəwian u tatən məmə, “Əte rəkis e naoa natimnat min rafin itəm natəplan kən mahl-ipən kəm niməfak sepin. Ilat koatuwin kəm Efesas, kən Simana, kən Pekamam, kən Tuatira, ne Satis, ne Filatelfia, ne Laotisia.”

¹²Kən əmun, ekeirair məmə ekəplan-tu, məmə pah tatəghat kəm io. Kən nian emeirair, məplan nat katəhtu-pər lait lan, ilat sepin, kəmol e iaen u kol tatipit-ipit,

¹³kən ilugin e nat katəhtu-pər lait min u lan, eməplan suah kit tahmen e Nəti Etəmim, rəhan napən kaifəmäh u kaifəmäh. Kən kəməlis manikiləhan e kətəut, kəmol e iaen u kol tatipit-ipit.

¹⁴Rəhn-kapə ne noanun tərüən tərüən mə nahwi noan nitəhəi, kən niganəmtin tətasiə tahmen e nəmnamin nigəm.

¹⁵Nelkin tahmen e pırons, itəm kəmaan e nigəm məmə otaiəh rəkis-in namtəən, mafəl itəm təwir, kən uarisig un, kərəpe məmə in otəwir matipit-ipit. Kən nəwian iahgin iahgin tahmen e nitəhəi asol kit tatem noanahluəluə;

¹⁶In tatos mēhau ilat seþin e nelmin matip, kēnu naip kit rēha nēluaginēn in tasilē e nīkalin kērēn mil, tatisi-pēn e nipēgnoan, kēn suah un tēhag-ēhag mitasiē, tahmen e mitgar ēpē e nērauiēgēn.

¹⁷Nian emēplan suah ēh, emeiuiiu morin io ēh nelkin ikin, tahmen ēm mēmē emimis. Mēto in tēmea-pa mek io e rēhn matip kēn mēmē, “Ēsēginēn. Io u, io emaupēn matig, kēn io iatol namnun agin.

¹⁸Io u, Etēm Tatēmegēh. !Emimis aupēn, kēn mēto ēplan-tu, iatēmegēh lilin! Kēn io iatos ki rēha Nīmisēn ne ki rēha Noanpēn.

¹⁹“Tol nēhlan, ēte rēkis nat naka itēm nēmēplan, kēn neen natēplan u-roiu, ne natimnat neen min itēm tatuwa.

²⁰Mēto ekuhapik e nipēti mēhau min ilat seþin itēm nēmēplan iatos e nelmek matip, ne nat katēhtu-pēr lait lan, ilat seþin, kēmōl e iaen u kol tatipit-ipit. Mēhau min u ilat seþin, nipētīn u nagelo min rēha nīmēfak seþin. Kēnu nat katēhtu-pēr lait lan, ilat seþin, kēmōl e kol, nipētīn un, nīmēfak min un ilat seþin.

Nol Ēpēn 2

Nēghatēn tēmuwin kēm iēfak min ikin Efesas

¹“Ēte naoa kit tuwin o nagelo rēha nīmēfak e taon Efesas, mēn-ipēn mēmē, Nēghatēn u rēhan, etēm tatos mēhau seþin e nelmin matip kēn mētaliwēk ilugin e nat katēhtu-pēr lait min lan, u itēm kēmōl e iaen u kol tatipit-ipit, kēn ilat seþin.

²Io ekitun rēhatēmat nolēn min. Ekitun wēk pik min rēhatēmat, kēn mitun min mēmē nēkotētul-iēkis. Ekitun mēmē itēmat nakotahtosig-in netēm rat. Nēmotakil netēm min un itēm ilat kotēmē ilat aposol min, mēto sēnēmē ilat pahrien. Kēn itēmat nēmōtēplan rēkis mēmē ilat ieiūē min.

³Ekitun min mēmē itēmat nakotos nētēligēn ēfēmēh. Nēratēn tēmīlēs pap itēmat, mēto noatētul-iēkis o nērgēk, mēsōtēpou-inēn.

⁴Mēto iatehm nipēgnēmtīn kit ēh-ikin nēmōtol, tēsahmenēn e niganēmtēk. Nēmōtapēs nolkeikeēn aupēn rēhatēmat.

⁵Nikitəmat tuəh-tu nolkeikeən itəm nəmoatatig lan aupən. Otəuhlin itəmat, kən motol natimnat min u nəmoatol aupən. Okəmə nəsotolən, kən ekuwa, miləs-irəkis rəhatəmat nat katəhtu-pər lait lan e nəmeen.

⁶Məto nat kitieħ əm əh-ikin, noatol in təwir. Itəmat nakotetəhau nolən rat min rəha netəmim rəha Nikolas, tahmen əm lak, iatol mihin.

⁷Etəm matəlgin tatig, in otəkəike mətəlig-in wir nəghatən min itəm Narmin Rəha Uhgīn tatən-ipən kəm niməfak min. Etəm otol win e nəluaginən u, io iategəhan-in məmə in otun noa nig rəha nəmegəhən itəm tatəwiə e nasumən rəha Uhgīn.”

Nəghatən təmuwin kəm iəfak min ikin Simana

⁸Kən in tatəghat əh matən-ipa kəm io məmə, “Əte naoa kit tuwin o nagelo rəha niməfak e taon Simana, mən-ipən məmə, Nəghatən u rəhan, etəm təmaupən matig, kən in otol namnun agin. In təmimis kən məmegəh min, kən in tatən məmə,

⁹Netəm Simana, ekitun rəhatəmat nahməən. Ekitun məmə itəmat ian-rat min, məto sənəmə itəmat ian-rat min pahrien. !Itəmat, rəhatəmat nautə tepət agin! Ekitun mə ieiūə min neen itəm koatən nəghatən moatalik itəmat lan, moatən mə ilat netəm Isrel, məto kəp. Rəhalat nimə rəha nuəfiminən in nuəfiminən rəha Setan əm.

¹⁰Sotəginən nahməən min itəm otəsuwəhən koatuwa etəmat. Iatən-ipinə kəm itəmat, məmə Setan otəpanəmki-pən itəmat neen e kalapus məmə Uhgīn otekasgəwin nahatətəən rəhatəmat, kən itəmat onəkotatig e nahməən o nian ilat ten. Otətul əskasik, nat əpnapin okəmə itəmat neen okotimis, kən io oekos-ipinə rəham nətouən, tahmen-pən əm məmə katəfauin-pən nat kit e rəhn-kapə etəm təmol win e naiuən, kən rəham nətouən in nəmegəhən lili.

¹¹Etəm matəlgin tatig, in otəkəike mətəlig-in wir nəghatən min itəm Narmin Rəha Uhgīn tatən-ipən kəm niməfak min. Etəm otol win e nəluaginən u, nimisən otəsuwinən e noanəmnamin nigəm asol.”

Nəghatən təmuwin kəm iəfak min ikin Pekamam

¹²Kən in tatəghat əh matən-ipa kəm io məmə, “Əte naoa kit tuwin o nagelo rəha niməfak e taon Pekamam, mən-ipən məmə, Nəghatən u rəhan, etəm tatos naip rəha nəluaginən kit itəm tasilə e nəwtain kərən mil.

¹³Ekitun ikin nəkotatig ikin. Ikin əh, Setan tatəpələh, matərəmərə ikin. Məto itəmat noatətul-iəkis ron io. Nəməsotəuhlinən rəhatəmat nahatətəən lak. Imatəmat, Setan tətətig ikin, kən kəməhamnu rəhak etəmim Antipas, itəm təmətul əskasik o nən-iarəpən io. Nat əpnapin məmə nian əh təmiəkis pap otəmat, məto itəmat nəmotahatətə əskasik lak.

¹⁴Məto in əm un, iatehm nipəgnəmtin min neen itəm itəmat noatol itəm təsətuatipən e niganəmtək. Itəmat neen u ikin-un, noatəgətun netəmim u ikin-un məmə okotos nəgətunən rəha Palam. Palam u, in təmol suatip kəm Kig Palak məmə in otos-ipən-os-ipən kəm netəm Isrel, kən pəs ilat kotol nolən rat, moatun nagwənən itəm kəmol sakrifais lan tatuwin kəm narmi nat itəm kəmasgəwin e nig, kən moatit əpnapin ilat min.

¹⁵Kən e nolən kitiəh əm ilat netəm Isrel min əh, itəmat neen u ikin nəkoatətəu-pən nəghatən rəha netəmim rəha Nikolas.

¹⁶!Tol nəhlan, onəkotəkəike motəuhlin wəhai əm nətəligən rəhatəmat o nolən rat min rəhatəmat! Okəmə nəsolən, otəsuwəhən oekimnə otəmat, kən iakoh netəm min un, kən mətə ilat e naip rəha nəluaginən itəm tətisi-pən e nipəgnoak.

¹⁷Etəm matəlgin tatig, in otəkəike mətəlig-in wir nəghatən min itəm Narmin Rəha Uhgın tatən-ipən kəm niməfak min. Etəmim itəm tatol win e nəluaginən, io oekos-ipən nagwənən anion u mana kəm in. Oekos-ipən min kəpiel ruən kit kəm in, itəm kəmətə-pən nərgin wi lan, kən in pisin əm un, itəm otos, titun nərgin.”

Nəghatən təmuwin kəm iəfak min ikin Tuatira

¹⁸Kən in tatəghat əh matən-ipa kəm io məmə, “Əte naoa kit tuwin o nagelo rəha niməfak e taon Tuatira, mən-ipən məmə, Nəghatən u, in nəghatən rəha

Nəti Uhgın. Nıganəmtın tətasiə tahmen e nəmnamın nıgəm, ne nelkın tahmen e pırons itəm kəmərəpe məmə in otəwir matıpıt-ıpit. Tatən məmə,

¹⁹Enıtun rəkis nolən mın rəhatəmat, netəm Tuatira. Ekitun rəhatəmat nolkeikeən ne nahatətəən, ne nasituən e netəmim, kən ekitun mın məmə nətəligən rəhatəmat təfəməh o nətul əskasikən. Ekitun məmə nolən mın rəhatəmat noatol roiu, təwir maprəkis-in nolən mın rəhatəmat aupən.

²⁰Məto iatehm nıpəgnəmtın kit əh-ikin noatol itəm təsətuatıpən e nıganəmtək. Itəmat noategəhan-in nolən rəha pətan əh itəm tahmen e pətan aupən u, Jesepel. In tatən məmə in ien kit, məto nəgətunən rəhan tatit rat rəhak mın iolwək, matol məmə ilat koatit əpnəpın ilat mın, kən moatun nagwənən u itəm katol sakrifais lan kəm narmı nat itəm kəmasgəwın e nıg.

²¹Ematəsağın pətan əh məmə in otəuhlin rəhan nolən rəha nətou-pən əpnəpınən iərman, məto in tapəs.

²²Tol nəhlan, roiu əh, oekol in tatımıs pık e rəhan pet. Kən netəm mın u itəm kəmotit əpnəpın ilat mın, ilat Jesepel u, okəmə ilat kəsotəuhlinən ilat e nosən nolən rəha pətan əh, oekol ilat mın koatəto tərət pık, kən məsou-in ilat e pet u rəha nahməən.

²³Kən ekau kitiəh əm e nenətın mın, moh ilat kotımıs. Tol nəhlan, kən nıməfak mın rafın okotıtun məmə io əm un, ekitun nətəligən mın rəha netəmim, ne nıkilat. Kən io ekos-ıpən nətouən rəhatəmat tətəu-pən əm rəhatəmat nolən mın itəm nəmoatol.

²⁴Məto itəmat u, netəm Tuatira itəm nəməsotosən o nəgətunən rəha Jesepel əh, iatəghat kəm itəmat roiu. Ekitun məmə itəmat nəməsotosən natımnat itəm katən məmə nat ağın mın rəha Setan itəm tatəhluaig-in məntaan. Esələhəu-pənən nat fıgəm kit mın kəm itəmat, məto iakolkeike məmə nəkotol nat kitiəh əm, inun,

²⁵otaskəlim tiəkis əm e nat itəm nınotos rəkis, mətoarus io ekıtəlig-pa.

²⁶⁻²⁷Etəm otol win e nəluaginən u, kən tatətul əskasik o nolən nəwiak, matuwın, matuwın mətoarus namnun, kən io ekos-ıpən nepətən u kəm in,

itəm rəhak tata təmos-ipa kəm io, məmə in otərəmərə e kantri pisin pisin min. Kən in otos rəhan nəlnal itəm in nəmtətin rəha nərig asol rəhan, kəmol e iaen, kən in otatgəhl-atgəhl netəm e nətueintən, tahmen-pən əm məmə iaen itəm təmoħapiləs-ohapiləs sospən kəmol e noanisip.

²⁸Kən io ekos-ipən min məhau u, fetukai kəm in.

²⁹Etəm matəlgin tatig, in otəkəike mətəlig-in wir nəghatən min itəm Narmin Rəha Uhgın tatən-ipən kəm niməfak min.”

Nol Əpən 3

Nəghatən təmuwin kəm iəfak min ikin Satis

¹“Əte naoa kit tuwin o nagelo rəha niməfak e taon u Satis, mən-ipən məmə, Nəghatən u rəhan, etəm tatos narmin rəha Uhgın ilat sepın, kən matos min məhau sepın. Nəghatən u rəhan itəm tatən-ipinə kəm itəmat məmə, Ekitun rəhatəmat nolən min. Ekitun məmə katən məmə itəmat noatəmegəh, məto kəpə, itəmat ninotimis rəkis.

²Otaiir-ta! Nolən wir min rəhatəmat nəmoatol aupən, otəsuwəhən tikə agin. Məto itəmat nəkotəkəike motalkut məmə onəkotos-ipər min nolən rəhatəmat, motol tuwa məskasik, məto-inu esəplanən əh nolən wir kit itəm nəmotol motuwin motol namnun lan, kən tətuatip e niganəmti Uhgın rəhak.

³Tol nəhlan, nikitəmat tuəh nəghatən itəm nəmotos, kən moatəto aupən. Otol, kən motəuhlin itəmat. Məto okəmə nakotapıl əlu-alu, oekiet-arəp otəmat tahmen e iakləh, kən itəmat okol nəsotitunən məmə nian naka oekimnə otəmat.

⁴Məto itəmat noan məsin əm un ikin Satis, itəm kəməsotolən napən rəhalat tamkimik. Ilat kotətuatip, motahmen o naliwəkən itimat min io e napən ruən.

⁵Etəm in otol win e nəluaginən, in otuwin nulan e napən ruən. Kən okol esafəl rəkisən nərgin e naoa rəha nəmegəhən, kən io ekən-iarəp nərgin e niganəmti rəhak Tata ne rəhan nagelo min, məmə in rəhak ətuatip etəmin.

⁶Etəm matəlgin tatig, in otəkəike mətəlig-in wir nəghatən min itəm Narmin Rəha Uhgın tatən-ipən kəm niməfak min.”

Nəghatən təmuwin kəm iəfak min ikin Filatelfia

⁷“Əte naoa kit tuwin o nagelo rəha niməfak e taon Filatelfia, mən-ipən məmə, Nəghatən u rəhan, Etəm Tasim, kən in Nipahrienən. Kən in tatos ki rəha Tefit u aupən. Okəmə in terəh e toa kit, kən okol suah kit təsahtosig-inən. Kən okəmə in tahtosig e toa kit, kən okol suah kit təserəhən lan. Nəghatən u rəhan itəm in tatən-ipinə kəm itəmat məmə,

⁸Ekitun rəhatəmat nolən min, netəm Filatelfia. Ekitun məmə rəhatəmat nəsanənən in noan məsin əm, məto itəmat nəmoatol nəwiak məsotapəsən, kən məsotəhluaig-inən məmə rəhak u itəmat. Otəplan-tu. Emerəh e toa otəmat. Okol suah kit təsahtosig-inən.

⁹Otəplan-tu. Netəm min un e Nuəfiminən rəha Setan, ilat koatən məmə ilat netəm Isrel, məto kəpə. Ilat ieiua min. Otəplan-tu. Oekol ilat kotuwa motisin nulilat e nelkitəmat o nisiaiien, kən okotən məmə nipahrienən io ekolkeike itəmat.

¹⁰Emən-ipinə kəm itəmat məmə itəmat onəkotos nətəligən əfəməh o nətul əskasikən, tahmen əm lak, kən itəmat nəmoatol rəhak nəghatən. O nat u, io oekatipal wir otəmat e nian itəm nəratən otəsuwəhən tuwa e nətueintən min rafin, məmə otekasgəwin-tu nahatətəən rəha netəm rəha nətueintən.

¹¹Otəsuwəhən ekuwa. Otaskəlim-iəkis natimnat min itəm itəmat ninotos rəkis, məmə suah kit otəsosən rəham nətouən itəm ninol win rəkis lan.

¹²Etəm otol win e nəluaginən, kən io oekol in tahmen e nig asol kit itəm tətəruəsan Nimə Rəha Uhgın rəhak. Kən in okol təsietən e Nimə əh nian kit. Kən io, oekəte-pən nərgi Uhgın rəhak lan, ne nərgi taon rəha Uhgın rəhak lan. Taon u, in Jerusalem wi, itəm Uhgın rəhak otahl-ipa, otisi-pər e nego e neai, meiuaiu-pa. Kən io oekəte-pən min nərgək wi e suah u.

¹³Etəm matəlgin tatig, in otəkəike mətəlig-in wir nəghatən min itəm Narmin Rəha Uhgın tatən-ipən kəm niməfak min.”

Nəghatən təmuwin kəm iəfak min ikin Laotisia

¹⁴“Əte naoa kit tuwin o nagelo rəha niməfak e taon Laotisia, mən-ipən məmə, !Nəghatən u rəhan, etəm katən məmə in Nipahrienən! In un, in etəm kitun nagileən lan məmə tatətul-arəp o nən-iarəpən nipahrienən əm, kən in nəukətın natımmat rafın itəm Uhgın təmol. Nəghatən u rəhan, itəm in tatən-ıpınə kəm itəmat məmə,

¹⁵Ekitun rəhatəmat nolən mın, netəm Laotisia. Ekitun məmə nəmegəhən rəhatəmat tahmen e nəhau itəm tarion əm. Təwir məmə onəkotətul əm e kitıəh, onəkotətəp o onəkotəgəpan.

¹⁶Itəmat nəkoatətul əm ilugin, nakotarion əm—nəsotəgəpanən məsotətəpən—tol nəhlan, oiakagəh rəkis-in itəmat roiı,

¹⁷məto-inun itəmat nakotən məmə, ‘Rəhatımat nautə tēpət, ioatos mənı asol, rəhatımat nəmegəhən təwir, natımmat rafın tatıg, kən nat kit təsikəən otımat.’ Məto itəmat nəkotəruru məmə itəmat nınotatıg rəkis e nəratən, itəmat nəkotal nasəkıtunən, rəhatəmat nautə tikə agın, nıganəmtıtəmat təpıs, kən nakotaiı piəpiə əm.

¹⁸O nat u, iatən-ıpınə ətuatıp kəm itəmat, təwir məmə onəkotos-nəmtın iaen u kol tatıpıt-ıpıt ron io, itəm kəmuwaan e nıgəm tus rəkis namtəən lan, kən pəs itəmat, rəhatəmat nautə otepət. Kən onəkotos-nəmtın mın napən ruən o nuwınən lan, məmə onəkotalpın nıpətıtəmat un, itəm tol naulısən. Kən moatos-nəmtın mın mərısın ron io, motol-pən e nıganəmtıtəmat, məmə nıganəmtıtəmat otalıen, nəkotəplan wir nat.

¹⁹Netəm mın un rafın itəm iakolkeike pik ilat, io iatəghat əskasık kəm ilat matəg-ətuatıp-in ilat. Tol nəhlan, təwir məmə nıkitəmat otıms-pa lak, kən motəuhlin-pa e nolən rat mın rəhatəmat.

²⁰!Otətəlıg-tu! Io iatətul e nafiluə, matətəht toa o nuwamən imə. Okəmə suah kit tətə nəwiak kən terəh e toa, kən ekuwın imə kən magwən itımlau mın.

²¹Io emol win e nəluaginən kən matəpələh-pər itımlau rəhak Tata e rəhan jea, matuərəmərə. Kən e nolən kitıəh əm, etəm otol win e nəluaginən, io

ekegəhan-in məmə otəpələh itimlau min e rəhak jea, matərəməərə itimlau min io.

²²Etəm matəlgin tatig, in otəkəike mətəlig-in wir nəghatən min itəm Narmin Rəha Uhgın tatən-ipən kəm niməfak min.”

Nol Əpən 4

Nəfakən e nego e neai

¹Uarisig e natimnat min u, emətag-pən əpəh, kən məplan toa kit təmerəh-pən əpəh e neai! Kən nəwian kitəh əm itəm eməto aupən, inun itəm in iahgin iahgin tahmen əm e təwi, tinatəghat min kəm io, kən tatən-ipa məmə, “Ər-tu muwa ikin-u, ekəgətun ik e natimnat min un, itəm okəpanol.”

²E nian kitəh əm, nəsanənən rəha Narmin Rəha Uhgın təmol kəm io, kən ekasipən əpəh aupən-in io matəplan kig, tatəpələh-pər e rəhan jea, matərəməərə e nego e neai.

³Kən etəm tatəpələh ikin əh, eməplan in təwir matəlip, matipit-ipit, tahmen e kəpiel wir kəiu nərgilau un tiaspa ne kanilian. Kən mirai-mirai kit təmuwin mitəlau e jea rəhan, kən mirai mirai əh tətasiə təhag-əhag tahmen e kəpiel wir kit u, emiral.

⁴Kən mitəlau-itəlau e jea asol rəha kig əh, jea neen min ilat tuente-fo, koatətul, kən netəm-iasol min itəm kəmotəwiətən, ilat tuente-fo, koatəpələh-pər elat. Kəmotuwın e natimnat ruən, kən motəfauin hat min rəha nisialien, itəm kəmol e iaen u kol tatipit-ipit.

⁵Kən ikin əh, jea rəha kig tətətig ikin, tatipit, kən kaluəluə titatiperəh matiet ikin. Aupən e jea rəha kig, noanisiə ilat sepın koatuəp. İnəh, narmin rəha Uhgın ilat sepın.

⁶Kən ikin əh aupən e jea rəha kig, nat kit min əh-ikin tahmen e nitəhəi, məto tahmen e kilas, itəm tatəlip, matipit-ipit. Ilugin ikin əh, kən titəlau e jea rəha kig u, nat neen əh-ikin, ilat kuwit, itəm koatəmegəh, koatətul. Kən niganəmtilat tepət tepət, tatəper-ipən əpnarın əm e nərpilat ne məntaalat ne.

⁷In aupən, tahmen e laion, kən nampa tu lan, tahmen e kau iəwiər, kən nampa tri lan, rəhn-kapə tahmen e etənim, kən nampa fo lan, tahmen e malikim itəm tatiwig.

⁸Nat min əh itəm koatəmegəh, ilat kuwit, məto niməlməlilat ilat sikis, kən niganəmtilat tirəfin əpnapin əm ilat, muwin əpəh e nəwtain niməlməlilat ləhau ikin ne. Nian rafin ilat kotan napuən lapin ne lenian, məsotamegən, koatan məmə: “!Iərəmərə Uhgīn Nahgīn Tepət Pīk Agīn in tasim, tasim, tasim pīk agīn, itəm in tətatiɡ roiu, təmətatiɡ lilin, otəpanətatiɡ lilin!”

⁹Kən nat min əh itəm koatəmegəh, koatən nīpahrienən e nepətən rəha Uhgīn, kən moatos-ipən nīsiaiən kəm in, kən moatən tagkiu kəm kig itəm tatəpələh-pər e rəhan jea, matərəmərə, mətatiɡ lilin, namnun tikə.

¹⁰Kən nian nat min əh itəm koatəmegəh koatol nəhlan, kən netəm-iasol itəm kəmotəwiətən, ilat tuente-fo, koteiuaiu moatisin nulilat kəm in, itəm tatəpələh-pər e rəhan jea, matərəmərə, kən moatəfak kəm in itəm tətatiɡ lilin, namnun tikə. Ilat kotisin nulilat kəm in, kən nīpinəgīlat taru nīsip, kən ilat koatəpeg rəkis rəhalat hat min rəha nīsiaiən, kən moatəlin aupən-in rəhan jea, kən moatən məmə,

¹¹“Rəhatimat Iərəmərə Uhgīn, Ik nakətuatip, mahmen agīn məmə onakos nənwiwiən rafin, ne nīsiaiən rafin, ne nəsanənən rafin, məto-inun ik nəmol natimnat rafin. Ik nəmol ilat məto-inu ik nəmolkeike məmə ilat okotatiɡ. Kən məto-inu ik nəmolkeike nəhlan, ilat kotatiɡ əh.”

Nol Əpən 5

Nəti sipsip təmuraḡik naoa itəm kəmaiu-aiu

¹Kən əmun, eməplan kig tatəpələh-pər e rəhan jea, kən matos naoa kit e nelmin matip itəm kəmaiu-aiu, kən naoa un kəməte-pən nat e nīkalin kərən mil, kən kəmaiu-aiu kuwaan ətain mau seḡin məmə otaskəlīm tiəkis.

²Kən eməplan nagelo əsanən kit tətəgət əfəməh matən-iarəp məmə, “?Pah u in tahmen mətuatip məmə oteatip rəkis nat itəm kəmuwaan ətain e naoa u, kən murapik?”

³Məto etəmim kit tikə ilis e nego e neai, o ləhau e nətueintən, o niki niməptən, kit okol təsətuatipən o nurapikən naoa u, mafin.

⁴Kən emətasək mətasək, məto-inun kəsəplanən etəmim kit itəm tahmen mətuatip o nurapikən naoa u, mafin.

⁵Kən etəm-iasol min u kit itəm təməwiətən, tən-ipa kəm io məmə, “!Sasəkən! Mitag-pən-tu məplan, Laion rəha Noanol rəha Juta, in nəukəti Tefit, in tinol win rəkis e nəluaginən rəhan. Tol nəhlan, in tətuatip agin-əh o nurapikən naoa əh, kən meatip rəkis nat əh ilat sepın itəm kəmuwaan ətain lan.”

⁶Kən əmun ekəplan Nəti Sipsip, tatətul əpəh ilugin e jea rəha kig ne nat kuwit itəm koatəmegəh ne netəm-iasol min itəm kəmotəwiətən. Nəti Sipsip u, nəkəplan məmə kəmohamnu rəkis. Kən rəhnipat ilat sepın, kən niganəmtin ilat sepın min, ilat un, koatətul o narmin rəha Uhgın ilat sepın itəm təmahl-iarəp ilat kotuwın e nətueintən.

⁷Nəti Sipsip əh, təmuwın meapən mos-irəkis naoa u e rəhn matip kig itəm tatəpələh-pər e rəhan jea.

⁸Kən nian in tinaskəlīm naoa un, kən nat min un itəm koatəmegəh ilat kuwit, ne netəm-iasol itəm kəmos nəwiətən ilat tuente-fo, ilat kotisin nulilat o Nəti Sipsip, moteiuaiu, nipiñəgilat taru nisip. Ilat rafin koatos hap min ne pesin min itəm kəmol e iaen u kol tatipit-ipit, tərıoah e nat pien-pien min itəm nəmiəwın təwir. Kən nat pien-pien u, in tahmen e nəfakən min rəha netəmim rəha Uhgın.

⁹Kən nat min un itəm koatəmegəh ilat kuwit ne netəm-iasol itəm kəmotəwiətən, kəmotan napuən wi kit məmə, “!k nakətuatip, mahmen agin o niləsən naoa u, kən meatip rəkis nat min itəm kəmuwaan ətain lan, məto-inun kəmohamnu ik, kən nəmos-nəmtin netəmim e nitam məmə ilat rəha Uhgın. Kən ilat kəmotisi-pən e noanol min rafin, ne nəghatən min rafin, ne kantri min rafin, ne netəm nuwigilat tol pisin pisin min,

¹⁰kən nəmol ilat kotatig ahgin rəham nərəmərəən, kən ilat rəham pris min, koatol wək rəha Uhgın rəhatimat. Ilat okotərəməərə e nətueintən.”

¹¹Kən ekətag-pən min məplan, kən məto min nəwia nagelo min tepət, tepət, okol kəruru nafinən. Kəmotətul, motitəlau e jea rəha kig, ne nat min u itəm koatəmegəh, ne netəm-iasol min itəm kəmotəwiətən.

¹²Kən ilat kotan əfəməh napuən məmə: “!Nəti Sipsip itəm kəmoħamnu, in tətuatip mahmen agin məmə kotənwiwi in, məto-inu tatos rafin nəsanənən, ne nautə, ne nenatigən, ne nahgin, ne nepətən əhag-əhag! !Təwir agin-əh məmə koatisiai-in!”

¹³Kən eməto min natimnat rafin itəm Uhgın təmol e nego e neai, ne nətueintən, ne Imə Netəm Kəmotimis Ikin, ne e niki nitəhəi, ne natimnat min rafin itəm kotatig elat, ilat rafin koatən məmə: “Pəs nənwiwiən ne nisiiəiən tatuwin o kig itəm tatəpələh-pər e rəhan jea ne Nəti Sipsip, məto-inu in tatos nepətən əhag-əhag ne nərəmərən. !Pəs nənwiwiən ne nisiiəiən tuwin olau, kən tatuwin, matuwin, matuwin, namnun tikə!”

¹⁴Kən nat min un ilat kuwit itəm koatəmegəh, kotəmə, “!Əwəh!” kən netəm-iasol min itəm kəmotəwiətən kotisin nulilat ron, moteiuaiu, nipiənəgilat taru nisip, moatəfak kəm in.

Nol Əpən 6

Nəti Sipsip təmatgəhl nat itəm kəmuwaan ətain naoa itəm kəmaiu-aiu lan

¹Kən ekatəlkəlik o Nəti Sipsip nian in təmatgəhl rəkis nat kit itəm kəmuwaan ətain e naoa kəmaiu-aiu. Kən əmun, nat koatəmegəh u kit ilat kuwit tagət əfəməh e nəwian kit tahmen e kaluəluə, məmə, “!Wa-tu!”

²Ekətag-pər məplan hos kəruən kit. Etəm tətəsuə-pər lan tatiləs nifagə, kən kəməfauin-pən hat rəha nisiiəiən kəm in, tahmen e hat rəha etəm tinol win rəkis e nəluaginən. In təmaiu matuwin tahmen e etəm təmol win e nəluaginən, kən matuwin min məmə otol min win.

³Nian Nəti Sipsip təmatgəhl rəkis nat tatol nampa tu lan, itəm kəmuwaan ətain naoa lan, kən eməto nat tatəmegəh itəm tatol nampa tu lan təmə, “!Wa-tu!”

⁴Kən hos pişin kit min itəm tasiə, təmaiu muwa. Etəm titasuə lan, kəmos-ipən nisa asol kit rəha nəluaginən kəm in. Kən Uhgın təmegəhan-in-pən nepətən məmə otos-irəkis nəməlinuən itəm tətətig e nətueintən, məmə netəmim koatəluagin əm moatohamnu-ohamnu ilat min ikin min rafin.

⁵Kən nian Nəti Sipsip təmatgəhl rəkis nat tatol nampa tri lan, itəm kəmuwaan ətain naoa lan, kən ekəto nat tatəmegəh itəm tol nampa tri lan, təmə, “!Wa-tu!” Kən ekətag-pər məplan hos kapin kit. Etəm titasuə lan tatitol sikel kit.

⁶Kənu eməto nəwian kit tətisi-pən ilugin e nat koatəmegəh min ilat kuwit, matən məmə, “Uwin, kəmegəhan-in ik məmə nəkitun nosən nəumis e nitən min, kən ilat okotəkəike motəra kin məni asol o nosən nagwənən noan məsin əm. Məto onəsərəkinən nəukəti nig olif min itəm katol oel e noan, kən nəsərəkinən nəukəti nol u krep itəm katol wain lan.”

⁷Nian Nəti Sipsip təmatgəhl rəkis nat tatol nampa fo lan, itəm kəmuwaan ətain naoa lan, kən ekəto nat tatəmegəh itəm tol nampa fo lan, tatən məmə, “!Wa-tu!”

⁸Kən ekətag-pər məplan hos kəmtap kit! Etəm titasuə lan, nərgin u Nimişən, ilau etəmim kit, nərgin u, Noanpən, tatuarisig-in mətian. Kəmios nepətən məmə okohamnu netəmim e naip ne nəumis ne nimişən ne nat megəh iarupin min. Kəmios nepətən nəhlan, tahmen-in nəwtain nətueintən kitiəh, mapəs əm nəwtain kisil.

⁹Kən nian Nəti Sipsip təmatgəhl rəkis nat tatol faif itəm kəmuwaan ətain naoa lan, ekətag-pən əpəh e nəwtain olta, ləhau ikin, məplan netəm kəmo hamnu ilat məto-inu ilat kəmotətul əskasik o nən-iarəpən nəghatən rəha Uhgın.

¹⁰Ilət kotaun əfəməh moatən-ipən kəm Uhgın məmə, “Ik nakərəmərə e natimnat rafin, ik nakasim, kən ik nipahrienən. ?O nəghan ne kən ik onakələhəu nəghatən məmə netəm rəha nətueintən kəmotol tərət, kən mol nalpinən kəm ilat o nat itəm kəmotol etimat? ?Onagəhən nakalpin nitai nitatimat e netəm min əh?”

¹¹Kəmotən nəhlan, kən kəmos-ipən napən ruən kəm ilat rafin. Məto kəmən-ipən kəm ilat məmə okotameg min noan məsin əm mətoarus nampa apiəpiə rəha pialat min ne winilat min, otuwa pitən mahmen. Pialat min ne winilat min u, netənim min rəha Iesu, itəm okəpanohamnu ilat o rəhalat nahatətəən.

¹²Kən nian Nəti Sipsip təmatgəhl rəkis nat tatol sikis itəm kəmuwaan ətain naoa lan, kən əmun, namig asol kit təməloal. Mitgar təmapinəp agin, kən məwig təmasiə agin tahmen e nita.

¹³Kən məhau min əpəh ilis e neai kəmotisas-pən e nətueintən, tahmen e noa nig u fik, itəm nimətag asol təmatigtig e noan pikəh tisas.

¹⁴Kən neai təmikə tahmen e nimitiwın kəmaiu-aiu kiləs kagim. Kən nitot min ne nəptən min kəmotagim e nəmelat min.

¹⁵Kən kig min rəha nətueintən ne iəməmə min, netəm-iasol min rəha mopael min, netəm rəhalat nautə tepət, ne netəm koatos nepətən, ne slef min rafin, ne netəm sənəmə slef min, ilat rafin kəmotəhluaig e nipəg kəpiel asol min, ne nikali kəpiel min əpəh e nikalkal nitot asol min.

¹⁶Kən ilat kəmotasək əfəməh-pən o nitot min ne kəpiel asol min məmə, “Otisas, motoh ətain itimat, motəhluaig-in itimat o niganəmti kig u itəm tatəpələh-pər e rəhan jea, ne o neməha rəha Nəti Sipsip,

¹⁷məto-inun nian asol kəgin əh rəha neməha rəhalau tinuwa. ?Kən pah un in titun nətulən?”

Nol Əpən 7

Wan-hanrit-foti-fo-taosən kəmol mak elat mə rəha Uhgın

¹Kən əmun ekəplan nagelo kuwit koatətul-pən e kona min ilat kuwit e nətueintən. Kəmotəmkətain rafin nimətag kuwit e kona kuwit rəha nətueintən, məmə nimətag otikə e nətueintən, ne nitəhəi, ne nig min.

²Kəmos-ipən nəsanənən kəm ilat o nərəkinən nəptən ne nitəhəi. Kən ekətag-pən məplan nagelo kit min tatisi-pah, tatiləs nat kit itəm Uhgın u, itəm tatəmegəh, otos o nolən mak rəhan lan. Kən in tətəgət əfəməh-pən kəm nagelo min u kuwit, məmə,

³“!Otəpəs pitən! Sotəhlmanən nimətag məmə otəsərəkinən niməptən ne nitəhəi ne nig min, pəs ekotol-pən pitən mak rəha Uhgin rəhatat e nipinəgi iolwək min rəhan.”

⁴Kən eməto nampa rəha netəm kəmosos mak u rəha Uhgin. Netənim wanhanrit-foti-fo-taosan kəmotiet rəkis e noanol min rəha Isrel, ilat kəmosos mak əh.

⁵E noanol rəha Juta, netənim ilat tuelef-taosən. E noanol rəha Rupen, netənim ilat tuelef-taosən. E noanol rəha Kat, netənim ilat tuelef-taosən. E noanol rəha Aser, netənim ilat tuelef-taosən.

⁶E noanol rəha Naptali, netənim ilat tuelef-taosən E noanol rəha Manase, netənim ilat tuelef-taosən.

⁷E noanol rəha Simeon, netənim ilat tuelef-taosən. E noanol rəha Lifae, netənim ilat tuelef-taosən. E noanol rəha Isakar, netənim ilat tuelef-taosən.

⁸E noanol rəha Sepulun, netənim ilat tuelef-taosən. E noanol rəha Josep, netənim ilat tuelef-taosən. Kən e noanol rəha Benjamin, netənim ilat tuelef-taosən kəmosos mak əh.

Nimanin netənim itəm kəmotuwın e napən ruən

⁹Uarisig e natimnat min u, emətag-pən əpəh aupən-in io, məplan nimanin netənim tepət tepət, okol kəruru nafinən. Ilat koatisi-pən e kantri min rafin, ne noanol min rafin, ne nəghatən min rafin, kən nuwigilat tol pisin pisin min. Ilat koatətul aupən e jea rəha kig, ne Nəti Sipsip. Ilat koatuwin e napən ruən min, kən moatos nelmi nəmıl e nelmılat.

¹⁰Kən moatagət əfəməh moatən məmə “Uhgin rəhatat itəm tatəpələh-pər e rəhan jea, matərəmərə, ilau Nəti Sipsip, ilau əh kəmioal suatip o nosmegəhən kitat.”

¹¹Nagelo min rafin ilat kotətul motitəlau e jea rəha kig, kən mitəlau min e netəm-iasol min itəm kəmosos nəwiətən, ne nat koatəmegəh min u, ilat kuwit. Ilat moatisin-pən nulılat aupən e jea rəha kig, moteiuaiu, nipinəgilat taru nisip, kən moatəfak kəm Uhgin,

¹²moatən mēmə: “!Əwəh! !Nipahrienən! Rəhatat Uhgın təwir pik, matəhag-əhag wir. !In tenatig tenatig, təsanən, nahgin tepət! !Pəs kotənwiwi in, motisiai-in, kən motən tagkiu kəm in matuwın matuwın namnun tikə! !Əwəh!”

¹³Kən əmun, netəm-iasol itəm kəmos nəwiətən min u kit tətəpəh ron io mēmə, “?Pah min əh koatuwin e natimnat ruən? ?Kən ilat kəmotisi-pən hiə?”

¹⁴Kən ekuhalpin mēmə, “Etəm-iasol. Ik əm nəkitun.” Kən in təmə, “Netəm min əh, ilat un kəmotiet rəkis e nahməən asol; ilat kinəmotaikuas e rəhalat napən kən motol tərüən e nita Nəti Sipsip.

¹⁵Kən tol nəhlan, “ilat kotətul aupən e niganəmti Uhgın, itəm tatəpələh matərəmərə, kən moatəfak kəm in e nərauiəgən ne lapin e Rəhan Nimə; kən kig u itəm tatəpələh-pər e jea, in otahgıl kəm ilat min nian rafin.

¹⁶Ilat, okol nəumis tibus minən ilat, kən okol kəsotoaoa minən. Kən nərauiə təsəhg minən ilat, nape-apeən asol rəha mitgar otəsəhg minən ilat,

¹⁷məto-inun, Nəti Sipsip itəm tatəpələh ilugin e jea rəha kig, in otatehm ilat tahmen e etəmim rəha nehmən sipsip. In otit ilat, matuwın o nəmti nəhau megəh, kən Uhgın otafəl rafin nahui nəmtilat.”

Nol Əpən 8

Pesin rəha nat pien-pien

¹Nian Nəti Sipsip təmatgəhl rəkis nat tatol sepın itəm kəmuwaan ətain naoa lan, kən nagətən təmikə əpəh e nego e neai o nian əkuəkır kit, tahmen e hafaoa.

²Kən əmun eməplan nagelo sepın u kotətul aupən e niganəmti Uhgın, kən ilat rafin koatos təwi.

³Kən nagelo kit min, in tatitol pesin kit itəm kəmol e iaen u kol tatipit-ipit, kəməmki-pən nat pien-pien lan. Təmitol muwa mətul aupən e olta. Kəmos-ipən nat pien-pien tepət kəm in, mēmə otos-ipən təlmin nəfakən min rəha netəmim rəha Uhgın, kən mos-ipən ilau kəm Uhgın, muwaan əpəh e olta kəmol e iaen u kol tatipit-ipit, itəm tatətul aupən e jea rəha kig.

⁴Nəhaniəm rəha nat pien-pien min, ne nəfakən min rəha netəmim rəha Uhgin, itəm nagelo tatəmik e nelmin, kəmotər motuwın o Uhgin.

⁵Kən əmun nagelo təmitol nat pien-pien u e pesin, kən məmki-pən nigəm lan, itəm tatuəp e olta, kən məhtəg-iarəpən e nətueintən. Kən əmun, kaluəluə təmatiperəh, kənu təmipit, kən nərəkərikən, kən namig təməloal.

Təwi min

⁶Kən nagelo sepın itəm koatos təwi min, kəmotətul matip o nahlən təwi.

⁷Kən nagelo itəm tətaupən, təmahl rəhan təwi. Kən əmun, ais ne nigəm itəm kəmol piləh-piləh iləhal nita, kəmətəg-pən iləhal e nətueintən. Təmuəp mus nəwtain nəptən kitiaəh, mapəs əm nəwtain kəiu, kənu təmuəp mus nig min nəwtain kitiaəh, mapəs əm nəwtain kəiu, kən təmuəp mus ma-kiras mitə kəmotuəp rafin.

⁸Kən nagelo itəm tatol nampa tu lan in təmahl rəhan təwi, kən nat kit tahmen e nitot asol, itəm tatuəp, kəmərakin-pən əpəh itəhəi. Kən nəwtain nitəhəi kitiaəh təmol nita, mapəs əm nəwtain kəiu.

⁹Kən təmərəkin nat megəh min itəm kotatig itəhəi nəwtain kitiaəh, mapəs əm nəwtain kəiu, kən mərəkin min nego min nəwtain kitiaəh, mapəs əm nəwtain kəiu.

¹⁰Kən nagelo itəm tatol nampa tri lan, təmahl rəhan təwi. Kən məhau asol kit təmiet, matuəp tahmen e noanisə. Təmiet əpəh ilis e neai, meiuaiu misas-pən mus nəwtain nəhau min ne nəmti nəhau min nəwtain kitiaəh, mapəs əm nəwtain kəiu.

¹¹Məhau u, nərgin u Tarip Tarip. Kən əmun, nəhau min nəwtain kitiaəh kəmotarip motarip, mapəs əm nəwtain kəiu. Kən netəmim tepət itəm kəmotənim nəhau arip, kəmotimis.

¹²Nagelo itəm tatol nampa fo lan, təmahl rəhan təwi. Kən nat kit təmoh mitgar, ne məwig ne məhau min, mol nəwtain mitgar kitiaəh təmapinəp, mapəs əm nəwtain kəiu kətiauəp. Kən nəwtain məwig kitiaəh təmapinəp, mapəs əm nəwtain kəiu kətiauəp, kən nəwtain məhau min kitiaəh kəmotamis,

kən nəwtain kəiu əm kəmotasiə. E nərauiəgən, kən tatərauiā e nəwtain kəiu əm, mapəs kitīəh. Kən nian lapin, tatəmihl e nəwtain kəiu əm, mapəs kitīəh.

¹³Kən əmun ematəplan, kən mətō malikim kit tatiwig e napuə, kən mətāsək əfəməh matən məmə, “!Awe! !Awe! !Awe! !Mətō-inun nagelo kisil min əh-ikin okəpanəhlahl min rəhalal təwi roiu, mol nəratən asol okəpanəhaluwa e netəmim rəha nətueintən!”

Nol Əpən 9

Nagelo itəm tatol faif lan təmahl təwi

¹Nagelo itəm tatol faif lan, tətahl rəhan təwi, kən eməplan məhau kit itəm tinəmişipər e neai miet-pən e nətueintən. Kəmos-ipən ki kit kəm məhau un, o nerəhən e nīpəg asol itəm teiuaiu agin.

²Nian təmerəh e nīpəg əh, nəhaniəm təmər, tahmen e nəhaniəm rəha iohe. Mītgar ne napuə kəmuapinəp e nəhaniəm rəha nīpəg asol.

³Kənu nat kit tahmen e pitip, ilat tepət agin-əh, kəmotiet rəkis e nəhaniəm əh, moteiuaiu e nəptən, kən kəmos-ipən nəsanənən kəm ilat o nusən itəm e nīpikilat, kən tīahmə tīahmə.

⁴Kəmən-ipən kəm pitip min məmə kəsotərəkīnən ma-kīras ne nig min, ne natimnat itəm kotəwiə e nətueintən, mətō okotərəkīn əm netəm min un itəm kəsotosən mak rəha Uhgīn e nīpinəgīlat.

⁵Kən kəmegəhan-in nəsanənən kəm ilat məmə okotus netəmim motol nahməən kəm ilat o məwig faif, mətō kəsotohamnuən ilat. Kən nahməən əh, itəm ilat okotəto tərāt lan, taprəkis-in agin nəme nīpiki welau itəhəi, nian tatus itəm, kətahmə.

⁶E nian min əh, netəmim okotegəs-in suatip o nīmişən, mətō okol kəsotehmən. Okotolkeike məmə okotimis, mətō okol kəsotimisən.

⁷Eməplan pitip asol min əh, ilat kotahmen e hos min itəm kəmotətul matip o nəluaginən. Ilat kəmotəfauin nat kit tahmen e hat rəha kīg itəm kəmol e iaen u kol tatipit-ipit, kən rəhn-kapəlat tahmen e rəha etəmim.

⁸Noanulat kaifēməh tahmen e noanu pətan, kən nəluilat tasilə tahmen e nəlui laion.

⁹Nuwiligilat tol məmə kəmotalpın manikiləhalat e nat kit rəha nəluaginən, kəmol e iaen, kən nawin niməlməlilat tatuwa tahmen e hos tepət koatiuw kat min moatuwin e nəluaginən.

¹⁰Nipikilat tatus itəm kətahmə taprəkis-in agin welau itəhəi. Ilat koatos nəsanənən e nipikilat o nolən nahməən kəm netəmim o məwig faif.

¹¹Ilat, rəhalat kit əh-ikin etəm-iasol, in iərəməərə rəha nipəg asol itəm teiuaiu agin. E nəghatən rəha netəm Isrel, katən nərgin mə Apaton, kən e nəghatən Kris, kətaun-in məmə Apolion, nipətın u Iərəkin.

¹²!Awe! Nəratən aupən tinol namnun, mətə awe, awe, nəratən kəiu min əh-ikin okəpanueia.

¹³Kən əmun, nagelo itəm tatol sikis lan təmahl rəhan təwi. Kən emətə nəwian kit təmisi-pən əpəh e niki rəhnipət olta u, ilat kuwit, kəmol e iaen u kol tatipit-ipit, kən tatətul aupən e niganəmti Uhgın.

¹⁴Kən nəwian əh təmən-ipən kəm nagelo itəm tatol sikis lan u tatiləs təwi, məmə, “fkis nagelo min un ilat kuwit itəm kəməlis ilat kəmki-pən əpəh e nəhau asol Iufretes.”

¹⁵Tol nəhlan, təmikis ilat. Nagelo min əh, ilat kuwit, kəməlin ilat kotətul matip u-roiu o aua ətuatip u, ne nian ətuatip u, ne məwig ətuatip u, ne nup ətuatip u, məmə okotohamnu netəmim rəha nətueintən nəwtain kitiəh, motapəs kəiu.

¹⁶Kən emətə nampa rəha mopael min rəhalat, itəm kotasuə e hos, kən ilat rafin tu-hanrit-milian netəmim.

¹⁷Kən e napilairən rəhak, eməplan hos min əh ne netəm kotasuə elat kotol nulan. Rəhalat iaen itəm tatəfətain manikiləhalat, in tasiə tahmen e nigəm, mol pilu wir, kənu mauieh. Rəhn-kapə hos min u, kotahmen e rəhn-kapə laion min, kən nigəm ne nəpienən rat ne nəhaniəm katəhalisi-pən e nipəgnoalat.

¹⁸Kən nəratən asol miləhal u itəm kəməhaliet e nīpəgnoalat, iləhal kəməhalohamnu netəmim e nətueintən nəwtain kitīəh, kapəs əm nəwtain kəiu.

¹⁹Nəsanənən rəha hos min əh, tatisi-pən e nīpəgnoalat, ne nīpikilat, mətō-inun nīpikilat tahmen e sinek, itəm rəhn-kapə tətatiḡ e malnīpikin. Kən hos min əh, koatus min netəmim e mal-nīpikilat.

²⁰Kən netəm min u, nəratən miləhal əh kəməsohamnuən ilat, ilat kəməsotəuhlinən nətəliḡən rəhalat e natimnat min itəm ilat koatol. Kəməsotapəsən nəfakən kəm iərmis min ne narmi nat min itəm kəmol e iaen u kol tatipit-ipit, ne silfa, ne pīrons ne kəpiel, ne niḡ. Ilat u narmi nat əm, itəm kəsotəplanən nat, ne məsotətoən nat, ne məsotaliwəkən.

²¹Kən ilat kəməsotəuhlinən nətəliḡən rəhalat o nohamnuən itəm, nəmikən nərik, nolən klefa, nolən masig, nītəpən iərman ne pətan, ne nakləhəən.

Nol Əpən 10

Nagelo itəm təmos naoa əkəku

¹Kən əmun ekəplan nagelo kit min nahgin tepət tatisi-pər e nego e neai. Tatuwin e malnapuə tahmen e rəhan napən, kən mirai-mirai titəlau e rəhn-kapə. Kən in təhag-əhag mitasiə, tahmen e mit, kən nelkin tahmen e pos asol mil u kətiauəp e niḡəm.

²In tatos naoa əkəku kit itəm kinurapik rəkis tatəməhl-pən e nelmin. In təməf-ipən nelkin matip e nitəhəi kən məf-ipən nelkin mol e nəptən,

³kən in təmagət əfəməh, nakəto nəwian tahmen e laion. Nian təmagət əfəməh, kən kaluəluə təmatipərəh mau sepīn, matuhalpīn.

⁴Kən nian kaluəluə təmatiperəh mau sepīn matuhalpīn rəhan nəghatən, kən nikik natəht məmə oekəte rəkis nəghatən itəm in tatən. Məto enəto nəwian kit tatisi-pər e nego e neai matən məmə, “Əhluaig-in nəghatən u itəm kaluəluə tatən, sətə rəkisən.”

⁵Kən əmun, nagelo apon itəm eməplan aupən tatətul-pən e nitəhəi ne nəptən, tīləs-ipər nelmin matip, matəhu-pər e nego e neai,

⁶Kən matos noanawil e etəm tətatiḡ lilin, etəm təmol nego e neai ne natimnat rafin itəm koatatiḡ lan, ne nətueintən ne natimnat rafin itəm kotatiḡ lan, ne nitəhəi ne natimnat rafin itəm kotatiḡ lan, kən məmə, “!Uhgīn otəsəsahgin minən!

⁷Məto nian nagelo itəm tatol sepin lan otahl rəhan təwi, kən nalpəkauən anion rəha Uhgīn itəm tatəhluaig-in, in otuwa mol nipahrienən lan u-roiu. In otiet-arəpa tahmen əm mə in təmən-iarəp aupən kəm rəhan iolwək min u, ien min rəhan.”

⁸Kən əmun, ekəto min nəwian əh təmiṣi-pən e nego e neai, matən-ipa min kəm io məmə, “Uwīn, miḡəs naoa kəmuraḡik əh itəm tatəməhl-pən e nelmi nagelo itəm tatətul-pən e nitəhəi ne nəptən.”

⁹Kən əmun, ekuwīn mətapəh o nagelo məmə otos-ipa naoa əkəku kəm io. In tən-ipa kəm io məmə, “Os mun. Nat u otərəkin nərpəm, məto nian onakun, tətəhen tahmen e sukapak.”

¹⁰Kən əmun ekiləs-irəkis e nelmi nagelo, kən mun mərḡe. Emun məto tətəhen tətəhen, tahmen e sukapak, məto nian emərḡe, təmərəkin nərpik, nərpik təmərət lan.

¹¹Kən kəmən-ipa kəm io məmə, “Ik onakəkəike mən-iarəp min nəḡhatən itəm Uhgīn otos-ipinə kəm ik u, o netənim nuwigilat piṣin piṣin min, ne netəm e kantri piṣin piṣin min, ne netəm koatən nəḡhatən piṣin piṣin min, ne kig min.”

Nol Əpən 11

Etənim mil itəm kəmuətul-arəp o lesu

¹Kən əmun kəmos-ipa nuwig kit rəha nosən mak e nat, kən kən-ipa kəm io, məmə, “Uwīn, mos mak e Nimə Rəha Uhgīn, ne olta, kənu mafin rafin netəm koatəfak əh imə.

²Sosən mak e iat, məto natos əm mak e nimə. Sosən mak lan məto-inun kinosiḡipən rəkis iat əh kəm Iaihlua min. Ilat okoteguafəl-eguafəl rəhak taon asim motuwīn motuwīn motos məwiḡ ilat foti-tu.

³Kən io ekos-ipən nəsanənən kəm rəhak etəmim mil itəm katuətul-arəp ron io. Kən okətios əm nəmkapin, muatətul-arəp o nən-iarəpən rəhak nəghatən min o nian wan-taosen tu hanrit sikiste.”

⁴Ilau u, nokət nig olif mil, ne nat katəhtu-pər lait lan mil, itəm katuətul aupən e İərəmərə rəha nətueintən.

⁵Okəmə suah kit tətalkut o nərəkinən ilau, kən nəmnamin nigəm otisi-pən e nohlilau, kən mus rəhalau tikimir min. Etəmim itəm tolkeike nərəkinən ilau, in otəkəike mimis nəhlan.

⁶Suah mil u, ilau kətios nəsanənən o nahtosig-inən napuə məmə nuhuən otəsəfikən nian ilau okatuəghat matuən-iarəp nəghatən min rəha Uhgın. Kən ilau matios min nəsanənən məmə okuəuhlin nəhau min kotuwa nita, kənu miatun min nərəkinən netəmim rəha nətueintən e nəratən pisin pisin min itəm ilau kioalkeike məmə okioal.

⁷Kənu nian ilau kinuatətul-arəp rəkis, kinuən rəkis natimnat rafın, kən nat megəh itəm otər e nıpəg teiuaiu agin, marioah moh ilau, mol win elau mohamnu ilau.

⁸Nipətılau otatəməhl əpəh e suatıp rəha taon asol əh, ikin əh kəməht-ipən min rəhalau İərəmərə e nig kəməluau ikin, kəməuhlin nərgin, məmə Sotom o İjip, tatəpsen-pən nolən rat ikin əh.

⁹Kən netəmim nuwigilat pisin pisin min, netəmim e noanol rafın, ne netəmim e nəghatən min rafın, ne kantri min rafın, okoatarəp e nıpətılau, motos nian apiəpiə kisil, kən haf, kən kəməsotegəhan-inən nitənimən ilau.

¹⁰Kən netəmim rafın rəha nətueintən okotol lafet, motagien, kən moatos-ipən natimnat kəm ilat min, motagien mətə-inun ien mil itəm kəmatioal pik nəratən kəm ilat, kiniamis.

¹¹Mətə uarisig e nian apiəpiə kisil ne haf tinuwın rəkis, kən Uhgın təmos-ipən nehagən e nıpətılau kən ilau kəmuətul e nelkılau. Kən netəmim rafın itəm kəmotəplan ilau, niganməpilat təmasiəp, narmilat tikə.

¹²Kən ilat kəmotəto nəwian asol kit təmiş-i-pər e nego e neai, matən-ipən kəm ilau məmə, “Uər mueia ikin-u.” Kən malnapuə təmiləs ilau mər muwin e neai. Kən rəhalau tikimir min kəmotətul motalkəlik olau.

¹³Kən e nian ətuatip əh, namig asol kit təmərəkin rum kitiəh e taon əh, mapəs əm rum nain. Namig təmohamnu netəmim ilat rafin sepın-taosən, kən netəmim rafin itəm kəməsotimisen, kəmotəgin motasiəp, kən motən nipahrienən məmə Uhgın e nego e neai, tatos nepətən.

¹⁴!Awe! Nəratən asol itəm tatol nampa tu lan, tinol namnun. Məto, nəratən itəm tatol kisil lan otəsuwəhən tuwa.

Nagelo itəm tatol sepın lan təmahl təwi

¹⁵Nagelo itəm tatol sepın lan təmahl rəhan təwi, kən əmun nəwian asol min kəmotisi-pən e nego e neai motən məmə, “Rəhatat İərəməyə ne rəhan Kristo, ilau kinatuərəməyə e nətueintən rafin agin, kən nəərəməyəən rəhan, otətətiğ liliin.”

¹⁶Kən netəm-iasol itəm kəmos nəwiətən min ilat tuente-fo, itəm koatəpələh-pər e rəhalat jea min aupən e nigənəmti Uhgın, ilat kəmotisin nulilat, moteiuaiu, nipinəğilat taru nisip, kən moatəfak kəm Uhgın,

¹⁷motəmə, “İakoatən tagkiu kəm ik, İərəməyə Uhgın Nahgim Tepət Pık Agin, etəm un ik nətətiğ un itəm nətətiğ roiu, kən nəmətətiğ aupən, məto-inu ik nəmos rəham nəsanənən asol, kən minətuoun matərəməyə.

¹⁸“Kantri min, kotautu pık, məto ik rəham neməha asol tinuwa. Nian tinuwa o nakilən netəm kəmotimis. Kən onakətou ien min u ilat rəham iolwək min, kən mətou min netəmim rəham, ne netəm koatisiai-in ik, ilat rafin, nat əpnapin okəmə ilat koatos nepətən asol o nepətən əkəku. Kən nian u rəham, o nəərəkinən netəm itəm koatərəkin netəmim e nətueintən.”

¹⁹Nian kəmerəh e Nimə Rəha Uhgın əpəh ilis e neai, kən kəməplan Bokis rəha Nəniəkisen Rəha Nasituən tatəpələh əpəh imə. Kən təmatipit mitasiə, kən kaluəluə təmatatiperəh, kən eməto nagətən asol min, kən təmatamig, kən ais təmişas-pa.

Nol Əpən 12

Pətan ne ialkita kəgin

¹Kən nəmtətin asol kit təmiet e neai, muha-pispiş lak. Pətan kit təmuwin e mitgar tahmen e rəhan napən, kən təməpələh məf-ipər nelkin e məwig, kən matəfauin hat rəha nisaiien kit, kəmol-pən məhau tuelef lan.

²In tətəsək əfəməh, tatəto nahməən məto-inun in təpək-əpək kən otəsuwəhən temək.

³Kən əmun nəmtətin kit min təmiet min əpəh ilis e neai, itəm tatuha-pispiş lak. Inəh, ialkita kəgin kit, tasiə, tahmen e nigəm, rəhn-kapə təmisim-isim ilat sepın, kən rəhnipət ilat ten, kən kəməfauin-pən hat rəha kig asol agin ilat sepın e rəhn-kapə min.

⁴Nipikin tətəh-irəkis məhau min əpəh ilis e neai, matəmki-əhau-pa ilat nəwtain kitieh e nətueintən, məpəs nəwtain kəiu. Kən e nian əh, ialkita un təmuwa mətul aupən e pətan u itəm otəsuwəhən temək, məmə okəmə nətin tinaiir un, kən in ton.

⁵Pətan əh təmiləs nətin iərman, itəm in otərəməərə e kantri min rafın, kənu nəmtətin rəha nərəmərəən rəhan tahmen e nəlnal kit kəmol e iaen. Məto Uhgın təmeuw rəkis suakəku u o ialkita, miləs-ipər ilis e rəhan jea, məmə otərəməərə.

⁶Pətan un, təmagım-pən əpəh ikin taruən-aruən ikin, itəm Uhgın təmol əpen-əpenə lan məmə otətətig ikin, kən katehm, kətoarus-pən nian wan-taosen-tuhanrit-sikiste tinuwa minuwın rəkis.

⁷Kən əmun, nəluaginən kit tinətul əpəh e nego e neai. Mikael ne rəhan nagelo min, kinoatəmou ilat ialkita, kən ialkita ne rəhan nagelo min kinoatəh min ilat.

⁸Məto ialkita, nahgin tikə, təsahmenən. Kən əmun, Mikael ne kinotol win elat, kən kəməhl-iarəp ilat əpəh e nego e neai.

⁹Kəmotiləs ialkita asol un, motərakin-iəhau e nətueintən. Kən inu, in sinek nuwəh ilouin aupən, katən mə İərmis, o Setan, itəm təmeiuə-in nətueintən

rafin agin. Kəmərakin-iarəp in, tuwa e nətueintən, ilat rafin nagelo min rəhan.

¹⁰Kən əmun eməto nəwian asol kit əpəh ilis e nego e neai. Təmə, “!Roiu əh, Uhgın rəhatat in tinosmegəh itat! !Roiu əh in tinol-arəp məmə in tatos nəsanənən, kən roiu əh, in tinatərəmərə! Kən roiu əh, Kristo rəhan təmol məmə in tatos min nəsanənən ne nepətən e natimnat min rafin. Tol nəhlan mətə-inu roiu əh, kinərakin-iəhau Setan e niganəmti Uhgın. Setan u, itəm tatətu-pən-ətu-pən nat e piətət min lapin ne lenian, mən-iarəp nipəgnəmtin min rəhan matətu-pən elat e niganəmti Uhgın.

¹¹Kən piətət min kəmotəmou ilat min, kən motol win rəkis lan e nəsanənən rəha nita Nəti Sipsip, motatig motol win min lan e nətul əskasikən o nən-iarəpən nəghatən rəha Nəti Sipsip. Motol win min lan mətə-inu nikilat təməsəht pikən nəmegəhən rəhalat, mətə kəmotətul matip əm məmə okotimis.

¹²!Nego e neai, ne itəmat u notatig ikin, otagien mətə-inu kinərakin-iarəp ialkita! !Mətə awe, kəsi o nətueintən ne nitəhəi, mətə-inu Setan təmeiuaiu minə ron ik! In, neməha təmol pik, mətə-inun in titun məmə nian rəhan təkuəkir əm.”

¹³Nian ialkita asol u, təməplan məmə kinərakin-iarəp in tuwin e nətueintən, in tinatitəp pətan u itəm təmīləs nətīn iərman.

¹⁴Kən kəmos-ipən nīməlməli malikim kəiu kəm pətan u, məmə in otos miwig lan muwin əpəh ikin kəmol əpen-əpenə rəkis ikin taruən-aruən ikin. Ikin əh, otətatig ikin, kən in titagim o sinek, kən katehm wir in o taem kitəh, ne taem kəiu min, ne taem haf.

¹⁵Kən sinek u, təmeoa tahmen e naruəh asol kit, məmə otəu-təlīmin pətan u mīləs magim.

¹⁶Mətə nisip təmasitu e pətan u. Nisip təmoag kən mərge rafin nəhau itəm ialkita təmeoa-in e nipəgnoan.

¹⁷Kən əmun, ialkita un, neməha təmol təmol o pətan u, kən in tagim muwin məmə otəluagin ilat rəhan min neen noanol, ilat u itəm koatol nəwia Uhgın, kən moatətul əskasik o nən-iarəpən məmə ilat netəmim rəha Iesu Kristo.

¹⁸Kən in təmətul əpəh e niməkləkil itəhəi.

Nol Əpən 13

Nat megəh itəm təməhap nitəhəi mər

¹Kənu eməplan nat megəh asol kit təməhap nitəhəi mər. Rəhnipət ten, rəhn-kapə təmisim ilat sepin, kəməfauin-pən hat min rəha kig asol agin e rəhnipət min. Kən kəməte-pən nərgin itəm tətau-iərmis-in Uhgın e rəhn-kapə min.

²Nat megəh un eməplan, tahmen e wisi kəgin kit u, lepet, məto nelkin min kotahmen e nat megəh kit u, pea. Kən nıpəgnoan tahmen e laion. Kən ialkita u, təmos-ipən rəhan nəsanənən ne rəhan nərəmərən ne nepətən asol kəm nat megəh u.

³Rəhn-kapə nat megəh u kit, nat kit təmol, kən nəkəplan məmə tinatol pap o nimisən, məto tinəwir min. Kən əmun, netəmim rafin e nətueintən narmilat təmiwig pik ron, kən moatuarisig-in nat megəh un.

⁴Kən ilat rafin kəmotəfak kəm ialkita, məto-inu təmos-ipən nepətən rəhan kəm nat megəh u. Kən ilat kəmotəfak min kəm nat megəh u, kən motəmə, “?Pah in tahmen e nat megəh u? ?Pah titun nohən?”

⁵Kən kəmegəhan-in nat megəh u, məmə in otəghat ausit, mau-iərmis-in Uhgın. Kən kəmegəhan-in-pən nepətən kəm in, məmə titun nolən nat naka in tolkeike o məwig foti-tu.

⁶Kən in təmən nəghatən rat tepət e Uhgın, ne nərgin, ne netəmim itəm kotatig e nego e neai, ilat u, rəhan niməfak.

⁷Kəmos-ipən min nəsanənən kəm in, məmə otəluagin ilat netəmim rəha Uhgın, kən mol win elat. Kən kəmos-ipən min nepətən kəm in o nərəmərən e netəmim e noanol min rafin, ne netəmim nuwigilat pisin pisin min, ne netəmim e nəghatən min rafin, ne kantri min rafin.

⁸Netəmim rafin rəha nətueintən, okotəfak kəm nat megəh u, inəh, netəmim rafin itəm kəməsəteən nərgilat e Naoa rəha Nəmegəhən, nian nətueintən təmatikə əh. Naoa u, in naoa rəha Nəti Sipsip itəm kəməhamnu.

⁹Etəm matəlgin tatig, in otəkəike mətəlig-in wir.

¹⁰Okəmə suah kit otuwın e kalapus, pəs in otuwın əm. Okəmə okətamnu suah kit e nisa, pəs okətamnu əm in e nisa. Nəghatən u, nıpətın u məmə netəmim rəha Uhgın okotəkəike motol tiku, kən motahatətə əm e Uhgın.

Nat megəh itəm təməhap nisip mər

¹¹Kən əmun, eməplan min nat megəh kit min itəm təməhap nisip mər. Rəhnıpat kəiu tahmen e nəti sipsip kit, məto tatəghat, nəwian tahmen e ialkita kit.

¹²Nat megəh itəm rəhn-kapə sepın, tatos-ipən rafin rəhan nepətən kəm in, kən nian nat megəh itəm rəhnıpat kəiu tətətig ilau nat megəh rəhn-kapə sepın, in tatol nəwian. Kən nat megəh itəm rəhnıpat kəiu tatəkəike kəm netəmim rafin e nətueintən, məmə ilat okotəfak kəm nat megəh itəm təmaupən, itəm rəhn-kapə kit tinatol pap o nimisən məto tinəwir min.

¹³Kən nat megəh u itəm rəhnıpat kəiu, tatol nəmtətin asol min ne nat pispis min tepət, matig mol min nigəm tətisi-pər e neai, matuwa e nətueintən, matol e niganəmti netəmim.

¹⁴Uhgın təmegəhan-in-pən nəsanənən kəm nat megəh u itəm rəhnıpat kəiu, məmə titun nolən nəmtətin min nian tətətig ilau nat megəh rəhn-kapə ilat sepın. Kən in təmateiuə-in netəmim rəha nətueintən e nəmtətin min əh in təmol, kən mən-ipən kəm ilat məmə okotəkəike motətə narmin itəm kasgəwın nat megəh rəhn-kapə sepın, nat megəh u, itəm kəmaru pap rəhn-kapə e nisa, məto tatəmegəh.

¹⁵Kən Uhgın təmegəhan-in-pən nəsanənən kəm nat megəh itəm rəhnıpat kəiu, məmə otehag-pən e narmin itəm kəmasgəwın e nig, pəs təghat. Kən narmin itəm kasgəwın e nig un, təməghat, mən əskasik məmə okəike kohamnu netəmim rafin itəm kəsotəfakən kəm in.

¹⁶Kən in təmatəkəike kəm netəmim rafin məmə okotos mak kit rəhan e nelmilat matip o e nipinəgilat. Netəmim rafin aġin kotəkəike motos, ilat u, netəm-iasol min, ne netəm əpnapin əm, netəm rəhalat nautə tepət, ne netəm rəhalat nautə tikə, slef min, ne netəm sənəmə slef min, məmə okotos mak kit rəhan e nelmilat matip o e nipinəgilat.

¹⁷Okəmə etəm təsosən mak u, təruru nosən nəmti nat kit, ne nosalim-inən, mətoarus in təkəike mos mak rəhan. Mak un, in nərgi nat megəh itəm rəhn-kapə ilat sepın, o nampa itəm tatəpsen-pən nərgin.

¹⁸O nat u, onakəkəike mos nenatigən tepət o nitunən nampa rəha nat megəh u. Kən okəmə ik nakenatig tahmen, kən nəkitun nənən nipətin. Kən nampa u, in sikis-hanrit-sikiste-sikis, kən in tatəpsen-pən etəmim kit.

Nol Əpən 14

Nəti Sipsip ne netəmim wan-hanrit-foti-fo-taosan

¹Kən əmun, ekətag-pən əpəh aypən-in io məplan Nəti Sipsip tatətul-pər əpəh e Nitot Saeon, kən wan-hanrit-foti-fo-taosan netəmim koatətul ilat min. Kən kəməte-pən nərgi Nəti Sipsip ne rəhan Tata e nipinəgilat.

²Kən ekəto nat kit əpəh ilis e nego e neai tətəgət, nəwian tahmen e nitəhəi tatem nonahluəluə, kən mahmen min e kaluəluə titatiperəh, kən ekəto tahmen min e nəwia hap tepət, netəmim koatoh.

³Kən ilat koatan napuən wi kit əpəh aypən e jea rəha kig, ne nat koatəmegəh kuwit, ne netəm-iasol itəm kəmos nəwiətən min. Suah kit təsitunən napuən əh, netəm min əm un ilat wan-hanrit-foti-fo-taosan itəm Uhgın təmos-nəmtin ilat, mos-irəkis ilat e nətueintən. Netəm min əm un ilat əh, ilat kotitun nanən napuən əh.

⁴Netəm min u ilat u, itəm kəmotehm wir rəhalat nəmegəhən, məmə namkimik tikə elat, kən ilat kəməsotitən pətan, ilat netəm wi. Ilat koatuarisig-in Nəti Sipsip u, moatuwin ikin min rafin itəm in tatuwin ikin. Uhgın tinos-nəmtin rəkis netəm min əh. Ilat rəha Uhgın əm, ne Nəti Sipsip u.

Ilat kotahmen e nagwənən itəm kəməfak-in wi əm e nasumən, itəm katos-
ipən kəm Uhgīn ne Nəti Sipsip.

⁵Ilat kəsoteiuəən nian kit ne, kən nat əkəku kitiaħ ne tikə məmə tatol ilat
kotamkimik e niġanəmti Uhgīn.

Nagelo kisil

⁶Kən əmun ekatig məplan min nagelo kit min, tatiwig əpəħ ilis e magoagəp.
In tatən-iarəp namnusən təwir itəm tətatig tətatig namnun tikə kəm netənim
rəha nətueintən, e kantri min rafin, e noanol min rafin, ne nəghatən min
rafin, ne netənim nuwigilat tol pišin pišin min.

⁷In tatən əfəməħ məmə, “Otəġin motisiai-in Uhgīn, kən motən nipahrienən e
rəhan nepətən, məto-inun nian ətuatip rəhan tinuwa, o nos-ipənən nalpinən
kəm netənim. Otəfak kəm in, etəm təmol nego e neai, ne nətueintən, ne
nitəħəi, ne nəmti nəhau min.”

⁸Kən nagelo kit min, itəm tatol nampa tu lan, tatətəu-pən matən məmə,
“!Papilon təməme! !Papilon təməme! !Papilon Əsanən Nahgin Terət təməme,
meiuaiu! In tahmen e pətan e suatip itəm təmiuw-pa nəman e kantri min
rafin kotuwa motənim wain ilat min. Wain u niimin, inun, nitəpən nalmələn
min, məkəike kəm netənim məmə koatol nolən rat ilat min. Kən nian nəman
kotənim wain u, ilat koatiuw-pa neməha rəha Uhgīn olat.”

⁹Kən nagelo kit min, itəm tatol kisil lan, tatuarisig-in ilau, kən matən əfəməħ
məmə, “Okəmə suah kit təfak kəm nat megəħ rəhn-kapə ilat sepīn, ne narmin
itəm kəmasgəwin e niġ, kən matos rəhan mak e niḡinəġin o nelmin,

¹⁰kən in təike mənim min wain u inu, in neməha rəha Uhgīn. Wain u inu,
kəməsəgələkləkən e nəhau. In otəto nahməən e niġəm ne noanəwiwə itəm
tatuəp okiaus in əpəħ e niġanəmti nagelo asim min ne Nəti Sipsip.

¹¹Kən nəhaniəm rəha niġəm itəm tatus ilat matol nahməən kəm ilat u, in tatər
nian rafin, namnun tikə. Netəm min un itəm kotəfak kəm nat megəħ rəhn-
kapə ilat sepīn ne narmin itəm kəmasgəwin e niġ, kən motos mak rəha
nərgin, ilat okəsotamegən e nərauiəgən ne lapin.”

¹²Nəghatən u, nipətīn u mēmə netəmim rəha Uhgīn itəm koatətəu-pən nəwia Uhgīn, kən moatahatətə e Iesu, ilat kotəkəike motətul əskasik.

¹³Kən əmun eməto nəwian kit təmisi-pər e nego e neai matən mēmə, “Əte rəkis nat u: roiu ne matuwīn, netəmim rəha Iərəmərə, mətə okəmə okotimis, ilat okotatig e nəwirən pahrien.” Kən Narmin Rəha Uhgīn tēmə, “!Əwəh! Ilat okotameg e rəhalat wək, mətə-inu okotos noa rəhalat wək mīn.”

Nəulək-inən netəmim e nətueintən

¹⁴Emətag-pən mīn əpəh aupən-in io məplan malnapuə kit tərūən, kən suah kit tatəpələh-pər e malnapuə un. Suah un, tahmen e Nəti Etəmim. In tatəfauin kraun kit, inu hat rəha kig, kəmol e iaen u kol tatipit-īpit, kən matiləs naip eko kit itəm tasilə.

¹⁵Kən əmun nagelo kit mīn təmisi-pən əpəh e Nimə Rəha Uhgīn muwa, kən maun-in əfəməh suah u, tatəpələh-pər e malnapuə mēmə, “Os rəham naip eko mos muwīn məulək, mətə-inu nian rəha nəuləkən tinuwa, kən nagwənən əpəh e nətueintən tinimətə.”

¹⁶Kən əmun suah u itəm tatəpələh-pər e malnapuə, təmurin-ego-in nətueintən e rəhan naip eko, kən məulək-in netəmim e nətueintən, tahmen e nagwənən itəm tinimətə o nosən.

¹⁷Kən nagelo kit mīn təmīet e Nimə Rəha Uhgīn əpəh e nego e neai. In tatiləs mīn rəhan kit naip eko itəm tasilə.

¹⁸Nagelo kit mīn, itəm tatos nepətən rəha nigəm e olta, təmisi-pən əpəh e olta, kən maun-in əfəməh nagelo itəm tatiləs naip eko mēmə, “Ləs rəham naip eko un, muwīn e nətueintən, kən mətə rəkis netəmim itəm kotahmen e noa krep marəg u tipilpīl mīn, əpəh e nəukətīn. Nətueintən tahmen e nəukətīn.”

¹⁹⁻²⁰Tol nəhlan, nagelo un təmoahin rəhan naip eko, tuwīn e nətueintən, kən mətə rəkis netəm mīn un itəm kotahmen e noa krep itəm tinəmarəg rəkis. Kən in təmərakin-pən ilat kotuwīn ikin asol əh itəm kateguarin-eguarin noa krep mīn ikin, mēmə nahuilat otaiəh. Ikin əh, in ihluə e taon, Uhgīn tatos-

iarəp rəhan neməha, kən matol nalpinən ikin kəm netəmim. Kən kateguarin-eguarin netəm min u, kən nitalat itəm titaiəh mətaiu ikin əh, in tahmen e nəhau asol kit nəfəməhən rəhan tahmen e tri hanrit kilomita, kən lokamnīm lokamnīm. Okəmə hos kit tiwig-pən ikin, nita titun nərən mek nohlin.

Nol Əpən 15

Netəmim rəha Uhgın kəmotənwiwi in

¹Ekətag-pən əpəh e nego e neai məplan min nəmtətin kit min itəm tatuha-pispis lak. Nagelo ilat sepın koatos namnu nalpinən min, ilat sepın. Nalpinən min əh, ilat koatol neməha apiəpiə rəha Uhgın tol namnun lan.

²Kən əmun, eməplan nat kit tahmen e nitəhəi, məto kəmol e klas ne nigəm pıləh-pıləh, kən netəmim neen koatətul e nikalkal nitəhəi u, ilat un netəm kəmotəmou ilat nat megəh rəhn-kapə sepın ne narmin itəm kəmasgəwin e nig, kən kotol win elau, ne nampa itəm tatətul o nərgin. Kən Uhgın təmos-ipən hap min kəm ilat,

³kən koatoh, motan napuən rəha Nəti Sipsip ne Moses u, iolwək rəha Uhgın, koatan məmə, “İərəmərə Uhgın Nahgim Təpət PİK Agın Rəham nolən asol min kotatuhə-pispis etimat. !Kig lilin, nolən min rəham kotətuatip pahrien!

⁴?Pah otəsaginən ik, İərəmərə?

?Kən pah otəsos-ipənən nənwiwiən o nərgəm? Məto-inu ik pisin əm nakasim. Netəmim e kantri min rafin okotuwa kən motəfak e niganəmtim, məto-inun nəmol-arəpa rəham nolən ətuatip min.”

⁵Kəmotan rəkis napuən u, emətag-pər e nego e neai, məplan kəmerəh-pən İkin Uhgın Tətətig İkin, inu, Nimə Tapolən rəha Uhgın.

⁶Nagelo ilat sepın kəmotiet e İkin Uhgın Tətətig İkin, koatos nalpinən min ilat sepın. İlat kotuwın e napən wir u, linen, itəm tatipit-ipit, kən kəməlis manikiləhalat e kətəut itəm kəmol e iaen u kol tatipit-ipit.

⁷Kən əmun, nat koatəmegəh un ilat kuwit kit təmos-ipən pesin min itəm kəmol e iaen u kol tatipit-ipit, ilat sepın, kəm nagelo min u sepın. Pesin min u, kotərioah e neməha rəha Uhgın u, itəm tətətig lilin.

⁸Kən nəhaniəm təmirəfin İkin Uhgın Tətətig İkin, nəhaniəm-in nepətən əhag-əhag rəha Uhgın ne nəsanənən rəhan, kən okol suah kit təsuwinən əh imə e İkin Uhgın Tətətig İkin mətoarus nalpinən min ilat sepin itəm nagelo sepin koatəmik, okotol namnun.

Nol Əpən 16

Pesin ilat sepin, kəmotərioah e neməha rəha Uhgın

¹Kən əmun, eməto nəwian kit təmagət əfəməh əpəh e İkin Uhgın Tətətig İkin, matən-ipən kəm nagelo min u sepin məmə, “Otuwin, motəhtəg-iarəp e nətueintən pesin ilat sepin itəm kəmotərioah e neməha rəha Uhgın.”

²Nagelo itəm tətaupən, təmuwin məhtəg-iarəp pesin rəhan e nəptən. Kən əmun, netəmim itəm koatos mak rəha nat megəh rəhn-kapə ilat sepin, kən moatəfak kəm narmin itəm kəmasgəwin e nig, niməgəm təmirəfin nipətilat.

³Kən nagelo nampa tu, təməhtəg-iarəp rəhan pesin əpəh itəhəi. Kən nitəhəi təmol nita lan, tahmen e nita etəm təmimis. Kən nat itəhəi min rafin kəmotimis.

⁴Kən nagelo nampa tri, təməhtəg-iarəpən rəhan pesin e nəmti nəhau min ne nəlugi nəhau min, kən ilau kueia mioal nita elau.

⁵Kən əmun eməto nagelo itəm tərəmərə e nəhau min təmə, “İk pisin əm ik Uhgın, nakətuatip, ik un itəm nəkətətig kən nəmətətig, kən tətətuatip əm məmə onəköl nalpinən kəm ilat nəhlan.

⁶Rəhalat atip əm, məto-inun ilat kəmotiu nita rəham netəmim min ne ien min, kən ik nakos-ipən nita nimilat məmə okotənim.”

⁷Kən ekəto min olta tətəgət əfəməh məmə, “!Əwəh! İərəmərə Uhgın Nahgin Təpət PİK Agin, rəham nəghatən nəmuəh netəmim lan, in tətətuatip agin, kən nipahrienən.”

⁸Kən əmun, nagelo nampa fo, təhtəg-iarəpən rəhan pesin e mitgar, kən kəmos-ipən nəsanənən kəm mit məmə otəhg netəmim tahmen e nigəm.

⁹Kən nэгəpanən təmus ilat, kən kotau-iərmis-in nərgi Uhgín, itəm in tatəramərə e nalpinən min u, məto ilat kotapəs nəuhlinən nətəligən rəhalat, kən motisiai-in rəhan nepətən.

¹⁰Kən nagelo nampa faif təhtəg-iarəpən rəhan pesin əpəh nat megəh tatəramərə ikin, kən əmun, ikin min rafin in tatəramərə ikin in təmapinəp. Kən netənim koatəto nahməən, moatus namilat motoatip-oatip.

¹¹Kən ilat motau-iərmis-in Uhgín əpəh e nego e neai o nahməən min ne niməgəm min rəhalat, məto ilat kəməsotəuhlinən nətəligən rəhalat o nat itəm kəmotol.

¹²Kən nagelo nampa sikis, təməhtəg-rəkis rəhan pesin əpəh e nəhau asol, nərgin u, Iufretes, kən əmun nəhau təmamir mol suatip rəha kig min kotaliwək lan moatisi-pah.

¹³Kən əmun, ekəplan min narmin rat kisil kəhalahmen e pirok. Kit təmiet e nipəgnoa ialkita, kit tiet e nipəgnoa nat megəh rəhn-kapə ilat sepín, kən kit tiet e nipəgnoa ien eiueiuə.

¹⁴Iləhal narmi iərmis min, itəm koatol nəmtətin min, kən iləhal kəhaliet mətəhaluwín o kig min e nətueintən rafin, məhaluəfimin ilat məmə okotəluagin e Nian Asol rəha Uhgín Nahgin Təpət Pík Agin.

¹⁵Kən Iesu təmən məmə, “!Ətag-pa-tu! !Iatuwa tahmen e iakləh! Etənim itəm təsapilən mətair, məsapəgən rəhan natimnat o napilən məmə in otəsaipiəriəən kən maulis ron, in otatig e nəwirən pahrien.”

¹⁶Kən ilat kəmotargətain rafin kig min əpəh ikin kit, katən e nəghatən rəha netəm Isrel, məmə, “Amaketon.”

¹⁷Kən namnun nagelo itəm in nampa sepín, təməhtəg-rəkis-pən rəhan pesin əpəh e nimagoagəp, kən əmun əpəh e Ikin Uhgín Tətatig Ikin, nəwian asol kit tisi-pən əpəh e jea rəha kig məmə, “!Tinol namnun!”

¹⁸Kən əmun təmatipit, kəməto nagətən asol, kən kaluəluə təmatiperəh-atiperəh, kən namig asol təməloal e nəptən. Namig u, in iahgin iahgin, kəsəplanən namig kit iahgin tol nəhlan nian kit.

¹⁹Kən taon asol tēməhap məsin kisil, kən taon min e kantri min rafin kəmotisas motol nat tikə elat. Uhgın, nikin tēməht nolən rat min rəha Papilon Asol, kən tos-ipən panikin itəm tərıoah e wain e neməha rəhan, tēməkəike kəm in məmə otənim rafin agin.

²⁰Nəptən əlkələh min rafin kəmahin rəkis ilat, kotikə, ne nitot min, kisəplan minən kit.

²¹Ais u itəm tahmen e kəpiel asol koatısı-pən e malnapuə, kəmotisas-pən e netəmim. Ais u, kitıəh əm tahmen e fite kilo, kən netəmim kəmotau-iərmis-in Uhgın o nahl-ipa-mən ais itəm təmatısas-pən elat, məto-inu nalpınən u in tərət tərət agin.

Nol Əpən 17

Pətan ionəhan tərət agin

¹Kən əmun, nagelo sepın min u kit itəm kəmoatəmik pesin ilat sepın, təmuwa mən-ipa kəm io məmə, “Wa-tu, pəs ekəgətun kəm ik nalpınən rəha pətan ionəhan tərət agin, itəm tatəpələh-pən e nəhau tepət.

²Pətan əh, kig min rəha nətueintən ilat kəmoatit, kən netəmim rəha nətueintən ilat kəmoatənim nımın wain, moatapis ilat min kən moatit.”

³Kən nəsanənən rəha Narmin Rəha Uhgın təmol kəm io, kən nagelo təmit-irəkis io ekian əpəh ikin taruən-aruən ikin. Kən ikin əh, eməplan pətan un tətəsüə-pər e məntaa nat megəh asiə kit. Kəməte-pən nərig min itəm tatən rat Uhgın, tırəfin nıpətin, kən rəhn-kapə təmisim ilat sepın, kənu rəhnıpat ten.

⁴Pətan un, tatuwın e napən itəm tol nəgui-naris ne tasiə, in təmol malə-malə e nıpətin, tətənin noanat ne iarig, itəm kəmol e iaen u kol tatıpıt-ıpıt, ne kəpiel itəm nəmtin tiəkis, ne nat kit təwir pık u, perel. Kən in tatos panikin kit e nelmin, itəm kəmol e iaen u kol tatıpıt-ıpıt, kən tərıoah e nat tərət min, itəm kotamkimik agin e niganəmti Uhgın, kən ilat un, noa nolən rat rəhan.

⁵Kən inəh e nıpınəgin, kəməte-pən nərig kit əh-ikin, itəm nıpətin tatəhluaig u, tatən məmə, Taon Əsanən Nahgin Tepət u Papilon. In iti nıpitan ionəhan min rafin. Kən in nəukəti nolən nat kotamkimik agin min.

⁶Kən ekəplan məmə pətan u, in tinapis e nita netəmim min rəha Uhgın, nita netəm kəmotətul-arəp o nən-iarəpən Iesu. Nian eməplan, kən narmək təmiwig təmiwig.

⁷Kən əmun nagelo təmən-ipa kəm io məmə, “?Narməm tatiwig nulan o naka? Io ekuhapik e nəghatən anion e pətan u ne nat megəh itəm tətəsüə-pər lan, itəm rəhn-kapə təmisim ilat sepın kən rəhnıpat ten.

⁸Nat megəh itəm nəməplan, təmətatig, kən təsatigən roiu, kən otəsüwəhən otər e nıpəg asol itəm teiuaiu agın, kən tinətaiu matuwın məmə Uhgın otərəkin. “Kən netəmim rəha netueintən itəm kəməsəteən nərgilat e naoa rəha nəmegəhən, ilat, narmilat otiwig pik nian okotəplan nat megəh u, məto-inu aupən in təmatəmegəh, məto təsatigən roiu, məto in otiet-arəpa min.

⁹“Etəmim otəkəike mos nenatigən o nıtunən nıpəti nəghatən u. Rəhn-kapə nat megəh u, ilat sepın, koatəpsen-pən nitot min itəm pətan əh tatəpələh-pər elat.

¹⁰Koatəpsen-pən min kig ilat sepın. Kig faif ilat kinotiet rəkis, kitiəh tatəmegəh roiu, kən kit min təsüwamən əh. Məto nian tuwa, in otəkəike mətatig o nian təkuəkir əm.

¹¹Nat megəh u itəm təmətatig, kən roiu in təsatigən, in min in kig kit, itəm tatol nampa eit lan, məto in min in kig kit rəha kig min u ilat sepın, kən tinətaiu matuwın məmə Uhgın otərəkin.

¹²“Rəhnıpat ilat ten itəm nəməplan ilat, koatəpsen-pən kig ilat ten, itəm ilat kəsotosən əh nərəmərəən rəhalat. Məto ilat okəpanotos nepətən məmə ilat kig min, motərəməre ilat nat megəh, məto o nian təkuəkir əm.

¹³Nətəligən rəhalat kitiəh əm o nos-ipənən rəhalat nəsanənən ne nepətən kəm nat megəh.

¹⁴Ilat okotəluagin ilat Nəti Sipsip, məto Nəti Sipsip otol win elat, məto-inu Nəti Sipsip in İərəmərə rəha İərəmərə min, ne Kig rəha kig min. Kən in otuwa ilat min netəm min u, təmitəpun ilat, kən ilat koatətul əskasik e rəhalat nahatətən.”

¹⁵Kən əmun, nagelo tən-ipa min kəm io məmə, “Nəhau min u nəməplan, itəm pətan ionəhan tatəpələh-pər lan, tatəpsen-pən netəmim nuwigilat tol pisin pisin, nimanin netəmim, kantri min, ne nəghatən pisin pisin min.

¹⁶Nat megəh ne rəhniapat ilat ten itəm nəməplan, ilat okotetəhau pətan ionəhan u. Kən ilat okotərəkin in, motol nat ruən lan, taiu piəpiə. Ilat okotun noanuwəhgin kən motan-ətip nipətin e nigəm.

¹⁷Okotol nəhlan, mətə-inu Uhgīn təmələhəu-pən nat u e nīkilat, məmə okotol nətəligən rəhan, kən mol nīkilat kitīəh əm o nos-ipənən rəhalat nəsanənən kəm nat megəh, məmə in otərəmərə, mətəarus nəghatən rəha Uhgīn tuwa mol nīpahrienən.

¹⁸“Pətan əh natəplan, in taon nahgin tepət itəm tatərəmərə e kig min rəha nətueintən.”

Nol Əpən 18

Papilon təməme

¹Uarisig e natimnat min u, eməplan nagelo kit min təmisi-pər e neai. In tatos nepətən asol, kən in tətasiəgəpīn rafīn nətueintən e rəhan nəhag-əhagən.

²Təməmərīt əfəməh e nəwian kit itəm iahgin, məmə, “!Təməme! !Papilon Əsanən Nahgin Tepət təməme! İərmis min kinotuwa kətatiğ ikin. In noanipirasig rəha narmin rat min. In noanipirasig rəha mənig rat min, kəsonən, itəm kotamkimik e niganəmti Uhgīn.

³Mətə-inun kantri min rafīn kinotapis e nīmīn wain u, nitəpən nalmələn, moatit in. Kig min rəha nətueintən kəmoatit min, kən netəm koatol-salim-in natimnat min e nətueintən, rəhalat nautə nepət rəkis e rəhan nolən itəm tətaumis o natimnat rəhan.”

⁴Kən əmun emətə nəwian kit min e nego e neai təmə, “Otiet rəkis lan, rəhak netəmim, məmə rəhan nolən rat otəsīləs pikənən itəmat, kən itəmat onəsotosən rəhan kit nalpīnən,

⁵mətə-inun in təmərgətāin rəhan nolən rat tər iuəhkīr əm tatek neai, mol Uhgīn təsaluinən rəhan nolən rat min.

⁶Otalpīn nītai nat tahmen itēm in tēmōl kēm rēham netēmim. Otos-ipēn rēhan nētouēn mau kēiu. Otiuw rēkis nīmīn wain itēm in tarīp mēskasik, rēhan nēsanēnēn tepēt maprēkis-in itēm un itēm in tēmatos-ipēn kēm ilat.

⁷Pētan un, tēmatos-ipēr atīp in, matēto tēwir e nautē rēhan, mēto roiu ēh, os-ipēn nētouēn rēhan e nahmēn ne nasākēn, mēto-inu tatēghat ausit e nīkin matēn mēmē, ‘Io kwīn kit. Ikīn-u iatēpēlēh, matērēmērē. Sēnēmē io nētahlīmīs. Okol esasākēn nīan kit.’

⁸O nausitēn u rēhan, rēhan nalpīnēn mīn otīlēs in o nīan kitīēh ēm. In otatīmīs, matēto tērat, mētāsāk. Kēn in otatīg e nīan iākīs o nosēn nagwēnēn, kēn nīgēm otus in, mēto-inun Iērēmērē Uhgīn un, nahgīn tepēt, in tatos-ipēn rēhan nalpīnēn.”

⁹“Kēn nīan kīg mīn rēha nētueintēn itēm kēmoatit kēn moatos kēlēh nautē mīn rēhan, kotēplan nēhaniēm e nīgēm itēm tatus, kēn ilat okotasāk, motēto tērat ron.

¹⁰Rēhan nahmēn otol ilat kotēgīn, kēn motētul-pēn ēm isēu moatēn mēmē, ‘!Kēsi! Kēsi o taon asol! !Awe, Papilon, taon itēm tēmatēsanēn pīk! Mēto roiu agīn-ēh huē, kēmau kitīēh ēm lan, in tīnatos rēhan nalpīnēn!’

¹¹“Netēmim koatol-salīm-in natīmnat e nētueintēn, ilat mīn okotasāk motāsāk o pētan u, mēto-inu etēmim kit mīn tikē o nosēn nēmtīn rēhalat natīmnat.

¹²Suah kit mīn otēsos-nēmtīnēn iaen u kol tatīpīt-ipīt, ne silpa, ne kēpiel wīr mīn ne perel rēhalat, kēn suah kit otēsos-nēmtīn mīnēn napēn wīr u linen, ne napēn u itēm tol nēgui-naris ne napēn wīr u silik, ne napēn u itēm tasiē tasiē, itēm nēmtīlat tiākīs agīn. Etēmim otikē o nos-nēmtīnēn nīg pīsīn pīsīn mīn itēm koatēpien wīr, ne natīmnat mīn itēm katol e nēlui elēfen, ne nīg mīn itēm nēmtētīn tiākīs agīn, ne pīrons, ne iaen, ne kēpiel wīr kit u, mapīl.

¹³Etēmim otikē o nos-nēmtīnēn nat nēmiēwīlat tatēpien wīr mīn, inu sinamon, ne senta, ne insens, ne frankinsens, ne fomat u mīr. Netēmim otikē o nos-nēmtīnēn wain ne oel ne flaoa ne wit rēhalat. Kēn etēmim otikē mīn o

nos-nəmtinən kau min ne sipsip ne hos ne kat, ne slef min rəhalat, inu netəmim.

¹⁴“Kən netəm rəha nol-salim-inən natimnat min, ilat okotasək pik, nikilat tahmə. Ilat okotən məmə, ‘Noa wək asol min rəham itəm ik rəham nətəligən təmuwin pik lan, kən nəmatol, ilat kinotagim kapəs ik. Rəham nautə min ne malə-malə min rəham kinotagim, okol nəsos minən ilat.’

¹⁵Netəm koatol-salim-in natimnat min rəhalat kəm pətan u, moatos nautə asol min lan, ilat kotətul-pən isəu ron, motasiəp o rəhan nahməən. Ilat nikilat otahmə kən kotasək motasək əfəməh,

¹⁶motəmə, “!Awe, kəsi! Taon əsanən itəm təmuwin e natimnat wir min u linen, itəm tol nəgui-naris ne tasiə ne, kən matol malə-malə e nīpətīn tətəanin noanat ne iarig, itəm kəmol e iaen u kol tatipit-ipit, ne kəpiel min nəmtin tiəkis, ne nat wir min u perel ne.

¹⁷Məto roiu agin-əh huə, kəmau kitīəh əm lan, kəmərəkīn rafin nautə asol min rəhan.’ “Kən əmun netəm koatīləs nego min rafin, netəm koataliwək e nego, ne kīru min rəha nego, ne netəmim rafin itəm koatos mənī rəhalat o natīgən e nərpi nitəhəi, ilat okotətul-pən isəu ron.

¹⁸Nian kotəplan nəhaniəm lan tatuəp, kən ilat okotəmə, ‘!Kəsehmen taon kit təsanən tahmen e taon asol u!’

¹⁹Kən ilat okotatip rəhalat-kapə e nīmoulul, tatəpsen-pən məmə nikilat titahmə, kən motasək pik məmə, “!Awe, kəsi! !Taon asol u itəm netəmim rafin itəm koatos nego min itəhəi ilat rəhalat nautə təməpət e rəham natimnat! Məto roiu agin-əh huə, kəmau kitīəh əm lam, kəmərəkīn agin ik.’

²⁰“!Məto itəmat e nego e neai, itəmat netəmim rəha Uhgīn, ne aposol min ne ien min, itəmat nikitəmat təike magien, məto-inu Uhgīn təmətu rəkis neim otəmat mələhəu-pən o pətan u!”

²¹Kən əmun, nagelo əsanən kit təmīləs kəpiel asol kit, matipin-pən e nahgin rafin əpəh itəhəi, kən məmə, “Kəmərakin-pən nəhlan Papilon Əsanən Nahgin Təpət əpəh itəhəi. Kən okol in təsətul minən.

²²Kən okol kəsəto minən nəwiali hap min ne napuən min, ne nəwiali nahlən nau ne təwi u ikin-u. Etənim rəha nalpəkau wirən e natimnat otikə ikin-u, kən okisəto minən natərkərikən rəha kəpiel min itəm kotalkin wit katol flaoa lan.

²³Nəhag-əhagən rəha lait min okol kəsotasiə minən, kən okol kəsəto minən nəwia pətan ne iərman itəm kətioal nəniəkisən rəhalau e nian rəha marit, mətə-inu aupən, netəm koatol-salim-in natimnat rəham, ilat koatol win e nətueintən rafin, kən ik natagwən asim netənim e kantri pisin pisin min məmə kotuwa o rəham nərəmərən, e nolə masig rəham.

²⁴“Taon asol u Pabilon in təmos nalpinən mətə-inun kəmatiu nita ien min ne netənim min rəha Uhgīn ikin min rafin e nətueintən. Nipahrienən, nita netənim rafin itəm kəmoħamnu ilat, in tətatiġ e taon asol u.”

Nol Əpən 19

Netənim ilis e nego e neai kəmotəniwiwi Uhgīn

¹Uarisig e nəġhatən rəha nagelo əh, ekəto nəwiali nat kit tahmen e netənim tepət tepət kotagət əfəməh əpəh e nego e neai, moatən məmə, “!Pəs kotəniwiwi İərəməərə! !In Uhgīn u, təmosmegəh kitat! Nepətən əhag-əhag ne nəsanənən in rəhan pisin əm,

²mətə-inu nakilən rəhan in tətuatip pahrien. Rəhan nəġhatən tinuəh rəkis pətan ionəhan u, itəm təmit ənapin netənim, kən tinətəlpin nita rəhan iolwək min.”

³Kən kəmotagət əfəməh min motəmə, “!Pəs kotəniwiwi İərəməərə Uhgīn! Nəhaniəm e niġəm itəm tatus pətan u, tatər tatər namnun tikə.”

⁴Netəm-iasol itəm kəmotəwiətən min ilat tuente-fo, ne nat koatəmegəh ilat kuwit, kəmotisin nulilat kəm Uhgīn. Ilat kəmotəiuaiu, nipinəġilat taru nisip, motəfak kəm in, itəm tatəpələh-pər e rəhan jea, matərəməərə. Kən ilat motəmə, “!Əwəh! !Pəs Kotəniwiwi İərəməərə!”

Marit rəha Nəti Sipsip

⁵Kən əmun, nəwian kit təmisi-pən əpəh e jea rəha kig, matən məmə, “!Otənwiwi Uhgin rəhatat! !Itəmat rəhan iolwək min rafin, otənwiwi in! !Itəmat u, noatisiai-in, moatəgin Uhgin, otənwiwi in! !Nat əpnapin okəmə itəmat noatos nepətən asol min, o netəm əpnapin əm, mətə otənwiwi Uhgin!”

⁶Kən əmun emətə nəwia nat kit tahmen e netəmim tepət koatagət, kən mahmen min e nitəhəi tatem nonahluəluə, ne kaluəluə titatiperəh-atiperəh motəmə, “!Pəs kotənwiwi Iərəmərə! Mətə-inun Iərəmərə Uhgin rəhatat, Nahgin Tepət Pík Agin, in tinatərəmərə.

⁷Pəs nikitat tərīoah e nagienən, kən motən nīpahrienən e rəhan nepətən, mətə-inu tinuwa e nian ətuatip rəha marit rəha Nəti Sipsip. Kən rəhan pətan tatətul matip matəsahgin əm.

⁸Kən Uhgin təmos-ipən napən wir kəm in, məmə otuwīn lan. Napən wir u linen, tatipit-ipit, məruən.”

(Napən wir u linen, tatəpsen-pən nolən ətuatip rəha netəmim rəha Uhgin.)

⁹Kənu nagelo u, tən-ipa kəm io məmə, “Əte rəkis natimnat min u. ‘Netəm min un itəm kəmaun-in ilat məmə okotuwīn e nagwənən rəha marit rəha Nəti Sipsip, ilat okotatig e nəwirən pahrien.’” Kən matig mən min məmə, “Nəghatən min u, ilat nəghatən pahrien rəha Uhgin.”

¹⁰Təmən nəhlan, kən emisin nulik e nelkin, meiuaiu, nīpīnəgək taru nisip, məmə ekəfak kəm in. Mətə in tən-ipa kəm io məmə, “!Əsəfakən kəm io! Kilau min ik iolwək mil əm, kitat piam min itəm ilat kotətul əskasik o nən-iarəpən namnusən təwir rəha Iesu. Əfak kəm Uhgin əm, mətə-inu nətul-arəpən rəha Iesu, in nəukətīn nəghatən min rəha ien min.”

Etəm təmasuə-pər e hos kəruən

¹¹Kən əmun ekəplan nego e neai təmerəh, kən məplan hos kəruən kit. Etəm tətəsuə-pər lan, nərgin un, “Etəm Kitun Nahatətə Əskasikən Lan, kən in Nīpahrienən.” In tatəmou, kən matos-ipən nalpīnən kəm netəmim e nolən itəm tətətuatip əm.

¹²Niganəmtin tahmen e nəmnamin nigəm, kən kəməfauin-pən hat tepət tepət e rəhn-kapə, hat min u, ilat hat min rəha kig asol agin. Kəməte-pən nərgin kit lan, məto suah kit təsitunən nərgin əh, in pisin əm titun.

¹³In tatuwin e napən kit itəm kəmeer e nita, kən nərgin un, Nəghatən Rəha Uhgın.

¹⁴Kən mopael min rəha nego e neai koatuarisig-in. Ilat rafin koatəpələh-pər e hos kəruən min, kən moatuwin e napən wir u, linen, təruən məwir.

¹⁵Suah un, rəhan kit əh-ikin naip itəm tatisi-pən e nıpəgnoan. Kən in otətamnu netəmim e kantri min e naip əh. “In otərəməərə elat, kən nəmtətin rəha nepətən u, in nəlnal itəm kəmol e iaen.” In otol təskasik agin kəm ilat, tahmen əm mə katol e noa kirep min itəm netəmim kəmoteguarin-eguarin məmə nahuin otaiəh kən kol wain lan. Nələn əh inəh, Uhgın Nahgin Tepət Pık Agin tatol-arəp rəhan neməha pık.

¹⁶Kəməte-pən nərgin e rəhan napən, ne nuwaan, məmə, Kig Rəha Kig Min Ne İərəməərə Rəha İərəməərə Min

¹⁷Kən əmun ekətag-pən məplan nagelo kit tatətul-pən e mitgar, in tətəsək əfəməh matən-ipən kəm mənig min itəm koatiwig əpəh e magoagəp, məmə, “Otuwa, motargətəin itəmat min o nagwənən asol rəha Uhgın,

¹⁸məmə itəmat onəkoton noanuwəhgi kig min, ne netəm-iasol rəha mopael min, ne netəm nahgilat tepət, ne hos min, ne netəm koatasuə-pər elat, ne noanuwəhgi netəmim rafin, netəm sənəmə slef, ne slef min, netəm koatos nepətən asol min, ne netəm ənnapin əm.”

¹⁹Kən əmun, ekatig məplan min nat megəh əpələ in, ne kig min rəha nətueintən ne rəhalat mopael min. Ilat kəmotargətəin ilat min məmə okotəluagin ilat etəm titasuə e hos kəruən, ne rəhan mopael min.

²⁰Məto kəmotaskəlīm nat megəh əh, ne ien eiuə-eiuə itəm təmatol nəmtətin pispis min nian təmətatig ilau nat megəh. In təmatol nəmtətin min əh, o neiuə-inən netəm min u itəm koatos mak rəha nat megəh, kən motəfak kəm

narmin itəm kəmasgəwin e nig. Kəmotərakin-pən ilau kərən katuəmegəh əm, əpəh e nīpəgnoa nəmnamin nīgəm asol itəm təgəpan matuəp matəpien.

²¹Etəm tītatasuə e hos kəruən, təmoħamnu kig min ne mopael min rafin e naip rəha nəluaginən itəm tātisi-pən e nīpəgnoan kən mənig min rafin kəmoton nīpətīlat, moton, nərpīlat tasis wir.

Nol Əpən 20

Kristo təmuwa mol Kig kən mərəmərə e netəmim mətoarus-pən nup wan-taosən

¹Kən əmun, eməplan nagelo kit tātisi-pər e nego e neai, tatos ki rəha nīpəg asol itəm teiuaiu agin, ne sen asol kit.

²Kən in təmaskəlīm ialkita asol u, sinek nuwəh ilouin aupən, in Iərmis, o Setan, kən məlis ətain o nup wan-taosən.

³Təmərakin-pən in e nīpəg asol itəm teiuaiu agin, kən mahtosiġ-in tiəkis, məmə in otəseiuə-in minən netəmim rəha kantri min mətoarus-pən nup wan-taosən tol namnun. Nup wan-taosən otol namnun un, okəike kerəh min lan o nian əkuəkīr min əm.

⁴Kən əmun, eməplan jea rəha kig min neen, kən netəmim itəm koatəpələh-pər elat. Uhgīn təmos-ipən nepətən kəm ilat məmə ilat okotakil netəmim. Kən ekəplan min netəmim itəm kəmətatiṗ nentoulāt məto-inu kəmotətul-arəp o nən-iarəpən namnusən təwir rəha Iesu ne nəghatən rəha Uhgīn. Ilat kəməsotəfakən kəm nat megəh ne narmin itəm kəmasgəwin e nig, kən məsotosən rəhan mak e nīpīnəgīlat ne nelmīlat. Kən roiu ilat kəmotəmegəh min, kən motərəmərə ilat Kristo o nup wan-taosən.

⁵Nat əh, in naiir-pa-minən e nīmīsən itəm otaupən. Məto netəm min u neen min itəm kəmotīmīs rəkis, ilat kəmotos mak rəha nat megəh ilouin, kəməsotəmegəh minən mətoarus nup wan-taosən tol namnun.

⁶Netəm min un, itəm kəmaupən kos ilat e naiir-pa-minən e nīmīsən, ilat okotatiġ e nəwirən pahrien, məto-inu ilat netəm asim min rəha Uhgīn. Ilat okəsotuwīnən e noanəmnamin nīgəm asol, məto ilat okotuwa motol pris min rəha Uhgīn ne rəha Kristo, kən ilat okotərəmərə ilat min e nup wan-taosən.

Uhgin tæmol nalpinæn kæm Setan

⁷Nian nup wan-taosen tinol namnun, okahl-iaræp min Setan e nipæg asol.

⁸Kæn in otuwîn æpæh o netæmim e kona kuwit ræha nætueintæn, itæm katæn mæmæ Kok ne Makok, mæmæ oteiuæ-in ilat, kæn mos rafin ilat margætain ilat o næluaginæn. Ilat rafin otepæt otepæt, nampa ræhalat in tahmen e nimæklækil æpæh e nikali itæhæi.

⁹Ilat kæmotaliwæk motuwîn isæu isæu min motiræfin nætueintæn. Kæn ilat kæmotætul kitælau-in ikin netæmim ræha Uhgin okotatig ikin, ne taon asol u itæm Uhgin tolkeike pik. Mæto nigæm kit tæmisi-pær e nego e neai, muwa mus ilat.

¹⁰Kæn kæmæraikin-pæn Iærmis itæm tæmatos-ipæn os-ipæn kæm ilat, kæmæraikin-pæn æpæh e noanæmnamin nigæm asol itæm tatæpien. Ikin æh, kæmæraikin-pæn rækis nat megæh ne ien eiueiuæ. Ilæhal okætæhalæto nahmææn lilin e nærauiegæn ne lapin, namnun tikæ.

Namnun nakilæn

¹¹Kæn æmun ekæplan min jea asol kit, tæruæn. Kæn kig tatæpælæh-pær lan. Nætueintæn ne neai kæmuagim o nigæntæn, miakæ agin.

¹²Kæn æmun ekæplan netæm kæmotimis, netæm koatos nepætæn asol, ne netæm ænnapin æm. Ilat rafin kotætul aupæn e jea ræha kig u, kæn kameg naoa min. Kæn kameg min naoa kit, inu naoa ræha næmegæhæn. Okehm nakilæn ræha netæm kæmotimis e naoa min u, kæn kinatakil ilat kitæh kitæh o nat ilat kæmotol.

¹³Nærpi nitæhæi tæmæhlman netæm kæmotimis itæhæi, kæn Nimisæn ne Noanpæn kæmuæhlman min ilat, ilat kinotiet rækis elau, kæn kinatakil ilat kitæh kitæh o nat ilat kæmotol.

¹⁴Kæn kæmilæs Nimisæn ne Noanpæn, kærakin-pæn ilau e noanæmnamin nigæm asol. Noanæmnamin nigæm asol u, in nimisæn mau kæiu.

¹⁵Okəmə kəsehman nərǵi suah kit e naoa rəha nəmegəhən, kən okərakin-pən in e noanəmnamin niǵəm asol.

Nol Əpən 21

Jerusalem wi

¹Kən əmun eməplan neai wi ne nətueintən wi, mətə-inu neai oas ne nətueintən oas kiniakə. Kən nitəhəi təmikə min.

²Kən əmun ekəplan taon asim rəha Uhgīn, inun Jerusalem wi, tətisi-pər o Uhgīn e nego e neai mateiuaiu-pa. Kəmōl malə-malə lan tahmen e pətan itəm kəmōl malə-malə kəm in məmə otuwīn mehm rəhan iərman mioal marit.

³Kən əmun ekəto nəwian asol kit təmisi-pən əpəh e jea rəha kig matən məmə, “!Əplan-tu! Roiu əh, Uhgīn tinol latuənu rəhan ilat netəmim. In otətatiǵ ilat min, kən ilat okotuwa rəhan min netəmim. Kən Uhgīn ətuatip in otətatiǵ olat, kən in rəhalat Uhgīn.

⁴In otafəl rəkis rafin nahui nəmtilat. Nīmisen ne nasəkən ne nahmən min okotikə. Natimnat nuwəh min u, ilat kinotuwīn rəkis, okol kəsotuwa minən.”

⁵Kig itəm tatəpələh-pər e rəhan jea, təmə, “!atəuhlin natimnat min rafin kotuwa motuwīwi.” Kən məmə, “Əte rəkis natimnat min u, mətə-inu nəghatən min u, kitun nagileən elat məmə nipahrienən.”

⁶Kən matig mən-ipa min kəm io məmə, “Kinol namnun natimnat rafin. Io Nəukətin ne Namnun. Io nətuounən, kən io iatol namnun lan. Netəmim itəm koatoaoa, io ekos-ipən nəhau kəm ilat, itəm okotənim məsotos-nəmtinən. Kən inun, nəmti nəhau itəm tatər matos-ipən nəmegəhən lili.

⁷Etəmim itəm otətətul-iəkis mol win e nəluaginən rəhan, io ekos-ipən natimnat itəm emən-iəkis rəkis kəm in. Io ekuwa rəhan Uhgīn, kən in otuwa nətik.

⁸Mətə netəm koatəgin itəm, məsotətul əskasikən e rəhalat nahatətəən, ilat kotamkimik, kən moatohamnu itəm, koatit anion əm ilat min, moatol klefa, moatəmik nərik, motəfak kəm narmi nat min, ne ieiueiuə min rafin, iməlat

ətuatip un in noanəmnamin nigəm asol, tatəpien ikin. Nat u, in nampa tu nimisən.”

⁹Kən əmun, nagelo aupən u kit tatəghat kəm io. In nagelo sepin min u kit itəm kəmoatəmik pesin ilat sepin itəm kotərioah e namnu nalpinən ilat sepin itəm Uhgın otol kəm netəmim. In təmuwa mən-ipa kəm io məmə, “Wa-tu, pəs iakəgətun pətan rəha Nəti Sipsip kəm ik, itəm okioal marit ilau min.”

¹⁰Kən nəsanənən rəha Narmin Rəha Uhgın təmol kəm io, əmun nagelo tit-irəkis io ekian əpəh e nitot asol kit, nitot un, in ilis u ilis. Kən in təgətun kəm io Taon Asim rəha Uhgın u, Jerusalem wi, itəm təmisi-pər o Uhgın əpəh ilis e nego e neai.

¹¹In təhag-əhag e nepətən rəha Uhgın. Tatipit-ipit tahmen e kəpiel wir kit u tiaspa, itəm talien mə kilas.

¹²Rəhan fenis təfəməh mər ilis, mitəlau e taon, ket lan ilat tuelef. Nagelo min tuelef koatətul o ket min u. Kəməte-pən nərgi noanol rəha nenəti Isrel ilat tuelef e ket min u.

¹³Kən kəməte-pən nərgiləhal kisil e nikalin pah ikin, kisil min e nikalin pəhap ikin, kisil e nikalin pis ikin, kən kisil e nikalin par ikin.

¹⁴Nəukəti fenis e taon u kəmotətul-pər e kəpiel asol ilat tuelef. Kənu kəməte-rəkis-pən nərgi tuelef aposol rəha Nəti Sipsip e kəpiel min u.

¹⁵Nagelo itəm tatəghat kəm io, in tatos nat kit kəmol e iaen u kol tatipit-ipit, o nosən mak rəha taon əh, ne ket min ne fenis rəhan.

¹⁶Taon u, kona lan kuwit. Mak rəha nikalin min rafin kotahmen-ahmen əm. Taon əh kaifəməh, kən mak rəha nikalin min rafin ne nəfəməhən rəhan ilat rafin tu taosen tu-hanrit-tuente kilomita.

¹⁷Fenis u, tipik-ipik, mak rəhan tahmen e sikiste-faef mita. Nagelo əh, təmos mak lan e nolən rəha netəmim, itəm ilat koatos mak mihin e nat.

¹⁸Fenis u, kəmol e kəpiel wir u tiaspa, kən kəmol taon e iaen u kol tatipit-ipit, in əm in əm. Kən kol u in təwir, in talien mə kilas.

¹⁹Kəpiel min itəm kəmiləkin nəukəti fenis lan, kəmol malə-malə elat e kəpiel wir min. Kəmotəupən motəlin-pən kəpiel wir min u tiaspa, kən nampa tu lan, kəmotəlin-pən kəpiel wir min u safaiia, kən nampa tri lan, kəmotəlin-pən kəpiel wir min u akat, kən nampa fo lan, kəmotəlin-pən kəpiel wir min u emeral.

²⁰Nampa faif lan, kəmotəlin-pən kəpiel wir u onikis, kən nampa sikis lan, kəmotəlin-pən kəpiel wir u kanilian, kən nampa sepın lan, kəmotəlin-pən kəpiel wir u krisolait, kən nampa eit lan, kəmotəlin-pən kəpiel wir u malakait, nampa nain lan, kəmotəlin-pən kəpiel wir u topas. Kən nampa ten lan, kəmotəlin-pən kəpiel wir u kalsetoni, kən nampa lepın lan, kəmotəlin-pən kəpiel wir u takuoēs, kən nampa tuelef lan, kəmotəlin-pən kəpiel wir u ametis.

²¹Ket asol min u rəha fenis, kəmol e tuelef perel. Kəmol ket kitiəh kitieh e perelkitiəh kitiəh. Kən suatip min əpəh imə e taon u, kəmol e iaen u kol tatipit-ipit in əm in əm, talien wir, tahmen e kilas.

²²Ikin əh, eməsəplanən nimə kit okatəfak ikin kəm Uhgın, məto-inu Uhgın əm, itəm Nahgin Tepət Pık Agın, ne Nəti Sipsip, ilau nimə rəha nəfakən.

²³Kən ikin əh, nikitəm təsuwəhən mitgar ne məwig, məto-inu nepətən əhag-əhag rəha Uhgın in tətasiəgəpın rafın taon u, kənu Nəti Sipsip un, in lait rəhan.

²⁴Kən kantri min e nətueintən okotaliwək e nəhag-əhagən rəhan, kən iəməmə rəha nətueintən okotuwa, kən motos rəhalat nautə wir min, motuwa e nisialiən motələhəu e taon u.

²⁵Kisahtosig-inən rəhan ket min nian kit, məto-inu nian lapın tikə ikin əh.

²⁶Netəmim e kantri pisin pisin min e nətueintən, okotos nautə wir min rəhalat, ilat okotəmik motuwa o nisialiən, motələhəu e taon u.

²⁷Məto natimnat min itəm kotamkimik e niganəmti Uhgın, ne netəmim itəm koatol nat itəm tol naulisən, ne netəm koateiuə, netəm min u okol ilat kəsotuwınən imə e taon asol u. Netəm min əm un itəm kəməte-rəkis-pən

nərgilat e naoa rəha nəmegəhən itəm Nəti Sipsip tatos, ilat əm un kotitun nuwinən imə.

Nol Əpən 22

Nəhau megəh

¹Kən nian nagelo təməgətun rəkis taon wi kəm io, kən təməgətun min nəhau megəh kəm io itəm tətaiu. In talien talien tahmen e kilas. Tatisi-pən əpəh e jea rəha Uhgın ne Nəti Sipsip,

²maiu matuwın matiləs nəlugi suatıp asol rəha taon u. Niğ rəha nəmegəhən tatətul u e nıkal-kalı nəhau u, in tatoe mau tuelef e nup min rafın, e məwig min rafın. Kən netəmim e kantri min rafın koatol nımalın o nol-wırən nımısən.

³Nat tikə agın ikin əh itəm təike mos nalpınən rəha Uhgın. Kən jea rəha Uhgın ne Nəti Sipsip in əh-ikin əh, katuərəmərə ikin. Kən rəhan iolwək min okotəfak kəm in.

⁴Ilat okotəplan nıganəmtin, kən okəte-pən nərgın e nıpınəgilat.

⁵Nian lapın otikə. Nıkilat otəsəhtən lait kit o nasiepənən lan, kən nıkilat otəsəhtən min nəhag-əhagən rəha mitgar, məto-inu İərəmərə Uhgın in lait rəhalat. Ilat okotərəmərə lılın, namnun tikə.

⁶Kən nagelo tən-ıpa kəm io məmə, “Nəghatən min u inu, kıtun nagileən elat məmə nıpahrienən. İərəmərə Uhgın təmən-ıpən kəm rəhan ien min aıpən natımnat min itəm okəpanotuwa, kən in təmahl-ıpən rəhan nagelo məmə otəgətun kəm rəhan iolwək min natımnat min itəm otəsuwəhən təike muwa.”

⁷Kən əmun, İesu tən-ıpa kəm io məmə, “!Otətəlig-tu! !Otəsuwəhən ekiet-arəpınə! Netəm min u itəm kəmotaskəlım nəghatən itəm Uhgın təmən-ıarəp aıpən e naoa u, ilat okotatıg e nəwırən pahrien.”

⁸İo Jon, io u eməto kən məplan natımnat min u. Kən nian eməto kən məplan rəkis ilat, kən emısın nulık e nelki nagelo itəm təmit io muwın məgətun ilat kəm io. Kən emeiuiui, nıpınəgək taru nısip, məmə ekəfak kəm in.

⁹Məto in tən-ipa kəm io məmə, “!Əsəfakən kəm io! Kilau min ik u iolwək mil əm rəha Uhgın, kitat piam min u ien min, ne netəm min u itəm kotaskəlīm nəghatən min e naoa u. !Əfak əm kəm Uhgın!”

¹⁰Kən in təmən-ipa kəm io məmə, “Suwaan ətainən nat kit e naoa u məmə otaskəlīm tiəkis, məto-inu natimnat min u, otəsuwəhən, kotiet-arəpa.

¹¹Netəm koatol nəratən, pəs ilat kotəkəike moatol nəratən. Netəm rəhalat nətəligən tamkimik, pəs ilat kotəkəike e nətəligən tamkimik rəhalat. Məto netəm wir, pəs ilat kotəkəike e nolən ətuatip. Kən pəs netəm asim rəha Uhgın, okotətuatip nian rafin, motəkəike e nasimən rəhalat.”

¹²Kən Iesu tatig mən min kəm io, “!Əplan-tu! !Otəsuwəhən ekimnə! Kən iatos rəhak nətouən wir kən ekos-ipən kəm netəmim rafin u, tətəu-pən natimnat min itəm ilat kəmotol.

¹³Io Nəukətın ne Namnun. Io emaupən matig, kən io oekol namnun agın. Io nətuounən, kən io iatol namnun lan.

¹⁴Netəm itəm kotaikuas e rəhalat napən tərüən, ilat okotatig e nəwırən pahrien, məmə inu, okegəhan-in nepətən kəm ilat məmə kotun noa nig rəha nəmegəhən, kən motuwın-pən e ket min rəha taon u.

¹⁵Məto netəmim neen min əh-ikin itəm okol kəsotuwamən imə. Ilat u, netəm kotamkimik, ne netəm min un itəm koatol klefa ne moatəmik nərik, ne koatit anion ilat min, ne moatohamnu itəm, moatəfak kəm narmi nat min, ne netəm rafin itəm kotalkeike neiueiuəən.

¹⁶“Io Iesu, emahl-ipinə rəhak nagelo məmə otən-iarəpinə natimnat min u kəm niməfak min. Io u, Nəukəti Tefit, məto Noanol min rəhan. Io ekahmen e məhau u fetukai itəm tətasiə wir.”

¹⁷Narmin Rəha Uhgın ilau Pətan rəha Nəti Sipsip katuən mə, “!Wa!” Kən pəs netəm min u kotəto, ilat min kotən mə “!Wa!” Etəmim pah itəm tatoaoa, pəs in tuwa. Kən etəmim pah itəm in tolkeike, pəs in otənım nəhau megəh kisos-nəmtinən.

¹⁸Io Jon, iatəghat əskasik matən-ipən kəm netəmim itəm kəmotəto nəghatən rəha Uhgın itəm tətətig e naoa u. Okəmə etəmim kit tətə-pən atip nəghatən kit rəhan e naoa u, Uhgın otos-ipən nalpınən mın u naoa u tatəghat-in kən mılpin-pən e nalpınən rəha etəmim u.

¹⁹Okəmə etəmim kit tos-irəkis nəghatən neen e naoa u, Uhgın otos-irəkis nəwırən mın itəm naoa u in tatəghat-in məmə rəha suah u. Inun, noa nig rəha nəmegəhən, kən məsegəhan-inən məmə otatig e taon asim əh.

²⁰Etəmim itəm tatən-iarəp natımnat mın u, təmə, “Əwəh, otəsuwəhən ekimnə.” !Əwəh! Wa-ta İərəmərə İesu.

²¹Pəs Uhgın tawte-in nəwırən rəha İərəmərə İesu tuwın kəm netəmim rəhan. Pəs otol nəhlan. Əwəh.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2023, Vitória/ES - Brasil